

Alkitab Bahasa Mentawai

Bahasa Sehari-hari 1996

Perjanjian Baru

Matius

1 ¹ Iaté néné surat paninikat tubut Jesus Kristus, punuteteu Dapid, samba punuteteu Abraham. Barania kai Abraham, pat aili kai Dapid, oninda taikebbukat Jesus iaté

² Si Abraham, si Isak, si Jakob, si Juda sambat sasarainania, si Peres sambat si Sera (inanda sipuoni si Tamar), si Hesron, si Aram, si Aminadab, si Nahason, si Salmon, si Boas (inania, sipuoni si Rahab), si Obet (inania, sipuoni si Rut), si Isai, samba Rimata Dapid

³ (1:2)

⁴ (1:2)

⁵ (1:2)

⁶ Barania kai Dapid ka tetret arajau-jauaké sia ka laggai Babel, oninda iaté: si Salomo (inania iaté sipulumang'aké si Uria), si Rehabeam, si Abia, si Asa, si Josapat, si Joram, si Usia, si Jotam, si Akas, si Hiskia, si Manase, si Amon, si Josia, si Jekonia sambat sasarainania

⁷ (1:6)

⁸ (1:6)

⁹ (1:6)

¹⁰ (1:6)

¹¹ (1:6)

¹² Barania arajau-jauaké bangsa Israel ka Laggai Babel teret putútukat matat Jesus, oninda iaté néné: si Jekonia, si Salatiel, si Serubabel si Abihud, si Eliakim, si Asor, si Sadok, si Akim, si Eliud, si Eliasar, si Mattan, si Jakob, si Josep simanteu Maria, Samba si Maria néné te, amasitútúaké matat Jesus, sipuoni Kristus

¹³ (1:12)

¹⁴ (1:12)

¹⁵ (1:12)

¹⁶ (1:12)

¹⁷ Oto barania kai Abraham pat aili kai Dapid, pulu epat ngareddenan leú et. Iageti barania kai Dapid pat aili ka tetret arajau-jauaké bangsa Israel ka laggai Babel, pulu epat ngareddenan leú sia. Ialeú et barania arajau-jauaké bangsa Israel ka laggai Babel pat aili putútukat matat Kristus, pulu epat ngareddenan leú et sia

¹⁸ Pagalaiat putútukat matat Jesus Kristus geti, kisé lé: Si Maria inania, ai

peilé nia mututunangan kai Josep, elé tápei amukebbukat sia, amusuruket'an nia si Maria néné. Tápoi ka sia si Josep, tá iagai kababarania ka Ketsat Sipunenan suruket Maria néné

¹⁹ Si Josep tunangan Maria néné, simasurú ka arat lé nia. Kalulut néné, isiakénangan itakkíaké pututunanganda si Maria. Tápoi sipinakele lé igagalai si Josep, isurú buí imaila si Maria ka tubudda siberikabaga

²⁰ Ai peilé ipaaatu si Josep kipa igagalai, pangamutnangan. Ka pangamutetnia, aiitsó sara Malaikat Tuhan, sipasikukua ka matania kisé, "Josep, punuteteu Dapid, buí numalotó nualá si Maria sikalalepnu; aipoí sibara ka Ketsat Sipunenan lé suruketnia

²¹ Itutútúaké te si Maria sara toga simanteu. Kaunungan oninia Jesus; ipaaarau poí bangsania, rabela ka ukuman jodda.

²² Aibara kelé néné geti, bulé ipuaili lé kelé ka sikuat Tuhan ka siniboira tai nabinia kisé

²³ "Mususuruket te sara siokkó, tú-túakénangan matat sara toga simanteu. Kaunangan oninia Immanuel."

(Immanuel, iaté nga-ngan Ibrani, katukolobatnia, iaté, "Ai Taikamanua ka talagatta".

²⁴Oto kelé aitusuru si Josep, galaiakénangan kelé sikuat malaikat Tuhan ka matania. Alánangan leú si Maria sikalalepnia

²⁵Tápoi burúna aipusuruket si Maria, taipaagai lé sia simanteunia si Josep. Kelé aiputútú matat toga, kaunangan oninia Jesus.

2¹Kudduat putútukat matat Jesus, iaté ka Betlehem ka propinsi Judea, ka tetret aimuririmata si Herodes. Ka tetret nenda leú et, oi sia piga pá ka Jerusalem sibabara ka kabelaiat sulu, iaté siagai masipatup-tup toggaiat sibara ka panyanyat

²Kaipa sia ei masinou-nou, kuaddangan, "Kaipa nia nenda toga, sipututútú mata, sibailiu rimatadda tai Jahudi? Akuitsó poí kai aibela panyanyatnia ka isit kabelaiat sulu. Iaté lulunia akuoi kai murappo ka matania.

³Bulat atugégéan nia simakopé Rimata Herodes, aiarep sikuadda néné. Beri leú sia tai Jerusalem, atugégé leú et sia ka sia

⁴Iageti kuanangan ka matadda sangamberidda tai Imam sabeu samba tai guru paamianda tai Jahudi bulé raei parurú. Oto nou-nounangan sia, kuanangan ka matadda, "Kaipa siagaimui ka kam ipututútú matat Rimata siripot sitonéakenen Taikamanua?

⁵Alegiddangan nia, pelé nga-nganda, "Ka laggai Betlehem ka Judea. Kelé sinurat'akenen sara nabi, sipasikukua kisé

⁶'Ekeu Betlehem, ka propinsi Judea, bulat tá te tuooniaké ekeu sara laggai sigoisó ka talagat palagga-laggai sabeu ka Judea. Kekeu lé poí ibabara sara rimata sipanei-nei bangsaku Israel.'

⁷Kelé aiarep katukolobat sikuadda néné si Herodes, sogainangan leú sia sibabara ka kabelaiat sulu siagai masipatup-tup toggaiat sibara ka panyanyat, sipinakele. Isénangan leú sia pigamoi aimatoilá panyanyat nenda

⁸Iageti koiniakénangan sia raei ka Betlehem, patonénangan sia pelé nga-ngania, "Kenan'an kam, kau ipulelek lé nugaba kam nia sikolik. Oto ké anusesengan geti kam nia, oi kam

nusegéaké kam nia ka matakku, bulé kúei kaku murappo ka matania.

⁹Lepá eirangan leú et. Iageti pusumbulatnangan leú mitsá panyanyat siitsóra siboikí ka kabelaiat sulu. Bulat simakopé angkat bagadda masiitsó ipusumbulat mitsá panyanyat nenda. Tutrangan panyanyat, tottorot segé bulat ka ipot lalep kudduat sikolik, ari-aipuari ka sia panyanyat

¹⁰(2:9)

¹¹Iageti gurú sia ka bagat lalep, itsóranan sikolik sambat inania si Maria, purappoddangan ka matat toga nenda, lepá gau-gaurangan kudduat bibiletta, kaurangan leú panguruatda ka tubunia, iaté, mas, kumanyan, samba mir

¹²Iageti patonénangan leú sia Taikamanua ka bagat pangamutet, bulé buí rasok-sok nia mitsá ka tubut Herodes. Bailiu ka enungan bageian lé arapuenung, ratoili ka laggaira

¹³Oto kuruk tei-teira sia siagai masipatup-tup toggaiat ka panyanyat, patoilánangan tubunia malaikat Tuhan ka tubut Josep ka pangamutetnia. Sipasikukua ka matania kísé, "Ai te iisiaké si Herodes igaba sikolik, bulé

imateiaké nia. Suruaké ekeu, abbit nia sikolik karuadda inania, kenan kam mujau-jau ka laggai Misir. Iageti kuddu kam sedda, teret kuakku nia mitsá ka matamui.

¹⁴ Iageti tusurunangan leú et si Josep; soibó nia nenda leú et, abbitnangan sikolik ruadda inania, raei mujau-jau ka laggai Misir

¹⁵ Oto kuddu sia sedda teret langóna si Herodes. Bulé ipuaili kelé ka sikuat Tuhan, sisegéakenenda tai nabinia, sipasikukua kisé, "Kusosogai Togakku ka laggai Misir.

¹⁶ Kelé aiagai nia si Herodes patatajudda nia sia siagai masipatup-tup toggaiat sibara ka panyanyat, iaté sia sibabara ka kabelaiat sulu, pugolúnangan leú et simakopé. Iageti koiniakénangan sia raei masipamatei sangamberi tatoga simanteu, ka laggai Betlehem sambat ka laggai simalegre sedda, barana ka sirua ngarura, pat aili ka sigoisó. Siripot ujut aiiséaké nia si Herodes ka tubudda siagai masipatup-tup toggaiat sibara ka panyanyat, pagalaiat gogoi araitsó aimatoilá panyanyat nenda

¹⁷ Bulé ipuaili kelé ka siniboi Nabi Jeremias, sipasikukua kisé

¹⁸ "Maarep ka Rama rapului-lui, rapureu-reu бага samba rapugeri. Isoibi si Rahel tatogania, pat táan iagai pusuibi bagania, beringan poí sia sara sipulelegei.

¹⁹ Kelé ailangó nia si Herodes, patoilánangan mitsá tubunia malaikat Tuhan kai Josep ka Misir, ka pangamutet

²⁰ Kuanangan ka matania malaika, "Suruaké ekeu, abbit sikolik karuadda inania, nutoili kam mitsá ka Israel. Ailangóan poí nia sipasiisiaké masimateiaké sikolik.

²¹ Iageti suru nia si Josep, abbitnangan leú et sikolik karuadda inania si Maria, toili sia ka Israel

²² Tápoi kelé aiarep nia si Josep, si Arkelaus togat Herodes'an lé amurimata ka propinsi Judea sailit ukkuinia si Herodes, bara lotónia mei sedda. Tápoi kelé aoi mitsá patonekat Tuhan ka pangamutetnia, bailiu ka Galileangan lé araei

²³ Kuddu nia ka sara laggai sipuoni Natsaret. Bulé ipuaili kelé ka sipoiliatda

tai nabi, pagalaiat tubunia sikolik néné,
"Ituoniaké nia tai Natsaret."

3¹ Ka tetret nenda, oi si Johannes
Sipasiraraú ka simatangeu ka Judea
mungantoman

² Kuanangan kisé, "Bauaké kam
paatuatmui, amalegrengan poí
Purimataat Taikamanua!

³ Si Johannes néné te, sikuat Nabi
Jesayas ka ngantomannia, sipasikukua
kisé, "Maarep nga-nga sipusosoga
ka simatangeu, sipasikukua, 'Patarek
kam enungan Tuhan; pagaktuk kam
enungannia.'

⁴ Bulut onta lé leppeinia si Johannes.
Akkik tengania kulit, kannia sin samba
suat mani

⁵ Maigi sia siooi sibabara ka Jerusalem,
samba sibabara ka propinsi Judea, samba
leú sia sibabara ka sanganantat riringan
bet-bet Oinan Jordan, masiailiaké si
Johannes

⁶ Seseakérangan jo sigalaira, iageti
raúnangan sia si Johannes ka Oinan
Jordan

⁷ Ka sia tai Parise samba tai Saduki leú,
maigi sia amei masiailiaké si Johannes,
maniddou bulé iraú sia ka sia. Tápoi

kelé aiitsó sia si Johannes, kuanangan
ka matadda, "Ale kam sirimanua sikataí
paraboat! Kasei amasikua ka matamui,
kaooinia nukatsliaké kam tubumui ké
iaili tetrenia ibara ukuman Taikamanua

⁸Patoilá kam ka paraboatmui,
katubabaunia paatuatmui

⁹Buí nukua kam ka paatuatmui,
momoi nubelaaké kam tubumui ka
ukuman Taikamanua, nukaróaké kam
putataikebbukatmuinia si Abraham. Bulé
nuagai kam nia; ka sia Taikamanua,
momoi ibaraaké sapunuteteu Abraham
sibara ka bukkú néné

¹⁰Amatarek'an te baliok ka pailakkik
loiná, masitadde pat alá ungatnia.
Aipoí senen loiná sitaibuaaké simaerú,
tutatadde lé, itugik-gik'aké nia ka api

¹¹Aku kaku oinan lé kuraraúaké ka
tubumui, kelé sara toggaiat babauakémui
paatuatmui; tápoi nia geti ka sia siooi
kuruk tei-teiku, Ketsat Sipunenan samba
api lé iraraúaké ka tubumui. Nia peilé
poí abeu tiboí tubu ka tubukku. Beri
masiabbít tarangaínia, tá mateú aku

¹²Ka kabeinia ai sasat-sat, masisósó
sangamberinia gandum pat liná. Iageti
gandum sibara бага, irurúaké ka

gudang, tápoi sipaga geti, irurúaké, bulé itulabóaké ka api sitaiepé.

¹³ Ka tetret nenda, amei leú et nia ka sia Jesus barania ka Galilea, iailiaké Oinan Jordan, masitaget'aké si Johannes, itiddou, bulé iraú nia ka sia

¹⁴ Tápoi aikeraaké lé nia si Johannes, kuanangan ka matat Jesus, "Ekeu lé siripokatnia iraraú aku, Ukkui, tá aku iraraú ekeu.

¹⁵ Tápoi kuana lé ka matat Johannes, Jesus, "Eddangan nia nugalaiaké nia boikí kineneiget, kisedda lé poí mateú ka sita, tagalaiaké siobat bagat Taikamanua." Iageti raúnangan nia si Johannes

¹⁶ Lepána lé aituraú Jesus, olaakénangan itusakai ka leleu. Iageti tulut buká-aitubuká manua, itsónangan itugorosot Ketsat Sipunenan, kelé mutubu marpati, tuleu ka tubunia

¹⁷ Iageti maarepnangan nga-ngan Taikamanua, sipasikukua, "Nia té néné Togakku, kilibet bagakku, samba siobat bagakku."

4 ¹ Lepá abbitnangan leú Jesus Ketsat Sipunenan, ka simatangeu, isibo nia Sanitu

² Epat ngapulu ngagogoi epat ngapulu ngasoibó burúnia sedda Jesus, taipukokom. Iageti malajenangan leú et

³ Oinangan leú Sanitu ka tubunia kuanangan ka matania, "Ké Togat Taikamanua baí nia ekeu, tá isoppi ioi nukua ka bukkú néné, ibailiu nia roti.

⁴ Tápoi alegina lé nia Jesus, ikua ka matat Sanitu, "Atusurat'akéan ka Buko Sipunenan sipasikukua kisé: Tá sarat roti iririmanuaaké sirimanua, tápoi beri leú et tiboiet Taikamanua sibebela ka ngu-ngunia, iririmanuaaké leú sirimanua.

⁵ Lepá abbitnangan nia mitsá Sanitu, Jesus, ka Jerusalem, ka laggai Sipunenan. Rióakénangan nia ka tei-tei Uman Taikamanua

⁶ Kuanangan ka matania Sanitu, "Ké Togat Taikamanua baí nia ekeu, tá isoppi ioi nuribbaiaké tubum ka polak, atusurat'akéan poí ka Buko Sipunenan sipasikukua kisé: 'Ikokoiniaké te Taikamanua samalaikania masijago ekeu, rabeilá ekeu, buí itusok-sok rerem ka bukkú.'

⁷ Kuanangan ka matania Jesus, "Ka bagat Buko Sipunenan leú ai atusurat'aké kisé, 'Buí nusibo si Tuhan Taikamanuam.'

⁸ Iageti abbitnangan nia mitsá Sanitu ka uddut leleu simakopé buak. Patoilánangan ka matania sangamberi purimataat polak, samba sangamberi pukayoatnia

⁹ Kuanangan ka matat Jesus, Sanitu, "Kuaaké sangamberinia néné kekeu, ké murappo ekeu masipaniddogi aku.

¹⁰ Tápoi kuanangan ka matania Jesus, "Kenan ka tui-tui Sanitu! Aipoí sarat si Tuhan lé paniddogietnu, samba sarania lé reddenennu!

¹¹ Iageti tui nia Sanitu, ikaddiuaké Jesus. Lepá oirangan leú et samalaika rapuukú nia

¹² Kelé aiarep nia Jesus gugurúakéra si Johannes ka bagat penjara, tui nia iei ka Galilea iareuaké tubunia

¹³ Tui-tui nia iei ka Natsaret, kuddu nia ka Kapernaum ka bet-bet Paot Galilea, ka laggaira tai Sebulon samba tai Naptali

¹⁴ Aigalaiaké kelé néné Jesus, bulé ipuaili ka siniboi Nabi Jesayas sipasikukua kisé

¹⁵ "Polakra tai Sebulon samba polakra tai Naptali, ka enungan sieei ka paó, ka silat Oinan Jordan, iaté ka Galilea, polakra sipuarat sabulungan

¹⁶ Bangsa sipukukuddu ka pugepgeman araitsóan pató simatoro! Sia sikukuddu ka tei ailiggou kamateiat abelangan ka sia toro!

¹⁷ Ka tetret nenda te aitaddaaké nia Jesus mungantoman, pelé ngangania, "Bauaké kam paatuatmui, aipoí amalegrengan iaili tetrenia ioi Purimataat Taikamanua!

¹⁸ Ai nia mueenung Jesus ka bet-bet Paot Galilea, itsónangan rua sia sipasiiba, iaté si Simon (sipuoni si Petrus), ruadda baginia si Andareas. Ai sia mujajalo masigaba iba ka paó

¹⁹ Kuanangan ka matadda Jesus, "Konan kam, tut kam Aku. Bulé kugelaiaké kam masijalo sirimanua.

²⁰ Iageti kaddiuakérangan jalodda, ei sia masitut Jesus

²¹ Aiririu-riuaké ipuenung Jesus, itsónangan leú mitsá tairua sabagei, iaté si Jakobus sambat si Johannes, tatogat Sebedeus, ai sia ka bagat abak, masisusubbai jalodda, kateludda ukkuira

si Sebedeus. Iageti sogainangan sia ka
sia Jesus

²² Oto kaddiuakérangan abak sambat
ukkuira, ei sia ratut Jesus

²³ Iageti gejenginnan sangaliot
laggai Galilea, Jesus, bulé iei
mungantoman ka senen uma parurukat,
masisegéaké Katuareman Simaerú,
masipakolou puririmata nia Taikamanua.
Aleakénangan leú sia simabesí samba
sikataí tubu kalulut oringen sikataí
siorikra

²⁴ Iageti maarepnangan kerek Jesus
ka sangaliot laggai Siria; bulat makopé
igidda sieei masiailiaké nia. Abbitrangan
leú sia sipangongorik sene ngamata besí
samba simareu-reu бага, sipinasaileura
sanitu, siroró, samba simasakit, ka
matat Jesus, iageti aleakénangan sia
sangamberidda

²⁵ Oto ka tetret nenda, bulat maigi sia
sipasitutut Jesus. Ai sibabara ka Galilea,
sibabara ka Dekapolis, sibabara ka
Jerusalem, sibabara ka Judea, samba sia
siooi sibabara ka silat Jordan.

5 ¹ Kelé aiitsó sirimanua simigi Jesus,
panatranangan leú et ka leleu.

Lelekna lé aipuuddet, oirangan leú et sipasiuluinia muuddet ka bébénia

²Iageti taddaakénangan nia Jesus ipangantoman sia, pelé nga-ngania

³"Mauktuk te sia sitaimaró бага ka tubuna, sarat Taikamanua lé rakakaroni бага lepá; aipoí sia te oniakenen sikauman Taikamanua

⁴Mauktuk te sia sipurereureu бага; ipususubi poí sia Taikamanua

⁵Mauktuk te sia simarepé paatuat; ikakau poí ka sia Taikamanua, apa sitonéakenennia ka tubudda

⁶Mauktuk te sia simarepdem бага masigalaiaké siobat बात Taikamanua; ikakau poí ka sia Taikamanua, apa kiddiyet bagadda

⁷Mauktuk te sia simakaté бага ka tubudda sirimanua sabagei; ipukakateki leú poí sia бага ka sia Taikamanua

⁸Mauktuk te sia simaliná paatuat; raaagai poí Taikamanua

⁹Mauktuk te sia sipaaban'aké sirimanua; iooniaké poí sia Taikamanua bakkat Togania

¹⁰Mauktuk te sia sipasioorik paoreat kalulut pasigalaiakéra siobat बात

Taikamanua; aipoí sia néné te oniakenen
Sikauman Taikamanua

¹¹ Mauktuk te kam ké raasá, rapaorei,
elé rapaloloi kam kalulut aku

¹² Beri sia tai nabi sipuboboikí ka kam
leú poí, kelé kisedda leú te arapaoreji
sia. Oto kau imaangká samba imagora
bagamui, bulat abeu poí upa siloketmui
sinarek'akenen Taikamanua akenenia ka
tubumui.

¹³ "Garapda taikapolak te kam. Oto ké
maleu baí garap, apangan lé tukakau
pasikalónia mitsá? Táan anai kauta
nia, ribbaiakenen'an lé, rapaperaki nia
sirimanua

¹⁴ Sipatóaké taikapolak te kam. Tá
momoi tá imatoilá laggai sikukuddu ka
uddut leleu

¹⁵ Beri poí sia sara sirimanua, lepá
aratunam alito, tabbórgan nia
bulukbuk. Tápoi ka katusaggaat
alito lé rakakau nia, bulé itoroi sia
sangamberidda sikukuddu ka bagat lalep

¹⁶ Oto buítá kisedda leú te iputoro
patómui ka kam, ka matadda sirimanua,
bulé raigbuk sigalaiakenenmui simaerú,
raumun'aké Ukkuimui sikuddu ka
manua.

¹⁷ "Buí ikua ka bagamui, kaooiku néné, iaté masitatóaké surukat Mose samba nganturatda tai nabi. Tá masitatóaké akuoi, tápoi masikolouaké lé, bulé imakolou ka bagamui apa bulat bagat surukat

¹⁸ Bulé nuagai kam nia, Beri sara takat elé gurit bulat sigoisó nia ka surukat tá tutatatóaké, ké ai peilé manua sambat polak, teret ipuaili sangamberi siniboinia

¹⁹ Oto kalulut néné, kasei sipasabau surukat beri sigoisó nia, lepá gelaiakénangan nia ka sabagei, bulé ragalaiaké nia ka sia kelé kisedda leú et, sia té oniakenen sigoisó ka talagat paamian Taikamanua. Kisedda leú et, kasei sireddet surukat, samba sipasigegelaiaké nia ka sabagei, bulé ragalaiaké nia ka sia kelé kisedda leú et, sia té oniakenen siabeu ka talagat paamian Taikamanua

²⁰ Ialeú et, ké tá isaliu putotopitmui masigalaiaké sangamberi siobat bagat Taikamanua, belé peilé tai Parise samba tai guru paamianda tai Jahudi, bulat buji bagamui ituoniaké kam sapaamian Taikamanua!

²¹ "Kelé siagaimui singantruakenenda taikebbukatta, arakua kísé: Buí nupamatei; kasei sipamamatei, buítá tuukum'aké

²² Tápoi kineneiget geti aku masikua ka matamui, kasei masipugoluki sirimanua sabagei, buítá tutaroaké nia ka matadda tai Mahkama Puaranan. Ialeú et, kasei sipasikukua ka sirimanua sabagei, 'bulat tá nuagai arat,' mateúan turibbaiaké nia ka api narako

²³ Oto kalulut néné, ké ai baí ka talagamui sieei masitaroaké panguruatnia ka matat Taikamanua, tápoi ai nia memei, repdemnangan ai sia simaasá бага ka tubunia

²⁴ buítá igalak'aké boikí panguruatnia ka uddut langgatan,iei masitiddou paaban ka tubut simaasá бага ka tubunia. Alepáan geti arapaaban, iapeité iei masitaroaké panguruatnia ka Taikamanua

²⁵ Ké ai sigelai masinganduaké kam ka tubudda tai mahkama, ai peilé nia memei masiailiaké tai mahkama, olaakénungan kekeu mei nuailiaké nia ka enungan, nutiddou nupaaban kam, bulé buían iriu-riuaké iei pangandu ka tubut hakim.

Aipoí, ké tá kisedda baí nugalai kam, puriu-riunangan leú raei masinganduaké kam ka hakim; oto taroakérangan leú et kam ka tai polisi. Iageti tai polisingan mitsá gurúaké kam ka bagat penjara

²⁶ Iaté né repdemenmui, Bulat táan te rabebeleaké kam ka bagat penjara, teret kapplu nia nutebui kam utakmui.

²⁷ "Kelé siagaimui leú, ai nganturat sipasikukua, kisé: Buí nupaelet

²⁸ Kineneiget geti, aku masukua ka matamui, kasei lé masiritúaké sara tainanalep, kalulut tutut bagania ka tubut sinanalep néné, apaelet'án nia ka paatuatnia

²⁹ Oto ké matam sikattoet baí masitubbui ekeu mugalai jo, kiok, giggik'akénungan nia! Maerú peilé tá bara sara laddou tubum. Aipoí sara pei te kopet kataí nia, ké ka sangamuinet tubum turibbaiaké ka api narako

³⁰ Ké kabeinu sikattoet baí itubbui ekeu mugalai jo, tippú, giggik'akénungan nia! Aipoí maerú peilé sitá silá kabei ekeu. Makopéan lé kataí nia ké ka sangamuinet tubum tugurúaké ka api narako.

³¹ "Ai leú te nganturat sipasikukua kisé: Kasei sigalak sinanalepnia, kau ikau

surat pagalangan ka tubut sinanalep sigalaknia

³²Tápoi kineneiget geti, aku masikua ka matamui: Kasei sigalak sinanalepnia, ké tá baí kalulut paelenan, nia lé aipaelet'aké sinanalepnia, ké mutalimou nia ka taimanteu bagei. Kisedda leú et, sipalalep'aké sinanalep sigalak néné leú, sipaelet leú te nia ka sia ituooniaké.

³³"Kelé siagaimui, taikebbukatta arangantruaké kisé: Buítá nugalaiaké palelengannu sikuam. Oto buítá nugalaiaké palelengannu sisuppaakenennu ka matat Taikamanua

³⁴Tápoi kineneiget geti, aku masikua ka matamui: bulat buí nupusuppa kam; élé ka tubut manua; uddenan Taikamanua lé poí

³⁵elé ka tubut polak; aipoí bongan reret Taikamanua leú et; élé mitsá ka tubut laggai Jerusalem; aipoí sedda lé poí kudduat Rimata sabeu

³⁶Ialeú et buí nupusuppa kam ka tubut uténu; aipoí beri sangantaili alai ka utémui, tá momoi nubulauaké élé nupusúaké kam nia

³⁷Ké nukua 'Oo', kau bulat sibulatnia, oo; ké nukua 'Tá', kau bulat sibulatnia,

tá; nupabara lé, páan te, ka sanitungan lé te nenda aibara.

³⁸"Ai leú te mitsá nganturat sipasikukua kisé: mata, tulumun'aké ka mata; sot, tulumun'aké ka sot

³⁹Tápoi kineneiget geti, aku masikua ka matamui: buí nulumun'aké kam sia sigalai jo ka tubumui. Tápoi galaiakenen geti ka tubudda, iaté: ké ratipak bailatnu sikattoet, bá leú kekera itipak bailatnu sikatsiu

⁴⁰Ké ranganduaké kam ka sipasiukum, kalulut bebesiakéra leppeimui, bá kekera kam; kau leú kam mitsá sambat leppeimui sabeu

⁴¹Ké rapaksa kam sauté nuabbit kam bibiletta sanga kilometer reunannia, abbitmuian nia, pat aili rua ngakilometer

⁴²Kau kam ka sia siooi maniddou apa pá ka tubumui. Buí nupisik'aké kam sia, siooi masibale apa pá ka tubumui.

⁴³"Kisedda leú kelé siagaimui, ai bagei nganturat sipasikukua kisé: kau imakaté bagamui ka tubudda saaleimui. Tápoi ka tubudda geti saggakmui, kau imalagá bagamui

⁴⁴Tápoi kineneiget geti, aku masikua ka matamui: kau imakaté bagamui ka tai

saggakmui. Tiddouaké kam sia sipaorei kam ka tubut Ukkui Taikamanua

⁴⁵ bulé ituoniaké kam tatogat Ukkuimui sikuddu ka manua. Aipoí makeré lé ibelaaké sulunia Taikamanua, ka tubudda sirimanua simaerú paraboat samba ka tubudda sikataí paraboat. Urat leú, iaaké ka sirimanua simaroipo бага samba ka sirimanua sijo

⁴⁶ Ké sarat sia simakaté бага ka tubumui lé baí nupukateki kam бага, oto apangan lé lulunia iaaké sili Taikamanua ka tubumui, kelé silit erut sigalaimui? Tá pá kisedda leú et ragagalaiaké ka sia sipuukú pajá

⁴⁷ Ké sarat saaleimui lé nuparororoaké kam, apangan lé umun'akenen kalulut saliu sigalaiakenenmui simaerú ka kam? Beri ka sia sipuarat sabulungan leú, kisedda leú et ragagalaiaké

⁴⁸ Bulat masun nuntut bagat Taikamanua ka tubudda sirimanua. Oto buitá kisedda leú te ka kam nugagalaiaké kam."

6¹ "Jago kam, buí nupatoilá kam ukut bagamui muarat, ka matadda siberikabaga, bulé ibara igbungenda sirimanua. Ké kisedda baí nugalai kam,

taiakénangan upamui Ukkuimui ka manua

²Ialeú et ké nukau kam panguruatmui ka simagebá, bá paaarep kam nia ka sabagei, kelé simarei-rei ragalaiaké sipatataju. Ka uma parurukat samba ka enungan sabeu lé ragagalaiaké nia, bulé raumun sia sirimanua. Bulat kukua nia ka matamui, páan, arasilóan upadda

³Tápoi kam geti ka kam, ké nukau kam panguruatmui, kau sipinakele; pat beri sia sara siagai nia

⁴Eddangan tá raagai nia kasei pá sigalaiakenenmui, sarat Ukkuimui sikuddu ka manua lé iagai nia, lepá. Aipoí, ai lé iitsó sigalaiakenenmui sipinalipput nenda, samba upamui leú, iaaké.

⁵"Ké maniddou kam, buí nuului kam kelé sigalaiakenenda sipatataju. Ka sia poí bulat raobá maniddou sipuririó ka uma parurukat, samba ka parubaiat enungan, bulé raigbuk sia sirimanua. Bulat kukua nia ka matamui, niangan té nenda upadda, lepá

⁶Tápoi ké maniddou kam ka kam, gurúaké lé kam ka bagat bilí; lekkre matatbaliu, paniddoumuian ka tubut

Ukkuimui sikuddu ka simalipput.
Iaaké poí upamui Ukkuimui siitsó
sigalaiakenenmui sipinalipput

⁷Ké maniddou kam, kila maole
kuanenmui, kelé sipuarat sabulungan.
Ka bagadda poí ka sia, kalulut nantat
paniddogat lé, iaarepi sia Taikamanua

⁸Oto bulat buí nuului kam sia. Ai lé
poí iaagai Ukkuimui, simagulai ka kam.
Ainangan tá nutitiddou kam, aiagaian
kiddiyetmui

⁹Oto ké maniddou kam, kisé lé
nukukua kam, 'Ukkuimai ka manua:
Ekeu lé saram Taikamanua. Bulé ekeu lé
tupaniniddogi samba tuaabeuaké

¹⁰Ekeu lé Rimatamai. Bulé nuutéaké
polak néné samba bulé itureddet teú
bagam kelé ka manua

¹¹Aké ka kai kanmai simemet
komenmai kineneiget

¹²Appéaké selemai, kelé kuappéaké leú
kai sia sipusesesele ka tubumai

¹³Buí nuobáaké itatá tonem bagamai
ka tubum, ké moi pasisiboat ka tubumai
tápoi belaaké lé kai ka geget sanitu
Sikataí. [Ekeu lé poí Rimata sipulu gege,
samba sipulubeunan, teret buru-burú,
Amen.]

¹⁴ Ké nuappéaké kam seledda saaleimui ka tubumui, appéakénangan leú et selemui ka kam, Ukkuimui sikuddu ka manua

¹⁵ Tápoi ké tá geti nuappéaké kam seledda saaleimui ka tubumui, tá leú te iaapéaké selemui ka kam, Ukkuimui sikuddu ka manua.

¹⁶ "Ké mupuaso kam, bá paseseuk kam matamui, kelé sigalaiakenenda sipatataju. Rapasisiep poí matadda, bulé raagai nia sangamberi sirimanua, pupupuasodda. Bulat kukua nia ka matamui, niangan té nenda upadda, sisilóra, lepá

¹⁷ Tápoi kam geti ka kam, ké mupuaso kam, bui kam matamui, samba soggi kam alaimui

¹⁸ bulé buí raagai nia kasei pá, pupupuasomui; bulat sarat Ukkuimui sikuddu ka simalipput lé iagai pupupuasomui, lepá. Aipoí ai lé iitsó Ukkuimui sigalaiakenenmui, kenanen sipinalipput, samba iaaké upamui.

¹⁹ "Bá rururúaké kam pukayoatmui ka polak, sioi ikom tabbubulut samba ipakataí kaop, elé sioi ratakkou sirimanua

²⁰Tápoi rurúaké lé kam pukayoat ka manua, sitaioi ikom tabbubulut samba ipakataí kaop, elé sitaioi ratakkou sirimanua.

²¹Aipoí, kaipa ikuddu pukayoatmui, sedda leú te ieei paatuatmui!"

²²"Mata iaté alitot tubu. Ké malatsat matam, mapatónangan leú te sangaliot tubum.

²³Tápoi ké maramun geti matam, geggep leú te simakopé sangaliot tubum. Tápoi sarapeite bulat t kopet kataí geggepnia, ké magep-gep matat alitot paatuatnu.

²⁴"Bulat beri te oi nia igalai galajetnia, sara pagugulet, ké murua baí tuannia. Aipoí ka sisara peilé te bulat makopé katet bagania, belé peilé ka sisara. Elé ka tubut uténia nenda sara peilé maréré nia, belé peilé nenda ka sisara. Kisedda leú te ka kam. Tá momoi nupalopru kam rua nia galajet; masipuukú Taikamanua samba masipuukú pukayoat

²⁵Oto repdem kam; buí imakarat bagamui ka purimanuaiatmui, masipaatu, apangan lé nukokom kam, apangan lé nuloló kam, elé apangan lé bibilet pakeietmui. Kipa, tá pá enga peilé

bulat mateú pasikeliet, belé peilé ka kan;
elé tubu peilé bulat mateú pasikeliet,
belé peilé ka leppei

²⁶ Igbuk peité kam, puririmanuan
umá sitububurut ka tei manua.
Taipanga-ngarap lé nia, taipasimomonei,
taipasirururúaké buat siuremannia ka
bagat sapou. Tápoi kenanen kisedda,
mariu-riu lé iurau sia Ukkuimui sikuddu
ka manua! Tá pá kam peilé bulat
makeppu saki ka tubut umá

²⁷ Kasei poi ka talagamui néné, kalulut
karat bagania, oi ituppaiaké goisó nantat
purimanuaiatnia

²⁸ Makakarát koddá bagamui ka
bibilet pakeietmui? Igbuk peité kam
puririmanuan ogó kainaú sipututútú ka
mone. Taipugagalai samba taipasibibibli
lé nia

²⁹ tápoi beri Rimata Salomo, oniakenen
bulat simakopé kayo, tá aiaili latsat
leppeinia, kelé latsat ogó kainaú néné

³⁰ Aipoí ka sia puo, kineneiget
putútúnangan, lepá matsep labóaké
ka api, sappru. Tápoi kenanen kisé,
mariu-riu lé ipalainge nia Taikamanua
puo néné, pat kopé lainge nia. Bulat
sarapeite kam néné! Tápoi kam geti

kuitsó nia, magulai peilé tonem bagamui ka tubut Taikamanua

³¹ Buí kalulut karat bagamui, kuamuian, 'Apangan lé kanmai', elé 'apangan lé lómai', elé mitsá nukua kam, 'apangan lé bibilet pakeietmai'

³² Pasibebesíaké bulé ioi imariu-riu tupurimanua kelé néné te, bulat rabubuluk ka sia sipuarat sabulungan. Oto ka sia Ukkuimui ka manua, ai lé iaagai sangamberinia simagulai ka kam

³³ Kau lé nubesíaké kam boikí ipurimata Taikamanua ka tubumui, samba galaiaké kam sangamberi siobat bagania, iapeí, tuppaiakénangan nia mitsá, Taikamanua, sangamberi simagulai ka kam

³⁴ Oto buí imakarat bagamui kipa nupaeerú kam matsep. Aipoí matsep, babara mitsá ka sia siripot pugejaat bagania. Gogoi néné metnangan ka sia siripot pugejaat bagania, báan tutuppai kam mitsá."

7¹ "Bá jojoaké kam saaleimui sirimanua, ijojoaké te kam ka kam Taikamanua. Aipoí kipa siperúmui ka tubudda nujoaké kam sia, kisedda leú te ipeperú ka kam Taikamanua, ijoaké kam

² Apa kirekat sikiréakenenmui ka tubudda saaleimui, kirekat nenda leú te ikikiréaké Taikamanua ka tubumui ka kam

³ Bulat amoi koí nuitsó sara sinoilet loiná ka matat alei nu sirimanua, tápoi arigi ka matam geti kekeu, beri itsónu nia

⁴ Kipa iooi nukua ka matat aleinu, 'Ale, saraina, konan peite boikí, bulé kualá sinoilet loiná ka matam,' ainangan ka matam kekeu arigi, tá nuiitsó

⁵ Ale, ekeu néné sipatataju! Golok'aké boikí arigi ka matam, iapeité imakoinong nualá sinoilet loiná sikukuddu ka matat alei nu

⁶ Bulat buí nukau kam bibilet Sipunenan ka matat jó-jó, babara ibabaila kam jó-jó nenda, lepá oi nia ikukru kam. Ialeú et, buí nukau kam inu mutiara ka matat sakkoiló, ipapeperaki siboboi.

⁷ "Tiddou kam ka Taikamanua, iaaké ka kam. Gaba kam, nusesese kam. Luu-luu kam matatbaliu, tububukáaké ka kam

⁸ Aipoí kasei masitiddou apa pá ka Taikamanua, bara, silónangan nia. Kasei masigaba, sese. Ialeú et, kasei masiluu-luu matatbaliu, bukáaké

⁹ Elé kipa, taleú ai sara ka talagamui saukkui néné, ké itiddou baí tokania roti, kauna lé bukkú

¹⁰ Elé ké itiddou baí tokania iba, kauna lé ulou

¹¹ Bulat kenanen baí tuoniaké kam néné sirimanua sikataí paraboat, nuagai kam masikau simaerú ka tubudda tatogamui. Oto sarapeite ka sia Ukkuimui sikuddu ka manua! Malangan pá tá ikau panguruatnia simaerú ka tubudda sipaniddogi nia

¹² Puukú kam sia sabagei, kelé nukiddiy kam ka kam rapuukú kam. Aipoí nenda lé bulat bagania surukat Mose samba nganturatda tai nabi.

¹³ "Gurúaké kam ka matatbaliu simaropdop; abeu samba malio poí enungan sieei ka narako. Oto maigi sia sienungi nia

¹⁴ Tápoi matatbaliu sambat enungan sieei ka purimanuaiat, maropdop lé samba tá malabbei ituenungi; oto tá maigi sia sipasisesese.

¹⁵ "Bulat suk-suk kam tubumui ka tubudda tai nabi sipatataju, siooi masitaget'aké kam, kelé mutubu

biri-biri; tápoi bulat kéan lé harimau simasagbak

¹⁶ Ka paraboatda simatotoilá ka galai tubudda lé nuaagai kam sia. Aipoí, tá ibubuaaké buat anggur ka sia laggigi. Kisedda leú et ka sia rui, tá leú te ibubuaaké buat sileu

¹⁷ Ké malibbut buluknia sara loiná, maerú leú te buania. Tápoi ké geti makaraggei buluknia, makataí leú te buania

¹⁸ Aipoí tá makataiket buania loiná simalibbut buluk. Kisedda leú loiná simakaraggei buluk, tá leú te maeruket buania

¹⁹ Oto senen loiná sitaibuaaké bua simaerú, tutatadde lé, itulabóaké ka api

²⁰ Kisedda leú te sia tai nabi sipatataju. Momoi nuagai kam sia, ka paraboatda simatotoilá ka galai tubudda.

²¹ Tá sangamberidda sipasisosogai aku, 'Tuhan, Tuhan,' ibabailiu paamian Taikamanua. Tápoi sarat sipasigagalaiaké siobat bagat Ukkuiku sikuddu ka manua lé

²² Maigi te sia ka Gogoi Sialu siooi masikua ka matakku, 'Tuhan, Tuhan, tá poi ka onim akupaarep kai patonekat

Taikamanua? Tá poi ka onim Tuhan, akupasiusiaké kai ketsat sikataí, samba akugalaiaké kai pukerengan?

²³Tápoi belan nga-ngangu lé kaku ka tubudda, 'Bulat beri agaiku kam! Katuitui kam sené ka matakku. Aipoí sirimanua sikataí paraboat lé kam!'

²⁴"Oto kasei sipasiaarep tiboietku samba sireddet nia, kupakeréaké lé nia ka sara sirimanua simasiku paatuat, sipasiririóaké lalepnia ka uddut bulak

²⁵Kenanen belé urat, samba italu nia eba, elé moi rusa simapiret masiboroi, tá mabubukkat burú, ka uddut bulak poi aiturioaké

²⁶Samba kasei sipasiaarep tiboietku, tápoi tá irereddet, kupakeréaké lé nia ka sara sirimanua sitaiagai paatuat, sirióaké lalepnia ka uddut ngái

²⁷Ké belé urat, bara eba, samba moi rusa simapiret masiboroi lalep nenda, bukkat. Ragat, bulat kakkataí simakopé

²⁸Kelé ailepáaké ipungantoman Jesus, makiseinangan ka bagadda sirimanua simigi

²⁹Berwibawa lé poi nia ka sia ipungantoman, tá kelé rapungantoman tai guru paamianda ka sia.

8¹ Kelé aitugorosot Jesus barania ka leleu, tutrangan leú et nia sirimanua simigi

² Oto ka tetret nenda, oinangan leú et sara sibara lubbé simasappó, masiailiaké Jesus, kuanangan ka matania, "Bulat ké nuobá baí nia, Ukkui, anualeakéan besíku.

³ Iageti rapenangan nia Jesus, kuanangan ka matania, "Nenda geti, kuobá, kauan numale!" Oto iangan leú et nia, liná-aimaliná tubunia

⁴ Lepá kuanangan ka matania Jesus, "Tápoi repdem; bulat buí tebaí nutiboi nia ka sabagei. Kenan lé ka tai imam nutiddou raitsó bulat kamamale nia besínu néné. Iageti mitsá, ei ekeu masikau panguruat pusurakatnu ka Taikamanua siripot surukat Mose, ibara toggaiatnia ka sirimanua, kamamale nia besínu!

⁵ Iageti kelé aitugurú Jesus ka Kapernaum, einangan leú et sara perwirat Roma, masiailiaké nia, itiddou paroman ka tubunia, pelé nga-ngania

⁶ "Ukkui, aimabebesí nia paguguletku ka lalep, ai sakitnia; bulat makopé iorik besínia.

⁷ Iageti kuanangan ka matania Jesus, "Kauan, ai leú kuoi kualeaké nia.

⁸ Tápoi kuana lé nia ka sia si perwirana, ka matat Jesus, "Eddangan nia Ukkui, báan leú ooi. Aipoí, bulat tá mateú kurauma ekeu Ukkui, ka lalepku. Kuangan lé sangakuanan, tá isoppi imale paguguletku

⁹ Beri aku kaku leú poí, buítá kuredet leú et nga-nganda sautéku, kelé reretdetda nga-ngangu kaku sapaguguletku. Ké kugugluaké sara paguguletku, kukua ka matania, 'Kenan!' einangan leú et. Ké kukua ka sapaguguletku sabagei, 'Konan sené!' oinangan leú et. Samba leú et ké kukua ka matat paguguletku, 'Galai néné!' galainangan leú et nia.

¹⁰ Oto bulat kisei lé ka bagania Jesus, masiarep sikuat perwira néné. Kalulut néné, kuanangan ka matadda sipasitututnia, "Bulat apangan té kopet tonem bagania sirimanua néné. Beri ka talagadda tai Israel, tá anai sia siaili kopet tonem бага, kelé néné

¹¹ Bulat sibulatnia te kuanenku néné ka matamui! Maigi te sia sibabara ka kabelaiat sulu samba leú et sibabara ka

kabelekat sulu, momoi parururú mugora
baga sambadda tai Abraham, tai Isak,
samba leú et tai Jakob, ka Purimataat
Taikamanua

¹²Tápoi sia geti oniakenen paamian
Taikamanua, turiribbaiaké lé sia ka
simagep-gep. Oto sedda te rapusosou
sambat rapangongorik.

¹³Lepá kuanangan ka matat perwira
nenda, Jesus, "Toiliakéan ekeu, aipoí
babarangan siniddounu, siripot tonem
bagam ka tubukku." Oto niangan leú et
jamnia, ale-aimale paguguletnia

¹⁴Iageti kelé aitugurú Jesus ka lalep
Petrus, itsónangan ina siputaliku si
Petrus, ai nia memerep ka pereman,
aibabara roketnia

¹⁵Oto rapenangan kabeinia, Jesus,
kulá-aimakulá roketnia. Tusurunangan
leú et ipuukú Jesus

¹⁶Ka soibokat, ei sia sipasiaabbít
migi sipinasaileu ketsat sikataí, ka
matat Jesus. Oto sangakuanan lé,
iusiaké sia Jesus paketsa-ketsat sikataí
nenda, samba aleakénangan leú et sia
sangamberidda simabesí

¹⁷Aigalaiaké nia geti kelé néné Jesus,
bulé ipuaili lé kelé ka sikuat Nabi

Jesayas, sipasikukua kisé, "Nia lé masibabairat pangoringanta, samba leú et masiaaleaké besíta.

¹⁸Iageti kelé aiitsó nia Jesus igidda sipasigogoilik nia, kuanangan ka matadda sipasiuluinia, bulé ratallipoki paó

¹⁹Lepá oi sara guru paamian ka tubut Jesus, masikua ka matania, "Matarek aku, Guru, kutut ekeu, ka senen eijatnu!

²⁰Tápoi kuana lé ka matania Jesus, "Ka sia lamusek, ai ugunia, samba leú et ka sia umá, ai rumunnia; tápoi ka sia geti Togat Manusia, beri kudduat pasiariatnia tubunia, tá anai.

²¹Iageti kuanangan nia ka sia sara ka talagat sipasiuluinia bagei, ka matat Jesus, "Obáaké aku boikí, Tuhan, kuei masirateiaké ukkuiku.

²²Tápoi aikua lé ka matania ka sia Jesus, "Konan'an lé nutut aku. Eddangan nia ka sia simamatei rarateiaké simamateira ka sia.

²³Lepá janang nia Jesus ka bagat abak. Iageti eirangan leú et ka sia sipasiuluinia, rapaaleiaké nia

²⁴Oto tulut buraakénangan rusa simakopé piret, iboroi bagat paó, bulat

pat pateipunangan nia koat, abakra.
Tápoi ka tetret nenda, ai lé nia memerep
ka sia Jesus

²⁵ Iageti eirangan leú et sipasiuluinia
ka tubut Jesus, rajiú-jiu nia, pelé
nga-nganda, "Pasikeli sita, Tuhan.
Mamatei sita!

²⁶ Oto kuana lé nia ka matadda, Jesus,
"Angoi numalolotó kam. Bulat gulainia
tebaí tonem bagamui ka tubukku!" Lepá
puriónangan Jesus, anunangan rusa
sambat bagat paó, bulat pak nem

²⁷ Katenan kisei lé ka bagadda
sipasiuluinia. Pat kuaddangan nia,
"Kasona lé pá nia sirimanua néné, pat koí
reddetnangan nga-ngania rusa sambat
onu!

²⁸ Iageti segé nia Jesus ka silat
paó, ka laggai Gadara. Oto sedda,
ai sia rua sipinasaileu ketsat sikataí,
amei ka tubunia. Bulat makopé kataí
pugegedda lé ruadda néné, pat beri
sia simaró бага tusabau sedda

²⁹ Oto bela sia ka ngaliu ratei,
pugereirangan leú et, pelé nga-nganda
ka tubut Jesus, "Ale, Togat Taikamanua,
kipa nupaeerú ka tubumai? Taleú

masipaorei kaian né nuooi, kenanen baí tápei aiaili tetrenia?

³⁰ Oto ai sedda ka bébéra simakopé igi sakkoiló sipumomone

³¹ Iageti tiddourangan nia ka tubut Jesus, sia paketsa-ketsat sikataí néné, pelé nga-nganda, "Ké nukua ka matamai kubela kai, kuanungan kutugurú kai ka tubut sakkoiló.

³² Kuanangan nia ka matadda, "Kauan, kenan'an kam!" Iageti bela sia paketsa-ketsat sikataí néné, ka tubudda sirua nenda, gurú sia ka tubut sakkoiló. Bailiu pabalaunangan leú et ka sia sakkoiló, teipuakénangan tubunia, barania ka gilak simaguluggú, belé ka bagat paó, iageti lollou-lou

³³ Oto pabalaurangan leú et ka sia sipasijajago sakkoiló, ratoili ka laggai. Nunuakérangan sangamberinia sibabara néné, samba leú pagalaiat sibabara ka tubudda sirua sipinasaileu ketsat sikataí néné

³⁴ Iageti bela sia sangalaggaiatda, eirangan leú et masiailiaké Jesus. Kelé araitso nia, ron'akérangan nga-nganda ka tubunia, bulé ikaddiuaké laggaira.

9¹ Lepá janang nia Jesus ka bagat abak, talipokinangan paó, itoili ka laggai puuragatnia

²Iageti oirangan leú et sipasibabairat simasakit ai nia ka bagat lapé, rataroaké nia ka matat Jesus. Kelé aiitsó nia Jesus bulat kopet ron tonem bagadda ka tubunia, sia sipasibabairat simasakit néné, kuanangan ka matat simasakit, "Buí imakarat bagam, sirou! Aiappeán poí jom Taikamanua.

³Tápoi ai sia piga pá sedda, tai guru paamianda tai Jahudi. Kelé araarep sikuat Jesus néné, kuaddangan ka bagat paatuatda, "Aipaloloian Taikamanua sirimanua néné!

⁴Tápoi ka sia geti Jesus, ai lé iaagai sipinaatudda néné. Iageti kuanangan ka matadda, "Angoi kisé kopet kataí nia sipinaatumui ka kam

⁵Apa lé poi simalabbei ka bagamui takukua ka matania, 'Atuappéakéan jom', élé, 'Rióaké ekeu, nupuenung?

⁶Tápoi kineneiget kupatoilá nia ka matamui, bulé nuitsó kam nia, kababara nia gege ka tubut Togat Manusia ka polak néné, masiappéaké jo." Iageti

kuanangan ka matat simasakit, Jesus,
"Suruaké ekeu, bairat lapénu, nutoili!

⁷ Iageti tusurunangan leú et simasakit
néné, toili nia ka lalepnia

⁸ Kelé araitsó nia sirimanua
simigi sibabara néné, bara lotóra,
umun'akérangan Taikamanua. Aikauan
poí Taikamanua gege simakopé ron, ka
tubudda sirimanua

⁹ Lepá tui-tui nia Jesus sedda. Ai
nia mueenung, itsónangan sara
sipuukú pajá, sipuoni si Mateus, ai nia
mukukuddu ka kantor pajánia. Iageti
kuanangan ka matania, Jesus, "Konan,
nutut aku!" Iageti puriónangan leú et si
Mateus, einangan leú et masitut Jesus

¹⁰ Ai sia mukokom ka lalep Mateus, oi
sia sabagei sipuukú pajá, samba leú et
sia oniakenenda sirimanua simigi, sikataí
paraboat, raei pataddé mukom ka tubut
Jesus sambat ka sipasiuluinia

¹¹ Kelé araitsó nia tai Parise sibabara
néné, nou-nourangan sipasiului Jesus,
pelé nga-nganda, "Angoi ka sia kai
gurumui, ioobá pataddé mukom ka
tubudda sipuukú pajá samba ka tubudda
sirimanua sikataí paraboat?

¹²Tápoi aiaarep Jesus, sikuadda néné. Kalulut néné, kuanangan ka matadda, "Simaron tubu geti, bulat tá te anai kaura sia tai dokter, sarat sia simaoringen lé

¹³Gelai peité kam kolobat tiboiet sitususurat ka Buko Sipunenan, sipasikukua kisé, 'Katet бага lé kuobá, tá tarimeu buluakenen.' Kaooiku néné poí, tá masisogai sia sikua tubuna sirimanua simaerú paraboat, tápoi sia kasitsit'akenen lé.

¹⁴Lepá oi sia sipasiului Johannes Sipasiraraú ka tubut Jesus, kuaddangan ka matania, "Sarat kai lé kodda sambamai tai Parise mupupuaso; tápoi ka sia geti sipasiuluinu, tá ai sia mupupuaso?

¹⁵Iageti aleginangan nia Jesus, kuanangan ka matadda, "Kipa poi sipinaatumui ka kam? Mateú leú pá rapureu-reu бага ka sia siooi mupunen putalimogat, ké ai peilé nia ka talagadda ka sia simanteu siputatalimou? Kupaatu tá! Tápoi ké geti aiailingan tetrenia itualá simanteu siputatalimou néné ka talagadda, iapeí pupuasoddangan

¹⁶Tá poí anai sia sitakkop'aké komang simabau, ka komang simaburú. Aipoí

ititiktik lé tubunia ka sia komang
simabau sitakkop'akenen nenda, iageti
miong'akénangan komang simaburú,
mabiritnangan leú et, oto bailiu kokkopé
liot biritnia

¹⁷ Kisedda leú et, tá te anai sia
sibaliuaké suat anggur sibau ka bagat
lalaisú kulit simamumúmú. Aipoí, tá te
isosoppi imakakataí samba ipupukpuk
nia nenda lalaisú kulit simamumúmú,
mapilinnan leú et suat anggur. Buítá
ka bagat lalaisú kulit simabau leú et
itubabaliuaké suat anggur sibau, bulé
imariu-riu erúnia ka ruania.

¹⁸ Ai peilé ipatitiboaké sia sipasiului
Johannes Sipasiraraú, Jesus, oi sara
sibajá garejadda tai Jahudi, murappo ka
matania, maniddou, pelé nga-ngania,
"Simaruei peilé ailangó nia togakku
sinanalep. Tápoi kenanen kisedda, konan
lé nurapeaké kabeinu ka tubunia, bulé
ipurimanua mitsá.

¹⁹ Iageti einangan leú et Jesus
sambadda sipasiuluinia, ratut nia

²⁰ Ka enungan, ai mitsá sara sinanalep
sipasioorik besíra tainanalep, kalulut
sarat bara lé simaingot tubunia. Pulu
rua ngarurangan burúnia aiorik besínia

néné. Iageti legreakénangan tubunia ka tei-tei Jesus, ikulum i rape simajai saraubat Jesus. Alepáan poí aipaatu nia, "Kurape lé saraubánia, ale besíku." Oto rapenangan simajai saraubat Jesus

²¹ (9:20)

²² Iageti pitsanangan tei-teinia Jesus, iitsó sinanalep néné, kuanangan ka matania, Jesus, "Kau imaom bagam, rogai! Matonem poí bagam ka tubukku, ale ekeu!" Oto iangan leú et jamnia, ale-aimale besínia

²³ Kelé aisegé Jesus, ka lalep bajá gareja, itsónangan sia sipasinanauaké pipiau pureuregat бага, samba bulat maigi sia, tenan gaú lepá nga-nganda

²⁴ Iageti kuanangan ka matadda, Jesus, "Belaaké kam sangamberimui! Aipoí tá amatei nia toga néné; ai lé nia memerep." Iageti gágatiddangan nia Jesus, sangamberidda

²⁵ Kelé arabela, gurú nia ka sia Jesus ka bilit toga, rapenangan kabeinia. Iageti tusurunangan leú et toga sinanalep nenda

²⁶ Oto mara-ratnangan leú et katuareman néné, ka sangaliot laggai

²⁷ Lepá tui nia Jesus sedda. Ka tangan enungan, oi sia rua simapeset mata, masitut Jesus. Pugereirangan leú et, pelé nga-nganda, "Ale Togat Dapit, kau imakaté bagam ka tubumai!

²⁸ Kelé aitugurú Jesus ka lalep, oirangan leú et ruadda simapeset mata néné, ka tubut Jesus. Nou-nounangan sia Jesus, kuanangan ka matadda, "Matonem leú bagamui ioi kualeaké kam?" Iageti kuaddangan ka matat Jesus, "Matonem bagamai, Tuhan.

²⁹ Iageti rapenangan matadda Jesus, kuanangan ka matadda, "Matonem poí bagamui ka tubukku, tá isoppi ibara kiddiyet bagamui.

³⁰ Iageti makoinongnangan leú et matadda. Lepá aséakénangan sia Jesus, bulé buí rapoiliat nia ka sabagei

³¹ Tápoi amei lé sia masipaarep katuareman sigalai Jesus néné, ka sangaliot laggai

³² Kappluna lé aratui-tui ruadda simapeset mata néné, oi sia mitsá sipasitataroaké sara simaoú-oú, sipinasaileu ketsat sikataí, ka matat Jesus

³³Iageti usiakénangan sanitu ka tubunia, Jesus. Iangan leú et jamnia, oi aipanibo mitsá. Oto bulat kisei lé ka bagadda sirimanua simigi; pat bela nga-nganda masikua, "Bulat beri peité itsómai nia sibabara kelé néné ka Israel!

³⁴Tápoi arakua geti ka sia tai Parise, "Utéra saketsat sikataí lé amasikau gege ka tubut Jesus, aoi aiusiaké nenda ketsat sikataí.

³⁵Iageti pugejeknangan Jesus, isenei sangamberi laggai sabeu samba laggai sigoisó, mungantoman ka uma parurukat, masipaarep Katuareman Simaerú, masikolouaké pagalaiat Purimataat Taikamanua. Aleakénangan leú sia sipasioorik sene ngamata besí, samba kataí tubu kalulut oringen sikataí siorikda

³⁶Kelé aiitsó sia Jesus, makaténangan bagania ka tubudda, kalulut maingo samba masulei lé poí tubudda, kéan lé poí biri-biri taipuukuket lé sia

³⁷Kuanangan ka matat Sipasiuluinia, Jesus, "Buat siureman maigi, tápoi goisó lé sia sipasimomonei

³⁸Oto tiddou kam ka sibakkat mone, bulé ikoiniaké sia sipasimomonei buat siuremannia."

10¹Lepá rurúakénangan sia Sipasiuluinia sipulurua, Jesus, kaunangan leú et ka tubudda gege masiusiaké ketsat sikataí, samba masialeaké sene ngamata besí, samba sene ngamata kataí tubu kalulut oringen sikataí siorikda

²Oninda sipasiului sipulurua néné, iaté: siboikí, si Simon (sipuoni leú si Petrus), samba sarainania si Andareas. Lepá si Jakobus, sambat sarainania si Johannes, iaté tatogat Sebedeus

³Si Pilipus sambat si Bartolomeus, sambat si Tomas. Si Mateus sipuukú pajá, samba leú et si Jakobus togat Alpeus, samba si Tadeus

⁴Sikatei-tei iaté si Simon tai Kana samba si Judas Iskariot sipajo Jesus

⁵Lepá koiniakénangan sia Jesus tai apostel. Kei mei sia, pangantrunangan sia, kuanangan ka matadda, "Buí nuei kam ka laggaira sipuarat sabulungan, samba ka laggaira tai Samaria

⁶Sarat ka tubudda simalilimai ka bangsa Israel lé nueei kam, lepá

⁷ Segéaké kam ka tubudda, táan mauuju ioi Purimataat Taikamanua

⁸ Aleakémuian leú sia simabesí; rimanuaakémuian sia simamatei; samba leú aleakémuian sia sibara lubbé simasappó. Usiakémuian leú et ketsat sikataí. Sangamberinia sisilómui néné, panguruat lé; oto buítá nupauruaké leú kam nia ka kam, ka sabagei

⁹ Buí nuabbit kam bulagatmui, iaté mas, perak, elé tembaga

¹⁰ Ialeú et, buí nuabbit kam suppit paniddoumui bulagat, elé rua saraubá, nupaatu kam, ibara panarenganmui ka puenunganan. Elé rua ngapasang sipatu. Samba leú et, buí nuabbit kam tuturámui. Aipoí bulat ai lé matatarek kanda sipugagalai galajet

¹¹ Ké segé kam ka laggai sabeu, samba ka laggai sigoisó, gabamuian sia siobá masirauma kam. Iageti kuddu kam sedda, pat aili tetrenia gogoi katui-tuiatmui

¹² Ké nuguruki kam bagat lalep, kuamuian, 'Bulé ipanukani kam si Tuhan.

¹³ Ké raobá masisiló kam sangalalepda, kuddu panukanan sikaumui ka tubudda. Tápoi ké geti tá raobá masisiló kam

ka lalepra, toili mitsá ka tubumui,
panukanan sikaumui ka tubudda

¹⁴Iageti ké ai sia sara lalep, elé laggai
sitaibá masisiló kam, elé sitaibá
masiarepi ngantomamui, tui-tui kam
sedda, nukaddiuké kam sia. Iageti abu
sikuddu ka reremui leú, só-sóakemuian
nia

¹⁵Repdem kam sikuakku néné!
Ka Gogoi Pasiukumannia sirimanua
Taikamanua, tai Sodom samba tai
Gomora peilé malabbei iappéaké
Taikamanua, ka tubudda sikukuddu ka
laggai néné!

¹⁶"Lelek'aké kam sikuakku néné:
Kukokoiniaké te kam, kelé biri-biri
simaluluk tubu, ka talagat harimau
simasagbak. Oto buítá masiku
paatuatmui kelé sikut paatuat ulou, tápoi
matopit kelé marpati

¹⁷Samba, kau nusuk-suk kam tubumui,
aipoí ralalabá te kam, lepá abbitrangan
kam ka matat rapat sabeu. Rapaooreji te
kam, ka bagat uma paniddogat

¹⁸Raaabbit te kam ka sauté samba ka
tai rimata, kalulut puoonimui sipasiului
aku. Oto ka tetret nenda te, nuaalá

kam tubumui masimuneng'aké aku ka matadda, samba ka sipuarat sabulungan

¹⁹Tápoi ké raabbit kam ka pengadilan, buí imakarat bagamui ka tiboiet tiboakenenmui, elé ka kuanenmui, masialegi nga-nganda. Aipoí, ikukua Taikamanua ka tubumui, tiboiet tiboakenenmui, ka tetrenia nenda leú et

²⁰Oto ka tetret nenda, kenanen baí kam masititiboaké, tápoi Ketsat Ukkui sikukuddu ka manua sikukuddu ka bagat paatuatmui lé mani-nibo

²¹Iaaili te tetrenia, saraina masinganduaké bakkat sarainania bulé ramateiaké sia. Kelé kisedda leú te ka sia igagalaiaké sara ukkui ka tubut toganía. Ialeú et, rasasaggangi te saukkui elé sainanda ka sia tatoga, lepá nganduakérangan sia, bulé ramateiaké sia

²²Rapulalagaki te kam бага sangamberi sirimanua, kalulut puoonimui sipasiului aku. Tápoi kasei siom'aké sangamberinia néné, teret kapplu, iaté ipaaarau Taikamanua

²³Oto ké rapaorei kam ka sara laggai, buítá nutui-tui kam ka laggai bagei. Kupoiliat nia ka matamui: Tápei te

tukakapplu nugejengi kam sangalionia
laggai Israel néné, amoian nia Togat
Manusia

²⁴Tá te isasaliu pubebeunan tiboí
tubudda sipasiului, ka pubebeunan
tiboí tubut gurudda, kisedda leú et
pubebeunan tiboí tubudda ka sia
sapagugulet, tá isasaliu pubebeunan
tiboí tubut tuanda

²⁵Tápoi ké amakeréan baí beunan tiboí
tubut sara toga sikola néné, kabeunan
tiboí tubut gurunia, elé beunan tiboí
tubut sara pagugulet kabeunan tiboí
tubut tuannia, amaerúan te. Ké
araoniakéan sara ukkui ka bagat lalep si
Belsebul, oto sarapeite kopet kataí nia
ka sia sangamberi sikukuddu ka bagat
lalepnia. Tá isoppi rakau ka sia oninda,
oni bulat sisaliu kopet kataí peilé!

²⁶"Buí numalotó kam ka tubudda
sirimanua. Tá poí anai simalipput, tá
tupatotoilá, samba tá poí anai keleat, tá
tupopoiliat

²⁷Apa sikuakku ka matamui
sipinakele, kau nupaarep kam nia
ka tubudda siberikabaga. Ialeú et,
apa sikasat'akenenku ka talingam, kau

nupaarep nia ka pulaibokatmui saaleinu sabagei

²⁸Buí nukalotóaké kam sia simateiaké tubu. Aipoí sarat tubu lé momoi ramamateiaké. Tápoi ketsat geti, tá momoi ramateiaké nia. Sarat Taikamanua lé bulat kalotóakenen, lepá. Aipoí ka sia, momoi imateiaké ruania, tubu samba leú et ketsat, ka api narako

²⁹Sangasen lé igit sakinia rua ngamuneng pit-pit. Tápoi kenanen kisedda kopet nimpit sakinia, tá anai beri sangamuneng mamatei, ké tá iteúaké nia Ukkuimui sikuddu ka manua

³⁰Aipoí beringan alai sipututútú ka utémui, aiaddengan nuntunia Taikamanua

³¹Oto buí numalotó kam! Aipoí kam peilé makeppu saki ka matat Taikamanua, belé peilé pit-pit!

³²"Kasei masimuneng'aké pupapasiuluiku nia, ka matadda sirimanua simigi, muneng'akékungan leú te nia kaku, ka matat Ukkuiku sikuddu ka manua

³³Tápoi kasei sipakele pupapasiuluiku nia, ka matadda sirimanua simigi,

pakelekkungan leú te nia kaku, ka matat Ukuiku sikuddu ka manua.

³⁴ "Buí nupaatu kam, kaooiku néné, masiaké paabanan ka polak. Tá masiaké paabanan akuoi, tápoi pasaggangan lé

³⁵ Akuoi iaté masipasaggag'aké tatoga simanteu ka saukkuira, elé tatoga tainanalep ka tubudda sainanda, taliku sinanalep, ka tubut ina siputataliku ka tubunia

³⁶ Ibabailiu geti bulat saggak sabeu, iaté sia sangamberi sikukuddu ka bagat lalepnia

³⁷ Oto ké ka tubudda saukkuira, elé ka tubudda sainanda peilé makopé katet bagadda, belé peilé ka tubukku, bulat tá mateú tuoniaké sia sipasiuluiku. Kisedda leú te, ka sia simanuntu бага ka tubudda tatogania taimanteu sambat tatogadda tainanalep belé peilé ka tubukku

³⁸ Samba kasei sia sitaiobá masibairat loiná siliktenganda raoi masitut aku, bulat tá mateú sia sipasiuluiku

³⁹ Kasei sikera engania, nia te malilimai purimanuaiat. Tápoi kasei sibuluaké engania, kalulut ron nia mutonem бага ka tubukku, nia te masisesese purimanuaiatnia.

⁴⁰ "Sipasisisiló kam, kenanen kam arasiló, tápoi aku lé te galainia arasiló. Ialeú et, sipasisisiló aku, kenanen aku lé arasiló, tápoi sipasikokoiniaké aku lé te galainia arasiló

⁴¹ Sipasisisiló sara nabi, kalulut puoninia nabi, isisiló leú te ka sia upa, siripot upat sara nabi. Kisedda leú et, kasei sipasisisiló sara sirimanua sipasigagalaiaké siobat berat Taikamanua, kalulut puobá nia masigalaiaké siobat berat Taikamanua, isisiló leú te ka sia upa, siripot upat sara sirimanua sipasigagalaiaké siobat berat Taikamanua

⁴² Kasei sikau ló ka tubudda sirimanua sigoisó tiboí tubu néné, kenanen ló simaleppet, kalulut puoninia sipasiului aku, kau imatonem bagamui ka sikuakku néné, bulat tá te isosoppi isiló upania!"

11 ¹ Lepána lé aipangantru sia sipasiuluinia Jesus, tui nia sedda,iei masipangantoman samba masiségéaké Katuareman Simaerú sitonéakenen Taikamanua, ka laggai simalegre sedda

² Kelé aiarep nia si Johannes Sipasiraraú sangamberi sigalai Kristus, ai nia ka

bagat penjara, koiniakénangan piga pá
sia sipasiuluinia, raei ka tubut Jesus,
raiséaké ka tubunia

³"Kipa, taleú ekeuan néné,
ngenaakenenmai siooi, siripot
sitonéakenen Taikamanua, elé ai
peilé sia sabagei ngenaetmai mitsá
siooi?

⁴Iageti kuanangan ka matadda Jesus,
pelé nga-ngania, "Kiséan lé, kenan'an
lé kam kai Johannes, nusegéaké kam
ka matania, sangamberi siitsómui elé
siarepmui

⁵Amakoinong'an matadda simapeset
mata, amoián arapuenung simasakit,
amalengan sia simalubbé simasappó,
amaarep'an piúra simatakkep,
atusurungan sia simamatei, samba
leú Katuareman Simaerú, sibara ka
Taikamanua, atusegéakéan ka tubudda
simagebá

⁶Mauktuk te sia sitaimarua бага ka
tubukku!

⁷Tui-tuira lé ka sia sikoiniakenen
Johannes néné, taddaakénangan nia
Jesus, masitiboi ka matadda sirimanua
simigi, pagalaiat tubut Johannes,
pelé nga-ngania, "Apangan lé lulunia

nubebesiaké kam moi ka kudduat
simatangeu néné? Taleú masiitsó
popou-pou ipaulá nia rusa lé

⁸Elé, aponia nuiitsó kam sedda?
Taleú masiitsó sirimanua sipuleleppei
simalaingé lé? Tá anai sia sedda, ai lé sia
ka lalepda tai rimata ka sia sipuleleppei
simaerú kelé nenda

⁹Oto apangan lé lulunia nueei kam ka
simatangeu? Taleú masiitsó sara nabi
lé? Bulatnia, aisesengan tedda, momoi
takua, legei peilé pubebeunan tiboi tubut
nabi

¹⁰Aipoí pagalaiat tubut Johannes lé
ititiboi ka Buko Sipunenan, sipasikukua
kisé, 'Nia té néné, pakoinietku, nga-ngan
Taikamanua, sikoiniakenenku sieei boikí
kei mei ekeu, bulé ipapa enungannu.

¹¹Bulé nuagai kam nia! Bulat beri te sia
sara ka polak néné, sisaliu pubebeunan
tiboi tubut Johannes Sipasiraraú. Tápoi
kenanen kisé, sia oniakenen sigoisó
tiboi tubu ka paamian Taikamanua peilé,
maabeu tiboi tubu ka tubut Johannes

¹²Taddanangan aipungantoman si
Johannes isegéaké katuaremannia, pat
aili kineneiget, bulat sarat masisaggangi
paamian Taikamanua lé ragagalai ka sia

simaron nga-nga, bulé ioi ragalai siobára ka tubudda

¹³ Pat aili kakaoijanan nia ka sia si Johannes, pagalaiat puaaili nia sangamberinia néné, atumuneng'akéan ka sangamberi surukat Mose sambat ka ngantomanda tai nabi

¹⁴ Ké baí matonem bagamui ka sikuakku néné, si Johannes néné te si Elia, atusiblaakéan pagalaiat kaooinia

¹⁵ Oto kasei simaarep piú arep'akénangan nia sikuakku néné

¹⁶ Ka tubut apangan lé pá mateú kupakekeréaké sia sangareddenan néné? Aipoí kelé galai tubudda tatoga sipukukuddu ka pasar lé sia néné. Pasoga pasasambadda, mungkuat sara ka mugkuat bagei, masikua

¹⁷ 'Amukateubá kai kateubat puangkakat бага, tápoi bulat beri geilauna kam muturú! Ialeú et, akuuraiaké kai urai pulúlukat бага, tápoi beri obámui nia musou!

¹⁸ Kelé aioi ka sia si Johannes, pupuasonangan samba tá iloló suat anggur, arakua peilé ka tubunia, 'Bulat ai lé sanitut tubunia, sirimanua néné!

¹⁹ Lepá oi nia ka sia kineneiget Togat Manusia, siobá mukom samba siobá muló, abela peilé nga-nganda masikua, 'Itsó peité kam nia ka sia néné! Taiom kan, simaló ló simapuinengan, samba siobá masipaaleiaké sipuukú pajá, samba sijo.' Tápoi kenanen kisedda, sikut paatuat Taikamanua, matoilá ituitsó ka buat sigalainia.

²⁰ Iageti taddaakénangan nia Jesus, ipateleji palagga-laggai, iaté laggai simarei-reiiei masigalai kerek. Kalulut taiobára masibauaké paatuatda

²¹ Kuanangan ka matadda, "Mateimuian te kam tai Korasim! Kisedda leú et kam tai Betsaida, bulat mateimuian leú te ka kam! Aipoí, ké ka laggai Tirus samba ka laggai Sidon baí itugalaiaké kerek kelé sigalaiakenen ka talagamui ka kam néné, bulat táan taagai burú arapupurúpú, samba araparagat abu ka utéra, rabauaké paatuatda

²² Repdem kam sikuakku néné! Ka Gogoi Sialu, jodda tai Tirus sambat tai Sidon peilé malabbei iappéaké Taikamanua, ka jomui ka kam néné

²³ Kisedda leú et ka kam tai Kapernaum! Ka bagamui te tububuak'aké kam pat

aili ka manua, elé? Bulat táan te matsí tubuak'aké kam! Tá te ka narako lé ituriribbaiaké kam! Aipoí ké ka laggai Sodom baí itugalaiaké kerek kelé sigalaiakenen ka talagamui néné ka kam, bailiu pat aili kineneiget ai peilé nia ka sia laggai Sodom néné

²⁴ Repdem kam sikuakku néné! Ka Gogoi Sialu, tai Sodom peilé malabbei iappéaké jodda Taikamanua, ka jomui ka kam néné!

²⁵ Ka tetret nenda, paniddounangan Jesus, pelé nga-ngania, "Taikamanua Ukkui, sikup-kup'aké polak samba manua! Surá sabeu kukua ka matam, kalulut anupakele poí sangamberi nia néné ka tubudda sirimanua simasiku paatuat samba simabuak tiboí tubu. Tápoi ka tubudda sigoisó tiboí tubu lé anupatoilá nia

²⁶ Nenda lé poí kiddiyet bagam, Ukkui.

²⁷ Iageti kuanangan nia mitsá Jesus, "Aiakéan Ukkui sangamberinia ka tubukku. Beri sia sara siagai Toga, sarat Ukkui lé iagai nia, lepá. Kisedda leú et ka sia Ukkui, beri leú sia sara siagai nia, sarat Toga lé, lepá, sambat ka tubudda

sia siobat bagania Toga ipaagai Ukkui ka tubudda

²⁸ Konan kam ka tubukku, kam sangamberi simasaggo tubu samba simaorú abbinen, bulé kupaarau kam

²⁹ Reddet kam surukatku, samba ului kam aku. Aipoí kalulut leppet bagakku samba repet paatuatku, maaraunangan bagamui

³⁰ Malabbei lé poí surukatku akenenku ka tubumui, samba abbinen sikauku ka bokumui leú et, masing."

12 ¹ Ka gogoi Sabbat, ai sia mueenung ka talagat monen gandum, taddaakérangan nia sipasiului Jesus raappek ottit gandum, iageti komrangan nia kalulut lajedda

² Oto, kelé araitsó nia tai Parise, kuaddangan nia ka matat Jesus, "Itsó peité rapasabau surukat aratta sipasiuluinu, ragalai keraet ka gogoi Sabbat.

³ Iageti kuanangan ka matadda Jesus, "Kipa, tápei poi anubatsa kam sigalaiakenennia ka sia si Dapid, ka tetret aramalaje sambadda saaleinia

⁴ Situgurúra ka Uman Taikamanua mukom roti, sibuluakenen ka

Taikamanua. Takua baí nia, siripot ka surukat aratta, bulat tá momoi rakom nia tai Dapid sambadda saaleinia. Sarat tai imam lé momoi ikokom nia

⁵Elé tápei poi anubatsa kam, ka surukat Mose sipasikukua, senen gogoi Sabbat lé rapasabau keraet gogoi Sabbat tai imam sipugagalai ka Uman Taikamanua; tápoi kenanen kisedda, tá leú atujoaké sia

⁶Lelek'aké peité kam sikuakku néné: Sené, ai sisaliu beunan Uman Taikamanua

⁷Siripot sitususurat ka Buko Sipunenan kisé aikua: Nuntut бага lé kuobá, tá tarimeu buluakenen. Ké nuagai kam kolou nia sikuakku néné, taio bámuian masiseleaké sitaimasele

⁸Aipoí Togat Manusia peilé abeu ka tubut gogoi Sabbat.

⁹Lepá tui nia Jesus sedda, gurú nia ka uma parurukat

¹⁰Sedda ai sara simasakit kabei sangasilá. Iageti ai sia piga pá sipasigagaba selet tubut Jesus, amei masinou-nou nia, pelé nga-nganda, "Kipa, momoi leú pá itualeaké simabesí ipot gogoi Sabbat?

¹¹ Iageti aleginangan nia Jesus, kuanangan ka matadda, "Ké ai baí ka talagamui sibara sangamuneng biri-biri sibebelé ka bagat guluggú ipot gogoi Sabbat, tá pá memei nia sibakkat biri-biri nenda, masialá biri-birinia ka bagat guluggú

¹² Tá poi sirimanua peilé makeppu saki ka biri-biri! Oto ké kisedda baí galainia, toilá, momoi tualeaké simabesí ka ipot gogoi Sabbat.

¹³ Iageti kuanangan ka matat simasakit kabei néné, Jesus, "Totoiaké kabeinu." Kelé aitotoiaké kabeinia, ale-aimale besit kabeinia, uluinangan kelé kabeinia sangasilá

¹⁴ Lepá bela sia tai Parise. Pakerénangan bagadda raisiaké ramateiaké Jesus

¹⁵ Kelé aiagai nia Jesus, isiat bagadda sikataí ka tubunia néné, tui-tui nia, iareuaké tubunia sedda. Sirimanua simigi leú et, ka sia, ei sia masitut Jesus. Iageti aleakénangan sia sangamberi simabesí

¹⁶ Tápoi sarat iaséaké lé sia, buí rapoiliat nia ka sabagei pagalaiat tubunia

¹⁷ Bulé ipuaili kelé ka siniboi
Taikamanua, sisegéakenen Nabi
Jesayas, sipasikukua kisé

¹⁸ "Nia té néné, sikoiniakenenku,
sipiliyku, kilibet bagakku samba siobat
bagakku. Kukakau Ketsatku ka tubunia,
bulé ipaarep roipot ukumku ka tai
bangsa-bangsa

¹⁹ Tá iobá pagolú élé mugerei, élé
mupidato ka enungan sabeu

²⁰ Popou-pou simalelemú, tá itatakkíaké
alito sipupepeípeí, tá ipepéaké. Tá
iaariaké masibesíaké teret puenung nia
ukum simaroipo

²¹ bulé rapukaronan sangamberi bangsa
ka tubunia.

²² Lepá abbitrangan sara simapeset
mata samba sioú-óú sipinasaileu
ketsat sikataí. Aleakénangan leú
nia Jesus, iageti oi aipanibo samba
makoinongnangan matania

²³ Oto bulat kisei lé ka bagadda
sirimanua simigi, pat patiboddangan
pasasambadda masikua, "Taleú baí
niangan néné Togat Dapid, sitonéakenen
Taikamanua?

²⁴ Kelé araarep nia tai Parise sikuadda
néné, kuaddangan nia ka sia, "Ké tá ikau

baí ka tubunia gege si Belsebul utéra paketsa-ketsat sikataí, bulat tá momoi iusiaké ketsat sikataí sirimanua néné.

²⁵Tápoi ai lé iaagai Jesus sipinaatudda tai Parise néné. Kalulut néné, kuanangan ka matadda, "Ké baí ka sara purimataat simararagat, sarat paaggra lé ragagalai, bulat tá te matotom purimataatnia.

Kisedda leú et, ké baí ka sara laggai, elé ka bagat sangalalep, simararagat, sarat paaggra lé ragagalai, bulat tá leú te matotom pulalaggai elé pulalalepra

²⁶Oto kisedda leú te ka sia ka purimataat Sanitu, ké sarat pakekle pasasambadda lé baí ragagalai, mungkuat sara ka mungkuat bagei, bulat tá isosoppi imaragat purimataatnia, lepá kakkataí

²⁷Kelé sikuamui, kalulut geget Belsebul lé aioi akuusiaké ketsat sikataí. Oto ké kisé baí nia, kasei gegengan lé rapapakei ka sia sipasiuluimui, rapasiusiaké ketsat sikataí. Ké beringan ka sia sipasiuluimui amatoiláan araitsó kababara nia selemui

²⁸Tápoi kaku geti, ka geget Ketsat Sipunenan lé, iooi kuusiaké ketsat sikataí. Oto toilá tataddaakéna nia Taikamanua murimata ka talagamui

²⁹ Kipa imaroró bagania sipananakkou iguruki lalep siron tubu, bulé irau-rauaké bibiletña, ké tá ikabéaké boikí siron tubu nenda? Teret lepá ikabéaké ñia, iapeité ioi irau-rauké bibiletña

³⁰ Oto kasei sitaiobá masipaalei aku, sia te masisasaggangi aku. Ialeú et kasei sitaiobá masiropké aku, sia té masipakakataí galajetku

³¹ Kau nuagai kam sikuakku néné, ké ragalai jo sirimanua, elé rapaloloi Taikamanua, momoi peilé te iappéaké jodda Taikamanua. Tápoi ké Ketsat Sipunenan geti rapaloloi, bulat táan te momoi iappéaké jodda Taikamanua

³² Ké rapaisit kuanenda masipaloloi Togat Manusia, momoi peilé te iappéaké jodda Taikamanua. Tápoi ké Ketsat Sipunenan geti arapaloloi, bulat táan te momoi iappéaké jodda Taikamanua, barania ka puririmanuanda kineneiget, pat aili ka Gogoi Sialu!

³³ "Bulé imaerú buania loiná, buíta malibbut bulukña. Ké tá malibbut bulukña sara loiná, makataí leú te buania. Aipoí ka buania lé ituaagai erú elé kataí ñia loiná nenda

³⁴ Kelé leú kam néné, sirimanua sikataí paraboat lé te kam. Oto kipa iooi nutiboi kam simaerú, ké sirimanua sikataí paraboat lé kam? Aipoí sitububura sibabara ka bagat paatuat lé poí, ititiboaké ka sia ngu-ngu

³⁵ Tápoi sirimanua simaerú paraboat geti, sarat simaerú lé ratitiboaké, aipoí ka bagat paatuatda, asut'an pueerú. Kelé leú ka sia sirimanua sikataí paraboat, sarat pakata-kataí lé te ratitiboi, asut'an poí ka bagat paatuatda pukakataí

³⁶ Oto repdem kam sikuakku néné: Ka Gogoi Sialu, sangamberinia titiboat sitá galai, sitiboakenenda sirimanua, buíta rapertanggung jawab'aké nia ka matat Taikamanua

³⁷ Aipoí ka tiboietnu lé ituaagai, masele pá ekeu, elé tá.

³⁸ Lepá oi sia piga pá tai guru paamianda tai Jahudi, samba tai Parise, masikua ka matat Jesus, pelé nga-nganda, "Paniddogatmai ka tubum, Guru, bulé nugalai kerek, ibara itsoketmai.

³⁹ Tápoi alegina lé nia Jesus ikua ka matadda, "Ale, apangan té kopet kataíra sirimanua kineneiget! Kipa, ainugegelai kam kugalai kerek? Bulat tá kugagalai

beri sara kerek itsoketmui, lepá. Sarat kerek kelé kiseiet sigalai Taikamanua ka tubut Nabi Jona lé tuaaké

⁴⁰ Kelé ka sia kai Jona, telu ngagogoi, telu ngasoibó burúnia aikuddu ka balugut iba sabeu. Oto kisedda leú te muaaili ka tubunia ka sia Togat Manusia, telu ngagogoi, telu ngasoibó leú te ikukuddu ka unou polak

⁴¹ Tususuru te sia tai Ninipe samba leú sia reddenan néné ka Gogoi Sialu masijoaké sia tai néné. Araobá poí ka sia tai Ninipe, masibauaké paatuatda ka tetret aiei si Jona, masipangantoman sia siburú. Tápoi kineneiget aian nia sené sisaliu peilé pubebeunan tiboi tubut Jona

⁴² Ialeú et, tususuru te nia sara rimata sinanalep sibara ka kayaman sambadda reddenan néné, masijoaké sia tai néné. Aipoí kalulut obána masiarep nganturat pagalaiat pusikuat paatuat Salomo, besíakénangan musila barania ka tut-tut polak, masiailiaké rimata Salomo. Tápoi kineneiget aian nia sené sara sisaliu peilé beunan tiboi tubut Salomo!

⁴³ "Ké bela ketsat sikataí ka tubut sara sirimanua, ei nia mugejek, masigaba kudduat simagarak ka simatangeu,

kudduat pasiariat tubunia, tápoi tá isesese

⁴⁴ Kalulut néné, kuanangan, 'Kusosok-sok'an lé mitsá ka lalep sikaddiuakenenku siboikí.' Kelé aisege sedda, ailinangan mitsá lalep nenda, tá anai ka bagania, maliná samba malelek kudduat katugalangan bibilet ka bagania

⁴⁵ Iageti ei nia mitsá masialá bagei pitu ketsat sikataí sisaliu peilé pukakataínia ka sia, tugurúranan leú et ka tubut sirimanua nenda, kuddu sia sedda. Oto bailiu tuppainangan kopet kataí paraboatnia sirimanua nenda, belé peilé kataí paraboatnia siboikí. Bulat kisedda te muaaili ka tubudda sirimanua sikataí paraboat, ka reddenan néné.

⁴⁶ Ai peilé ipatitiboaké sia sirimanua simigi, Jesus, oi-araoi ka sia sainan Jesus samba sasarainania. Iageti rió sia ka gerat, ragelai rapatiboaké nia

⁴⁷ Lepá oi sara ka talagat sirimanua simigi masisegéaké ka matat Jesus, pelé nga-ngania, "Ukkui, ai sia ka gerat sainam sambadda sasarainam. Airagegelai rapatiboaké ekeu.

⁴⁸Tápoi alegina lé nia Jesus, ikua ka matania, "Kasei baí sainangku? Kasei baí sasarainangku?

⁴⁹Oto saú-saúnangan sia sipasiuluinia, kuanangan ka matadda, "Sia té néné, sainangku samba sasarainangku

⁵⁰Aipoí kasei sigalaiaké siobat bagat Ukkuiku sikuddu ka manua, sia té nenda oniakenenku sasarainangku, samaniuku, samba sainangku."

13 ¹Gogoi nia nenda leú et, tui nia Jesus, ikaddiuaké lalep, ei nia mukuddu ka bet-bet koat

²Kalulut igidda sirimanua sipurut nia, ei nia ka bagat abak mungantoman. Tápoi ka sia geti sirimanua simigi, ai lé sia muririó ka bet-bet koat

³Iageti tiboinangan sangamberinia ka matadda Jesus, ka pasikat. pelé nga-ngania, "Ai sara sirimanua sieei masikarap'aké karamen

⁴Ai nia mangangarap, belé bagei ka talagat enungan. Iageti oinangan leú ka sia umá, pakominangan leú karamen néné, pat sappru

⁵Oto ai leú bagei karamen sibebelé ka polak simabukkú, goisó lé polaknia.

Bulat tá tedda kua ruei nia iputútú karamen, kalulut taimaigit polaknia

⁶Tápoi kelé imakaddat sulu, malajúnangan leú et letinia, iageti magaraknangan leú et, lepá attei, tá poi makeru ungatnia

⁷Oto ai leú bagei karamen sibebelé ka talagat rui. Kelé itaddaaké ka sia iputútú rui, teinangan karamen néné, pat attei

⁸Tápoi ai leú bagei sibebelé ka polak simagabru. Tá mauju pubuanangan; ai sangotu igit nganbénia, ai siaili enem ngapulu, ai leú et siaili telu ngapulu, igit ngambénia.

⁹Oto lepána lé aitiboi pasikat néné, Jesus, kuanangan ka matadda sirimanua simigi, "Kasei simaarep piú, kau iarep'aké nia!

¹⁰Lepá oirangan leú et sipasiului ka tubut Jesus masikua ka matania, pelé nga-nganda, "Pasikat lé kodda nukakau masipatiboaké sirimanua simigi?

¹¹Iageti aleginangan nia Jesus, kuanangan ka matadda, "Ka kam poi atuakéan panguruat, bulé nuagai kam keleat Taikamanua, iaté pagalaiat Purimataat Taikamanua. Tápoi ka sia geti ka sabagei, tá atukau

¹² Aipoí kasei ai, tukakau peilé mitsá simakopé igi ka tubunia, bulé ipulegei. Tápoi ka sitá anai apa pá geti, tupaaalaki peilé sipulelegei goisó nenda ka tubunia, bulé isappru

¹³ Iaté lulunia kupupapasikat ké manibo aku ka tubudda sirimanua simigi. Aipoí kenanen makoinong matadda, tápoi kelé tá raiitsó; kenanen maarep piúra, tápoi kelé tá raaarep samba tá isasaksak ka bagadda

¹⁴ Amuailingan kelé ka sikuat Nabi Jesayas, sipasikukua kisé, áikua Taikamanua; Mariu-riu lé rapasiarep tápoi tá ikokolou ka bagadda; airariritúaké tápoi tá raagai apa sipuaaili

¹⁵ Makelá lé poí paatuatda sirimanua néné, amatakkep'an piúra samba arauneng'akéan matadda. Aibara kelé néné geti, iaté, bulé buí imakoinong matadda, samba bulé buí imaarep piúra, bulé buí imakolou ka bagadda buían rasok-sok nia mitsá ka tubukku oto bailiu aleakékungan sia.'

¹⁶ Iageti kuanangan ka matadda sipasiuluinia Jesus, "Tápoi bulat mauktuk kam ka kam, aipoí bulat anuitsóan kam, samba bulat anuarep'an kam

¹⁷ Aipoí bulé nuagai kam nia, bulat tá te magulai sia tai nabi samba sia simaroipo бага siburú amasibesíaké masiitsó kelé siitsómui ka kam kineneiget, tápoi bulat beri itsóra nia. Arabesíaké masiarep kelé siarepmui ka kam kineneiget, tápoi bulat beri arepda nia.

¹⁸ "Arep'aké kam kukua katukolobat pasikat sipasikakarap'aké karamen

¹⁹ Karamen sibebelé ka enungan, iaté tupasikat'aké ka tubudda sipasiaarep Katuareman Simaerú, siorak pagalaiat Purimataat Taikamanua. Tápoi tá makokolou ka bagadda. Amoi poí Sanitu masirau-rau karamen sikarap'akenen ka bagat paatuatda

²⁰ Karamen sibebelé ka polak simabukkú, iaté tupasikat'aké ka tubudda sipasiaarep Katuareman Simaerú. Bulat arepda lé nia, silórgan nia ka angkat бага

²¹ Tápoi kalulut Katuareman Simaerú sisilóra néné, tápei amuungat ka bagat paatuatda, bailiu tá matom. Kelé ibara pugejaat бага, elé paoreat ka tubudda kalulut katuareman simaerú nenda, bulat tá mauju rasik-sik tei-teira muarat

²² Iageti karamen sibebelé ka talagat rui, iaté tupasikat'aké ka tubudda sipasiaarep Katuareman Simaerú, tápoi ai lé sia mukakarat бага ka purimanuaiatda, kalulut obára mukayo. Bailiu teinangan Katuareman Simaerú siarepra néné, pat taipubuanangan leú et

²³ Tápoi karamen sibebelé ka polak simagabru geti, iaté tupasikat'aké ka tubudda sipasiaarep Katuareman Simaerú. Arepda lé nia, makolounangan ka bagadda. Pureddeitnangan buadda, ai siaili sangotu, ai leú siaili enem ngapulu, tápoi ai leú siaili telu ngapulu igit ngambénia.

²⁴ Lepá tiboinangan mitsá sara pasikat, Jesus ka matadda sirimanua simigi, kuanangan, "Purimataat Taikamanua geti, makeré lé nia kelé ka pasikat néné: Ai sara sirimanua sieei maksikarap'aké karamen simaerú ka monenia

²⁵ Oto soibó, ai sia memerep sangamberidda, einangan leú et ka sia saggak sigalai mone néné, ikarap'aké karamen soa-soat ka talagat gandum; lepá tuinangan leú et

²⁶ Kelé aipuurau siureman néné, taddaakénangan leú ibela bobotsoketnia. Oto ka sia soa-soat leú, toilá

²⁷ Iageti oirangan leú sipugagalai siupaji ka tubut sibakkat mone, masukua ka matania, 'Kipa, tá uremen simaerú anukarap'aké ka monem, Tuan? Kipa aigalai aibara sedda soa-soat?

²⁸ Pelé nga-ngan sibakkat mone néné ikua ka matadda, 'Sikarap'akenenda lé saggakta.' Iageti kuaddangan nia mitsá ka matat sibakkat mone, pelé nga-nganda, 'Kipa, Tuan, nuobá leú kuei kai masiburau soa-soat nenda?

²⁹ Kuanangan ka matadda sibakkat mone néné, 'Báan leú eei kam, aipoí ké mei kam masiburau soa-soat, babara taiaagaietmui paburagimuian gandum

³⁰ Eddangan nia iputútú ka sia soa-soat, raputútú ruadda gandum, teret iaili gogoi pasimoneiat. Ai leú kukua nia ka sipasimomonei: Rurúaké kam boikí soa-soat. Oto ké alepáan nuappaaké kam nia, labóakémuian nia ka api. Alepáan geti nupalaboki kam soa-soat, iapeité nururúaké kam buat gandum, koiríakémuian nia ka bagat sapou.'

³¹ Lepá mitsá tiboinangan sara pasikat ka matadda sirimanua simigi, Jesus. Kuanangan ka matadda, "Ka sia Purimataat Taikamanua, makeré lé nia kelé ka pasikat néné: Ai sara sirimanua sialá sangambé luikut ubé, ikarap'aké nia ka monenia

³² Luikut ubé néné, iaté sara karamen bulat simakopé goisot ngambé. Tápoi kelé aiputútú, puuraunangan, pat niangan lé abeu ka pagule-gulei bagei. Bebbeunan loinánia, pat einangan leú umá murumun ka rannia.

³³ Ai leú mitsá sara pasikat aitiboi Jesus, ka matadda, "Ka sia Purimataat Taikamanua, makeré lé nia kelé ragi, sialat sara sinanalep, ipagalú nia ka siepat ngapulu ngaliter tapung, teret ipugoó sangamberinia!

³⁴ Sangamberinia ngantoman Jesus sarat ka pasikat lé itiboi nia ka tubudda sirimanua simigi

³⁵ Bulé ipuaili kelé ka siniboira tai nabi, sipasikukua kisé, "Mupasikat lé kugagalai, masipatiboaké sia kupoiliat sangamberinia simalipput barana ka panandaat polak peilé.

³⁶ Lepá kaddiukénangan sia sirimanua simigi, Jesus, gurú nia ka bagat lalep. Iageti oi sipasiuluinia kuaddangan ka matania, "Kolouaké peité ka kai bagat pasikat soa-soat ka talagat gandum.

³⁷ Iageti kolouakénangan nia, Jesus, kuanangan ka matadda, "Sipasikakarap'aké karamen simaerú iaté, Togat Manusia

³⁸ Mone, iaté, polak néné. Karamen simaerú, iaté sia situgugurú ka paamian Taikamanua. Soa-soat, iaté sia simaré-ré ka Sanitu

³⁹ Saggak sipasiuurep soa-soat, iaté Sanitu. Pasimoneiat, iaté Kalepakat Polak. Sipasimomonei, iaté samalaika

⁴⁰ Kelé kipa itururúaké soa-soat bulé itulabóake ka api, kisedda leú te muaaili ka Gogoi Sialu

⁴¹ Ikokoiniaké te sia samalaikania Togat Manusia, masirurúaké ka talagadda sapaamiannia, sipasitutubbui bagadda sirimanua mugalai jo, samba sia leú sabagei sangamberidda sigalai jo

⁴² Sangamberidda néné, turiribbaiaké ka purusuat sibara api sipujujuluu; oto sedda te rapusosou samba rapangongorik

⁴³ Tápoi sia geti, sigalaiaké siobat bagat Taikamanua, mutotoro tubudda kelé matat sulu, ka Laggai Sibau; Laggai Taikamanua Ukkuirá. Oto kasei simaarep piú, arep'akénangan leú et nia!

⁴⁴ "Ka sia geti Purimataat Taikamanua, makeré lé nia ka pasikat néné: ai bibilet silabbú ka polak, sikukuddu ka mone, lepá sesenangan niaté sara sirimanua. Kelé aisese nia, labbúnangan nia mitsá ka polak. Lulut kopet angkat bagania, einangan leú et masisakiaké sangamberi bibiletnia. Lepá sok-soknangan nia mitsá, isaki polak nenda.

⁴⁵ "Ka sia geti Purimataat Taikamanua makeré lé nia ka pasikat néné: Ai sara sipajajaga, sieei masigaba inu mutiara smakopé kepput saki

⁴⁶ Kelé aisese sara inu mutiara bulat smakopé lainge, ei nia masisakiaké sangamberi bibiletnia, iageti sakinangan nia mutiara nenda.

⁴⁷ "Ka sia geti Purimataat Taikamanua, momoi tupasikat'aké nia kelé ka sara jalo, sijaloakenen ka koat; sialá sene ngamata iba

⁴⁸ Kelé aisut jalo nenda, tiktikrangan nia jalo nenda sipasiiba ka leleu. Lepá

uddet sia masipiliy paiba-iba nenda: Iba simaerú rakau ka bagat garágá, tápoi iba sikataí geti, raribbaiaké lé

⁴⁹ Kisedda leú te, ké iaili Gogoi Sialu. Oi samalaika masipasaraaké sirimanua sikataí paraboat, ka sirimanua sigalaiaké siobat bagai Taikamanua

⁵⁰ Iageti sirimanua sikataí paraboat, turibbaiaké ka bagat purusuat sibara api sipujujuluu. Oto sedda te rapusosou samba rapangongorik.

⁵¹ Iageti kuanangan ka matadda, Jesus, "Amakolouan ka bagamui sangamberinia sikuakku néné?" Alegiddangan nia, pelé nga-nganda, "Amakolouan ka bagamai, Ukkui!

⁵² Oto kuanangan mitsá ka matadda sipasiuluinia, Jesus, "Iaté lulunia, sangamberidda tai guru paamianda tai Jahudi, situgugurú ka paamian Taikamanua, tupakeréaké lé sia kelé ka sara tuan sipasibebelaaké bibiletnia simabau sambat bibiletnia simaburú, sibara ka bagat sapounia.

⁵³ Kelé ailepáaké aitiboi sene ngamata pasikat, Jesus, tui-tui nia sedda

⁵⁴ toili nia ka laggai puuragatnia. Oto einangan leú et mungantoman ka uma

parurukatda tai Jahudi. Bulat kisei lé ka bagadda raarep ngantomannia. Pelé nga-nganda ka tubunia, "Kaipa te aisease pusoppinannia kelé néné? Samba kaipa te aibara gege ka tubunia ipasigalai kerek

⁵⁵Tá poi nia néné togat Josep situkang loiná? Tá poi si Maria inania; samba tá poi sasarainania sipuoni si Jakobus, si Josep, si Simon samba si Judas

⁵⁶Tá poi ai sia sené ka sia samaniunia? Kaipa aisease nia sangamberinia néné?

⁵⁷Oto taiobáranan masisiló kaooi Jesus. Iageti kuanangan ka matadda Jesus, "Ka palagga-laggai bagei rahohormati sia tai nabi, tápoi taikalaggaiatnia samba sia sikukuddu ka bagat lalepnia geti, tá.

⁵⁸Kalulut néné, taigalainangan maigi kerek sedda, tá poí matonem bagadda ka tubunia.

14¹Iageti ka tetret nenda, maarepnangan katuareman sigalai Jesus ka tubut Rimatadda tai Galilea, iaté sipuoni si Herodes

²Kuanangan nia si Herodes ka tubudda sauté siróakenennia, "Bulat kirénangan si Johannes Sipasiraraú te nia néné.

Amurimanuangan nia mitsá! Iaté lulunia ibabara gege ka tubunia igalaiaké kerek.

³Aipoí siburú aikoiniaké sia tai tenterania si Herodes masilabá samba masikabé si Johannes, rakau nia ka bagat penjara. Aigalaiaké néné geti ka tubut Johannes Sipasiraraú, si Herodes, kalulut galai tubunia ka tubut eirania si Herodias, sinanalep sarainania si Pilipus

⁴Aikua poí si Johannes ka matat Herodes kisé, "Bulat tá momoi nualá eiram si Herodias, sinanalepnu!

⁵Siripokatnia aiiisiaké si Herodes masimateiaké si Johannes. Sarat lotónia lé ka tubudda sirimanua simigi, ai lé poí rapunanabi nia si Johannes néné

⁶Oto ka punen pasirepdeman putútukat matania si Herodes, amuturú momoínia sinanalep, iaté togat Herodias, ka matadda sirimanua simigi sipupupunen. Bulat simakopé angkat bagania lé si Herodes masiigbuk againia muturú siokkó néné

⁷pat pusuppanangan si Herodes masikua ka matania, apa lé itiddou, kaunungan leú et nia

⁸Oto kalulut ron patubbuiat inania si Herodias, kuanangan ka sia toganian

siokkó néné, ka matat Herodes, "Utet Johannes Sipasiraraú lé nuaaké kaku kineneiget ka bagat mangkó!

⁹ Kelé aiarep paniddogatnia siokkó néné, si Herodes, bulat reu-reu lé bagania. Tápoi kalulut irepdep sisuppaakenennia ka matadda tairaumania, kuanangan bulé rakau paniddogatnia siokkó néné

¹⁰ Koiniakénangan leú et sia raei ka penjara bulé rasaggri lolokkat Johannes

¹¹ Iageti abbitrangan utet Johannes ka bagat mangkó, kaurangan leú et nia ka tubut siokkó néné. Oto ka sia siokkó néné mitsa, kaunangan nia ka tubut inania

¹² Lepá eirangan leú et sipasiului Johannes masialá tubut Johannes simamatei, rarateiaké nia. Iageti mitsá eirangan leú et masisegéaké sibabara néné ka tubut Jesus

¹³ Kelé aiarep nia sibabara néné Jesus, tui nia muabak sarania, masiareuaké tubunia sedda, masiailiaké kudduat simatangeu. Tápoi kelé araarep nia sirimanua simigi katutui-tui nia sedda Jesus, tui leú et sia ka sia rakaddiuaké laggaira, raei masiailiaké Jesus, sipusisila

¹⁴ Kelé aitujanang Jesus ka kapi,
itsónangan sirimanua simigi, oto
makaténangan bagania ka tubudda.
Iageti aleakénangan piga pá sia
simabesí, ka talagadda

¹⁵ Ka soibokatnia, oi sia sipasiuluinia
ka tubut Jesus masikua ka matania,
"Amasoibóan sulu. Kudduat néné pei
bagei matangeu. Maerú peilé nukua ka
matadda, raei masisaki kadda ka laggai
simalegre sené.

¹⁶ Iageti kuanangan ka matadda Jesus,
"Buían raei. Kam'an lé masikakau kadda.

¹⁷ Pelé nga-nganda ka tubut Jesus,
"Kakai poí sarat lima ngaaggro lé roti
samba rua ngamuneng iba!

¹⁸ Kuanangan ka matadda Jesus, "Aké
kam nia sené.

¹⁹ Iageti kuanangan ka matadda
sirimanua simigi bulé rapuuddet ka
turu-turu. Alánangan silima ngaaggro
roti sambat sirua ngamuneng iba,
teilanangan manua masikua pusurakat
ka Taikamanua. Lepá paabbónangan nia,
kaunangan leú et nia ka sipasiuluinia,
raparubei nia ka sirimanua simigi

²⁰ Iageti pukomrangan leú et
sangamberidda, bulat pat segé ektakra.

Lepat komanda, rurúakérangan
sipulelegei, sipasiuluinia, ai pulu rua
ngagarágá iginia sarat sisusut

²¹ Sangamberidda sipukokom, ai sia
lima ngaribu sia igidda, tápei atuaddeaké
sia tainanalep sambat tatoga sigoisó

²² Iageti kuanangan Jesus ka matadda
sipasiuluinia, bulé raei boikí muabak,
masitalipoki bagat paó, pengen an ikua
ka matadda sirimanua simigi ratoili ka
laggaira

²³ Oto kurukra sirimanua simigi, sakai
nia Jesus ka sara leleu,iei maniddou.
Kenanen amasoibóan, tápoi riu-riu lé
ikuddu sedda Jesus sarania

²⁴ Tápoi ka sia abak situtda sipasiului
Jesus geti, aiailingan ka tangan paó
reunannia. Aipabebetuji nia onu; kalulut
ai lé poí rasososro rusa

²⁵ Ka patokatnia, oi nia ka sia Jesus
muenung ka uddut oinan, iailiaké sia

²⁶ Kelé araitsó ipuenung Jesus ka uddut
oinan, tugégérangan leú et simakopé.
Pugereirangan leú et kopet kataí lotóra,
pelé nga-nganda, "Kodda Sanitu!

²⁷ Kuana lé nia ka matadda Jesus, "Bá
pulalamau kam! Aku lé né, Jesus. Bá
malolotó kam!

²⁸ Oto kuanangan nia ka sia si Petrus ka matat Jesus, "Ké bulatnia baí ekeu néné Jesus, oto kua pei, bulé kuoi kaku muenung ka uddut oinan.

²⁹ Aleginangan nia Jesus, kuanangan ka matania, "Kauan, konan'an." Iageti jananginangan leú et si Petrus uddut oinan, puenungnangan iailiaké Jesus

³⁰ Tápoi kelé aiitsó nia si Petrus iburaaké rusa simakopé piret, suggrunangan nia pulolotó, iageti tualupnangan leú et. Oto pugereinangan, pelé nga-ngania, "Rop'aké aku, Tuhan!

³¹ Bulat tá amauju aitotoiaké kabeinia Jesus, itakep kabei Petrus; iageti kuanangan ka matat Petrus, "Ei, Petrus, Petrus, magulai peilé tonem bagam ka tubukku. Marurua kodda bagam ka tubukku?

³² Iageti sakai sia ruadda ka bagat abak. Ka sia rusa leú, ari aipuboroi

³³ Oto purappoddangan leú et sipasiuluinia ka matat Jesus, pelé nga-nganda, "Bulatnia Togat Taikamanua lé ekeu, Tuhan!

³⁴ Iageti kelé aratujolou ka kapit paó, sakai sia ka laggai Genetsaret

³⁵ Kelé araagai nia sipulalaggai sedda, pu-Jejesus nia amoi masibalou sia, paarepdangan nia ka sabagei kaooi nia, ka sangaliot laggai simalegre sedda. Bailiu abbitrangan sangamberi simabesí ka tubut Jesus

³⁶ Tiddourangan ka tubut Jesus, bulé iobáaké rarape saraubánia, kenanen baí sipujajai leppeinangan lé. Oto sangamberi sipasirarape saraubánia, ale besíra.

15 ¹ Iageti oirangan leú et piga pá sia tai Parise sambat tai guru paamian sibabara ka Jerusalem masiailiaké Jesus, masikua ka matania, pelé nga-nganda

² "Rapasasabau kodda surukatda taikebbukatta sipasiuluinu? Simatukle tugalaiaké siripot ka surukatda taikebbukatta poí, kei mukom, buí tá muriggo boikí!

³ Aleginangan nia Jesus kuanangan ka matadda, "Kam ka kam leú et, nupasasabau kodda kam surukat Taikamanua kalulut nutut'aké kam surukatda taikebbukatmui

⁴ Aipoí aikua Taikamanua, 'Surú ukkuinu sambat inam,' samba leú

et, 'Kasei sipateleji ukkui sambat inania, buítá tuorakké ka tubunia ukum simateiakenen.

⁵Tápoi anungantruaké geti kam ka sirimanua kisé, ké ai sipasikukua ka saeppunia, 'Siripot akenenku ka tubumui ukkui, ina, akupanguruat'akéan nia ka Taikamanua,

⁶oto bailiu táan turoronké itukua bulé isurú saeppunia. Oto kalulut purereddetmui ka surukatda taikebbukatmui, putatámuian tiboiet Taikamanua

⁷Ale kam sipatataju! Bulat amuailingan te kelé ka sikuat Jesayas, pagalaiat tubumui néné

⁸'Kisé aikua Taikamanua: Sarat ka ngungunda lé, lepá rapasiumun'aké aku, tápoi paatuatda geti, areu ka tubukku

⁹Siboboi lé raumun'aké aku, aipoí surukatda sirimanua sigelaiakenenda nenda arabailiukéan lé nia kéan lé surukatkungan lé galainia.'

¹⁰Lepá sogoinangan sia sirimanua simigi, Jesus, kuanangan ka matadda, "Arep'aké peité kam sikuakku néné, bulé imakolou ka bagamui

¹¹ Situgugurú ka bagat nga-nga, tá ibabailiuaké itukasitsit'aké sirimanua, sarat sibebela ka bagat nga-ngania lé, itukasisitsit'aké sia.

¹² Iageti oirangan leú et sipasiuluinia, Jesus ka matania, pelé nga-nganda, "Nuagai leú arapubeleki ekeu бага tai Parise, araarep sikuam néné?

¹³ Tápoi alegina lé nia ka sia Jesus, "Sangamberi siureman, ké tá siurep ukkuiku sikuddu ka manua, tububurau lé

¹⁴ Bá puleletsei kam sia ka sia tai Parise. Aipoí sauté simapeset paatuat lé sia néné. Ké palulu baí sia ka tubu pasasambadda simapeset mata, tá isoppi rabelé ruadda ka bagat guluggú.

¹⁵ Iageti kuanangan ka sia si Petrus ka matat Jesus, "Kolouaké peité ka kai pasikat néné!

¹⁶ Oto kuanangan ka matadda Jesus, pelé nga-ngania, "Ale, beri leú kam ka kam, tápei makolou ka bagamui sikuakku néné

¹⁷ Tá nuagai kam, situgugurú ka bagat nga-nga, segé ka balugú, lepá bela mitsá

¹⁸ Sibebela ka bagat ngu-ngu, iaté sibuggraakenen paatuat; iaté nenda sikau sirimanua kasitsit'akenen

¹⁹ Aipoí sibabara ka paatuat
lé ikakabaraji pukakataí бага;
sipasitutubbui bagat sirimanua pamatei,
paelet, musilainge, manangkou,
masimuneng'aké boko samba
masipaloloi

²⁰ Nenda lé ibabailiu tukasit-sit'aké
sia sirimanua, tá kalulut pukokom
sitaipuririggo.

²¹ Lepá tui nia Jesus sedda, iei ka
sara laggai ka bet-bet laggaira tai Tirus
sambat tai Sidon

²² Iageti oinangan leú et sara sinanalep
tai Kanaan sibabara ka pasongan
laggaira tai Tirus sambat tai Sidon,
musoga ka tubut Jesus, pelé nga-ngania,
"Oi Tuhan, Toga Dapid, kau imakaté
bagam ka tubukku! Ai togakku sinanalep
aipasasaileu nia ketsat sikataí Bulat
simakopé kataí lé pangoringannia.

²³ Tápoi ka sia geti Jesus, meng lé nia.
Iageti oirangan leú et sipasiuluinia ka
tubunia, pelé nga-nganda, "Tuhan, kua
peité ka matat sinanalep néné itui-tui.
Sarat mugaú-gaú lé poi igagalai itut sita!

²⁴ Iageti kuanangan ka matat sinanalep,
Jesus, "Sarat ka tubudda simalilimai ka
bangsa Israel lé atukoiniaké aku.

²⁵ Iageti einangan leú et sinanalep murappo ka matat Jesus, kuanangan, "Bulat rop'aké lé aku, Tuhan.

²⁶ Kuanangan nia mitsá Jesus ka matat sinanalep, "Tá maerú tualá kadda tatoga, turibbaiaké nia ka jó-jó.

²⁷ Alegina lé nia ka sia sinanalep, "Bulat aisesengan tedda sikuam, Tuhan. Tápoi beri leú ka sia jó-jó, ai leú te ipipipli porat kan sibebelé ka tei mejat tuannia.

²⁸ Iageti kuanangan Jesus ka matat sinanalep, "Bulat maron tonem bagam lepá, Ina! Tá isoppi ibara kiddiyet bagam!" Oto iangan leú et jamnia, ale-aimale toganía Ina néné

²⁹ Oto lepá tui nia sedda Jesus, puenungnangan masiriringi bet-bet Paot Galilea. Iageti panatranangan ka sara leleu, kuddu nia sedda

³⁰ Maigi leú sia amei masiailiaké Jesus masitaroaké simasakit, simapeset mata, sitaiooi tubu, simaoú-oú, samba leú sia simabesí sabagei. Galakkérangan leú et sia simabesi néné ka matat Jesus, aleakénangan leú et sia

³¹ Bulat kisei lé ka bagadda sangamberi siparururú sedda, araitsó aioi arapanibo simaoú-oú, aramale simasakit, aioi

arapuenung sitaiooi tubu, samba aimakoinong matadda simapeset mata. Iageti umun'akérangan leú et Taikamanuanda bangsa Israel

³² Lepá sogainangan sia sipasiuluinia Jesus, kuanangan ka matadda, "Bulat makaté bagakku ka tubudda sirimanua simigi néné. Aipoí telu ngagogoian burúnia arapaalei aku. Oto kuneneiget táan anai kadda. Tá kuobáaké sia ratui-tui taipukokom, babara mamatei sia laje ka enungan.

³³ Iageti kuaddangan nia sipasiuluinia, ka matat Jesus, "Kaipa tagagaba kam kan ka laggai simatangeu néné, masipakom tá taagai nuntudda néné?

³⁴ Oto kuanangan ka matadda sipasiuluinia, Jesus, "Ai piga ngaaggro roti anuabbít kam?" Alegiddangan nia, "Ai pitu ngaaggro, samba leú et ai piga ngamuneng pá iba pagoiso-goisó.

³⁵ Lepá kuanangan ka matadda sirimanua simigi, Jesus, bulé rapuuddet ka polak

³⁶ Iageti alánangan sipitu ngaaggro roti sambat iba, kuanangan surá ka tubut Taikamanua. Lepá paabbónangan leú et nia roti samba iba nenda, kaunangan

nia ka tubudda sipasiuluinia, oto parubeirangan nia ka sirimanua simigi

³⁷ Iageti pukomrangan leú et, pat ektek sia sangamberidda. Lepá eirangan leú et sipasiuluinia, masirurúaké sipulelegei. Ai pitu ngagarágá iginia sarat sisusut

³⁸ Igidda sipukokom, sarat taimanteu peilé, ai sia epat ngaribu. Ainangan tátuaaddeaké sia ka sia tainanalep sambat tatoga sigoisó

³⁹ Lepá, iapeité obáakénangan sia sirimanua simigi néné, Jesus, ratoili ka laggaira. Tápoi ka sia geti Jesus, amei lé nia muabak sarania ka laggai Magadan.

16 ¹ Ai piga pá sia tai Parise sambat tai Saduki amei masiailiaké Jesus, ragaba enungan bulé ioi rajoaké nia. Iageti nánáranangan nia bulé igalai kerek ka matadda, masipatoilá kababara nia ka Taikamanua

² Tápoi kuana lé ka matadda Jesus, ["Ké mabonan matat sulu ka kabelekat sulu, kuamuian, 'Maeerú te manua.

³ Samba ké mabonan elé makunem matat sulu simatsep, kuamuian, 'Bebelé lé te urat.' Oto kam nuagai kam masipatup-tup matat manua, iaté masiitsó toggaiat sibabara ka manua.

Tápoi toggaiat pagalaiat sibabara kineneiget geti, bulat tá nuagai kam ipatup-tup nia!"

⁴"Bulat apangan té kopet kataí samba kopet kelat paatuatda sia reddenan néné. Kipa, ainukikiddiy kam kugalai kerek? Bulat beri te sara kerek tá tugagai itsoketmui, sarat kiseiet sipuaaili ka tubut Jona lé." Kelé aikua néné ka matadda, tui nia sedda Jesus, ikaddiuaké sia

⁵Kelé arasegé sipasiului Jesus ka silat paó, agairangan kakalipogidda raabbit roti

⁶Iageti kuanangan ka matadda Jesus, "Suk-suk kam tubumui ka ragidda tai Parise sambat tai Saduki.

⁷Kelé araarep nia sikuat Jesus néné ka matadda, patiboddangan pasasambadda, pelé nga-nganda, "Elé kalulut taiaabbitta lé pá roti ikukua néné ka matatta, Jesus.

⁸Tápoi ai lé iaagai sipinatibojidda néné, Jesus. Iageti kuanangan ka matadda, "Pauukle kodda kam kalulut taiaabbitmui roti? Bulat magulai peilé tonem bagamui ka tubukku

⁹ Tápei aimakokolou poi ka bagamui?
Táan poi ainurerepdem kam ka silima roti
sipaabbóku masipakom silima ngaribu
sia igidda? Ai piga ngagarágá nuntu nia
roti sipulelegei sirurúakenenmui

¹⁰ Samba leú et ka sipitu roti
masipakom siepat ngaribu sia igidda? Ai
piga ngagarágá nuntu nia roti sipulelegei
sirurúakenenmui

¹¹ Angoian lé tá imakokolou ka bagamui,
tá kalulut taiaabbitmui roti kukua nia
néné? Tápoi bulé nusuk-suk lé kam
tubumui ka ragidda tai Parise sambat tai
Saduki!

¹² Oto iapeité agairangan kolou nia
sikuat Jesus ka matadda, tá ragi pasigot
roti ikukua ka matadda, tápoi bulé
rasuk-suk lé tubudda, buí ialá bagadda
ka nganturatda tai Parise sambat tai
Saduki

¹³ Iageti ei nia Jesus ka laggai simalegre
ka Kaisarea Pilippi. Ai sia sedda,
nou-nounangan sia sipasiuluinia Jesus,
pelé nga-ngania, "Siripot siarepmui ka
nga-nganda sirimanua, kasonia ka sia,
rakukua, Togat Manusia néné?

¹⁴ Alegiddangan nia sipasiuluinia, pelé
nga-nganda, "Ai sia sipasikukua si

Johannes Sipasiraraú. Tápoi ai leú et sia sipasikukua si Elia. Iageti ai leú sabagei sipasikukua si Jeremias, elé sara ka talagadda tai nabi.

¹⁵ "Tápoi kam ka kam, kasonia nukukua kam aku néné?

¹⁶ Iageti kuanangan nia ka sia si Petrus, "Ekeu geti kekeu néné, iaté Rimata Sipaarau, Togat Taikamanua Sipuririmanua.

¹⁷ Oto kuanangan nia Jesus ka matat Petrus, "Bulat mauktuk ekeu ale Simon togat Jona! Aipoí tá sirimanua aipoiliat nia ka matam, tápoi Ukkuiku sikuddu ka manua lé

¹⁸ Bulé nuagai nia, ekeu néné sipuoni si Petrus, iaté bukkú bulak simaron. Ka uddut bongan bukkú bulak néné te kuririóaké garejakku, sitaioi tukalaaké. Pat beri kamateiat leú tá momoi ikalaaké nia

¹⁹ Kuaaké te ka tubum panguksik Laggai Taikamanua Sibau. Oto apa lé nukeraaké ka polak néné, tukekeraaké leú te ka manua. Iageti apa lé nusiniseat'aké ka polak néné, tuisineseat'aké leú te ka manua.

²⁰ Lepá aséakénangan sia sipasiuluinia Jesus, bulé buí ratiboi nia ka sabagei, rakua, Jesus néné, iaté Rimata Sipaarau

²¹ Ka tetret nenda, taddaakénangan Jesus, itiboi simakolou ka matadda sipasiuluinia, kaei nia ka Jerusalem sambat oorikna maigi paoreat sibara ka sauté, sibara ka tai imam sabeu, samba leú et sibara ka tai guru paamian. Iageti tiboinangan leú et mamateiakéra nia, tápoi isusuruaké lé nia mitsá Taikamanua, ka gogoi sikatelunia

²² Iageti ei si Petrus, tiktiknangan kabei Jesus, abbitnangan nia raei ruadda ka bété, oto aséakénangan nia, kuanangan ka matat Jesus, "Bulé iareuaké Taikamanua sibabara néné ka tubum, Tuhan! Buí ipuaili néné ka tubum, Tuhan!

²³ Oto pitsanangan si Petrus, Jesus, kuanangan ka matania, "Kenan katui-tui sené, ekeu Sibaraaké Paalakat Baga! Aipoí sipasisasaila aku lé ekeu néné. Bulat siripot sipinaatudda sirimanua lé kekeu nupaaatu; tá siripot sipinaatut Taikamanua!

²⁴ Iageti kuanangan ka matadda sipasiuluinia, Jesus, "Kasei siobá masitut

aku, kau rakatei-teiake boikí galajet
puuktunganda saradda, samba kau
rabairat siliktenganda, iageti mitsá, kau
mariu-riu ratut aku

²⁵ Aipoí kasei sikera engania,
iaté malilimai purimanuaiat. Tápoi
sipasibubuluaké engania geti kalulut
aku, iaté masisesese purimanuaiatnia

²⁶ Aponia poi uktuknia sara sirimanua,
ké moi iikep'aké sangaliot polak, tápoi ai
lé malilimai purimanuaiatnia? Momoi poi
tupasiliaké purimanuaiat néné ka tubut
aponia pá

²⁷ Táan te mauju ioi mitsá Togat
Manusia sambadda samalaikania
ka geget Ukkuinia. Ka tetret nenda
orak'akénangan ukum ka sirimanua,
Taikamanua, masisiliaké siripot sigalaira

²⁸ Repdem kam néné! Ai te sia
ka talagamui sené, tá ranananam
kamateiat, teret itsóra ioi Togat Manusia
sibailiu Rimata."

17 ¹ Lepána lé aitukapplu enem
ngagogoi burúnia, abbitnangan
sia Jesus, si Petrus, si Jakobus sambat
sarainania si Johannes raei saradda ka
sara leleu simakopé buak

²Oto ka mataddangan leú et siliynangan putubuatnia Jesus: Matoronangan matania kelé torot sulu, samba mabulaunangan leppeinia bulat kirisau lepá

³Iageti itsórganan leú et si Mose sambat si Elia sia sipasiului sitelu néné, aipatitiboaké sia Jesus

⁴Oto kuanangan ka matat Jesus si Petrus, "Bulat masanang sita mukuddu sené, Tuhan. Kelé baí nuobá nia, akurióakéan telu ngambua sapou: sara kekeu, Tuhan, sara kai Mose, sambat sara kai Elia.

⁵Bulat talagat paninibo nia si Petrus, kuneminangan sia tinobut simakopé toro. Iageti maarepnangan nga-nga sibara ka tinobut manua sipasikukua, "Nia té néné Togakku, kilibet bagakku, samba siobat bagakku, arepi kam nga-ngania!

⁶Bulat simakopé kataí lotóra lé sipasiuluinia, araarep nga-nga néné, pat purappoddangan ka polak

⁷Tápoi einangan leú et Jesus, rapenangan sia, kuanangan ka matadda, "Suruaké kam, bá malolotó kam!

⁸ Kelé arateilaaké matadda, táan araitsó sia sabagei, saranangan lé Jesus sedda amulegei

⁹ Iageti ai sia tugogorosot baradda ka leleu, patonénangan sia Jesus, pelé nga-ngania, "Buí tebaí nupoiliat kam nia ka sabagei, siitsómui simaruei néné, ké tápei atusuru Togat Manusia ka simamatei.

¹⁰ Oto nou-nourangan Jesus sipasiuluinia, pelé nga-nganda, "Angoi rakukua nia ka sia tai guru paamian, buítá moi nia boikí si Elia?

¹¹ Iageti kuanangan nia Jesus ka matadda, "Kirénangan tedda momoi nia si Elia, bulé ipaerú sangamberinia

¹² Tápoi aku kaku masikua ka matamui, amoián nia si Elia, tápoi tá raagai nia; aragalai lé siobára ka tubunia. Oto kisedda leú te ragagalaiaké ka tubunia ka sia Togat Manusia.

¹³ Iapeité aimakolou ka bagadda sipasiuluinia, pagalaiat tubut Johannes Sipasiraraú lé ititiboi ka matadda

¹⁴ Kelé aitoili Jesus sambadda sipasiuluinia sitelu néné ka tubudda sirimanua simigi, oi sara saukkui, murappo maniddou ka matat Jesus

¹⁵ pelé nga-ngania, "Kau imakaté bagam ka tubut togakku, Tuhan. Ai pangoringan tubunia, iaté pangoringan simabelaet bubut ka ngu-ngu. Bulat ké ioiaké iorik besínia, marei-rei ibelé ka api sambat mareirei leú et iei ka oinan

¹⁶ Akutaroakéan nia ka tubudda sipasiuluinu, Tuhan, tápoi tá amoi araaleaké besínia.

¹⁷ Iageti kuanangan nia Jesus ka matadda, "Bulat kipa lé pá kam néné! Sijo lé kam, sitaimatonem бага. Teret kipangan lé burúnia kukuddu ka talagamui samba kupaom bagakku ka tubumui? Kauan, abbit kam nia sené ka sia toga!

¹⁸ Oto usiakénangan leú et nia Jesus, ketsat sikataí sikukuddu ka tubut toga, belanangan leú et. Bulat iangan leú et tetrenia, ale-aimale ka sia toga

¹⁹ Iageti ei sia ka tubut Jesus, sipasiuluinia, masinou-nou nia saradda, pelé nga-nganda, "Tá koí momoi ka kai kuusiaké kai nia ketsat sikataí néné?

²⁰ Alegina lé nia Jesus, ikua ka matadda, "Kalulut gulai nia peilé poí tonem bagamui. Oto repdem kam sikuakku néné! Ké ai baí tonem

bagamui ka tubukku beri beu luikut ubé beunannia, tá isoppi momoi nukua kam ka tubut leleu néné, Ritsiaké tubum, turitsínangan leú et. Aipoí tá anai tá momoi nugalai kam

²¹ [Ka sia poí ketsat sikataí kelé néné, sarat paniddogat sialei puaso lé iooi ituusiaké.]

²² Kelé araparurú sangamberidda sipasiuluinia Jesus ka Galilea, kuanangan mitsá ka matadda Jesus, "Táan te mauuju, rasegéaké Togat Manusia ka kabeira sirimanua

²³ Iageti mateiakérangan nia. Tápoi ka gogoi sikatelunia, suruakénangan nia mitsá Taikamanua." Kelé araarep nia sikuat Jesus néné sipasiuluinia, mareu-reunangan bagadda simakopé

²⁴ Kelé arasegé sipasiuluinia Jesus ka Kapernaum, oirangan leú et sipasititiddou yuran Uman Taikamanua, masinou-nou si Petrus, pelé nga-nganda, "Kipa ikakau leú ka sia si gurumui yuran Uman Taikamanua?

²⁵ Iageti aleginangan nia si Petrus, pelé nga-ngania, "Ikakau!" Oto kelé aitoili si Petrus, olaakénangan Jesus ipuboikí masinou-nou si Petrus, pelé nga-ngania,

"Kipa kekeu siripot sipinaatum, Simon? Kasonia masibabaya yuran ka tubudda tai rimata ka polak néné? Tai rayat, elé sia siooiaké?

²⁶ Iageti kuanangan nia si Petrus, "Sia siooiaké lé. Oto ké kisedda baí nia, tá masibabaya sia tai rayat.

²⁷ Tápoi buí takau kabelekat bagadda sirimanua. Kenan lé mangabli ka paó. Iageti alánungan iba sikablim siboikí. Ai ka nga-ngania bulagat simemet pasibayan yuranku sambat yurannu kekeu. Alánungan bulagat nenda, bayanungan nia ka tubudda yuranta ka sita kaunen ka Uman Taikamanua.

18 ¹ Ka tetret nenda, amei sia sipasiului Jesus masinou-nou nia, pelé nga-nganda, "Kasonia oniakenen siabeu tiboí tubu ka talagat paamian Taikamanua?

² Iageti sogainangan sara tatoga sigoisó, Jesus, rióakénangan nia ka matadda

³ Kuanangan ka matadda, "Kau imatonem bagamui ka sikuakku néné! Bulat tá te tuooniaké kam sapaamian Taikamanua, ké tá ibailiu kam kelé tatoga

⁴ Kasei siparepé paatuatnia samba sibailiu kelé toga néné, niaté oniakenen simabeunan tiboï tubu ka talagat paamian Taikamanua

⁵ Samba leú et, kasei sipasisisiló toga kelé néné kalulut aku, aku lé te galainia aisiló.

⁶ "Kasei sipapepe pupaatuanan sara ka talagadda taigoisó néné, pat taimatonemnangan bagadda ka tubukku, bulat maerú peilé tusereaké ka lolokkatnia bukkú panundukat gandum, ituribbaiaké nia ka koat simakeru, imalou-lou

⁷ Matei lé sia taikapolak sibaraaké ramajo sirimanua. Kirénangan tedda marei-rei lé ibara kelé néné, tápoi páan te ka sia sipasibabaraaké

⁸ Oto ké kabeinu elé rerem masikabaraji numajo, tippú, gikgikkénungan nia. Aipoí maerú peilé sisangasilá kabei ele sisangasilá rere ekeu nupukuddu ka bet-bet Taikamanua, ka sirua kabei elé ka sirua rere ekeu, turibbaiaké ka api narako

⁹ Samba leú et, ké matam masikabaraji numajo, kiok, gik-gik'akénangan nia. Aipoí maerú peilé sisangasilá mata ekeu

nupukuddu ka bet-bet Taikamanua, ka sirua ngasilá nia matam turibbaiaké ekeu ka api narako.

¹⁰ "Pasikeli kam! Buí nupaloloi kam sara ka talagadda tai goisó néné. Aipoí bulé nuagai kam nia, mariu-riu lé sia samalaikadda murió ka matat Ukkuiuku ka manua

¹¹ [Masipaarau simalilimai lé poí aioi ka sia Togat Manusia!

¹² Kipa poi sipinaatumui ka kam? Ké ai baí sia sara sirimanua sibara biri-biri sangotu ngamuneng iginia, lepá limai sangamuneng, kipa ipaeerú sibakkat biri-biri néné? Tá isoppi ikaddiuaké sisiba ngapulu siba ngamuneng ka leleu, iei masigaba biri-biri simalilimai

¹³ Kau imatonem bagamui ka sikuakku néné ka matamui -- ké isese baí nia biri-biri simalilimai néné, bulat ka tubut biri-biri sisangamuneng néné peilé makopé angkat bagania, belé peilé ka sisiba ngapulu siba ngamuneng sitaimalilimai

¹⁴ Oto kisedda leú te Ukkuimui sikuddu ka manua, taiobána ramalimai beri sara ka talagadda sibau mutonem бага ka tubukku.

¹⁵ "Ké igalai jo ka tubum sarainam, kena nuamiaké nia, nukua sele sigalainia. Tápoi buítá sipinakele lé nugalaiaké nia. Sarat ruamui lé, lepá. Oto ké baí ireddet nganturatnu, amoian te anutoiliaké nia mitsá sarainam

¹⁶ Tápoi ké geti tá ireddet ngangam, abbitnungan sara elé rua sia aleinu, nuei kam ka tubunia. Beri ka Buko Sipunenan leú ai sedda atusurat'aké, 'Simatatánia rua elé telu sia sipasimumuneng'aké selet sara sirimanua.

¹⁷ Iageti ké tá ireddet nga-nganda sia néné, segéakénungan nia ka tubudda sapaamian. Oto ké tá leú et irerreddet nganturatda sapaamian, iapeité nuaddeaké kam nia kelé sipuukú pajá elé kelé sipuarat sabulungan.

¹⁸ Repdem kam néné: "Apa lé nukeraaké kam ka polak néné, atukeraakéan leú te nia ka manua. Samba leú et, apa nusineseatke kam ka polak néné, atusineseat'akéan leú te nia ka manua

¹⁹ Samba bulé nuagai leú kam nia: Ké ai baí rua sia igidda ka talagamui simakeré бага maniddou masibesíaké apa pá, tá isoppi iarepi paniddogatda Ukkui ku sikuddu ka manua

²⁰ Aipoí kaipa ai rua elé telu sia igidda siparururú maniddou ka oningku, aku leú kaku, ai aku ka talagadda.

²¹ Iageti oi nia si Petrus ka tubut Jesus, masiiséaké, pelé nga-ngania, "Kisé Tuhan, ké igalai baí jo sarainangku ka tubukku, teret piga ngamitsá iginia kuaappéaké nia? Metnangan leú pá pitu ngamitsá?

²² Oto pelé nga-ngan Jesus ikua ka matat Petrus, "Tá teret pitu ngamitsá iginia tápoi pitu ngapulu, ngamitsá pitu ngamitsá

²³ Aipoí ka sia Purimataat Taikamanua, makeré lé nia kelé ka pasikat néné: Ai sara rimata siobá masibaraaké paaddeat utakra sapaguguletnia

²⁴ Kelé aipasipareksa, taroakérangan ka matania sara pagugulet sipuuutak sipujujuta ngaropia iginia

²⁵ Bulat tá momoi itebui utaknia néné. Oto kuanangan nia rimata bulé rasakiaké sia sangalalepda sambat tatogania, samba leú et sangamberi bibiletnia, pasitebui utaknia

²⁶ Iageti purapponangan ka matat rimata maniddou, pelé nga-ngania, 'Ale

Tuan, om'aké bagam ka tubukku. Ai leú kutebui nia sangamberi utakku.

²⁷Oto makaténangan bagat Tuan ka tubunia, pat posanangan sangamberi utaknia

²⁸Tápoi kelé aibela pagugulet néné ka gerat, ailingan sara alei nia, pasasambadda sapagugulet, sipuuutak ka tubunia piga ngaribu ngaropia lé pá iginia. Iageti labánangan nia aleinia néné, petsutnangan lolokkatnia, kuanangan ka matania, 'Buítá nubaya sangamberinia utaknu ka tubukku!

²⁹Oto purapponangan leú et alei nia néné ka matania maniddou, pelé nga-ngania, 'Ale saraina, om'ake bagam ka tubukku, saraina. Ai leú kutebui nia sangamberi utakku ka tubum!

³⁰Tápoi aítátáaké lé paniddogat alei nia, pagugulet néné. Aikau lé nia ka bagat penjara, teret kapplu nia itebui utaknia

³¹Kelé araitsó nia sapagugulet sabagei sigalaiakenen nia néné, mareu-reunangan bagadda, eirangan leú et masisegéaké sibabara néné ka tubut rimata

³² Iageti sogainangan nia rimata pagugulet sikataí paraboat néné, kuanangan ka matania, 'Bulat pagugulet sikataí lé ekeu néné! Kalulut ron paniddogatnu ka tubukku, posakkungan nia sangamberi utaknu

³³ Oto kipa, tá pá mateú imakaté bagam ka tubut aleinu, kelé akupukateki ekeu бага кекеу?

³⁴ Bulat simakopé kataí golú nia rimata ka tubunia. Iageti kaunangan nia pagugulet néné ka bagat penjara, teret kappluakéna itebui sangamberi utaknia.

³⁵ Iageti lepáakénangan ipupasikat Jesus, kuanangan, "Oto kisedda te igagalaia ké ka tubumui sene-senemui Ukkuiku sikuddu ka manua, ké tá bulat sibara ka linat paatuatmui nuappéaké kam jodda sasarainamui."

19 ¹ Kelé ailepáaké nia Jesus, itiboi sangamberinia néné, tui nia ikaddiuaké Galilea, iei ka laggai Judea, ka silat Oinan Jordan

² Maigi sia sieei masitut nia, iageti aleakénangan leú et sia sedda

³ Lepá oirangan leú et tai Parise masisibo Jesus, pelé nga-nganda ka tubunia, "Siripot surukat ka aratta,

momoi leú pá igalak sinanalepnia, kalulut ai apa pá paluluatnia.

⁴Iageti kuanangan nia Jesus ka matadda, "Kipa, tápei poi anubatsa kam ka Buko Sipunenan sipasikukua, ka panandaatnia, ka sia Taikamanua, Sipasibabaraaké sirimanua, aibaraakéan simanteu sambat sinanalep

⁵Lepá mitsá kuanangan, 'Iaté lulunia ikakaddiuaké ukkui sambat inania, simanteu, iloplop'aké tubunia ka sinanalepnia; oto bailiu sisangaakkuláan lé sia ruadda.

⁶Sia néné, táan tuooniaké sia rua, tápoi sisangaakkuláan lé sia ruadda. Iaté lulunia, silop-lop'akenen Taikamanua, bulat tá momoi ipasaraaké nia sirimanua.

⁷Iageti nou-nourangan nia tai Parise, pelé nga-nganda, "Oto ké kisedda baí nia, angoi koí ikukua nia si Mose ka tubudda sirimanua, bulé rakau surat pagalangan ka tubut sinanalep sigalakra?

⁸Oto kuana lé nia ka matadda Jesus, "Kalulut kelat paatuatmui lé baí et, aiobáaké nia si Mose nugalak kam sia tainanalepmui. Tápoi ka panandaatnia geti, tá kisedda

⁹ Oto arep kam sikuakku néné: Kasei masigalak sinanalepnia ké tá kalulut puoolop tubunia, lepá putalimounangan mitsá simanteu néné ka tainanalep bagei, sipaeet lé nia.

¹⁰ Iageti kuaddangan ka matat Jesus, sipasiuluinia, "Oto ké kisedda baí galainia enung patabbarat pulalalepda simanteu ka sinanalep, maerú peilé tá mutalimou sita.

¹¹ Kuana lé ka matadda Jesus, "Tá sangamberit sirimanua makolou ka бага ka tiboiet néné, sarat sia lé siteúakenen Taikamanua

¹² Ai sia tá momoi raputalimou, kalulut tú-tú matadda, kiseddangan sikuat tubudda. Tápoi ai leú et sia, tá momoi raputalimou, kalulut sigalaira sabagei. Iageti ai leú sia mitsá sabagei, bulat teúra lé tá raputatalimou, bulé ioi rapuukú galajet Taikamanua. Oto kasei simakolou ka бага ka nganturat néné, kauan rasiló nia.

¹³ Iageti lepá, oi sia sipasitataroaké tatoga ka tubut Jesus, bulé isukat'aké samba itiddouaké sia ka tubut Taikamanua. Tápoi arapugoluki lé sia sipasiuluinia

¹⁴ Oto kuanangan ka matadda sipasiuluinia Jesus, "Eddangan nia raoi tatoga ka tubukku! Bá kekera kam sia, aipoí sirimanua kelé néné lé te, ibabailiu saladdou paamian Taikamanua.

¹⁵ Iageti kaunangan kabeinia ka utéra, Jesus, sukat'akénangan leú et sia. Lepá tui nia Jesus, sedda

¹⁶ Ka sara gogoi, amoi sara silainge ka tubut Jesus, masikua ka matania, "Guru, aponia simaerú bulat galaiakenenku, bulé ioi kuikep'aké purimanuaiat sipulelelek samba simatom?

¹⁷ Iageti kuanangan ka matania Jesus, "Nurereréaké kodda ka tubukku pagalaiat oniakenen simaerú? Sarat Sara lé simaerú. Oto ké ai obánu murimanua, kau nureddet sangamberi surukat Taikamanua.

¹⁸ Alegina lé nia silainge, "Surukat sikapiga poi?" Iageti kuanangan ka matania Jesus, "Buí nupamatei, buí nupaelet, buí nupanangkou, samba buí numuneng'aké boko

¹⁹ kau nusurú ukkui sambat inam. Kau imakaté bagam ka tubudda saaleinu sirimanua, kelé leú et katet bagam kekeu ka tubum.

²⁰ Oto kuanangan nia ka sia silaingé ka tubut Jesus, "Sangamberinia surukat sikuam ka tubukku néné, akureddet'an. Apangan lé onia simagulai?

²¹ Pelé nga-ngan Jesus ka tubunia, "Ké nuobá imasappru pueerúnu, ei ekeu nusakiaké sangamberinia bibiletnu. Iageti bulagat sakit bibiletnu nenda, parubeinungan nia ka tubudda simagebá, oto iapeité nusese pukayoat sibara ka manua. Lepá oi ekeu nutut aku!

²² Kelé aiarep nia sikuat Jesus néné, silaingé, tuinangan leú et ka reu-reu бага, kalulut makopé poí kayonia

²³ Pelé nga-ngan Jesus ka tubudda sipasiuluinia, "Bulat sibulatnia te néné kukukua ka matamui; bulat tubut mabesí te ibailiu sia laddou paamian Taikamanua, ka sia simakayo

²⁴ Samba kuanenku mitsá ka matamui; bulat onta peilé te malabbei tugurú ka matat pajjaí, ka tubudda sia simakayo, tugurú ka Laggai Taikamanua Sibau.

²⁵ Oto kelé araarep nia sipasiuluinia sikuat Jesus néné, makiseinangan ka bagadda. Belan nga-nganda lé, "Ké kisé baí galainia, kaseian lé tupaaarau?

²⁶Iageti kinerenangan sia Jesus, kuanangan ka matadda, "Kirénangan tedda, ka sirimanua tá momoi! Tápoi ka Taikamanua geti, tá anai tá momoi igalai.

²⁷Oto kuanangan nia ka sia si Petrus ka matat Jesus, "Itsó peité, pat galak'akémaian sangamberinia, kuoi kai masitut ekeu. Aponia iaaké Taikamanua kakai?

²⁸Tápoi kuanangan ka matadda Jesus, "Bulat tubut sibulatnia te néné kukukua ka matamui, Muuuddet te Togat Manusia ka uddenan purimataatnia sipulubeunan, ka Laggai Taikamanua Sibau. Oto ka tetret nenda, kam sipuoni sipasiului-Ku, nukukudduji leú te kam ka kam, sipulurua uddenan purimataat, masihakimi sipulurua muntogat ka Israel

²⁹Oto sangamberi sikaddiuké lalepnia, elé sasarainania sambat samaniunia; sikaddiuké ukkui sambat inania, elé tatogania, elé monenia kalulut aku, rasisiló mitsá silinia sangotu ngaoleat iginia. Samba isisilo leú et mitsá purimanuaiat sipulelelek samba sitaitatata

³⁰Tápoi maigi sia kineneiget, siboiki bailiu sikatei-tei, iageti mitsá kineneiget leú et, sikateitei bailiu siboikí."

20¹"Purimataat Taikamanua geti, makeré lé nia kelé ka pasikat néné: Ai sara tuan sibara monen anggur. Mamatsep peilé bela nia ka gerat masigaba sirimanua upajetnia mugalai ka monen anggurnia

²Oto kelé aipakeré bagadda igit upadda siloketda ka bagat sangagogoi, koiniakénangan sia raei mugalai ka monen anggurnia

³Ka bóbó siba simatsep, bela nia mitsá sibakkat monen anggur néné, ailinangan piga pá sia sipuririó sitagalai ka pasar

⁴Iageti kuanangan ka matadda, 'Kenan kam mugalai ka monen anggurku. Ai leú kuaké upamui sipasesese igit siloketmui.

⁵Oto eirangan leú et. Ka bóbó pulu rua sinágó samba ka bóbó telu kasoibokat, bela nia mitsá sibakkat monen anggur néné, galainangan kelé kisedda leú et

⁶Oto, elé ka bóbó lima ka soibokat, bela nia mitsá sibakkat monen anggur néné, itsónangan ai peilé sia sitaipugagalai. Kuanangan ka matadda, 'Sarat murió lé kodda nugagalai kam sené, sanganantat

gogoi, bulat beri apa pá tá anai nugagalai kam?

⁷ Pelé nga-nganda ka tubut sibakkat mone, 'Tá anai sia siobá masisogai kai mugalai.' Iageti kuanangan nia ka matadda sibakkat mone néné, 'Ké kisedda baí galainia, kenan kam mugalai ka monen anggurku.

⁸ Kasoibokat, kuanangan ka matat mandurnia sibakkat monen anggur néné, 'Sogai sia sangamberidda sieei mugalai ka mone, lepá bayanungan upadda sene-senenda, taddaakénu lé nia boikí, ka sieei ka tei-tei, pat aili ka sia sieei boikí.

⁹ Iageti oirangan leú et sieei mugalai barania ka bóbó lima kasoibokat. Silórganan pasasangaperak sia iginia

¹⁰ Lepá oi sia ka sia siupaji siboikí, sipugagalai barania kasimatsep. Bulat ka bagaddangan lé te ka sia néné, bulat maiigi rasisiló upadda. Oto pasasangaperak leú et sia, arasiló

¹¹ Kelé arasiló nia bulagatda, pungúngukiddangan leú et sibakkat mone

¹² pelé nga-nganda ka tubunia, 'Sarat sanga jam lé burúnia ka sia arapugalai

siooi ka tei-tei. Tápoi anupakeréaké lé upadda ka sia, kelé nuntut upamai ka kai, siorik rakat sulu mugalai, ka bagat sangagogoi burúnia!

¹³Iageti kuanangan nia ka matat sara ka talagadda sipugagalai, sibakkat mone néné, pelé nga-ngania, 'Kipa, ale saraina, tá te akupajo ekeu. Tá poi keret bagatta atatiboi nia nusiló upam sangaperak ka bagat sangagogoi

¹⁴Oto, aikoíné upam; lepá nusilo nia, tui ekeu. Aipoí kaku, kuobá kukau upadda sieei mugalai sikatei-tei, kelé nuntut upam siakéku kekeu

¹⁵Tá poi momoi kugalai siobáku ka bibiletku? Maooro kodda matam, kalulut anggai bagakku néné?'

¹⁶Iageti kuanangan mitsá ka matadda Jesus, "Kisedda leú te galainia, sikatei-tei bailiu siboikí, samba leú et, siboikí bailiu sikatei-tei.

¹⁷Talagat pueenung nia Jesus sambadda sipasiuluinia raailiaké Jerusalem, sogainangan sia sipasiuluinia raparurú saradda. Iageti kuanangan ka matadda

¹⁸"Arep'aké kam kuanenku néné! Ka Jerusalem te taei kam kineneiget.

Sedda te rasesegéaké Togat Manusia ka kabeira tai imam sabeu sambat tai guru paamian

¹⁹Iageti ukum'akérangan nia simateiakenen. Lepá kaurangan nia ka kabeira sipuarat sabulungan. Paloloirangan nia, lepá paoreirangan leú et nia. Lepá mitsá, mateiakérangan nia. Tápoi ka gogoi sikatelunia, suruakénangan nia mitsá Taikamanua.

²⁰Lepá oinangan leú et sara Ina, iaté sinanalep Sebedeus, sambadda tatogania ka tubut Jesus. Purappoddangan leú et ka matat Jesus masitiddou kiddiyet bagadda

²¹Iageti kuanangan ka matadda Jesus, "Aponia kiddiyet bagamui, Ina?" Kuanangan nia Ina ka matat Jesus, "Néné lé paniddogatku ka tubum; bulé nukau sia tatogakku néné sara kai kattoetnu, samba sara kai katsiunu, ka purimataatnu.

²²Oto kuana lé nia ka matadda Jesus, "Tá nuagai kam apa tiddogetmui. Kipa maró leú bagamui nuló kam ló sibara ka pulokat pangoringan akenen ka tubukku loketku?" Alegidda lé nia ka sia, "Maró bagamai.

²³ Oto kuanangan mitsá ka matadda Jesus, "Kirénangan tedda nuloló kam ló sibara ka pulokatku. Tápoi masisaú-saú kasonia mukukuddu kai kattoetku samba kai katsiuku geti, tá aku masitetéuaké. Aipoí kudduatda lé sinaúsaú Ukkuiuku sikuddu ka manua.

²⁴ Kelé araarep nia ka sia sipasiului sabagei, magolúnangan bagadda ka tubudda tairua, sipusasaraina néné

²⁵ Kalulut néné sogainangan sia sangamberidda sipasiuluinia Jesus, kuanangan ka matadda, "Kelé siagaimui, sia sautéra tai bangsa ka polak néné, sitaimatonem бага ka tubut Taikamanua, sarat masipaorei tai rayatda lé ragagalai. Samba sauté sabeu siutéaké sia leú et, sarat mugege lé ragagalai ka tubudda

²⁶ Tápoi kam geti ka kam, buí nugalaiaké kam nia kelé sigalaiakenenda ka sia néné. Tápoi kasei siobá maabeu tiboí tubu ka talagamui, buítá ibailiu sipuukú kam

²⁷ Ialeú et, kasei siobá muuté ka talagamui, buítá ibailiu nia paguguletmui

²⁸ Kelé ka sia Togat Manusia, aoi ka polak néné, tá bulé tapuukú nia, tápoi

masipuukú sita lé, samba masibuluaké engania, masitebui sirimanua simigi.

²⁹ Kelé arakaddiuaké Jeriko, oirangan leú et simigi, masitut Jesus

³⁰ Iageti ai sia rua simapeset mata muuuddet ka bet-bet enungan.

Kelé araarep nia itusabau Jesus, pugereirangan leú et, pelé nga-nganda, "Ale Togat Dapid, kau imakaté bagam ka tubumai!

³¹ Oto pugolukiddangan sia sirimanua simigi, aséakérangan leú et sia bule rapumeng-meng. Tápoi iapeí raabeuaké nga-nganda musoga, masikua, "Ale Togat Dapid, kau imakaté bagam ka tubumai, Tuhan!

³² Iageti puarinangan Jesus, sogainangan sia, pelé nga-ngania ka tubudda, "Apa nukikiddiy kam kugagalai ka tubumui?

³³ Iageti kuaddangan ka matania, "Bukáaké matamai, bulé imakoinong matamai.

³⁴ Oto makaténangan bagat Jesus ka tubudda, rapenangan matadda. Iangan leú et nia koinong-aimakoinong matadda. Iageti ei sia masitut Jesus.

21 ¹Iageti kelé aramalegre ka Jerusalem, kei raaili Betpage, iaté ka bet-bet Leleu Zaitun, koiniakénangan sia rua sipasiuluinia Jesus, raei boikí

²Kuanangan ka matadda, "Kenan kam ka laggai simatotoilá ka matatta nenda. Tá mauju itsómuian sangamuneng kalidei aina kasesereat ruania toganía. Iageti rugutmuian nia ruania, abbitmuian nia sené

³Oto ké bara sia sinou-nou kam, rakua apa pá ka tubumui, kuamui lé nia, Ai kauna nia si Tuhan! Iapeité raobáaké nuabbit kam nia.

⁴Ibabara geti kelé néné, bulé ipuaili lé kelé ka sikuat nabi, kisé

⁵"Kua kam ka matat Sion, Aian nia momoi Rimatam. Simarepé paatuat lé nia, samba sipukakalidei, sara togat kalidei sinanalep.

⁶Iageti eirangan leú et ruadda, masigalaiaké kelé sikuat Jesus ka matadda

⁷Abbitrangan leú et kalidei ka tubut Jesus ka ruania toganía. Apóakérangan leú et saraubára ka tei-tei kalidei. Lepá jananginangan nia Jesus tei-tei kalidei néné

⁸Maigi leú sia sedda amasiapóaké saraubára ka enungan. Iageti sabagei mei managgri paran-ran loiná, parappitdangan nia ka talagat enungan

⁹Sirimanua simigi sipuboboikí samba sipueenung ka tei-tei Jesus, ai sia mueenung ai sia musosoga masikua, "Taumun'aké kam nia Togat Dapid! Mauktuk te nia siooi ka onin Tuhan! Taumun kam Taikamanua ka manua ka Pata!

¹⁰Oto kelé aitugurú Jesus ka Jerusalem, bulat gaú lepá sirimanua sedda. Pelé nga-nganda, "Kasonia néné?

¹¹Iageti alegiddangan nia ka sia sipasitutut Jesus, "Nia té néné Nabi sipuoni Jesus, sibara ka laggai Natsaret ka Galilea.

¹²Iageti tugurúnangan leú et Jesus ka Uman Taikamanua, pakeklejinangan sia sipasasaki sedda. Pabailúnangan mejadda sipasisisiliy bulagat, sambat uddenanda sipasisasakiaké marpati

¹³Kuanangan ka matadda Jesus, "Ka Buko Sipunenan, ai atusurat'aké sikuat Taikamanua kisé, 'Uma paniddogat lé Umangku néné.' Tápoi anubailiuaké lé kam nia kudduatda sipararau-rau!

¹⁴ Oto maigi sia simapeset mata sambat simasakit, amei masiailiaké Jesus Ka Uman Taikamanua, iageti aleakénangan leú et sia

¹⁵ Tápoi ka sia geti tai imam sabeu sambat tai guru paamian, bulat mangoí-ngoí bagadda masiitsó kerek, sigalai Jesus. Beri leú et masiarep gaú-gaúra tatoga ka Uman Taikamanua sipasikukua, "Tuumun'aké lé nia Togat Dapid!", bulat mangoí-ngoí bagadda

¹⁶ Pelé nga-nganda ka tubut Jesus, "Kipa, ai leú nuaarep sikuadda néné?" Iageti kuanangan nia ka matadda Jesus, "Oo, aikuaarep. Tápei poi anubatsa kam ka Buko Sipunenan sipasikukua, 'Akupangantrungan sia tatoga sikebbukat sambat tatoga sigoisó rapasiumun sipulelelek?"

¹⁷ Iageti kaddiukénangan sia Jesus, bela nia ka Jerusalem, ei nia ka laggai Betania mugogoi

¹⁸ Iageti simatsep, ai nia totoili Jesus iailiaké laggai, againangan tubunia laje

¹⁹ Itsónangan sangaloiná sileu ka bet-bet enungan. Einangan leú et itaget'aké nia. Tápoi beri sangambua tá aisease buania, sarat buluknia lé, lepá.

Oto kuanangan ka tubut sileu néné Jesus, "Táan te babara buam, burú!" Iageti malajúnangan leú et

²⁰ Oto bulat kisei lé ka bagadda sipasiuluinia Jesus masiitsó sigalai Jesus néné. Iageti kuaddangan nia, "Kipa te aigalai aimaruei aimantei loinat sileu néné?

²¹ Iageti kuanangan ka matadda sipasiuluinia Jesus, "Ké matonem bagamui samba ké tá marua bagamui ka tubukku, tá isoppi ioi nugalai kam ka kam kelé sigalaiakenenku kaku ka loinat sileu néné. Ialeú et, tá sarat nenda momoi nugagalai kam, tápoi beri leú et ka tubut leleu néné, momoi nukua kam ka tubunia, 'Akkat'aké tubum, nuribbaiaké tubum ka koat': iageti puailinangan leú et

²² Aipoí apa lé nutiddou kam ka paniddogatmui, tá isoppi ibara, sarat kau lé imatonem bagamui ka tubukku.

²³ Lepá toili nia mitsá Jesus ka Uman Taikamanua. Gurú nia sedda mungantoman. Ai nia mungangantoman, lotsit-aratulotsit tai imam sabeu sambat tai bajára tai Jahudi, rataget'aké Jesus, masinou-nou nia, pelé nga-nganda,

"Kaipa pubakkanan nia iooi nugalaiaké sangamberinia néné? Kasonia amasi aké hak néné ka tubum?

²⁴Tápoi kuana lé nia ka matadda ka sia, Jesus, "Aku kaku leú et, kobá kunou-nou kam ka kam. Teret alegimui nia panounogatku néné, iapeité poiIiatkungan nia ka matamui, kasei amasi aké hak ka tubukku, iooi kugalaiaké sangamberinia néné

²⁵Kasei amasikau hak kai Johannes, ipasiraraú? Taikamanua, elé sirimanua?" Iageti patibojiddangan nia ka sia tai imam sabeu sambat tai bajára tai Jahudi, pelé nga-nganda, "Ké takua baí kam ka matania, 'Ka Taikamanua lé aibara haknia,' tá isoppi ikua ka matatta ka sita, 'Oto ké ka Taikamanua baí aibara haknia, angoi tá imatotonem bagamui ka tubunia?

²⁶Iageti mitsá, ké takua baí ka matania, 'Ka sirimanua lé aibara haknia,' malotó sita ka tubudda sirimanua simigi, ai lé poí rapunanabi nia ka sia si Johannes

²⁷Bailiu kuadda lé ka matania, "Tá kuagai kai." Iageti kuanangan leú ka matadda ka sia Jesus, "Tá poí nuagai kam ka kam, oto aku kaku leú et, tá leú

te kukukua ka matamui, kasei ka hak
iooi kugalaiaké sangamberinia néné.

²⁸Iageti kuanangan nia mitsá ka
matadda Jesus, "Oto kipa siripot
sipinaatumui ka kam, pagalaiat néné?"
Ai sara ukkui sibara tatoga rua
taimanteu. Oto ei nia ukkuira néné ka
tubut togonia sikebbukat, kuanangan ka
matania, 'Sirou, kenan pei kineneiget
mugalai ka monen anggur.

²⁹Iageti kuanangan nia, 'Tá kobá mei.'
Tápoi, lepá oleinangan bagania mitsá,
iageti einangan leú et ka monen anggur

³⁰Lepá ei nia ukkuira néné ka tubut
togonia sisulé, kuanangan ka matania
kelé nenda leú et. Iageti aleginangan nia
ka sia toga sisulé néné, ikua ka matat
ukkuinia, 'Kauan, Ukkui, ai leú kuei.'
Tápoi tá amei nia

³¹Oto karuadda tatoga néné, kasonia
amasigalaiaké siobat bagat ukkuira?"
Iageti kuaddangan nia tai imam sabeu
sambat tai bajára tai Jahudi ka matat
Jesus, "Toga sikebbukat lé." Oto
kuanangan ka matadda Jesus, "Kau
imatonem bagamui ka sikuakku néné:
Sipuukú pajá samba tainanalep simaolop

tubu peilé te muboboikí ibabailiu
sapaamian Taikamanua, ka kam

³² Aipoí masipangantru kam enungan
puririmanua siripot obaket bagat
Taikamanua lé, aioi ka sia si Johannes,
tápoi tá amatonem bagamui ka
ngantomannia; sipuukú pajá samba
tainanalep simaolop tubu lé, amatonem
baga ka tubunia. Aipoí ka kam
néné, kenanen aian nuiitsó kam
sangamberinia, tá leú et nubabauaké
kam paatuatmui, samba tá leú et
matotonem bagamui kai Tuhan.

³³ Iageti kuanangan ka matadda Jesus,
"Arep'aké kam mitsá kutiboi ka matamui
sara pasikat néné. Ai sara si tuan
oniakenen sibakkat laggai; ai aiuremi
sangamata monen anggur. Kekrenangan
nia pat bokkó. Ugguknangan kudduat
pametsunan suat anggur, samba
rióakénangan kudduat pujagoat.
Lepá sewaakénangan nia ka tubudda
sipumomone, iageti tuinangan leú et ka
laggai bagei

³⁴ Kelé aiaili tetret pasimoneiat buat
anggur, koiniakénangan sapaguguletnia
si tuan, raei masitiddou rubeiatnia ka
sia, ka sipumomone

³⁵ Tápoi aralabá lé sia sapagugulet
tuan néné, sipuukú mone: Oto sara
rabóbó, sabagei ramateiaké, samba
aleira sabagei rapabaijungi bukkú

³⁶ Iageti koiniakénangan mitsá
sapaguguletnia sabagei, si tuan sibakkat
mone néné, saliu peilé igidda sieei boikí.
Tápoi kisedda leú et aragalaia ké ka
tubudda ka sia

³⁷ Oto lepá bulat toganangan lé
aikoiniaké si tuan néné ka tubudda
sipuukú mone. Sipinaatunia poí situan,
'Tá isoppi rahormati nia togakku néné.

³⁸ Tápoi kelé araitsó nia sipuukú
mone, togat tuan sibakkat mone néné,
patiboddangan pasasambadda, pelé
nga-nganda, 'Nia té néné sipasiikep'aké,
kau tamateiaké kam nia, bulé ioi ka
tubutta ikep'akenennia!

³⁹ Iageti labáran nia toga néné,
ribbaiakérangan nia ka gerat, lepá
mateiakérangan leú et nia.

⁴⁰ Oto nou-nounangan sia Jesus, pelé
nga-ngania, "Ké toili baí nia si tuan
sibakkat mone néné, kipa igagalai ka
tubudda sipuukú mone néné?

⁴¹ Iageti alegiddangan nia, kuaddangan,
"Bulat tá isoppi ipamatei sia

sirimanua sikataí paraboat néné,
lepá sewaakénangan monen anggurnia
néné ka tubudda sabagei siobá masikau
rubeiat siloketnia ka sia, ké iaili tetret
pasimoneiat.

⁴² Oto kuanangan ka matadda Jesus,
"Tápei poi anubatsa kam sitususurat
ka Buko Sipunenan sipasikukua kisé?
'Bukkú siribbaiakenenda tai tukang
aibailiuan nia bukkú bongan inan arigi. Si
Tuhan lé amasigalai néné bulat makopé
laingenia!'

⁴³ Iageti kuanangan ka matadda
Jesus, "Repdem kam sikuakku néné,
sangamberinia rubeiat sibara ka
Taikamanua, akenen nia ka tubumui,
kalulut katuooniakémui sikauman
Taikamanua, iaaláan lé Taikamanua ka
tubumui, ikau nia ka bangsa simareddet
ka surukatnia

⁴⁴ [Aipoí kasei sibebelé ka uddut bukkú
néné, gatsá; samba kasei isaksak bukkú
néné, ngititnangan nia pat bailiu abu.]

⁴⁵ Oto kelé araarep nia tai imam sabeu
sambat tai Parise pasikat Jesus néné,
againangan bagadda sasailúna sia Jesus

⁴⁶Iageti gelairangan ralabá nia. Tápoi malotó lé sia ka sirimanua simigi, ai lé poí rapunanabi nia ka sia Jesus néné.

22 ¹Lepá panibonangan mitsá ka matadda sirimanua simigi Jesus, ka pasikat

²pelé nga-ngania, "Purimataat Taikamanua geti, makeré lé nia kelé ka pasikat néné: Ai sara rimata sibaraaké punen putalimogat ka togonia simanteu

³Iageti koiniakénangan paguguletnia rimata raei masisogai sia sipinaleleknia siboikí, raoi ka punen putalimogat. Tápoi beri sia sara siobá mei mupunen

⁴Lepá koiniakénangan sapaguguletnia sabagei, rimata, kuanangan ka matadda, 'Segéaké kam ka matadda sinogai: Komen ka punen, amatarek'an. Jauí samba togat jauí simómóakenen atujájáan. Amatarek'an sangamberinia. Kauan konan'an kam ka punen putalimogat!

⁵Tápoi tairauma sinogai ka punen, bulat beri puletseira nia pasogaiat néné. Amei lé sia ka eijatda; ai sieei ka monenia, iageti sabagei mei ka galajetda

⁶Tápoi sabagei masilabá sapagugulet rimata lé aragalai, pabóbokiddangan sia, lepá mateiakéरण leú et sia

⁷Oto kelé aiarep nia rimata sigalaira ka tubudda sapaguguletnia, pugolúnangan leú et simakopé. Koiniakénangan tai tenterania masipamatei sipasimamateiaké sapaguguletnia. Iageti labóरण leú et laggaira

⁸Lepá sogainangan sia sapaguguletnia, kuanangan ka matadda, 'Punen putalimogat amatarek'an, tápoi sia tairauma sinogai, táan mateú sia masisiló pasogaiat

⁹Kenan lé kam kineneiget ka enungan sabeu. Bulat pat igi sia nusogai kam, moi ka punen putalimogat néné.

¹⁰Iageti eirangan leú et sapaguguletnia ka enungan sabeu, masirurúaké sia sangamberi siailidda ka enungan, sirimanua simatopit sambat sikataí paraboat. Oto pat sut kudduat putalimogat, sarat tairauma

¹¹Lepá gurú nia rimata masilelek'aké sia tairauma. Iageti itsónangan sara ka talagadda tairauma sitaipakei saraubá pupunen

¹² Kuanangan ka matania rimata, 'Ale, suruak, kipa anugalai aioi anutugurú sené sitá leppei pupunen?' Tápoi beri sangatakó tá amoi aibelaaké nga-ngania

¹³ Iageti kuanangan ka tubudda sapaguguletnia rimata, 'Kauan, kabé kam rere sambat kabeinia sirimanua néné, lepá ribbaiakémuian nia ka gerat ka simagep-gep. Sedda te ipusosou sambat ipangongorik.'

¹⁴ Oto lepáakénangan ipupasikat Jesus, kuanangan ka matadda, kisé, "Maigi sia atusogai, tápoi goisó lé sia atupiliy.

¹⁵ Iageti patagetdangan pasasambadda tai Parise rapatiboji kipa rapaeerú, bulé ioi rajoaké Jesus, ka panounogat

¹⁶ Oto koiniakérangan sipasiululira sambat piga pá sia saladdou sipusasara ka mungkuat Herodes, masukua ka matat Jesus, "Guru, kuagai kai roipot paatuatnu. Bulat tá nugigígí nungantoman'aké siobat bagat Taikamanua sibailiu puuktunganda sirimanua. Tá mareré-ré ekeu ka sipinaatudda kasei pá. Aipoí kekeu, bulat tá nurarasei sirimanua

¹⁷ Oto kalulut néné, kua peité ka matamai: Siripokat ka aratta baí nia,

momoi leú pá takau pajá kai Kaisar, elé tá?

¹⁸ Ka sia Jesus, ai lé iaagai sipinaatudda sikataí, ka tubunia, lulut néné kuanangan ka matadda, "Ale kam sipatataju! Nugagaba kodda kam enungan bulé ioi nujoaké kam aku

¹⁹ Patoilá peité kam tubut bulagat, kaunenmui masibaya pajá!" Iageti kaurangan ka tubunia bulagat sangaperak

²⁰ Oto nou-nounangan sia Jesus, kuanangan ka matadda, "Kasei tularat samba kasei oni sitususurat ka tubut bulagat néné?

²¹ Alegiddangan nia, pelé nga-nganda, "Tularat Kaisar." Oto kuanangan ka matadda Jesus, "Ké kisedda baí nia, bulé apa sipuoni kai Kaisar, kaumuian nia ka tubut Kaisar, samba apa sipuoni ka Taikamanua, kaumuian nia ka tubut Taikamanua.

²² Oto bulat kisei lé ka bagadda araarep katukolobat sikuat Jesus ka matadda. Iageti, tuirangan leú et sedda, rakaddiuaké Jesus

²³ Ka gogoi nenda leú et, oi sia piga pá tai Saduki masiailiaké Jesus. Sia

néné iaté saladdou sitaikatonemi
katususurudda mitsá simamatei

²⁴ Kuaddangan ka matania, "Guru,
aingantruaké ka sia si Mose kisé:
Ké ilangó baí sara simanteu, sitá
tuppai tubu, buítá italimouaké
sipulumang'akenen nia, sarainania, bulé
ibara tuppai tubut silalangó

²⁵ Oto ai amuaili sené pitu sia
sipusasaraina. Iageti putalimounangan
sikebbukat, tápoi lepá langónangan nia
sitá tuppai tubu. Iageti kaddiuakénangan
nia sipulumang'akenennia néné, bulé
italimouaké nia sarainania

²⁶ Tápoi tá amauju, langónangan leú
et nia ka sia sarainania néné, tá leú et
abara tuppai tubunia. Oto kisedda leú te
amuaili ka sarainania sikatelú pat aili ka
sikapitu, sarat tá abara tuppai tubudda

²⁷ Kalepakatnia langónangan leú et nia
ka sia sinanalep néné

²⁸ Oto ké iaili baí tetrenia ibara
katusuruat tubu simamatei,
kasonia ka talagadda sipusasaraina
néné, masipalalalep'ake nia sinanalep
néné? Aipoí kapitudda néné, sarat
arapalalep'akéan nia.

²⁹ Iageti kuanangan ka matadda Jesus, "Bulat masele sikuamui, kalulut tápei poí ikokolou ka bagamui ka sitususurat ka Buko Sipunenan, samba leú et geget Taikamanua

³⁰ Aipoí ké tusuru sia mitsá sirimanua ka simamatei, táan mutatalimou sia mitsá, tápoi kelé puririmanuanda samalaika ka manuangan lé rauului

³¹ Kipa, tápei poi anubatsa kam sikuat Taikamanua pagalaiat katusuruat tubudda simamatei? Aikua Taikamanua

³² 'Aku te Taikamanuan Abraham, Taikamanuan Isak, samba Taikamanuan Jakob. Aipoí ka sia Taikamanua, tá Taikamanuanda simamatei. Tápoi Taikamanuanda lé sipuririmanua!

³³ Oto kelé araarep nia sirimanua simigi katukolobat sikuat Jesus, makiseinangan ka bagadda simakopé ka ngantomannia

³⁴ Oto kelé araarep nia ka sia tai Parise, taiooi nia aratepaaké ngungunda tai Saduki ka tubut Jesus, parurúrangan leú et ka sia

³⁵ Ai sara ka talagadda, iaté siguru paamian amasisibo Jesus, ka panounogat

³⁶ Pelé nga-ngania, "Guru, surukat sikapiga, bulat oniakenen sabeu ka bagat surukat Taikamanua?

³⁷ Iageti kuanangan ka matania Jesus, "Kau imakaté bagam kai Tuhan Taikamanuam, bulat tubut sibara ka sangamuinet paatuatnu, samba bulat tubut sibara ka sangamuinet purimanuaiatnu, samba kau bulat teret sapprut ka tubum nugalaiaké nia

³⁸ Iaté nenda oniakenen siabeu samba siboikí

³⁹ Iageti surukat sikaruania, makeré lé kelé ka surukat siboikí: Kau imakaté bagam ka tubudda saaleinu sirimanua, kelé leú katet bagam kekeu ka tubum

⁴⁰ Sangamberinia pasuru-surukat ka arat, kelé siaket Mose sambat singantruakenenda tai nabi, mubongan ka sirua surukat néné.

⁴¹ Iageti ai peilé sia parururú tai Parise sedda, nou-nounangan sia Jesus, pelé nga-ngania

⁴² "Kipa sipinaatumui ka kam pagalaiat Rimata Sipaarau néné? Kasei punuteteu nukukua kam nia?" Alegiddangan nia, pelé nga-nganda, "Punuteteu Dapid.

⁴³ Oto kuanangan ka matadda, Jesus, "Ké kisedda baí nia, angoi itotoroji paatuatnia Rimata Dapid, Ketsat Sipunenan, bulé imamuneng ka bagania, Rimata Sipaarau néné iaté Tuhannia? Kalulut aikua poí si Dapid kisé

⁴⁴ 'Aikua si Tuhan Taikamanua, ka tubut Rimata Sipaarau aku: uddet'aké ekeu kai kattoetku, teret kauku sia murappo tai saggaknu ka matam.

⁴⁵ Oto ké ipututuhan leú et nia ka sia si Dapid Rimata Sipaarau néné, kipangan lé ituooniaké nia punuteteu Dapid?

⁴⁶ Tápoi bulat beri oi araalegi nia tai Parise, panounogatnia Jesus néné. Bulat baranangan gogoi nenda, beringan sia simaró бага masipanounogi apa pá ka tubunia.

23 ¹ Iageti panibonangan Jesus ka matadda sirimanua simigi sambat ka matadda sipasiuluinia, pelé nga-ngania

² "Ka sia ka tai guru paamian sambat ka tai Parise ai atukau gege masibagaaké surukat Mose

³ Oto kau nureddet samba nugalaiaké kam nia sangamberi sikuadda ka matamui. Sarat bá lé uului kam galai

tubudda. Aipoí ka sia néné, sangamberi sikuadda, tá ragalaiaké

⁴Simabesí tugalaiaké lé rakakau galaiakenenda sirimanua, samba surukat simabesí turedet lé rakukua ragalaiaké sirimanua, tápoi bulat beri goisó tá rarorop'aké sia, bulé ioi ragalaiaké nia

⁵Sangamberinia sigalaira, sarat bulé ibara igbungen sirimanua lé ragagai nia. Teúra lé ralilioaké talit paniddoura, samba rapanananta sipujajai saraubára

⁶Rapipiliy lé kudduat simakopé erú ka pupunenán, sambat ka kudduat sikokoiaenen ka sauté lé rapuuuddet ka uma paniddogat

⁷Bulat igegeilauan lé sia raparoroaké sia sirimanua ka pasar, sarapei rakua sia, 'Guru.

⁸Tápoi kam geti ka kam, buí nuobá kam rakua kam, 'Si Guru'. Aipoí sarat sara lé Gurumui; iageti kam ka kam, musaraina lé nugagai kam

⁹Samba leú et, buí nupuukkui kam kasei pá ka polak néné; aipoí sarat sara lé Ukkumui, iaté Ukkui sikuddu ka manua

¹⁰Samba leú et buí nuobá kam rakua kam 'Sauté'; aipoí sarat sara

lé puuteketmui iaté Rimata Sipaarau
sitonéakenen Taikamanua

¹¹ Siabeu tiboí tubu ka talagamui, buítá
ibailiu nia sipuukú kam

¹² Aipoí kasei sipabuak tubunia, nia
té tuparerepé, samba kasei siparepé
tubunia, nia té tububuak'aké.

¹³ "Mateimuian te, kam tai guru
paamian samba kam tai Parise! Aipoí
sipatataju lé kam néné! Nukekekreaké lé
kam sia siobá moi muladdou ka paamian
Taikamanua. Kam ka kam, tá nuobá
kam ibailiu kam saladdou paamian
Taikamanua, tápoi ké bara sia siobá
tugurú, pasailajimuian leú et sia

¹⁴ [Mateimuian te, kam tai guru
paamian samba kam tai Parise: Aipoí
sipatataju lé kam néné. Nupatataju lé
kam sia tailumang, samba nupararaauragi
lé kam bibiletda. Oto bulé tá ituagai
kataínia sigalaimui, nantaakémuian
paniddogatmui. Iaté lulunia imakokopé
sanénia ukuman siloketmui!

¹⁵ Mateimuian te, kam tai guru paamian
samba kam tai Parise! Aipoí sipatataju
lé kam néné! Tá malelegre nuei kam,
pat talipokimuian coat, samba pat salú
nubokkó kam polak nubesíaké kam

ioi sara sirimanua muarat ka aratmui.
Tápoi kelé aioi muarat ka aratmui,
bailiukémuian nia ribbaiakenen ka api
narako. Bailiu niangan lé mitsá simakopé
kataí paraboat, ka tubumui

¹⁶ Mateimuian te, kam tai guru paamian
samba tai Parise! Aipoí sipatataju lé
kam néné! Anugelaiaké kam ka tubudda
sirimanua, kisé, 'Ké musuppa nia ka
onin Uman Taikamanua, tá iaappa nia
ka suppania; tápoi ké geti ka onin mas
ka Uman Taikamanua ipusuppa, iapeité
iaappa nia suppania.

¹⁷ Bulat sitaiagai paatuat lé kam,
simapeset matat paatuat! Kaipa bulat
siabeu: mas nenda pá, élé Uman
Taikamanua sikau mas néné maliná

¹⁸ Samba singantruakenenmui leú
bagei, kisé, 'Ké musuppa nia ka onin
pasibuluat, tá iaappa nia suppania; tápoi
ké geti ka onin buluakenennia ka uddut
pasibuluat ipusuppa, iapeité iappa nia
suppania.

¹⁹ Bulat apanganté peset nia matat
paatuatmui! Kaipa poi bulat abeu?
Buluakenen, élé pasibuluat sipaliná
buluakenen

²⁰ Aipoí ké baí ka onin pasibuluat ipusuppa, oto ka onin pasibuluat sambat sangamberi buluakenen ka uddutnia lé aipusuppa

²¹ Samba ké ka onin Uman Taikamanua ipusuppa, oto ka onin Uman Taikamanua sambat ka onin Taikamanua sikukuddu sedda lé aipusuppa

²² Samba leú et, ké ka onin manua ipusuppa, oto ka onin uddenan purimataat Taikamanua samba ka onin Taikamanua sipuuuddet ka uddenan purimataat lé, aipusuppa

²³ Bulat mateimuian te, kam tai guru paamian samba tai Parise! Aipoí sipatataju lé kam néné! Pasare-sarei, kelé laigá, kiniu, sambat raro, nukakau kam persepuluhanmui ka Taikamanua. Tápoi bulat siabeunia, sipuoni bulat besíakenen tugalaiaké ka surukat geti, kelé pasikatnia: Masigalai simaerú ka saalei, punununtut бага, samba putotopit, bulat beri puletseimui nia. Oto bulat nenda peité mateú nugagalaiaké kam, tápoi buí nujajak'aké kam bagei

²⁴ Bulat kam néné ka kam, sauté simapeset paatuat lé kam! Legú ka lómui

nukakarungi peilé kam, tápoi onta geti,
tenan lé kam guk

²⁵ Mateimuian te kam tai guru paamian
samba tai Parise! Aipoí sipatataju lé
kam néné! Sarat tei-tei pulokat samba
mangkómui lé bulat nupaliliná kam,
tápoi bagania geti bulat lolit lepá,
kalulut aipalolit nia sialakat gegemui,
nupauragi kam sia, kalulut puaalau
bagamui sikataí

²⁶ Bulat ale, kam tai Parise simapeset
paatuat! Bui kam boikí bagat pulokat
sambat mangkómui, pat liná, bulé
imaliná leú ka sia tei-teinia

²⁷ Mateimuian te, kam tai guru paamian
samba tai Parise! Aipoí sipatataju lé kam
néné! Kam néné ka kam, makeré lé
galai tubumui kelé ka tubut ratei sicut,
cat kapur; bulat malainge ituitsó ka
uddut, tápoi ka bagania geti, asut'an
patola-tolat samba sangamberi sianagat
simabuté

²⁸ Bulat kelé kisedda te galai tubumui ka
kam. Taitsó kam, bulat kéan lé simaerú
baga ka tubudda sirimanua; tápoi ka
bagat paatuatmui geti, asut'an patajuat
sambat pajoat.

²⁹ "Mateimuian te, kam tai guru paamian samba tai Parise! Aipoí sipatataju lé kam néné! Bulat simalainge lé nugagalai kam rateira tai nabi, samba kasei nuagai kam simaerú puririmanua, palatsatmuian tugudda

³⁰ Ai pei bagei nuumun'aké kam tubumui, nukua kam, 'Bulat aian baí kai ka tetretda taikebbukatmai, tá kututut'aké kai sia masimateiaké tai nabi.

³¹ Oto sené, kolou bulat tubumuian amasimuneng'aké pukakam nia néné, sapunuteteura sipasimamateiaké tai nabi

³² Kauan poí, riu-riuakéan kam nuusut'aké kam jo sitaddaakenenda taikebbukatmui

³³ Oto bulat sikataí lé baí kam néné. Niníra sikataí paraboa! Kipangan lé iooi nukatsliaké kam tubumui ka ukuman ka api narako

³⁴ Lelek'aké kam sikuakku néné: Kukokoiniaké te ka kam tai nabi, simasiku paatuat, samba tai guru paamian; sabagei numateiaké kam, iageti sabagei nusiliktengaaké kam. Ai sabagei nupaorei kam ka uma paniddogat, iageti sabagei nukukru kam,

barania ka laggai sara, pat aili ka laggai bagei

³⁵Oto bulat tuuukum'aké lé kam, kalulut pasimamateiakémui sirimanua sitá selet tubu, iaté barania ka pasimateiat Abel sitá selet tubu, pat aili ka pasimateiat Sakarias togat Berekia, simateiakenenmui ka paoggangan Uman Taikamanua sambat pasibuluat

³⁶Bulat kau imatonem bagamui ka sikuakku néné: ka tubudda reddenan néné te, ipuaaili sangamberinia néné!

³⁷"Jerusalem, Jerusalem! Sipasimamateiaké tai nabi. Sipabaijungi sapakoiniet Taikamanua pat matei. Piga ngamitsáan pá kugelai kukup-kup'aké sia sangamberi taikalaggaiatnu kelé ikau tatogania goú-goú ka tei kappónia, tápoi bulat beri bolotmui nia

³⁸Oto buji bagamui ipaalei kam Taikamanua

³⁹Bulé nuagai kam nia: Barania kineneiget táan te nuiitsó kam mitsá matakku, teret kuam, 'Tupapanukani te nia siooi ka onin Tuhan.'"

24¹Kelé aikaddiuaké nia Uman Taikamanua, Jesus, oirangan leú et sipasiuluinia ka tubunia, pasaú-

saúran ka kabeira ka Uman Taikamanua, raumun laingenia

²Iageti kuanangan ka matadda sipasiuluinia, Jesus, "Kipa, nuroró kam laingenia néné? Bulat sibulat nia te néné kukukua ka matamui, beri te sara bukkut Uman Taikamanua néné mulelegei. Aipoí tububukkat'aké lé sangamberinia.

³Lepá einangan leú et Jesus ka Leleu Zaitun. Ai nia muuuddet, oirangan leú et sipasiuluinia rapatiboaké nia kelé ka paaleiat, masikua ka matania. "Poiliat peité ka matamai ka kai, piga moi ipuaaili sangamberinia néné? Apa katuaggaiatnia ka kai masikua tetrenia kaoijanannu samba iaili ka lepakat polak?

⁴Iageti kuanangan ka matadda Jesus, "Jago kam tubumui buí rapataju kam

⁵Aipoí maigi te sia siooi masitaget'aké kam, sipuoni onigku, masikua ka matamui, 'Aku té néné Rimata Sipaarau!' Oto maigi te sia rapatataju

⁶Nuaarep te kam nga-ngan pamatei ka pasaggangan, samba katuareman pasaggangan. Tápoi buí numalotó kam. Aipoí buítá muaili sangamberinia néné.

Tápoi tápei te nia nenda gogoi kalepakat polak

⁷ Pasasaggak te bangsa ka bangsa, purimataat ka purimataat. Bulat kaipa te arep pulajeat sambat teteu sabeu

⁸ Tápoi sangamberinia sibabara néné, pasitaddania peilé, kelé galainia rapubesí saina, kei iaili rapusulé

⁹ Lepá labáranan leú et kam, kaurangan kam ka kabeira sipasiukum, bulé rapaorei sambat ramateiaké kam. Iageti pulagakiddangan kam бага sirimanua, kalulut pupapasiuluimui aku

¹⁰ Ka tetret nenda, maigi sia sisik-sik teiteina masikaddiuaké arat, pajoddangan ka tubu sambat palagáranan бага pasasambadda

¹¹ Maigi te muoottou tai nabi sipatataju, masipataju simigi

¹² Oto bulat simakopé kataí lé irarat pukakataí, pat igi sia sirimanua táan anai pukakatet бага ka bagat paatuatda

¹³ Tápoi siom'aké nia geti teret kalepakatnia, nia té tupaaarau

¹⁴ Iageti buítá tusegéaké boikí Katuareman Simaerú pagalaiat Purimataat Taikamanua, ka sangaliot polak, bulé raarep nia sangamberi

sirimanua. Oto lepá nanda, iapeité iaili tetrenia kalepakat polak.

¹⁵ "Nuiitsó te kam, 'Turot pukkataí, sipasaragai sirimanua', kelé sikuat Nabi Daniel. (Repdemenda sipasibabatsa: Lelek'aké kam apa katukolobatnia!

¹⁶ Ka tetret nenda, sia sikukuddu ka Judea, kau ratui-tui sedda, raei ka leleu

¹⁷ Sia sikukuddu ka laibó ka pata, buí ratugorosot raei masialá bibiletta ka bagat lalep

¹⁸ Sia sikukuddu ka mone, buí ratoili masialá saraubára ka laggai

¹⁹ Tápoi kataínangan te ka gogoi nenda ka sia tainanalep sibara suruket, samba saina simagoisó tatoga

²⁰ Kau lé nupaniddou kam ka Taikamanua, bulé tá iipó katui-tuiatmui ka ipot mui-mui manua, elé ipot gogoi Sabbat

²¹ Babara te paoreat sabeu ka tetret nenda, kelé sara paoreat sitaipuaaili peilé, iaté barania ka panandaat polak peilé pat aili kineneiget, samba táan babara mitsá

²² Oto ké tá baí itengai gogoinia Taikamanua, bulat beri sia sara sipuririmanua. Kalulutdangan lé

sapaamiannia, tengainangan gogoinia
Taikamanua

²³ Ka tetret nenda, ké ai sia siooi
masikua ka matamui, 'Ai nia sené
Rimata Sipaarau!' elé 'Ai nia sedda!', buí
imatonem bagamui ka tubunia

²⁴ Babara te sia sipaarau sipatataju,
samba tai nabi sipatataju. Ragagalai
te kerek sabeu, samba kiseiet, bulé
rapataju sirimanua; sambat ké momoi
baí nia sambat sapaamian Taikamanua
rapatataju

²⁵ Oto repdem kam sikuakku néné!
Kutatarek lé kutiboi nia ka matamui, kei
muaili, anuagaian kam

²⁶ Iageti ké ai baí sia sikua ka matamui,
'Ai nia sedda ka simatangeu!', buí nuei
kam sedda. Elé ké ai baí sia sikua ka
matamui, 'Ai nia sedda mulilipput ka
bagat bilí!' bulat buí imatonem bagamui
ka sikuadda

²⁷ Aipoí ioi ka sia Togat Manusia makeré
lé nia kelé torot bilá, ipukinam, barania
ka kabelaiat sulu, papparat aili ka
kabelekat sulu

²⁸ Kaipa poí ai simabuté, ai leú te sedda
seggú simakom simabuté.

²⁹ "Tá mauju, lepána lé ka sia paoreat ka tetret nenda, magep-gepnangan leú et matat sulu, samba taimatoronangan ka sia matat laggó. Belénangan leú et panyanyat barania ka manua. Oto pasabunangan leú et sia siutéaké manua ka goá

³⁰ Lepá matoilánangan ka manua toggaiatnia ka sia Togat Manusia. Ka tetret nenda pusourangan sangamberi sirimanua ka polak, raitsó ioi Togat Manusia ka tinobut manua ka gege samba ka pulatsanan sabeu

³¹ Pupiaurangan simaron samalaika. Iageti koiniakénangan sia samalaikania Togat Manusia masirurúaké sapaamiannia sibara ka siepat matat rusa, iaté, barania ka piprin manua sara, pat aili ka pipirinia sara.

³² "Alaki lé kam nia ka loinat sileu. Ké malimun samba mamé-mé rannia, samba ké itaddaaké ibela sinulania, agaimuian, amalegrengan te ibara legeu manua

³³ Kisedda leú te, ké nuitsó kam ipuaili sangamberinia néné, agaimuian bulat amalegrengan te iaili tetrenia

³⁴ Bulé nuagai kam nia! Tápei tatatá sia sangamberi sipuririmanua kineneiget, amuailingan sangamberinia néné

³⁵ Ka sia polak sambat manua tatatá lé; tápoi tiboietku geti, tátatatá lé, burú.

³⁶ "Bulat beri te sia sara siagai gogoi elé jamnia ioi. Beri samalaika ka manua, tá raagai. Ka sia leú et Togat Manusia tá iagai, bulat sarat Ukkui sikuddu ka manua lé iagai nia, lepá

³⁷ Galai kaoijanan Togat Manusia geti, makeré lé nia ka tetret aitugurú si Noak siburú ka bagat kapá

³⁸ Ainangan tá babara eba sabeu, mukom sambat muló elé mutalimou lé ragagalai sirimanua. Oto sarat nenda te rabubuluk pat ailinangan tetrenia itugurú si Noak ka bagat kapá

³⁹ Teret aitalungan lé sia sangamberidda eba, iapeité agairangan nia sibabara. Kisedda leú te muaaili ka tetret kaoijanannia ka sia Togat Manusia

⁴⁰ Ka tetret nenda, ai baí sia rua sipugagalai ka mone: Sara tuabbit, sara tugalak

⁴¹ Ai sia rua tainanalep sipanunuddú gandum: Sara tuabbit, sara tugalak

⁴² Oto kau nusuk-suk kam tubumui, tá poí nuagai kam ipot gogoi kaoijanan nia ka sia Tuhanmui

⁴³ Néné lé repdemenmui! Ké raagai baí nia ka sia sibakkat lalep jamnia ioi sinoibó sipananakkou, tá leú te ilalaú-laú nia, bulé tá ioi ratugurú sipananakkou ka bagat lalepnia

⁴⁴ Oto kau nupatarek kam tubumui. Kataibabagaiet bagamui lé poí, iooi ka sia Togat Manusia.

⁴⁵ Iageti kuanangan mitsá ka matadda, Jesus, "Oto ké kisedda baí nia, kasei oniakenen sapagugulet simatopit samba simasiku paatuat? Nia té iririóaké tuannia siutéaké saaleinia sapagugulet bagei, masikau kanda ka tetrenia

⁴⁶ Bulat simakopé beunan lé te uktuknia pagugulet néné, ké iaili nia tuannia, ai nia masigagalaiaké galajetnia

⁴⁷ Kau imatonem bagamui ka sikuakku néné, bulat tá te isosoppi iriíaké nia situannia pagugulet néné, bailiu katonemiet nia бага, masipasikeli sangamberi bibiletnia

⁴⁸ Tápoi ké sikataí paraboat lé baí nia pagugulet néné, tá isoppi ikua ka bagat paatuatnia

⁴⁹ 'Maburú peilé itoili si tuan',
oto taddakénangan masipabóboki
sapagugulet bagei, samba mukom elé
mulóan lé igagalai sambadda saaleinia
sipupupuineng

⁵⁰ Oto lepá, toili-aitoili si tuan ka gogoi
elé ka jam taibabagaiet bagania

⁵¹ Iageti palisojinangan nia si tuan,
pagugulet néné. Lepá gurúakénangan
nia ka kudduatda sipatataju. Oto
pusourangan leú sedda samba
pangorikrangan sangamberidda."

25 ¹ "Ka sia geti ioi Togat Manusia,
sipuoni Tuhan, makeré lé galainia
kelé ka pasikat néné: Ai sia pulu taiokkó
siei masipaaleiaké siputatalimou.
Senenda ai pasasara sia alito araabbit,
raei masiroroi talimouakenen

² Lima sia ka talagadda, tá raagai
paatuat. Tápoi ai leú et sia lima sabagei
siagai paatuat

³ Iageti sia taiokkó silima sitaiagai
paatuat néné, sarat sangapualitoat
lé iginia araabit tula baligetda. Tá
aratarek'aké tula baligetda mitsá

⁴ Tápoi ka sia geti taiokkó silima bagei
siagai paatuat, raabbit pualitoat, raabbit
leú et tula baligetda

⁵ Kalulut burúnia ioi talimouakenen, matuddunungan matadda sangamberidda, iageti pereprangan leú et

⁶ Oto tengamoi, maarepnangan nganngan sogá sipasikukua, 'Amoian te nia talimouakenen! Suru kam nuroroi kam nia!

⁷ Iageti tusuruddangan leú et taiokkó sipulu néné, tunamrangan leú et alitodda

⁸ Kuaddangan nia taiokkó silima sitaiagai paatuat, ka matadda taiokkó silima siagai paatuat, 'Ale, aké peité kam ka kai goisó suat alitomai, aipoí aian lé igegelai pepé ka kai alitomai.

⁹ Oto kuadda lé nia taiokkó silima siagai paatuat ka matadda, 'Tá momoi!' Babara tá iaaili tulatta sangamberitta. 'Kenan'an lé kam nusaki kam nia ka kam ka toko.

¹⁰ Iageti eirangan leú et taiokkó silima sitaiagai paatuat, masisaki tula. Ai sia memei pasaki, segé-aiségé ka sia talimouakenen. Iageti keré gurú sia ka sia taiokkó silima simatarek tubu néné, sambat talimouakenen ka pupunenan. Lepá pat-pat'akérangan leú et matatbaliu

¹¹ Kelé arabara ka sia taiokkó sabagei, pusogaddangan leú et, pelé nga-nganda, 'Ale Tuan, buká kai.

¹² Tápoi kuana lé nia talimouakenen ka matadda, 'Tá kuagai kam!'

¹³ Iageti lepáakénangan ipupasikat Jesus kuanangan kisé, "Oto suk-suk kam tubumui, aipoí tá nuagai kam gogoi elé jamnia kaoijanan Togat Manusia.

¹⁴ "Pagalaiat kaoijanan Togat Manusia sipuoni Tuhan geti, makeré lé nia ka pasikat néné. Ai sara sirimanua siobá mei ka sara laggai ka simareunan. Iageti sogainangan sapaguguletnia, bulé isegéaké ka tubudda, rapuukú sangamberi bibiletnia

¹⁵ Oto parubeinangan sia siripot siooi rapasikeli. Ka sisara aikau lima ngaribu ngamas iginia. Ka sabagei rua ngaribu ngamas. Iageti ka sisara mitsá aikau sangaribu ngamas iginia. Oto lepá tuinangan leú et

¹⁶ Ka sia pagugulet sisiló lima ngaribu ngamas, silóna lé nia, ei nia pajaga. Oto bara mitsá uktuknia lima ngaribu ngamas iginia

¹⁷ Beri leú ka sia pagugulet sisiló rua ngaribu ngamas, abara leú et ka sia uktuknia rua ngaribu ngamas iginia

¹⁸ Tápoi ka sia geti sisiló sangaribu ngamas, amei lé nia masiugguk polak, lepá lipput'akénangan bulagat tuannia sedda

¹⁹ Oto buru-burú, toilinangan leú et tuanda sapagugulet néné. Iageti taddaakérangan paadde, raadde uktuk sisesedda

²⁰ Oinangan leú et ka sia pagugulet sisiló lima ngaribu ngamas, kuanangan ka matat tuan, 'Ale Tuan, kelé bulagat siakénu kaku silima ngaribu ngamas iginia, aikoí né mitsá akusese uktuknia lima ngaribu ngamas iginia.

²¹ Kuana lé ka matania si Tuan, 'Nen. Bulat ekeu té né pagugulet simaerú бага sambat simatopit. Oto kalulut katonemiet poí ekeu ka puukuket sigoisó, bailiu matonemnangan bagakku masiaké ka tubum, puukuket sabeu. Oto kauan, gurúaké ekeu, bulé tapuangká kam бага sambatta!

²² Lepá mitsa, oi nia ka sia pagugulet sisiló rua ngaribu ngamas. Kuanangan ka matat Tuan, 'Ale Tuan, kelé bulagat

siakénu kaku sirua ngaribu ngamas iginia, aikoí né mitsá akusiló utuktuknia rua ngaribu ngamas iginia.

²³Oto kuanangan ka matania si Tuan, 'Nen. Bulat ekeu té né pagugulet simaerú бага sambat simatopit. Oto kalulut katonemiet poí ekeu ka puukuket sigoisó, bailiu matonemnangan bagakku masiaké ka tubum, puukuket sabeu. Oto kauan, gurúaké ekeu, bulé tapuangká kam бага sambatta!

²⁴Iageti oinangan leú et ka sia pagugulet sipasisisiló sangaribu ngamas iginia, kuanangan ka matat Tuan, 'Ale Tuan, kuagai simagege lé ekeu. Momoi numonei buat siureman, tá ka siuremannu, samba nururúaké buat siureman tá ka sikarap'akenennu

²⁵Oto kalulut lotóku ka tubum, ei aku masilabbú bulagatnu Tuan, ka polak. Oto aikoí né bulagatnu, Tuan.

²⁶Bulat kuana lé nia si Tuan ka matania ka sia, 'Ekeu té né pagugulet sikataí, samba sitaimamalá pei bagei! Kipa, tápei poi nuagai momoneiku tá ka siuremanku, samba rururúakéku buat siureman tá ka sikarap'akenenku

²⁷ Bulat maerú peilé nukoiriaké bulagatku ka bank, bulé ké iipó kutoili, silókungan nia mitsá bulagatku sambat bungania

²⁸ Oto alá lé kam, ka tubunia bulagat nenda, lepá kaumuan nia ka tubut pagugulet sibara pulu ngaribu ngamas

²⁹ Aipoí sibabara, tukakau peilé ka tubunia, pat pulegeinangan. Tápoi ka sitá anai geti, tuaalá peilé sibabara ka tubunia, bulé isappru

³⁰ Oto ribbaiaké kam nia ka gerat ka simagep-gep, pagugulet sitá katupunan néné. Iageti pusounangan samba pangoriknangan sedda!"

³¹ "Ké iaili tetrenia ioi Togat Manusia ka purimataatnia, sambadda samalaikania, puuddetnangan leú et ka uddenan purimataatnia sipulubeunan

³² Iageti rurúakénangan sangamberi bangsa ka matania. Rubeinangan sia bailiu rua ngabagguak, kelé galaiakenenda sipasijajago tarimeu, rapasaraaké biri-biri ka kambing

³³ Kaunangan sia kai kattoetnia, sia sigalaiaké siobat bagat Taikamanua, tápoi ka sia geti sabagei, ikau kai katsiunia

³⁴Iageti kuanangan nia Rimata ka matadda sikukuddu kai kattoetnia, 'Konan kam, kam sipanukanin Ukkuiku. Gurúaké kam ka Purimataat sinarek'akenen ka kam, barania peilé ka panandaat polak

³⁵Aipoí amalaje aku, anupakom kam aku, samba amaoggou aku, anuaké kam lóku. Amusitoi aku ka laggaimui, anunappit kam aku ka lalepmui

³⁶Amabulutut aku, anuaké kam leppeiku. Amabesí aku, amoi kam masipasikeli aku. Ai aku muuukum ka bagat penjara, anurop'aké kam aku.

³⁷Iageti kuaddangan nia ka sia, ka matat Rimata, 'Pigamoi poi Tuhan, akuitsó kai ekeu ai ekeu mulalaje, akupakom kai ekeu, elé ai ekeu maooggou, akuaké kai lónu

³⁸Pigamoi akuagai kai pusisitoinu ka laggaimai, akunappit kai ekeu ka lalepmi? Pigamoi akuitsó kai ekeu ai ekeu mububulutut, akuaké kai bibilet tubum

³⁹Pigamoi poi Tuhan akuitsó kai ekeu ai ekeu mubebesí, elé ai ekeu muuukum ka bagat penjara, akuoi kai masirop'aké ekeu?

⁴⁰ Iageti kuanangan nia Rimata ka matadda, 'Bulé nuagai kam nia: ka tetret anugalaiaké kam sangamberinia néné, kenanen ka tubudda sasarainangku sigoisó tiboí tubu lé anugalaiaké kam nia, tápoi ka tubukku lé te galainia anugalaiaké kam nia!

⁴¹ Lepá kuanangan nia Rimata ka matadda sia sikukuddu kai katsiunia, 'Katuitui kam sené, kam sitelei Ukkui! Gurúaké kam ka api sitaípepé ka sinarek'akenen Ukkui kudduat Sanitu sambat samalaikania

⁴² Aipoí amalaje aku, tá anupakom kam aku. Amaoggou aku, tá anuaké kam lóku

⁴³ Ainuaagai kam pusisitoiku ka laggaimui, tá anualá kam aku ka lalepMui. Amubulutut aku, tá anuaké kam bibilet tubukku.

⁴⁴ Iageti kuaddangan nia ka matat Rimata, 'Pigamoi poi Tuhan, akuítsó kai pulalajem, elé anumaoggou, elé akuagai kai pusisitoinu, elé pububulututnu, pubebesínu, elé katuukumnu ka bagat penjara, tá akurop'aké kai ekeu?

⁴⁵ Oto kuana lé nia ka matadda Rimata, 'Bulé nuagai kam nia: Ka taiobamui

masirop'aké sara sigoisó tiboí tubu néné,
aku lé te galainia tá anurop'aké kam.

⁴⁶Iageti orak'akénangan ka tubudda
ukuman teret buru-burú. Tápoi sia geti
sigalaiaké siobat bagat Taikamanua,
silóranan purimanuaiat sipulelelek
samba sitaitatátá."

26 ¹Lepá aitiboí nia sangamberinia
néné, Jesus, kuanangan ka
matadda sipasiuluinia

²"Kelé siagaimui, aian lé rua ngagogoi
burúnia iaaili Punen Paska. Seddangan té
iaaili gogoinia itusegéaké Togat Manusia
bulé itusiliktengaaké!

³Ka tetret nenda te raparururú tai
imam sabeu sambat tai guru paamian ka
uman Imam Sabeu sipuoni si Kayapas

⁴Rapatiboji bulé ralabá Jesus sipinakele,
lepá mateiakéranan leú et nia

⁵"Tápoi," sipinatibojidda, "buí
itugalaiaké ka ipot punen, babara
pulamagat ka talagat siberikabaga.

⁶Ai nia mukukuddu Jesus ka laggai
Betania, iaté ka lalep Simon simalubbé
simasappó, siburú

⁷lotsit-aitulotsit ka sia sara sinanalep
iailiaké Jesus. Ai aiabbít sangabuli-buli
tula simasingin simakopé kepput saki. Ai

nia mututukkú mukom, uruakénangan tula simasingin néné, sinanalep, ka utet Jesus

⁸Tápoi kelé araitsónia néné sipasiului, bara golúra, kuadda lé nia, "Tupasisibbu kodda sangamberinia néné

⁹Aipoí makeppu sakit tula néné ké tusakiaké; iageti bulagat sakit tula néné, panguruat'aké ka simagebá!

¹⁰Tápoi ai lé iaagai sipinaatudda néné, Jesus. Oto kuanangan ka matadda sipasiuluinia, "Nugegejaaké kodda kam bagania sinanalep néné? Aipoí simaerú samba umun'akenen lé poí sigalaiakenennia néné ka tubukku

¹¹Ai lé maririu-riu kababaradda simagebá, ka talagamui. Tápoi aku kaku geti, tá mariu-riu kukuddu ka talagamui

¹²Aipoí masipatarek kei iaili tetrenia turateiaké aku lé, aiuruaké tula simasingin néné, ka tubukku

¹³Repdem kam sikuakku néné! Kaipa lé te tupaarep Katuareman Simaerú sibara ka Taikamanua, ka sangaliot polak néné, katuareman pagalaiat sigalaiakenen sinanalep néné leú, tupaarep, kelé sara repdemen ka tubunia.

¹⁴Iageti einangan leú et sara ka talagadda sipulurua sipasiului Jesus, iaté sipuoni si Judas Iskariot, ka tai imam sabeu

¹⁵Kuanangan ka matadda, "Aponia nuaaké kam kaku, ké kusegéaké baí ka kabeimui, Jesus?" Iageti adderangan nia, telu ngapulu ngaperak iginia, iageti kaurangan nia ka tubut Judas

¹⁶Ka tetret nendangan té aigaba oggak sipasesese si Judas, iei masipajo Jesus

¹⁷Iageti ka gogoi siboikí, ka ipot Punen Roti Simaleu, eirangan leú et sipasiuluinia ka tubut Jesus. Kuaddangan ka matania, "Kaipa siobánu kupatatarek kai kudduat pukomannu komen Paska?

¹⁸Kuanangan ka matadda, "Kenan kam ka laggai, nuailiaké kam sara sirimanua, nukua kam ka matania, 'Aikua si Guru, aiailingan te tetrekku. Oto kuobá mupunen Paska ka lalepnu sambamai sipasiuluiku.'

¹⁹Iageti eirangan leú et galaiakérangan nia kelé sitonéakenen Jesus ka matadda, masipatarek komen Paska

²⁰Kelé aimasoibó, pukomrangan leú et sambadda sipasiuluinia, Jesus

²¹ Ai sia mukokom, kuanangan ka matadda Jesus, "Arep'aké kam sipulelelek: ai te sara ka talagamui masipajojo aku.

²² Kelé araarep nia sipasiului Jesus, sikuania néné, mareu-reunangan bagadda simakopé. Iageti taddaakérangan pasasara masinou-nou Jesus, pelé nga-nganda ka tubunia, "Taleú aku nukukua, Tuhan?

²³ Oto kuanangan ka matadda Jesus, "Simakeré kusop'aké kai kabeimai ka bagat mangkó, nia té nenda masipajojo aku

²⁴ Kirénangan tedda mamatei nia Togat Manusia, siripot sitususurat ka Buko Sipunenan. Tápoi mateirangan te sipajo Togat Manusia! Bulat maerú peilé ka sia néné, tá mutútú matania!

²⁵ Oto kuanangan ka sia si Judas sipajo nia ka matat Jesus, "Kipa taleú aku lé nukukua, Guru?" Iageti kuanangan ka matania Jesus, "Bulat kisedda tedda, kelé sikuam!

²⁶ Kelé arapukom, alánangan roti, Jesus, suráakénangan nia ka paniddogat. Lepá paabbónangan nia roti nenda, kaunangan nia ka tubudda sipasiuluinia.

Aikakau ka sipasiuluinia, aikukua, "Na, alá kam, kom kam; nia té néné tubukku.

²⁷ Lepá alánangan pulokat sibara ka бага anggur, kuanangan surá ka tubut Taikamanua. Lepá kaunangan nia pulokat ka sipasiuluinia. Aikakau, aikukua, "Na, ló kam, sangamberimui

²⁸ Aipoí néné te logauku masisasah'aké pakerekat bagat Taikamanua, iaté logau sipiliakenen kalulut sirimanua simigi, pasiappet jodda

²⁹ Kau imatonem bagamui ka sikuakku néné: Táan te kuloló mitsá suat anggur néné, teret iaili tetrenia mitsá kuló anggur sibau sambatta ka Laggai Ukkuike Sibau.

³⁰ Lepá uraiakérangan urai pasiumun. Pasatna lé rapuurai, ei sia ka Leleú Zaitun

³¹ Iageti kuanangan ka matadda sipasiuluinia Jesus, "Nukakaddiuaké te kam aku soibónia néné. Aipoí ka Buko Sipunenan, ai atusurat'aké kisé: Aikua Taikamanua, 'Kumamateiaké te nia sipasijajago, oto bailiu pasabunungan leú et tubunia ka sia mungkuat biri-birinia.

³² Tápoi ké atusurungan geti aku ka simamatei, boikíakékungan tubukku mei ka kam ka Galilea.

³³ Iageti kuanangan ka matat Jesus si Petrus, "Kenanen baí rakaddiuaké ekeu ka sia sabagei, tápoi aku kaku geti, bulat tá kukakaddiuaké lé ekeu, burú!

³⁴ Kuana lé nia Jesus ka matania, "Bulat soibónia néné, ainangan tá mutotokki goú-goú, anupakelengan aku telu ngamitsá.

³⁵ Oto kuana lé nia mitsá ka sia si Petrus ka matat Jesus, "Bulat kenanen tumateiaké aku, elé ruatta pá matei, bulat tá lé kupakekele ekeu, lepá!" Oto beri ka sia sipasiuluinia sabagei leú, kisedda leú et ka sia arakua

³⁶ Lepá ei nia Jesus sambat sipasiuluinia ka sara kudduat sipuoni Getsemane. Segé sia sedda, kuanangan ka matadda, "Kuddungan kam sené boikí, kuei sedda maniddou.

³⁷ Iageti nánánangan si Petrus, sambat tairua tatogat Sebedeus aleinia. Oto lepá, suggrunangan nia purereu-reu бага sambat taimangkánangan bagania

³⁸ Kuanangan nia ka matadda sipasiuluinia, Jesus, "Bulat ai te makokopé reu-reu bagakku, bulat kelé mamateian lé aku galainia. Senéan té

kam boikí, eddangan tapumata kam sambatta.

³⁹Iageti areuakénangan tubunia goisó, Jesus, ka tubudda sipasiuluinia, purapponangan leú et ka polak, paniddounangan, pelé nga-ngania, "Ale Ukkui, ké momoi baí nia, areuakénungan nia ka tubukku, pangoringan bairat'akenen ka tubukku néné. Tápoi buí ka teú bagakku, ka teú bagam lé, Ukkui.

⁴⁰Lepá aipaniddou Jesus, toili nia ka tubudda sipasiuluinia sitelu, ailingan leú et sia aian sia memerep. Iageti kuanangan ka matat Petrus, Jesus, "Kipa ale, bulat beri sangajam tapumata kam sambatta tá nuom'aké kam

⁴¹Kau nupanuksuk kam, samba paniddou kam, bulé tá iorak kam pasisiboat. Kirénangan ka sia ketsatmui iobá masigalaiaké simaroipo, tápoi tá nuom kam, kalulut tubu néné ka sia, masaggoet.

⁴²Iageti einangan leú et mitsá Jesus maniddou, kuanangan, "Ale Ukkui, ké bulat kuorik lé pangoringan néné, samba tá momoi ituareuaké ka tubukku, oto kauan, ekeu lé tuteteú.

⁴³ Lepá sok-soknangan nia mitsá Jesus, ailinangan leú et sia mitsá sipasiuluinia, ai sia memerep, kalulut kopet tuddun matadda

⁴⁴ Iageti kaddiuakénangan sia mitsá Jesus, ei nia maniddou sikatelunia, kuanangan kelé sikuania leú et

⁴⁵ Lepá sok-soknangan nia mitsá Jesus, iei ka sipasiuluinia, kuanangan ka matadda, "Kipa ale, ai peilé kam memerep samba muari? Itsó kam, aiailingan te tetrenia itusegéaké Togat Manusia ka kabeira sirimanua sijo

⁴⁶ Suru kam, ai sita memei. Itsó peité kam! Amalegrengan nia sipajo aku!

⁴⁷ Talagat paninibo nia Jesus, lotsit-aitulotsit si Judas, iaté sara ka talagadda sipasiului Jesus. Maigi sia aiabbít saaleinia; ai sipasiaabbít lanjau, ai leú et sia sipasiaabbít bobóbó. Sia néné iaté, sikoiniakenenda tai imam sambat tai bajára tai Jahudi

⁴⁸ Ka sia sipajo Jesus néné, aikauan toggaiat ka tubudda, ikua, "Kasei kusigguk, nia té nenda nulalabá kam!

⁴⁹ Oto kelé arasegé sedda, riuriginangan Jesus si Judas, kuanangan ka matania,

"Salam, Guru!" Iageti sigguknangan Jesus

⁵⁰ Pelé nga-ngan Jesus ka tubunia, "Ale Saraina, apa lulunia nuooi sené?" Iageti riurigiddangan Jesus sirimanua simigi, labáranan leú et nia

⁵¹ Oto oppatnangan leú et lanjaunia ka sia sara ka talagadda sipasiului sipaaleiaké Jesus, sepprinangan talingat imam sabeu, pat belé talingania sangasilá

⁵² Oto kuanangan ka matat sipasiuluinia néné Jesus, "Ale, buluk'aké mitsá lanjaunu ka sagbungnia, aipoí kasei sioppat lanjaunia, ka lanjau leú te ka sia imamatei

⁵³ Bulat ka bagam lé pá tá momoi kutiddou ka tubut Ukkuiku, bulé ikoiniaké simaola, pulu rua ngapasukan tentera malaika

⁵⁴ Ké kisedda baí nia, kipangan lé iooi ipuaili siniblaakenen ka Buko Sipunenan, masikua, buítá muaili kelé sipuaaili kineneiget?

⁵⁵ Lepá kuanangan ka matadda sirimanua simigi Jesus, "Sirimanua sijo lé pá aku néné nukukua kam, elé; pat koí oi kam sibara lanjau samba bobóbó

sinippukat loiná nulabá kam aku? Senen
gogoian lé koí kupungantoman ka Uman
Taikamanua, tá koí anulabá kam aku

⁵⁶ Kirénangan buítá muaili kelé néné,
bulé ipuaili kelé ka sinurat'akenenda
tai nabi ka Buko Sipunenan." Lepá
tui-tuirangan leú et sipasiuluinia,
rakaddiuaké Jesus

⁵⁷ Iageti abbitrangan leú et nia Jesus,
sia sipasilalabá, ka lalep Kayapas Imam
Sabeu. Sedda aian sia parururú tai guru
paamian sambadda tai bajára tai Jahudi

⁵⁸ Ka sia si Petrus aitutut Jesus, tápoi
makareunan, pat aili ka gerat lalep
imam sabeu. Iageti tugurúnangan leú
et si Petrus ka gerat lalep imam néné,
puuddetnangan ka bébéra tai tentera
sipujajago. Aitataiko kipa ragagalaiaiké
ka tubut Jesus teret kapplu nia

⁵⁹ Bulat airabebesíaké tai imam sabeu
sambat sangamberidda tai Mahkama
Puaranan, ramuneng'aké boko, bulé ioi
raukum'aké Jesus, simateiakenen

⁶⁰ Tápoi beri sara tá anai arasese
selenia, kenanen maigi sia
sipasimumuneng'aké boko. Tápoi
lepá oi sia rua ka mata

⁶¹ Kuaddangan, "Aikua sirimanua néné, 'Momoi kuragat'aké Uman Taikamanua néné, lepá rióakékungan nia mitsá ka bagat telu ngagogoi.'

⁶² Iageti puriónangan leú et si imam sabeu, pelé nga-ngania, "Kipa, tá koí nuaalegi panganduatda pagalaiat tubum néné?

⁶³ Tápoi meng lé nia Jesus. Lepá oleakénangan ikua nia mitsá ka matat Jesus, "Ka onin Taikamanua sipuririmanua, kutiddou kai bulé nukua ka matamai, Rimata Sipaarau, elé Togat Taikamanua leú, ekeu néné?

⁶⁴ Iageti kuanangan ka matadda Jesus, "Aisesengan kelé sikuam. Tápoi kau imatonem bagam ka sikuakku néné: barania kineneiget, itsómuian ipuuddet Togat Manusia kai kattoet Taikamanua Sipulugege, samba ioi ka tinobut manua!

⁶⁵ Oto pabiritnangan leú leppeinia si imam sabeu, kuanangan ka matadda, "Aipaloloian Taikamanua! Táan anai lulunia tagaba kam sipasimumuneng. Aipoí sangamberimuian amasiarep tiboiet paloloiatnia ka tubut Taikamanua

⁶⁶ Oto kineneiget, kipa bulat sipinaatumui ka kam?" Pelé nga-

nganda ka sia, "Amaselengan nia, oto buítá tumateiaké lé nia.

⁶⁷ Iageti lujiddangan matat Jesus, lepá pabóbokiddangan nia. Samba ai leú et sia sipasititipak bailatni

⁶⁸ kuaddangan ka matania, "Poiliat peité ka kai, ale Rimata Sipaarau! Kasonia amasitipak bailatnu?

⁶⁹ Talagat kukuddu nia si Petrus ka gerat, oi sara pagugulet sinanalep, kuanangan ka matat Petrus, "Ekeu té néné alei Jesus tai Galilea, elé?

⁷⁰ Tápoi aipakele lé si Petrus againa Jesus ka matadda sangamberidda sedda, kuanangan, "Bulat tá kuagai sikuam néné,

⁷¹ iageti bela nia ka matatbaliu gerat. Lepá itsónangan nia mitsá sara pagugulet sinanalep, kuanangan ka matadda sikukuddu sedda, "Nia néné te ataitsó simaruei, alei Jesus tai Natsaret.

⁷² Oto pakelenangan mitsá againa Jesus si Petrus, pat pusuppanangan leú et, kuanangan, "Bulat tá te kuagai nia sirimanua nenda!

⁷³ Tá amauju, eirangan leú et ka tubut Petrus sia sipuririó sedda, kuaddangan ka matania, "Bulatnia ekeu té sara ka

talagadda, aipoí aimatoilá aituagai, iaté ka galai paninibom.

⁷⁴Iageti pusuppanangan leú et si Petrus, pelé nga-ngania, "Bulat beri agaiku nia sirimanua nenda!" Ka tetret nendangan leú et, putokkinangan goú-goú

⁷⁵Oto iapeité repdemnangan nia si Petrus kukuana ka matania Jesus, "Tápei amutokki goú-goú, anupakelengan aku telu ngamitsá." Iageti bela nia si Petrus, pusounangan leú et, kopet reu-reu bagania.

27 ¹Maseggei peilé, pakerénangan bagadda tai imam sabeu sambat tai bajára tai Jahudi, ramateiaké Jesus

²Iageti kabérangan nia, lepá eirangan leú et masitaroaké nia kai Pilatus gubernurda tai Roma

³Kelé aiagai nia si Judas sipajo Jesus uukum'akéra Jesus, bara olei bagania. Iageti einangan leú et ka tai imam sabeu sambat ka tai bajára tai Jahudi, masitoiliaké bulagat sitelu ngapulu ngaperak

⁴Kuanangan ka matadda, "Bulat amajongan te aku kalulut akupajo sitá anai selet tubu, pat ukum'aké nia

ukuman simateiakenen!" Tápoi kuadda lé ka matania, "Apananmai kupuleletsei kai nia? Ekeuan lé ipagaba nia!

⁵Iageti ribbaiakénangan nia nenda bulagat si Judas ka bagat Uman Taikamanua, einangan leú et masitiggot lolokkatnia

⁶Oto eirangan leú tai imam sabeu masirurúaké bulagat siribbaiakenen Judas, pelé nga-nganda, "Bulagat logau lé te bulagat néné. Siripot ka surukat, tá momoi tugurúaké bulagat néné, ka kudduat pasibuluat, ka Uman Taikamanua.

⁷Kelé aipakeré bagadda, pakeirangan bulagat néné pasisakit polak oniakenen Polak Tukang Parió. Kaunenda rateira taitoi

⁸Iaté lulunia, teret kineneiget ai peilé tuooniaké nia polak néné, "Polak Logau"

⁹Oto néné, bulé ipuaili lé kelé ka sikuat Nabi Jeremias sipasikukua kisé, "Iageti silórganan telu ngapulu ngaperak iginia siripot igit siteúakenenda tai Israel, kelé sakinia

¹⁰Oto kaurangan bulagat sikaura sakinia néné, pasisakit polak tukang parió, kelé sikuat Tuhan ka matakku.

¹¹ Kelé aisegé Jesus ka matat Gubernur Pilatus, nou-nounangan nia, pelé nga-ngania, "Bulatnia Rimatadda tai Jahudi lé ekeu, elé?" Iageti kuanangan nia ka sia Jesus, ka matat Pilatus, "Oo, kelé sikuam.

¹² Tápoi bulat beri sara aialegi, sikuadda ka sia tai imam sabeu sambat tai bajára tai Jahudi, ka tetret airapababara tiboiet rajoaké nia

¹³ Oto kalulut néné, kuanangan nia si Pilatus ka matania, "Kipa, tá ainuaarep sangamberinia sikuadda, rajoaké ekeu?

¹⁴ Tápoi tenan lé nia meng, Jesus; bulat pat kisei ka bagat gubernur Pilatus ka tubunia

¹⁵ Kelé simarei-rei igalaiaké si gubernur, senen ipot Punen Paska, buíta ibelaaké sara situukum. Tápoi siripot siteúakenenda lé sirimanua simigi

¹⁶ Oto ka tetret nenda, ai sara situuukum simakopé beunan katuareman kataí sigalainia. Iaté sipuoni Jesus Barabas

¹⁷ Kelé araparurú sirimanua simigi, nou-nounangan sia si Pilatus, pelé nga-ngania ka tubudda, "Kasei siobámui

kubebelaaké ka kam? Jesus Barabas, elé Jesus kuanenda Kristus?

¹⁸Ikukua geti kelé néné si Pilatus, kalulut aagaina lé kakaura Jesus ka tubunia, sautéra tai Jahudi, kalulut sit-sit bagadda ka tubunia

¹⁹Iageti ai nia muuudet ka uddenan purimataatnia si Pilatus, oi-aioi surat sinanalepnia masikua ka matania, "Buí te nupaisit peruketnu ka tubut sirimanua sitá selet tubu néné, aipoí pat bara pangamutetku sikataí, kalulu nia.

²⁰Tápoi ka sia geti tai imam sabeu sambat tai bajára tai Jahudi, riu-riu nia lé rapatubbuji bagadda sirimanua simigi, bulé ratiddou ka tubut Pilatus, ibelaaké ka sia si Barabas, tápoi ka sia geti Jesus tuuukum'aké lé nia, ukuman simateiakenen

²¹Iageti nou-nounangan sia mitsá si Pilatus, pelé nga-ngania, "Karuadda néné, kasonia siobámui kubebelaaké ka kam?" Pelé nga-nganda, "Si Barabas lé.

²²Iageti kuanangan ka matadda si Pilatus, "Oto ké kisedda baí nia, kipangan lé kugagalai ka tubunia ka sia Jesus, kuanenda Kristus?" Kuadda lé nia, "Pattáaké lé nia ka sia ka loiná siliktenga.

²³ Kuana lé nia ka sia si Pilatus ka matadda, "Aponia poi jonia?" Oto pugereirangan simakopé, pelé nga-nganda, "Bulat pattáaké lé nia ka loiná siliktenga!

²⁴ Kelé aiitsó nia si Pilatus taiooi nia igalai apa pá, samba ijago buí ibara pulamagat, alánangan oinan, buinangan kabeinia ka matadda sirimanua simigi, pelé nga-ngania ka tubudda, "Tá tebái iaaili aku gejat бага, katumamateiaké nia sirimanua néné! Kam lé iaaili gejat бага!

²⁵ Tápoi alegidda lé nia sangamberidda, "Kauan, eddangan nia iorak kai ukuman sambat tatogamai, kalulut katumamateiaké nia sirimanua néné!

²⁶ Iageti belaakénangan ka sia si Barabas, si Pilatus, tápoi kuanangan rapabóboki nia ka sia Jesus samba segéakénangan nia ka kabeira bulé rapattáaké nia ka loiná siliktenga

²⁷ Iageti abbitrangan Jesus tai perajurit Pilatus ka istanan gubernur. Oto bokkóranan Jesus, sangamberidda pasukan tentera

²⁸ Golokranan saraubat Jesus, kaurangan saraubánia simasuat laiket

²⁹ Tikairangan kirit purimataat, sibara ka paran-ran loiná simarui, kaurangan nia ka utet Jesus. Lepá kaurangan sara tuturá ka kabeinia sikattoet, purappoddangan leú et ka matania, rapaloloi nia, pelé nga-nganda, "Tabé, ka tubut Rimatadda tai Jahudi!

³⁰ Iageti lujiddangan nia, lepá alárgan nenda tuturá ka kabeinia, lisoakérangan nia ka lakkupatnia

³¹ Lepá aragalai siobára ka tubunia, golokran saraubá simasuat laiket ka tubunia, kaurangan saraubánia leú et. Iageti abbitran nia ka gerat, rapattáaké nia, ka loiná siliktenga

³² Iageti talagat pueenungra, ailiddangan sara tai Kirene sipuoni si Simon. Paksaddangan nia ibairat loiná siliktengan Jesus

³³ Lepá segé sia ka sara kudduat sipuoni Golgata, katukolobatnia "Kudduat Lakkupat.

³⁴ Sedda kaurangan ló nia anggur pagalú lappegu. Tápoi kelé ainanam nia, taiobánangan iló nia

³⁵ Oto pattáakérangan nia ka loiná siliktenga, iageti parubeirangan

saraubánia, tápoi sipauktuk'akenen lé aragalai

³⁶ Lepá kuddu sia sedda masijago

³⁷ Ka uddut utet Jesus, ai arasurat'aké, masikolouaké paluluatnia aituukum'aké, sipasikukua: "Nia té néné Jesus, Rimatadda tai Jahudi"

³⁸ Ai leú sia rua sipamamatei, arasiliktengaaké ka bet-bet Jesus; sara kai kattoetnia, sara kai katsiunia

³⁹ Sia situsasabau sedda, kelé araitsó Jesus, pagilikrangan utéra, iageti paloloirangan leú et nia

⁴⁰ Pelé nga-nganda, "Ekeu té, né, elé, sigelai masiragat Uman Taikamanua, lepá rióakénungan nia mitsá ka bagat telu ngagogoi! Oto ké Togat Taikamanua baí nia ekeu, kauan betungan peité tubum nutugorosot ka loiná siliktenga, bulé nubela!

⁴¹ Oto beri leú ka sia tai imam sabeu, sambat tai bajára tai Jahudi, arapaloloi leú et nia, Jesus. Arakua ka sia

⁴² "Kipa pá, sabagei momoi irorop'aké, tápoi tubunia geti ka sia, tá momoi irorop'aké! Iageti, ké bulat Rimatadda tai Israel baí nia, kauan igorosot'aké

tubunia kineneiget, ka loiná siliktenga, imatonem bagamai ka tubunia

⁴³ Bulat matonem te bagania ka tubut Taikamanua. Samba mitsá aikua, nia néné Togat Taikamanua. Oto kauan taigbuk kam nia kineneiget, baleú iobá Taikamanua irop'aké nia.

⁴⁴ Ka sia sipamamatei si pattáakenen ka bébénia ka loiná siliktenga, kisedda leú et arakua, arapaloloi Jesus

⁴⁵ Iageti tuggé sulu, magepgepnangan sangaliot laggai, ka bagat telu ngajam burúnia

⁴⁶ Ka bóbó telu kasoibokat, pugereinangan Jesus, pelé ngangania, "Eli, Eli, lama sabaktani?" katukolobatnia, "Taikamanuangku, Taikamanuangku, angoi nukakaddiuaké aku?

⁴⁷ Kelé araarep nia ka sia piga pá sikukuddu sedda, kuaddangan, "Ai lé isosogai si Elia!

⁴⁸ Tápoi sara ka talagadda, kelé aiarep nia, olaakénangan mei masialá romot, sop'akénangan nia ka suat anggur simalagá, lepá ettet'akénangan nia ka ngungun tuturá loiná, kaunangan nia ka ngungun Jesus

⁴⁹Tápoi arakua geti ka sia sabagei,
"Edda tangenaaké tubutta boikí, baleú
moi nia si Elia, irop'aké nia!

⁵⁰Lepá pugereinangan mitsá Jesus,
simakopé ron, iageti tatá-aitatá engania

⁵¹Oto mabiritnangan komang kekre
siputotoak ka Uman Taikamanua, bulat
silá, oi rua; barana ka pata, pat aili ka
repé. Pungeu-ngeunangan polak, iageti
papok-poknangan leú et leleu bukkú

⁵²Lepá tubukánangan leú et parate-
ratei. Oto maigi sia sapaamian
Taikamanua simamatei atusuru

⁵³Lepá aitusuru ka sia Jesus ka
simamatei, pabeladdangan tubudda ka
sia néné ka ratei, eirangan leú et ka
Jerusalem. Maigi sia sedda sipasiiitsó sia

⁵⁴Kelé araitsó nia, aibara teteu samba
sangamberi sibabara néné, ka sia
utet pasukan sambat tai perajuritnia,
malotórangan leú et simakopé. Belan
nga-nganda lé masikua, "Oto bulat Togat
Taikamanua lé nia sinéné!

⁵⁵Samba maigi leú et sia sedda
tainanalep sipasiiigbuk sibabara néné ka
sareunan. Sia té néné sieei masirop'aké
Jesus, barana ka Galilea

⁵⁶ Sia néné, iaté, si Maria Magdalena, si Maria inanda tai Jakobus sambat tai Josep, samba leú et inanda tatogat Sebedeus

⁵⁷ Soibó nia nenda leú et, oi sara simakayo sibara ka Arimatea, sipuoni si Josep. Nia leú et ka sia sipasiului Jesus leú et

⁵⁸ Ei nia ka tubut Pilatus, masitiddou tubut Jesus simamatei. Iageti koiniakénangan sia si Pilatus rakau tubut Jesus simamatei, kai Josep

⁵⁹ Oto alánangan tubut Jesus simamatei, si Josep, tabutnangan nia komang juto sibau

⁶⁰ Galak'akénangan tubut Jesus simamatei, ka ratei sikailúnia leleu bukkú, kaunen nia purateiatnia. Lepá guilúnangan sara bukkú takket ratei. Iageti tui nia

⁶¹ Tápoi ka sia si Maria Magdalena sambat tai Maria sabagei, kuddu lé sia sedda masimattai ratei

⁶² Simatsep gogoi Sabbat, ei sia tai imam sabeu sambat tai bajára tai Jahudi ka tubut Pilatus

⁶³ Kuaddangan ka matania, "Tuan, ai peilé kurerepdem kai sikuania nenda

sirimanua sipepeaké sirimanua, ka tetret ai peilé nia muririmanua, aikua kisé, 'Ka gogoi sikatelunia, suru aku mitsá.

⁶⁴Oto paniddogatmai, bulé nukoiniaké sia rajago ratei sipulelelek, pat aili ka gogoi sikatelunia, buí ioi raalá tubut Jesus simamatei sipasiuluinia, lepá kuadda lé te ka sirimanua, atusurungan nia ka simamatei. Bailiu patajuat sikatei-tei néné peilé te bulat makataí, ka patajuat siboikí.

⁶⁵Iageti kuanangan ka matadda si Pilatus, "Tápoi ka kam ai sia sipujajago. Oto kam'an lé memei masijago ratei, bulat tá nupagugulai kam tubumui nujago kam nia.

⁶⁶Oto eirangan leú et ka ratei, raparon takkénia. Rióakérangan kudduat pujagoat ka matat ratei, rajago buí raei kasei pá masipageugebi ratei.

28¹Kelé aitukapflu gogoi Sabbath, simatsep ka gogoi Menggui, maseggei peilé, ameian sia tai Maria Magdalena sambat sipuoni tai Maria bagei, masibalou ratei

²Oto tulut bara-aibara teteu sabeu. Iageti tugorosotnangan sara malaikat Tuhan, barania ka manua,

guilúakénangan bukkú takket ratei, lepá uddet nia ka uddutnia

³ Bulat kelé bilá lé ituitsó matania malaika, saraubánia bulau lepá

⁴ Oto bulat geret lepá ka sia tubudda sipasijajago ratei, kopet kataí lotóra; pat tubudda musi lepá, kéan lé tubut simamatei

⁵ Iageti kuanangan ka matadda tainanalep, malaika, "Bá malolotó kam! Ai lé kuaagai gagabamui nia Jesus, sipattáakenen ka loiná siliktenga

⁶ Tá anai nia sené. Atusurungan nia, kelé sikuania siboikí. Konan peité kam, nuitsó kam kudduat katugalangan nia

⁷ Sarat kau lé nuolaaké kam mei kineneiget, masisegéaké ka tubudda sipasiuluinia, nukua kam, 'Atusurungan nia. Oto kineneiget aiboikíakéan tubunia mei ka Galilea. Seddangan geti itsómuian nia!' Repdem kam sangamberi sikuania ka matamui.

⁸ Iageti olaakérangan nia tainanalep mutui-tui ka ratei. Oto, ai sia mulolotó pagalú angkat бага, pabalaurangan leú et raolaaké mei masisegéaké ka tubudda sipasiului Jesus

⁹Tápoi tulut lotsit-aitulotsit Jesus iailiaké sia tainanalep. Kuanangan ka matadda, 'Salam ka kam!' Iageti legreakérangan tubudda ka tubunia, lakkaiakérangan rerenia, purappoddangan ka matania

¹⁰Iageti kuanangan ka matadda, "Bá malolotó kam, kau lé nuei kam ka tubudda sasarainangku nukua kam ka matadda, bulé raei ka Galilea. Seddangan geti itsórganan aku.

¹¹Ai sia mututui-tui ka sia tainanalep, toili sia piga pá ka sia tai tentera sipujajago ka kota, segéakérangan sangamberinia sibabara ka tubudda tai imam sabeu

¹²Iageti patibojiddangan nia tai imam sabeu sambat tai bajára tai Jahudi. Lepá kaurangan bulagat simigi ka tubudda tai tentera sipasijajago ratei

¹³Oto pangantruddangan sia, pelé nga-nganda, "Buítá nukua kam, amoi lé sipasiuluinia, masitakkou tubut Jesus simamatei, ai kam memerep

¹⁴Oto ké iarep nia si gubernur pagalaiat néné, ei kai masipusumi bagania, bulé tá iaili kam apa pá gejat бага.

¹⁵ Iageti silórganan nia bulagat, tai tentera sipujajago, galaiakérangan kelé singantruakenenda ka tubudda. Iaté lulunia teret kineneiget, pungu-nguan néné ai peilé rapaloloibáaké ka talagadda tai Jahudi

¹⁶ Iageti eirangan leú et kapulusaradda sipasiuluinia Jesus ka Leleu Galilea, kelé siripot sitonéakenen Jesus ka matadda

¹⁷ Kelé araitsó nia Jesus sedda, purappoddangan leú et ka matania. Tápoi ai peilé sia ka talagadda simarua бага ka tubunia

¹⁸ Iageti legreakénangan tubunia Jesus ka tubudda, kuanangan ka matadda, "Aiakéan Ukkui ka tubukku sangamberi gege ka manua sambat ka polak

¹⁹ Oto kenan kam ka sangamberi bangsa ka sangaliot polak. Bailiuaké kam sia sipasiuluiku. Raú kam sia ka onin Ukkui, Toga samba ka onin Ketsat Sipunenan

²⁰ Pangantoman kam sia masireddet sangamberi sitonéakenenku ka matamui. Samba repdem kam, mariu-riu lé kupaalei kam, teret kalepakat polak."

Markus

1 ¹ Néné te Katuareman Simaerú pagalaiat tubut Jesus Kristus, Togat Taikamanua

² Katuareman Simaerú néné makeré kelé ka sinurat'akenen Nabi Jesayas, sipasikukua kisé, "'Aikua Taikamanua, Nia té néné pakoinietku; Sikoiniakenenku sipuboboikí ka tubum, bulé ipapa enungannu.

³ Maarep nga-nga sipusosoga ka simatangeu, sipasikukua kisé, 'Patarek kam enungan Tuhan; pagaktuk kam enungan enungietnia.'

⁴ Kelé sitususurat nenda te, aibara ka sia si Johannes ka simatangeu. Iraú sia samba ingantoman'aké Katuareman Simaerú sibara ka Taikamanua. Kuanangan ka matadda si Johannes, "Buítá nubauaké kam paatuatmui samba leú buítá turaú kam, bulé iappéaké jomui Taikamanua.

⁵ Iageti ei sia sangamberi sibabara ka Judea samba sibabara ka Jerusalem masiarep'aké ngantoman Johannes.

Seseakérangan leú sangamberi jo sigalaira. Lepá iapeité raúnangan sia si Johannes ka Oinan Jordan

⁶ Bulut onta lé leppeinia si Johannes. Akkik tengania kulit. Suat mani samba sin lé ikokom

⁷ Aisegéaké ka ngantomannia si Johannes kisé, "Momoi te sara sirimanua kuruk tei-teiku néné. Nia peilé abeu tiboitu ka tubukku. Pat beri mulukkuk masirugut talit tarangaínia, tá mateú aku

⁸ Aku kaku oinan lé kuraraúaké ka tubumui. Tápoi ka sia geti, Ketsat Sipunenan lé iraraúaké.

⁹ Iageti ka tetret nenda, einangan leú et Jesus, barania ka Natsaret ka propinsi Galilea, oto raúnangan leú et nia si Johannes, ka Oinan Jordan

¹⁰ Sakaina lé Jesus ka leleu, itsónangan itubuká manua, iageti tugorosotnangan Ketsat Sipunenan, kelé mutubu marpati, tuleunangan leú et ka tubunia

¹¹ Oto maarepnangan ngangan Taikamanua sipasikukua kisé: "Ekeu te Togakku, kilibet bagakku, samba obaket bagakku te ekeu.

¹² Lepána lé nenda, tubbuinangan
bagat Jesus Ketsat Sipunenan bulé iei ka
simatangeu

¹³ Iageti kuddu nia sedda ka
simatangeu, epat ngapulu ngagogoi
burúnia, bulé isibo nia Sanitu. Patari-
tarimeu simaliá leú, maigi sedda
sipaaleiaké nia. Beri ka sia samalaika,
airapasisikeli nia

¹⁴ Kelé araukum'aké si Johannes ka
bagat penjara, ei Jesus ka Galilea,
ipaarep sedda Katuareman Simaerú
sibara ka Taikamanua

¹⁵ Kuanangan ka matadda Jesus, "Táan
te mauuju ioi Purimataat Taikamanua.
Oto bauaké kam paatuatmui, samba
kau imatonem bagamui ka Katuareman
Simaerú sibara ka Taikamanua!

¹⁶ Aimueenung Jesus ka bet-bet Paot
Galilea, itsónangan rua sipasiiiba iaté si
Simon ruadda baginia si Andareas. Ai sia
mujajalo ka koat, masigaba iba

¹⁷ Kuanangan ka matadda Jesus,
"Konan kam nutut kam aku, kugelaiaké
kam masijalo sirimanua.

¹⁸ Iageti kaddiukérangan leú jalodda,
ei sia masitut Jesus

¹⁹ Riu-riuakénangan ipuenung Jesus, itsónangan leú mitsá sia tairua sabagei, iaté si Jakobus samba si Johannes, tatogat Sebedeus. Ai sia ka bagat abak masisusubbai jalodda

²⁰ Sogainangan sia Jesus. Iageti kaddiuakérangan ukkuira ka abak sambat sia upajietnia, eirangan leú et masitut Jesus

²¹ Iageti segé Jesus sambat sipasiuluinia ka Kapernaum. Kelé aiaili mitsá gogoi Sabbat, ei nia mitsá Jesus ka Uma parurukatda mungantoman

²² Bulat kisei lé ka bagadda galai pungangantomannia. Berwibawa lé poí ipungantoman, tá kelé rapungantoman ka sia tai guru paamian

²³ Ka tetret nenda amei sara sirimanua sipinasaileu ketsat sikataí ka uma parurukat. Pugereinangan leú et

²⁴ "Jesus tai Natsaret, kipa nupaeerú ka tubumai? Taleú masisubuaké kaian né nuooi? Kuagai ekeu: Ekeu te sipunenan sikoiniakenen Taikamanua!

²⁵ Iageti anunangan ketsat sikataí Jesus, kuanangan ka matania, "Meng-meng'aké ekeu! Belaaké ekeu ka tubut sirimanua néné!

²⁶ Oto pangit-ngitnangan nia ketsat sikataí, lepá bela nia ka tubut sirimanua néné, pugereinangan leú et

²⁷ Bulat kisei lé ka bagadda sirimanua simigi, pat patiboddangan pasasambadda masikua, "Aponia néné? Taleú ai lé mitsá gelajet sibau? Ka wibawa samba ka gege aiusiaké ketsat sikataí, samba bulat mareddet nia ketsat sikataí ka nga-ngania!

²⁸ Iageti mararatnangan katuareman sigalai Jesus néné, ka sangaliot Galilea

²⁹ Lepá, tui-tui nia Jesus sedda sambat sipasiuluinia, rakaddiuaké uma parurukat, ei sia ka lalep Simon samba Andareas. Beri leú et ka sia si Jakobus sambat si Johannes, amei leú sia ka sia, masitut sia

³⁰ Ina siputaliku si Simon, aibabara roketnia, ai nia memerep ka pereman. Kelé aitugurú Jesus sambadda sipasiuluinia ka bagat lalep, segéakérangan ka matania puroroket nia ina néné

³¹ Iageti einangan leú et Jesus ilegreaké tubunia ka tubut ina siputaliku si Simon néné, omet'akénangan kabeinia, ropnangan nia itusuru. Iangan leú et nia

tatá roketnia. Iageti taddaakénangan leú ipuukú sia

³² Ka soibokat, abeléan sulu, ei sia sipasiaabbit sangamberi simabesí sambat pinasaileu ketsat sikataí ka tubut Jesus

³³ Iageti parurú parurúrangan leú et sangalaggaiatda ka matat lalep kudduat Jesus

³⁴ Oto aleakénangan sia sangamberidda siorik sene ngamata besí, samba maigi leú aiusiaké ketsat sikataí. Bulat tá ioobáaké sia Jesus, rapanibo saketsat sikataí néné, ai lé poi raaagai nia

³⁵ Ka patokat, ai peilé maiiprei manua, atusurungan nia ka sia Jesus, iageti tui nia ikaddiuké lalep. Ei nia ka simatangeu, ka bet-bet laggai, paniddounangan leú et sedda

³⁶ Iageti eirangan leú et ka sia tai Simon sambadda saaleinia ragaba Jesus

³⁷ Kelé araaili nia, kuaddangan ka matania, "Ai te ragagaba ekeu sangamberidda, Ukkui!

³⁸ Tápoi alegina lé nia Jesus, ikua ka matadda, "Sita kam tariu-riuaké kam puenungananta, taei masigejengi palagga-laggai simalegre sené. Aipoí

buítá mungantoman leú aku sedda. Nia poí né lulunia akuoi sené.

³⁹ Iageti gejenginnan sangaliot laggai Galilea, Jesus, mungantoman ka senen uma parurukatda, samba usiakénangan leú paketsa-ketsat sikataí

⁴⁰ Iageti oi sara sibara lubbé simasappó, ka tubut Jesus. Purekkuknangan kuanangan ka matat Jesus, "Ké nuobá baí nia Ukkui, anualeakéan aku.

⁴¹ Iageti makaténangan bagat Jesus ka tubunia, rapenangan leú nia Jesus, kuanangan ka matania, "Kuobá leú; kauan numale!

⁴² Iangan leú et jamnia, tatá besínia, malenangan leú et

⁴³ Iageti kuanangan ka matania itui-tui. Tápoi kei mutui-tui nia pangantomannangan nia boikí, kuanangan ka matania

⁴⁴ "Buí tebaí nutiboi nia ka sabagei. Tápoi ka tubudda tai imam lé nueei, bulé rakua ka matam bulat kamamale nia besínu. Oto siripot katuaale nia besinu, kau panguruat pusurakatnu ka Taikamanua, kelé siripot sikuat Mose, masipatoilá ka sirimanua sabagei, kamamale nia besínu.

⁴⁵Tápoi kelé aitui-tui, riu-riuakenangan ipungunguan'aké sangamberinia sibabara néné ka senen kudduat. Pat ipakekelengan lé tubunia Jesus, iguruki laggai. Ka laggai simatangeuan lé ieei mukuddu. Tápoi kenanen kisé, tá itetektek raoi ka tubut Jesus sibara ka palagga-laggai raiailiaké nia.

2¹Piga ngagogoi pá burúnia, toili nia mitsá Jesus ka Kapernaum. Iageti mararatnangan katuareman kababara nia sedda ka lalep

²Oto eirangan leú et sirimanua simigi masiailiaké nia. Purutrangan nia ka kudduatnia sedda, pat taimemetrangan ka bagat lalep, lulut igidda sirimanua simigi. Ka matatbaliu leú okkip lepá sia sirimanua. Iageti pungantomannangan Jesus isegéaké ka tubudda katuareman simaerú sibara ka Taikamanua

³Ai nia mungangantoman, gurú sia epat sipasibabairat simasakit, rataroaké nia ka matat Jesus

⁴Tápoi kalulut okkipra sirimanua simigi, taioinangan ralegreaké tubudda ka tubut Jesus. Iageti sakai sia ka lappra, bukárangan tobat lalep, ipot kudduat

Jesus. Lepá gorosot'akérangan nia simasakit néné sambat peremannia

⁵ Kelé aiitsó nia Jesus kopet tonem bagadda ka tubunia, kuanangan leú et ka matat simasakit, Jesus, "Atuappéakéan jom Sirou.

⁶ Iageti kuaddangan nia ka bagat paatuatda ka sia piga pá tai guru paamian sipuuddet sedda, pelé nga-nganda

⁷ "Airó koí bagania sirimanua néné, masikua tiboiet kelé néné! Aipaloloian Taikamanua. Tá pá sarat Taikamanua lé momoi masiaappéaké jo?

⁸ Tápoi ai lé iaagai sipinaatudda néné Jesus. Kalulut néné, kuanangan ka matadda, "Nupatitiboaké koí kam tubumui ka bagat paatuatmui

⁹ Kaipa lé poi malabbei ka bagamui tukua, 'Atuappéakéan jom', elé 'Suruaké ekeu, bairat peremannu, lepá puenungnungan leú et'

¹⁰ Oto kineneiget'an te kupopoiliat nia ka matamui, kababara nia gege ka tubut Togat Manusia ka polak néné masiappéaké jo." Iageti kuanangan ka matat simasakit, Jesus

¹¹ "Suruaké ekeu, bairat peremannu, nutoili!

¹² Oto tusurunangan leú et, olaakénangan ibairat peremannia, bela nia ka gerat, airaiigbuk nia sangamberidda sikukuddu sedda. Bailiu ka sia sipasiigbuk sibabara néné, umun'akérangan Taikamanua, kalulut kisei ka bagadda. Pelé nga-nganda, "Bulat tá peí ataitsó sibabara, kelé néné!

¹³ Iageti toili nia mitsá Jesus ka bet-bet Paot Galilea. Maigi sia sirimanua amei masitaget'aké nia. Pangantomannangan leú et sia sangamberidda

¹⁴ Ai nia mugegejek sedda, itsónangan sara sipuukú pajá, sipuoni si Lepi, togat Alpeus, ai nia mukukuddu ka kantornia. Kuanangan ka matania Jesus, "Konan, tut aku." Iageti puriónangan si Lepi, ei nia masitut Jesus

¹⁵ Talagat pukokom nia Jesus, ka lalep Lepi, guru-gurú sia sabagei sipuukú pajá sambadda sia oniakenenda sirimanua simigi, sikataí paraboat, masipaaleiaké Jesus sambat sipasiuluinia mukom. Amaingingan poí sia ka talagadda sipasitutut Jesus

¹⁶ Kelé araitsó ipakom'aké sia Jesus sipuukú pajá samba leú sia oniakenen sirimanua sikataí paraboat, tai guru paamian sibara ka rubeiat Parise, nou-nourangan sipasiului Jesus, pelé nga-nganda, "Ipakokom'aké koí sia sipuukú pajá samba sirimanua sikataí paraboat, si gurumui?

¹⁷ Kelé aiarep panounogatda néné Jesus, kuanangan ka matadda, "Tá anai punda nia si Dokter ka sia simaron tubu; sarat sia simaoringen lé. Aipoí akuoi néné, tá masigaba sikua tubuna simaerú paraboat, tápoi masigaba sia kasit-sit'akenen sirimanua lé.

¹⁸ Ka sara tetre, ai sia mupupuaso ka sia sipasiului Johannes Sipasiraraú, samba tai Parise, eirangan leú et sipasinonou-nou Jesus, pelé nga-nganda, "Ka sia sipasiului Johannes Sipasiraraú samba sipasiuluirai tai Parise, ai sia mupupuaso; lepá angoi tá rapupupuaso ka sia sipasiuluinu?

¹⁹ Oto alegina lé nia Jesus ikua ka matadda, "Kipa poi, ka punen putalimogat, tá pá mukokom sia tairauma? Aipoí ké ai peilé simanteu

sitalimouakenen ka talagadda, riu-riu lé rapukom

²⁰Tápoi ké aiailingan geti tetrenia tualá simanteu sitalimouakenen ka talagadda, iapeité taipukomrangan

²¹Tá poí anai sia sitakkop'aké komang simabau, ka leppei simaburú. Aipoí komang simabau sitakkop'akenen nenda, ititik-tik tubunia, iageti birit'akénangan leppei simaburú, bailiu makopénangan liot biritnia

²²Kisedda leú et, tá anai sia sibaliuaké suat anggur sibau ka bagat lalaisú kulit simamumú-mú. Aipoí tá isosoppi ipuk-puk'ake lalaisú simamumú-mú néné, anggur sibau, makataínangan ruania leú et suat anggur. Buitá ka bagat lalaisú kulit simabau leú et itubabaliuaké ka sia suat anggur sibau!

²³Apaipó aipuenung Jesus ka talagat monen gandum ka gogoi Sabbat. Oto ka sia sipasiuluinia, taddaakérangan masiakpek ottit gandum

²⁴Kelé araitsó nia tai Parise galai tubudda sipasiuluinia néné, kuaddangan nia ka matat Jesus, "Angoi rapasasabau surukat aratta sipasiuluinu, ragalaiaké keraet ka gogoi Sabbat?

²⁵Iageti aleginangan nia Jesus, kuanangan ka matadda, "Tápei poi anubatsa kam, sigalaiakenennia ka sia si Dapid, ka tetret ai nia muiimam sabeu si Abiatar, arapulaje tai Dapid sambat saaleinia, lulut tatat kanda, situgurúna ka Uman Taikamanua, mukom roti sibuluakenen ka Taikamanua; lepá kaunangan leú ka saaleinia rakom nia ka sia. Ké siripot ka aratta baí nia, tá momoi rakom nia kasei pá roti nenda, sarat sia lé tai imam momoi ikokom nia!

²⁶(2:2))

²⁷Iageti kuanangan mitsá Jesus ka matadda, "Kalulutda sirimanua lé aitubaraaké gogoi Sabbat; tá kalulut Sabbat aitubaraaké sirimanua

²⁸Oto ké kisédá baí nia, ai gege ka tubut Togat Manusia ka tubut gogoi Sabbat."

3¹Iageti paolenangan mitsá tubunia Jesus, iei ka uma parurukat. Sedda ai sara simasakit kabei sangasilá

²Tápoi sedda leú et, ai sia sipasigagaba selet tubut Jesus, bulé ioi ranganduaké nia. Airatataiko nia, baleú ialeaké simabesí, ka gogoi Sabbat

³ Oto kuanangan nia Jesus ka matat simasakit kabei sangasilá, "Konan murió sené, ka mata.

⁴ Lepá nou-nounangan sia Jesus sikukuddu sedda, "Siripot ka aratta, aponia momoi tagagalai kam ka gogoi Sabbat? Mugalai simaerú, elé mugalai sikataí lé? Masirimanuaaké sirimanua, elé masimateiaké lé tagagalaiaké kam?" Tápoi amumeng-meng lé sia

⁵ Iageti kinerenangan sia Jesus pak salú, lulut golú sambat sou bagania masiitsó kopet kelat paatuatda. Kuanangan ka matat simasakit, Jesus, "Totoiaké kabeinu." Iageti totoiakénangan kabeinia simasakit, malenangan leú et kabeinia

⁶ Oto bela sia tai Parise ka uma parurukat, olaakérangan mei ka tubudda simaré-ré ka tubut Herodes, bulé rapatiboji ramateiaké Jesus

⁷ Iageti tui-tui Jesus sambadda sipasiuluinia, raareuaké tubudda sedda, ei sia ka Paot Galilea. Bulat tá amagulai igidda tai Galilea sieei masitut Jesus. Ai leú sia sabagei sibabara ka Judea

⁸ sibabara ka Jerusalem, sibabara ka Idumea, samba sibabara ka saigit kabelaiat sulut Jordan, samba leú

sibabara ka bet-bet laggai Tirus
samba Sidon. Amoi sia sangamberidda
masiailiaké Jesus, kalulut aarepra
sangamberi sigalaiakenennia

⁹ Kalulut kopet igidda siooi, kuanangan
ka matadda sipasiuluinia Jesus,
ratarek'aké abak kudduatnia, buí raokkip
nia sirimanua simigi

¹⁰ Bulat makopé igidda simabesí
aialeaké Jesus, pat paelakrangan
tubudda simabesí, kalulut rabesíaké
ramalegre ka tubut Jesus, bulé ioi rarape
nia

¹¹ Sia sipinasaileu ketsat sikataí, senen
raitsó Jesus, rekkuk sia ka matania,
pugereirangan masikua, "Ekeu te Togat
Taikamanua!

¹² Tápoi bulat makopé ron ikeraaké sia
sangamberi ketsat sikataí néné Jesus,
buí rapoiliat nia ka sabagei, kasonia nia
néné

¹³ Lepá panatranangan Jesus ka leleu,
sogainangan leú kasei sia siobat bagania.
Iageti eirangan leú et ka tubunia

¹⁴ Piliynangan sia ka talagadda, ai sia
pulu rua igidda. Kuanangan ka matadda,
"Akupiliy kam néné, bulé nuoi kam
nupaalei kam aku, kukoiniaké kam mei

masipararat Katuareman Simaerú sibara
ka Taikamanua

¹⁵ Ai leú tuaké ka tubumui gege
masiusiaké ketsat sikataí.

¹⁶ Oninda sipulu rua néné, iaté: Si
Simon (sioniakenen nia si Petrus)

¹⁷ si Jakobus, samba baginia si
Johannes, iaté tatogat Sebedeus
(sioniakenen nia ruadda néné, si
Boanerges, katukolobatnia, "togat
leleggu")

¹⁸ si Andareas, si Pilipus, si Bartolomeus,
si Mateus, si Tomas, si Jakobus togat
Alpeus, si Tadeus, si Simon si Patriot

¹⁹ sambat si Judas Iskariot sipajo Jesus

²⁰ Lepá toili nia mitsá Jesus ka lalep.
Tápoi amei leú sia' mitsá sirimanua
simigi rapurut nia, pat taioinangan
arapukom sambadda sipasiuluinia

²¹ Pelé nga-nganda sirimanua ka
tubunia, "Bulat ai lé rorónia sirimanua
néné!" Oto kelé araarep nia saepput
Jesus nga-nganda sirimanua, rakua
rorónia, ei sia raalá nia

²² Tápoi arakua geti ka tubunia, ka sia
tai guru paamian sibabara ka Jerusalem,
"Ai lé ipasasaileu nia si Belsebul! Aipoí
utéra paketsa-ketsat sikataí lé amasikau

gege ka tubunia, aioi aipasiusiaké ketsat sikataí.

²³ Iageti sogainangan sirimanua simigi Jesus, tiboinangan piga ngamata pá pasikat ka matadda, pelé nga-ngania, "Kipa te iooi rapausi pasasmbadda ketsat sikataí.

²⁴ "Ké maragat sara purimataat, bailiu piga ngarubeiat pá, lepá sarat paaggra lé ragagalai, bulat tá te matotom purimataatnia

²⁵ Kisedda leú et, ké baí sia sikukuddu ka sara lalep tá anai pusaraat, tápoi sarat paaggra lé baí ragagalai pasasambadda, makakataí leú te pulalalepda

²⁶ Oto ké bara leú et ka purimataat Sanitu, kasaragaiatda, elé paaggaratda, tá leú te matotom purimataat nenda, samba tá isosoppi leú et itatatá

²⁷ Tá anai simaró бага mei manangkou ka lalepra simaron tubu, bulé rarau-rauaké bibiletania, ké tá rakabéaké nia boikí simaron tubu, sibakkat lalep nenda, iapeité ioi irau-rauaké bibiletania

²⁸ Oto kau nuagai kam néné! Ké ragalai jo sirimanua, elé rapaloloi Taikamanua, momoi peilé ituappéaké jodda

²⁹Tápoi ké Ketsat Sipunenan'an geti rapaloloi, táan te iagai ituappéaké jodda! Aipoí nga-nga paloloiat nenda, iaté, sipuoni jo simatom.

³⁰(Ikukua kelé néné geti Jesus, kalulut kukuadda ai pasasaileu nia ketsat sikataí.

³¹Lepá oi sia sainan Jesus sambat sasarainania. Rió sia ka gerat. Iageti gugluakérangan sabagei, raei masisogai Jesus

³²Ka tetret nenda, bulat maigi sia sipuuuddet ka bet-bet Jesus. Kuaddangan ka matat Jesus, "Ukkui, ai sia sainam sambadda sasarainam, airagagaba ekeu.

³³Tápoi alegina lé nia Jesus, ikua ka matadda, "Kasonia sainangku? Kasonia sasarainangku?

³⁴Iageti kinerenangan sia sipuuuddet ka bébénia, kuanangan ka matadda, "Sia té néné, sainangku samba sasarainangku

³⁵Aipoí sipasigagalaiaiké siobat bagat Taikamanua lé, sasarainangku, samaniuku, samba sainangku."

4¹Iageti taddaakénangan nia mitsá Jesus, mungantoman ka bet-bet Paot Galilea. Bulat maigi sia sigoilik nia.

Kalulut igidda, ei nia ka bagat abak.
Tápoi ka sia geti sirimanua simigi, ai lé
sia muririó ka bet-bet paó

²Oto pangantomannangan sia,
Jesus. Maigi ngamataat nia aikolouaké
ka matadda, ka pasikat. Oto kisé
ngantomannia ka tubudda

³"Arep'aké kam! Ai sara sirimanua
sipumomone sieei masikarap'aké
karamen

⁴Ai nia mangangarap, belé bagei ka
enungan. Iageti oinangan leú et umá
ipakomi karamen, pat sappru

⁵Ai leú bagei sibebelé ka polak
simabukkú, ka sitaimigi polak. Bulat tá
tedda kua ruei nia iputútú karamen,
kalulut taimakepput polaknia

⁶tápoi kelé aimakaddat sulu,
malajúnangan leú et letinia, iageti
magaraknangan, lepá, attei, kalulut
taimakerut ungatnia

⁷Ai leú bagei karamen sibebelé ka
talagat rui. Kelé aiputútú ka sia rui,
teinangan leú et letit karamen, pat
taipubuanangan

⁸Tápoi ai leú bagei karamen, sibebelé
ka polak simagabru. Putútúnangan
karamen nenda, memei mabebeunan,

iageti pubuanangan leú et. Ai siaili telu ngapulu, ai siaili enem ngapulu, tápoi ai leú et pat aili sangotu ngaoleat, kopet igit ngambénia.

⁹Lepána lé aitiboi nia pasikat néné Jesus, kuanangan ka matadda, "Kasei simaarep piú, arep'akénangan nia!

¹⁰Kelé aisarai tubunia Jesus, oi sia sipasiaarep ngantomannia sambadda sipasiuluinia ka tubut Jesus, masitiddou bulé ikolouaké ka sia bagat pasikat sikuania ka tubudda

¹¹Iageti kuanangan ka matadda, Jesus, "Ka kam, atuakéan panguruat masiagai keleat Taikamanua, bulé nuagai kam nia, kipa Ipurimata ka sia Taikamanua. Tápoi ka sabagei geti, pasikat lé tungangantoman'aké ka tubudda

¹²bulé kenanen, 'Airariritúaké, tápoi tá raagai apa sipuaaili, airaaarepi, tápoi tá ikokolou ka bagadda, ibabara kelé néné geti, bulé buí raitsó nia samba buí imakolou ka bagadda bulé buí raei ka Taikamanua iageti, appéakénangan leú et jodda.'

¹³Iageti kuanangan ka matadda, Jesus, "Ké tá makolou ka bagamui pasikat

néné, kipa iooi imakolou ka bagamui ka pasikat bagei, sikuakku ka matamui

¹⁴ Sipasikakarap'aké karamen, iaté, sipasikakarap'aké Katuareman Simaerú sibara ka Taikamanua

¹⁵ Karamen sibebelé ka enungan, tupasikat'aké ka tubudda sipasiaarep Katuareman Simaerú, iaté pagalaiat Purimataat Taikamanua. Bulat niapéi araarep nia, oi Sanitu masirau-rau sikarap'akenen ka bagat paatuatda

¹⁶ Karamen sibebelé ka polak simabukkú, iaté tupasikat'aké ka tubudda sipasiaarep Katuareman Simaerú. Bulat arepra lé nia, silóranan nia ka angkat бага

¹⁷ Tápoi kalulut Katuareman Simaerú siarepra nenda, tápei amuongat ka bagat paatuatda, bailiu tá matom. Bulat barana lé pugejaat бага, elé paoreat ka tubudda, kalulut Katuareman Simaerú sisilóra nenda, sik-sikranan leú et tei-teira muarat

¹⁸ Karamen sibebelé ka talagat rui, iaté tupasikat'aké ka tubudda sipasiaarep Katuareman Simaerú

¹⁹ tápoi ai lé sia mukakarat бага ka purimanuaiatda, kalulut obára mukayo.

Oto kelé itugurú ka bagat paatuatda sene ngamata pubobot-bot, bailiu teinangan Katuareman Simaerú sikukuddu ka bagat paatuatda, pat taipubuanangan

²⁰Tápoi karamen sibebelé ka polak simagabru geti, iaté tupasikat'aké ka tubudda sipasiaarep Katuareman Simaerú. Arepra lé nia, sak-saknangan ka bagadda. Puretdetnangan buadda, ai siaili telu ngapulu, ai siaili enem ngapulu, ai leú et pat aili sangotu ngaoleat kopet igit buania.

²¹Iageti riu-riuakénangan nia mitsá Jesus, ikua ka matadda, "Kipa ai leú sia siagaimui sipasitutumam alito, lepá geti tabbónangan nia bulukbuk, elé lipput'akénangan nia ka tei pereman? Tá pá ka panaggaat alito lé isasaggaaké nia

²²Aipoí tá anai simalipput, tá tupatotoilá; ia leú et tá anai keleat, tá tupopoiliat

²³Iaté lulunia, kasei simaarep piú, arep'akénangan nia!

²⁴Paolenangan nia mitsá masikua ka matadda, Jesus, "Lelek'aké kam sangamberi tiboiet siarepmui néné! Apa sikiréakenenmui ka tubudda sabagei, nia leú té nenda ikikiréaké Taikamanua ka

tubumui ka kam; elé isasaliu peilé igit sikiréakenenmui ka kam, igagalai

²⁵ Aipoí kasei ai, tukakau peilé mitsá simigi ka tubunia. Tápoi ka sitá anai geti, beri sipulelegei goisó ka tubunia, alá.

²⁶ Iageti riu-riuakénangan ipanibo mitsá Jesus, pelé nga-ngania, "Ka sia Purimataat Taikamanua, makeré lé nia kelé ka pasikat sara sieei masikarap'aké karamen ka monenia

²⁷ Soibó, ei nia merep; tágó suru nia. Oto ka sia karamen aiririu-riuaké iputútú, ipuurau. Tápoi kipa ipaeerú iputútú samba ipuurau nenda karamen, tá iagai

²⁸ Oto polak nenda te masibabaraaké: siboikí gagainia, lepá bobotsoketnangan, iapeité bara buania

²⁹ Samba ké amaráan baí buania gandum néné, taddaakénangan masimonei buania, kalulut aiailingan tetrenia pasigetaiat.

³⁰ Iageti kuanangan ka matadda Jesus, "Ka tubut apa tapakekeréaké nia Purimataat Taikamanua néné? Apa kirekat takakau bulé ioi takolouaké nia

³¹ Purimataat Taikamanua geti, makeré lé nia kelé ka pasikat néné: Ai sara

sirimanua sipasikakarap'aké luikut ubé ka polak. Luikut ubé iaté sara karamen bulat simakopé goisó ka polak néné

³²Tápoi kelé iputútú, niangan lé maabeu ka pagule-gulei. Rannia bulat magebbá, pat oi umá murumun ka tei sikunemannia.

³³Oto kisé lé ka sia igagalai Jesus ipangantoman sia, ikua siripot sioi isak-sak ka bagadda

³⁴Sarat pasikat lé ikakau Jesus ipangantoman sia. Tápoi kelé rasarai tubudda sambadda sipasiuluinia, iapeité ikolouaké nia ka tubudda, sangamberinia

³⁵Ka soibokatnia nenda leú et, kuanangan ka matadda sipasiuluinia, Jesus, "Sita kam mutalipó ka silat paó.

³⁶Iageti sakai nia Jesus ka bagat abak. Ka sia sipasiuluinia leú et tui sia rakaddiuaké sirimanua simigi, ka bet-bet paó, lepá sakai sia ka sia ka bagat abak nenda leú et. Abak bagei ai sedda. Lepá taddaakénangan nia mulajo Jesus, sambat sipasiuluinia

³⁷Oto tá amuju, buraakénangan rusa talabari. Iageti papau-paunangan leú et nia abak, makusenangan leú et abakra, malegre tim

³⁸Tápoi ka sia geti Jesus, ai lé nia memerep ka tulunan ka murit abak. Oto jiu-jiurangan nia sipasiuluinia. Pelé nga-nganda ka tubunia, "Kipa Guru, bulat taú ka bagam kekeu tamatei, elé?

³⁹Iageti suru nia Jesus, anunungan rusa, kuanangan ka matat paó, "Bá paanu tubum, lebak'aké ekeu!" Iageti puarinangan leú et ka sia rusa. Beri leú et ka sia paó, lebak

⁴⁰Oto kuanangan ka matadda sipasiuluinia, Jesus, "Angoian lé numalolotó kam? Apangan lé tá imatotonem bagamui ka tubukku?

⁴¹Iageti malotóranan leú et sipasiuluinia, pat patiboddangan pasasambadda, pelé nga-nganda, "Kasei lé páonia sirimanua néné, pat koí reddetnangan nga-ngania rusa sambat koat."

5¹Iageti segé Jesus sambadda sipasiuluinia ka silat Paot Galilea, ka laggai Gerasa

²Janangna lé Jesus ka kapí, oinangan leú et sara simanteu sibabara ka bagat pangali-ngaliu ratei

³Airapasasaileu nia paketsa-ketsat sikataí. Ka ratei lé ikukuddu. Bulat táan

iagai kabéaké, kenanen rattei tukau pasikabé nia

⁴ Amarei-reian tupaleggiui rere sambat kabeinia, tápoi ia leú et patakkína nia. Beri leú labá paleggiui rerenia patakkínangan nia. Bulat simakopé ron tubunia, pat beri sia sara simaró бага masikeraaké itui-tui

⁵ Sinágó samba sinoibó kaipa lé iobá ei. Kau mei nia ka ratei, kau leú mei nia ka leleu; ai nia memei ai nia mugegerei. Pakiritnangan leú et ka tubunia bukkú

⁶ Kelé aiitsó aoi Jesus ka sareunan, pabalaunangan leú et masiailiaké Jesus, segé nia lé purapponangan leú et ka matat Jesus

⁷ Iageti pugereinangan leú et masukua ka matat Jesus, pelé nga-ngania, "Ale Jesus, Togat Taikamanua Sipulubeunan! Kipa nupaeerú ka tubukku? Bulat ka onin Taikamanua, kutiddou ka tubum buí nupaorei aku!

⁸ (Ikukua geti nia néné, kalulut ikukua poí ka matania Jesus, "Ekeu ketsat sikataí, beleaké ekeu ka tubut sirimanua néné!"

⁹ Iageti kuanangan ka matania Jesus, "Kasonia onim?" Oto aleginangan nia,

pelé nga-ngania, "Oningku geti 'si Legiun', kalulut seget kopet igimai!

¹⁰ Bulat tá muaari iei masináná Jesus, bulé buí ikua ka matadda Jesus, rabela, rakaddiuaké laggai nenda

¹¹ Sedda ka iggirit leleu, ai maigi sakkoiló sipumomone

¹² Iageti nánáranan Jesus, paketsa-ketsat sikataí néné, pelé nga-nganda, "Kua lé ka tubumai, bulé kutugurú kai ka tubut sakkoiló.

¹³ Oto reddetnangan nga-nganda Jesus. Iageti pabeladdangan tubudda paketsa-ketsat sikataí, ka tubut sirimanua néné, eirangan leú et ka tubut sakkoiló. Oto sangamberinia nenda sakkoiló, paboddotnangan tubunia, pakukrunangan leú et, iageti pateipunangan tubunia, barania ka gilak leleu, belé ka bagat paó, lollou-lou. Ai rua ngaribu ngamuneng iginia, sangamberinia

¹⁴ Iageti tui sia sipababalau ka sia sipasijajago sakkoiló néné, raei masisegéaké sibabara néné, ka laggai sambat ka laggai simalegre sedda. Oto bela sia ka sia raitsó sibabara néné

¹⁵ Eirangan leú et ka tubut Jesus. Oto simaroró siitsóra simaruei, ai nia muuuddet sedda. Aian bibilet tubunia, samba aiagaian simerú. Iageti malotóranan leú et

¹⁶ Oto pungu-nguan'akérangan nia sangamberidda sipasiiigbuk sangamberi sibabara néné, sigalai Jesus ka tubut simaroró samba ka tubut sakkoiló

¹⁷ Iageti eirangan leú et sangalaggaiatda ka tubut Jesus, ratiddou, bulé ikaddiuaké laggaira

¹⁸ Kelé aitujanang ka bagat abak, Jesus, oi nia sipinasaileura paketsa-ketsat sikataí néné, ka tubut Jesus, itiddou buléiei masitut Jesus

¹⁹ Tápoi tá iobá Jesus itut sia, aikua lé ka tubunia, "Toiliakéan lé ekeu, nuei masisegéaké ka tubudda saeppum sangamberi sigalai Tuhan néné ka tubum, samba nupoiliat ka tubudda kipa kopet erut bagania ka tubum!

²⁰ Oto einangan leú et. Iageti taddaakénangan masipungungan'aké sangamberinia sigalai Jesus ka tubudda sikukuddu ka sipulu laggai. Bulat kisei lé ka bagadda sangamberidda, raarep sikuania

²¹ Lepá toili nia mitsá Jesus, ka silat paó. Iageti eirangan leú et sirimanua simigi ka bet-bet paó, rapurut Jesus

²² Lepá oinangan leú et ka sia sipuoni si Jairus, ka tubut Jesus. Iaté sara sibajá garejadda ka laggai nenda. Kelé aiitsó Jesus, purapponangan ka matania

²³ Paniddounangan simakopé ka tubut Jesus, pelé nga-ngania, "Bulat makopé besit togakku sinanalep, Ukkui. Ké nuobá lé baí nia, amoián ekeu, bulé nurapeaké kabeinu ka tubunia, imale besínia, babara ilalangó nia!

²⁴ Iageti ei sia ruadda si Jairus. Maigi leú te sia sabagei amei masitut Jesus. Paoilotrangan tubudda, bulat okkip lé ka tubunia, Jesus

²⁵ Ka talagadda, ai sara sinanalep sipasioorik besíra tainanalep, kalulut sarat bara lé simaingot tubunia. Aian pulu rua ngarura burúnia aiorik besínia néné

²⁶ Bulat amabolot'an pukayoatnia masibaya sakit laggeknia ka tai dokter, tápoi tá amoi araaleaké nia; ai lé makokopé besínia

²⁷ Tápoi amaingingan aiarep sinanalep néné sigalaiakenen Jesus. Iageti

paelaknangan tubunia sinanalep néné ka sirimanua simigi, ikulumiiei ka tei-tei Jesus

²⁸ Aikua poí sinanalep néné ka bagat paatuatnia, "Bulat kurape lé saraubánia, ale aku!

²⁹ Iageti rapenangan saraubat Jesus. Oto iangan leú nia, ari-aipuari ibara simaingot tubunia. Bulat againangan kamamalet besínia

³⁰ Oto ka tetret nenda leú et, againangan tubunia ka sia Jesus kabebelat kerek ka tubunia. Iageti pitsanangan sirimanua simigi, kuanangan ka matadda, "Kasonia amasirape saraubáku?

³¹ Iageti kuaddangan nia ka matat Jesus, sipasiuluinia, "Aian nuaagai igidda sirimanua siokkip ekeu, Tuhan, nukukua peilé kasei amasirape ekeu?

³² Tápoi riu-riunia lé ipaingo matania Jesus, igaba sipasirarape saraubánia

³³ Kalulut nia lé poí sinanalep néné siagai sipuaaili ka tubunia, oto ei nia murappo ka matat Jesus masakua sangamberi sigalainia. Tápoi ai nia memei aimugegeret tubunia, kopet lotó nia

³⁴Tápoi kuana lé ka matania Jesus, "Matonem poí bagam ka tubukku, Rogai, ale besínu! Oto toiliakéan ekeu ka angkat бага. Aipoí bulat amaron'an ekeu!

³⁵Talagat paninibo nia Jesus, lotsit-aratulotsit ka sia piga pá sapagugulet sibabara ka lalep Jairus, iageti kuaddangan ka matat Jairus, "Ailangóan nia togam sinanalep. Táan anai lulunia nugejaaké bagat Guru.

³⁶Tápoi tá aipuletsei sikuadda néné Jesus. Aikua lé ka matat Jairus, "Buí imakarat bagam, kau lé imatonem bagam ka tubukku!

³⁷Iageti riu-riu lé ipuenung Jesus, tápoi tá aiobáaké ratut nia kasei pá, sarat si Petrus, si Jakobus ruadda baginia si Johannes lé, aiabbít alei nia

³⁸Oto kelé arasegé ka lalep Jairus, arepnangan nga-nganda, gaú lepá sipusosou sambat sipugegeri sigereiakenen

³⁹Iageti tugurúnangan Jesus ka bagat lalep, kuanangan ka matadda, "Angoi nupulalamau kam sambat nupusosou kam? Tá ailangó nia toga néné; ai lé nia memerep!

⁴⁰ Iageti gágatidddangan nia, Jesus. Oto kuanangan ka matadda rabela sangamberidda. Lepá abbitnangan ukkui samba inan toga samba sipasiuluinia sitelu, ka bilit toga

⁴¹ Rapenangan kabei toga, Jesus, kuanangan ka matania, "Talita kum," katukolobatnia, "Oi Rogai, kukua ka matam: suruaké ekeu!

⁴² Oto tusurunangan leú et siokkó néné, puenungnangan leú et. (Aian pulu rua ngarura beunannia.) Bulat kisei lé ka bagadda sangamberi sipasiigbuk sibabara néné

⁴³ Iageti aséakénangan sia, simakopé, Jesus buí ratiboi nia ka sabagei. Lepá kuanangan ka matadda, "Kau kam kannia, toga néné."

6¹ Barania sedda, pariu-riunangan itoili Jesus sambadda sipasiuluinia, ka laggai puuragatnia

² Einangan leú et Jesus mungantoman ka gogoi Sabbat, ka uma paniddogat. Maigi sia siparururú sedda. Bulat makopé kisei ka bagadda raarep ngantoman Jesus. Oto pelé nga-nganda, "Kaipa te aisease nia ka sia sangamberinia néné?

Pusoppinan apa páonia ka tubunia? Kipa te ipaeerú ibaraaké kerek

³Tá poi nia né situkang loiná, togat Maria, sarainan Jakobus, Joses, Judas, sambat sarainan Simon? Beri leú et samaniunia, sené leú et rakukuddu." Oto kalulut néné, taiojárangan rasiló nia

⁴Iageti kuanangan ka matadda Jesus, "Kaipa laggai sarat mahormat sia ka tubut sara nabi, tápoi taikalaggaiatnia, sasaraiania elé sikalalepnia sambat tatogania geti, tá rahohormati nia.

⁵Bulat beri sara kerek aigalai sedda Jesus, sarat piga lé pá sia simasakit airapeaké kabeinia ka tubudda ialeaké sia

⁶Oto kisei lé ka bagania iitsó taimatonem bagadda ka tubunia. Lepá nenda, ei nia Jesus ka palagga-laggai simalegre sedda, mungantoman

⁷Iageti sogainangan sipasiuluinia kapuluruadda, Jesus, koiniakénangan sia parurua ka tubu. Kaunangan ka tubudda gege masiusiaké paketsa-ketsat sikataí

⁸Pangantrunangan sia, pelé ngangania, "Buí nuabbit kam apa pá, panarenganmui ka puenunganan. Sarat tuturá lé nuabit kam, lepá. Buí nuabbit

kam balutmui samba suppit paniddoumui
panguruat, elé bulagat

⁹ Pusipatu kam, tápoi buí nuabbit kam
rua leppeimui.

¹⁰ Samba aikua bagei ka matadda, "Ké
tugurú kam ka sara lalep, seddangan
té nukukuddu kam teret ailina
katui-tuiatmui

¹¹ Iageti ké anusegekingan kam sara
kudduat, tápoi sia sikukuddu sedda
tá raobá rasiló kam, elé tá raarepi
tiboietmui, tui kam nukaddiuaké kam
kudduat nenda. Iageti só-sóakémuian
ngaí ka reremui, kelé sara toggaiat
uukum'akéna sia Taikamanua, kalulut
taiobára masiarep ngantomanmui!

¹² Iageti eirangan leú et kapuluruadda
sipasiului, Jesus. Pungantomandangan
leú et, masisegéaké, buítá rabauaké
paatuatda sirimanua

¹³ Oto bulat maigi ketsat sikataí
arausiaké sipasiului Jesus, palokotrangan
tulat zaitun ka simabesí, aleakérangan
leú et sia

¹⁴ Iageti mararatnangan katuareman
sangamberi sibabara néné, pat
againangan nia ka sia Rimata Herodes.
Aipoí onin Jesus araagaian ka senen

laggai. Oto ai sia sipasikukua,
"Amurimanuangan nia mitsá si Johannes
Sipasiraraú! Iaté lulunia ibabara ka
tubunia gege, masigalaiaké kerek néné.

¹⁵Tápoi arakua geti sabagei, "Si
Elia lé nia." Iageti ai leú sia sabagei
sipasikukua, "Nabi lé nia, makeré kelé
galai tubut sara nabi siburú.

¹⁶Oto kelé aiarep nia ka sia si
Herodes, kuanangan ka sia, "Kirénangan
tedda si Johannes Sipasiraraú néné,
sikuakku siburú ratippú lolokkatnia.
Amurimanuangan nia mitsá kineneiget!

¹⁷Aipoí siburú aikoiniaké sia tai
tenterania si Herodes ralabá si Johannes,
rakau nia ka bagat penjara. Tápoi
aigalaiaké geti nia kelé néné si Herodes,
ka tubut Johannes Sipasiraraú, kalulut
galai tubunia ka tubut eirania si Herodias,
sinanalep sarainania si Pilipus. Aialá
eirania si Herodias bailiu sikalalepnia

¹⁸amareireian iaséaké nia si Johannes
si Herodes néné, ikua ka matania,
"Tá momoi nupalalep'aké sinanalep
sarainam!

¹⁹Kalulut néné te ipulu-lumun si
Johannes si Herodias, tápoi tá momoi

igagalaiaiké golú si Herodias, kalulut ikeraaké nia si Herodes

²⁰ Aikoiniakean poí sia tai tenterania si Herodes, rajago sipulelelek si Johannes buí rapageu-geu nia ka bagat penjara, kalulut lotó nia ka tubut Johannes. Ai lé poí iaagai simaerú paraboa lé nia si Johannes néné, sikoiniakenen Taikamanua pei bagei. Samba leú bagei, bulat iobá bagania si Herodes masiarep tiboiet Johannes, kenanen baí kalulu nia, taimasanangnangan paatuatnia

²¹ Tápoi lepá bara sara oggak simaerú kai Herodias bulé ialá sili ka tubut Johannes, iaté ka ipot punen pasirepdeman putútukat matat Herodes. Oto ka tetret nenda barakénangan punen si Herodes, iaté punenda sambadda sauté simabuak tiboit tubu ka purimataatnia, tai perwira samba sia karoniet siberikabaga ka Galilea

²² Iageti puturúnangan leú et togat Herodias siokkó ka punen. Bulat angká lé bagat Herodes sambat tairaumania masiitsó againa muturú. Oto kuanangan nia ka matat siokkó sipututurú néné si Herodes, "Apa nuobá, tiddounungan

nia ka tubukku. Iageti akékungan nia sangamberinia kekeu!

²³ Oto pusiblanangan leú et si Herodes ka tubut siokkó néné sisuppaakenen, pelé nga-ngania, "Bulat apa lé nutiddou, akékungan leú et nia kekeu. Kenanen elé sangasilá purimataatku néné pá, nutiddou!

²⁴ Iageti bela nia boikí siokkó néné ireréaké nia ka tubut inania si Herodias. Pelé nga-ngania, "Aponia ina sipasesese ka bagam tiddogetku?" Oto kuanangan ka matania inania, "Utet Johannes Sipasiraraú lé nutitiddou.

²⁵ Iageti olaakénangan nia siokkó mei ka tubut Herodes, kuanangan ka matania, "Paniddogatku ka tubum, bulé nuaké kaku kineneiget, utet Johannes Sipasiraraú, ka bagat mangkó!

²⁶ Bulat kelé aiarep nia si Herodes, paniddogatnia siokkó néné, mareu-reunangan bagania simakopé. Tápoi tá momoi itátáaké paniddogat néné, amusuppangan poí nia ka matadda tairaumania

²⁷ Oto kuanangan ka tubut sara tenterania, bulé ialá utet Johannes Sipasiraraú. Iageti einangan leú et

si perajurit, ka penjara, tippúnangan lolokkat Johannes

²⁸ Abbitnangan utet Johannes ka bagat mangkó, kaunangan nia ka tubut siokkó néné. Oto ka sia siokkó néné mitsá, kaunangan nia ka tubut inania

²⁹ Kelé araarep nia sipasiului Johannes sibabara néné, eirangan leú et masialá tubut Johannes simamatei, rateiakéranan nia

³⁰ Iageti toili sia mitsá sipasiului Jesus sikoiniakenennia, taddéranan mitsá tubudda ka bet-bet Jesus. Nunuakéranan sangamberinia sigalaiakenenda samba singantoman'akenenda, ka tubut Jesus

³¹ Bulat maigi sia sedda, siooi, situtui-tui, pat taioinangan ipukom ka sia Jesus sambat sipasiuluinia. Oto lepá kuanangan ka matadda sipasiuluinia, Jesus, "Sita kam ka simatangeu, tá sarai kam tubutta, ioi nuariaké kam tubumui goisó.

³² Iageti tui sia muabak, raei ka simatangeu

³³ Tápoi maigi sia sipasiiitsó aratui-tui sedda, samba raagai sia. Oto tui sia ka sia sangamberidda sipulalaggai sedda,

sipusisila. Kopet olat bagadda rasegé, pabalaurangan leú et raboikíaké tubudda ka tubut Jesus sambat sipasiuluinia

³⁴ Kelé aitujanang Jesus ka kápí, itsónangan sirimanua simigi. Oto makaténangan bagania ka tubudda, kéan lé poí biri-biri sitaipuukuket lé sia. Taddaakénangan leú ipangantoman sia, Jesus, sene ngamata obaket bagat Taikamanua

³⁵ Ka soibokat, kuaddangan ka matat Jesus, sipasiuluinia, "Aian masosoibó sulu, paobánangan pei bagei kudduatta sené, simatangeu lé

³⁶ Merú peilé, nukua ka matadda, ratui-tui, raei masisaki kanda ka palagga-laggai simalegre sené.

³⁷ Tápoi alegina lé nia Jesus, "Kam'an lé ipakokom sia." Oto kuaddangan nia sipasiului Jesus, "Kipa taleú kai lé memei manaki kan simemet rua ngotu ngaperak, masikau kanda tai néné?

³⁸ Iageti nou-nounangan sia Jesus, kuanangan ka matadda, "Ai piga ngaaggro rotimui ka kam? Itsó peité kam." Lepá araitsó nia, kuaddangan ka matat Jesus, "Ai lima ngaaggro roti, bara rua ngamuneng iba.

³⁹ Iageti kuanangan ka matadda sangamberidda, Jesus, bulé rapuuddet ka turu-turu, tápoi rakuddu sibagguak tubuna

⁴⁰ Oto puuddetrangan simalelek, sibagguak tubuna. Sangabagguak, sangotu sia igidda. Tápoi ai leú et sia lima ngapulu igidda sangabagguak

⁴¹ Iageti alánangan lima ngaaggro nia roti samba rua ngamuneng nia iba, teilanangan manua, kuanangan surá ka Taikamanua. Lepá paabbónangan nia, kaunangan nia ka sipasiuluinia, raparubei nia ka sirimanua simigi. Sambat iba leú, siruangamuneng parubeirangan nia ka tubudda sirimanua simigi

⁴² Iageti pukomrangan, bulat pat segé ektakra

⁴³ Oto rurúakerangan nia sipulelegei, sipasiului, Jesus, ai pulu ruangagarágá inia, sarat sisusun

⁴⁴ Ai sia lima ngaribu igidda taimanteu, sipukokom

⁴⁵ Iageti kuanangan ka matadda sipasiuluinia, Jesus, raei boikí muabak, mutalipó ka silá ka laggai Betsaida,

pangenan ikua ka matadda sirimanua
simigi, ratoili ka laggaira

⁴⁶ Kurukra sirimanua simigi, sakai Jesus
ka leleu maniddou

⁴⁷ Kelé aimasoibó, aian nia ka talagat
paó ka sia abakra sipasiuluinia. Tápoi ka
sia geti Jesus, ai peilé nia ka kapi

⁴⁸ Kelé aiitsó sia sipasiuluinia besit
tubudda muluga masisosro rusa, elé
ka bóbó epat ka patokat, ei nia Jesus
iailiaké sia, muenung ka uddut oinan.
Riu-riuakénangan ipuenung Jesus.
Lepá galainangan ipuenung kelé baí
isasabauaké lé sia

⁴⁹ Kelé araitsó nia ipuenung ka uddut
oinan, ka bagadda lé te sanitu

⁵⁰ Pat katsiakérangan nia kopet lotóra.
Araitsóan poí nia sangamberidda;
oto tugégérangan leú et simakopé.
Pelé ngangan Jesus ka tubudda, "Bá
pulalamau kam! Aku lé. Bá malolotó
kam!

⁵¹ Iageti sakai nia Jesus ka bagat
abakra. Oto ka sia rusa leú, ari-aipuari.
Oto kisei lé ka bagadda sipasiuluinia

⁵² Aipoí kerek Jesus ka silima roti, tápei
amakokolou ka bagadda. Aipoí bulat
mabesí isak-sak ka bagadda

⁵³ Iageti kelé aratusappai ka silat
paó, jolouakérangan abakra ka kapit
Genetsaret

⁵⁴ Kelé aratujanang ka kapí, agairangan
pu-Jesus nia, amoi

⁵⁵ Oto pabalaurangan leú et,
masisegeaké ka sangaliot laggai.
Iageti taddaakérangan masitaroaké
simabesí ka bagat peremanda ka matat
Jesus. Samba ké raarep rakua kababarat
Jesus ka sara kudduat, eirangan leú et
sedda, masitaroaké simabesí

⁵⁶ Bulat kaipa lé iei Jesus, ka laggai
sigoisó, elé ka laggai sabeu, elé ka laggai
bulat sigoisó, riu-riu lé raailiaké nia;
iageti taroakérangan simabesí ka tana
lapang. Besíakérangan nia simakopé ka
tubut Jesus, bulé iobáaké sia simabesí,
rarape saraubat Jesus, kenanen
sipujajainangan lé. Oto sangamberi
sipasirarape simajai saraubat Jesus, ale
besíra.

7 ¹ Iageti oi sia piga pá tai Parise
samba tai guru paamian sibabara ka
Jerusalem, ka tubut Jesus

² Araitsó poí piga pá sia sipasiului Jesus,
tá rapaliliná kabeira siripot puaranan,

tibonannia, tá muririggo sia siripot
peraturan ka arat

³Aipoí ka sia tai Parise samba sia
leú et sangamberidda tai Jahudi, bulat
maukú ka bagadda masireddet surukat
aratda taikebbukatda. Tá mukokom
sia, ké tá rariggo boikí kabeira, siripot
enung'akenen simarei-rei tugalaiaké

⁴Sangamberi pakome-komen sinaki
ka pasar, tá rakokom, ké tá rabui boikí.
Samba maigi peilé bagei raomet'aké
simaron surukat sikuadda taikebbukatda.
Kelé surukat masibui pulokat, seré,
samba pabibi-bibilet sigalai sibara ka
tembaga

⁵Kalulut néné, ei sia tai Parise sambat
tai guru paamian, masinou-nou Jesus,
pelé nga-nganda ka tubunia, "Tenan
lé koí sia mukom, ka sia sipasiuluinu,
taipuririggo? Tá koí rarereddet surukatda
taikebbukatta?

⁶Iageti aleginangan nia Jesus,
kuanangan ka matadda, "Ale kam
sipatataju! Bulat aisesengan te kelé
ka sikuat Nabi Jesayas pagalaiat
tubumui, sipasikukua kisé, 'Kisé aikua
Taikamanua, Sarat ka tiboietda lé

rapasiumun'aké aku, bangsa néné, tápoi paatuatda geti areu ka tubukku

⁷ Siboboi lé raumun'aké aku, aipoí surukat sirimanua sigelaiakenenda arabailiukéan lé nia kéan lé surukatkungan lé!

⁸ Surukat Taikamanua nuputatá kam, tápoi surukat sibara ka sirimanua geti, nia makopé ron nuomet'aké kam.

⁹ Kuanangan mitsá ka matadda Jesus, "Bulat nuagai kam pagalai, nutátáaké kam surukat Taikamanua, bulé ioi nuron'aké kam surukatmui saramui

¹⁰ Aiakéan si Mose surukat néné, masikua, 'Kau nuhormati ukkui samba inam. Oto kasei masipaloloi ukkui samba inania, buítá tumateiaké.

¹¹ Tápoi anugelaiaké geti kam, kisé lé: Ké rakua ka saeppudda, 'Gelajetku kuaaké ka tubum ukkui, ina, táan anai, akupanguruat'akéan nia ka Taikamanua,

¹² bailiu kalulut néné, anusailangan kam sia masipasikeli, saukkui samba sainania

¹³ Oto kalulut surukatmui sigelaiakenenmui ka tubudda sirimanua, bailiu putatámuian tiboiet Taikamanua. Samba maigi peilé bagei anugelaiaké

kam, ka sirimanua kelé sigalaiakenenmui néné.

¹⁴Iageti sogainangan sia mitsá sirimanua simigi, Jesus, kuanangan ka matadda, "Arep'aké peité kam sikuakku néné, bulé imakolou ka bagamui

¹⁵Tá te anai situgugurú ka bagat nga-nga, ibabailiuaké tukasit-sit'aké sirimanua, sarat sibebela ka ngu-ngu lé, itukasisit-sit'aké nia sirimanua

¹⁶[Oto kasei simaarep piú, arep'akénangan nia.]

¹⁷Kelé aikaddiuaké sirimanua simigi Jesus, isuggru lalep, eirangan leú et sipasiuluinia, masinou-nou katukolobat pasikat sikuania ka matadda

¹⁸Oto kuanangan ka matadda, Jesus, "Kipa, beri kam leú ka kam, tápei amakolou ka bagamui pasikat sikuakku ka matamui? Tá nuagai kam, situgugurú ka bagat nga-nga, tá sikau tukasit-sit'aké sirimanua

¹⁹Aipoí situgugurú nenda, tá paatuat ieenungi, tápoi balugú lé, lepá bela mitsá." Ka tiboiet sikuat Jesus néné, ituaagai, sangamberinia komen momoi itukom

²⁰ Iageti kuanangan mitsá ka matadda Jesus, "Sibebela ka ngu-ngu lé ilololit'aké sirimanua

²¹ Aipoí sibabara ka бага lé, elé sibabara ka багат паауат lé, ipututútú паауат sikataí, situbbui sirimanua musilainge, манангkou, масиматеiaké sirimanua

²² paelet, патажу, масіжоакé, samba masigalaiaké sene ngamata pukakataí, mualau бага, tá masopan, muoro mata, mubuak паауат, samba mukelá паауат

²³ Aipoí sangamberinia pukakataí бага, ka багат паауат lé ibabara. Oto nenda té ikakau tukasit-sit'aké sia sirimanua.

²⁴ Lepá tui nia Jesus ikaddiuaké kudduat nenda, ei nia ka sara laggai ka bet-bet laggaira tai Tirus. Gurú nia ka sara lalep, sipinakele, kalulut taiobána raagai kababara nia sedda. Tápoi tá leú amoi aipakele tubunia

²⁵ Aipoí kelé aiarep kababarat Jesus, sara saina sibara tatoga sinanalep, sipinasaileu ketsat sikataí, oinangan leú et masitaget'aké Jesus, purapponangan leú et ka matania

²⁶ itiddou bulé iusiaké ketsat sikataí ka tubut toganía. Ka sia sinanalep néné, tá

tai Jahudi. Tápoi sipututútú mata lé ka laggai Penisia ka Siria

²⁷ Kuanangan ka matania Jesus, "Tatoga lé boikí tupakokom. Aipoí tá maerú tualá kanda tatoga, ituribbaiaké ka jó-jó.

²⁸ Tápoi alegina lé nia sinanalep, ikua ka matat Jesus, "Tuan, jó-jó sikukuddu ka tei meja leú, ai leú te ikokom porat kan sipalimaira tatoga!

²⁹ Iageti kuanangan ka matania Jesus, "Kalulut tiboietnu néné, toiliakéan ekeu; abelangan ketsat sikataí, ka tubut togam!

³⁰ Iageti toilinangan leú et sinanalep néné, ka lalep. Kelé aisegé ka lalep, itsónangan togonia, ai nia memerep ka pereman. Bulat abelangan ka tubunia, ketsat sikataí

³¹ Iageti tui Jesus sedda, ikaddiuaké laggai Tirus, riu-riuakénangan puenunganannia ka laggai Sidon, iailiaké ka bet-bet Paot Galilea. Aibagai lé Jesus, ienungi laggai Sipulu Laggai

³² Kelé aisegé sedda, Jesus, taroakérangan ka matania sara sirimanua sioú-ou, samba simatakkep. Tiddourangan ka tubut Jesus bulé irapeaké kabeinia ka tubunia

³³ Iageti abbitnangan nia Jesus, rasarai tubudda, ka simigi. Usuakénangan singongaínia Jesus ka bagat ruania talingat simaoú-óú, simatakkep néné. Lepá pulujinangan, iageti rapenangan jalai nia sioú-óú, simatakkep nenda

³⁴ Lepá mitsá teilanangan manua, Jesus, puhoi-hoinangan, kuanangan ka matat simaoú-óú simatakkep néné, pelé nga-ngania, "Epata," tibonannia, "Bukáaké ekeu!

³⁵ Iageti tubukánangan leú et talingania. Jalainia leú et alit mitsá. Bailiu táan mabesí ka tubunia manibo

³⁶ Tápoi lepá, keraakénangan sia sangamberidda, Jesus buí rapoiliat nia ka sabagei. Tápoi iapeí ikeraaké sia Jesus, buí rapoiliat nia ka sabagei, iapeí rapakakra nia

³⁷ Bailiu makiseinangan ka bagadda sangamberi sipasiaarep sigalai Jesus néné, pat bela nga-nganda masikua, "Bulat apa lé igalai sirimanua néné, saran maeerú sangamberinia! Kalulunua, maarepnangan piúra simatakkep, samba oi rapanibo sioú-óú!"

8 ¹Tá amauju, oi sia mitsá sangamungkuat sirimanua simigi

parurú. Kalulut tatat kanda, sogainangan sipasiuluinia, Jesus, kuanangan ka matadda

²"Bulat makaté bagakku, ka tubudda sirimanua simigi néné. Aiailingan telu ngagogoi burúnia, arapaalei aku sené. Oto kineneiget asapprungan kanda

³Ké kukua ka matadda ratoili taipukokom, tá isoppi ramatei laje ka enungan. Sarapei ka talagadda néné, ai sia simareunan laggai.

⁴Tápoi alegidda lé nia ka sia sipasiuluinia, rakua ka matat Jesus, "Kaipa tagagaba kam kan, ka simatangeu néné, ioi tumemeti siripot nuntudda sangamberidda néné?

⁵Iageti nou-nounangan sia mitsá sipasiuluinia, Jesus, pelé ngangania, "Ai piga ngaaggro roti anuabbít kam?" Alegiddangan nia, "Ai pitu ngaaggro, iginia.

⁶Iageti kuanangan ka matadda sirimanua simigi, Jesus, bulé rapuuddet ka polak. Lepá alánangan kapitunia roti, kuanangan surá ka Taikamanua, lepá paabbónangan nia, kaunangan nia ka sipasiuluinia, bulé raparubei nia ka

sirimanua simigi. Oto taddaakérangan leú et nia sipasiuluinia masiparubei

⁷Iba leú, ai piga ngamuneng pá pagoiso-goisó. Iageti kuanangan surá ka Taikamanua kalulut iba néné, lepá kaunangan nia ka tubudda sipasiuluinia, bulé raparubei iba néné ka sirimanua simigi

⁸Iageti pukomrangan leú et, pat segé ektekra. Ai sia epat ngaribu igidda sipukokom. Lepá rurúakérangan nia sipulelegei, sipasiuluinia, ai pitu ngagarágá iginia sarat sisusut. Iapeité aiobáaké sia, Jesus, ratoili ka laggaira

⁹(8:8)

¹⁰Tápoi ka sia geti Jesus sambat sipasiuluinia, ka abak lé araei, raailiaké ka Dalmanuta

¹¹Ai sia piga pá tai Parise amei ka tubut Jesus, paukle ka tubunia, bulé ragaba selet tubunia, ioi rajoaké nia. Nánárangan Jesus, igalai kerek sibara ka manua, ibara itsoketda, masipatoilá pukaka-Taikamanuana aibara

¹²Iageti aleginangan sikuadda Jesus, ka bagat reu-reu бага, pelé nga-ngania ka tubudda, "Apa lulunia rananáná aku sangareddenan néné, bulé kugalai kerek

sibara ka manua? Tá! Tá kugagai
katuaggaiat kelé néné ka tubudda!

¹³ Iageti kaddiuakénangan sia Jesus,
sakai nia ka bagat abak, putalipónangan
leú et ka silat paó

¹⁴ Oto arakalipogi raabbit roti simigi,
sipasiului Jesus. Sangaaggro lé rotidda
ka bagat abak

¹⁵ Iageti kuanangan Jesus ka matadda
sipasiuluinia, "Suk-suk kam tubumui ka
ragidda tai Parise samba leú et ka ragit
Herodes.

¹⁶ Oto taddaakérangan nia ka sia
sipasiuluinia, rapaukeli sikuat Jesus ka
matadda. Pelé nga-nganda, "Kalulut
taiaabbitta lé pá roti, ikukua ka matatta
kelé néné, Jesus.

¹⁷ Tápoi aiaagai Jesus paukelietda,
sipasiuluinia. Kalulut néné, kuanangan
ka matadda, Jesus, "Nupaukeli kodda
kam tatá nia rotimui? Tápei ainuaagai
kam, élé tápei aimakokolou ka bagamui
sikuakku ka matamui? Ia né bulat
taiaailina paatuatmui masipaatu

¹⁸ Siboboian lé kababarat matamui -- tá
koí nuiitsó kam? Siboboian lé kababarat
talingamui -- tá koí nuaarep kam? Kipa,
tá ainurerepdem kam

¹⁹ sipaabbóku lima ngaaggro roti, masipakom lima ngaribu sia igidda? Ai piga ngagarágá legeira, sirurúakenenmui?" Iageti alegiddangan nia, pelé nga-nganda, "Ai pulu rua ngagarágá iginia.

²⁰ Iageti kuanangan nia mitsá ka matadda sipasiuluinia, Jesus, "Akupaabbó roti masipakom epat ngaribu sia igidda, ai piga ngagarágá legeira, anururúaké kam nia?" Alegiddangan nia, "Ai pitu ngagarágá iginia.

²¹ Kuanangan ka matadda Jesus, "Oto kipa, tápei leú ikokolou ka bagamui.

²² Iageti segé sia ka Betsaida. Lepá oi sia sipasitataroaké simapeset mata, ka tubut Jesus. Tiddourangan bulé irapeaké kabeinia ka tubut simabesí néné, ialeaké nia

²³ Oto alánangan kabei simapeset mata néné Jesus, abbitnangan nia raareuaké tubudda goisó ka laggai. Lepá lujinangan matat simapeset mata néné, Jesus, rapenangan matania, kuanangan leú ka matania, "Aian leú nuiitsó goisó apa pá, kineneiget?

²⁴ Iageti ipóakénangan matania ka gerat, kuanangan, "Oo, aian kuiitsó goisó, rapainga tubudda sirimanua, tápoi kelé mutubu loiná peilé kuitsó sia.

²⁵ Lepá rapenangan mitsá matat simapeset mata néné, Jesus. Oto ka sia néné, bulat besíakénangan ipaitsó, teret ka tubunia. Iageti erú-aimaerú matania, samba bulat toilá iitsó nia sangamberinia

²⁶ Lepá kuanangan ka matania Jesus, "Toiliakéan ekeu. Tápoi báan eei ka laggai kudduatnu siboikí.

²⁷ Iageti einangan leú et Jesus sambadda sipasiuluinia, masigejengi sangaliot laggai Kaisarea Pilippi. Ai sia mueenung, nou-nounangan sia sipasiuluinia, Jesus, kuanangan ka matadda, "Siripot siarepmui ka kam, ka nga-nganda sirimanua, kasei ka sia rakukua aku néné?

²⁸ Alegiddangan nia, pelé nga-nganda ka tubunia, "Ai sia sipasikukua ekeu, si Johannes Sipasiraraú; ai leú sabagei sipasikukua, ekeu néné si Elia. Tápoi ai leú et sia sabagei sipasikukua, ekeu néné iaté sara nabi.

²⁹ Iageti kuanangan ka matadda ka sia Jesus, "Tápoi kam ka kam, kasonia

nukukua kam aku?" Pelé ngangan Petrus ka sia, ikua ka matat Jesus, "Ekeu geti kekeu, Rimata Sipaarau lé ekeu!

³⁰ Iageti keraakénangan sia sipasiuluinia Jesus, buí ratiboi pagalaiat tubunia ka sabagei

³¹ Kappluna lé néné, taddaakénangan itiboi ka matadda Jesus, oorikna Togat Manusia sene ngamata paoreat, sibara ka tai bajá gareja, ka tai imam sabeu samba sibara ka tai guru paamian. Ramamateiaké te nia, tápoi isusuruaké te nia mitsá Taikamanua ka gogoi sikatelunia

³² Bulat simakolou lé itiboi sipuaaili ka tubunia néné Jesus, ka matadda sipasiuluinia. Oto kalulut néné, alánangan kabei Jesus si Petrus, abbitnangan nia raei ruadda ka bébé, iaséaké nia

³³ Iageti pitsanangan sipasiuluinia Jesus, anunangan si Petrus, kuanangan ka matania, "Kenan katui-tui sené, Sipatutubbui Baga! Aipoí tá siripot sipinaatut Taikamanua nupaaatu; tápoi siripot sipinaatut sirimanua simaerú ka sia lé nupaaatu!

³⁴ Lepá sogainangan sirimanua simigi Jesus, rataddé tubudda sambat sipasiuluinia. Kuanangan ka matadda, "Kasei siobá masitut aku, kau ragalak'aké galajet puuktunganda saradda, samba kau rabairat siliktenganda, samba kau mariu-riu ratut aku

³⁵ Aipoí kasei ikera engania, nia te malilimai purimanuaiat. Tápoi kasei sibuluaké tubunia, kalulut aku, samba kalulut Katuareman Simaerú sibara ka Taikamanua, nia té masisesese purimanuaiat

³⁶ Aponia uktuknia sirimanua, kenanen baí moi iikep'aké sangaliot polak néné, ké ai lé malilimai purimanuaiatnia

³⁷ Momoi poi itupasiliaké purimanuaiat néné ka tubut apa pá

³⁸ Kasei maila masimuneng'aké aku sambat ngantoman siniboiku ka matadda reddenan simakelá paatuat samba sikataí paraboat néné; maila leú te nia ka sia Togat Manusia masimuneng'aké sia, ka kaoijanannia ka gogoi sialu, ka pulatsanan Ukkuinia sambat samalaika sipunenan."

9 ¹ Iageti kuanangan mitsá ka matadda Jesus, "Repdem kam néné! Ai

ka talagamui sené kineneiget, tá ranananam kamamatei, teret itsóra ioi Purimataat Taikamanua ka gege!

² Kelé aitukapplu enem ngagogoi burúnia, abbitnangan sia Jesus, iaté si Petrus, si Jakobus sambat si Johannes, raei saradda ka leleu simakopé buak. Iageti ka mataddangan leú, siliynangan tubunia Jesus

³ Pukinamnangan saraubánia. Tá anai beri sara ka polak néné sipasitatap-tap saraubá, bulat pat uluinangan kelé bulaunia néné

⁴ Iageti itsóranan nia Jesus, kateludda sipasiuluinia néné, aipatitiboaké si Elia sambat si Mose

⁵ Kuanangan ka matat Jesus, si Petrus, "Bulat mangká bagatta mukuddu sené, Guru. Eddangan kurióaké kai telu ngambua sapou pugogoiat. Sara kekeu, sara kai Mose, iageti sara mitsá kai Elia.

⁶ Tá aiaagai kuanen nia si Petrus, ai lé poí sia mulolotó kateludda saaleinia

⁷ Iageti kuneminangan sia tinobut. Maarepnangan nga-nga ka tinobut sipasikukua kisé, "Nia té néné Togakku, kilibet bagakku. Reddet kam nga-ngania!

⁸ Lepá olaakérangan rapaingo matadda, tápoi táan araitsó sia sabagei, sarat Jesus'an lé sedda

⁹ Iageti ai sia tugogorosot baradda ka leleu, keraakénangan sia Jesus, kuanangan ka matadda, "Buí tebaí nupoiliat kam nia ka sabagei siitsómui néné, ké tápei atusuru Togat Manusia ka simamatei.

¹⁰ Oto reddetdangan leú nia sikuat Jesus ka matadda. Tápoi sia ka talagdda néné, riu-riu leú rapatiboji aponia katukolobat sikuat Jesus, "itusuru ka simamatei"

¹¹ Iageti nou-nourangan leú nia sipasiuluinia, pelé nga-nganda, "Angoi rakukua nia tai guru paamian, buítá moi nia boikí si Elia?

¹² Kuanangan ka matadda Jesus, "Kirénangan tedda buítá moi nia boikí si Elia, ipaerú sangamberinia. Oto kipa ka sia ka Togat Manusia? Apa lulunia ioorik migi paoreat samba paloloiat, kelé sitususurat ka Buko Sipunenan

¹³ Tápoi aku geti masukua ka matamui: amoi nia si Elia. Tápoi aragalai lé siobára ka tubunia, kelé leú ka sitususurat ka Buko Sipunenan, pagalaiat tubunia.

¹⁴ Kelé aitoili mitsá Jesus sambat sipasiuluinia sitelu, raei rarurú tubudda mitsá sambat sipasiuluinia sabagei, itsóranan sirimanua simigi siparururú sedda, ai sia pauukle tai guru paamian ka tubudda sipasiului Jesus

¹⁵ Kelé araitsó Jesus, makiseinangan ka bagadda, pabalaurangan leú et, raei raroroi nia

¹⁶ Iageti kuanangan ka matadda sipasiuluinia, "Aponia nupauukeli kam sambamui tai guru paamian?

¹⁷ Aletinangan nia sara ka talagadda, pelé nga-ngania, "Guru, amoi aku masitaroaké togakku ka tubum. Aioú-oúan nia kalulut ipasaileu nia ketsat sikataí

¹⁸ Bulat ké ibesiki nia ketsat sikataí, parapdamnangan leú et tubunia ka polak, iageti bela bubut ka ngungunia, patangatnangan sotnia, pusironnangan leú et sangaliot tubunia. Akukuangan ka tubudda sipasiuluinu Ukkui, bulé rarop'aké rausiaké nia ketsat sikataí néné, tápoi tá amoi arausiaké nia.

¹⁹ Iageti kuanangan ka matadda Jesus, "Bulat kipa lé pá kam néné! Bulat tá anai tonem bagamui ka tubukku. Kipangan lé

burúnia kukuddu ka talagamui, kupaom bagakku ka tubumui? Abbit kam nia sené toga!

²⁰ Oto abbitrangan nia toga nenda, ka matat Jesus. Kelé aiitsó Jesus, ka sia ketsat sikataí néné, pusironnangan tubut toga, paboddotnangan tubunia, pat belé nia ka polak. iageti bela bubut ka ngungunia

²¹ Iageti nou-nounangan ukkui toga néné, Jesus, kuanangan ka matania, "Kipangan burúnia, aibara ka tubut toga kelé néné?" Aleginangan nia ukkui toga, kuanangan ka matat Jesus, "Kapusulekatnia peilé!

²² "Amarei-reian itukkluké nia ketsat sikataí ka api, samba ka oinan igelai imateiaké nia. Oto ké momoi baí nia Ukkui, anurop'akéan nia. Bulat kau imakaté bagam ka tubumai, ukkui, nurop'aké kai!

²³ Tápoi pelé ngangan Jesus ka tubunia, "Kipa baí anukua? Ké momoi baí nia? Sangamberinia momoi tugalai, ké matonem bagamui ka tubut Taikamanua!

²⁴ Iageti pugereinangan ukkui toga néné, kuanangan ka matat Jesus, "Matonem bagakku, Tuhan, ka

Taikamanua; sarat gulainangan lé nurorop'aké, bulé ituppai peilé ronnia tonem bagakku!

²⁵ Kelé aiitsó raoi sirimanua simigi, Jesus, rapurut nia, kuanangan ka matat ketsat sikataí, "Ketsat sipaoú-oú samba sipatakkep sirimanua, kubelaaké ekeu ka tubut toga néné, samba buían nutugurú mitsá ka tubunia!

²⁶ Iageti pugereinangan leú et ketsat sikataí néné, pangit-ngitnangan nia, lepá belanangan leú et ka tubut toga néné. Ituitsó tubut toga néné, bulat kéan lé simamatei, pat kuaddangan nia sangamberidda sipasiitsó, "Ailangóan nia!

²⁷ Iageti omet'akénangan kabei toga néné Jesus, isuruaké nia. Oto tusurunangan leú et

²⁸ Kelé aitoili Jesus ka lalep, ei sia saradda sipasiuluinia ka tubut Jesus, ranou-nou nia, pelé nga-nganda, "Tá koí momoi ka kai kuusiaké kai nia ketsat sikataí néné?

²⁹ Iageti kuanangan ka matadda, Jesus, "Ketsat sikataí kelé néné geti, kenanen kipa tagalai tausiaké nia, bulat

tá irereddet, burú. Sarat paniddogat lé momoi masiusiaké.

³⁰ Lepá tui nia Jesus sambat sipasiuluinia, rariu-riuaké puenungananda ka Galilea. Tápoi tá iobá Jesus raagai kudduatnia

³¹ ai peilé poí ipangangantoman sipasiuluinia. Iageti kuanangan ka matadda sipasiuluinia, Jesus, "Rasesegéaké te Togat Manusia ka kabeira sirimanua. Lepá mateiakérangan nia. Tápoi ka gogoi sikatelunia, suruakénangan nia mitsá Taikamanuana!

³² Bulat tá araagai kolou nia singantruakenen Jesus ka tubudda sipasiuluinia. Tápoi malotó sia raiséaké nia ka tubunia

³³ Lepá segé sia ka Kapernaum. Kelé arasegé ka lalep, nou-nounangan sia sipasiuluinia, Jesus, kuanangan ka matadda, "Aponia nupauukeli kam ai sita mueenung simaruei néné?

³⁴ Beri sia sara sipasiaalegi nga-ngania, kalulut apaukle poí sia ragaba kasei sia oniakenen siabeu tiboí tubu

³⁵ Kelé aipuuddet Jesus, sogainangan sia kapuluruadda sipasiuluinia. Kuanangan ka matadda, "Kasei siobá

munomor sara, buítá ibailiu sikatei-tei, samba buítá ibailiu nia sipuukú sangamberi sirimanua.

³⁶ Lepá alánangan sara toga Jesus, rióakénangan nia ka matadda.

Lakkaiakénangan nia toga néné Jesus, kuanangan ka matadda sipasiuluinia

³⁷ "Kasei sipasiaalá sara tatoga kelé néné, kalulut aku, aku lé te galainia aialá. Ialeú et sipasiaalá aku, tá te sarat aku aialá, tápoi sambat Taikamanua sipasikokoiniaké aku leú te aialá.

³⁸ Iageti kuanangan ka matat Jesus, si Johannes, "Guru, ai sia sara akuitsó kai aiuusiaké sanitu ka onim, Ukkui. Kalulut néné, ei kai kukeraaké kai nia, aipoí nia néné, tá aleita.

³⁹ Tápoi kuana lé ka matania, Jesus, "Bá kekeraaké kam nia ipasiusiaké sanitu. Tá poí anai sia atuagai sipasigagalai kerek ka oningku, lepána lé igalai nia, paloloinangan aku

⁴⁰ Aipoí kasei sitaisaggangi sita, sia té nenda saaleita

⁴¹ Repdem kam sikuakku néné! Kasei sipasiaaké lómui, kalulut puonimui sipasiului Rimata Sipaarau, bulat tá isosoppi isiló upania.

⁴² "Kasei sipapepe pupaaturananda sara taigoisó néné, pat taimatonemnangan bagadda ka tubukku, bulat maerú peilé tutiggot'aké tali ka lolokkatnia, iageti alá bukkú panundukat gandum saonia, ribbaiaké ka bagat koat

⁴³ Ké kabeinu itubbui ekeu mugalai jo, tippúnungan nia kabeinu nenda! Aipoí maerú peilé sisangasilá kabei ekeu, nupukuddu ka bet-bet Taikamanua, nutugurú siruangasilá kabei ka api narako, ka api sitaipepé

⁴⁴ [Sedda, api tá pepé. Kisedda leú ka sia leitínia, tá leú et mamatei.

⁴⁵ Samba ké rerem itubbui ekeu mugalai jo, tippúnungan nenda rerem. Aipoí maerú peilé sisangasilá rere ekeu, nupukuddu ka bet-bet Taikamanua, nutugurú sirua ngasilá rere ka api narako

⁴⁶ [Sedda, api tá pepé. Kisedda leú et ka sia leitínia, tá leú et mamatei.

⁴⁷ Ké matam itubbui ekeu mugalai jo, kioknungan nia matam nenda! Aipoí maerú peilé sisangasilá mata ekeu, nukuddu ka Laggai Taikamanua Sibau, nutugurú sirua ngasilá mata turibbaiaké ka bagat narako

⁴⁸ Sedda, api tá pepé, kisedda leú et ka sia leitínia, tá leú mamatei

⁴⁹ Aipoí sangamberi sirimanua tupaliliná ka api, kelé ka sia buluakenan tupaliná ka garap

⁵⁰ Ka sia garap, maerú. Tápoi ké maleu baí garap néné, momoi peilé pá itukalóaké mitsá? Oto kam ka kam, buítá kelé garap. Kau nupusara kam ka aban baga."

10 ¹ Lepá tui nia sedda Jesus, ei nia ka laggai Judea samba ka laggai ka silat Oinan Jordan. Iageti ei sia mitsá sirimanua simigi parurú ka matat Jesus. Iageti pangantomannangan sia Jesus, kelé simarei-rei igalalaiaké

² Ka sia tai Parise, amoi leú sia ka sia, ragaba selet tubut Jesus, bulé ioi rajoaké nia. Iageti nou-nourangan nia, Jesus, pelé nga-nganda, "Siripot surukat ka aratta, momoi leú igalak sinanalepnia, sara simanteu?

³ Iageti aleginangan nia Jesus, ikua ka matadda, "Kipa aiparentaaké si Mose ka tubumui?

⁴ Alegiddangan nia, pelé nga-nganda, "Momoi ragalak sinanalepra,

taimanteu, tápoi buítá ragalai boikí surat pagalangan.

⁵Tápoi kuanangan ka matadda Jesus, "Kalulut kelat paatuatmui lé, aigalai surukat néné si Mose

⁶Ka panandaatnia geti, ka tetret aibaraaké sirimanua Taikamanua, aikua sedda, 'Aibaraakéan sia Taikamanua, simanteu sambat sinanalep

⁷Iaté lulunia ikakaddiuaké ukkui samba inania simanteu, ilop-lop'aké tubunia ka sinanalepnia, karuadda néné bailiu sara.

⁸Oto sia néné táan rua, tápoi sarangan lé

⁹Iaté lulunia, sia silop-lop'akenen Taikamanua, tá momoi rapasaraaké sia sirimanua!

¹⁰Kelé arasegé ka lalep, nou-nourangan nia sipasiuluinia, Jesus pagalaiat sitiboinia ka matadda tai Parise

¹¹Kuanangan ka matadda, "Kasei masigalak sinanalepnia, lepá putalimounangan mitsá ka tainanalep bagei, sipaeet lé nia, ka sinanalepnia siboikí

¹²Kisedda leú tainanalep sigalak taimanteura, lepá putalimourangan

mitsá ka taimanteu bagei, sipaeet leú te nia ka sia.

¹³ Iageti oirangan leú et sipasitataroaké tatoga ka tubut Jesus, bulé irape samba isukat'aké sia. Tápoi arapugoluki lé sia sipasiului Jesus

¹⁴ Kelé aiitsó nia Jesus, pugolúnangan leú et, pelé nga-ngania ka tubudda sipasiuluinia, "Obáaké kam sia tatoga raoi ka tubukku! Bá kekera kam sia, sirimanua kelé néné lé poí ibabailiu saladdou paamian Taikamanua

¹⁵ Bulé nuagai kam nia! Ké tá kelé tatoga raei ka tubut Taikamanua, bulat tá ibabailiu sia sapaamian Taikamanua.

¹⁶ Oto lepá aikua néné, Jesus, lakkaiakénangan sia tatoga, kaunungan kabeinia ka utéra sene-senenda, sukat'akénangan leú et sia

¹⁷ Aiririu-riuaké puenunganannia Jesus, oi sia sara sipababalau masiailiaké Jesus. Purapponangan ka matat Jesus, pelé nga-ngania, "Guru simatopit, aponia sipasesese galaiakenenku, bulé ioi kuikep'aké purimanuaiat sipulelelek samba sitaitatátá?

¹⁸ Iageti aleginangan nia Jesus, kuanangan ka matania, "Nukukua

koí aku simatopit? Aipoí tá anai
bagei simatopit. Sarat Taikamanua lé
simatopit, lepá

¹⁹ Ai lé nuaagai surukat Taikamanua,
sipasikukua, 'Buí nupamatei, buí
nupaelet, buí nupanangkou, buí
numuneng'aké boko, buí nupataju,
hormati ukkui sambat inam.'

²⁰ Iageti kuanangan nia ka sia ka matat
Jesus, "Guru, sangamberinia néné,
akureddet'an, barana ka silaingekku
peilé.

²¹ Oto kinerenangan nia Jesus,
manuntunangan bagania, kuanangan ka
matania, "Ai peilé sara, tá anugalaiaké.
Iaté néné; bulé mei ekeu nusakiaké
sangamberinia bibiletu, lepá ei ekeu
masiparubei bulagat sakit bibiletu
nenda ka simagebá, ibara pukayoatnu
ka manua. Oto lepá oi ekeu nutut aku.

²² Kelé aiarep nia sikuat Jesus néné,
bulat tá aisese ka bagania, iageti tui-tui
nia sedda, ikaddiuaké Jesus, simakopé
kayo lé poí nia, néné

²³ Oto kinerenangan leú sia ka
sia sipasiuluinia, Jesus, kuanangan
ka matadda, "Bulat tá te malabbei

ka simakayo, ibailiu sia sapaamian Taikamanua!

²⁴Tápoi ka sia sipasiuluinia, bulat makisei ka bagadda iarep sikuat Jesus néné. Iageti kuanangan ka matadda Jesus, "Kam tatogakku, kirénangan tá tedda malabbei tugurú mupaamian Taikamanua

²⁵Sangamuneng onta peilé malabbei tugurú ka matat pajjaí, ka tubudda simakayo, ratugurú ka Laggai Taikamanua Sibau.

²⁶Kalulut tiboiet Jesus néné, bara kisei ka bagadda sipasiuluinia, pat patiboddangan pasasambadda masikua, "Ké kisé baí nia, kaseian lé isisiló puaragat?

²⁷Iageti kinerenangan sia sipasiuluinia Jesus, lepá kuanangan ka matadda, "Kirénangan ka sirimanua, tá momoi! Tápoi ka Taikamanua geti, sangamberinia lé momoi igagalai.

²⁸Kuanangan ka sia si Petrus ka matat Jesus, "Itsó peité, akukaddiuakéan kai sangamberinia, kuoi kai kutut kai ekeu, Tuhan.

²⁹Iageti kuanangan ka matadda sipasiuluinia, Jesus, pelé nga-ngania,

"Kau imatonem bagamui ka sikuakku néné: kasei sikaddiuaké lalepnia, kalulut aku, elé kalulut Katuareman Simaerú sibara ka Taikamanua

³⁰tá isoppi rasiló simigi, saliu peilé sisilóra kineneiget. Isisiló pasasangotu ngaoleat mitsá igit lalep, sasaraina samba samaniu, ina sambat tatoga samba leú mone; beri paoreat leú isisiló. Oto ka gogoi sialu, silóranan purimanuaiat sipulelelek samba sitaitatátá

³¹Tápoi maigi sia kineneiget siboikí, bailiu sikatei-tei, samba sikatei-tei kineneiget, bailiu siboikí.

³²Ai sia mueenung raailiaké Jerusalem, boikíakénangan tubunia Jesus ka sipasiuluinia. Kalulut néné, bara karat bagadda sipasiuluinia. Sipasitutum sia sabagei ka tei-tei leú, bara ka sia lotóra. Lepá sogainangan sia mitsá sipasiuluinia Jesus, rasaraaké tubudda, bulé ipoiliat ka tubudda sipuaaili ka tubunia

³³Kuanangan ka matadda, "Arep'aké kam! Kineneiget aian taaailiaké kam Jerusalem. Rasesegéakéan lé te Togat Manusia ka kabeira tai imam sabeu samba ka kabeira tai guru paamian.

Rauukum'ake te nia simateiakenen, lepá segéakérangan nia ka kabeira sipuarat sabulungan

³⁴ Rapalololoi samba raluluji te nia, samba leú mitsá, rapaoorei te nia. Kalepakatnia pattáakérangan nia ka loiná siliktenga. Tápoi ka gogoi sikatelunia, suruakénangan nia mitsá Taikamanua.

³⁵ Lepá oi si Jakobus sambat si Johannes, iaté tatogat Sebedeus, ka tubut Jesus. Kuaddangan ka matania, "Ai sara kiddiyet bagamai nugagalai ka tubumai, Guru.

³⁶ Kuanangan ka matadda Jesus, "Aponia nukikiddiy kam kugagalaiaké ka tubumui?

³⁷ Iageti alegiddangan nia, pelé nga-nganda, "Néné lé! Aikugegelai kai nukau kai muuddet sara kai kattoetnu, sara kai katsiunu, ké amuuddet'an ekeu ka purimataatnu sipulubeunan.

³⁸ Oto kuanangan ka matadda, Jesus, "Tá nuagai kam tiddogetmui. Kipa momoi leú nuló kam ló sibara ka pulokat pangoringan akenen ka tubukku loketku, lepá oi kam nuorik kam oringen enungietku?

³⁹ Alegiddangan nia, pelé nga-nganda ka tubunia, "Momoi." Iageti kuanangan ka matadda Jesus, "Kirénangan tedda nuloló kam pulokat pangoringan, akenen ka tubukku loketku, samba oringen enungietku

⁴⁰ Tápoi masiteteúaké kasei muuuddet kai kattoet, elé kai katsiuku geti, tá aku masiteteúaké. Taikamanua lé masiteteúaké kasei sia kaunen nia muuuddet sedda.

⁴¹ Kelé araagai nia ka sia sipasiului Jesus sipulu sibabara néné, pugolúranan leú et ka tubut Jakobus samba ka tubut Johannes

⁴² Lepá sogainangan sia sipasiuluinia Jesus, kuanangan ka matadda, "Kelé siagaimui, sauté sitaimalotó ka Taikamanua, sarat masipaorei tai rayatda lé ragagalai. Samba siabeu tiboí tubu ka talagadda leú, sarat mugege lé ragagalai ka tubudda tai rayatda

⁴³ Tápoi ka kam geti, buí nuului kam kelé sigalaiakenenda! Kasei siobá muabeu tiboí tubu ka talagamui, buítá ibailiu nia sipuukú kam

⁴⁴ Ia leú et, kasei siobá muuté ka talagamui, buítá ibailiu nia paguguletmui sangamberimui

⁴⁵ Kelé ka sia Togat Manusia, tá bulé tapuukú nia aioi, tápoi masipuukú sita lé, samba masibuluaké engania masitebui sirimanua simigi.

⁴⁶ Iageti segé sia ka Jeriko. Kelé aitui-tui Jesus sambadda sipasiuluinia sambat sirimanua simigi rakaddiuaké Jeriko, ai leú sedda sara simapeset mata, ai nia muuuddet ka bet-bet enungan maniddou paroman, iaté sipuoni si Bartimeus, togat Timeus

⁴⁷ Kelé aiarep katusasabau Jesus tai Natsaret, pugereinangan leú et, ipusoga ka tubut Jesus, pelé nga-ngania, "Jesus Togat Dapid! Kau imakaté bagam ka tubukku!

⁴⁸ Iageti pugolukiddangan nia sirimanua simigi, asérangan nia ipumeng-meng. Tápoi aituppai lé beunan nga-ngania mugerei, masikua, "Ale Togat Dapid, kau imakaté bagam ka tubukku!

⁴⁹ Iageti tengennangan ipuenung Jesus, kuanangan ka matadda, "Sogai kam nia ioi sené." Eirangan leú et masisogai simapeset mata néné, kuaddangan ka

matania, "Buí imakarat bagam! Konan, aisogai ekeu, Jesus!

⁵⁰ Iageti ribbaiakénangan saraubánia, olaakénangan murió, einangan leú et masiailiaké Jesus

⁵¹ Kuanangan ka matania Jesus, "Aponia nukikiddiy kugagalai ka tubum?" Aletinangan nia simapeset mata, kuanangan ka matat Jesus, "Rop'aké aku, Guru, imakoinong matakku.

⁵² Iageti kuanangan ka matania Jesus, "Kauan toiliakéan ekeu. Kalulut tonem bagam ka tubukku, ale ekeu." Iangan leú et nia, makoinongnangan matania. Iageti ei nia masitut Jesus ka enungan.

11 ¹ Kelé aramalegre ka Jerusalem, airaaailiaké Betpage samba Betania ka gilak Leleu Zaitun, koiniakénangan sia sipasiuluinia Jesus, raei boikí

² Kuanangan ka matadda, "Kenan kam ka laggai nenda, simatotoilá ka matatta. Gurúmui lé ka laggai, itsómuian sangamuneng togat kalidei, ai nia ka sesereat, beri pei sakajidda tei-teinia. Oto rugutmuian nia abbitmuian nia sené

³ Ké ai sia siteká kam, rakua, apa lulunia nururugut kam kalidei néné,

kuamuian, 'Ai lé kauna nia si Tuhan. Tá mauju, toiliakénangan nia mitsá.'

⁴Iageti eirangan leú et sipasiului sirua sikoiniakenen Jesus, ailiddangan leú sangamuneng togat kalidei, ai nia ka sesereat ka matatbaliu lalep, ka bet-bet enungan. Rugutdangan leú et nia

⁵Oto sia sipuririó sedda, kelé araitsó sia, tekárgan sia, kuaddangan ka matadda sipasiului sirua néné, "Ei, aponia nupaeerú kam? Nururugut koí kam togat kalidei néné?

⁶Iageti kuaddangan kelé singantruakenen Jesus, ka tubudda. Oto obáakérangan leú et nia

⁷Kelé arasegé ka tubut Jesus, paapórgan saraubára ka tei-tei kalidei, iapeité sakai nia Jesus ka tei-tei kalidei

⁸Maigi leú sia sabagei amasiapóaké saraubára ka enungan. Tápoi ai leú sia sabagei amasiparappi paran-ran loiná, sialára ka mone

⁹Sia sipueenung ka mata samba sipueenung ka tei-tei, sangamberidda masisogaaké

¹⁰"Umun kam Taikamanua! Tupanunukani te nia siooi ka onin Tuhan! Mauktuk te purimataatnia siooi

mitsá, samba purimataat taikebbukatta si Dapid! Umun'aké kam Taikamanua ka Pata!

¹¹ Kelé aisege Jesus ka Jerusalem, gurú nia ka Uman Taikamanua. Lelek'akénangan sangamberinia sibabara sedda, pat bökkó. Tápoi kalulut malegrengan lé ibelé sulu, tui-tuiakénangan nia, iei ka Betania, sambadda sipasiuluinia sipulurua

¹² Simatsep, ai sia mututui-tui baradda ka Betania, againangan tubunia Jesus, laje

¹³ Ai peilé nia ka sareunan, itsónangan sangaloiná sileu simalibbut buttet. Einangan leú et iailiaké loinat sileu néné, iitsó baleú ai buania. Tápoi kelé aisege ka bakkatnia, itsónangan mandé sangambé buania, sarat buluknia lé matotoilá, tápei poí aiaili pubuaiatnia ka sia sileu

¹⁴ Iageti kuanangan ka loinat sileu néné, Jesus, "Barania kineneiget, táan rakokom buam sirimanua, burú!" Ka sia sipasiuluinia, araarep leú sikuat Jesus néné

¹⁵ Iageti segé sia ka Jerusalem. Lepá gurú nia ka sia Jesus ka Uman Taikamanua. Oto taddaakénangan

ipakekleji sia sangamberidda sipasasaki sedda. Pabailúnangan leú et mejadda sipasisisiliy bulagat, sambat uddenanda sipasisasakiaké marpati

¹⁶ Bulat beri sia sara aiobáaké raabbit apa pá ka bet-bet Uman Taikamanua

¹⁷ Lepá taddaakénangan nia Jesus ipangantoman sia sedda. Pelé ngan-gania ka tubudda, "Kisé atusurat'aké ka bagat Buko Sipunenan, Aikua Taikamanua, 'Kudduat paniddogatda sangamberi bangsa lé Umangku néné.' Anubailiuaké peilé kam nia ngaliura sipasirarau-rau!

¹⁸ Tápoi ka sia tai imam sabeu sambat tai guru paamian, airaaarep sikuat Jesus néné. Oto bailiu gabaddangan enungan ioi ramateiaké Jesus. Tápoi malotó sia ka tubunia, aipoí sangamberi sirimanua lé makisei ka бага, raarep ngantomannia

¹⁹ Oto ka soibokat, kaddiuakénangan nia Jesus laggai nenda, sambadda sipasiuluinia

²⁰ Kelé aratusabau simatsep, itsórganan loinat sileu, amatteian, pat attei sambat ungatnia

²¹ Repdemnangan leú ka sia si Petrus, sigalai Jesus sokat. Kuanangan ka matat

Jesus, si Petrus, "Itsó peité, Guru, sileu siteleinu amatteian!

²² Iageti kuanangan ka matadda Jesus, "Kau imatonem bagamui ka tubut Taikamanua

²³ Oto kukua ka matamui: Bulatnia momoi nukua kam ka leleu néné, 'Akkat'aké tubum, nuribbaiaké tubum ka bagat koat!' tá isoppi ireddet sikuamui nén'é, ké tá marua bagamui, samba ké matonem bagamui bulat puaailinia sikuamui néné

²⁴ Oto néné lé repdemenmui: Ké maniddou kam, nutiddou kam apa pá, kau imatonem bagamui, siniddoumui nenda, aiakéan Taikamanua ka kam; oto bailiu, nususilóan te kam

²⁵ Samba leú ké maniddou kam ka Taikamanua, tápoi ai peilé ngúngut bagamui ka sara sirimanua, appéaké lé kam boikí jo sigalainia ka tubumui, bulé iappéaké jomui ka kam Ukkuimui sikuddu ka manua

²⁶ [Aipoí, ké tá nuappéaké kam jodda sabagei, tá leú te iaappéaké jomui ka kam, Ukkuimui sikuddu ka manua.]

²⁷ Lepá sok-sokrangan nia mitsá ka Jerusalem. Ai nia mugegejek Jesus, ka

bagat Uman Taikamanua, oirangan leú et tai imam sabeu, tai guru paamian, sambat tai bajára tai Jahudi ka tubut Jesus

²⁸ Nou-nourangan nia, pelé nga-nganda ka tubunia, "Kaipa pubakkanannia aibara haknu iooi nugalaiaké nia sangamberinia néné? Kasei amasiaké hak néné ka tubum?

²⁹ Iageti kuanangan ka matadda ka sia Jesus, "Aku kaku leú, kobá kunou-nou kam ka kam. Ké nualegi baí kam panounogatku néné, iapeité poiliatkungan nia ka matamui, kasei amasiaké hak néné ka tubukku, iooi kugalai sangamberinia néné

³⁰ Kasei amasikau hak ka tubut Johannes, iooi ipasiraú? Taikamanua, elé sirimanua?

³¹ Iageti taddaakérangan rapatiboji nia pasasambadda, tai imam sabeu sambat tai bajára tai Jahudi sikuat Jesus néné, pelé nga-nganda, "Ké takua baí kam, 'Taikamanua lé amasikau hak ka tubunia,' tá isoppi ikua ka matatta ka sita, 'Lepá, tá koí matonem bagamui ka tubut Johannes?

³²Iageti ké takua baí, 'Sirimanua lé amasikau hak ka tubunia,'" malikkru leú te. Ai lé poí sia malolotó ka tubudda sirimanua simigi, kalulut ai lé poí rapunanabi nia ka sia si Johannes néné

³³Oto taiagaira kuanenda, kuadda lé ka matat Jesus, "Tá kuagai kai." Iageti kuanangan ka matadda Jesus, "Tá poí nukukua kam ka kam, oto, aku kaku leú et, tá leú te kukukua ka matamui, kasei ka hak, iooi kaku kugalaiaké sangamberinia néné."

12 ¹Iageti taddaakénangan mupasikat Jesus, ka matadda tai imam sabeu, ka tai guru paamian, samba ka tai bajára tai Jahudi. Pelé ngangania ka tubudda, "Ai sara sirimanua sipasiuurep sangamata monen anggur. Kekrenangan nia pat bokkó. Iageti kailúnangan kudduat pametsunan suat anggur, lepá rióakénangan leú et sapou pujagoat. Oto lepá sewaakénangan nia ka tubudda piga pá sipuukú mone, iageti tui nia ka laggai bagei

²Kelé aiaili tetrenia pasimoneiat buat anggur, koiniakénangan sara paguguletnia si tuan néné, iei masitiddou

rubeiat siloket nia ka sia si tuan, ka tubudda sipuukú mone

³Tápoi aralabá lé nia pagugulet néné sipuukú mone. Bóbórangan nia, lepá toiliakérangan nia sitá abbinen

⁴Iageti koiniakénangan mitsá sara paguguletnia bagei sibakkat mone. Tápoi arajigu lé lakkupatnia pagugulet néné, sipuukú mone. Lepá kekledangan nia sipulagaji

⁵Lepá koiniakénangan mitsá sara paguguletnia bagei sibakkat mone. Tápoi aramateiaké lé nia ka sia. Oto sarat kiseddangan lé aragalai ka tubudda piga pá sapagugulet sabagei: ai rapabó-boki, samba ai leú sabagei ramateiaké

⁶Oto kineneiget, kaseian lé ikokoiniaké si tuan sibakkat mone néné? Aian lé sia sara koiniakenennia, iaté toganía kilibet bagania. Iageti koiniakénangan toganía, iei ka sipuukú mone. Aipaaturan poí, 'Malangan pá tá rahormati togakku.

⁷Tápoi kelé araitsó nia sipuukú mone, patiboddangan pasambadda, pelé nga-nganda, 'Nia té néné sipasiiikep'aké mone, sita kam tamateiaké kam nia, bulé ioi tabakkati ikep'akenennia!

⁸Iageti labáranan nia toga néné, mateiakéranan leú et nia. Oto tubut toga simateiakenenda néné, aláranan nia, ribbaiakéranan nia ka tei-tei irip monen anggur.

⁹Iageti nou-nounangan sia Jesus, kuanangan ka matadda, "Oto kipangan lé ipaeerú sibakkat monen anggur néné, ka tubudda sipuukú mone? Tá isoppi ioi imateiaké sia sipuukú mone néné, lepá kaunangan mone néné ka tubudda sipuukú mone sabagei

¹⁰Anubatsangan kam sitususurat ka Buko Sipunenan, sipasikukua kisé, 'Bukkú siribbaiakenenda tai tukang aibailiuan nia bukkú bongen bakkat inan arigi

¹¹Nia té néné sigalaiakenen Tuhan; bulat iobá bagatta iigbuk nia!'

¹²Kelé araarep nia tai bajára tai Jahudi sikuat Jesus néné, gabaddangan enungan ioi ramateiaké nia, aiagaian poí bagadda, sia lé aikak-kak pasailukat néné. Tápoi tá amuriu-riu aragalaiaké nia, kalulut lotóra ka sirimanua simigi. Lepá tui sia rakaddiuké Jesus

¹³Iageti koiniakéranan piga pá sia tai Parise samba piga pá saladdou partai

Herodes ka tubut Jesus, rapanounogi nia, ragaba imasele kuanennia, bulé ioi rajoaké nia

¹⁴ Ei sia ka tubut Jesus, kuaddangan ka matania, "Guru, kuagai kai roipot bagam, samba taimarérénu ka sipinaatudda kasei pá. Bulat tá poí nugigígí nungantoman'aké apa siobat bagat Taikamanua, sibailiu puuktunganda sirimanua. Aipoí tá nurarasei sirimanuania. Oto kauan, kua peité ka matamai, 'Siripot surukat ka aratta, momoi leú pá, tabaya kam pajá kai Kaisar, elé tá? Bulat takakau pajá, elé tá?'

¹⁵ Tápoi ai lé iaagai patatajudda nia Jesus. Kalulut néné, kuanangan ka matadda, "Apangan lé lulunia nubebesíaké kam masijoaké aku? Patoilá peité kam ka matakku tubut bulagat, perak.

¹⁶ Iageti kaurangan ka tubunia bulagat sangaperak. Lepá nou-nounangan sia Jesus, kuanangan ka matadda, "Kasei tularat samba kasei oni sitususurat ka tubut bulagat néné?" Iageti alegiddangan nia, "Tularat sambat onin Kaisar.

¹⁷ Iageti kuanangan ka matadda Jesus, "Oto ké kisedda baí nia, apa sipuoni kai Kaisar, kaumuian nia kai Kaisar, samba apa sipuoni ka Taikamanua, kaumuian nia ka Taikamanua." Bulat kisei lé ka bagadda araarep sikuania néné

¹⁸ Lepá ei sia piga pá sibara ka mungkuatda tai Saduki ka tubut Jesus. (Tai Saduki néné, iaté sara mungkuat sitaikatoni katususurudda sirimanua simamatei.

¹⁹ Kuaddangan ka matat Jesus, "Guru, siripot surukat sinurat'akenen Mose ka sita, kisé: 'Ké ilangó sara simanteu sitá tuppai tubu, buíta sarainania leú et masialá babaliunia, bailiu sikalalepnia, masibaraaké tuppai tubut sarainania simamatei.

²⁰ Iageti ai sangamitsá, ai sia pitu sipusasaraina. Talimou-aiputalimou ka sia toga sikebbukat, lepá langónangan nia, tá abara tuppai tubunia

²¹ Lepá putalimounangan ka sia toga sikarua ka tubut babaliunia. Tápoi tá amauju, langónangan nia; tá leú et abara tuppai tubunia ka sia. Oto kisedda leú te amuaili ka sarainania sikatelú

²² pat aili ka sikapitunia, sarat tá abara tuppai tubudda sangamberidda. Kalepakatnia, langónangan leú et nia ka sia sinanalep néné

²³ Oto ké iaili tetrenia ibara katusuruat tubu simamatei, kasei ka talagadda sipitu sipusasaraina néné, ipalalalep'aké nia sinanalep néné? Aipoí sia ka pitudda sipusasaraina néné, sarat arapalalep'akéan nia!

²⁴ Iageti kuanangan ka matadda Jesus, "Bulat masele sikuamui. Tá poí makolou ka bagamui sikuat Taikamanua ka Buko Sipunenan, sambat geget Taikamanua

²⁵ Aipoí, ké tusuru sirimanua ka simamatei, táan mutatalimou sia mitsá. Tápoi kelé puririmanuanda samalaika ka manuangan lé, rauului

²⁶ Kipa, tápei poi anubatsa kam ka bukot Mose, sipasikokolouaké, kipa ratusuru sirimanua simamatei, kelé ka pungu-nguan sangabakkat rui simalalabó? Ka tiboiet sitususurat sedda aikua Taikamanua kai Mose, 'Aku te Taikamanuan Abraham, Taikamanuan Isak, sambat Taikamanuan Jakob.

²⁷ Aipoí ka sia Taikamanua, tá Taikamanuanda sirimanua simamatei;

tápoi Taikamanuanda lé sipuririmanua.
Oto bulat makopé selemui!

²⁸ Lepá einangan leú et ka sia sara guru paamian, iarepi paukelatda tai Saduki sambat Jesus. Arepnangan si guru paamian ikau alegiat simakolou ka tubudda tai Saduki. Oto kalulut néné, tú-tú ka paatuatnia masinou-nou Jesus, pelé nga-ngania, "Surukat sikapiga, bulat abeu, ka surukat Taikamanua?

²⁹ Iageti aleginangan nia Jesus, kuanangan ka matania, "Surukat siboikí iaté: 'Arep'aké kam, kam bangsa Israel! Sara lé Tuhan, iaté Tuhan Taikamanua

³⁰ Kau imakaté bagam kai Tuhan Taikamanuam, bulat sibara ka sangamuinet paatuatnu, bulat sibara ka sangamuinet purimanuaiatnu, samba kau bulat pat sappru siripot siagainu nupaeerú, samba leú et kau bulat teret sapprut ka tubum nubesíaké nia.

³¹ Surukat sikaruania, iaté néné: 'Kau imakaté bagam ka tubudda saaleinu sirimanua, keleú katet bagam ka tubum kekeu.' Táan te anai surukat bagei, sisaliu beunan karuania surukat néné.

³² Iageti kuanangan si guru paamian ka tubut Jesus, pelé nga-ngania, "Bulatnia,

aisese sikuam néné, Guru! Bulat maipó kelé ka sikuam: Si Tuhan lé Taikamanua. Sarat nia lé Taikamanua; tá anai Taikamanua bagei

³³Oto buitá rapukateki nia бага sirimanua, Taikamanua, bulat sibara ka sangamuinet paatuatda, bulat sibara ka sangamuinet purimanuaiatda, samba bulat pat sappru siripot siagaira rapaeerú, samba bulat teret sapprut ka tubudda rabesíaké nia. Kisedda leú, buítá ipukateki sia бага saaleinia sirimanua, ké leú katet bagania ka tubunia ka sia. Aipoí nenda peilé maerú, ka buluaakenen rarangen, elé ka buluakenen bagei kaunen masibuluji Taikamanua.

³⁴Kelé aiarep nia Jesus, kopet erut alegiatnia si guru paamian néné, kuanangan ka matania, "Bulat aian lé te goisó ibabailiu ekeu laddou paamian Taikamanua." Lepána lé nenda, táan anai sia simaró бага mei masinou-nou mitsá, Jesus

³⁵Talagat punta-ngantoman nia Jesus, ka Uman Taikamanua, nou-nounangan sia sipasiuluinia, Jesus, kuanangan ka matadda, "Angoi rakukua nia tai guru

paamian, pupupunuteteuna nia si Dapid, Rimata Sipaarau néné

³⁶ Beringan poí si Dapid leú ka sia, kelé aitoroji paatuatnia Ketsat Sipunenan, amusiblania, masikua: 'Tuhan Taikamanua, masikua ka matat Rimata Sipaarau: uddet'aké ekeu saigit kai kattoetku teret kalaakéku sia saggaknu.

³⁷ Oto ké iputu-Tuhan lé nia Rimata Sipaarau néné ka sia si Dapid, kipangan lé galainia ituooniaké nia punuteteu Dapid?" Bulat maangká bagadda sirimanua simigi sikukuddu ka Uman Taikamanua, masiarep ngantoman Jesus

³⁸ Iageti kuanangan ka matadda, Jesus, "Jago kam tubumui ka tubudda tai guru paamian. Aipoí raobá musaraubá simananta, raei mugejek. Samba bulat raobá raparoroaké sia sirimanua ka pasar

³⁹ Ka uddenan sikokoiaakenen ka sauté lé raei muuddet ka bagat uma paniddogat, samba ka pupunenan

⁴⁰ Sarat masipajo tailumang lé ragagalai, rapauragi bibiletta. Oto bulé tá ituagai kataínia sigalaira,

panantaddangan paniddogatda. Bulat tá te magugulai sanet ukumanda!

⁴¹ Ai nia muuddet Jesus, ka matat petit panguruat ka Uman Taikamanua, aiiigbuk sia sipasikakau panguruatda ka bagania. Ka sia simakayo, maigi arakau panguruatda ka bagat petit bulagat panguruat

⁴² Lepá ei nia ka sia silumang, simagebá pei bagei, buluk'akénangan bulagat ka bagat petit bulagat, rua ngatembaga iginia. Iaté sara matat bulagat bulat sigoisó nia

⁴³ Iageti sogainangan sia sipasiuluinia Jesus, kuanangan ka matadda, "Lelek'aké peité kam néné: Sikau nia silumang néné peilé te maigi, ka sikaura ka sia sabagei

⁴⁴ Aipoí sikaura ka sia sabagei néné, sialára ka sipulelegei ka pukayoatda lé. Tápoi ka sia geti silumang néné, kenanen magebá nia, tápoi bulat tubut sangamberi sibabara ka tubunia lé aipanguruat'aké, iaté tubut balut pakeietnia ka purimanuaiatnia."

13 ¹ Kelé aitui-tui Jesus ka Uman Taikamanua, oi sara ka talagadda sipasiuluinia, masikua ka matat Jesus,

pelá nga-ngania, "Guru, itsó peité nenda Uman Taikamanua. Lelek'aké peité pabukku-bukkúnia. Bulat tubut simakopé lainge!

²Tápoi kuana lé nia Jesus, ka matania, "Kipa nuroró beunannia? Bulat beri te sara mulelegei bukkú sipinalakké ka Uman Taikamanua néné. Turaragat'aké te sangamberinia néné.

³Lepá ei nia Jesus ka leleu Zaitun. Segéna lé sedda, puuddetnangan ka ipot matat Uman Taikamanua. Lepá ei sia sipasiuluinia ka tubut Jesus, iaté si Petrus, si Jakobus, si Johannes sambat si Andareas, masinou-nou Jesus kelé ka siripot paaleiat, pelé nga-nganda

⁴"Poiliat peité ka kai, piga moi ipuaaili sangamberinia néné? Apa katuaggaiatnia sibailiu patuptumenmai ka paatuatmai, ké iaili tetrenia?

⁵Iageti aleginangan nia Jesus, kuanangan ka matadda, "Pagaba kam tubumui, buí rapataju kam sirimanua

⁶Maigi poí sia siooi masiailiaké kam, sipuoni oningku, masikua ka matamui, 'Aku té né Rimata Sipaarau!' bailiu maigi sia rapatataju

⁷ Ké nuarep kam gururuu ngan-
ngan pamatei ka pasaggangan, elé
katuareman pasaggangan, bulat buí
numalotó kam. Aipoí buítá muaili
sangamberinia néné. Tápoi tápei te nia
nenda gogoi kalepakat polak

⁸ Pasasaggak te bangsa ka bangsa,
negara ka negara. Kaipa te bara
teteu sabeu samba pulajeat. Tápoi
sangamberinia sibabara néné, pasiboikí
nia peilé. Kelé galai pubebesíra lé
tainanalep, kei iaili rapusulé

⁹ Suk-suk kam tubumui, aipoí momoi
te sia ralabá kam, rakau kam ka kabeira
sipasiukum. Rapabobóboki te kam ka
uma paniddogat. Rapagigirit te kam,
rataroaké kam ka sauté samba ka tai
rimata, kalulut pupapasiuluimui aku.
Oto nenda te tetre simaerú ka kam,
numuneng'aké kam aku ka matadda

¹⁰ Katuareman Simaerú leú, buítá
tupaarep boikí ka sangamberi bangsa

¹¹ Samba ké moi sia masilabá kam
rakau kam ka matat pengadilan, buí
imakarat bagamui ka kuanenmui.
Ké aiailingan tetrenia nupanibo kam,
kuamuian, apa sitonéakenen ka matamui
ka tetret nenda leú et. Aipoí tiboiet

tiboakenenmui, tá sibara ka kam, tápoi Ketsat Sipunenan lé masipangangantru kam

¹² Rapajo-jo te sarainanda, bulé itumateiaké. Ia leú te muaaili ka ukkui ka tokania. Rasasaggangi te saukkui samba sainanda sia tatoga, lepá taroakérangan sia, bulé ramateiaké sia

¹³ Rapulalagaki te kam бага sangamberi sirimanua, kalulut pupapasiuluimui aku. Tápoi kasei siom'aké nia teret kalepakatnia, sia té masisisiló puaragat sibara ka Taikamanua.

¹⁴ "Nuiitsó te kam ipurió, 'Turot Pukakataí Pasimamatei', tá ka siripot kudduatnia. (Repdemenda sipasibabatsa: Lelek'aké kam apa katukolobatnia!) Ka tetret nenda, sia sikukuddu ka Judea, kau ratui-tui sedda, raei ka leleu

¹⁵ Samba leú et sia sikukuddu ka tei-tei lalep, buí ratugorosot raei masialá bibiletda ka bagat lalep

¹⁶ Ialeú et sia sieei ka mone, buían ratoili ka laggai masialá saraubára

¹⁷ Tápoi bulat kataínangan te ka sia tainanalep sibara suruket, samba saina simagoisó tatoga

¹⁸ Kau nupaniddou kam ka Taikamanua, bulé tá iipó sibabara néné, ka mui-mui manua

¹⁹ Ka ipot gogoi sikataí samba kalotóakenen nenda leú et, babara leú te paoreat. Paoreat néné, tápei abara, baranangan aibaraaké polak Taikamanua, pat aili kineneiget. Tápoi sangamitsá lé ibara, lepá

²⁰ Tá baí itengai nantat gogoi paoreat nenda Taikamanua, bulat bolot sirimanua ka matat polak, rapamatei sia

²¹ Ka tetret nenda, ké ai sia sikua ka matamui, rakua, 'Ai nia sené Rimata Sipaarau!' elé rakua, 'Ai nia sedda!' buí imatonem bagamui ka sikuadda

²² Aipoí momoi te sia sipatataju, sikua tubuna sipaarau, elé sipunabi tubuna. Ragagalai te sene ngamata kiseiet samba maigi kerek, ibara enunganda masipataju sirimanua. Pat kelé baí moi nia, beri sapaamian Taikamanua, rapatataju

²³ Oto bulat jago kam tubumui! Kuboboikiáké lé kutiboi nia sangamberinia néné ka matamui. Kei iaili, anuagaian kam.

²⁴ "Kappluna lé paoreat, magep-gepnangan matat sulu samba taimatoronangan leú et matat laggó

²⁵ Ka sia leú panyanyat, belé, barana ka manua, samba pasabunangan leú sia sangamberi siutéaké manua

²⁶ Lepá matoilánangan ioi ka sia Togat Manusia ka tinobut, ka gege samba ka pulatsanan sabeu

²⁷ Iageti koiniakénangan samalaikania, Togat Manusia, masirurúaké sapaamian sipiliynia, sibara ka siepat matat rusa, barana ka tútut polak, pak aili ka piprin manua.

²⁸ "Alaki lé kam nia kelé ka loinat sileu. Ké malimun sambat manembú rannia, elé ké itaddaaké ibela sinulania, agaimuian, amalegrengan te iaili legeu manua

²⁹ Oto kisedda leú te, ké nuitsó kam ipuaili sangamberinia néné, agaimuian, bulat amalegrengan te, iaili tetrenia

³⁰ Bulé nuagai kam nia! Tápei tatatá sia sangamberidda sipuririmanua kineneiget, amuailingan sangamberinia néné

³¹ Tatatá lé ka sia manua sambat polak, tápoi tiboietku geti, tá tatatá lé, burú.

³² "Tápoi kenanen kisedda, beri sia sara siagai masipatup-tup gogoi elé jamnia. Samalaika ka manua leú, tá raagai. Beri ka sia Togat Manusia, tá iagai. Sara nia lé Ukkui iagai nia, lepá

³³ Oto kau nupumata kam samba nupanuksuk kam, tá poí nuagai kam tetrenia

³⁴ Aipoí makeré lé nia kelé ka sara sirimanua, sikaddiuaké lalepnia, iei ka laggai sirimanua musaralaggai. Kei mutui-tui nia, patonénangan sapaguguletnia, rajago lalepnia, samba parubeinangan sia, galajetda sene-senenda. Sarapei te ka sia sipasijajago matatbaliu, iron'aké ikua ka matadda, bulé rajago lalepnia bulat sipulelelek

³⁵ Oto kalulut néné, kau nupanuksuk kam; tá poí nuagai kam gogoi katoiliatnia si tuan sibakkat lalep néné, elé ka soibokat, elé tengamoi, elé ka patokat, elé ka tetret ibotsó sulu

³⁶ Ké simatulut ibara, buí iaili kam, ai kam memerep

³⁷ Oto apa siniboiku ka matamui, ialeú te kutitiboi ka matadda ka sia sangamberi sirimanua: bulat kau nusuk-suk kam tubumui!"

14¹ Ai pei rua ngagogoi iaili Punen Paska sambat Punen Pukoman Roti Simaleu. Oto ka sia leú tai imam sabeu sambat tai guru paamian, ai leú ragagaba ka sia enungan bulé ioi ralabá Jesus, pinakele, ramateiaké nia

² Tápoi arakua, "Buí tagalaiaké kam nia ka ipot matat punen, babara pulamagat.

³ Ai nia mukukuddu Jesus ka Betania, ka lalep Simon, iaté simalubbé simasappó, siburú, oi sara sinanalep ka tubut Jesus. Ai aiabbit sangabuli-buli tula simasingin simakopé kepput saki, iate sigalai sibara ka ungat simasingin. Ai nia mututukú Jesus, mukom, ragat'akénangan nia buli-buli nenda sinanalep, uruakénangan tula simasingin néné, ka utet Jesus

⁴ Tápoi sia sabagei sikukuddu sedda, kelé araitsó nia, mangoí-ngoínangan bagadda, pat bela nga-nganda masikua, "Tupasisibbu kodda tula simasingin néné

⁵ Ké tusakiaké baí tula simasingin néné, ai telu ngotu ngaperak legei, igit sakinia; iageti bulagat sakinia néné, parubei ka simagebá!" Oto pugolúranan leú et ka tubut sinanalep néné

⁶ Tápoi kuanangan Jesus ka matadda, "Bá sasaila kam nia! Angoi nugegejaaké

kam bagat sinanalep néné? Galajet
simaerú samba umun'akenen lé poí
sigalainia ka tubukku néné

⁷Ai lé turerere kababaradda simagebá
ka talagamui. Senen gogoi, momoi
nurop'aké kam sia, ké aitututu bagamui,
momoi nurop'aké kam sia. Tápoi aku
kaku geti, tá mariu-riu kukuddu ka
talagamui

⁸Aigalaiakéan ka sia sinanalep néné,
teret siooi igalaiaké. Aipatarek'an aku
ka tula simasingin, kaunen pasirateiku,
kenanen baí tápei aiaili tetrenia

⁹Kau imatonem bagamui ka sikuakku
néné! Ka sangaliot polak néné, kaipa
itupaarep Katuareman Simaerú sibara
ka Taikamanua, sigalai sinanalep néné
leú, tupungungungan'aké, kelé sara
repdemen ka tubunia.

¹⁰Iageti einangan leú et sara ka
talagadda sipulurua, sipasiului Jesus,
iaté sipuoni si Judas Iskariot, ka tai
imam sabeu, iisiaké masipajo Jesus, ka
matadda

¹¹Bulat seget kopet angkat bagadda
raarep sikuat Judas Iskariot néné, pat
pusibladdangan leú et, rakau bulagat

ka tubunia. Iageti gabanangan oggak sipasesese si Judas, ipajo Jesus

¹² Iageti eirangan leú et sipasiuluinia, Jesus ka tubunia, ka gogoi siboikí ka Punen Pukoman Roti Simaleu, iaté ka ipot pasijájakatda ibat Punen Paska, raisé nia, pelá nga-nganda, "Kaipa siobánu, kueei kai, masipatarek kudduat pukoman komen Paskam?

¹³ Iageti koiniakénangan sia rua sipasiuluinia, Jesus, kuanangan ka matadda, "Kenan kam ka laggai, ai leú nupaseseaké kam sara simanteu sipasibebeilá lalaisú, sibara ka бага oinan. nia té nenda nututut kam

¹⁴ Kaipa lalep itugurú, ei kam sedda. Kuamuian ka matat sibakkat lalep, 'Aikua si Guru, kaipa nia kudduatda mukom Paska sambadda sipasiuluinia.

¹⁵ Iageti saú-saúnangan ka kam sara kudduat simalio ka bilí ka pata. Kudduat silepá Perú. Ka bilí nenda, amalelek'an katugalangan sangamberinia, beri leú et papuko-pukoman aian sangamberinia. Oto patarekmuiian sangamberinia ka sita sedda.

¹⁶ Iageti eirangan leú et sipasiuluinia ka kota. Ailiddangan sangamberinia, kelé

sikuat. Jesus ka matadda. Patarekdangan leú et siripot komen Paskadda

¹⁷ Kelé aimasoibó, einangan leú et Jesus sambat sipasiuluinia sipulurua

¹⁸ Kelé arapuuddet mukom, kuanangan ka matadda, Jesus, "Arep'aké kam: ai te sia sara ka talagamui sipakom'aké aku kineneiget, masipajojo aku.

¹⁹ Kelé araarep nia sikuat Jesus néné sipasiuluinia, pureu-reurangan baga simakopé. Taddaakérangan pasasara masinou-nou Jesus, masikua, "Kipa, taleú aku nukukua, Tuhan?

²⁰ Iageti kuanangan ka matadda Jesus, "Nia té nenda, sara ka talagamui sipulurua, sisangapiring kai mukom ruamai

²¹ Kirénangan tedda, mamatei nia Togat Manusia, kelé sitususurat ka Buko Sipunenan. Tápoi mateinangan leú te ka sia sipajo Togat Manusia. Maerú peilé tá mutútú matania ka polak sirimanua néné!

²² Ai sia mukokom, alánangan roti Jesus, kuanangan surá ka Taikamanua. Lepá paabbónangan nia, kaunangan nia ka sipasiuluinia. Aikakau ka sipasiuluinia,

aikukua, "Na, alá kam, kom kam, tubukku te néné.

²³ Lepá alánangan pulokat sibara ka бага anggur, kuanangan surá ka Taikamanua, kaunangan nia ka tubudda sipasiuluinia. Iageti lóranan nia sangamberidda

²⁴ Lepá, kuanangan Jesus ka matadda, "Iaté néné logauku, masisah'aké pakerekat bagat Taikamanua, sipiliakenen punutubut sirimanua simigi

²⁵ Kau imatonem bagamui ka sikuakku néné: Táan te kuloló mitsá suat anggur néné, teret iaili tetrenia kuló nia mitsá, suat anggur sibau, sambatta ka Laggai Ukkuiku Sibau.

²⁶ Lepá uraiakérangan urai pusurakat. Kelé aitulettu sangamberinia, eirangan leú et, ka Leleu Zaitun

²⁷ Iageti kuanangan Jesus ka matadda sipasiuluinia, "Nukakaddiuaké te kam aku sangamberimui, kelé sitususurat ka Buko Sipunenan, sipasikukua kisé: 'Imamateiaké te sia Taikamanua sipasijajago biri-birinia, bailiu pasabunungan tubunia ka sia mungkuat biri-biri.

²⁸Tápoi ké atusurungan geti aku, boikíakékungan tubukku ka kam, mei ka Galilea.

²⁹Iageti kuanangan ka sia si Petrus, ka matat Jesus, "Kenanen rakaddiuaké ekeu ka sia sabagei, tápoi aku kaku geti, bulat tá kukakaddiuaké ekeu, burú.

³⁰Tápoi kuanangan ka matat Petrus, Jesus, "Repdem Petrus, soibó nia néné leú, tápei mururua ngamitsá iputokki goú-goú, anupakelengan againu aku telu ngamitsá.

³¹Kuana lé nia mitsá ka sia si Petrus, iron'aké sikuania, "Kenanen baí tumateiaké aku kaku, imakeré tamatei, bulat tá lé pá kukukua taiagaiku ekeu, burú!" Ka sia sipasiuluinia sabagei leú, keré lé nga-nganda masikua kelé sikuat Petrus

³²Lepá segé sia ka sara mone sipuoni Getsemane. Iageti kuanangan ka matadda sipasiuluinia, Jesus, "Kuddungan kam sené boikí, kuei sedda maniddou.

³³Nánánangan si Petrus, si Jakobus sambat si Johannes alei nia. Iageti masounangan bagania Jesus, samba pureu-reunangan бага

³⁴ Lepá kuanangan ka matadda sipasiuluinia, Jesus, "Bulat makopé reu-reu bagakku, kelé ilalangóan lé aku. Oto senéan té kam boikí, tápoi, bá pulalaú-laú kam!

³⁵ Iageti areuakénangan tubunia goisó sedda, Jesus purapponangan ka polak, paniddounangan leú et. Ka paniddogatnia, itiddou ka Ukkui, bulé ké momoi baí nia, buí iorik paoreat néné

³⁶ Pelé nga-ngania, "Ale Ukkui, sangamberinia tá anai tá momoi nugalai. Oto ké momoi lé baí nia, sabauakéan lé ka tubukku pangoringan néné. Tápoi buí ka teú bagakku, Ukkui, ka teú bagam lé.

³⁷ Lepá sok-soknangan nia Jesus, ailinangan sia sipasiuluinia, ai sia memerep. Iageti kuanangan ka matat Petrus, Jesus, "Kipa, ai lé ekeu memerep, Simon? Tá momoi nuom'aké nia mumata beri sangajam?

³⁸ Lepá kuanangan ka matadda sangamberidda sipasiuluinia, Jesus, pelé nga-ngania, "Pumata kam, samba paniddou kam, bulé tá ikerek kam pasisiboat. Aipoí ka sia ketsatmui, aioobá mugalai simaerú; tápoi tá momoi nugalaiaké kam nia, kalulut galai tubut

puakkulakat sirimanua poí ka sia,
masaggoet lé.

³⁹ Iageti oleakénangan nia mitsá Jesus,
mei maniddou, sikaruania, kisedda leú
et aikua

⁴⁰ Lepá sok-soknangan nia mitsá, Jesus,
ailinangan leú et sia mitsá sipasiuluinia,
ai peilé sia memerep, kopet tuddun
matadda. Bulat táan araagai kuanenda
ka tubut Jesus

⁴¹ Kelé aisok-sok nia mitsá Jesus,
ka sikatelunia, iapeité kuanangan ka
matadda, "Ale, ai peilé kam memerep,
masiariaké tubumui? Kauan, alepáan!
Aiailingan te tetrenia itusegéaké Togat
Manusia ka kabeira sirimanua sijo

⁴² Surungan kam, ai sita memei. Itsó
peité kam nia, sipajo aku, aian nia
momoi masiailiaké sita!

⁴³ Talagat paninibo nia Jesus, lotsit-
aitulotsit ka sia si Judas, iaté sara ka
talagat sipasiuluinia sipulurua. Maigi sia
saaleinia, ai kakabeira lanjau sambat
bobóbó. Sia néné, iaté sikoiniakenenda
tai imam sabeu, tai guru paamian samba
leú et tai bajára tai Jahudi

⁴⁴ Oto ka sia si Judas, iaté sipajo nia,
aikauan sara toggaiat ka tubudda, aikua,

"Kasei kusigguk, nia té nenda nulalabá kam. Lepá abbitmuian nia. Tápoi bulat jago kam sipulelelek, buí ibela matania.

⁴⁵ Segéra lé sedda, riuriginangan Jesus si Judas, pelé nga-ngania, "Guru!" lepá ei nia isigguk Jesus

⁴⁶ Iageti labáranan nia saalei Judas, kabéakérangan leú et nia

⁴⁷ Tápoi sara ka talagadda, oppatnangan lanjaunia, tétéakénangan nia ka talingat pagugulet imam sabeu, pat belé talingania

⁴⁸ Iageti kuanangan ka matadda Jesus, "Taleú sipananaé lé aku nukukua kam; pat koí abbitmuian lanjau sambat bobóbómui, nuoi kam nulabá kam aku

⁴⁹ Senen gogoian lé koí, kupungantoman ka matamui, ka Uman Taikamanua; tá anulabá kam aku. Kirénangan tedda, buitá muaili kelé néné, bulé iaili kelé ka sitususurat ka Buko Sipunenan.

⁵⁰ Iageti tui-tuirangan leú et ka sia sipasiului Jesus, palaípaí lepá

⁵¹ Ai leú sedda sara silaingé sipasilelebuiaké komang ka tubunia, amei masitut Jesus. Kelé aragelai ralabá nia ka sia

⁵² obáakénangan lebuinia, tui-tuinangan leú et sibulutut

⁵³ Iageti taroakérangan Jesus ka lalep imam sabeu. Sedda, amarurúan sia tai imam sabeu, tai bajára tai Jahudi, sambat tai guru paamian

⁵⁴ Ka sia leú si Petrus, riu-riu lé itut sia, pat aili ka laibokat lalep imam sabeu. Uddet nia sedda, muraka ka api, sambadda sipujajago

⁵⁵ Iageti sangamberidda tai imam sabeu sambat tai Mahkama Puaranan, riu-riu lé ragaba selet tubut Jesus, bulé ibara lulunia ituukum'aké nia simateiakenen. Tápoi beri sara tá arasese simatotoilá selenia

⁵⁶ Maigi sia arasogai masipabara tiboiet, masipakau, tápoi tiboiet simuneng'akenenda néné, tá musasara

⁵⁷ Lepá puriórangan piga pá sia sipabara tiboiet, rapabara selet tubut Jesus, pelé nga-nganda

⁵⁸ "Sangamitsá akuarep kai aikua sinéné, 'Momoi kuragat'aké Uman Taikamanua sigalai kabei sirimanua néné, tápoi ka bagat telu ngagogoi, rióakékungan mitsá sibau, tápoi táan sigalai kabeira sirimanua.'

⁵⁹ Tápoi tiboiet simuneng'akenenda néné leú, tá leú et musasara

⁶⁰ Iageti puriónangan si imam sabeu ka matat rapat, kuanangan ka matat Jesus, "Kipa, tá koí nuaalegi nga-nganda sipasijojoaké ekeu?

⁶¹ Tápoi ka sia geti Jesus, tenan lé nia mumeng-meng. Beri alegina nia tiboietda. Iageti oleakénangan nia mitsá si imam sabeu masinou-nou Jesus, pelé nga-ngania, "Elé, ekeu leú Rimata Sipaarau, Togat Taikamanua Sipunenan?

⁶² Aleginangan nia Jesus kuanangan ka matania, "Oo, aku té néné. Nuiitsó te kam sangamberimui ipuuddet Togat Manusia kai kattoet Ukkui Taikamanua Sipulugege, moi ka tinobut barana ka manua!

⁶³ Iageti pabiritnangan saraubánia si imam sabeu néné, kuanangan, "Apa peilé tagagaba kam sia sipasimumuneng'aké selet tubunia. Aipoí bulat tubumuian amasiarep tiboietnia, aipaloloi Taikamanua. Oto kipa sipinaatumui ka kam?

⁶⁴ Iageti pakerénangan bagadda masikua, amaselengan Jesus, mateúan tuukum'aké nia simateiakenen

⁶⁵ Iapeité rataddaaké raluji nia, Jesus. Tabbórganan matania, pabóbokiddangan nia. Lepá kuaddangan ka matania, "Kua pei ka matamai, kasonia ipabobóbóki ekeu?" Beri ka sia tai pengawal, aratipak leú Jesus

⁶⁶ Ai nia muuuddet si Petrus ka laibokat, ei sara pagugulet imam sabeu sinanalep, masiailiaké si Petrus

⁶⁷ Kelé aiitsó si Petrus ai nia muraraka ka bet-bet api, ritúakénangan putubuat Petrus sipulelelek, lepá kuanangan ka matat Petrus, "Ekeu té néné, alei Jesus tai Natsaret, élé?

⁶⁸ Iageti pakelenangan againa Jesus, si Petrus, kuanangan ka matat pagugulet imam sabeu néné, "Tá kuagai, aponia sikuam néné." Lepána lé aikua kelé néné, bela nia ka gerat. Iageti putokkinangan leú et goú-goú

⁶⁹ Taitupepépet bagania pagugulet imam sinanalep néné, ritúakénangan nia mitsá si Petrus, kuanangan ka matadda sikukuddu sedda, "Bulatnia, nia té néné sara aleira!

⁷⁰ Tápoi aipakele lé againa Jesus si Petrus. Tá amauju, sia sikukuddu sedda leú, taddaakérangan rakua ka matat

Petrus, "Báan kakaróaké tubum, bulatnia ekeu té néné sara ka talagadda. Aipoí ekeu kekeu leú, tai Galilea leú ekeu!

⁷¹Iageti taddaakénangan ipasuppaji tubunia si Petrus, kuanangan, "Bulat beri te agaiku nia, nenda sirimanua kuanenmui!

⁷²Iageti ka tetret nenda leú et, putokkinangan goú-goú sikaruania. Iapeité airepdem nia si Petrus, sikuat Jesus ka matania, "Tá mururua ngamitsá iputokki goú-goú, anupakelengan againu aku, telu ngamitsá." Iageti pusounangan leú et si Petrus, pat pasikúnangan nia.

15¹ Mamatsep peilé, aparurúan sia tai Mahkamah Puaranan, tai imam sabeu, samba tai bajára tai Jahudi, samba leú tai guru paamian, raolaaké patibo. Kabérangan Jesus, abbitrangan nia, rasegéaké nia ka kabei Pilatus

²Iageti nou-nounangan Jesus, si Pilatus, pelé nga-ngania, "Bulatnia, rimatadda tai Jahudi ekeu néné?" Aletinangan nia Jesus, kuanangan ka matat Pilatus, "Oo, kelé sikuam.

³Iageti taddaakérangan nia tai imam sabeu masipabara selet tubut Jesus

⁴ Lepá nou-nounangan nia mitsá si Pilatus, kuanangan ka matania, "Tá koí nuaalegi sikuadda néné? Arep pei te iginia panganduatda, raseleaké ekeu!

⁵ Tápoi beri sangatakó tá aialegi mitsá nga-ngan Pilatus, Jesus, pat bara kisei ka bagania si Pilatus, ka tubut Jesus

⁶ Kelé simarei-rei igalaiaké si Pilatus, senen iaili Punen Paska, buitá ibelaaké sara siukum; tápoi siberikabaga lé masiteteúaké, kasei siobára tubebelaaké

⁷ Ka bagat penjara, ai sara ka talagat siukum, kalulut obára masimateiaké sirimanua, ké bara pulamagat, iaté sipuoni si Barabas

⁸ Iageti parurúran sangamberi sirimanua simigi, masitiddou kai Pilatus, bulé ibelaaké ka sia sara siukum, kelé simatukle tugalaiaké

⁹ Nou-nounangan sia si Pilatus, pelé nga-ngania ikua ka matadda, "Kipa, nuobá leú kam, kubelaaké ka kam, rimatadda tai Jahudi?

¹⁰ Aipoí, aian iaagai si Pilatus, kalulut tutut bagadda ka tubut Jesus lé, aranganduaké nia ka tubunia

¹¹ Tápoi ka sia tai imam sabeu, riu-riu lé rapatubbuji bagadda sirimanua simigi,

bulé ratiddou kai Pilatus, ibelaaké ka sia si Barabas

¹²Iageti oleakénangan nia mitsá si Pilatus masikua ka matadda sirimanua simigi, pelé nga-ngania, "Oto ké kisedda baí nia, kipangan lé kugagalai ka tubunia ka sia kuanenmui, rimatadda tai Jahudi néné?

¹³Iageti pugereirangan leú et sirimanua simigi, pelé nga-nganda, "Pattáaké lé nia, ka loiná siliktenga!

¹⁴Tápoi kuanangan mitsá ka matadda si Pilatus, "Aponia poi jonia?" Iageti pugereirangan simakopé, pelé nganganda, "Pattáaké lé nia ka loiná siliktenga!

¹⁵Oto bulé imaangká bagadda sirimanua simigi, belaakénangan si Barabas, si Pilatus. Iageti koiniakénangan sia rapabóbóki Jesus, lepá segéakénangan Jesus, bulé rapattáaké nia ka loiná siliktenga

¹⁶Iageti abbitrangan Jesus, tai perajurit, ka pengadilan, ka istanat Gubernur. Kuaddangan, bulé rarurú tubudda sangamberidda tai pasukan

¹⁷Kaurangan leú saraubá, simasuan laiket ka tubut Jesus. Tikairangan

kiritnia, sibara ka paran-ran loiná sibara rui; lepá lai-laiakérangan nia ka utet Jesus

¹⁸ Lepá galairangan paroroat ka tubut Jesus, pelé nganganda ka tubunia, "Kutabé kai ekeu Tuan, Rimatadda tai Jahudi!

¹⁹ Iageti lisoddangan uténia tuturá, lujiddangan leú nia, lepá purappoddangan ka matania

²⁰ Oto lepá arapaloloi nia, golokrangan saraubá simasuan laiket ka tubunia, kaurangan mitsá bulat tubut leppeinia. Iageti abbitrangan nia ka gerat, raei rapattáaké nia ka loiná siliktenga

²¹ Iageti talagat pueenungra, sogoirangan sara situsasabau sedda, kaurangan nia masibairat loiná siliktengan Jesus. (Iaté si Simon tai Kirene, ukkuira tai Aleksander sambat tai Rufus.) Apasese amoi nia barania ka laggaira, masitaget'aké laggai sabeu

²² Iageti abbitrangan Jesus, ka sara kudduat sipuoni, Golgota, katukolobatnia "Kudduat Lakkupat"

²³ Kaurangan lónia anggur pagalú mur, iaté muno simasingin. Tápoi kelé ainanam nia, taiobánangan iló nia

²⁴ Iageti pattáakérangan nia ka loiná siliktenga. Lepá mitsá parubeirangan bibiletnia. Tápoi sipauktuk'akenen lé aragalai, bulé raagai ikep'akenenda sene senenda

²⁵ Arapattáaké nia ka loiná siliktenga, iaté ka bóbó siba simatsep

²⁶ Ka loiná siliktengania, iaté ka uddut utet Jesus ai araottot'aké sara surat, masikolouaké paluluatnia, aituukum'aké Jesus, iaté: "Rimatadda tai Jahudi"

²⁷ Sedda, ai leú sia rua sabagei arapattáaké ka loiná siliktenga, iaté sipasirarau-rau bibiletda sirimanua. Arakuddu ka sia, iaté sara kai kattoet samba sara kai katsiunia

²⁸ [Bulé ipuaili kelé ka sitususurat ka Buko Sipunenan, sipasikukua kisé: "Arapakeréaké lé nia, kelé sara sirimanua sikataí paraboat."

²⁹ Sia situsasabau sedda, kelé araitsó Jesus, pagilikrangan utéra, rapaloloi Jesus. Belan nga-nganda lé, "Ale, ekeu siobá masiragat Uman Taikamanua, samba sipasiririóaké nia mitsá ka bagat telu ngagogoi

³⁰ betungan peité tubum, bulé ioi
nutugorosot ka loiná siliktenga,
nubelaaké tubum!

³¹ Kisedda leú ka sia tai imam sabeu,
samba tai guru paamian, arapaloloi
leú Jesus, ka sia. Patiboddangan leú
pasasambadda masikua, "Bulat kipa pá,
sabagei momoi irorop'aké, tápoi tubunia
geti ka sia, tá momoi irorop'aké

³² Ké rimatadda tai Israel baí nia,
oniakenen, Rimata Sipaarau, kauan
peité igorosot'aké tubunia kineneiget
ka loiná siliktenga, kuitsó kai nia, ibara
tonem bagamai ka tubunia!" Oto beri leú
ka sia sipattáakenen ka bet-bet Jesus,
arapaloloi leú et nia

³³ Iageti tuggé sulu, magep-gepnangan
sangaliot laggai, telu ngajam burúnia

³⁴ Oto kasoibokat, pugereinangan Jesus,
kuanangan, "Eloi, Eloi, lama sabaktani?"
katukolobatnia, "Taikamanuangku,
Taikamanuangku, angoi nukakaddiuaké
aku?

³⁵ Ai sia piga pá sikukuddu sedda,
kelé araarep katsit Jesus, kuaddangan,
"Arep'aké peité kam, ai nia musosoga,
isogai si Elia!

³⁶Tápoi sara geti ka talagadda, kelé aiarep nia, olaakénangan mei masialá romot, sop'akénangan nia ka suat anggur simalagá, iageti ettet'akénangan nia ka ngungun tuturá loiná, totoiakénangan nia ka ngungun Jesus. Aikakau, aikukua, "Edda tangena nia boikí, baleú moi si Elia, masigorosot'aké nia ka loiná siliktenga.

³⁷Lepá pugereinangan Jesus; iageti tatá-aitatá engania

³⁸Mabiritnangan leú komang kekre ka Uman Taikamanua, silá oi rua, barana ka pata, pat aili ka repé

³⁹Tápoi ka sia geti si Kapten tentera sipuririó ka matat siliktengan Jesus, aiiigbuk, kipa igagalai itatá engan Jesus. Iageti pusiblangan si Kapten tentera néné, pelé nga-ngania, "Bulat aisesengan, Togat Taikamanua lé nia sinéné!

⁴⁰Sedda, ai leú sia piga pá tainanalep sipasiiigbuk sangamberinia sibabara néné, ka sareunan. Ka talagadda tainanalep néné, ai si Salome, si Maria Magdalena, si Maria inan Jakobus sibautubu, sambat si Joses

⁴¹ Tainanalep néné te amasitut Jesus, samba amasirop'aké nia, ka tetret ai nia mukukuddu ka Galilea. Samba maigi leú sia sedda tainanalep bagei, sieei masipaaleiaké Jesus ka Jerusalem

⁴² Kelé aimasoibó, oinangan leú et si Josep sibara ka Arimatea, iaté sara siabeu tiboï tubu ka laddou Mahkama Puaranan. Nia ka sia néné, mariu-riu lé ingenaaké tubunia, iaili tetrenia Purimataat Taikamanua. Gogoi nenda, iaté gogoi Panarengan (kei iaili gogoi Sabbath). Iaté lulunia aigegeaké bagania si Josep mei ka tubut Pilatus, masitiddou tubut Jesus, simamatei

⁴³ (15:42)

⁴⁴ Kelé aiarep nia si Pilatus kamamatei Jesus, bara kisei ka bagania. Iageti koiniakénangan sia, rasogai utéra tai tentera, iiséaké ka tubunia, baleú amaujungan ailangó Jesus

⁴⁵ Lepána lé aiarep pangasegekat Kapten tentera néné, si Pilatus, iapeité obáakénangan ialá tubut Jesus simamatei néné si Josep

⁴⁶ Iageti sakinangan komang simabulau simaalit бага Josep. Oto lepá aigorosot'aké tubut Jesus simamatei, si

Josep tabut'akénangan komang néné ka tubut Jesus. Lepá rateiakénangan tubut Jesus simamatei néné, ka bagat ratei leleu bukkú sikailú. Iageti guilúnangan sara bukkú sabeu, ikau nia takket ratei

⁴⁷Tápoi ka sia si Maria Magdalena sambat si Maria inan Joses, airalelelek'aké, kaipa katugalangan tubut Jesus.

16 ¹Kelé aitukaplu gogoi Sabbath, eirangan leú et sainan Jakobus sambadda tai Salome masisaki sene ngamata pasingi-singin, kaunenda masitulaji tubut Jesus simamatei

²Oto ka gogoi Menggui, maseggei peilé, ameian sia ka ratei

³Ai sia mueenung, airapatitiboji, rakua, "Kasei pá tasosogai rarop'aké sita, masiguilú bukkú takket ratei?" Aipoí bulat abeu bukkú arakau. Tápoi kelé arasegé sedda, itsórganan bukkú, atuguilúan

⁴(16:3)

⁵Iageti buluk sia ka bagat ratei. Segéra lé ka bagat ratei, itsórganan sara silainge sipusasaraubá simabulau, ai nia muuuddet saigit kai kattoet ratei, tugégérganan leú et

⁶ Oto kuanangan silainge néné ka matadda, "Bá malolotó kam! Ai lé kuaagai gagabamui Jesus tai Natsaret, sipattáakenen ka loiná siliktenga. Tá anai nia sené. Aisuruakéan nia Taikamanua! Itsó lé kam kudduat katugalangan nia

⁷ Kenan lé kam kineneiget, nusegéaké kam sibabara néné ka sipasiuluinia, sambat kai Petrus. Segéaké ka matadda, 'Nia lé memei boikí ka kam ka Galilea. Seddangan lé geti itsómuian nia, kelé sitonéakenennia ka matamui.'

⁸ Iageti pabalaurangan, raolaaké rabela ka bagat ratei, kalulut gégé sambat kopet lotóra. Pat kalulut lotóra, beri tiboira nia ka sabagei, sibabara néné

⁹ [Iageti eirangan leú tainanalep ka tubut Petrus sambat saaleinia, masitiboi sangamberi sisegéakenen silainge ka matadda.

¹⁰ [Lepá nenda, einangan leú Jesus masisegéaké Katuareman Simaerú, Sipunenan samba sitaitatatá, barana ka kabelaiat sulu, pat aili ka kabelekat sulu. Kaei nia néné, táan tubunia amei, tápoi sipasiuluiniangan lé aikau punu tubunia.

¹¹ [Tápoi kenanen araarep'an katususurut Jesus, samba iitsóna nia

si Maria, tá leú matotonem bagadda katususurunia.

¹² [Lepá patoilánangan mitsá tubunia Jesus, ka tubudda rua sipasiuluinia. Tápoi aisiliy lé tubunia, ka matadda pat taiagairangan nia. Aibara néné, iaté ka tetret ai sia ruadda sipasiuluinia mueenung raailiaké sara laggai.

¹³ [Lepá toili sia masisegéaké sibabara siitsóra néné, ka matadda sabagei. Tápoi tá amatonem bagadda ka sikuadda néné.

¹⁴ [Kalepakatnia patoilánangan mitsá tubunia Jesus, ka tubudda sipasiuluinia, ka tetret ai sia mukokom. Paanujinangan sia Jesus, kalulut gulai tonem bagadda, samba kalulut kelat paatuatda; aipoí, pat taikatonemindangan simuneng'akenenda sirimanua, sipasiiitsó katususuru nia ka simamatei.

¹⁵ [Iageti kuanangan ka matadda sipasiuluinia, Jesus, "Kenan kam ka sangaliot polak, nusegéaké kam Katuareman Simaerú sibara ka Taikamanua, ka tubudda sangamberi sirimanua ka polak néné.

¹⁶ [Kasei simatonem бага samba situraraú, nia té masisisiló puaragat

sibara ka Taikamanua. Tápoi sitaimatonem бага geti, sia té isisiló ukuman Taikamanua.

¹⁷ [Néné lé toggaiatnia ka tubudda simatonem бага ka tubukku, iaté, momoi rausiaké ketsat sikataí, ka oningku; samba momoi ratiboaké panganga-nganga taiaagaietda.

¹⁸ [Ké ralabá ulou, elé raló tuba, tá mamatei sia. Iageti ké rarapeaké kabeira ka tubudda simabesí, malenangan leú et besíra."

¹⁹ [Lepána lé aipanibo Tuhan Jesus ka matadda sipasiuluinia, tuakkatnangan ka manua. Kuddu nia sedda, murimata ka bet-bet Ukkui Taikamanua.

²⁰ [Iageti eirangan leú sipasiuluinia, masisegéaké Katuareman Simaerú sibara ka Taikamanua, ka senen laggai. Oto si Tuhan leú ka sia, ai leú nia mugagalai masipaalei sia. Samba si Tuhan leú masibabaraaké kerek, masipatoilá ka sirimanua, simuneng'akenenda sipasiului néné, bulat sibulatnia.]

Lukas

1 ¹ Ale Teopilus simatopit, amaingingan sia sibesíaké masisurat'aké nia sipulelelek pagalaiat sipuuaaili ka talagatta

² Arasurat'aké ka sia iaté siripot siarepta siniboira ka matatta, sia sipasiitsó siburú, sipuaaili siboikí, lepá pakakraddangan katuaremannia

³ Oto kelé akulelek'aké nia sangamberinia bulat sipulelelek, barania ka pananddaatnia, paatukkungan nia ai erúnia kugalai sara pangasegekat ka kam sipulelelek

⁴ Paluluatnia geti akugalai nia kelé néné, bulé imakolou ka kam, sangamberinia singantruakenenda nenda ka tubumui, bulat sibulatnia

⁵ Ka tetret ai nia muririmata si Herodes ka Judea, ai sara imam sipuoni si Sakarias. Nia néné, iaté sara ka rubeiatda tai imam Abia. Sinanalepnia sipuoni si Elisabet. Beri nia leú et ka sia rubaiatda tai imam leú et

⁶ Bulat iobá bagat Taikamanua, masiitsó topitda sangalalepra. Maukú sia ka arat, samba masappru purereddetda ka sangamberi surukat Taikamanua

⁷ Amabajáan sia ruadda, tápoi tápei anai tuppai tubudda, sipututukkú tubu lé poí nia ka sia si Elisabet néné

⁸ Oto ka sara tetre, iaté ka tetret aiaili rubeiatda ka sia tai Abia, galainangan galajet imam, si Sakarias ka matat Taikamanua

⁹ Kelé aragalai pauktungan, kelé simarei-rei ragalaiaké tai imam, saú-saúrangan si Sakarias tugurú ka Uman Taikamanua masilabó kamenyan

¹⁰ Oto aitueenung'ake galajet masilabó kamenyan, ai sia mani-niddou ka sia sirimanua simigi ka gerat

¹¹ Iageti ka tetret nenda, patoilánangan tubunia malaikat Tuhan ka tubut Sakarias. Aipurió malaika, iaté kai kattoet mejat pasilabokat kamenyan

¹² Kelé aiitsó nia si Sakarias, malaika néné, paingonangan nia. Oto bara lotónia

¹³ Tápoi kuana lé ka matania malaika, "Bá malolotó Sakarias! Paniddogatnu aiarepingan Taikamanua. Oto itutútúaké

te matat sara toga simanteu, sinanalepnu si Elisabet. Oto buítá nukau oninia si Johannes

¹⁴ Muaangká te ekeu бага simakopé, samba maigi leú te sia sabagei sipuaangká бага ké amutútúan baí matania ka sia toga

¹⁵ Abeu te tiboí tubunia ka matat Tuhan. Tá iloló anggur samba ló simapuinengen. Masun lé ka tubunia Ketsat Sipunenan, barania ka gí-gí peilé

¹⁶ Maigi te sia bangsa Israel ipalululu, bulé ratoili mitsá ka tubut Taikamanua, iaté Tuhanda

¹⁷ Ibabailiu te nia pakoiniet Tuhan simaron samba simagege, kelé si Elia. Ipaababan te sia saukkui ka tubudda tatogadda, samba sia simakelá paatuat leú ipamá-maki bagadda, bulé rasese pupaatuanan simaerú, kelé sara enungan, masipatarek sara paamian simatarek tubu kai Tuhan.

¹⁸ Iageti kuanangan nia ka matat malaika si Sakarias, "Apa katuaggaiatnia, bulé kuagai puaailinia néné? Aipoí amabajaán aku. Beri sinanalepku leú et ka sia, amabajáan nia.

¹⁹ Oto kuanangan ka matat Sakarias, malaika, "Si Gabariel te aku néné. Pagugulet Taikamanua. Nia lé amasikoiniaké aku masipangasegé katuareman simaerú néné ka matam

²⁰ Sangamberinia sikuakku néné ka matam, muaaili, ké aiailingan tetrenia. Kalulut tá poí matonem bagam ka tubukku, oto táan te momoi nupaninibo. Sarat puoóú-oúan lé te ekeu néné teret puailinia sikuakku néné ka matam.

²¹ Oto ka sia sirimanua simigi riu-riu lé rangena ibela si Sakarias. Bulat kisei lé ka bagadda burúnia ibela ka Uman Taikamanua

²² Tápoi kelé aibela si Sakarias, táan momoi ipanibo ka tubudda. Kabeinangan lé ikakau kelé pakirekat, amariu-riuan aimaoú-oú. Oto agairangan ai siitsot matania ka Uman Taikamanua

²³ Kelé aitulettu galajetnia si Sakarias ka Uman Taikamanua, toili nia ka lalep

²⁴ Oto tá amauju pusuruketnangan sinanalepnia si Elisabet. Iageti kuddu nia ka bagat lalep si Elisabet, ipakele tubunia lima ngalaggó burúnia

²⁵ Lepá kuanangan nia si Elisabet,
"Oto kalepakatnia rop'akénangan aku si
Tuhan, masitatóaké paloloiat ka tubukku.

²⁶ Enem ngalaggóan burúnia
aipusuruket si Elisabet, koiniakénangan
malaika Gabariel Taikamanua ka
Natsaret, iaté sara laggai sabeu ka
Galilea

²⁷ masiailiaké sara siokkó sipuoni
si Maria. Siokkó néné, aian nia
mututunangan ka tubut Josep,
punuteteu Dapid

²⁸ Iageti taget'akénangan nia malaika,
si Maria, kuanangan ka matania, "Salam,
ekeu sipanukanin Tuhan! Bulé ipaalei
ekeu si Tuhan!

²⁹ Kelé aiarep nia si Maria, nga-ngan
paroroiat malaika, tugégénangan leú
et. Oto patup-tupnangan ka bagat
paatuatnia, masikua, apa páonia
katukolobat nga-nga paroroiat néné

³⁰ Tápoi kuanangan ka matat Maria,
malaika, "Bá malolotó Maria, aipoí
aiakéan ka tubum Taikamanua
panguruat katet baga

³¹ Babara te suruketnu. Iageti tú-
túakénungan matat sara toga simanteu.
Oto buí tá nukau oninia Jesus

³² Maaabeu te tiboí tubunia, samba tuooniaké te nia Togat Taikamanua Sipulubeunan. Ibabailiuaké te nia Taikamanua, rimata, kelé taikebbukatnia Rimata Dapid

³³ Iageti purimatanangan ka tubudda sapunuteteu Jakob, teret buru-burú. Tá tatakkí lé purimataatnia, burú.

³⁴ Oto kuanangan nia si Maria ka matat malaika, "Tápoi aku néné, siokkó peilé aku, kipa iooi ibara kelé néné ka tubukku?

³⁵ Iageti kuanangan ka matat Maria, malaika, "Ai leú isop-sop ka tubum Ketsat Sipunenan. Kuneminangan ekeu geget Taikamanua. Iaté lulunia ituooniaké toga tú-túakenennu néné, Sipunenan, Togat Taikamanua

³⁶ Itsó peité ka sia eiram si Elisabet, aian enem ngalaggó burúnia, aibara suruketnia, kenanen amabajáan nia, pat oniakéरण nia sirimanua sipututukkú tubu

³⁷ Aipoí ka sia Taikamanua, sangamberinia lé momoi ibabaraaké.

³⁸ Oto kuanangan si Maria ka matat malaika, "Aku kaku néné, pagugulet Taikamanua lé; kauan lé ipuaili

sangamberinia sikuam néné ka
tubukku." Iageti tuinangan leú et ka sia
Malaika, ikaddiuaké si Maria

³⁹Tá amauju, ei nia si Maria ka sara
laggai ka Judea, iaté ka laggai simaleleu

⁴⁰Einangan leú et itaget'aké lalep
Sakarias. Oto kelé aitugurú ka bagat
lalep, kaunangan paroroiat si Maria ka
tubut Elisabet

⁴¹Bulat arepna lé nia si Elisabet
paroroiat Maria, pageluknangan tubunia
sikolik ka suruket Elisabet. Iageti
kuneminangan nia Ketsat Sipunenan, si
Elisabet

⁴²Oto kuanangan ka matat Maria
si Elisabet, "Bulat ekeu lé oniakenen
simakopé uktuk ka talagadda sangamberi
tainanalep! Samba tupanunukani leú te
nia ka sia toga tú-túakenennu

⁴³Kasei poi aku néné, pat koí oi inan
Tuhanku masibalou aku

⁴⁴Aipoí arepku lé paroroiatnu ka
tubukku, pageluknangan tubunia ka sia
toga ka suruketku, kopet angkat bagania

⁴⁵Oto mauktuk te ekeu kalulut
anukatonemi puaailinia sangamberi
sikuat Tuhan ka tubum!

⁴⁶ Iageti kuanangan ka sia si Maria,
"Paatuatku masiumun'aké si Tuhan

⁴⁷ ketsatku mugora бага kalulut
Taikamanua Sipaarau aku

⁴⁸ Airepdem poí aku, paguguletnia
sigoisó tiboí tubu! Pat barania kineneiget
arakuangan aku sangamberi bangsa
simaerú uktuk

⁴⁹ Taikamanua Sipulugege lé
amasigalaiaké galajet sabeu néné
ka tubukku! Sipunenan lé oninia

⁵⁰ Pat paninínangan tubunia ipukateki
sia бага si Tuhan sangamberi sikalotóaké
nia

⁵¹ Ka geget kabeinia simaron ipasabu
sia simabuak paatuat samba ipakataí
isiat paatuatda

⁵² Tai rimata ipaari ka uddenan
purimataatda tápoi sigoisó tiboí tubu
ibuak'aké

⁵³ Isegéaké lé ektekra simalaje, sibara
ka sangamberi anggai bagania, tápoi
ikekle lé sia simakayo, pat tui sia sitá
abbinen

⁵⁴ Irop'aké paguguletnia bangsa Israel,
siripot pakerekat бага sigalainia ka
taikebbukatta

⁵⁵ Tá ikakalipogi pakerekat baga sigalainia si Tuhan, maaggai bagania ka tubut Abraham samba ka tubudda sapunuteteunia, teret buru-burú.

⁵⁶ Oto malegre telu ngalaggó burúnia, aikuddu si Maria ka lalepra tai Elisabet, ia peí toili nia mitsá ka lalepra

⁵⁷ Iageti kelé aiali laggónia si Elisabet, tú-túakénangan matat sara toga simanteu

⁵⁸ Oto bulat maangká bagadda ka sia pabébéakenennia lalep samba leú et saeppu, araarep erut bagat Tuhan ka tubut Elisabet

⁵⁹ Balu ngagogoian burúnia aiputútú matania sikolik, oi sia rasunat nia. Gelairangan rakau oninia si Sakarias, siripot onin ukkuinia

⁶⁰ Tápoi aikua lé inania, "Tá! Si Johannes lé tukakau oninia.

⁶¹ Iageti kuaddangan nia ka sia ka matat Elisabet, "Tápoi tá anai beri sia sara saeppum, sipuooni kelé néné.

⁶² Oto pakirérangan kabeira ka tubut Sakarias, masinou-nou ka tubunia, kasei ka sia ikakau onin toganía

⁶³ Iageti tiddounangan leí, si Sakarias surat'akénangan, "Si Johannes lé oninia." Oto bulat kisei lé ka bagadda

⁶⁴ Samba niangan leú et nia, oi aipanibo mitsá si Sakarias samba aipasiumun Taikamanua

⁶⁵ Oto malotóranan leú et sangamberi pabébéakenennia lalep. Iageti mara-ratnangan leú et katuareman sibabara néné, pat salú laggaira tai Judea, ka simaleleu

⁶⁶ Bailiu sangamberidda sipasiaarep sibabara néné, masikua ka paatuatna, "Aponia pá ibabailiu nia toga néné?" Ai lé poí ipaaalei nia si Tuhan

⁶⁷ Iageti masutnangan ka tubut Sakarias, ukkui toga néné Ketsat Sipunenan. Taddaakénangan masisegéaké patonekat Taikamanua, pelé nga-ngania

⁶⁸ "Taumun'aké kam si Tuhan, Taikamanuanda bangsa Israel! Amoian poí nia masirop'aké sikaumania samba masibelaaké sia ka paoreat

⁶⁹ Aiakéan ka sita sipaarau simakopé gege punuteteu Dapid, paguguletnia

⁷⁰ Aiakéan palelengannia si Tuhan, ka sisegéakenenda tai nabi sipiliynia siburú

⁷¹ Masibelaaké sita ka kabeira saggakta
samba ka kabeira simalagá бага ka
tubutta

⁷² Bulé ipatoilá anggai bagania ka
tubudda taikebbukatta, taipajajaknangan
iaké sitonéakenennia sipunenan

⁷³ Amusuppangan nia ka tubut ukkuita
si Abraham, samba aigalaian pakerekat
baga masibelaaké sita ka kabeira
saggakta, bulé tá ka bagat pulolotó
tapaniddogi kam ni

⁷⁴ (1:7)

⁷⁵ bulé sarat ka tubunia lé,
tapagugugulet'aké kam tubutta
samba masigalai siobat bagania ka
sanganantat purimanuaiatta

⁷⁶ Ekeu leú et Togakku, tuooniaké te
ekeu nabit Taikamanua Sipulubeunan.
Aikoiniaké ekeu muboikí ka tubut Tuhan
masipapa enungannia

⁷⁷ masisegéaké ka tubudda
sapaamiannia paarauna sia, ké
aiappeán jodda Taikamanua

⁷⁸ Simaanggai бага samba simakaté
baga lé nia Tuhanta; pat oi nia
masiparau sita. Kelé sulu ibela simatsep

⁷⁹ kisedda leú te ikau patónia ka
sangamberi sirimanua sikukuddu

ka tei ailiggou pugepgeman sambat pulolotó. Ipalulu sita ka enungan sieei ka paabanan.

⁸⁰Oto ka sia togat Sakarias néné, muurau tubunia, muurau leú et ron ketsatnia. Ka simatangeu lé ikukuddu, teret ailina tetrenia ipatoilá tubunia ka tubudda bangsa Israel.

2¹Ka tetret nenda, kaunangan parenta si Kaisar Agustus, bulé sangamberidda tatogat Purimataat Roma mei masisurat'aké oni, bulé ituadde nuntutda

²Pasiaddeat nuntut sirimanua siboikí néné, aitugalaiaké iaté ka tetret ai nia mugugubernur si Kirenus ka Siria

³Iageti ka tetret nenda eirangan leú et sangamberi rasurat'aké oninda ka senen laggaira

⁴Oto ka sia si Josep, amei leú et nia ka sia barania ka Natsaret iaté ka propinsi Galilea, iailiaké laggai Betlehem ka propinsi Judea, iaté ka laggai putútukat matat Rimata Dapid; punuteteu Dapid leú poí nia ka sia si Josep néné

⁵Iageti surat'akénangan oninia si Josep sambat tunangannia si Maria sibara suruket

⁶Oto ai sia ka Betlehem, aili-aiali
laggónia si Maria

⁷Tú-túakénangan matat sara toga
simanteu, iaté tokania sikebbukat.
Iageti tabutnangan nia komang,
perep'akénangan nia ka pukoman
tarimeu, sibara singitinan gandum, tá
poí mememet sia ka lalep pugogoiat

⁸Oto soibónia nenda leú, ai sia ka
sia sedda ka sú-sú simaturu-turu,
sipasijajago tarimeu, rajago biri-biridda

⁹Iageti sinulut patoilánangan tubunia
malaikat Tuhan ka tubudda; oto
toronangan sia pulatsanan Tuhan,
malotórangan leú et simakopé

¹⁰Tápoi kuanangan ka matadda
malaika, "Bá malolotó kam! Aipoí
kaooiku néné ka kam, masisegéaké
katuareman simaerú lé, iaté siangkáaké
bagadda simakopé, sangamberi
taikapolak

¹¹Amutútúan poí kineneiget, matat
Sipaarau kam, iaté Kristus si Tuhan, ka
laggai Dapid

¹²Néné te patuaggaiatnia ka kam:
Nusesese te kam sara sikolik sinabut
komang, sipeperep ka pukoman tarimeu.

¹³ Iageti tulut mitsá lotsit-aratulotsit samalaika sabagei simigi, masipaaleiaké samalaika néné, masiumun Taikamanua. Pelé nga-nganda

¹⁴ "Tuumun'aké lé Taikamanua ka manua ka pata! samba ka polak, paabanan ka tubudda sirimanua kilibet bagania!

¹⁵ Oto kurukra samalaika ratoili ka manua, patiboddangan pasasambadda sipasijajago tarimeu, pelé nga-nganda, "Sita kam ka Betlehem, taitso kam sibabara, sipoiliat Tuhan ka matatta.

¹⁶ Iageti olaakérangan nia raei, ailiddangan si Maria sambat si Josep, samba leú et sikolik, sipeperrep ka pukoman tarimeu

¹⁷ Kelé araitsó nia sikolik néné, pungu-nguan'akérangan sangamberinia sikuat malaika ka tubudda, pagalaiat tubut sikolik néné

¹⁸ Oto kisei lé ka bagadda sangamberidda sipasiaarep tiboiet sisegéakenenda sipasijajago tarimeu néné

¹⁹ Tápoi ka sia geti si Maria, aisiddoni samba aipatup-tup lé ka bagania sangamberinia néné

²⁰ Lepá sok-sokran nia mitsá sipasijajago tarimeu ka sú-sú simaturu-turu, ai sia masiumun Taikamanua, kalulut sangamberinia siarepra samba siitsóra, bulat tá aijulut kelé ka sikuat malaika ka matadda

²¹ Kelé aiaili balu ngagogoi burúnia sikolik néné, sunatrangan nia. Kaurangan oninia Jesus, siripot sipinatonet malaika ka matadda, einangan tá isusuruket'aké nia inania

²² Kelé aiaili tetrenia ka tai Josep sambat ka tai Maria raenung'aké siripot arat, pasimagirat siripot ka surukat Mose, abbitrangan sikolik ka Jerusalem rasegéaké nia ka tubut Tuhan

²³ Aipoí ka surukat Taikamanua, ai atusurat'aké kisé, "Sangamberi tatoga simanteu sikebbukat, buítá tusegéaké sia kai Tuhan.

²⁴ Ai leú rapaatu masibuluaké buluakenen, iaté rua ngamuneng umá limendeu, elé rua ngamuneng marpati simanosa, kelé siripot ka sikuat Surukat Taikamanua

²⁵ Ka tetret nenda, ai ka Jerusalem sipuoni si Simeon. Simatopit samba simasurú ka arat lé nia. Ai lé

ingengenaaké tubunia iaili tetrenia
ipaarau sia bangsa Israel, Taikamanua.
Ai lé ipaaalei nia Ketsat Sipunenan

²⁶ Oto aikuangan ka matania Ketsat
Sipunenan tailalangóna nia, teret itsóna
boikí, matat Sipaarau, sitonéakenen
Taikamanua

²⁷ Iageti tubbuinangan bagat Simeon
Ketsat Sipunenan, bulé itugurú ka Uman
Taikamanua. Ka tetret nenda aiipó
pasiabbinanda Jesus tai Josep samba tai
Maria, ka tetret ai peilé nia magogoisó,
bulé ragalaiaké ka tubunia punen kelé ka
sikuat surukat

²⁸ Iageti alánangan sikolik si
Simeon, kup-kupnangan nia, iageti
taddaakénangan masiumun Taikamanua,
pelé nga-ngania

²⁹ "Bulatnia Tuhan, kineneiget
amuailingan palelengannu ka tubukku.
Oto obáakéan lé ilangó paguguletnu
néné, ka aban бага

³⁰ Aipoí bulat matakungan amasiitsó
Sipaarau sibara kekeu

³¹ Anupatarek'an sipaarau néné sibailiu
puuktunganda sangamberi bangsa

³² kelé pató masitoroji enunganda
sabangsa bagei, siooi ka tubum;

iaté pató sibaraaké pulatsananda
sapaamiannu tai Israel.

³³ Bulat kisei lé ka bagadda saukkui
sambat sainan kolik, raarep ipusibla
si Simeon, inunuaké pagalaiat tubut
togadda

³⁴ Iageti sukat'akénangan sia. Lepá
kuanangan ka matat Maria, inan toga, si
Simeon, "Aipiliyan nia Taikamanua sikolik
néné, masisubuaké élé masiarauaké
simigi ka bangsa Israel. Bailiu nia sara
patuaggaiat sibara ka Taikamanua,
saggangietda sirimanua simigi

³⁵ Tápoi seddangan té imatotoilá, bagat
pupaatuananda. Itetegli te paatuatnu
pureuregat бага, kelé palittei simalauru.

³⁶ Sedda leú, ai sara nabi sinanalep
simakopé bajá. Iaté sipuoni si Hanna,
togat Panuel, sibara ka muntogat Aser.
Pitu ngarura lé burúnia aipulalep

³⁷ pulumangnangan leú et. Oto
kineneiget aian balu ngapulu epat
ngarurangan nia. Bulat beri pei
kaddiuakéna Uman Taikamanua. Sinágó
sambat sinoibó sarat masipuukú galajet
Taikamanua. Maniddou sambat mupuaso
lé igagalai

³⁸ Apaipó gogoi nenda leú et, amoi nia ka sia ka Uman Taikamanua. Oto pasiumunnangan Taikamanua, itiboi pagalaiat tubut kolik ka tubudda sipasingengenaaké tubudda, ioi Taikamanua masiujaaké Jerusalem

³⁹ Kelé aralettuaké sangamberinia siripot Surukat Tuhan, tai Josep sambat tai Maria, toili sia ka Natsaret, iaté ka propinsi Galilea

⁴⁰ Oto ka sia toga aian nia maabeu samba tubunia maron. Masiku paatuatnia. Bulat makiliu bagat Taikamanua ka tubunia

⁴¹ Senen rura lé, raei saepput Jesus Mupunen Paska ka Jerusalem

⁴² Oto kelé aiaili pulu rua ngarura beunannia Jesus, ei sia ka punen, kelé simatukle ragalaiaké

⁴³ Laibina lé arapupunen, toili sia. Tápoi ka sia geti Jesus, togadda, ai peilé nia mukukuddu ka Jerusalem, taiaagaietda saukkui, élé sainania

⁴⁴ Ka bagadda te, aitut'an sirimanua simigi, Jesus. Kelé aiaili sangagogoi burúnia arapuenung, iapeité agairangan taibabara nia. Oto ei sia masipaisé ka tubudda saeppu samba saaleira

⁴⁵Tápoi tá arasese nia. Kalulut néné, toili sia mitsá ka Jerusalem, ragaba nia sedda

⁴⁶Telu ngagogoi burúnia arapasigaba, iapeité seseddangan nia, ai nia mukukuddu ka Uman Taikamanua. Ai nia masiaarep'aké tiboietda tai guru paamian, samba ka sia leú et aipaiiseki sia

⁴⁷Oto bulat kisei lé ka bagadda ka tubunia sangamberidda, kalulut sikut paatuatnia masialegi

⁴⁸Beri ka sia saeppunia leú et, makisei ka bagadda, raitsó nia. Iageti kuanangan inania ka tubunia, "Ale sirou, nugagalaiaiké kodda kelé néné, ka tubumai? Bulat reu-reu lé te bagamai ukkuinu, sambat aku sipuoni inam, kugaba kai ekeu!

⁴⁹Tápoi kuana lé nia ka sia Jesus, ka matadda saeppunia, "Nugagaba kodda kam aku ukkui, ina? Tápei poi nuagai kam, aku kaku néné, buítá mei aku mukuddu ka uman Ukkuiku?

⁵⁰Tápoi tá isasak-sak ka bagadda, sikuat Jesus ka matadda

⁵¹Iageti toili nia Jesus, itut sia ka Natsaret, samba riu-riu lé ireddet

nga-nganda. Tápoi ka sia inania geti, isiddoni lé sangamberinia néné, ka bagat paatuatnia

⁵²Iageti ka sia Jesus, memei muurau tubunia, memei leú et itutuppai sikut paatuatnia. Makiliu bagat Taikamanua ka tubunia, samba raobá nia sirimanua.

3¹Ka rura sikapululimania ipurimata si Kaisar Tiberius, gubernur ka propinsi Judea, iaté si Pontius Pilatus. Kai Herodes ipuririmata iaté ka propinsi Galilea. Sarainania si Pilipus ipuririmata ka wilayah Iturea sambat ka Trakonitis, tápoi kai Lisantias geti ipuririmata iaté ka Abilene

²Imam sabeu ka tetret nenda iaté si Hannas sambat si Kayapas. Oto ka tetret nenda te, aikua kuanennia Taikamanua ka tubut Johannes, togat Sakarias, ka simatangeu

³Iageti gejenginnan nia si Johannes, sangaliot laggai ka bet-bet Oinan Jordan, masisegéaké katuareman simaerú sibara ka Taikamanua. Pelé nga-ngan Johannes, "Bauaké kam paatuatmui, samba buítá turaú kam, bulé iappéaké jomui Taikamanua.

⁴ Kelé sitususurat ka bukot Nabi Jesayas, sipasikukua: "Maarep nga-nga sipusosoga ka simatangeu, 'Patarek kam enungan Tuhan, pagaktuk kam pusilaiatnia

⁵ Papele-peleu, buítá tutabbui, paleleleleu sambat patina-tinambu, buítá tupagaktuk. Enungan pakoilu-koilut, buítá tuparoipo, samba enungan pabukklu-bukklu, buítá tupaosai

⁶ Raiitsó te taikapolak paaarauna sia sirimanua, Taikamanua!"

⁷ Oto maigi sia amei ka tubut Johannes, bulé iraú sia ka sia. Iageti kuanangan ka matadda si Johannes, "Bulat sirimanua sikataí paraboat lé kam néné! Kasei amasikua ka matamui, kaooinia nukatsliaké kam tubumui, ka ukuman Taikamanua, ka gogoi sibabara

⁸ Patoilá kam ka puparaboananmui, katubabaunia paatuatmui! Buí nuatsiaké kam putataikebbukatmui nia si Abraham. Bulé nuagai kam nia: Beri ka bukkú néné, momoi ibaraaké sapunuteteu Abraham, Taikamanua

⁹ Atupatarek'an te baliok masitadde loiná bulat pat alá ungatnia. Oto sangamberi loiná sitaibuaaké bua

simaerú, tutatadde lé, itugiggik'aké ka api.

¹⁰ Iageti kuaddangan nia ka matat Johannes, "Oto aponia galaiakenenmai?

¹¹ Kuana lé nia si Johannes ka matadda, "Kasei sibara rua leppei, kau ikau sara, ka tubudda sitá leppei; samba kasei sibara kan, kau iparubei nia

¹² Ka sia sipuukú pajá leú et, amei leú sia ka tubut Johannes, bulé iraú sia ka sia. Kuaddangan ka matat Johannes, "Ka kai leú, guru, apa kugagalai kai ka kai?" Iageti kuanangan ka matadda si Johannes, "Báan rararat kam tiddogetmui, masisabauaké siripot igit siloketmui.

¹³ Beri leú ka sia tai perajurit, amei leú sia ka tubut Johannes. Arakua ka sia, "Oto kipa ka kai? Aponia ka kai kugagalai kai?

¹⁴ Iageti kuanangan ka matadda ka sia si Johannes, "Bá papopot-poni kam pukayoatda kasei pá, samba leú et bá parauragi kam bibiletta sirimanua, kalulut nupabara kam selet tubudda. Metnangan sarat gajimui nukaroni kam baga, lepá!

¹⁵ Ka tetret nenda taddaakérangan sirimanua simigi masipatup-tup ka bagadda, masikua, taleú pá niangan né Rimata Sipaarau, ngenaakenenda

¹⁶ Oto iaté lulunia, aikua ka matadda sangamberidda si Johannes, "Aku kaku geti, oinan lé kuraraúaké ka tubumui. Tápoi momoian lé te nia sisaliu beunan tiboí tubukku peilé. Bulat beri masirugut talit tarangaínia, tá mateú aku. Iageti raúnangan kam Ketsat Sipunenan sambat api

¹⁷ Ka kabeinia ai sasat-sat, masisósó gandum, pat liná. Oto gandum, irurúaké ka bagat sapou, tápoi kulitnia geti irurúaké, itugiggik'aké ka api sitaipepé!

¹⁸ Oto maigi ngamataat galai pungangantomannia si Johannes, masipangantru sia, ka tetret aiparararat Katuareman Simaerú

¹⁹ Tápoi kai Herodes geti, iaté rimata ka propinsi Galilea, aipaanuji lé nia si Johannes, kalulut putatalimou nia kai Herodias, sinanalep sarainania, si Pilipus, samba leú kalulut jo bagei sigalaiakenennia

²⁰Tápoi aituppai lé kopet kataí paraboatnia, si Herodes, kalulut aigurúaké si Johannes ka bagat penjara

²¹Lepá airaú sia, ka sia sangamberidda, si Johannes, raúnangan leú et Jesus. Oto talagat paniniddou nia, tubukánangan manua

²²iageti tugorosotnangan Ketsat Sipunenan kelé mutubu marpati, leú ka tubut Jesus. Maarepnangan leú et nga-nga sipasikukua, "Togakku te ekeu, kilibet bagakku samba obaket bagakku.

²³Oto ka tetret aitaddaaké mugalai galajetnia Jesus, aian malegre telu ngapulu ngarura beunannia. Arakua sirimanua, nia néné, togat Josep, élé togat Eli

²⁴togat Mattat, togat Lepi, togat Malki, togat Janai, togat Josep

²⁵togat Matika, togat Amos, togat Nahum, togat Esli, togat Naggai

²⁶togat Maat, togat Matika, togat Simei, togat Josek, togat Joda

²⁷togat Johanan, togat Resa, togat Serubabel, togat Sealtiel, togat Neri

²⁸togat Malki, togat Adi, togat Kosam, togat Elmadam, togat Er

²⁹ togat Jesua, togat Elieser, togat Jorim, togat Mattat, togat Lepi

³⁰ togat Simeon, togat Jehuda, togat Josep, togat Jonam, togat Eliakim

³¹ togat Melea, togat Mina, togat Matata, togat Natan, togat Dapid

³² togat Isai, togat Obed, togat Boas, togat Salmon, togat Nahason

³³ togat Aminadab, togat Admin, togat Arni, togat Esron, togat Peres, togat Jehuda

³⁴ togat Jakob, togat Isak, togat Abraham, togat Tera, togat Nahor

³⁵ togat Serug, togat Rehu, togat Peleg, togat Eber, togat Salmon

³⁶ togat Kenan, togat Arpaksad, togat Sem, togat Noak, togat Lamek

³⁷ togat Metusala, togat Henok, togat Jared, togat Mahalael, togat Kenan

³⁸ togat Enos, togat Set, togat Adam, samba togat Taikamanua.

4 ¹ Iageti sop-sopnangan ka tubut Jesus, Ketsat Sipunenan, ka tetret aikaddiuaké Oinan Jordan. Oto abbitnangan nia Ketsat Sipunenan ka simatangeu

² Sedda sibonangan nia Sanitu ka bagat epat ngapulu ngagogoi burúnia. Burúnia

sedda taipukokom lé nia. Oto lepá
againangan tubunia laje

³Iageti kuanangan ka matania Sanitu,
"Ké Togat Taikamanua baí nia ekeu, tá
isoppi ioi nukua ka bukkú néné, bulé
ibailiu nia roti.

⁴Tápoi alegina lé nia Jesus ikua ka
matat Sanitu, "Ai atusurat'aké ka
Buko Sipunenan kisé, 'Tá sarat kan
iririmanuaaké sirimanua.'

⁵Lepá abbitnangan Jesus, Sanitu
ka sara kudduat simakopé buak. Oto
sangapeipekat mata patoilánangan ka
matania Sanitu, sangamberi purimataat
polak

⁶Iageti kuanangan ka matat Jesus,
"Kuaaké te sangamberinia gege samba
pukayoat néné ka tubum. Aipoí aiakéan
ka kabeiku sangamberinia Taikamanua.
Oto teúkungan lé kaipa kobá kau

⁷Ké murappo baí ekeu ka matakku
nupaniddogi aku, akékungan nia
sangamberinia néné, nuikep'aké nia.

⁸Iageti kuanangan ka matat Sanitu,
Jesus, "Ka Buko Sipunenan leú et
ai atusurat'aké kisé, 'Sarat Tuhan
Taikamanua lé paniddogietnu samba
reddeennu.'

⁹ Lepá abbitnangan nia mitsá Sanitu, Jesus, ka Jerusalem, rióakénangan nia ka tei-tei Uman Taikamanua. Iageti kuanangan ka matat Jesus, "Ké Togat Taikamanua baí nia ekeu, tá isoppi ioi nuteipuaké tubum ka polak

¹⁰ Atusurat'akéan leú poí ka Buko Sipunenan, sipasikukua kisé, 'Ikokoiniaké te samalaikania Taikamanua, rajago ekeu sipulelelek.

¹¹ Samba leú et mitsá, 'Rabebeilá te ekeu samalaika, buí ituso-sok rerem ka bukkú.'

¹² Oto kuana lé nia mitsá Jesus ka matat Sanitu, "Beri leú et ka Buko Sipunenan, ai leú et atusurat'aké kisé, 'Buí nusibo si Tuhan Taikamanuam.'

¹³ Kelé ailepá aipasiboji Jesus, Sanitu, aigaba sene ngamata enungan teret siagainia, kaddiuakénangan Jesus, ingena mitsá iaili tetrenia sipasesese

¹⁴ Lepá sok-soknangan nia mitsá Jesus ka Galilea. Iageti sop-sopnangan ka tubut Jesus Ketsat Sipunenan. Samba pagalaiat katuareman tubut Jesus leú, amararat'an ka sangaliot laggai

¹⁵ Pangantomannangan sia ka uma paniddogat. Oto umun'akérangan nia sangamberidda

¹⁶ Iageti einangan leú et Jesus ka Natsaret, ka laggai puuragatnia. Kelé simarei-rei, ipot gogoi Sabbat, ei nia ka uma paniddogat. Puriónangan masibatsa Buko Sipunenan

¹⁷ Oto kaurangan ka tubunia bukot Nabi Jesayas. Kelé aingá-ngáaké purunannia buko néné, sesenangan sara ruang sipasikukua kisé

¹⁸ "Aisop-sop'an ka tubukku Ketsat Sipunenan, aipauddet'an poí aku masisegéaké Katuareman Simaerú ka tubudda simagebá. Aikoiniaké aku masipaarep katubebelaakéra situuukum samba katuaaledda simapeset mata; masibelaaké sia sipinaor

¹⁹ samba masisegéaké iaili tetrenia kaoijanan Tuhan masipaarau sapaamiannia.

²⁰ Lepá purutnangan nia mitsá buko sibatsania Jesus, kaunangan nia ka sipugagalai, ei nia muuddet. Iageti kinereddangan nia sangamberidda siparururú ka uma paniddogat

²¹ Oto taddaakénangan ikua kuanennia Jesus ka tubudda, kisé, "Tiboiet sitususurat ka Buko néné, amuailingan te ka gogoi néné, ka tetret anuarep kam nia.

²² Bulat maerú tiboiet sikuania ka matadda. Oto kisei lé ka bagadda ka tubunia. Iageti seseakérangan sikuania. pelé nga-nganda, "Tá poi togat Josep nia, néné?

²³ Oto kuanangan ka matadda Jesus, "Bulat tá te isosoppi nukua kam ka tubukku, kelé sara nga-nga paloibáakenen néné, 'Tubum'an lé aleaké Dokter. Galaiakéan kiseiet ka laggai puuragatnu néné, kelé sigalaiakenennu leú ka Kapernaum.'

²⁴ Oto kuanangan mitsá ka matadda Jesus, "Repdem kam sikuakku néné, bulat tá te rahohormati sara nabi ka laggai puuragatnia

²⁵ Tápoi arep kam sikuakku néné: ka tetrenia Nabi Elia, tá aibelé urat telu ngarura enem ngalaggó burúnia, pat bara pulajeat simakopé ka sangaliot laggai. Ka tetret nenda maigi sia tailumang ka Israel

²⁶Tápoi kenanen kisedda, tá aikoiniaké si Elia, Taikamanua iei ka tubut sara tailumangra tai Israel, tápoi sarat ka tubut sara tailumang ka laggai Sarpat ka laggai Sidon lé, aiei

²⁷Kisedda leú ka tetret Nabi Elisa, maigi sia simalubbé simasappó, ka tai Israel, tápoi beri sia sara aialeaké ka tai Israel, sarat si Naeman tai Siria lé.

²⁸Iageti mangoí-ngoínangan bagadda ka tubunia, sangamberidda siparururú ka uma paniddogat, araarep sikuat Jesus ka matadda

²⁹Oto puriórangan leú et, kekleddeangan Jesus ibela ka laggaira, abbitrangan nia ka gilak leleu laggaira. Raisiaké ratukkluaké nia ka guluggú

³⁰Tápoi paelaknangan tubunia Jesus, ka talagadda sirimanua simigi, iageti tui nia sedda

³¹Lepá ei nia Jesus ka laggai Kapernaum ka propinsi Galilea. Iageti pangantomannangan sia ka gogoi Sabbat

³²Oto kisei lé ka bagadda raitsó enung pungangantomannia, aipoí berwibawa lé ipanibo

³³ Ka uma paniddogat, ai sara sipinasaileu ketsat sikataí. Sarat pugegerei lé nia, ikua

³⁴ "Ale Jesus tai Natsaret, kipa nugagalai ka tubumai? Taleú masisubuaké kaian lé, né, nuooi? Kirénangan, ai lé kuaagai ekeu, iaté sipunenan, sikoiniakenen Taikamanua!

³⁵ Iageti anunangan nia Jesus, pelé ngangania, "Meng-meng'aké ekeu. Belaaké ekeu ka tubunia!" Oto bebbeb'akénangan nia ketsat sikataí simasaileu néné ka polak ka matadda sangamberidda, lepá belanangan leú et ketsat sikataí, ka tubunia; tápoi tá aibesiki nia

³⁶ Bulat kisei lé ka bagadda raitsó nia, pat patiboddangan pasasambadda masikua, "Bulat apa lé páonia tiboietnia ka sia néné. Kalulut wibawa samba kereknia, oi ikua ka matat ketsat sikataí, rabela; oto beladdangan leú et!

³⁷ Iageti makakranangan katuareman pagalaiat sigalaiakenen Jesus néné, ka sangaliot laggai

³⁸ Iageti kaddiuakénangan uma parurukat, Jesus, ei nia ka lalep Simon. Ka tetret nenda, ai nia muroroket ka sia Ina siputaliku si Simon. Oto

segéakérangan puroroketnia ka matat Jesus

³⁹ Oto einangan leú et Jesus itaget'aké ina nenda ka peremannia, usiakénangan roketnia. Iageti tatá roketnia.

Tusurunangan leú et siputaliku si Simon néné, ipasikeli sia

⁴⁰ Ka soibokatnia, abbitrangan sasarainanda sipasioorik sene ngamata besí. Iageti rapeakénangan kabeinia ka tubudda, Jesus, ialeaké sia

⁴¹ Oto pabeladdangan leú et tubudda ka sia paketsa-ketsat sikataí néné ka tubudda sirimanua simigi. Beladda lé, pugereirangan leú et, masikua, "Ekeu té, né, Togat Taikamanua!" Tápoi aipaanuji lé sia Jesus. Tá ioobáaké rapanibo, ai lé poí raagai, nia néné, iaté Rimata Sipaarau

⁴² Kelé aimapató, tui nia sedda Jesus, ei nia ka simatangeu. Iageti gabaddangan nia sirimanua simigi. Oto kelé araaili nia, besíakérangan, buí ikaddiuaké sia

⁴³ Tápoi aikua lé ka matadda Jesus, "Buítá mei aku masipakakra Katuareman Simaerú, sibara ka Taikamanua ka laggai bagei; aipoí nenda lé lulunia, aikoiniaké aku Taikamanua, ka polak néné.

⁴⁴ Oto ei nia Jesus mungantoman ka senen uma paniddogat ka sangaliot laggai Judea.

5 ¹ Ka sara gogoi ai nia muririó Jesus ka bet-bet Paot Genetsaret, oi sia sirimanua simigi rapurut Jesus, raarepi katuareman simaerú sibara ka Taikamanua

² Iageti itsónangan rua abak, Jesus, ai nia mutetegbuk ka kapí; aipoí ka sia sipasiiba, atusakaian sia ka kapí, ratap-tap jalodda

³ Iageti jananginangan sara abak, iaté abak Simon, lepá kuanangan ka matat Simon, Jesus, bulé ilaut'aké nia goisó. Oto puuddetnangan Jesus ka bagat abak, iageti taddaakénangan ipangantoman sirimanua simigi

⁴ Kelé ailepá ipungantoman Jesus, kuanangan ka matat Simon, "Lugai kam ka simakeru, lepá jaloakémuian jalomui pasialat iba.

⁵ Tápoi kuana lé nia ka sia si Simon ka matat Jesus, "Ale Guru, bulat sangasoibó, akubesíaké kai nia, tápoi mandé sangamuneng tá abara! Tápoi kalulut gugulatnu, kauan kupujalo mitsá.

⁶ Kelé arapujalo, alánangan iba
simakopé igi, pat birit jalodda

⁷ Oto maí-maíranan abak sara, bulé
raoi masirop'aké. Iageti oirangan leú
et saaleira, kaurangan iba ka ruania
abak, pak tim ruania, bulat aian lé goisó
imalelelep

⁸ Kelé aiitsó nia néné si Simon,
purapponangan ka matat Jesus, pelé
nga-ngania, "Kaddiuaké lé aku Tuhan,
aipoí sirimanua sijo lé aku néné!

⁹ Bulat kisei ka bagat Simon sambat
saaleinia masiitsó igit iba sijalodda

¹⁰ Beri leú et ka sia saaleinia si Simon,
iaté si Jakobus, si Johannes sambat
tatogat Sebedeus, makisei leú et ka
bagadda. Iageti kuanangan ka matat
Simon, Jesus, "Bá malolotó Simon!
Barania kineneiget, tubabailiukéan lé
ekeu, sipasijajalo sirimanua.

¹¹ Oto lepá, giritdangan abakra ka kapí.
Iageti kaddiuakérangan sangamberinia
néné, ei sia masitut Jesus

¹² Ka sara gogoi, ai nia mukukuddu
Jesus ka sara laggai, ei nia ka sia
sara simalubbé simasappó ka laggai
nenda, murappo ka matat Jesus, pelé

nga-ngania, "Ké lé baí nuobá nia Ukkui, anualeakéan lubbéku!

¹³Iageti rapenangan nia Jesus, kuanangan ka matania, "Nenda geti, kuoba, kauan numale!" Oto niangan leú et nia, ale-aimale lubbénia

¹⁴Oto panei-neinangan nia Jesus, bulé buí itiboi nia ka sabagei, tápoi aikua lé ka tubunia, "Kenan lé ka tai imam, nutiddou ka tubudda rakua bulat kamamale nia besínu. Lepá ei ekeu masikau panguruatnu kelé pusurakatnu, ka tubut Taikamanua, siripot surukat sikuat Mose, masipatoilá ka tubudda sirimanua, bulat kamamale nia besínu.

¹⁵Tápoi memei lé mara-rarat katuareman sigalai Jesus néné, ka senen kudduat. Oto maigi sia sieei masiarep'aké ngantomannia, bulé ialeaké besíra

¹⁶Lepá ei nia Jesus ka simatangeu, maniddou

¹⁷Ka sara gogoi, ai nia mungangantoman Jesus, ka sia tai Parise sambat tai guru paamian, ai leú et sia sedda mukukuddu. Sia simigi néné, iaté sibabara ka Jerusalem, samba sibabara ka palagga-laggai ka Galilea,

samba ka Judea. Oto ka tubut Jesus, ai gege sibara kai Tuhan, masialeaké simabesí

¹⁸ Oto ka tetret nenda, ai sia siooi masitaroaké simasakit sipeperrep ka peremannia. Besíakérangan rataroaké simasakit néné ka bagat lalep, ioi rakau nia ka matat Jesus

¹⁹ Tápoi kalulut okkipra sirimanua simigi, taioinangan ragurúaké simasakit néné ka бага. Oto bairatdangan simasakit néné ka tei-tei lalep. Iageti bukárangan tobat lalep, gorosot'akérangan nia sambat peremannia ka matat Jesus, ka talagadda sirimanua simigi

²⁰ Kelé aiitsó kopet tonem bagadda Jesus, kuanangan ka matat simasakit néné, Jesus, "Ale saraina, atuappéakéan jom.

²¹ Iageti taddaakérangan rapatibo pasasambadda tai guru paamian sambat tai Parise, pelé nga-nganda, "Kasonia te nia néné, simaró бага masipaloloi Taikamanua? Tá poi sarat Taikamanua lé, momoi masiappéaké jo?

²² Tápoi ai lé iaagai Jesus, sipinaatudda néné. Lulut néné, kuanangan ka

matadda, "Angoi nupaaatu kam kelé nenda, ka bagat paatuatmui

²³ Apa lé poi simalabbei ka bagamui tukua, 'Atuappéakéan jom,' elé, 'Suruaké ekeu, nupuenung!'

²⁴ Tápoi kineneiget kupatoilá nia ka matamui kababaranian gege ka tubut Togat Manusia ka polak néné masiappéaké jo." Iageti kuanangan ka matat simasakit néné Jesus, "Suruaké ekeu, bairat peremannu, nutoili!

²⁵ Ka mataddangan leú et, suru nia, bairatnangan peremannia, toilinangan leú et, iageti umun'akénangan leú et Taikamanua

²⁶ Bulat kisei lé ka bagadda sangamberidda, raitsó sibabara néné. Iageti umun'akérangan Taikamanua. Oto ai sia mulolotó airakukua, "Bulat makisei ka bagatta, taigbuk kam sibabara gogoi néné!

²⁷ Lepá bela nia Jesus, itsónangan sara sipuukú pajá, sipuoni si Lepi, ai nia mukukuddu ka kantornia. Iageti kuanangan ka matania Jesus, "Konan tut aku.

²⁸ Oto puriónangan leú et si Lepi, kaddiuakénangan sangamberinia, einangan leú masitut Jesus

²⁹ Lepá baraakénangan punen ka lalepnia, masirauma Jesus. Maigi leú sia sipuukú pajá, samba sabagei amei mupunen, masipaaleiaké sia, mukom

³⁰ Oto taimangkánangan bagadda, ka sia piga pá tai Parise sambat tai guru paamian. Oto kuaddangan ka matadda sipasiului Jesus, "Nupakokom'aké kodda kam sia ka kam sangamberimui, sipuukú pajá, samba sirimanua sijo?

³¹ Tápoi kuana lé nia Jesus, ka matadda, "Ka sia simaron tubu, tá anai punda nia si dokter, sarat simaoringen lé

³² Aipoí kaooiku néné, tá masisogai sikua tubuna simatopit, tápoi masisogai sijo lé, bulé rabauaké paatuatda.

³³ Iageti kuaddangan nia ka matat Jesus, "Ka sia sipasiului Johannes samba sipasiuluirai tai Parise, marei-rei rapupuaso. Tápoi sipasiuluinu geti ka sia, bulat sarat pukokom samba puloló lé ragagalai.

³⁴ Tápoi kuana lé nia Jesus ka matadda, "Kipa, mateú leú nukua kam rapupuaso tairauma siooi mupunen putalimogat, ké

ai peilé nia mukukuddu ka sia, simanteu siputatalimou ka talagadda? Kirénangan tá mateú

³⁵Tápoi iaaili te tetrenia, itualá simanteu siputatalimou néné ka talagadda. Oto sedda peité tetrenia rapupuaso ka sia.

³⁶Lepá tiboinangan ka matadda Jesus, pasikat néné, "Bulat tá te anai sia sipasitatakkop'aké komang leppei simabaú ka leppei simaburú. Ibibirit'aké lé poí leppei sibau. Samba bagei komang sibau sitakkop'akenen néné, tá paloló nia ka leppei simaburú

³⁷Kisedda leú et, tá te anai sia sibaliuaké suat anggur sibau ka bagat lalaisú kulit simamumúmú. Aipoí kalulut suat anggur sibau néné, mapukpuknangan leú et lalaisú nenda. Oto mapilinangan leú et suat anggur, iageti ka sia lalaisú leú et, kataí

³⁸Buítá ka lalaisú kulit sibau leú et, itubabaliuaké ka sia suat anggur sibau

³⁹Oto kisedda leú te, tá te anai sia, siobá masiló suat anggur sibau, lepat raló suat anggur simaburú. Aipoí arakua, 'Suat anggur simaburú lé mananam.'"

6¹ Ka ipot gogoi Sabbat, ka tetret aipuenung Jesus ka talagat monen gandum, akpekrangan buat gandum sipasiuluinia. Ngototrangan nia, lepá komrangan leú et nia

² Oto ai sia piga pá tai Parise sipasikukua ka matadda, "Nupasasabau kodda kam surukat aratta, nugalaiaké kam keraet ka gogoi Sabbat?

³ Iageti kuanangan ka matadda Jesus, "Kipa, tápei poi anubatsa kam, sigalaiakenennia ka sia si Dapid, ka tetret aramalaje sambadda saaleinia

⁴ Situgurúna ka Uman Taikamanua, mukom roti sibuluakenen ka Taikamanua. Lepá baí mitsá kaunangan roti nenda ka saaleinia. Oto siripot ka surukat aratta baí nia, sarat tai imam lé momoi ikokom nia roti néné.

⁵ Oto kuanangan ka matadda Jesus, "Ai gege ka tubut Togat Manusia masiatur gogoi Sabbat!

⁶ Ka gogoi Sabbat mitsá, ei nia Jesus mungantoman ka uma paniddogat. Oto ai sedda sara simasakit kabei sangasilá

⁷ Iageti, ai leú piga pá sia ka sia tai guru paamian sambat tai Parise sipasigagaba selet tubut Jesus, bulé ioi ranganduaké

nia. Taikoddangan nia, baleú ialeaké simabesí ka gogoi Sabbath

⁸Tápoi ai lé iaagai sipinaatudda néné Jesus. Oto kuanangan ka matat simasakit kabei, "Rióaké ekeu sené ka mata!" Iageti puriónangan leú et simasakit kabei néné, ka mata

⁹Lepá nou-nounangan sia Jesus siparururú sedda, pelé nga-ngania, "Siripot ka arat, apa lé simateú tagalaiaké kam ka gogoi Sabbath? Masigalaiaké simaerú, elé sikataí lé? Masirimanuaaké sirimanua, elé masimateiaké lé?

¹⁰Iageti kinerenangan sia sangamberidda Jesus, pat salú, lepá kuanangan ka matat simasakit, "Totoiaké kabeinu." Oto totoiakénangan leú et kabeinia, iageti ale-aimale sakitnia

¹¹Oto bulat ngoí-ngoí lé bagadda tai guru paamian sambat tai Parise ka tubut Jesus. Iageti taddaakérangan masipatiboji kipa rapaeerú ka tubut Jesus

¹²Ka tetret nenda, ei nia Jesus ka sara leleu maniddou. Oto sangasoibó nia nenda, sarat maniddou aigalai

¹³ Kelé aimapató, sogainangan sia sipasiuluinia Jesus, piliynangan sia pulu rua ka talagadda. Oniakénangan sia sipulurua sipasiuluinia néné, apostel. Sia néné, iaté

¹⁴ Si Simon (sipuoni leú si Petrus), sambat si Andareas sarainan Simon; si Jakobus sambat si Johannes, si Pilipus sambat si Bartolomeus

¹⁵ si Mateus sambat si Tomas, si Jakobus togat Alpeus, samba si Simon (sipuoni si Patriot)

¹⁶ si Judas togat Jakobus sambat si Judas Iskariot sipajo Jesus

¹⁷ Lepá gorosot nia Jesus sambat sipasiuluinia baradda ka leleu, rióakérangan tubudda rapuari goisó ka simagaktuk. Maigi leú sia sedda aparurú sipasiului Jesus sabagei, samba leú et sia siooi sibabara ka senen kudduat ka sangaliot Galilea, Jerusalem, samba ka laggai Tirus sambat Sidon ka bet-bet coat

¹⁸ Kaooira néné, iaté masiarep'aké ngantoman Jesus, sambat masitiddou bulé ialeaké besíra. Beri leú et sia sipinasaileu ketsat sikataí, amoi leú et sia ka sia, iageti aleakénangan sia

¹⁹ Bulat arabesíaké sangamberidda masirape Jesus, kalulut aibebela ka tubunia kerek sialeaké besíra sangamberidda

²⁰ Iageti kinerenangan sia sipasiuluinia Jesus, lepá kuanangan ka matadda, "Mauktuk te kam simagebá, aipoí kam te sapaamian Taikamanua

²¹ Mauktuk te kam sipulalaje kineneiget; iektek'aké poí kam Taikamanua! Mauktuk te kam sipusosou kineneiget; ipagogora poí bagamui Taikamanua

²² Mauktuk te kam, ké rapulagaki kam бага sirimanua, elé rakekle elé rapaloloi, elé rapakataí nga-nga ka tubumui, kalulut Togat Manusia

²³ Aipoí beri tai nabi siburú, kisedda leú et aragalaiaké ka tubudda ka sia. Oto ké muaili baí néné ka tubumui ka kam, kau nupugora kam бага samba kau nuputurú kam ka angkat бага, aipoí bulat abeu upa siloketmui sitarek'akenen Taikamanua ka manua

²⁴ Tápoi mateimuian te ka kam simakayo kineneiget; anunanam'an poí kam simaerú

²⁵ Mateimuian te kam simaektek kineneiget; aipoí nuoorik te kam

pulajeat! Mateimuian te kam sipugagágá kineneiget; aipoí murereu-reu te kam бага samba musou

²⁶ Mateimuian te ké raumun kam sangamberi sirimanua; aipoí kisedda te aragalai siburú taikebbukatda raumun'aké tai nabi sipatataju.

²⁷ "Tápoi ka tubumui geti ka kam sipasiaarep'aké tiboietku kineneiget, kutonéaké ka matamui: kau imakaté bagamui ka tubudda saggakmui, samba galai kam simaerú ka tubudda simalagá бага ka tubumui

²⁸ Sukat'aké kam sia sipateleji kam, samba tiddouaké kam sia ka Taikamanua, sigalaiaké sikataí ka tubumui

²⁹ Ké ratipak bailatnu silá, tinóaké lé mitsá bailatnu silá, itipak nia. Ké irakkt'aké saraubánu, kaunungan leú et sambat leppeinu ka tubunia

³⁰ Ké ratiddou apa pá ka tubum, kaunungan nia ka tubunia; iageti ke irakkt'aké bibiletnu, buían nutiddou nia mitsá ka tubunia

³¹ Puukú kam sia sabagei, kelé nukiddiy kam ka kam, rapuukú kam

³² Aipoí ké baí sarat ka tubudda simanuntu бага ka tubumui lé imanununtu bagamui, oto apa uktukra ka tubumui? Beri leú et ka sia sijo, rapunununtuki leú sia бага simanuntu бага ka tubudda

³³ Iageti mitsá, ké baí sarat ka tubudda sigalai simaerú ka tubumui lé, nugagalai kam simaerú, oto apa uktukra ka tubumui? Beri leú et ka sia sijo, kisedda leú et ka sia ragalalaiaké

³⁴ Ké baí sarat ka tubudda siobá masitoiliaké sibaledda lé, nubabaleaké kam bulagatmui, oto apa uktukra ka tubumui? Beri leú et ka sia sijo, rababaleaké leú et ka sia bulagatda ka pasasambadda sijo, tápoi lepá tiddourangan nia mitsá

³⁵ Tápoi siripokatnia geti, tá kisedda! Kau lé imanuntu bagamui ka tubudda saggakmui, samba galaiaké kam simaerú ka tubudda. Baleaké kam bulagatmui ka tubudda, tápoi buí nungenaaké kam tubumui, ratoiliaké nia mitsá. Oto ké kiseddangan baí nia, galai tubumui, bulat tá te magugulai beunannia upamui, samba bailiunangan kam tatogat Taikamanua Sipulubeunan. Aipoí ka sia

Taikamanua, maerú bagania ka tubudda sitaiagai masikua surá, samba leú et ka tubudda sijo

³⁶Oto, kau numaerú kam бага, kelé pueerut bagania ka sia Ukkuimui!

³⁷"Buí nuhakimi kam sabagei, bulé buí ihakimi kam ka kam Taikamanua. Buí nupaukumi kam sabagei, bulé tá ipaukumi kam ka kam Taikamanua. Appéaké kam jodda sabagei, bulé iappéaké jomui ka kam, Taikamanua

³⁸Kau kam ka sabagei, bulé iaké ka kam Taikamanua; aipoí iaaké te ka kam Taikamanua panguruat singanyak pat potsou. Kirekat sikiréakenenmui ka sabagei, nenda te ikikiréaké Taikamanua ka tubumui ka kam.

³⁹Lepá tiboinangan ka matadda Jesus pasikat néné, "Ké pasasambadda simapeset mata, palulu ka tubu, tá isoppi rabelé ruadda ka bagat guluggú

⁴⁰Tá te anai beri sara tatoga sikola sisaliu beunan tiboitubut gurudda. Tápoi ké geti alepáan aikappluaké sikolania ka sia toga sikola néné, iapeité imakeré ka tubut gurunia

⁴¹ Angoi matoilá nuitsó sinoilet loiná ka matat sarainam, tápoi ka matam geti kekeu loiná beu arigi tá iaagai tubum

⁴² Kipa mateú leú pá nukua ka matat sarainam, 'Ale saraina, konan kukarit sinoilet loiná ka matam,' ké beringan ka matamui ka kam loiná beu arigi tá nuiitsó kam? Ale kam sipatataju! Golok'aké lé boikí loiná beu arigi ka bagat matam. Iapeité imakoinong nukarit sinoilet loiná, ka matat sarainam.

⁴³ "Bulat tá te makataiket buania loiná simalibbut buluk. Kisedda leú et ka sia loiná simakaraggei buluk, tá leú te maeruket buania

⁴⁴ Aipoí ka buania lé ituaagai galai tubut loiná. Kelé ka sia laggigi, tá te ibubuaaké buat sileu. Kisedda leú et ka sia rui, tá te ibubuaaké buat anggur

⁴⁵ Sirimanua simaerú бага, maigi simaerú tusesese ka tubunia, aipoí asut'an ka bagat paatuatnia pueerú. Tápoi ka sia geti sikataí paraboa, sarat pakata-kataí lé tusesese ka tubunia, aipoí asut'an ka bagat paatuatnia pukakataí. Sitububura ka bagat paatuat lé poí ititiboaké ka sia ngungu.

⁴⁶ "Angoi peilé nusosogai kam aku, nukua kam, 'Tuhan, Tuhan,' ké tá ainugagalaiaiké kam sikuakku ka matamui

⁴⁷ Kasei ka tubu tapakekeréaké kam sia siooi ka tubukku; arepra lé tiboietku galaiakérangan nia? Oto kauan, kupatoilá nia ka matamui galai tubudda néné

⁴⁸ Nia ka sia néné, makeré lé nia ka sara sirimanua kei irióaké lalep, gai-gainangan polak simakeru, lepá galainangan pundasinia ka uddut bukkú. Kelé ibara eba samba italu nia bagat oinan simaroirai, tá ipauuksak tubunia lalep nenda, ka pundasi sipulelelek lé poí aiturióaké

⁴⁹ Tápoi ka sia geti sipasiaarep tiboietku, tápoi tá igagalaiaiké, makeré lé nia ka sara sirimanua, sipasiririóaké lalep, tápoi sitá pundasi. Kelé ikuilú nia eba, mabukkatnangan leú et lalep nenda; oto bulat kakkataí!"

7 ¹ Kelé ailepá ipanibo Jesus ka matadda sirimanua simigi, ei nia ka Kapernaum

² Sedda, ai sara perwirat Roma sibara sara pagugulet bulat simanuntut

bagania. Pagugulet néné, ai nia mubebesí, bulat aian lé goisó ilalangó nia

³Oto kelé aiarep kababarat Jesus si perwira néné, koiniakénangan piga pá sia sautéra tai Jahudi, raei masisogai Jesus, bulé iei ialeaké paguguletnia

⁴Kelé arasegé ka tubut Jesus, nánáranan nia bulé irop'aké si perwira néné. Kuaddangan ka matat Jesus, "Bulat mateú nurop'aké si perwira néné, Ukkui

⁵aipoí bulat makaté bagania ka bangsatta. Ai airióaké uma paniddogatmai.

⁶Iageti einangan leú et Jesus itut sia. Oto kelé aimalegre Jesus ka lalep perwira, koiniakénangan saaleinia si perwira néné, masikua ka matat Jesus, "Táan leú palínia numageja бага masitaget'aké lalepku. Aipoí bulat tá mateú kusiló kam, Ukkui ka lalepku

⁷Iaté lulunia, tá tubukku amoi masiailiaké ekeu Ukkui, kalulut gilat tubukku. Oto kuangan lé sangakuanan, bulé imale paguguletku

⁸Aipoí beri aku kaku leú et, buítá kureddet leú et nga-nganda sautéku. Iageti kaku, ai leú et sia saperajuritku

sireddet nga-ngangu. Ké kugugluaké sara perajurit, kukua, 'Kenan!' einangan leú et; samba ké kukua ka sara, 'Konan sené!' oinangan leú et. Samba ké kukua ka matat paguguletku, 'Galai néné!' galainangan leú et nia.

⁹Oto bulat kisei lé ka bagania Jesus iarep sikuat perwira néné. Iageti pitsanangan tei-teinia Jesus, kuanangan ka matadda sirimanua simigi, "Bulat apanganté onia sirimanua néné. Beri ka talagadda tai Israel, tá anai akusese kopet tonem бага kelé néné!

¹⁰Oto kelé aratoili sikoiniakenen perwira néné ka lalep, amalengan nia pagugulet perwira

¹¹Iageti tá amauju, ei nia Jesus ka laggai Nain. Oto ka sia leú sipasiuluinia sambat sirimanua simigi, amei leú et sia ka sia masipaaleiaké Jesus

¹²Kelé aramalegre ka matatbaliu laggai, bela sia sieei manou simamatei. Silalangó néné, iaté sara silainge, togat ina silumang. Sarania lé toganian. Maigi sia taikalaggaiat sieei masipaaleiaké ina silumang néné

¹³Oto kelé aiitsó nia Jesus sinanalep néné, makaténangan bagania ka

tubunia. Iageti kuanangan ka matat ina néné Jesus, "Bá pusosou, Ina!

¹⁴Iageti legreakénangan tubunia Jesus ka panggre, rapenangan nia. Oto puariddangan leú et sipasibabairat. Kuanangan ka matat silainge Jesus, "Oi silainge, kukua ka matam suruaké ekeu!

¹⁵Iageti tusurunangan leú et silainge, silalangó néné, puuddetnangan leú et; lepá taddaakénangan manibo. Oto segéakénangan nia Jesus, silainge néné, ka tubut inania

¹⁶Iageti malotóranan leú et sangamberidda, bailiu taddaakérangan masiumun Taikamanua. Pelé nganganda, "Atulotsit'an sara nabi sabeu ka talagatta! Amoian Taikamanua, masipaarau sapaamiannia!

¹⁷Iageti mara-ratnangan katuareman pagalaiat sigalai Jesus néné, ka sangaliot Galilea sambat ka sangaliot laggai simalegre sedda

¹⁸Lepá segéakérangan nia ka sia sipasiului Johannes, sangamberi sibabara, sigalai Jesus néné, ka matat Johannes Sipasiraraú. Iageti sogainangan rua sipasiuluinia si Johannes

¹⁹ Koiniakénangan sia raei ka tubut Tuhan Jesus, rakua ka matania, "Ekeuan leú néné, kuanen siooi siripot sitonéakenen Taikamanua, elé ai peilé sabagei ngenaakenenmai?

²⁰ Oto eirangan leú et karuadda sipasiului Johannes, néné masiailiaké Jesus, pelé nga-nganda ka tubunia, "Aikoiniaké kai si Johannes Sipasiraraú, masiiséaké ka tubum, Ukkui, kipa, taleú ekeuan né siooi siripot sitonéakenen Taikamanua, elé ai peilé sia sabagei ngenaakenenmai?

²¹ Ka tetret nenda, aiaaleaké simigi Jesus, samba aiuusiaké maigi ketsat sikataí, samba leú et maigi sia simapeset mata amakoinong mata

²² Oto kuanangan ka matadda Jesus, "Toiliakéan kam kai Johannes, nutiboi kam siarepmui samba siitsómui, ka matania: amakoinong'an matadda simapeset mata, amuenung'an sia simasakit, amalengan sia simalubbé simasappó, amaarep'an piúra simatakkep, atusurungan sia simamatei, samba leú et atupaarep'an Katuareman Simaerú ka tubudda simagebá

²³ Mauktuk te sia sitaimarua бага ka tubukku.

²⁴ Oto lepána lé aratui-tui sapakoiniet Johannes, taddaakénangan nia Jesus, itiboi pagalaiat tubut Johannes ka matadda sirimanua simigi, pelé nga-ngania, "Aponia nuiitsó kam sedda ka simatangeu? Taleú masiitsó popou-pou siuilakat rusa lé

²⁵ Aponia nuiitsó kam anuei kam sedda? Taleú masiitsó sipuleleppei simalainge lé? Ale, ai lé sia ka lalepra tai rimata sipuleleppei simalainge samba simalelek puririmanua

²⁶ Oto, aponiangan lé nuiitsó kam anubela kam? Taleú masiitsó sara nabi lé? Oo, bulatnia. Momoi tukua nia néné, saliu peilé sara nabi

²⁷ Aipoí si Johannes te ikukua ka Buko Sipunenan, sipasikukua, 'Nia té néné pakoinietku,' nga-ngan Taikamanua, 'Koiniakenenku sipuboboikí kei mei ekeu kekeu, bulé ipapa enungannu!'

²⁸ Iageti kuanangan ka matadda sirimanua simigi Jesus, "Bulé nuagai kam nia, tá anai ka polak néné, sisaliu pubebeunan tiboi tubut Johannes Sipasiraraú. Tápoi mitsá, oniakenen

simagoisó ka talagadda sapaamian
Taikamanua peilé abeu tiboí tubu, ka
tubut Johannes Sipasiraraú.

²⁹ Sangamberi sirimanua, samba
sipuukú pajá leú et, kelé araarep
nia sikuat Jesus néné, toilá, sia lé
amasireddet sikuat Taikamanua, samba
sia lé aiobá iraú si Johannes

³⁰ Tápoi ka sia geti tai Parise sambat tai
guru paamian, tá raobá rasiló sipinaatut
Taikamanua, galaiakenennia ka tubudda.
Tá raobá iraú sia si Johannes

³¹ Iageti kuanangan nia mitsá
Jesus, "Apa katubungan lé, mateú
kupakikiréaké sia sirimanua ka reddenan
néné? Bulat kelé kipa sia néné, takukua

³² Sia geti néné ka sia, kelé galai
tubudda tatoga ka pasakiat'an lé sia.
Rapusoga ka mungkuat sara, masukua
ka matadda, 'Akuuraiakéan kai urai
puangkakat бага, tápoi tá amuturú kam!
Akuuraiakéan kai urai pulúlukat бага,
tápoi tá amusou kam!

³³ Iageti oi nia ka sia si Johannes,
galainangan mupuaso samba leú tá iobá
muló anggur, tápoi anukua peilé kam ka
tubunia, 'Ai lé sanitut tubunia, sirimanua
néné!

³⁴ Kelé aoi ka sia Togat Manusia, siobá mukom samba muló, kuamuian nia, 'Itsó peité kam galai tubunia ka sia sirimanua néné! Bulat taiom kan; simaló anggur simapuinenen; suruakra sipuukú pajá samba sirimanua sijo, lé nia.

³⁵ Tápoi kenanen kisedda, ka tubudda sangamberi sirimanua sipasisisiló nia lé, imatotoilá pusisikut paatuat Taikamanua.

³⁶ Ai sara tai Parise, sipuoni si Simon, amei nia masisogai Jesus mukom ka lalepnia. Iageti einangan leú et Jesus ka lalep Simon, pukomrangan

³⁷ Ka laggai nenda leú et, ai sara sinanalep sipaakkulaaké jo. Kelé aiagai kababarat Jesus ka lalep Parisena, einangan leú et, abbitnangan sara buli-buli pualam sibara ka бага tula simasingin

³⁸ Puriónangan ka tei-tei Jesus, ka bet-bet rerenia. Iageti pusounangan leú et, suaakénangan reret Jesus elunia. Lepá posaakénangan alainia masigarak'aké reret Jesus. Lepá mitsá sigguknangan Jesus, iageti piliakénangan tula simasingin ka tubunia

³⁹ Oto kelé aiitsó nia si Parisena sipasisosogai nia mukom sibabara néné,

kuanangan ka bagat paatuatnia, "Bulat ké nabi baí nia sinéné, tá isoppi iagai kasonia sinanalep sipasirarape nia néné, samba againangan paaakkuláakéna jo sinanalep néné!

⁴⁰ Iageti kuanangan ka matat Simon, Jesus, "Ai sara kuanenku ka matam, Simon." Oto kuanangan ka sia si Simon ka matat Jesus, "Aponia poi, Guru, kuangan poi.

⁴¹ Iageti kuanangan ka matania Jesus, "Kisé, ai sia rua sipuuutak ka tubut sibaleaké bulagat ka tubudda. Sara nuntut utaknia lima ngotu ngaperak iginia, ka sisara ka sia lima ngapulu ngaperak

⁴² Karuadda néné, tá momoi rabaya nia utakra. Kalulut taiooinia rabaya nia, tataákénangan utakra ruadda. Oto karuadda néné, kasei ka talagadda simakopé nuntut бага ka tubut sipasibabaleaké bulagat ka tubudda?

⁴³ Iageti kuanangan nia ka sia si Simon ka matat Jesus, "Siripot sipinaatukku baí nia kaku, siposa utak simigi lé, bulat makopé nuntut бага!

⁴⁴ Oto kuanangan ka matania Jesus, "Bulat tubut maipó sikuam." Iageti

kinerenangan nia sinanalep néné Jesus, lepá kuanangan ka matat Simon, "Ai tebaí nulelelek'aké nia sinanalep néné, elé? Itsó peite, akuoi ka lalepnu, tá anutarek'aké oinan bubui rerekku; tápoi ka sia geti sinanalep néné, aibuian rerekku elunia, lepá posaakénangan alainia masigarak'aké rerekku

⁴⁵ Kekeu tá anusigguk aku, kelé pasisisilónu kaooiku ka lalepnu; tápoi ka sia geti sinanalep néné, taddanangan akuoi sené, tá aiariaké isigguk rerekku

⁴⁶ Kekeu tá anuuruaké tula simasingin ka utéku; tápoi ka sia geti sinanalep néné, aiuruakéan tula simasingin ka rerekku

⁴⁷ Oto bulatnia: beunan nuntut bagania néné te masipatotoilá katuaappé nia jonia simigi! Aipoí, ké goisó jonia tuappeaké, goisó leú te nuntut bagania.

⁴⁸ Iageti kuanangan ka matat sinanalep néné, Jesus, "Atuappéakéan sangamberinia jom.

⁴⁹ Oto patiboddangan pasasambadda sieei pataddé mukom ka tubut Jesus, pelé nga-nganda, "Kasonia te, né sirimanua, amoi koí aipasiappéaké jo?

⁵⁰ Iageti kuanangan ka matat sinanalep néné, Jesus, "Kalulut tonem bagam ka tubukku, arau ekeu. Oto toiliakéan ekeu ka aban baga!"

8 ¹ Tá amauju, ei nia Jesus ka laggai sabeu samba leú et ka laggai sigoisó, masikarap'aké Katuareman Simaerú pagalaiat Purimataat Taikamanua. Beri leú et ka sia sipasiuluinia, sipulurua amei leú et sia ka sia, masipaaleiaké, Jesus

² Iageti ka sia leú tainanalep sialeakenennia, iaté sipinasaileu ketsat sikataí, sambat simabesí, amei leú et sia ka sia masitut Jesus. Iaté si Maria sipuoni si Magdalena (sibelaakenen Jesus, pitu sanitu ka tubunia)

³ si Johanna, sinanalep Kussa, pegawai istanat Herodes; si Susanna, samba maigi peilé sia tainanalep sabagei. Bulagatda lé arapakei masirop'aké Jesus, sambat sipasiuluinia

⁴ Iageti riu-riunia lé raei sirimanua simigi, ka tubut Jesus; iaté, sibabara ka palagga-laggai sabeu. Oto kelé aramarurú sirimanua simigi, taddaakénangan nia Jesus, itiboi pasikat néné

⁵ "Ai sara sieei masikarap'aké karamen ka monenia. Ai nia mangangarap, belé bagei ka enungan. Oto sangarubeiat rapaperaki sirimanua, sangarubeiat bagei ipakomi umá

⁶ Ai leú et sibebelé ka simabukkú. Oto belana lé letinia, lajú, kalulut garak polak

⁷ Ia leú et, ai karamen sibebelé ka talagat rui. Iageti putútúrangan ruadda rui. Tápoi lepá teinangan nia rui, attei

⁸ Tápoi ai leú et karamen sibebelé ka polak simagabru, kelé aiputútú, bara buania sangotu ngaoleat iginia." Lepána lé aitiboi pasikat néné Jesus, kuanangan ka matadda, "Kasei simaarep piú, arep'akénangan nia!

⁹ Iageti nou-nourangan nia sipasiuluinia, katukolobat pasikat sikuat Jesus néné

¹⁰ Oto kuanangan ka matadda Jesus, "Ka tubumui geti ka kam, atuakéan panguruat masiagai keleat pagalaiat Purimataat Taikamanua. Tápoi ka sia geti sabagei, pasikat lé tukakau masipangantoman sia, bulé kenanen airariritúaké, tápoi tá raagai apa sibabara; iageti kenanen airaaarep'aké, tápoi tá isasak-sak ka bagadda.

¹¹ "Néné lé katukolobat pasikat néné:
Karamen iaté, tiboiet Taikamanua

¹² Karamen sibebelé ka talagat
enungan, iaté tupasikat'aké ka tubudda
sipasiaarep tiboiet Taikamanua. Tápoi
amoi lé Sanitu masirau-rau tiboiet néné
ka bagat paatuatda, bulé buí imatonem
bagadda samba buí tuarauaké sia

¹³ Iageti karamen sibebelé ka polak
simabukkú, iaté tupasikat'aké ka
tubudda sipasiaarep Katuareman
Simaerú. Arepra lé nia silóranan nia ka
angkat бага. Tápoi kalulut Katuareman
Simaerú néné, tápei amuungat ka bagat
paatuatda, bailiu ké bara pasisiboat ka
tubudda, sik-sikrangan tei-teira muarat

¹⁴ Karamen sibebelé ka talagat sésé
rui, iaté tupasikat'aké ka tubudda
sipasiaarep Katuareman Simaerú,
tápoi ai lé sia mukakarat бага ka
purimanuaiatda, kalulut obára mukayo,
bulé ramasanang murimanua ka polak
néné. Tápoi sangamberinia néné te
masitetei sia, pat taiom'akénangan
imatuá buania

¹⁵ Tápoi karamen sibebelé ka polak
simagabru geti, iaté tupasikat'aké
ka tubudda sipasiaarep Katuareman

Simaerú, lepá siddoniddangan nia ka bagat paatuatda simaerú samba simaroipo. Oto om'akérangan nia pat bara buania.

¹⁶ "Tá te anai sia, lepá itunam alito, tabbónangan nia bulukbuk, elé usuakénangan nia ka tei pereman. Tápoi ka panaggaat alito leú et isasaggaaké nia, bulé raitsó toronia ka sia, situgugurú ka bagat lalep

¹⁷ Aipoí tá anai simalipput, tátupatotoilá, elé tá poí anai keleat, tátupopoiliat, elé tupaaagai

¹⁸ Oto lelek'aké kam sangamberinia tiboiet siarepmui. Aipoí kasei ai, tukakau peilé ka sia, bulé imaigi; tápoi ka sitáanai geti, tuaalá peilé mitsá nenda sipulelegei ka tubunia.

¹⁹ Lepá eirangan leú et saina samba sasarainan Jesus ka tubunia, tápoi tá amoi arapailuk tubudda raailiaké nia, kalulut kopet okkipra sirimanua simigi

²⁰ Iageti einangan leú et sara, ka tubut Jesus masisegéaké ka matania kababaradda saeppunia, pelé ngangania, "Ai sia ka gerat sainam sambat sasarainam, Ukkui. Airabebesíaké nupaaili kam.

²¹ Tápoi kuana lé nia ka matania, Jesus, "Sipasiaarep samba sipasirereddet tiboiet Taikamanua lé, sainangku sambat sasarainangku.

²² Ka sara gogoi, amei Jesus sambadda sipasiuluinia muabak. Iageti kuanangan ka matadda sipasiuluinia Jesus, "Sita kam mutalipó ka silat paó." Oto eirangan leú et

²³ Talagat pulalajodda, maunengnangan ka sia Jesus. Oto tulut buraakénangan rusa talabari ka bagat paó. Iageti kusenangan sia ioi koat ka bagat abakra, bulat kei lepá ka sia sangamberidda

²⁴ Oto eirangan leú et sipasiuluinia rajiu-jiu Jesus bulé itusuru. Pelé nga-nganda ka tubunia, "Suruaké ekeu, Guru, babara mamatei sita!" Iageti tusurunangan leú et Jesus, anunangan rusa sambat onut koat. Oto puarinangan leú et ipuboroi ka sia rusa, sambat ka sia onu leú, lebak. Bulat nem lepá bagat paó

²⁵ Iageti kuanangan ka matadda sipasiuluinia Jesus, "Angoi peilé tá imatotonem bagamui ka tubukku?" Bulat kisei lé ka bagadda pagalú lotó. Kalulut néné, patiboddangan pasasambadda, pelé nga-nganda, "Kasonia lé pá

sirimanua néné, pat koí oi aiaséaké rusa sambat koat, iageti reddetdangan leú et nga-ngania!

²⁶ Iageti riu-riuakénangan ipulajo Jesus sambat sipasiuluinia, pat segé sia ka laggai Garasa ka silat Paot Galilea

²⁷ Kelé aitujanang Jesus ka kapi, taget'akénangan nia sara simanteu sipinasaileu ketsat sikataí, barania ka laggai. Amaburúan aipubulutut, kalulut taiobána tubunia muleppeí. Tá iobá mukuddu ka bagat lalep. Sarat ka ngaliu ratei lé iobá mukuddu

²⁸ Kelé aiitsó Jesus, pugereinangan leú et, lepá purapponangan ka matat Jesus, pelé nga-ngania, "Ale Jesus, Togat Taikamanua Sipulubeunan! Kipa nupaeerú ka tubukku néné? Bulat paniddogatku ka tubum, ale, buí nupaorei aku!

²⁹ Ikukua kelé néné geti, kalulut iuusiaké poí ketsat sikataí néné Jesus, rabela ka tubunia. Bulat amarei-reian ipasaileu nia ketsat sikataí, bailiu kenanen tukabéaké kabei sambat rerenia rattei, elé tujago nia simakopé, ia leú et takkiákéna nia rattei sikabéakenen

ka tubunia, iageti abbitnangan nia ketsat sikataí ka simatangeu

³⁰ Oto nou-nounangan nia Jesus, pelé nga-ngania, "Kasonia onim?" Iageti aleginangan nia, kuanangan, "Oningku geti si 'Legiun'," aipoí maigi sia sanitu atugurú ka tubunia

³¹ Tiddourangan ka tubut Jesus ka sia paketsa-ketsat sikataí, bulé buí iusiaké sia raei ka Guluggut Kamateiat

³² Iageti sedda ka bébéra, ai sangamungkuat sakkoiló sipumomone ka gilak leleu. Tiddourangan simakopé ka tubut Jesus ka sia pakeetsa-ketsat sikataí nenda, bulé iobáaké ratugurú ka tubut sakkoiló. Oto obáakénangan sia Jesus, ratugurú ka tubut sakkoiló

³³ Iageti pabeladdangan tubudda paketsa-ketsat sikataí néné, ka tubut simasaileu, gurúakérangan tubudda ka tubut sakkoiló. Oto ka sia sakkoiló pakukrunangan leú et, lepá paattatnangan tubunia, barania ka gilak leleu, teipu, beléna lé ka bagat paó, iageti lollou-lou

³⁴ Kelé araitsó sibabara néné, ka sia sipasijajago tarimeu, pabalaurangan leú et ka sia, raei masisegéaké sibabara

néné ka sangaliot laggai sambat ka
palagga-laggai simalegre sedda

³⁵Iageti bela sia raei masiitsó sibabara
néné. Eirangan leú et masitaget'aké
Jesus. Oto ailiddangan leú et nia
sipinasaileu ketsat sikataí, abelangan
nia ka paoreat sanitu, aian lé nia
muuuddet ka bet-bet reret Jesus. Aian
leppeinia samba aiagaian simaerú. Iageti
malotóranan leú et

³⁶Oto pungu-nguan'akérangan nia
sibabara néné, sangamberi sipasiigbuk
kipa aiperú aimale simasaileu néné

³⁷Oto eirangan leú et tai Garasa ka
tubut Jesus, tiddourangan simakopé
ka tubunia, bulé ikaddiuaké laggaira,
kalulut kopet lotóra sangamberidda.
Iageti janang nia Jesus ka bagat abak,
itoili

³⁸Iageti ka sia sibebela ka paoreat
ketsat sikataí néné, tiddou ka tubut
Jesus, bulé iobáaké itut sia. Tápoi
aikua lé ka matania Jesus, itoili, pelé
nga-ngania

³⁹"Maerúan lé nutoili, bulé
nupungungan'aké sangamberinia
sigalai Taikamanua ka tubum." Oto
toilinangan leú et, iei masisegéaké

sangamberinia sigalaiakenen Jesus ka tubunia, ka sangaliot laggai

⁴⁰ Kelé aitoili mitsá Jesus ka silat paó, silóranan kaooinia sirimanua simigi, ka angkat бага, ai lé poí rangengena ibara

⁴¹ Lepá oinangan leú et sara utet uma paniddogat, sipuoni si Jairus, murappo ka matat Jesus ináná Jesus, bulé iei ka lalepnia

⁴² kalulut aian lé goisó imamatei togonia sinanalep sipulurua ngarura beunannia. Paobánangan pei bagei sarania lé togonia sinanalep. Ai nia mueenung Jesus iailiaké lalep Jairus, oirangan leú et sirimanua simigi sibabara ka senen kudduat, raokkip Jesus

⁴³ Ka talagadda sirimanua simigi néné, ai sara sinanalep sibara besíra tainanalep kalulut taipuarit ibara simaingot tubunia. Pulu rua ngarurangan aiorik nia. Bulat amabolot'an pukayoatnia ikau sakit laggeknia ka tai dokter, tápoi tá amoi araaleaké nia

⁴⁴ Iageti kuluminangan Jesus, iei ka tei-teinia, rapenangan simajai saraubánia. Oto iangan leú et nia ari-aipuari ibara simaingot tubunia

⁴⁵ Nou-nounangan sia Jesus, kuanangan ka matadda, "Kasonia airape aku?" Sangamberidda masikua taipusisia nia, amasirape Jesus. Iageti kuanangan nia ka sia si Petrus, ka matat Jesus, "Itsó peité kopet igidda sirimanua sigoilik ekeu, Tuhan, raoi rapaoilot tubudda ka tubum!

⁴⁶ Tápoi aikua lé Jesus, "Tápoi ai sia sipasirape aku. Akuagai geti nia, kalulut abela kerek ka tubukku.

⁴⁷ Oto kelé aiagai nia sinanalep néné aagaira sigalaiakenennia, einangan leú et ka tubut Jesus ka geret tubu, purapponangan ka matat Jesus; iageti tiboinangan paluluatnia airape Jesus, samba kolouakénangan leú et kamamalet besínia ka tetret nenda, ka matadda siparururú sedda

⁴⁸ Iageti kuanangan ka matania Jesus, "Oi Rogai, kalulut tonem bagam ka tubukku, ale ekeu. Oto toiliakéan ekeu ka angkat бага.

⁴⁹ Ai nia mani-nibo Jesus, lotsit-aitulotsit sara pagugulet barania ka lalep Jairus. Kuanangan ka matat Jairus, "Ailangóan nia togam sinanalep. Buían nugejaaké bagat Guru siboboi.

⁵⁰ Kelé aiarep nia Jesus sikuat pagugulet néné, kuanangan ka matat Jairus, Jesus, "Bá makakarat бага. Matonem lé bagam ka tubukku, ale nia togam.

⁵¹ Kelé aisége Jesus ka lalep Jairus, sarat si Petrus, si Johannes, si Jakobus, ukkui sambat inan toga lé aiabbít, tápoi sabagei geti beri sia sara tá aiobáaké ratugurú

⁵² Sangamberidda sedda talagat pusourangan, kalulut lalangóna toga sinanalep néné. Oto kuana lé nia Jesus ka matadda, "Bá pusosou kam. Tá ailangó nia toga néné, ai lé nia mauuneng!

⁵³ Iageti gágatiddangan nia, Jesus, araagaian poí lalangóna nia toga sinanalep néné

⁵⁴ Oto alánangan kabei toga néné Jesus, kuanangan ka matania, "Rogai, suruaké ekeu!

⁵⁵ Iageti bara mitsá engania toga néné; oto niangan leú et nia, suru-aitusuru toga néné. Lepá kuanangan ka matadda Jesus, bulé rakau kannia toga néné

⁵⁶ Oto bulat kisei lé ka bagadda simakopé saepput toga néné. Tápoi

aikeraaké lé sia Jesus, bulé buí ratiboi nia ka sabagei.

9¹ Lepá sogainangan sipasiuluinia sipulurua Jesus, kaunangan ka tubudda gege masiusiaké ketsat sikataí samba masialeaké besí

² Iageti koiniakénangan leú et sia raei masialeaké simabesí samba masipaarep pagalaiat Purimataat Taikamanua

³ Kuanangan ka matadda Jesus, "Buí nuabbit kam apa pá panarenganmui ka puenungananmui. Tutturámui leú et buí nuabbit kam nia. Kisedda leú et suppit paniddoumui bulagat, elé balutmui, elé bulagat elé rua leppeimui, buí nuabbit kam nia

⁴ Kaipa laggai rasiló kam, seddangan té nukukuddu kam teret iaili tetrenia nutui-tui kam, nukaddiuaké kam laggai nenda

⁵ Iageti mitsá kaipa laggai tá rasiló kam, kei mutui-tui kam sedda, só-sóakémuian abu ka reremui, kelé sara toggaiat uukum'akéna sia Taikamanua, kalulut taiobára masiarepi ngantomanmui.

⁶ Iageti eirangan leú et sipasiuluinia Jesus, seneirangan laggai, masipararat

Katuareman Simaerú, samba masialeaké simabesí ka senen kudduat

⁷ Kelé aiarep nia si Herodes rimata ka Galilea, sangamberi sibabara néné, maingonangan leú et. Aiarep poí arakua nia sirimanua, amurimanuangan nia mitsá si Johannes Sipasiraraú

⁸ Iageti ai leú et sia sabagei sipasikukua, aian nia mitsá ka sia si Elia. Tápoi ka sia sabagei arakua, amurimanuangan nia mitsá sara ka talagadda tai nabi siburú

⁹ Oto kuanangan nia ka sia si Herodes, "Akukoiniakéan sia ratippú lolokkat Johannes. Tápoi ka sia geti sinéné, kasonia? Amaingingan akuarep pagalaiat tubunia sirimanua néné." Iageti besíakénangan iitsó tubut Jesus, si Herodes

¹⁰ Iageti kelé aratoili sipasiului Jesus, pungu-nguan'akérangan leú et sangamberinia sigalaiakenenda ka tubut Jesus. Oto lepá nánánangan sia sipasiuluinia, Jesus, raei sambadda, rasaraaké tubudda ka laggai Betsaida

¹¹ Tápoi kelé araagai nia sirimanua simigi, eirangan leú et masitut Jesus. Oto silónangan kaeaira ka tubunia Jesus. Iageti tiboinangan ka matadda pagalaiat

Purimataat Taikamanua. Aleakénangan leú et simabesí ka talagadda

¹² Kelé aimasoibó, ei sia sipasiuluinia ka tubut Jesus, masikua, "Simatangeu lé te kudduatta néné, Tuhan. Oto maerú peilé nukua ka matadda raei masigaba kanda samba pugogoiatda ka palagga-laggai sabeu samba sigoisó simalegre sené.

¹³ Tápoi kuana lé nia ka matadda Jesus, "Kam'an lé ipakokom sia." Oto belan nga-nganda lé sipasiuluinia, "Ka kai poí sené, sarat lima nga aggro lé roti samba rua ngamuneng iba. Taleú memei peilé kai masisaki kanda sangamberidda néné?

¹⁴ (Sedda, ai sia lima ngaribu igidda taimanteu.) Iageti kuanangan ka matadda sipasiuluinia Jesus, "Kua kam ka matadda sirimanua simigi néné, bulé rabagguak tubudda muuddet. Sangabagguak lima ngapulu sia igidda.

¹⁵ Oto galaiakérangan nia sipasiuluinia, kelé sikuat Jesus ka matadda

¹⁶ Iageti alánangan silima nga aggro roti sambat sirua ngamuneng iba, Jesus, teilanangan manua, kuanangan surá ka tubut Taikamanua. Lepá paabbónangan nia roti sambat iba, Jesus, kaunangan

nia ka sipasiuluinia raparubei nia ka sirimanua simigi

¹⁷Iageti pukomrangan leú et sangamberidda bulat pat segé ektekra. Lepá rurúakérangan sipulelegei, sipasiuluinia, ai pulu rua ngagarágá iginia

¹⁸Ka sara gogoi, ai nia mani-niddou Jesus, taget'akérangan nia sipasiuluinia. Iageti kuanangan ka matadda sipasiluinia, Jesus, "Siripot siarepmui ka kam ka nga-nganda sirimanua, kasonia rakukua aku kaku néné?

¹⁹Iageti alegiddangan nia, pelé nga-nganda, "Ai sipasikukua, si Johannes Sipasiraraú lé ekeu néné. Tápoi ai leú et sia sipasikukua, ekeu néné, si Elia. Iageti arakua mitsá ka sia sabagei, ekeu néné, iaté sara nabi siburú, tápoi amurimanuangan nia mitsá.

²⁰Oto kuanangan ka matadda ka sia Jesus, "Tápoi kam ka kam, kasonia nukukua kam aku, kaku néné?" Pelé nga-ngan Petrus ka sia, ikua ka matat Jesus, "Ekeu geti kekeu néné, Rimata Sipaarau, sitonéakenen Taikamanua.

²¹ Lepá kuanangan ka matadda sipasiuluinia Jesus, "Buí tebaí nupoiliat kam sangamberinia néné ka sabagei.

²² Iageti kuanangan nia mitsá ka matadda Jesus, "Ka sia poí Togat Manusia, buítá iorik sene ngamata paoreat sibara ka tai bajá, sibara ka tai imam sabeu samba sibara ka tai guru paamian. Iageti mateiakérangan nia. Lepá ka gogoi sikatelunia, suruakénangan nia mitsá Taikamanua.

²³ Oto kuanangan ka matadda sangamberi siparururú sedda, "Kasei siobá masitut aku, kau igalak'aké galajet puuktungannia sarania, samba kau ibairat siliktengania senen gogoi, ia leú et, kau imariu-riu itut aku

²⁴ Aipoí kasei sikera engania, nia té malilimai purimanuaiat. Tápoi kasei sibuluaké engania kalulut aku, nia té masiikep'aké purimanuaiat sitaitatátá

²⁵ Aponia poi uktuknia sara sirimanua, kenanen moi iikep'aké sangaliot polak néné, ké ai lé ipakakataí elé ai lé malilimai purimanuaiatnia

²⁶ Kasei maila masimuneng'aké aku samba sitaimatonem бага ka ngantomanku, maila leú te nia ka sia

Togat Manusia masimuneng'aké nia ka tetret kaoijanannia ka gegenia, sambat ka geget Ukkui samba leú et ka gegetda samalaika sipunenan

²⁷ Bulé nuagai kam nia: ai te sia ka talagamui néné sené, tá inananam kamateiat, teret itsóra ipurimata Taikamanua.

²⁸ Kelé aitukapflu enem ngagogoi burúnia lepat aipungantoman Jesus, abbitnangan sia Jesus, iaté si Petrus, si Johannes, sambat si Jakobus ka sara leleu, maniddou

²⁹ Oto ai nia mani-niddou Jesus, siliynangan pumataatnia, iageti pukinamnangan leú et saraubánia

³⁰ Lepá lotsit-aratulotsit ka sia rua taimanteu, iaté si Mose sambat si Elia, patoilárgan tubudda ka toro sibara ka manua. Amoi sia ka tubut Jesus, rapatiboji pagalaiat kamateiat Jesus. Aipoí táan mauuju ipuaili ienungi nia néné, Jesus ka Jerusalem

³¹ (9:30)

³² Ka tetret nenda, ai lé sia mauuneng tai Petrus sambat saaleinia, tápoi lepá tulut suru sia, itsórgan iputoro tubut

Jesus, samba sia sirua ai sia muririó ka bet-bet Jesus

³³ Aian lé ragegelai rakaddiuaké Jesus, karuadda néné, kuanangan ka matat Jesus, si Petrus, "Guru, bulat maangká bagatta mukuddu sené. Maerú lé kurióaké kai telu ngambua sapou: sara kekeu Tuhan, sara kai Mose, sambat sara mitsá kai Elia." (Tápoi kei ikukua kelé néné si Petrus, tá aiaagai kolou sikuania.

³⁴ Oto talagat paninibo nia si Petrus, kuneminangan sia tinobut manua, pat bara lotóra

³⁵ Lepá maarepnangan nga-nga ka tinobut manua sipasikukua, "Nia té néné Togakku, sipiliyku. Reddet kam nga-ngania!

³⁶ Lepána lé aimaarep nga-nga néné, itsóra lé nia Jesus, saranangan lé sedda. Oto aramengmeng'aké lé sipasiuluinia sangamberinia néné, bulat beri tiboira nia ka sabagei siitsóra néné

³⁷ Kelé aimapató gorosot nia Jesus sambat sipasiuluinia sitelu, baradda ka leleu. Lepá oirangan leú et sirimanua simigi masitaget'aké nia

³⁸ Iageti pugereinangan leú et sara ukkui ka talagadda sirimanua simigi,

kuanangan, "Ale Guru, konan pei nuitsó togakku. Aipoí sarania lé togakku

³⁹ Ké itaddaaké ibesiki nia sanitu togakku néné, pugereinangan leú et, lepá pusironnangan tubunia, pat bela bubut ka ngungunia. Tá muaari ibesiki nia ketsat sikataí, samba tá iobá ibelaaké tubunia ka tubut toga

⁴⁰ Akutiddouan ka tubudda sipasiuluinu, bulé rausiaké nia ketsat sikataí néné, tápoi tá amoi arausiaké nia.

⁴¹ Iageti kuanangan ka matadda Jesus, "Bulat kipa lé pá kam néné! Simapepepe samba sitaimatonem бага ka tubukku lé kam néné! Kipangan lé burúnia kukuddu ka talagamui, samba kupaom bagakku ka tubumui? Kauan, abbit nia sené nenda togam!

⁴² Ai nia memei toga néné masiailiaké Jesus, parapdamnangan nia ketsat sikataí, ka polak; iageti pusironnangan tubunia. Oto kuanangan ka tubut ketsat sikataí, Jesus, ibela ka tubunia. Iageti ale-aimale toga néné. Lepá toiliakénangan nia mitsá toga néné, ka tubut ukkuinia

⁴³ Bulat kisei lé ka bagadda masiitsó kopet beunan geget Taikamanua.

Ai peilé sia mukekeppu ka бага sirimanua simigi kalulut kisei ka bagadda sigalainia, kuanangan mitsá ka matadda sipasiuluinia, Jesus

⁴⁴ "Bulat lelek'aké kam sikuakku néné, buí nukalipogi kam nia: Tusesegéaké te Togat Manusia ka kabeira sirimanua simagege.

⁴⁵ Tápoi tá ikokolou ka bagadda sikuat Jesus néné. Ai lé poí tupakekele ka tubudda sipasiuluinia Jesus, bulé buí raagai nia. Tápoi tá maró bagadda masinou-nou katukolobatnia ka tubut Jesus

⁴⁶ Iageti ka sara tetre, bara paukelat ka talagadda sipasiului Jesus, rapaukeli kasonia oniakenen siabeu tiboí tubu ka talagadda néné

⁴⁷ Tápoi kelé aiagai nia sipinaatudda néné, Jesus, alánangan sara tatoga sigoisó, rióakénangan nia ka bébénia

⁴⁸ Oto kuanangan ka matadda sipasiuluinia Jesus, "Kasei sisiló toga néné kalulut aku, bulat aku lé te galainia aisiló. Samba kasei sisiló aku, sipasikokoioniaké aku lé te galainia aisiló. Aipoí sia oniakenen sigoisó tiboí

tubu ka talagamui, niaté simakopé beunan tibo tubu!

⁴⁹Iageti kuanangan si Johannes ka matat Jesus, "Akuitsó kai sara sipasiuusiaké sanitu ka onim, Tuhan. Oto aséakémaian nia, aipoí nia ka sia néné, tá aleita.

⁵⁰Tápoi kuana lé nia Jesus ka matat Johannes sambat ka matadda sipasiuluinia sabagei, "Bá aaséaké kam nia, aipoí sia sitaisaggangi kam, niaté aleimui.

⁵¹Kelé aimalegre tetrenia iaili gogoi katusakaiat Jesus ka manua, teúakénangan mei ka Jerusalem

⁵²Iageti koiniakénangan sia raei boikí. Oto eirangan leú et boikí sia sikoiniakenen Jesus néné, gurú sia ka sara laggai, ka Samaria masipatarek sene ngamata siripot pakeiet Jesus

⁵³Tápoi tá arasiló kaooi Jesus ka laggai néné, aian poí raaagai kaeei nia ka Jerusalem

⁵⁴Oto kelé araagai nia sipasiului Jesus, iaté si Jakobus sambat si Johannes, kuaddangan ka matat Jesus, "Nuobá leú Tuhan, kutiddou kai api sibara ka manua, bulé tusubuaké sia néné?

⁵⁵ Iageti pitsanangan sia Jesus,
pugolukinangan leú et sia

⁵⁶ Lepá eirangan leú et ka laggai bagei

⁵⁷ Talagat pueenung nia Jesus sambat
sipasiuluinia, oi-aioi sara sipasikukua ka
matat Jesus, "Kobá kutut ekeu, Tuhan,
kenanen kaipa nuei!

⁵⁸ Tápoi kuana lé nia Jesus ka matania,
"Ka sia lamusek, ai ugunia, samba umá
ai rumunnia; tápoi ka sia geti Togat
Manusia, tá anai kudduat pasiariatnia
tubunia.

⁵⁹ Lepá kuanangan Jesus ka matadda
sabagei, "Tut aku." Tápoi kuana lé nia ka
matat Jesus, "Obáaké lé aku boikí kuei
masirateiaké ukkuiku, Tuhan.

⁶⁰ Iageti kuanangan ka matania
Jesus, "Eddangan nia ka sia simamatei
rarateiaké simamateira ka sia. Tápoi
ekeu geti kekeu, kenan lé masisegéaké
tataddaakéna ipurimata Taikamanua.

⁶¹ Oto mitsá ai leú sara amasikua
ka matat Jesus, "Kuobá moi masitut
ekeu, Tuhan, tápoi obáaké lé boikí kuei
kusegéaké katutui-tuiku.

⁶² Iageti kuanangan ka matania Jesus,
"Kasei pá sia, ai nia mamamakkru polak,

aipipitsa ka tei-tei, bulat tá mateú ibailiu nia sikauman Taikamanua."

10¹ Lepá piliynangan sia mitsá sipasiuluinia, Jesus, ai sia pitu ngapulu igidda. Koiniakénangan sia parurua ka tubu, raboikiáké tubudda, masigejengi sangaliot laggai sigoisó samba sabeu, samba ka kudduat ailiakenennia

² Iageti kuanangan ka matadda Jesus, "Buat mone getaiet amaingingan, tápoi sipugagalai kaunen masimonei, tápei maigi sia. Oto tiddou kam ka tubut Taikamanua sibakkat mone, ikoiniaké sia sipasimomonei siuremannia

³ Oto kauan, kenan'an kam! Kukoiniaké kam kelé biri-biri ka talagat harimau

⁴ Buí nuabbit kam dompetmui,élé suppit paniddoumui bulagat, samba tarangaí. Bá puaari kam ka talagat enungan, nuparoroaké kam kasei pá

⁵ Ké nuguruki kam sara lalep, kua kam boikí, 'Bulé bara aban ka lalep néné.

⁶ Oto ké ai sia sedda siobá muaban бага, ottotnangan ka tubunia aban Taikamanua sikaumui. Tápoi ké geti tá anai sia, tik-tikmuian nia mitsá nenda aban sikaumui

⁷ Sara lé lalep kudduatmui, lepá. Apa lé ratat-tat'aké sibakkat lalep ka matamui, kommuian nia; aipoí ai hakra masisiló upadda, sipugagalai galajet. Buí baramui ka lalep sara, ei kam ka lalep bagei

⁸ Ké ai baí sia sara ka laggai sigurukimui, sipasirarauma kam ka erut бага, apa ratat-tat'aké ka matamui, kommuian nia

⁹ Aleakémuian sia simabesí ka laggai kudduatmui, samba segéakémuian ka matadda sedda, 'Amalegrengan te ioi Purimataat Taikamanua ka talagamui.

¹⁰ Tápoi ké geti tá anai sia, sirauma kam ka laggai sigurukimui, bela kam ka enungan, kuamuian

¹¹ 'Beri ngaí laggaimui ka reremai, kususó-sóaké kai, kelé sara toggaiat uukum'akéna kam Taikamanua! Tápoi bulé nuagai kam nia, amalegrengan te iaili tetrenia ioi Purimataat Taikamanua ka talagamui!

¹² Repdem kam néné, ka gogoi sialu, jodda tai Sodom peilé malabbei iappéaké Taikamanua, ka tubudda sirimanua sikukuddu ka laggai néné!

¹³ "Mateinungan te kekeu, Korasim! Beri leú ekeu kekeu Betsaida mateinungan leú te! Aipoí ké baí

ka tubudda tai Tirus sambat tai Sidon
nia aitugalaiaké puckerengan kelé
puckerengan sigalaiakenen ka talagamui
ka kam néné, táan tagai burú arabauaké
paatuatda, elé arapupurúpú samba
arakau abu ka utéra

¹⁴ Ka gogoi sialu, jodda tai Tirus sambat
tai Sidon peilé malabbei iappéaké
Taikamanua, ka tubumui ka kam

¹⁵ Ialeú et ekeu Kapernaum! Bulat
ka bagam lé te ibubuak'aké ekeu
Taikamanua, pat aili ka manua, elé?
Bulat táan te matsí! Tá te ka narako lé
iriribbaiaké ekeu Taikamanua!

¹⁶ Lepá kuanangan ka matadda
sipasiuluinia Jesus, "Kasei iarep'aké
tiboietmui, aku lé te galainia aiarepi.
Ialeú et, kasei sitá táaké kam, aku lé te
galainia aratátáaké. Samba leú et kasei
sitá táaké aku, sipasikokoiniaké aku lé te
galainia aratátáaké.

¹⁷ Lepá toiliddangan leú et sipasiului
Jesus, sipitu ngapulu ka angkat бага.
Oto kuaddangan ka matat Jesus, "Tuhan,
bulat beri sia leú paketsa-ketsat sikataí
rarereddet nga-ngamai, ké kuusiaké kai
sia ka onim!

¹⁸Iageti kuanangan ka matadda Jesus, "Kirénangan tedda akuitsóan arabelé sanitu, baradda ka manua, kéan lé bilá rueinia

¹⁹Bulé nuagai kam nia! Akuakéan ka tubumui gege masipaperaki utet ulou sambat telengangá, samba leú et masikalaaké gegedda tai saggak, tápoi beri lamaina kam pasimamatei

²⁰Tápoi kenanen kisé katukuanannia, buí imaangká bagamui kalulut rereddetda nga-ngamui paketsa-ketsat sikataí; tápoi maerú peilé imaangká bagamui, kalulut katususurat onimui ka manua.

²¹Ka tetrenia nenda leú et, magoranangan bagania Jesus, kalulut aisop-sop ka tubunia Ketsat Sipunenan. Oto pusiblanangan leú et, pelé nga-ngania, "Ale Ukkui, Tuhan sikup-kup'aké manua sambat polak! Bulat surá lé kukua ka matam, kalulut anupakele poí sangamberinia néné ka tubudda simaagai samba simasiku paatuat, tápoi anupoiliat lé nia, ka tubudda sigoisó tiboí tubu. Aipoí néné lé siobat bagam, Ukkui

²² Aisegéakéan Ukkui ka kabeiku, sangamberinia néné. Bulat beri te sia sara siagai Toga, sarat Ukkui lé, lepá. Kisedda leú et ka sia Ukkui, beri sia sara siagai nia, sarat Toga lé, lepá, samba ka tubudda siobána Toga ipaagai Ukkui ka tubudda.

²³ Lepá pitsanangan sipasiuluinia Jesus, kuanangan ka matadda saradda, "Bulat mauktuk kam, anuitsóan poí kam apa simatotoilá ka matamui kineneiget

²⁴ Aipoí, bulat maigi sia tai nabi samba tai rimata aitutu бага masiitsó siitsómui ka kam néné kineneiget, tápoi beri itsóra nia. Aitututu bagadda masiarep kelé siarepmui ka kam kineneiget, tápoi bulat beri arepda nia.

²⁵ Lepá ei sara guru paamian masigaba selet tubut Jesus. Kuanangan ka matat Jesus, "Aponia bulat simateú galaiakenenku, bulé ioi kubakkati purimanuiaiat sitaitatátá?

²⁶ Iageti kuanangan ka matania Jesus, "Aponia poi sitususurat ka Buko Sipunenan? Kipa kekeu siripot sipinaatum pagalaiat sikuania sedda?

²⁷ Oto nunuakénangan nia, pelé nga-ngania, "Kau imakaté bagam ka tubut

Tuhan Taikamanuam, bulat tubut sibara ka sangamuinet paatuatnu, samba bulat tubut sibara ka sangamuinet purimanuaiatnu, samba leú et bulat teret sapprut ka tubum, samba bulat teret sapprut siagainu." Iageti mitsá, "Kau leú imakaté bagam ka tubudda saaleinu, kelé katet bagam leú et kekeu ka tubum.

²⁸Oto kuanangan ka matania Jesus, "Sikuam geti bulat apasesengan. Kauan lé nugalaiaké nia, bulé nupurimana.

²⁹Tápoi ka sia siguru paamian, iobá peilé iparoipo tubunia. Lulut néné, kuanangan ka matat Jesus, "Kasonia baí sapunualeiku?

³⁰Oto kuanangan ka matania Jesus, "Ai sara simanteu situgogorosot barania ka Jerusalem, iailiaké laggai Jeriko. Ka tangan enungan, lobbou sipararau-rau, labáranan leú et nia, parakkutranan bibiletnia, samba pabóbokiddangan nia pat malegre matei, lepá kaddiukérangan nia, talagat putatagguilú nia ka enungan, kalulut maujú ka tubunia

³¹Bulat apasese, atusabau sara tai imam sipueenung ka enungan nenda. Tápoi kelé aiitsó nia, soip'akénangan

tubunia ka silat enungan, iageti sabauakénangan nia

³²Oto kisedda leú te ka sia sara tai Lepi sipueenung sedda; kelé aiitsonia, legreakénangan tubunia ilelek'aké nia. Tápoi beri leú ka sia, aisoip'aké leú et tubunia,iei ka silat enungan, lepá sabauakénangan leú et nia

³³Tápoi lepá sabau nia ka sia sedda, sara tai Samaria sieei musaralaggai. Kelé aiitsó nia, suggrunangan nia pukakatet baga

³⁴Iageti legreakénangan tubunia, buinangan matat maujúnia suat anggur, laggeknangan nia tula, lepá appranangan matat maujúnia. Lepá mitsá sakaiakénangan nia ka tei-tei kalideinia, abbitnangan nia ka lalep pugogoiat, oto palaggengingangan nia sedda

³⁵Simatsep, belaakénangan bulagat rua ngaperak iginia, kaunangan nia ka tubut sibakkat pugogoiat, kuanangan ka matania, 'Pasikeli nia. Oto ké ai peilé bayaet bagei, teret toilikkungan lé mitsá sené, bayakkungan nia ka tubum.'

³⁶Iageti kelé ailepáaké itiboi pungu-nguan néné, Jesus, kaunangan sara

panounogat ka tubut guru paamian
néné, pelé nga-ngania, "Kateludda
néné, kasonia siripot sipinaatum kekeu,
oniakenen sipuaalei ka tubut sirau-rau
néné?

³⁷ Oto alegina lé nia siguru paamian
ikua ka matat Jesus, "Sipasirorop'aké
sirau-rau lé." Iageti kuanangan ka
matania Jesus, "Oto kauan, galaiaké
kekeu kelé sigalaiakenennia ka sia!

³⁸ Iageti riu-riuakénangan
puenunganannia Jesus sambat
sipasiuluinia. Lepá segé sia ka sara
laggai. Ka laggai nenda, ai sara sinanalep
sipuoni si Marta. Oto raumanangan Jesus
ka lalepnia

³⁹ Ai bagit Marta sipuoni si Maria. Ka
sia si Maria sarat ka bet-bet Jesus lé
ikukuddu, masiarep'aké ngantomannia

⁴⁰ Tápoi ka sia geti si Marta, bulat
geja lé bagania masipasikeli galajet ka
bagat lalep. Oto taitualat ka bagania si
Marta, einangan leú et ka tubut Jesus,
kuanangan ka matania, "Kipa Tuhan,
nuooreaké kodda ikau aku sarakku
mugalai si Maria? Kuangan peité ka
matania, ioi irop'aké aku!

⁴¹ Iageti kuanangan ka matat Marta, Jesus, "Marta, Marta, apanganté karat bagam; bailiu apabulá nupaatu

⁴² aipoí sarat sara lé besíakenen. Ka sia kai Maria, aipiliyan rubieiat simaerú, beri sia sara sipasiaalá néné ka tubunia."

11 ¹ Ka sara gogoi, amei Jesus maniddou ka sara kudduat. Lepána lé aipaniddou, kuanangan nia sara ka talagat sipasiuluinia ka matat Jesus, "Gelaiaké peité kai ka kai maniddou, Tuhan, kelé igelaiaké sia ka sia sipasiuluinia si Johannes.

² Iageti kuanangan ka matadda sipasiuluinia Jesus, "Ké maniddou kam, néné lé nukukua kam, 'Oi Ukkui, Taikamanua sisasara lé ekeu. Bulé tupaniddogi samba tuabeuaké onim

³ Aké ka kai senen gogoi kanmai siripot igit perluakenenmai

⁴ Appéaké jomai, kelé kuappéaké kai ka kai jodda sangamberi sirimanua sigalai sele ka tubumai. Buí nuobáaké itatá tonem bagamai ka tubum ka tetret ioi pasisiboat ka tubumai.'

⁵ Iageti kuanangan ka matadda sipasiuluinia Jesus, "Ké ai baí sia ka talagamui sieei tengamoi ka lalep

suruaknia masijiu-jiu nia, masikua ka matania, "Ale suruak, aké pei boikí kubale rotim telu ngaaggro

⁶ Aipoí segéna peí ka lalep, aleiku sieei mugejek ka sareunan. Tápoi tá anai tat-tat'akenenku kannia

⁷ Oto ké kisé baí ikua alei nu ka tubum, ai nia ka bagat lalepnia, 'Bá gegejaaké bagakku! Aipoí aian lé kakukuksingan lalep, paobánangan pei bagei, amerep'an kai tatogakku. Oto tá momoi kutusuru kuaké apa pá ka tubum.'

⁸ Iageti kuanangan ka matadda sipasiuluinia, Jesus, "Oto kipangan lé?" "Aku masikua ka matamui, oo bulatnia! Aipoí kenanen ai kam pasusuruak, apanannia te tusuru iaké apa pá ka tubum. Tápoi kalulut taimailam mei samba taipuaari nia nupaniddogi nia, tusurunangan leú et, iaké kiddiyet bagam

⁹ Oto nia té kukukua nia ka matamui: Tiddou kam, tuaaké ka kam; gaba kam, nusesese kam; luu-luu kam, itububukáaké ka kam matatbaliu

¹⁰ Aipoí kasei masitiddou, bara, samba kasei masigaba, sese, iageti kasei masiluu-luu bukáaké ka sia matatbaliu

¹¹ Kipa poi, taleú ai sia ka talagamui saukkui, sipasikakau ulou ka tubut togam, ké itiddou baí ibania

¹² Elé sipasikakau telenga-ngá, ké itiddou baí attelu

¹³ Oto kenanen baí tuoniaké kam sirimanua sikataí paraboat, tápoi nuagai kam masikau simaerú ka tubudda tatogamui. Bulat sarapeite ka sia Ukkuimui sikuddu ka manua! Tá isoppi iaké Ketsatnia ka tubudda sipaniddogi nia!

¹⁴ Ka sara gogoi, ai aiusiaké ketsat sikataí, Jesus ka tubut sara simaoú-óú. Kelé aibela ketsat sikataí ka tubunia, oi aipanibo. Oto maigi sia simakisei ka бага

¹⁵ Tápoi ai leú sia sabagei sipasikukua, "Ka geget Belsebul utéra paketsa-ketsat sikataí lé, iooi ipasiusiaké ketsat sikataí.

¹⁶ Iageti ai leú et sia sabagei siobá masigaba selet tubut Jesus, bulé ioi rajoaké nia. Oto tiddourangan bulé igalai kiseiet, imatonem bagadda kababarana ka Taikamanua

¹⁷ Tápoi ai lé iaagai sipinaatudda Jesus. Iageti kuanangan ka matadda Jesus, "Ké ai baí sara purimataat simararagat sitá

anai pusaraat ka bagania, tápoi sarat paaggra lé ragagalai, tá te matotom purimataat nenda. Kisedda leú et, ké ai sia sangalalep, tá anai pusaraat, sarat pagolú lé baí ragagalai, makakataí lé pulalalepra

¹⁸ Oto kisedda leú te purimataat Sanitu; ké paaggra sia mungkuat sara ka mungkuat sara mitsá, tá leú te matotom purimataatnia. Anukua kam, kalulut geget Belsebul siakéna ka tubukku lé, aioi akuusiaké ketsat sikataí

¹⁹ Oto ké kisedda baí galainia, kasei ka gegengan lé rapasiusiaké ketsat sikataí, ka sia sipasiuluimui? Aipoí sipasiuluimui lé amasipoiliat kababara nia selemui

²⁰ Tápoi kaku geti, ka geget Taikamanua lé, iooi kuusiaké ketsat sikataí, kelé sara toggaiat, tataddaakéna nia Taikamanua murimata ka talagamui

²¹ Ké ai baí sara simaron tubu, sibara sene ngamata pamatei masijago lalepnia, tá malilimai bibiletnia

²² Tápoi ké moi sara sisaliu ron tubunia ilabá nia, samba ipaalaki pamatei karóakenenenenia sibakkat lalep néné, kala nia; oto oi irau-rau bibiletnia, lepá

parubeinangan sangamberi bibiletnia ka sabagei

²³ Kasei sitaipaalei aku, sipasisasaggangi aku lé te nia, samba leú et, kasei sitaiobá masirop'aké aku, sipakataí galajetku lé te nia!

²⁴ "Ké bela ketsat sikataí ka tubut sara sirimanua, ei nia mugejek ka simagarak, masigaba kudduat pasiariatnia tubunia. Tápoi tá isesese. Kalulut néné, kuanangan, 'Kusosok-sok'an lé mitsá ka lalep sikaddiuakenenku siboikí!

²⁵ Oto kelé aisegé sedda, itsónangan lalep sikaddiuakenennia, maliná samba malelek kuddut bibilet ka bagania

²⁶ Iageti tui nia. Lepá abbitnangan mitsá pitu sia ketsat sikataí, sisaliu peilé kopet kataí nia ka sia, tugurúranan mitsá ka tubut sirimanua nenda, iageti kuddu sia sedda. Kalepakatnia, bulat kopé kataínia paraboa sirimanua néné, belé peilé ka siboikí.

²⁷ Kelé ailepáaké ipanibo Jesus, oinangan leú et sara sinanalep masikua ka matat Jesus, pelé nga-ngania, "Bulat mauktuk te nia sinanalep sipasitototoni ekeu!

²⁸Tápoi aikua lé ka matania Jesus, "Tápoi bulat simakopé uktuk geti, iaté sipasiaarep tiboiet Taikamanua samba sipasigagalaiaké sikuania!

²⁹Airapupurut nia sirimanua simigi Jesus, aikukua ka matadda, "Bulat makopé kataínia paraboatda sirimanua kineneiget. Ranáná bulé kugalai kiseiet itsoketda, ibara ramatonem бага ka tubukku. Tápoi bulat tátugagalai beri sara kiseiet itsoketda, sarat kiseiet Nabi Jona lé, lepá

³⁰Kelé aibailiu nia ka sia si Jona kiseiet ka tai Ninipe, kisedda leú te ka sia Togat Manusia néné, bailiu nia kiseiet ka tubudda sirimanua kineneiget

³¹Tususuru te ka gogoi sialu, Rimata Sinanalep sibara ka Kayaman sambadda reddenan néné, iageti joakénangan sia. Aipoí kalulut obána masiarep sikut paatuat Salomo ka sia Rimata Sinanalep néné, besíakénangan musila barania ka tut-tut polak. Tápoi sené kineneiget, ai nia sisaliu beunan tiboí tubut Salomo

³²Tususuru te ka gogoi sialu tai Ninipe sambadda sirimanua reddenan néné, iageti joakérangan sia, kalulut ka sia tai Ninipe, arabauaké paatuatda ka tetret

aipangantoman sia si Jona. Tápoi sené kineneiget, ai nia sisaliu beunan tiboitubut Jona!

³³ Beri poí sia sara lepá itunam alito koiriakénangannia, elé tabbónangan nia bulukbuk. Tápoi ka katusaggaat alito leú et rasasaggaaké nia, bulé raitsó toronia sangamberi situgugurú ka bagat lalep

³⁴ Mata iaté alitot tubu. Oto ké malatsat matam, matoronangan sangaliot tubum. Tápoi ké geti maramun matam, magep-gepnangan leú et sangaliot tubum

³⁵ Oto bulat jago kam, buí ipé pató sikukuddu ka tubum

³⁶ Aipoí ké mapató sangaliot tubum, pat beringan simagep-gepnia, bailiu mapatónangan sangaliot tubum kelé sitoroat alito.

³⁷ Lepá aipungantoman Jesus, sogainangan nia sara tai Pariseiei mukom ka lalepnia. Oto einangan leú et sedda Jesus

³⁸ Tápoi bulat kisei lé ka bagadda tai Parise raitsó ipukom taipuririggo, kalulut masitut ka sikuat surukat

³⁹ Iageti kuanangan ka matadda Jesus, "Kirénangan galai tubumui ka kam

tai Parise sarat tei-tei pulokat samba mangkó lé nububui kam, tápoi ka bagat paatuatmui geti asut'an obat mugege samba pukakataí

⁴⁰ Bulat sitaiagai paatuat lé kam néné! Tápoi Taikamanua amasigalai tei-tei elé bagat pulokat samba mangkó

⁴¹ Siripokatnia sikukuddu ka bagat pulokat samba mangkó nenda lé nupangunguruat'aké kam ka tubudda simagebá. Oto kaenungan néné, bailiu liná sangamberinia kekeu

⁴² Mateimuian te kam tai Parise! Aipoí pasare-sarei, kelé raro, laigá samba leú et pagule-gulei nukakau kam panguruatmui sepersepulu ka Taikamanua. Tápoi masigalaiaké puroipoat samba masipununtuki бага Taikamanua geti, bulat tá maletsei ka bagamui. Oto bulat nenda peité galaiakenen, kenanen tá tujajajak'aké leú tugalai pabage-bagei

⁴³ Mateimuian te kam tai Parise! Aipoí ka kudduatda siabeu tiboí tubu lé, nueei kam muuddet ka uma paniddogat, samba bulat maangká bagamui rahormati kam ka pasar

⁴⁴ Mateimuian tedda! Aipoí kam néné, kelé ratei sitá bukkú oni, elé nisan, sarat rapaperaki lé nia sirimanua taiagaira puraratei nia.

⁴⁵ Lepá ei sara guru paamian ka tubut Jesus masukua ka matania, "Kuarep kai tiboietnu Guru, beri kai leú et ai nupalololoi kai!

⁴⁶ Iageti kuanangan ka matania ka sia, "Mateimuian leú te ka kam tai guru paamian! Aipoí surukat simabesi tugalaiaké lé nutitiddou kam ragalaiaké sirimanua, tápoi bulat beri goisó tá nurorop'aké kam sia, bulé ioi ragalaiaké nia

⁴⁷ Mateimuian te ka kam! Aipó kei nugagalai kam rateira tai nabi, tápoi taiebbukatmui lé amasimateiaké sia

⁴⁸ Oto sené amatoiláan sesesena ka bagamui sigalaiakenenda taiebbukatmui; aipoí kirénangan sia lé aimateiaké tai nabi. Tápoi kam'an ka kam, galaimuian rateira

⁴⁹ Iaté lulunia aibela tiboiet Taikamanua ka sikut paatuatnia masukua, 'Kukokoiniaké te tai nabi samba sapakoinietku; tápoi ai sabagei ramateiaké, ai leú et sabagei rapaoreji!

⁵⁰ Oto aigalaiaké kelé néné geti
Taikamanua, bulé itupaukumi
sia reddenan néné, kalulut
katumamateiakéra sangamberi tai
nabi, barania ka panandaat polak peilé

⁵¹ Iaté, barania aitemateiaké si Abel, pat
aili pasimateiatda si Sakarias, sipuaaili
ka paoggangan kudduat pasibuluat
samba Uman Taikamanua. Bulat kau
imatonem bagamui ka sikuakku néné.
Bulat tá isoppi ratuukum reddenan néné,
kalulut sangamberinia sipuaaili néné

⁵² Mateimuian te ka kam tai guru
paamian! Aipoí aian nia ka kabeimui
aituaké panguksik pasibukat matatbaliu
pasiagai obaket bagat Taikamanua; tápoi
kam ka kam, tá nuobá kam tugurú ka
bagania, masigaba puaagai néné. Iageti
mitsá anukeraaké lé kam sia sibesíaké
tuguru ka bagania!

⁵³ Kelé aitui-tui Jesus sedda,
taddaakérangan nia tai guru paamian
sambat tai Parise mungoí-ngoí бага ka
tubut Jesus. Taddaakérangan rapaiseki
nia, rakiddiy bulé maigi itiboi apa pá ka
matadda

⁵⁴ Oto taikoddangan nia sipulelelek,
ragaba tiboietnia simasele.

12¹ Iageti parurúrangan sirimanua simigi, bulat okkip lepá, pat papeperáan lé sia rere, kopet igidda. Ai sia parururú sirimanua simigi, kuanangan ka matadda sipasiuluinia Jesus, "Suk-suk kam tubumui ka ragidda tai Parise, iaté pagalaiat patajuatda

² Tá poí anai simalipput tá tupatotoilá, ia leú et, tá anai poí keleat tá tupaagai

³ Sitiboimui sinoibó, tupaaarep nia ka sinágó, samba sikasat'akenenmui ka bagat bilí, tupaaarep te nia ka siberikabaga.

⁴ "Repdem kam néné, ale kam sasuruakku! Buí nukalotóaké kam sia simateiaké tubu, tápoi táan momoi ragalaiaké apa pá bagei ka tubumui

⁵ Kukuangan lé nia ka matamui, kasei bulat simateú kalotóakenenmui. Iaté, kau nukalotóaké kam Taikamanua! Aipoí ka sia Taikamanua, lepá ipasimateiaké, ai leú et ka tubunia gege masiribbaiaké kam ka bagat api narako. Oto kau imatonem bagamui; bulat buítá Taikamanua lé nukakalotóaké kam, lepá

⁶ Rua ngasen lé sakin lima ngamuneng pit-pit. Tápoi kenanen kisedda nimpit

sakinia, beri sangamuneng tá ikakalipogi, Taikamanua

⁷ Beringan koí alai ka utémui aiaddengan Taikamanua sangamberinia. Oto buí numalotó kam; aipoí kam peilé makeppu saki ka matat Taikamanua, ka tubut pit-pit!

⁸ "Repdem kam sipulelelek sikuakku néné: Kasei masimuneng'aké pupapasiuluiku nia, ka matadda siberikabaga, muneng'akénangan leú te nia ka sia Togat Manusia ka matadda samalaikat Taikamanua

⁹ Tápoi kasei masipakele pupapasiuluiku nia ka matat siberikabaga, ipakekele leú te nia ka sia Togat Manusia ka matadda samalaikat Taikamanua

¹⁰ Ké rapaisit kuanenda rasaggangi Taikamanua, momoi peilé iappéaké jodda Taikamanua. Tápoi ké Ketsat Sipunenan'an rapaloloi, táan iaappéaké jodda Taikamanua

¹¹ Ké raabbit kam ka uma paniddogat, bulé raadili kam ka matadda sapamarenta, elé ka matadda sauté, buí imakarat bagamui kipa nukukua kam nualegi kam nga-nganda, elé apa simateú tiboakenenmui

¹² Ai leú ipangantru kam Ketsat Sipunenan, ikua kuanenmui ka tetret nenda leú et.

¹³ Ai sara ka talagadda sirimanua simigi amei ka tubut Jesus masukua ka matania, "Ale Guru, kua peité ka matat kebbúku, iaké kaku sangarubeiat bibilet kalimeumai.

¹⁴ Tápoi alegina lé' nia Jesus, ikau ka matania, "Ale saraina, kasei aikau aku bailiu hakim, elé sipasirurubei bibilet ikep'akenenmui karuamui néné?

¹⁵ Lepá kuanangan ka matadda sangamberi siparururú sedda, Jesus, "Pasikeli kam, samba jago kam tubumui, buí imaalau bagamui ka pukayoat. Aipoí tá kalulut pukayoat sipususukkra, rapuririmanua sirimanua.

¹⁶ Iageti tiboinangan ka matadda Jesus sara pasikat, pelé nga-ngania, "Ai sara simakayo, sibara mone simabualet simigi

¹⁷ Iageti paatunangan ka bagat paatuatnia simakayo néné, 'Táan mememet sapou pangoirikat buat siuremanku. Oto kipangan lé pá kupaeerú kineneiget?

¹⁸ Kelé aipaatu nia mitsá, patiboakénangan tubunia sarania,

kuanangan, 'Nen, kiséan lé kupaeerú;
sangamberi sapouku siburú ragatkungan
nia, lepá rióakékungan mitsá sabeu. Oto
sedda te kukokoiriaké sangamberi buat
gandumku, sambat bibiletku bagei

¹⁹Lepá kuakkungan ka tubukku,
Bulat mauktuk ekeu kina tubu!
Anuikip'akéan sangamberinia simaerú.
Táan anai kasappuratnia kannu, pat aili
piga ngarura pá burúnia. Masiariaké
tubungan lé nugagalai kinatubu! Mukom
samba mulóan lé nugagalai, nusegéaké
bagam murimanua!

²⁰Tápoi kuana lé nia Taikamanua ka
tubunia, 'Ale, ekeu sitaiagai paatuat!
Soibó nénéan te numamatei. Oto kaseian
lé masiikep'aké sangamberi pukayoatnu
sirurúakenennu?

²¹Oto kisedda te muaaili ka tubudda
sibesíaké pukayoat sarat puuktungannia
saranja, tápoi tá ibebesíaké mukayo ka
matat Taikamanua.

²²Iageti kuanangan ka matat
sipasiuluinia Jesus, "Iaté lulunia kukukua
nia ka matamui, 'Buí imakarat bagamui
ka purimanuaiatmui, masipaatu,
apangan lé nukokom kam, elé apangan
lé bibilet pakeietmui.

²³ Aipoí engá peilé mateú tupasikeli, ka komen. Elé tubu peilé mateú tupasikeli, ka bibilet

²⁴ Igbuk peité kam puririmanuan kaileá! Taipangu-ngurep, taipasimomonei buat siureman, tá anai gudang elé sapounia. Tápoi aipasisikeli sia Taikamanua! Tá poi kam peilé makeppu saki ka tubut umá

²⁵ Kasei poi ka talagamui néné, kalulut karat bagania ka purimanuaiatnia, oi ituppaiaké goisó nantat purimanuaiatnia

²⁶ Oto ké beringan pagoisokatnia tá momoi nugagalaiaké kam, apangan lé lulunia imakakarát bagamui ka pabage-bagei

²⁷ Igbuk peité kam iputútú ka sia ogó kainaú; taipugagalai lé nia, tá ai nia masibibibli komang. Tápoi beringan Rimata Salomo oniakenen simakayo, tá abara leppeinia kelé laingen ogó néné

²⁸ Ka sia poí papuo-puo ka mone, tú-tú kineneiget, tápoi matsepnia lé, labó, pí. Tápoi kenanen kisé ai leú ipalalainge nia Taikamanua. Oto sarapeite kam néné! Tápoi magugulai peilé tonem bagamui ka tubut Taikamanua

²⁹ Oto buían imakarat bagamui elé ipaingo kam masipaatu apangan lé komenmai, elé apangan lé lómai

³⁰ Pagalaiat kelé néné geti, kelé bulungenda sipuarat sabulungan lé. Aipoí, ai lé iaagai Taikamanua sangamberi simagulai ka kam

³¹ Tápoi besíaké lé kam ipurimata Taikamanua ka tubumui, iapeité tuppaiakénangan apa pá bagei simagulai ka kam Taikamanua.

³² "Kam mungkuat sigoisó, buí numalotó kam! Matarek poí Ukkuimui masiaké ka kam panukanan sibara ka Purimataatnia

³³ Sakiaké kam bibiletmui; iageti bulagat sakit bibiletmui nenda, parubeimuian nia ka simagebá. Galai kam dompetmui sitaimamúmuket, iaté pukayoat sikoirí ka manua. Pukayoat néné, sitaioi ratakkou sipananakkou, samba tá ipakakataí nia tabbubulut

³⁴ Aipoí kaipa ikuddu pukayoatmui, sedda leú te ieei paatuatmui!

³⁵ "Kau imatarek tubumui ké bara apa pá sibabara! Samba kau imariu-riu ituakkik tengamui samba iputoro alitomui

³⁶ iului kelé sapagugulet sipasingengena itoili tuanda barana ka punen putalimogat. Kelé itoili situan, luu-luuna lé matatbaliu, bukáakérangan nia

³⁷ Bulat mauktuk te sia sapagugulet, ké iaili sia airangengenaaké tubudda itoili tuanda. Kukuania ka matamui: tá isoppi ipatarek tubunia si tuan, samba ikua ka matadda sapagugulet rapuuddet, iageti kaunangan kanda

³⁸ Bulat mauktuk te sia sapagugulet, ké iaili sia tuanda ai sia matatarek masingena itoili, kenanen elé tengamoi itoili, elé maburú peilé

³⁹ Repdem kam sikuakku néné! Ké ai baí iaagai sibakkat lalep, pigamoi raooi sipananakkou ka lalepnia, tá isoppi ijago nia sipulelelek, bulé tá moi raguruki lalepnia

⁴⁰ Oto kam ka kam leú et, buítá matarek tubumui, aipoí ka taibabagaiet bagamui lé, ioi ka sia Togat Manusia.

⁴¹ Iageti isénangan Jesus si Petrus, pelé nga-ngania, "Kaipa Tuhan nuorak'aké ngantomannu néné, ka tubumai, elé ka tubudda sangamberi sirimanua?

⁴² Iageti kuanangan ka matania si Tuhan, "Kasei pagugulet simatopit samba

simasiku paatuat, pat rióakénangan nia
si tuannia bailiu utéra sapaguguletnia
sabagei, bulé ikau kanda ké iipó tetret
pukoman

⁴³ Bulat mauktuk te nia pagugulet,
toilina lé tuannia, ailinangan nia
aigagalaiaké galajetnia

⁴⁴ Bulatnia kukua ka matamui: Tá isoppi
isegéaké sangamberi bibiletania ka tubut
pagugulet néné ipasikeli nia

⁴⁵ Tápoi ké ikua lé ka paatuatnia
pagugulet néné, 'Ah, maburú peilé
itoili tuanku,' oto pabóbokinangan
sia sangamberi pagugulet; iageti
pukomnangan samba pulónangan leú et,
pat puineng

⁴⁶ Kataibabagaiet bagania, lotsit-
itulotsit tuannia. Oto patoddojinangan
nia pagugulet néné si tuannia,
kaunangan ka tubunia ukuman kelé
ukumanda sitaimareddet ka nga-ngan
Taikamanua

⁴⁷ Aipoí bulat toddojet sikataí besí
geti, iaté sia sapagugulet, kenanen
airaaagai siobat bagat tuanda, tápoi tá
ragagalaiaké

⁴⁸ Tápoi pagugulet sitaiagai siobat
bagat tuannia geti, kenanen igalaiaké

sitaipasesese, kuanen simateúan itupatoddoji, bailiu tulungan lé itutoddoi nia goisó, lepá. Aipoí kasei ka tubu isegéaké Taikamanua maigi galajet puukuket, ka tubunia leú te maigi ititiddou Taikamanua, buat sigalaiakenennia. Ialeú et kasei irióaké Taikamanua bulat katonemietnia бага masipasikeli galajetnia, ka tubunia leú te makopé itiddou Taikamanua buat sigalaiakenennia.

⁴⁹ "Kaooiku néné geti, masirusui api ka polak lé. Oto bulat akukiddiyan bulé ipujuluu api néné

⁵⁰ Aipoí maigi peilé pangoringan sikataí besí bairanenku. Bulat tápei masasanang aku ké tápei muaili néné ka tubukku

⁵¹ Bulat ka bagamui lé te masiaké paabanan ka polak akuoi? Tá, tá paabanan, tápoi pasaggangan lé

⁵² Oto barania kineneiget, ké ai baí sia lima igidda ka bagat sangalalep? tá isoppi rapasaggak katubu; rubeirangan tubudda, telu masisaggangi sia sirua; iageti mitsá, sia sirua masisaggangi sitelu

⁵³ Ukkui masisaggangi tatogania simanteu, ialeú et tatoga taimanteu

masisaggangi ukkuira. Kisedda leú et ka sia ina, masisaggangi tatogania tainanalep, ialeú et tatoga tainanalep, masisaggangi inanda. Ina talikuet masisaggangi talikunia sinanalep, ialeú' et ka sia taliku sinanalep, masisaggangi ina talikuet nia.

⁵⁴ Iageti kuanangan ka matadda sirimanua simigi, Jesus, "Ké nuitsó kam ipangaraí tinobut manua ipot ka kabelekat sulu, kuamuian, 'Bebelé lé te urat.' Bulatnia, bebelé urat

⁵⁵ Ké iagai tubumui ipuboroi rusa sibara ka kayaman, kuamuian, 'Malelegeu te manua.' Bulatnia malelegeu manua

⁵⁶ Bulat kam néné sipatataju lé kam! Bulat nuagai kam masipatup-tup toggaiat sibabara ka manua samba ka polak. Lepá tá koí nuagai kam masipatup-tup toggaiat pagalaiat sibabara kineneiget?

⁵⁷ "Angoi tá nuteteúaké kam mugalai simaroipo, ké aikukua ka bagamui sesesena nia sipinaatumui

⁵⁸ Ké ai sia sigelai masinganduaké kam ka pengadilan, olaaké nuei nupaseseaké nia ka enungan, bulé, ai peilé kam mueenung, lepá nupatiboji

kam paukelatmui. Aipoí ké tá kisedda nugalai kam, abbitnangan leú et kam ka tai hakim, iageti taihakim'an ka sia, taroakérangan kam ka kabeira tai polisi. Oto ka sia tai polisi, gurúakérangan kam ka bagat penjara

⁵⁹ Oto repdem kam sikuakku néné! Bulat táan te bebela kam ka bagat penjara burú, teret kapplu nia nutebui kam utakmui."

13 ¹ Ka tetret nenda, ei sia masitiboi ka matat Jesus mamateiakéna piga pá sia tai Galilea, si Pilatus, ka tetret ai sia masibubuluaké pusurakatda ka Taikamanua

² Oto aleginangan sikuadda néné Jesus, pelé nga-ngania, "Kalulut kamamateira kelé néné ka sia tai Galilea, kuamuian sia peilé mabeunan jo ka tubudda sangamberi tai Galilea sabagei

³ Oto tá nia nenda lulunia! Tápoi repdem kam: ké tá nubauaké kam paatuatmui ka kam ka jomui, tá leú te isosoppi numamatei kam, ka kam, kelé ka sia

⁴ Elé, kipa poi ka sia sipulubalu sinaksak tutut ngono-ngonong ka Siloam? Bulat ka bagamui lé pá aibara ka tubudda kelé néné, iaté sara toggaiat masikua,

sia néné peilé makopé jo ka tubudda sabagei ka Jerusalem

⁵Tá nia nenda lulunia! Bulat kukua nia mitsá ka matamui: Ké tá nubauaké kam paatuatmui ka kam ka jomui, tá isoppi leú te numatei kam, ka kam, kelé ka sia.

⁶Lepá tiboinangan leú et pasikat néné, Jesus, pelé nga-ngania, "Ai sara sibara sileu ka monen anggurnia. Ka sara gogoi ei nia masigaba buat sileu néné, tápoi bulat tá aisease mandé sangambé buania

⁷Oto kuanangan ka matat sipuukú monenia, 'Bulat aiailingan telu ngarura burúnia kuoi masigaba buat sileu néné, tápoi beri sangambé tá abara. Oto taddengan lé! Sarat masipapotponi kan siureman bagei lé igagalai!

⁸Tápoi kuanangan sipasijajago mone ka matat tuan, 'Eddangan nia ikuddu boikí, tá itsóaké nia, ka bagat sangarura, Tuan. Ai leú kupakkru boikí bakkatnia, pat bokkó, lepá kaukungan pupúnia

⁹Baleú ka rura ka mata, pubuanangan. Tá geti mubua, iapeité nukua kutadde nia.'

¹⁰Iageti, amei nia Jesus ka gogoi Sabbath, mungantoman ka uma paniddogatda tai Jahudi

¹¹ Sedda, ai sara saina simabesí. Pulu balu ngarurangan burúnia aimabesí, kalulut aisop-sop ka tubunia ketsat sikataí. Amakou-kouan tei-teinia ina néné, pat táan momoi irióaké tubunia

¹² Kelé aiitsó nia Jesus, kuanangan ka matania, "Abelangan ekeu ka pangoringannu ina!

¹³ Iageti rapenangan tei-teinia ina néné Jesus. Oto niangan leú et nia, oi airióaké tubunia. Iageti umun'akénangan Taikamanua

¹⁴ Oto pugolúnangan leú et sipanei-nei paamian, kalulut aaleakéna simabesí, Jesus, ipot gogoi Sabbath. Iageti kuanangan ka matadda siparururú sedda, "Ai enem ngagogoi pugalaiat; gogoi nenda te nuooi kam itualeaké kam, báan leú ooi kam ipot gogoi Sabbath!

¹⁵ Tápoi kuana lé nia Jesus, ka matadda, "Bulat sirimanua sipatataju lé kam néné! Kipa tápoi ainubebelaaké kam jauimui sambat kalideimui ka geli, ipot gogoi Sabbath, nukau kam lónia

¹⁶ Sené kineneiget, ai sara punuteteu Abraham, aiailingan pulu balu ngarura burúnia aipaorei nia sanitu, tá pá mateú turugut kakab'enia ka gogoi Sabbath?

¹⁷ Oto bulat amailangan sia lawan Jesus, araarep alegiat Jesus néné; tápoi sangamberidda sabagei, bulat mangká bagadda masiitsó sangamberi kerek sigalai Jesus néné

¹⁸ Iageti nou-nounangan sia Jesus, pelé nga-ngania, "Ka tubut apa tupakikiréaké nia Purimataat Taikamanua

¹⁹ Pagalaiat Purimataat Taikamanua geti, tupakeréaké lé nia kelé, ka sara ngambet ubé, sialat sara sirimanua, lepá karap'akénangan nia ka monenia. Iageti putútúnangan ngambet ubé néné, pat puloinánangan leú et. Lepá einangan leú et umá, murumun ka rannia.

²⁰ Iageti nou-nounangan sia mitsá Jesus, kuanangan ka matadda, "Kaipa kupakikiréaké nia Purimataat Taikamanua néné

²¹ Galai Purimataat Taikamanua geti, makeré lé nia ka sara ragi, sialat sara sinanalep, lepá mui-muinangan nia ka siepat ngapulu ngaliter tapung, pat pugónangan sangamberinia.

²² Ka puenunganannia Jesus iailiaké Jerusalem, aisabau leú palagga-laggai sabeu samba palagga-laggai sigoisó;

samba ai leú nia mungangantoman
sedda

²³ Oto ai sia sipasikukua ka matania,
"Kipa Ukkui, taleú goisó lé sia masisisiló
puaragat?

²⁴ Iageti kuanangan nia Jesus,
"Besíaké kam nuguruki kam matatbaliu
simaropdop. Aipoí né lé repdemenmui!
Bulat maigi sia sigelai tugurú ka bagania,
tápoi tá momoi

²⁵ Kelé aitusuru sibakkat lalep ipat-
pat'aké matatbaliu, puriómuian ka gerat
masiluu-luu, kuamuian, 'Ale Tuan, buká
kai!' Tápoi alegina lé nia si Tuan, 'Tá
kuagai kam!

²⁶ Alegimuian nia ka kam, 'Amukom'an
sita sambatta, Tuan, samba
amungantoman'an ekeu ka enungan
laggaimai.

²⁷ Tápoi belan nga-ngania lé mitsá ka
sia si Tuan, 'Tá kuagai kam. Katui-tui
kam sené, kam sigalai jo!

²⁸ Ké nuitsó kam ipuangká бага si
Abraham samba si Isak samba leú et
si Jakob ka Laggai Taikamanua Sibau,
pusoumuian, samba pangorikmuian,
aipoí arabelaaké lé kam ka kam ka gerat

²⁹ Sia sibabara ka kabelaiat sulu samba sibabara ka kabelekat sulu, elé sibabara ka baré samba ka kayaman lé muaangká бага ka Laggai Taikamanua Sibau

³⁰ Sibulatnia, ai sia sikatei-tei bailiu siboikí, iageti siboikí bailiu sikatei-tei.

³¹ Ka tetret nenda leú et, ai sia piga pá tai Parise amei masiailiaké Jesus, kuaddangan ka matania, "Buí nukuddu sené! Kenan ka kudduat bagei, aipoí iisiaké imateiaké ekeu si Herodes.

³² Tápoi kuana lé nia ka matadda, "Kenan kam ka tubut sirimanua sitá katupunan nenda, nukua kam ka matania, 'Gogoi néné samba matsep, masiusiaké ketsat sikataí samba masialeaké simabesí lé kugagalai, tápoi ka gogoi sikatelunia geti, lepáakékungan galajetku.

³³ Tápoi kenanen kisedda galainia, buítá kuriu-riuaké puenungananku kineneiget, matsep, sambat matsepnia mitsá, aipoí tá maerú tumateiaké sara nabi ké tá ka Jerusalem

³⁴ Jerusalem, Jerusalem! Sipasimamateiaké tai nabi! Sapakoiniet Taikamanua, pabaijungimuian sia bukkú pat matei! Piga ngamitsáan pá kugelai

kukup-kup'aké sangamberi tatogam,
kelé ikepkemi tokania goú-goú, tápoi tá
anuobá kam

³⁵Oto táan te ipaaalei kam Taikamanua.
Bulé nuagai kam nia, bulat barania
kineneiget, táan te nuiitsó kam matakku,
teret kuamui, 'Tupanunukani te nia siooi
ka onin Tuhan.'"

14 ¹Ka sara gogoi, iaté ka gogoi
Sabbat, amei nia Jesus mukom
ka lalep sara siabeu tiboí tubu ka tai
Parise. Oto sedda bulat makopé rataiko
nia Jesus

²Iageti oinangan leú et sara sipasioorik
besit got tubu. Rere sambat kabeinia
bulat apagoó

³Oto nou-nounangan sia Jesus tai guru
paamian sambat tai Parise siparururú
sedda, pelé nga-ngania, "Siripot ka
surukatta, momoi leú pá itualeaké
simabesí ipot gogoi Sabbat, elé, tá?

⁴Tápoi ka sia tai guru paamian sambat
tai Parise, tenan lé sia meng. Oto
sogainangan nia Jesus simabesí néné,
aleakénangan nia, lepá kuanangan ka
matania itui-tui

⁵Iageti kuanangan ka matadda
siparururú sedda, "Ké ai baí sara ka

talagamui sibebele tatoga, ele jai ka
bagat sumur ipot gogoi Sabbath, ta pa
ioolaake masitik-tik toga ele jai sibebele
nenda ka gogoi nenda leu et?

⁶Tapai bulat ta amoi aratepaake
ngungunda masialegi nga-ngan Jesus

⁷Kele aiitsó ai sia tairauma sioba
muuddet ka kudduat simakope
eru, pangantomannangan leu et sia
sangamberidda, Jesus, kuanangan

⁸"Ke rasogai kam ka punen
putalimogat, bui npuuddet kam
ka uddenanda siabeu tibo tubu. Aipo
tapei tagai baleu ai peile sia sabagei
simabuak tibo tubu arasogai mupunen

⁹Babara momoi nia sibakkat lalep
sipasisosogai kam ruamui, ka sanet
paatuat ikua ka matamui, 'Bojoian le
boiki ale, kudduat sikuddujim nene, ka
tairauma nenda le aitutarek'ake.' Oto
bulat aila ekeu simakope nuei mukuddu
ka tei-tei

¹⁰Oto ke rasogai kam ka punen, gaba
kam kudduat bulat ka tei-tei, bele isogai
ekeu sibakkat lalep, masikua ka matam,
'Ale saraina, sené le konan ka uddenan
simaeru.' Bailiu tuabeuake kam ka matat
sirimanua simigi

¹¹ Aipoí senen sibuaak'aké tubunia, tuparerepé lé sia, tápoi siparepé tubunia geti, tububuak'aké lé sia.

¹² Iageti kuanangan ka matat sibakkat lalep Jesus, "Ké nusogai sirimanua mukom ka punen sinágó pá elé sinoibó, buí nusogai saaleinu elé sasarinam, elé saeppum, samba pabébéakenennu lalep simakayo. Aipoí tá isoppi rasogai ekeu kekeu; oto anusilóan mitsá silit sigalaiakenennu ka tubudda

¹³ Tápoi, ké nubaraaké punen, sogai sia simagebá, simakataí tubu, simasakit samba simapeset mata

¹⁴ Tá isoppi ipanukani ekeu Taikamanua, aipoí tá momoi rasiliaké nia sigalainu simaerú ka tubudda. Oto siliakénangan nia Taikamanua sigalainu simaerú néné, ka katusuruatda mitsá sirimanua simaerú paraboat.

¹⁵ Kelé aiarep nia sara sipaaleiaké nia mukom sikuat Jesus néné, kuanangan, "Bulat mauktuk te sia sinogai mei pataddé mukom ka tubut Taikamanua ka Purimataat Taikamanua!

¹⁶ Iageti kuanangan ka matania Jesus, "Ka sara gogoi, ai sara sipasibabaraaké

punen sabeu, sogainangan maigi sirimanua

¹⁷ Kei tutaddaaké punen, koiniakénangan sapaguguletnia raei masisogai sinogainia mupunen, masikua ka matadda, 'Konan'an kam amatarek'an sangamberinia!

¹⁸ Tápoi sangamberidda néné, kasei oi masikua, bojoían lé boikí. Siboikí ka sia aikua ka matat pagugulet, 'Simaruei peilé akusaki sangamata mone, buítá mei lé aku masiitsó. Oto bojoían lé boikí.

¹⁹ Sabagei ka sia arakua, 'Simaruei peilé akusaki lima ngapasang jaui pasipakkru mone. Oto buítá mei aku kusibo nia ka mone. Bojoían lé boikí.

²⁰ Iageti sabagei mitsá ka sia arakua, 'Simaruei peilé akuputalimou, oto tá momoi kuoi.

²¹ Iageti toili nia pagugulet, segéakénangan taiooira, ka matat tuannia. Oto pugolúnangan simakopé si tuan, kuanangan ka matat paguguletnia, 'Olaaké nuei ka enungan samba ka senen elak laggai sabeu. Abbit sia sené simagebá, simakataí tubu, simapeset mata sambat simasakit.

²² Lepá kuanangan ka matat tuan, pagugulet néné, 'Akugalaiakéan kai sikuam, tápoi maigi peilé kudduat sitá kabaga.

²³ Iageti kuanangan ka matadda, si tuan, 'Oto kenan lé kam ka enungan sabeu sambat ka enungan sigoisó ka laggai bagei, náná kam sia raoi, bulé isut lalepku

²⁴ Bulé nuagai kam nia! Bulat beri te sia sara tairauma sinogaiku nenda, masinananam kan punenku néné!'

²⁵ Bulat maigi sia amei masitut Jesus. Lulut néné, pitsanangan sia Jesus, kuanangan ka matadda

²⁶ "Ké ka tubudda sainanda, saukkuira, tainanalepra, tatogadda, sasarainanda, elé ka tubunia peilé makaté bagania, belé peilé aku, tá momoi ibailiu nia sipasiuluiku

²⁷ Sitaibobá masibairat loiná siliktengania, raoi masitut aku, tá momoi ibailiu nia sipasiuluiku

²⁸ Ké ai baí sia ka talagamui sipupaatuat masirióaké sara menara, buítá mukuddu nia boikí, masiadde nuntut sakinia, bulé iagai metnangan leú pá igit bulagatnia

masilepáaké menara néné, elé tápei
iaaili

²⁹ Aipoí ké tá moi ilepáaké nia, tápoi
bukú pundasi alepáan aitugalai, tá
isoppi ragágati nia sangamberi sipasiitsó
tailelepá nia

³⁰ Tá isoppi rakua nia, 'Pegi, pasigagalai
geti, táan buu, tápoi siboboi, tá lelepá!

³¹ Ké ai sara rimata sibara tentera
pulu ngaribu sia igidda, tápoi aigegelai
masisaggangi sara rimata sibara tentera
rua ngapulu ngaribu sia igidda, tá
isoppi ikuddu boikí masipaatu ka bagat
paatuatnia, metnangan leú pá ronnia
masilawan saggaknia néné, elé tápei

³² Ké iagai taiooinia ilawan nia, bulat
ai peilé sia mare-reunan tai saggaknia,
aikoiniakéan sia sapaguguletnia
masitiddou bulé paaban'an lé sia.

³³ Oto kalepakatnia, kuanangan ka
matadda Jesus, "Kisedda leú te ka
kam. Bulat beri sia sara ka talagamui
ibabailiu sipasiuluiku, ké tá ikaddiuaké
sangamberi sibabara ka tubunia.

³⁴ "Maerú lé ka sia garap, tápoi ké
maleu baí nia, momoi peilé pá itukalóaké
nia mitsá

³⁵Táan anai katukaunannia, elé itukau nia puput mone pá. Tápoi turiribbaiakéan lé nia. Kasei simaarep piú, arep'akénangan nia!"

15 ¹Ka sara gogoi maigi sia sipuukú pajá samba sia oniakenen siberikabaga sikataí paraboat, amei masiarep'aké ngantoman Jesus

²Kalulut néné pungúngukiddangan nia tai Parise sambat tai guru paamian. Pelé nga-nganda ka tubunia, "Bulat isisiló lé bagei sia sirimanua sikataí paraboat; sarapei bagei amukom sia sambadda!

³Oto kalulut néné, tiboinangan ka matadda Jesus, pasikat néné

⁴"Ké ai baí sia ka talagamui sibara sangotu ngamuneng biri-biri, lepá limai sangamuneng, kipa ipaeerú? Tá isoppi ikaddiuaké biri-biri sisiba ngapulu siba ngamuneng ka simatangeu, iei masigaba simalilimai teret sesena nia

⁵Ké aisesengan baí biri-birinia simalilimai, bulat simakopé angkat bagania lé, pat bairatnangan nia

⁶iageti toiliakénangan nia. Lepá einangan leú et masisogai saaleinia sambat pabébéakenennia lalep, pelé nga-ngania ka tubudda, 'Kau tapuangká

kam baga sambatta, aipoí akusesengan mitsá biri-birikku, simalilimai!

⁷Oto kisedda leú te ka manua, bulat puangkakat baga sabeu, kalulut katubabau nia paatuat sara sirimanua, belé peilé ka sia sisiba ngapulu siba, simaroipo baga, aipoí táan leú maperlu rabauaké paatuatda.

⁸"Elé ké ai baí sara sinanalep sibara bulagat pulu ngaperak iginia, lepá limai sangaperak, kipa ipaeerú? Tá isoppi itunam alito, lepá sabuínangan bagat lalep, masigaba ka senen kudduat, teret sesena nia

⁹Kelé aisese nia bulagat simalilimai nenda, sogainangan saaleinia sambat pabébéakenennia lalep, pelé nga-ngania ka tubudda, 'Bulat simakopé angkat bagakku lé, akusesese nia mitsá bulagatku simalilimai. Oto konan kam tapuangká kam baga!

¹⁰Kukua ka matam! Kisedda te kopet angkat bagadda ka sia samalaika ké bara sara sirimanua sibauaké paatuatna.

¹¹Iageti kuanangan nia mitsá Jesus ka matadda, "Ai sara ukkui sibara rua tatoga simanteu

¹² Oto kuanangan ka sia toganía sisulé,
ka matat ukkuinia, 'Akéan lé kaku
kineneiget, bibiletta sipuoni rubeiatku
kaku, Ukkui.' Iageti rubeinangan
pukayoatnia ka ruadda tatogania néné

¹³ Piga ngagogoi pá burúnia,
pasakinangan nia bibilet rubeiatnia
ka sia, lepá tui-tui nia ka laggai
simareunan. Sedda pasapprunangan
bulagatnia, musitá galai

¹⁴ Kasappurat bulagatnia, aiipó
aibara pulajeat ka laggai nenda, oto
taddaakénangan iorik pulalaje

¹⁵ Iageti einangan leú et mugalai
ka tubut sara taikalaggaiat sedda,
sipasikokoiniaké nia ka mone masijago
sakkoilónia

¹⁶ Oto kopet lajenia, repdemnangan
masikom kan sakkoiló bulé imaektek.
Tápoi kenanen kipa kopet lajenia, beri
sia sara sikau kannia

¹⁷ Kalepakatnia, bara olei bagania,
kuanangan, 'Kapei ka sia sipugagalai ka
ukkuiku, sipususukkra lé kanda, tápoi
aku geti kaku sené mamateian lé aku
laje

¹⁸ Oto totoilingan lé aku, kuei ka
ukkuiku, kukua ka matania: Amajongan

aku Ukkui, ka tubut Taikamanua sambat ka tubum

¹⁹Táan mateú tuoniaké aku togam. Addeakéan lé aku kelé paguguletnu, Ukkui.

²⁰Iageti tolinangan leú et ka ukkuinia. Tápoi areu peilé nia ka lalep, aiitsóan nia ukkuinia. Oto ka sou bagania, pabalaunangan leú et ukkuinia, iailiaké toganian. Kelé aiali nia, lakkaiakénangan leú et nia, lepá sigguknangan nia

²¹Iageti kuanangan ka matat ukkuinia toga néné, 'Amajongan aku Ukkui, ka tubut Taikamanua sambat ka tubum. Táan mateú nuaddeaké aku togam.

²²Oto sogainangan sapaguguletnia Ukkui néné, kuanangan ka matadda, 'Olaaké nuei! Nualá leppei simakopé erú, lepá buluk'akénungan nia ka tubunia. Lepá mitsá usuakénungan sip-sip ka singongaínia, samba kaunungan sipatunia

²³Lepá jájámuian ibatta togat jaui simamómó. Tapukom kam samba tapuanká kam бага

²⁴Aipoí amateian nia togakku néné, tápoi kineneiget amurimanuangan nia mitsá; amalimaian nia, tápoi

kineneiget atusesengan nia mitsá.' Iageti taddaakérangan nia mupunen

²⁵ Ka tetret nenda, ka sia toganía sikebbukat, ai nia ka mone. Oto kelé aitoili, iaailingan lé lalep, arepnangan nga-ngan pipiau samba nga-ngan turú

²⁶ Iageti sogainangan sara paguguletnia, nou-nounangan sia pelé nga-ngania ka tubudda, 'Aponia sibabara ka lalep?

²⁷ Aletinangan nia pagugulet, 'Atoilingan nia bagim! Oto koiniakénangan sia ukkuinu, Tuan, rajájá togat jaui simamómó, aipoí aisesengan nia mitsá toganía ka ron tubu!

²⁸ Oto pugolúnangan leú et toganía sikebbukat néné, pat taiobánangan tugurú ka bagat lalep. Iageti belanangan leú et ukkuinia, nánánangan nia, itugurú ka bagat lalep

²⁹ Tápoi kuana lé nia ka matat ukkuinia, 'Bulat táan tagai burúnia kumomoaké tubukku mugalai, Ukkui, samba bulat beri siddotku sikuam. Aponiangan anuaké kaku? Beringan sangamuneng kambing tápei anuaké kaku, bulé ioi kupuangká kai бага saaleiku

³⁰ Kelé aitoili togam sipasappru pukayoatnu ka tainanalep simaolop tubu, bulat tá amauju anujájá ibania, togat jaui simamómó!

³¹ Iageti kuanangan ka matania ukkuinia, 'Sirou, kekeu, mariu-riu lé nukuddu sené ka tubukku. Oto sangamberi pukayoatku, ekeu leú et sibakkat nia

³² Oto mateú lé tapupunen samba tapuangká kam бага, aipoí amateian nia bagim, tápoi kineneiget, amurimanuangan nia mitsá; amalimaian nia, tápoi kineneiget atusesengan nia mitsá."

16 ¹ Iageti kuanangan ka matadda sipasiuluinia Jesus, "Ai sara simakayo, sibara bendahara sipasikeli pukayoatnia. Lepá bara panganduatra ka tubut simakayo néné, masikua palilimaina bulagat si bendahara néné ka sitá galai

² Oto sogainangan nia sibendahara néné, kuanangan ka matania, 'Aponia néné siarepku pagalaiat tubum? Kineneiget aké ka tubukku sangamberinia pangandeatnu nupasikeli

pukayoatku. Táan momoi ibailiu ekeu mitsá bendaharakku.

³Iageti paatunangan nia si bendahara néné, kuanangan, 'Kipangan lé pá kugagalai kineneiget? Aian lé igegelai iariaké aku si tuan. Mamakkru, tá maron tubukku; patiddo-tiddou, maila aku

⁴Nen, akusesengan paatuat; oto ké iariakéan baí aku si tuan, buítá kubesiaké ramaigi saaleiku sipasinanappit aku ka lalepra!

⁵Oto sogainangan sia si bendahara sangamberi sipuuutak ka tubut tuannia. Aikua ka tubut siooi boikí, 'Piga nuntu utaknu ka tubut tuanku?

⁶Iageti kuanangan nia, 'Ai sangotu ngatappaiaiat tula.' Oto kuanangan ka matania si bendahara, 'Aikoíné surat utaknu. Uddet'aké ekeu, pelé ola nusurat'aké: lima ngapulungan lé.

⁷Lepá kuanangan ka tubut siooi sikarua, 'Kekeu, Saraina, piga nuntu utaknu?' Aletinangan nia, 'Sangaribu ngagoni gandum.' Oto kuanangan ka matania si bendahara, 'Aikoíné surat utaknu. Surat'akéan lé balu ngotu ngagoni.

⁸ Oto umunnangan nia si majikan, bendahara sitaimaroipo néné, kalulut againa pagalai; aipoí taikapolak peilé maagai masipagaba enung'akenenda, belé peilé sia tatogat pupatokat.

⁹ Lepá kuanangan nia mitsá Jesus, "Arep'aké kam sikuakku néné! Pakei kam pukayoat polak néné pasigabamui saalei, bulé ké táan anai katukaunan nia mitsá bulagat néné, silórgan kam ka kudduat simatom

¹⁰ Ké atukatonemangan nia бага ka puukuket sigoisó, tukakatonemi leú te nia бага ka puukuket sabeu. Tápoi ké tá tukatonemi nia бага ka puukuket sigoisó, tá leú te tukakatonemi nia бага ka puukuket sabeu

¹¹ Oto ké beringan ka puukuket pukayoat polak néné, táan atukatonemi kam бага, kaseian lé ikakatonemi kam бага ka puukuket pukayoat ketsat

¹² Ialeú et, ké beringan ka bibiletta sabagei, táan atukatonemi kam бага, kaseian lé masiaaké ka tubumui ikep'akenenmui

¹³ Bulat tá te momoi ragalai galajetda, ké murua tuanda; aipoí tá isoppi ka tubut sisara peilé makaté bagania, belé peilé

ka sisara, elé ka tubut majikan sisara peilé matopit nia belé peilé ka sisara. Oto kisedda leú te kam ka kam. Tá momoi nupalopru kam ruania galajet; iaté galajet Taikamanua samba pukayoat.

¹⁴Iageti kelé araarep nia sikuat Jesus tai Parise, gagatiddangan leú et nia, ai lé poí iaagai bagadda, alau bagadda ka bulagat

¹⁵Oto kuanangan ka matadda Jesus, "Kam te néné, ka matat sirimanua, ituitsó kam, bulat kéan lé simatopit, tápoi ai lé iaagai bagat pupaaturanmui Taikamanua. Aipoí oniakenenda sirimanua simabuak, marepé lé sia ka matat Taikamanua

¹⁶Surukat siaket Mose samba nganturatda tai nabi, riu-riu lé ituenung'aké, pat aili ka tetrenia si Johannes Sipasiraraú. Ka tetret nenda leú et Katuareman Simaerú pagalaiat Purimataat Taikamanua, riu-riu leú itupaarep. Oto bulat siagai kabagangan lé rabesíaké ibailiu sia paamian Taikamanua

¹⁷Oto manua samba polak peilé malabbei tatá, tá ituenung'aké sara takat surat Surukat Taikamanua

¹⁸ Kasei sigalak sinanalepnia, lepá putalimounangan mitsá ka tainanalep bagei, sipaeet lé nia. Ialeú et sipalalep'aké sinanalep sigalak, sipaeet leú et nia ka sia.

¹⁹ "Ai sara simakayo. Bulat sarat simakeppu saki lé leppeinia. Bulat sipususukra lé kannia senen gogoi

²⁰ Iageti ai aragalak'aké sara simagebá ka bet-bet matatbaliu lalepnia, iaté sipuoni si Latsarus. Bulat salú lé ka tubunia lubbé

²¹ Aiuukat ikom porat kan sibebelé ka tei mejat simakayo néné. Tápoi jó-jó lé amei masibolot suat lubbénia

²² Oto lepá langónangan nia simagebá néné. Iageti abbitrangan nia samalaika ka manua, ka kudduat simaerú, ka kup-kup Abraham. Ka sia simakayo leú et langónangan nia, tápoi ararateiaké lé nia ka sia

²³ Iageti pangoriknangan leú et simakopé ka laggaira simamatei ka taikabaga. Oto kelé aiteilaaké matania ka pata, itsónangan si Abraham ka sareunan, ai nia sedda ka sia si Latsarus ka kup-kup Abraham

²⁴ Oto pusoganangan leú et ka tubut Abraham, 'Ale Ukkui Abraham! Kau imakaté bagam ka tubukku. Kua peité ka matat Latsarus, bulé isop-sop'aké singongaínia ka oinan itep-tep'aké nia ka jalaiku. Aipoí bulat makopé besínia kupangorik ka bagat api néné!

²⁵ Tápoi kuana lé nia si Abraham ka matania, 'Repdem lé sirou: kekeu, ka sanganantat purimanuaiatnu, sarat simaerú lé anusiló, tápoi ka sia geti kai Latsarus, sarat sikataí lé aisiló. Oto masanang lé nia ka sia sené, tápoi ekeu geti kekeu, mangorik'an lé nugagalai sedda

²⁶ Paobánangan pei bagei, aian ka oggakta guluggú simakopé keru, bulé tá ioi raei sibabara sené, ei sedda, ialeú et sibabara sedda, oi sené!

²⁷ 'Oto ké kisedda baí galainia, Ukkui, kutiddouan lé ka tubum, bulé nukoiniaké si Latsarus ka lalepra saukkuiku

²⁸ Aipoí ai sia lima sasarainangku sedda. Koiniaké si Latsarus, bulé ikua ka matadda, buí ratugurú ka sia ka kudduat paoreat néné.

²⁹ Iageti kuanangan ka matania si Abraham, 'Aian ka tubudda bukot Mose

samba bukodda tai nabi! Kauan lé rareddet nia sangamberi sitususurat ka bagania!

³⁰Oto kuanangan nia simakayo, 'Tápei iaaili ké sarat nenda Ukkui, Abraham. Ké ai baí sia sitususuru ka simamatei siailiaké sia, iapeité rabauaké paatuatda.

³¹Tápoi kuana lé nia si Abraham ka matat simakayo, 'Ké tá maletsei ka bagadda ka surukat Mose sambat ka sikuadda tai nabi, ialeú' té taimatonem bagadda, kenanen bara sitususuru mitsá ka simamatei.'"

17 ¹Iageti kuanangan ka matadda sipasiuluinia Jesus, "Tá isoppi ibara oniakenen sikabaraji ramajo sirimanua. Tápoi mateirangan tedda sipasibabaraaké jo

²Maerú peilé tusereaké ka lolokkatnia bukkú panundukat gandum, turibbaiaké sia ka koat. Aipoí makopé lé kataí nia ibaraaké jot sara taigoisó néné

³Oto jago kam tubumui. Ké igalai jo sarainam, teká nia. Ké aioleian bagania ka jonia, appéakénungan leú et jonia

⁴Ké igalai jo ka tubum pitu ngamitsá sangagogoi, samba leú senen gogoi ioi

ka tubum masikua, 'Kutiddou maaf ka tubum,' appéakénungan leú et jonia.

⁵Iageti kuaddangan nia ka matat Jesus, sipasiuluinia, "Ron'aké tonem bagamai ka tubum, Tuhan.

⁶Oto kuanangan nia ka matadda si Tuhan, "Ké ai baí tonem bagamui beu luikut ubé, tá isoppi ioi nukua kam ka tubut murbai néné, 'Burauaké tubum, lepá urep'akénungan tubum ka koat,' tá isoppi ireddet nia nga-ngamui.

⁷"Ké ai baí sia sara ka talagamui sibara pagugulet sipamamakkru polak samba sipasijajago tarimeu. Ké toili nia ka mone, kipa, ikukua leú pá ka matania, 'Olaaké nuoi mukom'

⁸Kupaatu tá! Tá pá kisé lé ikukua ka matania, 'Kauan, patarek kanku. Kau leppeinu simaliná, iageti ngenanungan ilapá kupukom samba kupuló; alepáan geti kaku, iapeité nupukom kekeu.

⁹Samba tá leú tuuumun'aké nia pagugulet néné, kalulut gagalaiakéna sikuania, elé

¹⁰Oto kisedda leú te kam ka kam néné. Ké anulepáakéan kam sangamberinia sikua ka matamui, kuamui lé nia, 'Kai geti ka kai néné, kelé leú et sapagugulet

simarei-rei lé kai; siripot galajetmai lé kugagalaiaiké kai.'

¹¹ Ka puenunganannia Jesus, iailiaké laggai Jerusalem, sabaunangan leú et pasongan laggaira tai Samaria sambat tai Galilea

¹² Kelé aitugurú Jesus ka laggai, eirangan leú et ka tubunia pulu simalubbé simasappó. Puriórangan ka sareunan

¹³ Iageti pusogaddangan sipugegerei, pelé nga-nganda ka tubunia, "Ale Jesus, Guru, kau imakaté bagam ka tubumai!

¹⁴ Kelé aiitsó sia Jesus, kuanangan ka matadda, "Kenan kam ka tai imam, rapareksa kam." Oto ai sia mueenung, ale-aimale besíra

¹⁵ Kelé aiagai tubunia ka sia sara ka talagadda, toilinangan leú et mitsá ka tubut Jesus; ai nia memei, ai nia muuurai masiumun'aké Taikamanua

¹⁶ Segéna lé ka bet-bet Jesus, purapponangan leú et ka matania, ikua surá ka tubunia. Nia néné, iaté tai Samaria

¹⁷ Lepá kuanangan nia Jesus, "Kipa, tá pulu sia igidda atualeaké

¹⁸ Sarat nia lé koí né tairauma, atoili masikua surá ka tubut Taikamanua?

¹⁹ Iageti kuanangan ka matania Jesus, "Kauan, suruakéan ekeu, nutoili. Matonem poí bagam ka tubukku, bailiu ale-aimale besínu.

²⁰ Iageti eirangan leú et, piga pá sia tai Parise, ka tubut Jesus masinou-nou nia, rakua ka matania, pigamoi iooi Purimataat Taikamanua. Oto kuanangan ka matadda Jesus, "Pagalaiat kaoijanan Purimataat Taikamanua geti, tá anai toggaiatnia simatotoilá tuitsó

²¹ pat oi rakua, 'Konan nuitsó nia!' elé, 'Ai nia sedda!' Aipoí ka sia Purimataat Taikamanua, aian nia ka talagamui.

²² Lepá kuanangan ka matadda sipasiuluinia Jesus, "Iaaili te tetrenia igou-gou bagamui masiitsó sara gogoi, iaté gogoinia ka sia Togat Manusia, tápoi tá momoi nuitsó kam nia

²³ Ai te sia sipasikukua ka matamui, 'Ai nia sedda!' elé 'ai nia sené!' Bulat buí nuei kam nugaba kam nia

²⁴ Aipoí kelé bilá ka manua lé ipukinam ka sia gogoinia Togat Manusia; toro, barania ka tú-túnia sara, aili ka tú-túnia sara

²⁵ Tápoi buítá iorik boikí maigi paoreat, samba rapisik nia ka reddenan néné

²⁶ Makeré lé nia ka tetret Noak siburú, katutoilakatnia ka sia Togat Manusia

²⁷ Mukom, muló lé ragagalai sambat mutalimou; oto sarat kiseddangan aragalai, ailingan tetrenia itugurú si Noak ka bagat kapá, iageti bara eba, talunungan sia sangamberidda

²⁸ Iageti mitsá, makeré leú nia ka tetrenia ka sia si Lot. Mukom muló lé ragagalai, mangurep samba masigalai lalepra

²⁹ Tápoi kelé aitui-tui si Lot ka Sodom, gogoi nia nenda leú et, belé api belerang sibara ka manua masisubuaké sia sangamberidda

³⁰ Oto kisedda te galainia ka sia, iaili tetrenia kaoijanan Togat Manusia

³¹ Ka tetret nenda, sia sikukuddu ka purusaat ka tei-tei lalep, buían ratugorosot masialá bibiletta ka bagat lalep. Ialeú et sia sikukuddu ka mone, buían ratoili ka lalepra

³² Repdem kam kelé sipuaaili ka sinanalep Lot

³³ Oto kasei sikera engania, iaté malilimai purimanuaiat. Tápoi kasei

sitaikera engania iaté masisesese
purimanuaiatnia

³⁴ Kau imatonem bagamui ka sikuakku
néné: Soibónia nenda, rua sia tainanalep
sipeperrep ka sara pereman, sara tuabbit,
sara tugalak

³⁵ Ai sia rua sipasingi-ngitit buat
gandum, sara tuabbit, sara tugalak

³⁶ [Ai sia rua sipugagalai ka mone, sara
tuabbit, sara tugalak.]

³⁷ Iageti nou-nourangan nia
sipasiuluinia, pelé nga-nganda,
"Kaipa ipuaaili, Tuhan?" Aletinangan
nia Jesus, pelé nga-ngania, "Kaipa
ai simabuté, ai leú te sedda seggú
sipasikokom simabuté."

18 ¹ Lepá tiboinangan sara pasikat
ka tubudda sipasiuluinia, Jesus,
masipangantru sia, bulé tá itek-tek
rapaniddou samba buí ramabelé бага

² Pelé nga-ngania, "Ka sara laggai,
ai sara hakim sitaimalotó ka tubut
Taikamanua, samba bulat beri letsei ka
bagania ka tubudda kasei pá

³ Iageti ka laggai nenda leú et, ai sara
silumang, piga ngamitsáan pá aiei ka
tubut hakim néné, masitiddou bulé
irop'aké nia ka pakaronia. Kuanangan

ka matat hakim néné, silumang,
'Rop'aké aku, masialegi nga-nganda
pakaroakenenku.

⁴ Piga pá burúnia, tá aiobá irop'aké
silumang, si hakim néné. Tápoi lepá
paatunangan nia si hakim néné ka bagat
paatuatnia, kuanangan, 'Kenanen baí tá
malotó aku ka tubut Taikamanua, samba
tá maletsei ka bagakku ka tubudda kasei
pá

⁵ tápoi kalulut taipuaari nia ioi
masipageu-geu aku, oto maerú peilé
kurop'aké pakaronia. Aipoí ké tá kisedda
kugalai, bailiu tá muaari ioi masigejaaké
bagakku.'

⁶ Iageti kuanangan ka matadda si
Tuhan, "Lelek'aké peité kam sikuat
hakim sitaimaroipo бага néné

⁷ Oto tá pá irorop'aké sia sapaamiannia
Taikamanua, sipaniddogi nia sinágó
samba sinoibó? Iooreaké pá irop'aké sia

⁸ Kau imatonem bagamui ka sikuakku
néné! Bulat beri uju irop'aké sia ka
pugejaat bagadda! Tápoi ké moi baí
Togat Manusia, isesese peilé pá sia
simatonem бага ka tubunia ka polak
néné?

⁹ Iageti tiboinangan leú et pasikat, Jesus, siorak ka tubudda siputatá sabagei, tápoi rakua peilé tubudda sarat sia lé simaerú

¹⁰ Pelé nga-ngania, "Ai sia rua sieei maniddou ka Uman Taikamanua. Iaté, sara tai Parise, samba sara sipuukú pajá

¹¹ Oto puriónangan sarania ka sia si Parisena, paniddounangan leú et, pelé nga-ngania, 'Oi Taikamanua, bulat surá lé kukua ka tubum, aipoí aku kaku néné, tá makeré aku, kelé sirimanua sabagei; simaalau бага, simapajoat, elé sipaelet. Kukukua surá néné, kalulut taimakeréku ka tubunia nanda sipuukú pajá

¹² Sangamenggui, rua ngamitsá kupupuaso, samba leú et aikupangu-nguruat'aké ka tubum sepersepulu sangamberi puuktungan sinesekku.

¹³ Tápoi ka sia geti sipuukú pajá, ka sareunan lé ipuririó, bulat beri masiteila manua, tá maró bagania. Ai lé ipoposai bagania aikukua, 'Oi Taikamanua, kau imakaté bagam ka tubukku, sirimanua sijo néné!'

¹⁴ Iageti kuanangan ka matadda Jesus, "Kau imatonem bagamui ka sikuakku

néné; kelé aratoili ka lalep, sipuukú paja lé aisiló Taikamanua, tá Si Parisena. Aipoí sangamberi sibua'aké tubuna, iparerepé lé sia Taikamanua; samba leú et sangamberi siparepé tubuna, tububuak'aké lé.

¹⁵ Iageti eirangan leú et sipasitataroaké tatoga ka tubut Jesus, bulé irape sambat isukat'aké sia. Tápoi kelé araitsó nia sipasiuluinia, pugolukiddangan leú et sia

¹⁶ Oto sogainangan sia tatoga nenda Jesus, kuanangan ka matadda sipasiuluinia, "Obáaké kam sia tatoga raoi kaku! Bá kekera kam sia. Aipoí sia kelé néné lé ibabailiu sapaamian Taikamanua

¹⁷ Bulé nuagai kam nia! Ké tá kelé tatoga rapaerú, raei ka matat Taikamanua, bulat tá ibabailiu sia sapaamian Taikamanua.

¹⁸ Iageti kuanangan ka matat Jesus, sara sautéra tai Jahudi, "Ale Guru simatopit, aponia simateú galaiakenenku, bulé kuikep'aké purimanuaiat sipulelelek samba sitaitatatá?

¹⁹ Tápoi kuana lé ka matania Jesus, "Nukukua kodda aku simatopit? Aipoí tá

anai kuanen simatopit, sarat Taikamanua lé, lepá

²⁰ Ai lé turerere againu surukat Taikamanua, kelé: 'Bá paelet, buí nupamatei, buí nupanangkou, buí numuneng'aké boko, samba leú, kau nusurú ukkui sambat inam.'

²¹ Iageti kuanangan ka matat Jesus, "Silainge peilé aku, akureddet'an sangamberinia surukat néné.

²² Oto kelé aiarep nia Jesus sikuania néné, kuanangan ka matania, "Ai peilé sara simateú galaiakenennu iaté: kenan lé nusakiaké sangamberinia bibiletu, lepá panguruat'akénungan nia nenda bulagat sakit bibiletu, ka simagebá, bulé nusiló pukayoat sibara ka manua. Lepá oi ekeu nutut aku.

²³ Oto kelé aiarep nia sikuat Jesus néné, bara reu-reu bagania, bulat simakayo lé poí nia

²⁴ Ai lé iaagai purereu-reu nia бага, Jesus. Lulut néné kuanangan nia, "Bulat mabesí te ratugurú simakayo ka paamian Taikamanua

²⁵ Onta peilé te malabbei tugurú ka matat pajjaí, ka tubudda simakayo, ratugurú ka Laggai Taikamanua Sibau.

²⁶ Oto kuaddangan nia ka sia sangamberi sipasiaarep sikuat Jesus néné, "Ké kisedda baí nia, kaseian lé masisisiló puaragat?

²⁷ Iageti kuanangan ka matadda Jesus, "Sitaiooi ragalaiaké sirimanua, momoi ka Taikamanua!

²⁸ Lepá kuanangan nia ka sia si Petrus ka matat Jesus, "Itsó peité! Pat kaddiuakémaian sikalalepmai sambat tatogamai, kutut kai ekeu.

²⁹ Iageti kuanangan ka matadda Jesus, "Kau imatonem bagamui ka sikuakku néné! Sangamberi sikaddiuaké lalepnia, sinanalepnia, sasarainania, saukkui samba sainania, elé tatogania, kalulut puukúra galajet Taikamanua

³⁰ bulat tá magugulai iaké silinia Taikamanua ka tubudda kineneiget; samba ka gogoi sibabara mitsá, silórgan purimanuaiat sipulelelek samba sitaitatátá.

³¹ Iageti rurúakénangan sia sangamberidda sipasiuluinia Jesus saradda, kuanangan ka matadda, "Arep'aké kam sikuakku néné! Taei kam kineneiget iaté ka laggai Jerusalem. Sedda te ipuaaili sangamberinia

sinurat'akenenda tai nabi pagalaiat tubut
Togat Manusia

³² Rasesegéaké te nia ka kabeira
sipuarat sabulungan, bulé raasá,
rapaloloi samba raluji nia

³³ Iageti paoreirangan nia samba
mateiakérangan leú et nia. Tápoi ka
gogoi sikatelunia, suru nia mitsá ka
simamatei.

³⁴ Tápoi bulat beri kolouna ka bagadda
sipasiuluinia sangamberinia néné. Ai lé
poí tupakekele ka tubudda katukolobat
sangamberi sikuania. Tá raagai rakeruji
saúsaket tiboietnia

³⁵ Kelé aimalegre Jesus ka laggai
Jeriko, ai sedda sara simapeset mata,
ai nia muuuddet ka bet-bet enungan,
masitiddou paroman

³⁶ Oto kelé aiarep aratusabau sirimanua
simigi, nou-nounangan sia, pelé
nga-ngania, "Aponia sibabara?

³⁷ Iageti kuaddangan nia ka matania,
"Atusabau Jesus tai Natsaret.

³⁸ Oto pugereinangan leú et simapeset
mata néné, pelé nga-ngania, "Ale Jesus
togat Dapid! Kau imakaté bagam ka
tubukku!

³⁹ Iageti pugolukiddangan nia sia sieei boikí, rakua ipumeng-meng. Tápoi aituppai lé ron aipugerei, pelé nga-ngania, "Ale Togat Dapid, kau imakaté bagam ka tubukku!

⁴⁰ Oto puarinangan leú et Jesus, kuanangan ka matadda bulé raabbit simapeset mata néné ka tubunia. Kelé aisegé, kuanangan ka matania Jesus

⁴¹ "Aponia nukikiddiy kugagalaiaké ka tubum?" Kuanangan ka matat Jesus, "Bulé imakoinong matakku, Tuhan.

⁴² Lepá kuanangan ka matania Jesus, "Ké kisedda baí nia, kauan imakoinong matam! Matonem poí bagam ka tubukku, ale besínu.

⁴³ Iangan leú et tetrenia, makoinongnangan matania. Iageti einangan leú et masitut Jesus, samba umun'akénangan Taikamanua. Kelé araitsó nia sirimanua simigi sigalai Jesus néné, umun'akérangan Taikamanua sangamberidda.

19 ¹ Kelé aisegé Jesus ka laggai Jeriko, riu-riuakénangan isabauaké nia laggai néné Jesus

² Ka laggai nenda ai sara utet pajá smakayo, sipuoni si Sakeus

³ Bulat ai lé ikikiddiy masiitsó tubut Jesus. Tápoi kalulut igidda sirimanua sambat teténia bagei, bailiu tá momoi iitsó Jesus

⁴ Iageti pabalaunangan leú et iei ka mata, lepá karaínangan sara loiná, bulé ioi iitsó itusabau Jesus

⁵ Kelé aitusabau Jesus ka loiná, teilanangan ka pata, kuanangan ka matat Sakeus, "Sakeus, olaaké nutugorosot! Aipoí buítá moi aku ka lalepnu masibalou ekeu kineneiget.

⁶ Iageti olaakénangan itugorosot si Sakeus, silónangan kaooi Jesus ka angkat бага

⁷ Oto sangamberidda sipasiiitsó sangamberinia néné, ngoí-ngóinangan bagadda ka tubut Jesus. Pelé nga-nganda, "Pegi, amei peilé nia mugogoi ka lalep sirimanua sikataí paraboa!

⁸ Lepá ai sia ka lalepnia si Sakeus, puriónangan, kuanangan ka matat Jesus, "Tuhan, sangarubeiat pukayoatku néné, kupanguruat'aké ka simagebá. Oto kasei kupajo, siliykungan nia mitsá epat ngamitsá igit sialáku!

⁹ Iageti kuanangan ka matania Jesus, "Gogoi néné kam sangalalepmui,

aipaarauan kam Taikamanua, samba iaké puririmanua sibau ka kam, ekeu néné leú poí, sapunuteteu Abraham leú et

¹⁰ Aipoí ka sia Togat Manusia, masigaba samba masipaarau simalilimai lé aoi.

¹¹ Talagat pasiaarepra tiboietnia Jesus, tiboinangan sara pasikat. Aipoí ka tetret nenda, aian raaaili ka Jerusalem, samba bagei ka bagadda te amalegrengan ioi Purimataat Taikamanua ka polak néné

¹² Pelé nga-ngania ka tubudda, "Ai sara si tuan sieei ka laggai ka sareunan, bulé rauddet'aké nia murimata. Lepá arapauddet nia, toili nia mitsá

¹³ Kei mei nia, sogainangan sia pulu sapaguguletnia, kaunangan ka tubudda senen tubu pasasangamas sia. Kuanangan ka matadda, 'Pajagangan kam, nupakei kam bulagat néné, ka burúku ka puenunganan.

¹⁴ Tápoi sia taikalaggaiatnia, malagá bagadda ka tubunia. Oto kelé aitui-tui, koiniakérangan sieei masikua ka matania, 'Táan kuobá kai nia néné rimatamai.

¹⁵ Tápoi riu-riu lé arapauddet nia rimata néné. Oto lepá toili nia mitsá ka

laggainia. Iageti olaakénangan isogai sapaguguletnia, bulé iagai piga nuntunia uktuk arasese

¹⁶ Oto oinangan leú et ka sia pagugulet siboikí, kuanangan ka matat tuan, 'Tuan, siakénu kaku bulagat sangamas, aibailiuan pulu ngamas iginia.

¹⁷ Iageti kuanangan ka matania si Tuan, 'Nen, niapeité néné pagugulet simatopit! Matopit poí ekeu ka puukuket sigoisó, oto bailiukékungan ekeu masikup-kup'aké pulu laggai.

¹⁸ Lepá oi nia ka sia pagugulet sikarua, kuanangan, 'Tuan, bulagat sangamas siakénu kaku, akubailiukéan nia lima ngamas.

¹⁹ Iageti kuanangan ka matat pagugulet néné si Tuan, 'Ekeu kekeu leú, kubabailiuké leú et ekeu, masikup-kup'aké lima laggai.

²⁰ Lepá mitsá oi sia ka sia sapagugulet sabagei, kuanangan ka matat Tuan, 'Aikoíné bulagatnu Tuan; akukoiriaké lé nia ka saputangan

²¹ kalulut lotóku ka tubum, aipoí simagege lé ekeu. Kekeu poí Tuan, momoi nualá tá sipuoni kekeu; numonei tá siuremannu.

²² Iageti kuanangan si Tuan ka tubunia, 'Pagugulet sikataí paraboat lé ekeu néné! Siripot ka tiboietnu lé kuaaké ukumannu. Aipoí ai lé nuaagai gegekku; aaláku tá kaku, samba momoneiku tá siuremanku

²³ Oto angoian lé tá anukau bulagatku néné ka bank, bulé toilikku lé, silókungan bulagatku sambat bungania?

²⁴ Iageti kuanangan nia rimata ka matadda sipuririó sedda, 'Kauan, alá kam bulagat nenda ka tubunia, nukau kam nia ka tubut sibara pulu ngamas.

²⁵ Oto kuaddangan nia ka matat rimata, 'Kipa Tuan, aian pulu ngamas ka sia.

²⁶ Tápoi kuana lé nia rimata ka matadda, 'Repdem kam sikuakku néné: kasei sibabara, tukakau peilé simigi ka tubunia. Tápoi ka sitá anai geti, tuaalá peilé sipulelegei ka tubunia

²⁷ Oto kineneiget abbit kam sia sené tai saggakku sitaiobá murimata ka tubukku. Pamatei kam sia ka matakku!'

²⁸ Lepá aikua nia néné Jesus, boikíakénangan tubunia ka tubudda raei raailiaké Jerusalem

²⁹ Kelé aramalegre ka Betpage samba ka Betania ka Leleu Zaitun,

koiniakénangan rua sipasiuluinia, Jesus raei boikí

³⁰ Kuanangan ka matadda, "Kenan kam, nuailiaké kam laggai nenda ka matatta. Oto ké asegéan kam sedda, itsómuian sangamuneng togat kalidei, ai nia ka sesereat. Kalidei nenda, beri pei arajanangi tei-teinia sirimanua. Oto rugutmuian nia, iageti abbitmuian nia sené

³¹ Ké ai sia sikua ka matamui, 'Angoi nururugut kam nia kalidei néné?' alegimui lé nia, 'Ai kauna nia si Tuhan.'

³² Iageti eirangan leú et karuadda sipasiuluinia, ailiddangan leú et sangamberinia, kelé sikuat Jesus ka matadda

³³ Oto airarurugut togat kalidei néné, tekánangan sia sibakkat kalidei, pelé nga-ngania, "Nururugut kodda kam kalidei néné?

³⁴ Alegiddangan nia, "Ai kauna nia si Tuhan.

³⁵ Iageti abbitrangan nia kalidei néné, ka tubut Jesus. Lepá apóakérangan saraubára ka tei-tei kalidei, iageti rop'akérangan Jesus ijanangi tei-tei kalidei

³⁶ Oto aijajanangi tei-tei kalidei,
paapóranan saraubára ka enungan

³⁷ Kelé aimalegre Jesus ka Jerusalem,
ka gogorosan tuailiaké Leleu
Zaitun, taddaakérangan sipasiuluinia
simigi sipasitutum nia, musoga sabeu
masiumun'aké Taikamanua, samba
masikua surá ka tubunia, kalulut
sangamberi kiseiet siigbukra

³⁸ Pelé nga-nganda, "Tupanunukani
te nia Rimata siooi ka onin Tuhan!
Paabanan ka manua samba tuumun'aké
lé Taikamanua!

³⁹ Oto ai sia piga pá tai Parise
ka talagadda simigi amasikua ka
matania, "Kua ka tubudda sipasiuluinu,
rapumeng-meng.

⁴⁰ Tápoi kuana lé nia ka matadda
Jesus, "Kau imatonem bagamui ka
sikuakku néné! Ké mumeng-meng baí
sia, pugereinangan leú et ka sia bukkú
néné.

⁴¹ Kelé bulat aramalegre ka Jerusalem,
itsónangan Jerusalem, soibinangan leú
et nia

⁴² Pelé nga-ngania, "Bulat apanganté
katet bagatta ka tubum. Bulat ké tebaí
mueerúan lé, ké baí ka gogoi néné

nuagai nia sibaraaké paabanan! Tápoi kineneiget táan momoi nuitsó nia

⁴³ Ka sara tetre, bara sibabara ka tubum, iaté rakekreaké ekeu tai saggaknu, pat bökkó. Goilikrangan ekeu, iageti okkip'akérangan ekeu sibabara ka mata, ka tei-tei, kai kattoet samba sibabara kai katsiunu

⁴⁴ Subuakérangan ekeu, sambat sangamberi sirimanua sikukuddu ka tubum; pat beri sara sipulelegei bukkú sipalalakké, kalulut tailelelek'akénu tetre nia, ioi Taikamanua masipaarau ekeu!

⁴⁵ Iageti kelé aitugurú Jesus ka Uman Taikamanua, taddaakénangan masipausiji sia sipasasaki sedda

⁴⁶ Kuanangan ka matadda, "Ka Buko Sipunenan, ai atusurat'aké kisé: Aikua Taikamanua, 'Uma paniddogat lé umangku.' Tápoi anubailiuaké lé kam nia kudduatra sipararau-rau!

⁴⁷ Oto senen gogoiiei Jesus mungantoman ka Uman Taikamanua. Iageti isiakérangan nia tai imam sabeu sambat tai guru paamian samba leú et tai bajára tai Jahudi, masimateiaké Jesus

⁴⁸ tápoi tá arasese enungan, bulé ioi ragalaiaké kelé sipinaatudda, aipoí

sangamberi sirimanua lé iobá masiarepi ngantomannia, samba bulat ai lé iaalá bagadda ka tiboietnia.

20¹ Ka sara gogoi, talagat punga-ngantoman nia Jesus masisegéaké Katuareman Simaerú ka tubudda siparururú ka Uman Taikamanua, eirangan leú et tai Imam sabeu, sambat tai guru paamian samba leú et tai bajára tai Jahudi ka tubut Jesus

² Kuaddangan ka matat Jesus, "Kua peité ka tubumai, kaipa pubakkanannia aioi anugalaiaké nia sangamberinia néné? Kasei amasiaké hak néné ka tubum?

³ Iageti kuanangan nia ka sia ka matadda, Jesus, "Aku kaku leú et, kuobá kunou-nou kam. Kua peité kam ka kam ka tubukku

⁴ kasei ka hak ka sia ipasiraraú si Johannes? Ka hak Taikamanua, elé ka hakra sirimanua?

⁵ Oto patibojiddangan nia, pelé nga-nganda, "Ké takua baí, 'Ka hak Taikamanua,' kuanangan ka tubutta, 'Ké kisedda baí nia, angoi tá imatotonem bagamui ka tubunia?

⁶Tápoi mitsá, ké takua baí, 'Sibara ka sirimanua lé haknia,' baijukrangan sita bukkú sangamberi sirimanua, aipoí bulat matonem bagadda punanabi nia si Johannes.

⁷Iageti kuaddangan ka matania, "Tá kuagai kai.

⁸Oto kuanangan nia ka sia ka matadda, Jesus, "Ké kisedda baí nia, aku kaku leú et, tá leú et kukukua ka matamui, kasei ka hak kugagalaia ké sangamberinia néné.

⁹Iageti tiboinangan ka tubudda Jesus, pasikat néné, "Ai sara sipasiuuremi sangamata monen anggurnia. Lepá sewaakénangan nia ka tubudda piga pá sipuukú mone, iageti tui nia ka laggai bagei, kuddu nia sedda simaburú

¹⁰Kelé aiaili tetrenia pasimoneiat buat anggur, koiniakénangan paguguletnia sibakkat mone néné ka tubudda sipuukú mone, masialá rubeiatnia ka sia. Tápoi arabóbó lé sia sipuukú mone, lepá kuanangan ka matania itoili sitá abbinen

¹¹Lepá koiniakénangan mitsá sara paguguletnia sabagei; tápoi beri leú et nia ka sia arabóbó samba arapaloloi leú

et nia sipuukú mone, lepá kuanangan ka matania itoili sitá abbinen

¹²Iageti koiniakénangan mitsá paguguletnia sikatelunia. Tápoi arapabóboki leú et nia ka sia, sipuukú mone, lepá ribbaiakérangan leú et nia ka tei-tei irip mone

¹³Kalepakatnia, kuanangan nia sibakkat mone néné, 'Kipangan lé pá kugagai? Eddangan nia togakku simanuntut bagakkungan lé kukokoiniaké. Tá isoppi rahormati nia!

¹⁴Tápoi itsóra lé nia ka sia sipuukú mone, togat sibakkat mone néné, patiboddangan pasasambadda, pelé nga-nganda, 'Nia té néné sipasiikep'ake. Tamateiaké kam nia, bulé taikep'aké kam ikep'akenennia.

¹⁵Iageti girit'akérangan nia ka tei-tei irip mone, lepá mateiakérangan nia." Oto kuanangan ka matadda Jesus, "Ké toili baí nia ka sia sibakkat mone néné, kipa ipaeerú ka tubudda ka sia sipuukú mone néné

¹⁶Tá isoppiiei masipamatei sia sipuukú mone néné, lepá kaunangan mone néné ka tubudda sipuukú mone sabagei." Kelé

araarepnia, kuaddangan ka matat Jesus, "Kupaatu tá!

¹⁷ Iageti kinerenangan sia Jesus, kuanangan ka matadda, "Ké kisedda baí nia, aponia katukolobat tiboiet ka Buko Sipunenan néné? 'Bukkú siribbaiakenenda tai tukang, aibailiuan nia bukkú bongen inan arigi.

¹⁸ Sangamberi sibebelé ka uddut bukkú néné, gatsá; samba kasei sisak-sak bukkú néné, bubu bailiu abu.

¹⁹ Oto kelé aiagai tubudda ka sia tai guru paamian sambat tai imam sabeu sia lé isasailú pasikat Jesus néné, gelairangan ralabá nia ka tetret nenda leú et, tápoi malotó le sia ka sirimanua simigi

²⁰ Oto gabaddangan tetre simaerú. Iageti bulaganiddangan sirimanua, bulé rakau tubudda kelé simaliná paatuat, lepá koiniakérangan sia raei masigaba selet tubut Jesus, rapanounogi nia, bulé ioi rasegéaké nia ka kabei gubernur

²¹ Pelé nga-nganda ka sia sibulaganidda néné ka tubut Jesus, "Guru, ai lé kuaagai kai sangamberinia sikuam, bulat sineseatnia. Samba ai lé kuaagai kai bulat tai gigígínu nugelaiaké siobat bagat

Taikamanua ka sirimanua, aipoí kekeu, bulat tá nurarasei sirimanuania

²² Oto kalulut néné, sibo pei nukua ka matamai, siripot ka surukatta, momoi leú pá tabaya pajá kai Kaisar, elé tá?

²³ Tápoi ai lé iaagai Jesus patajuatda néné ka tubunia. Kalulut néné kuanangan ka matadda

²⁴ "Patoilá peité kam ka matakku bulagat sangaperak. Kasei tularat elé kasei oni néné?" Iageti alegiddangan nia, "Kai Kaisar!

²⁵ Iageti kuanangan ka matadda Jesus, "Oto ké kisedda baí nia, apa sipuoni kai Kaisar, kaumuian nia kai Kaisar, samba apa sipuoni ka Taikamanua, kaumuian nia ka Taikamanua.

²⁶ Oto toilá ka matat siberikabaga tá anai arasese beri sara selet tubut Jesus. Bailiu amumengmeng'an lé sia kalulut kisei ka bagadda masiarep alegiatnia

²⁷ Iageti ei sia piga pá sibara ka mungkuatra tai Saduki masiailiaké Jesus. (Sia néné, iaté mungkuat sitaikatonemi katususurutda sirimanua simamatei.) Nou-nourangan nia, pelé nga-nganda

²⁸ "Guru, siripot sinurat'akenen Mose ka sita: Ké ilangó baí sara simanteu sitá tuppai tubu, buítá italimouaké babaliunia néné sarainania, bulé ibara tuppai tubut silalangó

²⁹ Oto ai sia pitu sipusasaraina. Putalimounangan sikebbukat, lepá langónangan nia tá abara tuppai tubunia

³⁰ Lepá putalimounangan ka babaliunia ka sia sarainania sikarua, tápoi lepá langónangan nia, tá leú et abara tuppai tubunia

³¹ Oto kisedda leú te ka sia amuaili ka sarainania sikatelunia, sarat kiseddangan, aili ka sarainania sikapitunia

³² Lepá langónangan leú et nia ka sia sinanalep

³³ Ka gogoi katusuruat tubu simamatei, kasei ka talagadda sipitu sipusasaraina néné, masipalalalep'aké nia sinanalep néné? Aipoí kapitudda, sarat arapalalep'akéan nia.

³⁴ Iageti kuanangan ka matadda Jesus, "Sia sipuririmanua kineneiget lé mutatalimou

³⁵ tápoi ka sia geti simateú tusuruaké ka simamatei, samba sipasiikep'aké

purimanuaiat ka gogoi sibabara, táan mutatalimou sia

³⁶ Aipoí sia néné, kelé samalaikangan lé sia, samba táan mamatei sia.

Tatogat Taikamanuangan lé sia, kalulut atusuruakéan poí sia ka kamateiat

³⁷ Beri leú poí ka sia kai Mose, bulat makolou aikua nia katususurudda mitsá sirimanua simamatei. Ka sisurat'akenennia masikolouaké pagalaiat puo sipujujuluu aikua, si Tuhan néné, iaté 'Taikamanuan Abraham, Taikamanuan Isak, sambat Taikamanuan Jakob.

³⁸ Oto kolou ka sia Taikamanua néné, tá Taikamanuanda simamatei! Tápoi Taikamanuanda lé sipuririmanua! Aipoí ka matat Taikamanua, sangamberi sirimanua, sipuririmanua lé.

³⁹ Iageti ai sia piga pá amasikua ka matat Jesus, "Bulat maerú alegiatnu, Guru.

⁴⁰ Kalulut néné, taimarónnangan bagadda mitsá masipaiseki apa pá ka tubut Jesus

⁴¹ Iageti nou-nounangan sia sipasiuluinia Jesus, "Kipa iooi itukua Rimata Sipaarau néné, punuteteu Dapid

⁴² Tápoi beringan nia ka sia si Dapid ai aikua ka Mazmur, 'Aikua si Tuhan Taikamanua ka tubut Rimata Sipaarau aku: Uddet'aké ekeu kai kattoetku

⁴³ teret kalaakéku sia saggaknu.

⁴⁴ Oto ké beringan si Dapid aioniakéan nia Rimata Sipaarau néné, 'si Tuhan', kipangan lé itukukua nia ka sia néné punuteteu Dapid?

⁴⁵ Talagat aarepidda nia ipanibo Jesus, kuanangan ka matadda ka sia sipasiuluinia

⁴⁶ "Suk-suk kam tubumui ka tubudda tai guru paamian. Raobá poí muenung sibara saraubá simananta, samba bulat raobá rahormati sia ka pasar. Ka kudduatra siabeu tiboí tubu lé raeei muuddet ka uma paniddogat samba ka punen

⁴⁷ Masipajo tailumang lé ragagalai, samba masipauragi bibletra. Oto bulé ralabbú galai tubudda sikataí, panantaddangan leú et paniddogatra! Kalulut néné, bulat masané ukuman siloketra!"

21 ¹ Iageti itsónangan nia Jesus, rakau panguruatda simakayo, ka kudduat bulagat, ka Uman Taikamanua

²Tápoi mitsá itsónangan leú et sara silumang simagebá, aikakau bulagat panguruatnia, rua ngarimis iginia

³Oto kuanangan ka matadda Jesus, "Arep'aké peité kam: silumang néné peilé te maigi aikau, belé peilé ka sia sabagei

⁴Aipoí ka sia sabagei, legeira lé arakau. Ka sia geti silumang néné, kenanen bulat simagebá lé nia, tápoi sangamberinia sibabara ka tubunia, pakeietnia ka purimanuaiatnia, panguruat'akénangan leú et nia.

⁵Iageti ai sia sitiboi pagalaiat erúnia Uman Taikamanua, kalulut arakau pulaingeatnia bukkú simalainge, samba bibilet sibuluakenen ka tubut Taikamanua. Oto kuanangan ka matadda Jesus

⁶"Iaaili te tetrenia, ituragat'aké sangamberi siitsómui néné; pat beringan sara bukkú sené sipalalakké ka kudduatnia!

⁷Iageti nou-nourangan nia Jesus, pelé nga-nganda, "Pigamoi, Guru ipuaaili? Samba apa toggaiatnia ituagai aailina tetrenia néné?

⁸ Oto kuanangan ka matadda Jesus, "Suk-suk kam tubumui, buí rapataju kam. Aipoí maigi te sia sipuoni oningku, masikukua ka matamui, 'Aku té néné!' samba 'Aiailingan te tetrenia.' Tápoi buí nutut'aké kam sikuadda

⁹ Buí leú numalotó kam masiarep katuareman pasaggangan samba rapugege simaron nga-nga. Aipoí buítá muaili boikí sangamberinia. Tápoi tápei te nia nenda tetrenia.

¹⁰ Iageti riu-riuakénangan ipanibo Jesus, pelé nga-ngania, "Bangsa sara masisaggangi bangsa bagei, negara sara masisaggangi negara bagei

¹¹ Babara te ka senen kudduat teteu sabeu, pulajeat sambat oringen. Babara te kalotóakenen samba kiseiet sabeu ka manua

¹² Tápoi kei muaili sangamberinia néné, labáranan kam, lepá paoreirangan kam boikí. Abbitrangan kam ka uma paniddogat, samba kaurangan kam ka bagat penjara. Pagiritrangan kam ka matadda tai rimata samba sauté, kalulut pupapasiuluimui aku

¹³Tápoi ka tetret nenda te nualá
kam tubumui masipararat Katuareman
Simaerú sibara ka Taikamanua

¹⁴Kau imaron paatuatmui bulé tá
ipaingo kam apa kuanenmui nualegi kam
nga-nganda

¹⁵Aipoí bulat tubukku lé masiaaké
ka kam sikut paatuat masitiboaké
tiboakenenmui, pat taioinangan raperú
tubudda elé ratátáaké sikuamui tai
saggakmui

¹⁶Rapajo-jo te kam saukkui samba
sainamui, sasarainamui, saeppumui
samba sapunualeimui. Sangarubeiat ka
talagamui ramamateiaké

¹⁷Pulagakiddangan kam бага, kalulut
pupapasiuluimui aku

¹⁸Tápoi bulat beri sangantaili alaimui tá
malilimai

¹⁹Ke tá ipauksak putotonem bagamui
samba ké maom bagamui, silómuian
puaragat.

²⁰"Ké nuitsó kam rabokkó nia tai
tentera laggai Jerusalem, agaimuian
táan te mauuju itususubuaké

²¹Oto ka tetret nenda, sia sikukuddu
ka Judea, kau raei manatra ka leleu.
Sia sikukuddu ka laggai Jerusalem, kau

rabela ka laggai nenda, samba leú et sia sibabara ka laggai bagei, buí ratugurú sedda

²² Aipoí gogoi nenda, iaté 'Gogoi Pasiorangan Ukum', bulé ipuaili kelé ka sitususurat ka Buko Sipunenan

²³ Bulat kataínangan te ka sia saina sibara suruket, samba saina sibara tatoga sigoisó! Aipoí babara te pugejaat бага sabeu, iukum'aké sia bangsa néné, si Tuhan

²⁴ Ai sia simamatei ka lanjau, samba ai leú et sia sikabéakenen, lepá abbitrangan sia ka laggaira sirimanua; samba paperakiddangan te Jerusalem sipuarat sabulungan, teret kapplu nia tetre, siripot siteúakenen Tuhan, ka tubudda.

²⁵ "Matotoilá te toggaiat ka matat sulu, ka matat laggó, samba ka matat panyanyat. Mulolotó samba museddé te sia бага tai bangsa, raarep ipuukkú nga-ngan onut koat

²⁶ Pat te matei sia lotó sirimanua masiitsó sibabara ka sangaliot polak, kalulut ipasabu sia siutéaké sangaliot manua ka goá

²⁷ Ka tetret nenda te ioi ka sia Togat Manusia ka tinobut ka gege samba ka pulatsanan sabeu

²⁸ Oto ké aitaddaakéan ibara sangamberinia néné, kauan, suruaké kam tubumui, teilaaké kam matamui, aipoí táan te mauuju iaili tetrenia itupaarau kam.

²⁹ Iageti tiboinangan ka matadda Jesus pasikat néné, pelé nga-ngania, "Alaki lé kam nia ka loinat sileu samba ka paloina-loiná bagei

³⁰ Ké musinula, agaimuian amalegrengan te iaili erut manua

³¹ Oto kisedda leú te kam ka kam néné, ké nuitsó kam ipuaili sangamberinia néné, agaimuian amalegrengan te ioi Purimataat Taikamanua

³² Bulé nuagai kam nia! Tápei amatei sia sangamberidda sipuririmanua kineneiget, amuailingan

³³ Ka sia manua sambat polak, tatatá lé, tápoi tiboietku geti, bulat tá tatatá lé, burú.

³⁴ "Suk-suk kam tubumui, kila-kila nubuluk kam sarat mupunen samba masiló ló simapuinenen, élé sarat masipaatu pagalaiat purimanuaiatmui,

pat taimatarekmuian ka tetret iaili
tetrenia ioi sinulut

³⁵ Aipoí iaili tetrenia ioi ka sia Gogoi
nenda, kelé jalo lé ka tubudda
sangamberi sikukuddu ka matat polak
néné

³⁶ Oto kau nupanuksuk kam, samba
kau nupaniddou kam, bulé numaron kam
masipet-pet'aké sangamberinia sipuaaili
néné, samba bulé ioi nupurió kam ka
matat Togat Manusia.

³⁷ Aipungantoman Jesus ka Uman
Taikamanua, sinágó. Oto kelé aimasoibó
ei nia ka Leleu Zaitun, iageti kuddu nia
sedda

³⁸ Senen simatsep, ei sia sangamberi
sirimanua ka Uman Taikamanua,
masiarep ipungantoman Jesus.

22 ¹ Punen Roti Simaleu oniakenen
Paska, amalegrengan

² Iageti gabaddangan enungan ka sia tai
Imam sabeu sambat tai guru paamian,
bulé ioi ramateiaké Jesus sipinakele,
kalulut lotóra ka tubudda sirimanua
simigi

³ Iageti gurukinangan nia Sanitu ka sia
si Judas, iaté sipuoni si Iskariot, sara ka
talagat sipulurua sipasiului Jesus

⁴Iaté lulunia aiei si Judas, patibo ka tubudda tai imam sambat ka tubudda sipasijajago Uman Taikamanua, bulé ragaba enungan, kipa ipaeerú si Judas isegéaké Jesus, ka kabeira

⁵Oto bulat simakopet angkat bagadda lé, pat tanéakérangan ka matania rakau bulagatnia

⁶Ka sia leú et si Judas apasesengan ka bagania. Iageti gabanangan sara oggak simaerú, iei masisegéaké Jesus ka tubudda sipinakele

⁷Iageti ailinangan tetrenia ka Punen Roti Simaleu, itujájá biri-biri komen ka Paska

⁸Oto koiniakénangan sia Jesus, si Petrus sambat si Johannes, pelé nga-ngania, "Kenan kam nutarek'aké kam komen Paska ka sita.

⁹Kuadda lé ka matania, "Kaipa poi siobánu kupatatarek kai nia?

¹⁰Iageti kuanangan ka matadda Jesus, "Segémui lé ka laggai, paseseakémuian sara simanteu sipasibebeilá lalaisú. Oto tutmuian nia kaipa lalep iguruki, gurú kam

¹¹ samba kuamuian ka matat sibakkat lalep: Aikua si Guru, 'Kaipa kupukokom kai Paska sambamai sipasiuluiku?

¹² Iageti saú-saúnangan ka tubumui, sibakkat lalep, sara bilik simalio ka lappra, amatarek'an sedda sangamberinia pakeiet. Oto patarekmuian nia sedda.

¹³ Iageti eirangan leú et tai Petrus sambat tai Johannes, ailiddangan leú et sangamberinia, kelé sikuat Jesus ka matadda. Oto patarekrangan leú et nia, komen Paska

¹⁴ Iageti kelé aiaili tetrenia Pukoman Paska, uddet nia Jesus sambat sipasiuluinia ka pukoman Sipunenan

¹⁵ Kuanangan ka matadda, "Bulat aikubebesíaké mukom komen Paska sambatta, kei iaili tetrenia kuorik pangoringan

¹⁶ Kau imatonem bagamui ka sikuakku néné: táan te kukokom mitsá komen néné, teret itupatoilá mitsá katukolobat pukoman néné ka Laggai Taikamanua Sibau.

¹⁷ Lepá akkat'akénangan pulokat anggur, Jesus, paniddounangan leú ka Taikamanua masikua surá, iageti

kuanangan, "Alá kam néné, nuparubei kam nia

¹⁸ aipoí, bulé nuagai kam nia: barania kineneiget, táan te kuloló mitsá anggur néné, teret oi nia Purimataat Taikamanua.

¹⁹ Lepá mitsá, alánangan roti. Oto lepána lé aikua surá ka tubut Taikamanua, paabbónangan leú et nia, iageti kaunangan nia ka tubudda sipasiuluinia, kuanangan, "Tubukku te néné [sinegéakenen lulumui. Galaiaké kam néné, pasirepdemmui aku.

²⁰ Kisedda leú et lepat koman, kaunangan pulokat ka tubudda, kuanangan, "Pulokat néné, iaté, pakerekat bagat Taikamanua sibau, sisah'akenen ka logauku, iaté logau sipiliakenen lulumui].

²¹ "Itsó kam! Ai nia sené ipaalei aku ka sia sipajo aku

²² Kirénangan tedda mamatei nia ka sia Togat Manusia, kelé ka siteúakenen Taikamanua; tápoi mateinangan te ka sia sipajo aku!

²³ Iageti taddaakérangan paisé pasasambadda, masikua kasei ka talagadda masigagalaiaké kelé néné

²⁴ Iageti bara pajoggolat ka talagat sipasiului Jesus, kalulut rapaukeli, kasei ka talagadda simakopé beunan tiboï tubu

²⁵ Oto kuanangan ka matadda Jesus, "Tai Rimata ka sara bangsa, sitaiagai Taikamanua, sarat masipaorei tai rayatda lé ragagalai, samba sia sauté, iaté oniakenen, 'Sipasikeli tai Rayat'

²⁶ Tápoi kam geti ka kam, tá momoi nugalaiaké kam kelé nenda. Siabeu tiboï tubu ka talagamui, buítá ibailiu nia kelé sigoisó tiboï tubu, samba sauté buítá ibailiu sia kelé pagugulet

²⁷ Kasei poi, oniakenen siabeu tiboï tubu: sipuuuddet mukom ka meja, élé sia sipuukú nia? Sipuuuddet mukom ka meja lé. Tápoi ai aku ka talagamui kelé sara pagugulet

²⁸ Sarat ai lé kam ka sangamberinia pangoringanku

²⁹ Kelé aakéna kaku gege murimata Ukkui, kisedda leú te kaku, kuaké gege ka tubumui

³⁰ Oto bailiu keré tapuangká kam бага ka tetret iaili tetrenia kupurimata. Iageti puuddetmuian ka kam ka sipulurua uddenan purimataat masiutéaké sipulurua suku ka bangsa Israel.

³¹ "Simon, Simon, arep'aké peité!
Atuobáakéan nia Sanitu bulé isibo kam;
kelé tupasaraaké gandum ka kulitnia,
bailiu simaerú tupasaraaké nia ka sikataí

³² Tápoi akutiddouakéan ekeu ka Ukkui,
Simon, bulé tá imalebbei tonem bagam.
Samba ké atoilangan ekeu kekeu ka
tubukku, buítá nuparon leú et tonem
bagadda ka sia saaleinu.

³³ Iageti kuanangan ka matat Jesus, si
Petrus, "Matarek lé aku Tuhan, tugurú
ka bagat penjara. Samba beri tamatei
ruatta, Tuhan, bulat matarek aku!

³⁴ Tápoi kuana lé nia Jesus, ka matat
Petrus, "Einangan tá mutotokki goú-goú,
gogoi néné, anupakelengan againu aku,
telu ngamitsá.

³⁵ Lepá kuanangan ka matadda Jesus,
"Ka tetret akukoiniaké kam siburú,
tá akuobáaké nuabbit kam dompet,
suppit sambat lanjau élé sipatu, aponia
simagulai ka kam?" Iageti alegiddangan
nia, "Tá anai!

³⁶ Oto kuanangan ka matadda Jesus,
"Tápoi kineneiget geti, kasei sibara
dompet élé suppit, kau raabbit nia;
samba kasei sitá lanjau, buítá rasakiaké
saraubára masisaki lanjaura

³⁷ Aipoí kau imatonem bagamui ka sikuakku néné, ai ruang ka Buko Sipunenan sipasikukua kisé, 'Arakau lé nia kelé sirimanua sijo,' oto buítá muaili ka tubukku. Aipoí aian muaaili kineneiget sangamberinia sitususurat ka bagat Buko Sipunenan.

³⁸ Iageti kuaddangan ka tubut Jesus, sipasiuluinia, "Aian sené rua akutarek'aké kai lanjau." Kuanangan ka matadda Jesus, "Páan, metnangan!

³⁹ Iageti kaddiuakénangan laggai, Jesus, einangan leú et ka eijatnia simarei-rei iaté ka Leleu Zaitun. Oto beri leú ka sia sipasiuluinia, amei leú et sia ka sia masipaaleiaké nia

⁴⁰ Oto kelé aisegé sedda Jesus, kuanangan ka matadda, "Paniddou kam, bulé buí ibara jomui ké ikerek kam pasisiboat.

⁴¹ Iageti reunan'akénangan tubunia goisó ka tubudda Jesus, kelé reunan nia turibbaiaké bukkú

⁴² Oto purekkuknangan leú et Jesus maniddou, pelé nga-ngania, "Ale, Ukkui, moi baí nia, areuaké ka tubukku pangoringan akenen ka tubukku néné.

Tápoi buí ka teú bagakku Ukkui, ka teú bagam lé.

⁴³ [Iageti oi sara malaika masikau ron ka tubunia

⁴⁴ Bulat makopé sou bagania Jesus, kalulut néné paniddounangan leú et bulat sibara ka paatuatnia sipulelelek. Pat pubaí-baínangan attinangnia kelé logau, ka polak.

⁴⁵ Lepá aipaniddou Jesus, toili nia ka tubudda sipasiuluinia. Oto ailinangan sia, ai sia memerep, kalulut reu-reu bagadda

⁴⁶ Iageti kuanangan nia ka tubudda, "Angoi nupeperep kam? Suru kam, samba paniddou kam, bulé tá ikerek kam pasisiboat.

⁴⁷ Talagat paninibo nia Jesus, lotsit-aratulotsit ka sia sangamungkuat sirimanua. Amasiabbít sia, iaté si Judas; sara ka talagat sipasiului Jesus. Iageti einangan leú et ka tubut Jesus, rirriu-riu, sigguknangan leú et nia

⁴⁸ Tápoi kuana lé nia Jesus ka matania, "Ale Judas, kipa, pasiggungan lé anugalai masipajo Togat Manusia?

⁴⁹ Oto kelé araitsó nia sipasiului Jesus sibabara néné, kuaddangan nia ka matat

Jesus, "Kipa, Tuhan, kupasaggrijingan kai sia lanjau

⁵⁰ Iageti tétéakénangan lanjau nia ka sia sara ka talagat sipasiuluinia, ka tubut sara pagugulet imam sabeu, pat belé talingania kai kattoet

⁵¹ Kuana lé ka matania Jesus, "Páan!" Lepá rapenangan talingan pagugulet imam sabeu néné, Jesus, aleakénangan leú et nia

⁵² Iageti kuanangan ka matadda tai imam sabeu samba ka matadda tai perwira sipasijajago Uman Taikamanua, samba leú et tai bajára tai Jahudi, sieei masilabá nia sedda, "Sipananaé pá aku né nukukua kam, pat koí oi kam sibara lanjau sambat bobó-bó, nulabá kam aku

⁵³ Bulat senen gogoian lé koí kukuddu ka talagamui ka Uman Taikamanua, tá koí anulabá kam aku? Niangan né tetrenia nugalaiaké kam nia, ka tetret ai gagalaiaké galajetnia ka sia geget pugepgeman.

⁵⁴ Iageti labáran nia Jesus, abbitrangan nia ka lalep imam sabeu. Ka sia kai Petrus, aitutut Jesus, tápoi makareunan

⁵⁵ Ka talagat gerat lalep, ai ararusui obengan. Oto ei nia ka sia si Petrus ka bet-bet api ipaaleiaké sia sabagei sipuraraka sedda

⁵⁶ Oto lepá itsónangan nia sara pagugulet, si Petrus, ai nia muraraka ka bet-bet obengan, iageti lelek'akénangan putubuat Petrus, lepá kuanangan nia, "Nia ka sia néné, alei Jesus!

⁵⁷ Iageti pakelenangan againa Jesus si Petrus, pelé nga-ngania, "Bulat tá te kuagai nia sirimanua nenda!

⁵⁸ Tápoi tá amauju, itsórangan nia si Petrus sabagei; oto kuanangan nia ka matat Petrus, "Ekeu leú té néné sara ka talagadda!" Oto kuanangan ka matania si Petrus, "Bulatnia tá aku!

⁵⁹ Iageti ai pá sangajam burúnia, oi sia sara mitsá masikua sigereiakenen, "Kirénangan tedda nia néné, sipasiului Jesus, aipoí nia ka sia néné, tai Galilea leú et!

⁶⁰ Kuana lé nia si Petrus ka matania, "Aponia baí. Bulat tá te kuagai nia!" Oto talagat paninibonia si Petrus ipakele againa Jesus, putokkinangan leú et goú-goú

⁶¹ Iageti matainangan si Petrus, Jesus, kinerenangan nia. Iapeité repdemnangan nia sikuat Tuhan ka matania, "Tápei amutokki goú-goú gogoi néné, anupakelengan againu aku telu ngamitsá.

⁶² Iageti bela nia si Petrus sedda, pusounangan leú et, pat pasikúnangan nia

⁶³ Iageti paguileakérangan Jesus, lepá mitsá pabóbokiddangan nia, sipasijajago

⁶⁴ Tabbóranan matania, lepá nou-nourangan nia, pelé nga-nganda, "Kua peité ka tubumai, kasonia aibóbó ekeu?

⁶⁵ Oto maigi peilé bagei paloloiat arakua ka tubunia

⁶⁶ Iageti matsepnia lé, parurúrangan leú et tai bajára tai Jahudi, tai imam sabeu, samba tai guru paamian. Oto abbitrangan leú et Jesus ka matat Mahkama Puarananda

⁶⁷ Kuaddangan ka matania, "Kua pei ka matamai, Rimata Sipaarau leú ekeu néné?" Iageti kuanangan ka matadda Jesus, "Kenanen leú kukua ka matamui, tá leú et matotonem bagamui

⁶⁸ Iageti kenanen leú kunou-nou kam, tá leú et nuaalegi kam

⁶⁹Tápoi barania kineneiget, muuuddet te Togat Manusia kai kattoet Taikamanua Sipulubeunan.

⁷⁰Iageti kuaddangan ka matania, "Oto ké kisedda baí nia, Togat Taikamanua lé ekeu néné, élé?" Kuanangan ka matadda Jesus, "Kisedda tedda, kelé sikuam.

⁷¹Oto kuadda lé nia ka sia, apananta peilé tagagaba kam sipasimumuneng! Aipoí bulat tubut sibara ka ngu-ngunungan ataarep kam nia!"

23 ¹Iageti puriórgan sangamberidda sipurarappat, abbitrangan Jesus ka matat Pilatus

²Oto joakérangan nia sedda. Pelé nganganda, "Akuaili kai nia sirimanua néné, aipapepepe siberikabaga. Aipatatubbuji bagadda sirimanua simigi, bulé tá rabaya pajá kai Kaisar, aipoí aikua Kristus lé nia ka sia néné.

³Iageti nou-nunungan Jesus si Pilatus, kuanangan, "Bulatnia Rimatadda tai Jahudi leú ekeu néné?" Kuanangan ka matania Jesus, "Bulatnia, kelé sikuam.

⁴Oto kuanangan ka matadda tai imam sabeu sambat ka tubudda sirimanua simigi si Pilatus, "Bulat beri sara

akusese selenia sirimanua néné, imateú tuukum'aké nia.

⁵Tápoi memei lé raroron'aké nga-nganda masináná si Pilatus, pelé nga-nganda, "Ka ngantomannia nenda aipatutubbuji bagadda sangamberi sikukuddu ka laggai Judea; siboikí ka Galilea, oto kineneiget aiailingan sené.

⁶Oto kelé aiarep nia si Pilatus sikuadda néné, nou-nounangan sia, pelé nga-ngania, "Taleú tai Galilea lé nia sirimanua néné?

⁷Kelé arasegéaké nia ka tubut Pilatus, kukuddu nia Jesus ka kupkumen Herodes, koiniakénangan sia rataroaké nia kai Herodes, aipoí ka tetret nenda ai nia ka Jerusalem ka sia si Herodes

⁸Oto bulat angká lé bagania si Herodes aiitsó Jesus, aipoí amaburúan aiarep pagalaiat tubut Jesus, samba bulat aikikiddiy iitsó tubunia. Ibesíaké iigbuk igalai kerek, Jesus

⁹Kalulut néné panounoginangan nia si Herodes, tápoi bulat beri sara tá aialegi nga-ngania, Jesus

¹⁰Beri leú et ka sia tai imam sabeu, ai leú et sia ka sia sedda masijojoaké Jesus simakopé

¹¹ Iageti paloloinangan nia samba paguileakérangan nia Jesus tai Herodes sambat saladdounia. Lepá kaurangan ka tubunia saraubat purimataat, iageti toiliakérangan nia mitsá ka tubut Pilatus

¹² Ka gogoi nendangan té arataddaaké arapasuruak mitsá ka sia si Pilatus sambat si Herodes, aipoí bulat sitaipaobá lé sia siboikí

¹³ Iageti rurúakénangan sia si Pilatus tai imam sabeu sambat tai bajá, samba leú et sia tai rayat

¹⁴ kuanangan ka matadda, "Amoi kam sené masitaroaké sirimanua néné ka matakku. Samba anukua kam aipepeaké pupaaturananda sirimanua simigi. Oto kineneiget bulat ka matamuian akupareksa nia. Tápoi bulat beri sara akusese jo sigalainia, kelé sisusuiakenenmui ka tubunia

¹⁵ Beri ka sia si Herodes leú et, kisedda leú et sipinaatunia; aikoiniaké koí Jesus ioi mitsá ka tubumai. Bulat tá mateú tuukum'aké nia simateiakenen sirimanua néné, kalulut tatat jonia

¹⁶ Kalulut néné, masipabóbokiniangan lé kugagalai, lepá belaakékungannia.

¹⁷ [Kelé simarei-rei senen ipot Punen Paska, buítá ibelaaké ka sia sara situuukum.

¹⁸ Iageti pugereirangan sangamberidda siparururú sedda, pelé nga-nganda, "Mateiaké lé nia! Oto belakénungan ka kai si Barabas!

¹⁹ (Si Barabas néné, atuukum'aké nia, kalulut aibaraaké pulamagat ka laggai Jerusalem, samba leú et pasimamateiakéna sirimanua.

²⁰ Ka sia geti si Pilatus, ai lé igegelai ibelaaké Jesus. Kalulut néné, panibonangan mitsá ka matadda sirimanua simigi

²¹ Tápoi memei lé raabeuaké nga-nganda mugerei masikua, "Pattáaké lé nia ka loiná siliktenga! Pattáaké lé nia ka loiná siliktenga!

²² Iageti kuanangan ka matadda sirimanua simigi si Pilatus sikatelunia, "Apa poi jonia? Bulat tá akusese beri sara jonia, imateú tuukum'aké nia simateiakenen! Masipabóbokiniangan lé kugagalai, lepá belakékungan nia.

²³ Tápoi ia pei raalá karoronda mugerei rabesíaké itupattáaké Jesus

ka loiná siliktenga. Kalepakatnia tá leú
amusiboboi gereira

²⁴ Iageti orak'akénangan ukum
simateiakenen ka tubut Jesus, si Pilatus,
siripot kiddiyet bagadda sirimanua simigi

²⁵ Oto belaakénangan leú et ka sia si
Barabas siripot siniddoura, iaté sara
situuukum kalulut aibaraaké pulamagat
samba pasimamateiakéna sirimanua.
Iageti segéakénangan Jesus ka kabeira,
bulé ragalai siobára ka tubunia

²⁶ Iageti abbitrangan leú et Jesus. Oto
talagat pueenungra, paseseakérangan
si Simon tai Kirene, ai nia memei ka
Jerusalem. Alárgan nia, paksaddangan
nia bulé ibairat siliktenga, masitut Jesus

²⁷ Maigi sia sieei masitut Jesus.
Ka talagadda ai piga pá tainanalep.
Tainanalep néné ai sia mugegeri
masisoibi Jesus

²⁸ Iageti pitsanangan sia tainanalep,
Jesus, kuanangan ka matadda, "Ale
kam tainanalep sibabara ka Jerusalem!
Bá sosoibi kam aku. Tubumui samba
tatogamui lé soibi kam

²⁹ Aipoí iaaili te tetrenia rakua,
'Apanganté erut uktukra tainanalep

sitaipususuruket samba sitaipususulé
samba leú et sitaipasitototoni toga!

³⁰ Ka tetret nenda te rakua ka tubut
leleu, 'Sak-sak kai kina leleu!' samba ka
patinambu-tinambu, 'Labbú kai!

³¹ Aipoí ké beringan ka tubut loiná
sipuririmanua aragalaiakéan ka tubunia
kisedda, oto sarapeite ka tubut loiná
simamantei, igit ragagalaiaké ka tubunia
ka sia!

³² Oto ai sedda sabagei araabbít rua
sikataí paraboat, bulé tuukum'aké sia ka
sia simateiakenen sambat Jesus

³³ Kelé arasegé ka sara kudduat sipuoni,
"Lakkupat", siliktengaakérangan Jesus
sambat nenda sirua sikataí paraboat;
sara kai kattoetnia, samba sara mitsá
kai katsiunia

³⁴ Iageti paniddounangan Jesus, pelé
nga-ngania, "Ale Ukkui, appéaké jodda.
Aipoí tá raagai aponia sigalaiakenenda
néné!

³⁵ Oto pauktukrangan leú et raparubei
bibilet tubut Jesus. Ka sia sirimanua
simigi leú, amei leú et sia ka sia sedda
paigbuk. Ka sia tai bajára tai Jahudi,
riu-riunia lé rapaloloi Jesus, rakua ka
tubunia, "Sabagei airop'akéan sia. Oto

ké sibulatnia Rimata Sipaarau sipilit
Taikamanua baí nia néné, kauan isibo
ibuet tubunia kineneiget, bulé ibela!

³⁶Tai tentera leú ka sia, arapaloloi leú
et Jesus. Iageti ei sia rakau lónia anggur
simalagá

³⁷Kuaddangan ka matania, "Ké
Rimatadda tai Jahudi baí nia ekeu néné,
kauan buet'an tubum, bulé nubela!

³⁸Iageti ka loiná siliktenga, saliu uténia,
ai arasurat'aké nga-nga sipasikukua,
"Nia té néné, Rimatadda tai Jahudi.

³⁹Beri leú et sara ka talagadda sirua
sikataí paraboat néné leú, aipaloloi leú
et Jesus. Aikua, "Rimata Sipaarau tebaí
ekeu, elé? Oto kauan buet'an tubum
nubela, lepá oi ekeu nurop'aké kai ka
kai, bulé kubela kai!

⁴⁰Iageti anunangan nia alei nia,
pasasambadda sikataí paraboat, pelé
nga-ngania ka tubunia, "Ale, tá malotó
ekeu ka Taikamanua? Kirénangan tedda
makeré tatuukum simateiakenen

⁴¹Sarat néné lé, ukuman sisilóta ka
sita, pasese siripot kataíta. Tápoi ka sia
geti, bulat beri sara jonia!

⁴² Iageti kuanangan ka matat Jesus,
"Ale Jesus, ké aian ekeu muririmata,
repdem aku!

⁴³ Oto kuanangan ka matania Jesus,
"Kau imatonem bagam ka sikuakku
néné, Gogoi néné, makeré taei ruatta ka
Paradaiso.

⁴⁴ Iageti malegre bóbó pulurua sinágó,
magep-gepnangan matat sulu. Oto
taddaakénangan imagep-gep sangaliot
laggai, pat aili bóbó telu ka soibokat

⁴⁵ Mabiritnangan leú et ka sia komang
kekre ka bagat Uman Taikamanua, silá
oi rua

⁴⁶ Iageti pugereinangan Jesus, pelé
nga-ngania, "Ale Ukkui! Ka tubum lé
kusegéaké tubukku néné!" Oto kelé
aikua néné, tatá-aitatá engania

⁴⁷ Kelé aiitsó nia sibabara néné utéra
tai tentera, umun'akénangan leú et
Taikamanua. Pelé nga-ngania, "Oto bulat
sibulatnia leú, tá anai jonia sirimanua
néné!

⁴⁸ Oto sia sangamberidda sieei paigbuk,
lepá araitsó nia sangamberi sibabara
néné, toili sia; tápoi bulat makopé
taisesena bagadda

⁴⁹ Beri leú et ka sia tainanalep sipaaleiaké Jesus, iaté sipasitutut nia barania ka Galilea, ai sia masiiigbuk ka sareunan sangamberinia sibabara néné

⁵⁰ Oto ai sara sipuoni si Josep, sibabara ka Arimatea ka propinsi Judea. Simatopit samba simaroipo бага lé nia. Ai lé ingengenaaké tubunia ioi Purimataat Taikamanua. Kenanen nia ka sia néné sara laddou Mahkama Puaranan, tápoi tá maré-ré nia ka siteúakenenda, samba leú et ka sigalaiakenenda tai mahkama

⁵¹ (23:50)

⁵² Iageti einangan leú et ka tubut Pilatus, itiddou bulé iobáaké ialá tubut Jesus simamatei

⁵³ Oto gorosot'akénangan tubut Jesus simamatei néné, ka loiná siliktenga, iageti tabutnangan nia komang simabulau simabau. Galak'akénangan nia ka bagat ratei leleu bukkú sikailú. Ratei néné, tápei atupakei

⁵⁴ Gogoi nenda iaté gogoi Jumat, tápoi amalegrengan leú et iaili gogoi Sabbath

⁵⁵ Ka sia tainanalep sipasitutut nia barania ka Galilea leú, amei leú et sia ka sia, raiitsó kipa katugalangan Jesus ka bagat ratei

⁵⁶Oto lepá toili sia rapatarek pasingi-singin samba leú et tula simasingin, masitulaji tubut Jesus simamatei. Tápoi ka gogoi Sabbath puariddangan, masitut ka sikuat surukat.

24 ¹Iageti ka gogoi Menggui, maseggei peilé ameian sia tainanalep ka puariat, raabbit pasingi-singin sinarek'akenenda

²Kelé arasegé ka puariat, itsórganan atuguilúan bukkú takket ratei

³Oto gurú sia ka bagat ratei, tápoi tá arasese sedda tubut Tuhan Jesus simamatei

⁴Ai sia sedda muririó, aipaiingo sia, rapaatu sibabara néné, tulut rió-arapurió ka bébéra rua sipuleppei simakirisau

⁵Oto bulat simakopé lotóra, iageti purappoddangan ka polak. Lepá kuaddangan ka matadda sirua néné, "Nugagaba kodda kam nia sipuririmanua ka talagadda sirimanua simamatei

⁶Tá anai nia sené. Atusurungan nia! Repdem kam kelé sikuania ka matamui ka tetret ai peilé nia mukukuddu ka talagamui ka Galilea

⁷Iaté, 'Buítá rasegéaké Togat Manusia ka kabeira sijo, bulé rasiliktengaaké nia.

Iageti ka gogoi sikatelunia, suru nia mitsá.'

⁸Oto iapeité repdemrangan nia ka sia tainanalep kelé sikuat Jesus, ka matadda

⁹Kelé aratoili tainanalep baradda ka puariat, pungu-nguan'akérangan nia sangamberi sibabara néné ka matadda tai apostel sipulurua sambat ka matadda sipasiuluinia sabagei

¹⁰Sia tainanalep sipasisesegéaké ka matadda sipasiului Jesus, iaté: si Maria Magdalena, si Johanna sambat si Maria inan Jakobus samba tainanalep saaleira sabagei

¹¹Tápoi ka bagadda lé te ka sia tai Apostel tá sibulatnia sikuadda néné. Bulat beri tonem bagadda ka sikuadda tainanalep néné

¹²Tápoi ka sia geti si Petrus, kelé aiarep nia, suru nia, pabalaunangan leú et,iei ka puariat. Iageti kuiluakénangan tei-teinia iloggouaké bagat ratei, tápoi sarat komang poposa lé aiitsó. Oto toilinangan leú et ka ingon бага, masipaatu pagalaiat sibabara néné

¹³Ka gogoinia nenda leú et, ai sia rua sipasiului Jesus sieei ka laggai Emmaus.

Ai pulu sara ngakilometer reunannia ka Jerusalem

¹⁴ Ai sia mueenung, airapalalaibóaké pagalaiat sibabara néné

¹⁵ Oto talagat patitibojidda nia, lotsit-aitulotsit Jesus, paenung'akénangan leú et sia

¹⁶ Airaiitsó nia Jesus, tápoi kelé ai lé apa pá sisakkeri matadda buí raagai nia

¹⁷ Iageti tekánangan sia Jesus, pelé nga-ngania ka tubudda, "Aponia baí nenda nupalalaibóaké kam ka enungan?" Oto ari arapuenung, sulei lé matadda, kalulut reu-reu bagadda

¹⁸ Lepá nou-nounangan nia sara ka talagadda, iaté sipuoni si Keleopas, "Taleú saram'an lé ukkui, tairauma sikukuddu ka Jerusalem, sitaiagai sibabara simaruei néné?

¹⁹ Oto kuanangan ka matadda ka sia Jesus, "Aponia poi sibabara?" Pelé nga-nganda, "Néné lé, pagalaiat sipuaaili ka tubut Jesus, si Natsaretna. Nabi lé nia. Bulat simakerek tiboiet samba ai ka tubunia gege simaron, ka matat Taikamanua sambat ka matadda sangamberi sirimanua

²⁰ Arasegéaké nia tai imam sabeu sambat tai bajá ka bangsatta ka kabeira sipasiukum, bulé tuukum'aké nia simateiakenen, iageti siliktengaakérangan leú et nia

²¹ Bulat akukaroningan kai nia бага, ibelaaké bangsa Israel. Katelungagogoinangan té néné, lepána aibara sibabara néné

²² Sarapei mitsá, ai sia piga pá tainanalep ka talagamai arabaraaké kakiseiat ka bagamai. Araei simaseggei peilé ka puariat

²³ Tápoi tá araitsó sedda tubut Jesus simamatei. Lepá toili sia, kuaddangan ka matamai, iitsóra malaika, samba kukuadda ka matadda, samalaika, katususurut Jesus ka simamatei

²⁴ Lulut néné, eirangan leú et piga pá saaleimai ka puariat. Kelé arasegé, bulat tá aijulut kelé ka sikuadda tainanalep; sarat ka sia néné, tá araitsó tubut Jesus.

²⁵ Iageti kuanangan ka matadda Jesus, "Bulat sitaiagai paatuat lé kam néné! Bulat maburú nukatonemi kam бага sangamberi sikuadda tai nabi

²⁶ Kipa, tá poi mangorik lé boikí
igagalai Rimata Sipaarau, kei mei nia ka
pulatsanannia?

²⁷ Iageti taddaakénangan ikolouaké
ka matadda, Jesus, sangamberinia
sitususurat ka bagat Buko Sipunenan,
pagalaiat tubunia, barania ka
sinurat'akenen Mose, pat aili ka
sinurat'akenenda tai nabi

²⁸ Kelé aramalegre ka laggai
ailiakenenda, galainangan Jesus
kelé baí iririu-riuaké lé ipuenung,
isabauaké laggai

²⁹ Iageti keraakérangan itui-tui,
Jesus. Kuaddangan ka matania, "Ka
kudduatmaian lé tapugogogoi, aipoí
kineneiget masosoibóan lé sulu, aian pei
magegep-gep." Iageti pugogoirangan
leú et ka kudduatda

³⁰ Oto ai sia mukokom, alánangan
roti, Jesus, kuanangan surá ka tubut
Taikamanua, lepá paabbónangan nia,
kaunangan nia ka tubudda

³¹ Bulat iapeité agairangan pu-Jejesus
nia. Tápoi lepá agounangan nia ka
matadda

³² Iageti patiboddangan pasasambadda,
"Ale, tenan lé ka bagatta poa-poau,

ka tetret aipatiboaké sita ka enungan,
aipakolou ka sita bagat tiboiet ka Buko
Sipunenan, elé?

³³Iangan leú et gogoinia, toili sia ka
Jerusalem. Segé sia sedda, ailiddangan
ai sia parururú ka sia sipasiului sipulusara
sambat sipasiului sabagei

³⁴Iageti kuaddangan ka matadda,
"Bulat sibulatnia, atusurungan nia mitsá
si Tuhan! Aipatoiláan tubunia ka tubut
Simon!

³⁵Oto taddaakérangan nia ka sia
sipasiului Jesus sirua néné, masipungu-
nguan'aké sangamberinia siitsóra ka
enungan, samba leú et ratiboi, kipa aioi
araagai nia Jesus, aipaaabbó roti

³⁶Ai peilé ranununuaké siitsóra, tulut
rió-aipurió Jesus ka talagadda. Iageti
kuanangan ka matadda, Jesus, "Bulé
ipaalei kam aban Taikamanua!

³⁷Oto tugégérangan leú et pagalú
lotóra bagei. Aipoí ka bagadda te sanitu
lé araitsó

³⁸Tápoi kuanangan ka matadda Jesus,
"Malolotó kodda kam? Samba iparurua
kodda bagamui ka tubukku

³⁹Itsó kam néné kabeiku samba
rerekku. Bulat aku lé néné! Rape peité

kam aku samba lelek'aké peité kam!
Aipoí ka sia sanitu, tá anai akkulá samba
tolatnia, kelé siitsómui ka tubukku kaku
néné.

⁴⁰ Aikukua kelé nééné Jesus, aipatotoilá
ka tubudda kabei sambat rerenia

⁴¹ Tápoi kelé iitsó tápei matotonem
bagadda ka tubunia, kalulut angkat
bagadda samba kisei ka bagadda,
kuanangan ka matadda Jesus, "Taleú ai
kanmui sené?

⁴² Iageti kaurangan ka tubut Jesus
sangapaggla iba sigoreng

⁴³ Oto alánangan nia nenda iba Jesus,
komnangan leú et nia ka matadda

⁴⁴ Lepá kuanangan ka matadda Jesus,
"Iaté nééné kelé siniboiku ka matamui,
ka tetret ai peilé aku ka talagamui:
buítá muaili sangamberinia sitususurat
pagalaiat tubukku ka bagat Bukot Mose,
samba tai Nabi, samba leú et ka Mazmur.

⁴⁵ Iageti bukaakénangan paatuadda
Jesus, bulé raagai katukolobat tiboiet
sitususurat ka Buko Sipunenan

⁴⁶ Lepá kuanangan ka matadda,
Jesus, "Ka bagat Buko Sipunenan,
ai atusurat'aké, buíta mangorik nia
boikí Rimata Sipaarau nééné, samba

buítá tusuru nia ka simamatei ka gogoi sikatelunia

⁴⁷ Samba leú et, buítá ka oninia, tupangantoman sangamberi taikapolak, bulé rabauaké paatuatda, iappéaké jodda Taikamanua. Samba Katuareman Simaerú néné, buítá tapakakra barania ka Jerusalem

⁴⁸ Oto kam te sipasimumuneng'aké sangamberinia néné

⁴⁹ Ai leú kukoiniaké ka kam Ketsat Sipunenan, kelé sitonéakenen Ukkui. Tápoi buítá mariu-riu nungena kam nia ka Jerusalem néné, teret sop-sopna ka tubumui geget Taikamanua.

⁵⁰ Lepá abbitnangan sia sipasiuluinia Jesus, raei ka Betania. Segé sia sedda, totoiakénangan kabeinia Jesus, sukat'akénangan leú et sia

⁵¹ Oto aisusukat'aké sia, tusakainangan leú et ka manua, iageti pasaraddangan leú et

⁵² Iageti purappoddangan leú et masipaniddogi nia, lepá toili sia ka Jerusalem ka angkat бага sabeu

⁵³ Samba riu-riunia lé raumun'aké Taikamanua ka Uman Taikamanua.

Yohanes

1 ¹ Ka panandaatnia peilé, ainangan tá ibabaraaké manua sambat polak Taikamanua, aian turerere kababaranian ka sia Tiboiet. Aian nia ka sia Tiboiet néné ka bet-bet Taikamanua, iageti Tiboiet néné leú, makeré lé nia ka tubut Taikamanua

² Taddanangan aian nia turerere mukukuddu ka bet-bet Taikamanua, ka sia Tiboiet néné

³ Ka tubunia lé ka baraiat sangamberinia, samba sangamberinia sibabara néné, tá anai tenan nia bara; ké tá kalulunia

⁴ Bakkat purimanuaiat lé Tiboiet néné ialeú et purimanuaiat néné, sipatóaké sirimanua

⁵ Mutoro lé pató néné ka simagep-gep tápoi tá momoi ipéaké nia pugep-geman

⁶ Iageti oinangan leú et sara pakoiniet Taikamanua, sipuoni si Johannes

⁷ Kaooi nia néné, iaté masisegéaké pagalaiat pató néné, bulé imatonem

bagadda sangamberi sirimanua ka tubunia

⁸Tápoi tápei te nia néné oniakenen pató, sarat masisegéaké pató lé nia ka sia

⁹Amoian nia ka polak ka sia, oniakenen bulat pató sipulelelek, sitoroji sangamberi sirimanua

¹⁰Ai nia ka polak Tiboiet néné, samba kalulunia lé aibara polak néné, tápoi tá raagai nia taikapolak

¹¹Amoian nia bulat ka bakkat laggainia, tápoi tá arasiló nia sabangsanian

¹²Tápoi ai leú te sia sipasisisiló nia, samba ai leú et sia simatonem бага ka tubunia. Oto kaunangan ka sia hak ibailiu sia tatogat Taikamanua

¹³tápoi tá te sirimanua aitútúaké matadda, aipoí ka Taikamanua lé ka baraiat puririmanua sibau néné

¹⁴Aibailiuan nia sirimanua Tiboiet néné, aian nia mukukuddu ka talagatta, ataitsóan kam pulatsanannia. Aisiló pulatsanan néné, siripot puooni nia togat Ukkui, sisasara. Ka tubunia lé taiitsó kam Taikamanua, samba leú nuntut bagania ka tubutta

¹⁵ Sipasimumuneng'aké pagalaiat tubunia, iaté si Johannes, aikua: "Nia té néné sikuakku: Momoi te nia kurukku, tápoi nia peilé abeu tiboí tubu ka tubukku, aipoí einangan aku kaku tá mututú-tú mata, aian nia ka sia.

¹⁶ Sipulu katat бага lé nia; tá muaari, isukat'aké sita

¹⁷ Aiaké Surukat Taikamanua ka tubutta, iaté si Mose; tápoi katet бага samba putotopit Taikamanua geti ka tubut Jesus Kristus lé ataitsó kam nia

¹⁸ Bulat beri peité sia sara sipasiiitsó Taikamanua, sarat togat Ukkui sisasara lé, lepá, iaté simakeré ka Ukkui, simakopé legre ka tubunia. Nia lé ipopoiliat Ukkui ka sita

¹⁹ Iageti koiniakérangan tai imam samba sia ka suku Lepi, tai bajára tai Jahudi sikukuddu ka Jerusalem, raei ka tubut Johannes, bulé raiséaké nia, rakua, "Kasonia ekeu néné?

²⁰ Oto poiliatnangan tubunia si Johannes bulat simakolou ka tubudda, pelé nga-ngania, "Aku kaku geti néné, tá Rimata Sipaarau.

²¹ Iageti kuaddangan ka matania, "Oto kasonia lé ekeu? Taleú si Elia lé ekeu?"

Aleginangan nia si Johannes, ikua ka matadda, "Taá." Oleakérangan mitsá raisé nia pelé nga-nganda ka tubunia, "Taleú Nabi lé ekeu?" Kuanangan ka matadda, "Taá.

²² Kuaddangan mitsá ka matania si Johannes, "Oto kauan, poiliat pei ka matamai, kasonia lé ekeu néné, bulé ibara segéakenenmai ka tubudda sipasikokoiniaké kai, apa sikuam ka matamai pagalaiat tubum?

²³ Iageti kuanangan ka matadda si Johannes, "Aku te nenda kelé sipoiliat Nabi Jesayas: 'Sipusosoga ka simatangeu, masikua: Pagaktuk kam enungan Tuhan.'

²⁴ Kuaddangan ka matat Johannes sia sikoiniakenenda tai Parise

²⁵ "Oto ké tá Rimata Sipaarau ekeu néné, elé tá si Elia, sambat tá sipuoni tai Nabi, masiraraú kodda ekeu?

²⁶ Aleginangan nia si Johannes, pelé nga-ngania, "Aku geti kaku néné, oinan lé kuraraúaké. Tápoi ka talagamui sené, ai sia sara taiaagaietmui

²⁷ Siooi kuruk tei-teiku. Tápoi beri masirugut talit tarangaínia, tá mateú aku.

²⁸ Ka laggai Betania te aipuailli sangamberinia néné, iaté ka saigit ka kabelaiat sulut Oinan Jordan, ka kudduat pasiraúkatnia sirimanua, si Johannes

²⁹ Matsepnia lé mitsá, itsónangan Jesus si Johannes ai nia memei masitaget'aké nia. Iageti pusiblanangan si Johannes, pelé nga-ngania, "Itsó kam, nia té néné, Togat Biri-birit Taikamanua, sipasipoposa jodda taikapolak

³⁰ Nia té néné kuanenku ka matamui, siooi kuruk tei-teiku. Tápoi nia peilé abeu tiboí tubu ka tubukku, aipoí kei babara aku kaku, aian turerere kababara nia ka sia

³¹ Panandaatnia poí, bulat beri agaiku nia ka sia néné. Tápoi bagat kaooiku néné, iaté masiraú sia oinan, bulé raagai nia ka sia néné sabangsa Israel.

³² Ka sia leú et si Johannes imuneng'aké leú et kisé, "Akuitsó Ketsat Sipunenan itugorosot kelé mutubu marpati ileugi nia

³³ Ka tetret nenda tápei kuagai nia. Tápoi kelé aikua ka matakku Taikamanua, sipasikokoiniaké aku masiraú sirimanua oinan, kisé, 'Ké nuitsó itugorosot Ketsat Sipunenan, ileugi sara

sirimanua, nia té nenda sipasiraraúaké Ketsat Sipunenan.'

³⁴ Iageti pusiblanangan si Johannes, pelé nga-ngania, "Oto bulat tubut tubukkungan te amasiitsó; kalulut néné muneng'akékungan nia kaku, bulat Togat Taikamanua lé nia.

³⁵ Iageti matsep, ei nia mitsá si Johannes ka kudduat nenda leú et, sambat rua sipasiuluinia

³⁶ Kelé aiitsó aitusabau Jesus, kuanangan, "Itsó kam! Nia té néné Togat Biri-birit Taikamanua.

³⁷ Oto ka sia sipasiului Johannes sirua néné, kelé araarep sikuat Johannes ka matadda, eirangan leú et masitut Jesus

³⁸ Kelé aipitsa tei-teinia ka sia Jesus, itsónangan airatutut nia. Iageti kuanangan ka matadda, "Aponia nugagaba kam?" Belan nga-nganda lé masikua ka matat Jesus, "Ale Rabbi, kaipa nukukuddu?" (Rabbi, katukolobatnia, guru.

³⁹ Iageti kuanangan ka matadda, Jesus, "Sita kam, nuitsó kam nia." Oto eirangan leú et sambadda, raitsó kaipa kudduatnia. Ka tetret nenda

aiailingan bó-bó epat ka soibokat. Oto pugogoirangan sambadda sedda

⁴⁰ Oto sara ka talagat sirua sipasiaarep sikuat Johannes, lepá ei nia masitut Jesus, iaté sipuoni si Andareas, sarainan Simon Petrus

⁴¹ Iageti olaakénangan nia si Andareas mei masigaba sarainania si Simon. Kelé aiaili nia, kuanangan ka matania, "Apaailingan kai si Mesias!" (Mesias, makeré lé Kristus, iaté: Rimata Sipaarau.

⁴² Einangan leú et si Andareas itaroaké si Simon ka tubut Jesus. Iageti kinerenangan nia Jesus si Simon, pelé nga-ngania ka matania, "Ekeu néné iaté sipuoni si Simon, togat Jona. Tuooniakéan lé te ekeu si Kepas." (Kepas, makeré lé Petrus, katukolobatnia, iaté, leleu bulak.

⁴³ Kelé aimamatsep, teúakénangan Jesus mei ka Galilea. Iageti paailiddangan si Pilipus, kuanangan ka matania, "Konan, nutut aku!

⁴⁴ Laggainia ka sia si Pilipus ka Betsaida, iaté ka kudduatra tai Andareas sambat tai Petrus

⁴⁵ Lepá ailinangan si Natanael si Pilipus. Iageti kuanangan ka matania,

"Akuailingan kai nia kelé sipoiliat Mose sambat sisegéakenenda tai nabi. Nia néné iaté tai Natsaret, togat Josep.

⁴⁶Tápoi aikua lé ka sia si Natanael ka matat Pilipus, "Kipa pá ora, babara leú pá simaerú ka laggai Natsaret?" Iageti kuanangan ka matat Natanael si Pilipus, "Taá, kisé lé, konan lé nuitsó nia, kekeu.

⁴⁷Kelé aiitsó nia Jesus si Natanael ai nia memei masiailiaké nia, pusiblanangan leú et, isiblaaké pagalaiat tubut Natanael, pelé nga-ngania, "Iaté néné sara bulat tubut tai Israel sipulelelek. Beri sara pajoat ka bagat paatuatnia.

⁴⁸Kuanangan si Natanael ka matat Jesus, "Kipa galainia anuagai aku?" Kuanangan ka matania Jesus, "Ainangan tá isosogai ekeu si Pilipus, akuitsoán ekeu, ai ekeu mukukuddu ka tei sileu.

⁴⁹Iageti pusiblanangan ka sia si Natanael, pelé nga-ngania, "Guru, Togat Taikamanua lé ekeu, Rimatadda tai Israel!

⁵⁰Kuanangan ka matania Jesus, "Kalulut kukuakku ka matam iitsóku ekeu ai ekeu mukukuddu ka tei sileu peilé, amatonem'an bagam ka tubukku?

Oto nuiitsó peilé te mitsá, bulat sisaliu beunan nenda peilé!

⁵¹ Kuanangan nia mitsá Jesus ka matat Natanael, "Bulat sibulatnia te kuanenku néné ka matam, kau nukatonemi nia; nuiitsó te itubuká manua, samba samalaikat Taikamanua, situsasakai sambat sipangangaraí, raailiaké Togat Manusia."

2¹ Kelé aitusabau rua ngagogoi burúnia, baraakérangan sara punen putalimogat ka laggai Kana ka propinsi Galilea. Ka punen nenda ai nia ka sia inan Jesus

² Ka sia leú et Jesus sambat sipasiuluinia, arasogai leú et sia ka sia mupunen ka putalimogat néné

³ Kelé aitatá anggur, kuanangan inannia ka matat Jesus, "Asapprungan anggurda.

⁴ Iageti kuanangan ka matat inania Jesus, "Bá gugugluaké aku, Ina. Aipoí tápei aiali tetrenia kupatoilá tubukku.

⁵ Oto kuanangan ka matadda inan Jesus sapagugulet néné, "Apa lé ikua ka matamui, galaimuian nia.

⁶ Iageti sedda ai enem ngambua bubbuman, sinarek'akenenda kaunen pasibuiat rere siripot aratda tai Jahudi.

Ai pasasangotu ngaliter igit ka bagania senen bubbuman néné

⁷Kuanangan ka matadda Jesus sapagugulet néné, "Kau kam oinan ka bagania sangamberi bubbuman néné." Iageti kaurangan oinan ka bagania, pat tim

⁸Lepá kuanangan ka matadda Jesus, "Oto kauan, seilú kam goisó oinan néné, nuei kam nukau kam nia ka siutéaké punen néné. Iageti abbitrangan nia oinan nonda ka siutéaké punen.

⁹Iageti nanamnangan nia nenda oinan sibailiu anggur. (Tápoi tá iagai kabaraiaitnia anggur néné, sarat sia lé sapagugulet sipasibabaliuaké oinan, iagai nia.) Oto rengeiakénangan tubunia siutéaké punen néné ka tubut simanteu sitalimouakenen

¹⁰kuanangan ka matania, "Kelé simatukle tugalaiaké, anggur simakopé erú lé boikí tukakau lóra tairauma sipupu-punen, tápoi ké geti asegéan bagadda muló, iapeité belaaké anggur sitaimakopé nanam. Tápoi anukoirí lé kam anggur bulat simaerú néné, teret kineneiget!

¹¹ Iaté né pukerengan siboikí sigalai Jesus ka laggai Kana. Aigalai néné Jesus, iaté ka laggai Kana ka propinsi Galilea. Toggaiat néné te masipatoilá pulatsanannia. Iageti matonemnangan bagadda sipasiuluinia ka tubunia

¹² Lepá, ei sia ka Kapernaum sambadda sainania, sambat sasarainania, samba leú et sipasiuluinia. Iageti kuddu sia sedda piga ngagogoi pá burúnia

¹³ Kelé aimalegre iaili tetrenia Punen Paskadda tai Jahudi, einangan leú et Jesus ka Jerusalem

¹⁴ Iageti ailinangan sia Jesus ka Uman Taikamanua sipasisasakiaké jai, biri-biri, sambat umá marpati. Ka sia leú sipasisisiliy bulagat, ai sia mututukú sedda

¹⁵ Iageti tikainangan leú et tali, Jesus, ibara jijigunia; oto pausijinangan leú et sangamberi tarimeu, iaté biri-biri sambat jai ka bagat Uman Taikamanua. Paluggánangan leú et mejadda sipasisisiliy bulagat, katenan bulagatda aparappi ka polak

¹⁶ Kuanangan ka matadda Jesus, sipasisasakiaké umá marpati, "Abbit kam sangamberinia sikukuddu sené.

Bá babailiuké kam nia Uman Ukkuiku néné, kudduat pasakiatmui!

¹⁷ Oto iapeité repdemrangan nia ka sia sipasiuluinia, kelé ka sitususurat ka Buko Sipunenan, sipasikukua kisé, "Nuntut bagakku ka Umam lé Tuhan, aimatei ka tubukku.

¹⁸ Iageti pajoggloakérangan Jesus tai bajára tai Jahudi, pelé nga-nganda ka tubunia, "Galai peité kiseiet, ibara itsoketmai, kuagai kai kababaranian haknu masigalaiaké kelé néné.

¹⁹ Tápoi belan nga-ngania lé Jesus, ikua ka matadda, "Ragat'an lé kam Uman Taikamanua néné, tápoi ka bagat telu ngagogoi burúnia, rióakékungan nia mitsá.

²⁰ Oto kuaddangan nia ka sia, "Epat ngapulu enem ngarura burúnia aitugalai Uman Taikamanua néné. Kipa kekeu momoi nurióaké nia mitsá ka bagat telu ngagogoi?

²¹ Tápoi tubunia lé iooniaké Jesus, Uman Taikamanua

²² Oto lepá, aitusuru Jesus ka simamatei, iapeité repdemrangan nia sipasiuluinia, kukuana ka matadda Jesus, pagalaiat néné. Iageti matonemnangan

bagadda ka sitususurat ka bagat Buko Sipunenan samba ka sangamberi siniboi Jesus ka matadda

²³Maigi sia simatonem бага ka tubut Jesus, ka tetret ai nia ka Jerusalem mupupunen Paska, kalulut maigi kerek aigalai

²⁴Tápoi ka sia geti Jesus, tá aikatonemi sia бага, iagai lé poí sia sangamberi sirimanua

²⁵Tá anai lulunia rakolouaké ka matania pagalaiat tubudda kasei pá; aipoí nia ka sia, iagai apa sibabara ka paatuatda sirimanua.

3¹Ai sara siagai enung puaranan ka talagadda tai Parise, iaté sipuoni si Nikodemus

²Iageti sinoibó ei nia ka tubut Jesus, kuanangan ka matania, "Ale Guru, aikuaagai kai kokoiniakéna ekeu Taikamanua. Aipoí tá anai sia beri sara siagai masigalai kerek kelé sigalaiakenennu néné kekeu, ké tá ipaalei nia Taikamanua.

³Oto kuanangan ka sia Jesus ka matat Nikodemus, "Kau imatonem bagam ka sikuakku néné; bulat beri te sia sara

ibabailiu sapaamian Taikamanua, ké tá mutú-tú matania mitsá.

⁴Iageti kuanangan nia ka sia si Nikodemus ka matat Jesus, "Ale, kaipa iooi iputútú matadda mitsá sikebbukat. Momoi leú pá isuruket'aké nia mitsá inania, lepá tú-túakénangan matania mitsá inania?

⁵Oto alegina lé nia ka sia Jesus, "Bulat sibulatnia sikuakku néné ka matam: ké tá itú-túaké matadda oinan samba Ketsat Sipunenan, bulat tá momoi ibailiu sia sapaamian Taikamanua

⁶Aipoí sirimanua siripot ka pusirimanuaat, saeppudda lé itutú-túaké matadda, tápoi siripot ka puketsanan geti, Ketsat Sipunenan lé itutú-túaké matadda

⁷Oto buí imakeppu ka bagam, ké kukua ka matam: buitá mutú-tú matamui mitsá

⁸Kelé leú ka sia ipuboroi rusa, kaipa lé iobá ei; aitaarep ukkúnia, tápoi tá taagai kaipa kabaraiaatnia, samba kaipa ieei. Oto kisedda leú te galainia ka sia sinútúakenen Ketsat Sipunenan.

⁹Iageti kuanangan ka matat Jesus, si Nikodemus, "Oto kipa ipaeerú ibara néné?

¹⁰ Kuanangan ka matania Jesus, "Ale, guru lé ekeu ka bangsa Israel; malangan pá tá nuagai nia néné

¹¹ Kau imatonem bagam ka sikuakku néné: siagaimai lé kutitiboi kai, samba siitsómai lé kumumuneng'aké kai: tápoi beri tonem bagamui ka simuneng'akenenmai

¹² Oto ké tá baí matonem bagamui kupungu-nguan'aké pagalaiat sibabara ka polak néné; kipangan lé iooi imatotonem bagamui ké kupungu-nguan'aké baí kai pagalaiat sibabara ka manua

¹³ Beri peité sia sara situsasakai ka manua, sarat nia situgogorosot ka polak peilé, iaté Togat Manusia

¹⁴ Kelé aitoak'aké ulou tembaga si Mose ka sara loiná ka simatangeu, oto buitá kisedda leú te ka sia itubuak'aké Togat Manusia

¹⁵ bulé rabakkati purimanuaiat sipulelelek samba sitaitatatá, ka sia simatonem бага ka tubunia.

¹⁶ Kisé te bulat kopet katet bagania Taikamanua ka taikapolak, pat akénangan Togania sisasara, bulé tá ilangó sia sangamberi simatonem

baga ka tubunia, tápoi raiikep'aké
lé purimanuaiat sipulelelek samba
sitaitatató

¹⁷ Aipoí aikoiniaké Togania Taikamanua,
tá masihakimi taikapolak, tápoi
masipaarau sia lé

¹⁸ Oto kasei simatonem бага ka
tubunia, tá iuukum'aké sia Taikamanua.
Tápoi sitaimatonem бага ka tubunia
geti, aiukum'an sia Taikamanua, kalulut
taimatonem bagadda ka tubut Togat
Taikamanua sisasara

¹⁹ Ituseseleaké sia geti, iaté kalulut:
Amoian nia pató ka polak néné, tápoi
sirimanua geti ka gep-gep lé ramareré-
ré, belé peilé ka pató, kalulut kataí nia
sigalaira

²⁰ Aipoí sangamberi sirimanua sigalai
sikataí, bulat malagá bagadda ka tubut
pató; samba tá ioobá moi ka pató geti,
kalulut ikera buí imatoilá sigalainia
sikataí

²¹ Tápoi sia geti sigalaiaké sangamberi
siobat bagat Taikamanua, maeme
bagadda masilegeri pató, bulé imatoilá,
sangamberi sigalainia néné, sarat siripot
obaket bagat Taikamanua lé

²² Lepá ei Jesus sambadda sipasiuluinia ka Judea. Iageti kuddu sia sedda piga ngagogoi pá burúnia, masiraú

²³ Ka tetret nenda, tápei arapenjaraaké nia ka sia si Johannes. Pasiraúnangan leú et ka laggai Ainon, tá mareunan nia ka laggai Salim. Aipoí sedda maigi oinan. Iageti oirangan leú et sirimanua ka tubunia, raúnangan leú et sia

²⁴ (3:23)

²⁵ Lepá pajoggloddangan sipasiului Johannes, ka tubudda tai Jahudi, rapaukeli pagalaiat aturan pasiliná

²⁶ Iageti eirangan leú et ka tubut Johannes masikua ka matania, pelé nga-nganda, "Ai peilé leú nurerepdem nia, Guru, nenda alei nu mukuddu ka silat Oinan Jordan, sinaúsaúnu ka tubumai siburú? Ka sia kineneiget, ai leú et nia masiraraú, ameian sia sangamberi sirimanua ka tubunia!

²⁷ Iageti kuanangan ka matadda sipasiuluinia si Johannes, "Tá anai tenan lé nia bara apa pá ka tubut sirimanua, ké tá Taikamanua ipanguruat'aké nia ka tubudda

²⁸ Bulat piúmuian te amasiarep akukua nia ka matamui, 'Aku kaku néné geti,

tá Rimata Sipaarau. Aikoiniaké lé aku Taikamanua muboikí ka tubunia.

²⁹ Aipoí sinanalep sitalimouakenen nenda, simanteu sitalimouakenen sibakkatnia. Ka sia alei simanteu talimouakenen, sarat murió masipaaleiaké samba masiarep'aké galajetnia, samba bulat maangká bagania ké iarep nga-ngan simanteu talimouakenen. Oto kisedda leú te aku kaku. Kineneiget bulat maangká bagakku

³⁰ Bulé nia lé memei maabeu tiboí tubu, tápoi aku kaku geti, memei lé ibebeleki tiboí tubukku.

³¹ Sibabara ka manua lé sisaliu sangamberinia. Tápoi sibabara ka polak geti, addeat taikapolak peilé sia, samba pagalaiat pupolangan lé ratitiboí. Nia lé, sibabara ka manua sisaliu sangamberinia

³² Siripot siitsónia elé siarepnia lé ititiboí, tápoi beri sia sara simatonem бага ka simuneng'akenennia

³³ Tápoi sia geti simatonem бага ka simuneng'akenennia, ramumuneng'aké pububulat sibulatnia sikuat Taikamanua

³⁴ Aipoí sia sapakoiniet Taikamanua lé masingangantoman'aké tiboiet

Taikamanua, aipanguruat'akéan poi sangamberinia ka tubunia Ketsat Sipunenan

³⁵ Manuntu bagat Ukkui ka tubut Togania, samba aikauan sangamberinia gege ka tubunia

³⁶ Oto kasei simatonem бага ka tubut Toga, tá isoppi rabakkati purimanuaiat sipulelelek samba sitaitatátá. Tápoi sitaimareddet ka tubut Toga geti, bulat buji bagadda rabakkati purimanuaiat. Iuukum'aké lé sia Taikamanua teret buru-burú.

4 ¹ Iageti maarepnangan ka tai Parise, Jesus peilé maigi aisese elé maigi airaú, sapagugulet, belé peilé kai Johannes

² [Tápoi kenanen rakukua kelé néné, tá aina masiraraú ka sia Jesus, sipasiuluinia lé.

³ Oto kelé aiagai nia Jesus aarepra nia tai Parise pagalaiat néné, tui nia ikaddiuaké Judea, ei nia masiailiaké Galilea

⁴ Tápoi puenunganannia néné, buítá isabau laggaira tai Samaria

⁵ Iageti segé nia Jesus ka laggaira tai Samaria, sipuoni Sikar, tá maareu nia

ka polak sikau Jakob siburú ka tubut tokania si Josep

⁶Ai sedda sumur Jakob. Kalulut saggot tubunia Jesus muenung puuddetnangan ka bet-bet sumur. Ka tetret nenda iaté tuggé sulu

⁷Ka sia sipasiuluinia, ameian sia ka kota masisaki kan. Lepá oinangan leú et sara sinanalep tai Samaria masiaisú oinan. Iageti kuanangan ka matat sinanalep néné, Jesus, "Ale Ina, momoi leú kutiddou ka tubum, bulé nuaké lóku oinan?

⁸(4:7)

⁹Tápoi aikua lé ka matat Jesus sinanalep néné, "Tai Jahudi lé ekeu, Ukkui, iageti aku kaku néné tai Samaria lé. Nutitiddou koí ka tubukku lónu oinan?" (Aipoí tai Jahudi sambat tai Samaria, taipaoobá lé sia.

¹⁰Iageti kuanangan ka matania, Jesus, "Ké ai baí nuaagai nia panguruat Taikamanua, samba leú et ké ai baí nuaagai nia kasonia néné sipasitiddou oinan ló ka tubum, tá isoppi nutiddou lónu ka tubunia, iageti akénangan kekeu oinan purimanuaiat.

¹¹ Kuanangan ka sia sinanalep ka matat Jesus, "Kipa ibabara ka tubum oinan purimanuaiat, ké beringan seseilúnu tá anai; iageti paobánangan pei bagei sumur néné bulat makeru. Oto kaipangan lé ibabara oinan purimanuaiat

¹² Taikebbukatmai si Jakob lé aiaké kakai sumur néné. Beri ka sia leú et sené leú et iaalá lónia oinan. Kisedda leú et tatogania sambat tarimeunia sené leú et ka baraiat lóra. Taleú ai lé nukukua tubum ekeu peilé abeu tiboí tubu ka tubut Jakob?

¹³ Kuanangan mitsá ka matania Jesus, "Maooggou lé sia mitsá sipasiloló oinan néné

¹⁴ tápoi sipasiloló oinan akenenku geti, táan te maooggou nia burú. Aipoí oinan akenenku kaku, ibabailiu lé nia ka tubunia matat bubuakat, sipububuggra, sikau ka tubunia purimanuaiat sipulelelek samba sitaitatátá.

¹⁵ Iageti kuanangan sinanalep néné ka matat Jesus, "Oto kauan, akéan poí kaku oinan nenda kuanennu, buí kumaoggou mitsá, buían kuoi mitsá sené masiaisú oinan.

¹⁶ Kuanangan ka matania Jesus, "Oto kisé, kenan'an boikí nusogai simanteunu; lepá oi ekeu mitsá sené.

¹⁷ Iageti kuanangan ka matat Jesus sinanalep néné, "Tá anai simanteuku." Kuanangan ka matania Jesus, "Aisese tedda sikuam

¹⁸ Aipoí aiailingan lima ngamitsá anuputalimou; tápoi simanteu paaleiakenennu geti kineneiget, tá simanteunu.

¹⁹ Iageti kuanangan nia sinanalep ka matat Jesus, "Oto kineneiget peité akuagai nia punanabim

²⁰ Ka taikebbukatmai ka leleu néné lé rapaniniddogi Taikamanua; tápoi arakua sabangsam geti, sarat ka Jerusalem lé kudduat paniddogat ka Taikamanua.

²¹ Tápoi kuanangan ka matania Jesus, "Kau imatonem bagam ka sikuakku néné, ka sara tetre, táan ka leleu néné, elé ka Jerusalem, kudduat paniddogat ka Ukkui

²² Kam kakam tai Samaria, tá nuagai kam nia paniddogietmui; tápoi ka kai geti tai Jahudi, kuagai kai nia paniddogietmai; aipoí ka tai Jahudi lé ibabara puaragat

²³ Tápoi iaaili te gogoinia, elé aiailingan gogoinia, ka geget Ketsat Sipunenan'an lé te rapaniddogi Ukkui, iaté Taikamanua bulat sibulatnia, siripot siobat bagat Ukkui

²⁴ Aipoí Ketsat lé nia Ukkui néné; oto sarat ka geget Ketsat Sipunenan lé iooi rapaniddogi Ukkui ka siripokatnia.

²⁵ Iageti kuanangan ka matat Jesus sinanalep néné, "Aikuaagai kaooi nia Rimata Sipaarau (sipuoni Kristus). Oto ké moi nia, poiliatnangan sangamberinia ka tubutta.

²⁶ Kuanangan ka matania, Jesus, "Aku té néné, sipatiboaké ekeu kineneiget.

²⁷ Kelé aratoili sipasiuluinia, bulat kisei lé ka bagadda raitsó Jesus, ipatiboaké sara sinanalep. Tápoi beri sia sara siisiaké masiteká sinanalep néné, masikua ka matania, "Apa nuaalá sené, Ina?" elé masiteká Jesus masikua ka matania ka sia, "Nupatitiboaké kodda sara sinanalep?

²⁸ Iageti galak'akénangan lalaisúnia sedda sinanalep néné, pabalaunangan leú itoili ka laggai, kuanangan ka matadda sedda

²⁹ "Sita peité kam nuitsó kam sipoiliat ka matakku sangamberinia sigalaiku. Taleú pá niangan né Rimata Sipaarau?

³⁰ Iageti kaddiukérangan laggaira, ei sia ka tubut Jesus

³¹ Lepá ei sia sipasiuluinia masisogai nia mukom, kuaddangan ka matania, "Konan mukom, Guru.

³² Tápoi alegina lé nia Jesus ikua ka matadda, "Ai kaku kanku, taiaagaietmui.

³³ Iageti paisérangan pasasambadda sipasiuluinia, pelé nga-nganda, "Taleú ai sia sipasitataroaké kannia?

³⁴ Iageti taddaakénangan masikua ka matadda sipasiuluinia, "Kuanenku kanku geti kaku, iaté masigalaiaké siobat bagat sipasikokoiniaké aku, samba masilepáaké galajet sisegéakenennia ka tubukku

³⁵ Ka kam nukukua kam, 'Ai pei epat ngalaggó burúnia iaili tetrenia pasimoneiat buat siureman.' Tápoi aku kaku geti masikua ka matamui: Lelek'aké peité kam buat siureman ka mone, surá lepá aimará, getaiet'an lé buania

³⁶ Sia sipasimomonei, arataddaakéan masisiló upadda, rarurúaké balutda

ka purimanuaiat sipulelelek samba sitaitatátá. Oto bailiu keré rapuangká бага, sipasikakarap'aké samba leú et sia sipasimomonei

³⁷ Aipoí ai tiboiet sipasikukua kisé, 'Sara mangurep, sabagei masimonei.

³⁸ Oto sené, kukoiniaké kam bulé mei kam masimonei, ka mone taigagalaietmui. Sabagei lé amei mugalai sedda, tápoi kam'an lé masipuuuktungi buat sigalaira.

³⁹ Bulat amaingingan sia tai Samaria simatonem бага ka tubut Jesus, kalulut tiboiet sinanalep sipasikukua, 'Aipoiliat ka matakku sangamberinia galai tubukku.

⁴⁰ Oto kelé bulat arapaaili ka tubut Jesus, tai Samaria néné, nánáranan nia bulé mukuddu peilé nia ka talagadda. Iageti kuddu nia sedda rua ngagogoi burúnia

⁴¹ Lepá uraunangan peilé mitsá igidda simatonem бага ka tubunia, kalulut ngantomannia ka tubudda

⁴² Belan nga-nganda lé ka tubut sinanalep néné, "Aimatonem geti bagamai kineneiget ka tubunia, táan kalulut sesegéakénu nia ka matamai,

tápoi kalulut bulat tubumaian poí aiarep ngantomannia, samba amakolouan ka kai, bulat tubut Sipaarau lé nia néné.

⁴³ Rua ngagogoi burúnia aikuddu ka laggai Sikar, Jesus tui nia iei ka Galilea

⁴⁴ Bulat tubut Jesus lé amasikua, "Tá rahohormati sara nabi ka laggainia.

⁴⁵ Tápoi kelé aisegé ka Galilea, silórganan nia ka angkat бага, aipoí araigbuk'an sigalai Jesus, ka tetret araei mupunen Paska ka Jerusalem

⁴⁶ Lepá ei nia mitsá Jesus ka laggai Kana ka Galilea, ka pasigalaiatna siburú oinan bailiu anggur. Ka laggai néné, ai sara pegawai pamarenta, aimubebesí togonia ka laggai Kapernaum

⁴⁷ Kelé aiarep nia kaooi Jesus ka Galilea barana ka Judea, einangan leú et masiailiaké Jesus sedda, masináná Jesus, bulé iei ka laggai Kapernaum, masialeaké togonia. Togonia néné ilalangóan lé nia

⁴⁸ Tápoi aikua lé ka matat pegawai pamarenta néné, Jesus, "Bulat ké tá nuitsó kam kerek sigalaiku, tá matotonem bagamui ka tubukku.

⁴⁹ Iageti aleginangan nia pegawai pamarenta néné, "Kauan, sitangan lé, Tuan, babara mamatei nia togakku.

⁵⁰ Kuanangan ka matania Jesus, "Kauan kenan'an, amalengan nia togam." Oto bulat matonem bagania ka sikuat Jesus. Iageti toilinangan leú et

⁵¹ Ka tangan enungan, paseseakénangan sia sapaguguletnia sieei masiailiaké nia, masisegéaké ka matania, pelé nga-nganda, "Amalengan nia togam, Tuan.

⁵² Lepá isénangan sia sapaguguletnia bó-bó piga aimale toganian. Iageti kuaddangan ka matania, "Sokat, ka bó-bó sara sinágó aitatá roketnia.

⁵³ Iapeité airepdem nia ukkui toga néné, ka tetret nenda te aikua ka matania Jesus, "Amalengan nia togam." Kalulut néné matonemnangan bagadda sangalalepra ka tubut Jesus

⁵⁴ Iaté néné pukerengan sikaruanian sigalai Jesus, barania ka Judea.

5 ¹ Lepá nenda, ei Jesus ka Jerusalem, kalulut ai sedda punenda tai Jahudi

² Sedda ka Jerusalem, ka bet-bet, "Matatbaliu Biri-biri", ai sara kolam, ka

nga-ngan Ibrani oninia iaté Betesda. Ai lima ngambua sapounia

³Sedda ka bagat sapou, apareppa simabesí; ai simapeset mata, ai simasakit rere, samba leú et simaluluk tubu. [Airangengenaaké tubudda sangamberidda ipugotsó oinan kolam néné

⁴Aipoí pasasangamitsá iaili tetrenia itugorosot malaikat Tuhan masigotsó oinan kolam néné. Oto kasei tugorosot boikí ka bagat kolam sigotsot malaika néné, kenanen aponia pá onin besíra ale-ramale.

⁵Tápoi ka kudduat nenda, ai sara simanteu, telu ngapulu balu ngarurangan burúnia aimabesí

⁶Kelé aiitsó nia Jesus, ai nia mukakakkang sedda, samba bagei aiagaan bulat amaburúan aimabesí, nou-nounangan nia Jesus, kuanangan ka matania, "Ale, nuobá leú male?

⁷Kuanangan simabesí néné ka matat Jesus, "Tá anai sia sené, sipasiaakkat'aké aku rakau aku ka bagat kolam, Ukkui; ka tetret aipugotsó oinan kolam. Oto aian kububuet tubukku kumoileaké mei ka kolam, amuboikían araei sabagei.

⁸Iageti kuanangan ka matania, Jesus, "Suruaké ekeu, alá peremannu, puenungnungan.

⁹Iangan leú et nia, ale-aimale besínia, bairatnangan peremannia, puenungnungan leú et. Ipot gogoi Sabbat te aigalai néné, Jesus

¹⁰Kalulut néné kuaddangan ka matat simamale besí néné, tai bajára tai Jahudi, pelé nga-nganda, "Takei-kei nubairat peremannu, aipoí gogoi Sabbat lé kineneiget.

¹¹Tápoi kuana lé nia ka sia simamale besí néné, "Sipasiaaleaké aku lé, amasikua ka matakku, bulé kubairat peremanku, samba kupuenung.

¹²Oto pelé nga-nganda ka tubunia, "Kasonia poi amasikua ka matam nubairat peremannu samba nupuenung?

¹³Tápoi ka sia simamale besí néné, táan iagai tubunia sipasiaaleaké besínia, aipapulingan poí tubunia ka sia Jesus ka talagadda sirimanua simigi

¹⁴Tápoi lepá ailinangan nia Jesus ka Uman Taikamanua, simamale besí néné kuanangan ka matania, "Kineneiget, amalengan té ekeu. Oto buían tebaí

nugalai mitsá jo, bulé buí nuorik mitsá oringen sisaliu kopet kataí peilé.

¹⁵Iageti einangan leú et simamale besí néné, ka tubudda tai bajára tai Jahudi, masisegéaké pu-Jejesus nia amasialeaké besínia

¹⁶Oto kalulut néné taddaakérangan nia tai bajára tai Jahudi rasaggangi Jesus, kalulut pasiaaleakéna besíra sirimanua, ka ipot gogoi Sabbath

¹⁷Tápoi aikua lé ka matadda Jesus, "Kelé kipa riu-riu nia ipugalai ka sia Ukkuiku, pat aili kineneiget, oto buitá kisedda leú te riu-riu nia kaku kupugalai galajetku.

¹⁸Oto tiboietnia néné, masituppai ron paatuatda raisiaké ramateiaké Jesus. Bulat raiisiaké ramateiaké nia geti, tá sarat kalulut pasasabauna surukat ka aratda, sipaoorak ka gogoi Sabbath, tápoi bulat kukuana nia, Taikamanua néné, Ukkuinia; oto aipakeréakéan lé tubunia ka tubut Taikamanua

¹⁹Iageti kuanangan kelé néné ka matadda, "Kau imatonem bagamui ka sikuakku néné; ka sia Toga, tá momoi igagalai apa pá sibara ka teú bagania sarania. Siitsónia ka Ukkuinia

lé igagalaiaké. Apa igalai ka sia Ukkui, ialeú te igagalaiaké ka sia Toga

²⁰ Aipoí manuntu lé bagat Ukkui ka tubut Toga, samba aipatoilá sangamberinia sigalaiakenennia ka Togania. Iageti ipatotoilá peileú te mitsá Ukkui, ka tubut Toga, galaiakenennia bulat simakopé beunan, pat bara kisei ka bagamui

²¹ Oto ké kipa ka Ukkui, isuruaké sia simamatei samba ikau purimanuaiat sipulelelek samba sitaitatatá ka tubudda sirimanua; kisedda leú te ka sia Toga, ipasikau purimanuaiat sitaitatatá ka tubudda siobánia ikau purimanuaiat

²² Ka sia poí Ukkui, táan ihahakimi kasei pá. Aipoí aikauan ka tubut Togania gege masihakimi sirimanua

²³ Aigalaiaké kelé néné geti Ukkui, bulé rahormati nia sangamberi sirimanua, Toga néné, kelé rahormati nia ka sia Ukkui. Oto kasei sitaihormati Toga, tá leú te ihohormati nia ka sia Ukkui, sipasikokoiniaké Toga néné

²⁴ Bulat sibulatnia te sikuakku néné: Kasei sisiddoni ka bagania sangamberi sikuakku néné, samba simatonem бага ka tubut sikoiniaké aku, niaté masibabakkati purimanuaiat sipulelelek

samba sitaitatató. Táan tuukum'aké nia;
abelangan nia ka kamateiat, samba
araikep'akéan purimanuaiat

²⁵ Samba kau imatonem bagamui ka
sikuakku néné: Iaaili te tetrenia, elé
momoi takua, aiailingan tetrenia, raarep
te, ka sia simamatei, nga-ngan Togat
Taikamanua. Oto kasei sipasiaarep,
purimanuandangan leú et

²⁶ Ukkui ka sia, bakkat ka baraiat
purimanuaiat lé nia; oto Togania ka
sia leú et, bailiukénangan leú et nia,
bakkat ka baraiat purimanuaiat

²⁷ Aikauan ka tubut Togania, Ukkui,
gege masihakimi sirimanua, aipoí Togat
Manusia lé nia

²⁸ Oto buí imakisei ka bagamui masiarep
kelé néné, aipoí iaaili te gogoi nia raarep
nga-ngania sangamberi sirimanua
simamatei

²⁹ Arepra lé nga-ngania, bela sia ka
bagat ratei. Oto kasei sigalai si maerú,
suru, ikep'akérangan purimanuaiat.
Tápoi sia geti sipasigagalaiaké sikataí,
suru, lepá ukum'aké.

³⁰ "Aku kaku néné, tá kugagalai
apa lé kuobá galai. Siripot sikuat
Taikamanua lé kupasihakimi kaku. Ialeú

et siteúakenenku, maroipo lé, aipoí tá kugagalai siobat bagakku sarakku, tápoi siobat bagat Ukkui sipasikokoiniaké aku lé kugagalaiaké

³¹ Ké aku leú et masimuneng'aké tubukku, bailiu simuneng'akenenku néné, tá katonemiet бага

³² Tápoi ai lé sia sabagei sipasimumuneng'aké pagalaiat tubukku, samba ai lé kuaagai sesesena nia simuneng'akenennia

³³ Kelé sigalaiakenenmui, anukoiniaké kam pakoinietmui raei masitaget'aké si Johannes, masiiséaké pagalaiat tubukku, iageti akénangan ka tubudda katumunengan bulat simakolou pagalaiat tubukku

³⁴ Kukukua nia geti kelé néné, tá kalulut obáku ramuneng'aké aku sirimanua, tápoi bulé nusiló lé kam puaragat sibara ka Taikamanua

³⁵ Aipoí ka sia si Johannes, kelé alito sipuju-juluu lé nia, samba siputotoro. Tápoi tulu lé aimaangká bagamui masisiló toronia

³⁶ Tápoi simuneng'akenenku kaku peilé abeu, ka simuneng'akenen nia ka sia si Johannes. Oto sangamberi

sigalaiakenenku kineneiget, iaté
masigalaiaké sangamberi galajet
sisegéakenen Ukkui ka tubukku,
masipatoilá bulat kokoiniakéna aku
Ukkui

³⁷ Beri ka sia Ukkui sipasikokoiniaké
aku leú et, ai leú imumuneng'aké aku ka
sia. Tápoi beri pei arepmui nga-ngania,
elé beri pei itsómui nia

³⁸ Kalulut taimatonem bagamui
ka tubukku sikoiniakenennia,
taiottotnangan tiboietnia ka bagat
paatuatmui

³⁹ Bulat numamateiakéan kam tubumui
masigelai tiboietnia ka bagat Buko
Sipunenan, aipoí ka bagamui te kelé
kisedda tupaeerú, bulé ioi nubakkati
kam purimanuaiat sipulelelek samba
sitaitatátá. Beri Buko Sipunenan leú et,
aimuneng'aké leú et pagalaiat tubukku

⁴⁰ Tápoi beri gelaimui nia moi
ka tubukku, bulé nuikep'aké kam
purimanuaiat sitaitatátá

⁴¹ Tá aikubebesíaké bulé raumun aku
sirimanua

⁴² Ai lé poí kuaagai kam. Ai lé kuaagai
tatá nia ka paatuatmui punununtut бага,
masipununtuki бага Taikamanua

⁴³ Ka geget Ukuiku lé akuoi, tápoi beri silómui aku. Tápoi ké sabageian geti moi ka gegenia sarania, bulat biláan lé nusisiló kam nia

⁴⁴ Kaipa iooi ibabara tonem bagamui, ké ai peilé nubebesíaké kam raumun kam saalei pasasambamui, tá masibesíaké umun sibara ka Taikamanua Sisasara

⁴⁵ Buí nusuk-suk kam elé kujo-joaké kam ka matat Ukkui. Sipasijo-joaké kam geti si Mose lé, aipoí nia lé nukakaroni kam бага

⁴⁶ Ké matonem bagamui kai Mose, tá isoppi imatonem leú et bagamui ka tubukku kaku; aipoí pagalaiat tubukku lé aisurat'aké

⁴⁷ Tápoi ké geti tá matonem bagamui ka sinurat'akenen Mose, kipa te imatotonem bagamui ka sikuakku kaku?"

6¹ Piga pá burúnia, ei nia Jesus, ka silat Paot Galilea, sipuoni leú Paot Tiberias

² Kelé aisegé sedda, bulat maigi sia amei masitut nia, kalulut araitsóan pói kerek sigalainia masialeaké simabesí

³ Iageti panatranangan Jesus ka leleu, pukuddurangan sedda sambadda sipasiuluinia

⁴ Ka tetret nenda, amalegrengan iaili Punen Paskadda tai Jahudi

⁵ Kelé aipaingo matania Jesus, itsónangan sia sirimanua simakopé igi, siooi masiailiaké nia. Iageti kuanangan ka matat Pilipus, Jesus, "Kaipa siagainu taei masisaki kan, bulé tapakom sia sirimanua simigi néné?

⁶ [Kenanen ikukua kelé néné Jesus, ka matat Pilipus, tápoi ai lé iaagai galaiakenennia; obána lé isibo pupaaturan Pilipus.

⁷ Tápoi kuana lé nia ka sia si Pilipus ka matat Jesus, "Bulat kenanen tasaki roti rua ngotu ngaperak igit sakinia, tá leú et iaaili sia nuntudda néné, kenanen baí takau pagogoisó sia.

⁸ Iageti kuanangan ka sia sara sipasiului Jesus, sipuoni si Andareas, sarainan Simon Petrus, ka matat Jesus

⁹ "Ai sené, sara tatoga sigoisó, ai lima ngaaggro roti aiabbat sambat rua ngamuneng iba. Tápoi apangan lé lulunia tukau nia ka simigi, iaailingan leú pá sia goisó néné?

¹⁰ Tápoi kuana lé nia ka matadda, Jesus, "Kiséan lé, kuangan lé kam ka matadda rapuuddet." Sedda maturu-turu. Oto

ka turu-turu lé rapuuddet. Oto sarat taimanteu, ai sia lima ngaribu igidda

¹¹ Iageti alánangan nia roti néné Jesus, kuanangan surá ka tubut Taikamanua. Lepá parubeinangan nia ka sirimanua simigi. Lepá mitsá parubeinangan leú et iba; iageti pukomrangan leú et, bulat pak segé ektekra

¹² Kelé aisegé ektekra mukom, kuanangan ka matadda sipasiuluinia Jesus, "Rurúaké kam sipulelegei; bui ibara beri sara simalilimai.

¹³ Iageti rurúakérangan legeira sibara ka silima ngaaggro roti, ai pulu rua ngagarágá iginia, sarat sisusun sangamberinia

¹⁴ Oto kelé araitsó nia sirimanua simigi kerek sigalai Jesus néné, kuaddangan, "Bulat sinénéan te, sara Nabi ngenaetta siooi ka polak!

¹⁵ Iageti kelé aiagai nia Jesus, bebesiakéra rakau nia rimatadda, tui-tui nia iei ka leleu, iareuaké tubunia ka tubudda

¹⁶ Kelé aimasoibó, gorosot sia sipasiuluinia Jesus ka paó

¹⁷ Janang sia ka bagat abak, iageti talipokiddangan paó, raailiaké laggai

Kapernaum. Pat segé soibónia, tápei
amei Jesus masiailiaké sia

¹⁸ Ka tetret nenda, aian itataddaaké
imaonu, kalulut iboroi nia rusa simapiret

¹⁹ Pat malegre lima elé enem
ngakilometer reunannia arapuabak,
itsórangan aiaailiaké sia Jesus, ai nia
mueenung ka uddut oinan. Bulat seget
kopet kataí lotóra

²⁰ Iageti tekánangan sia Jesus, pelé
nga-ngania ka tubudda, "Bá malolotó
kam, aku lé!

²¹ Oto alárangan nia Jesus sipasiuluinia
ka bagat abak, ka angkat бага; iageti
táan amauju, segé sia ka ailiakenenda

²² Oto kelé aimamatsep, agairangan
nia sirimanua simigi sitaitutui-tui peilé
sedda, sarat sara lé abak sikukuddu
sedda. Raagai sarat sipasiului Jesus lé
amutuitui sedda, tápoi ka sia geti Jesus,
tá amei nia masitut sia

²³ Lepá mitsá jolou sedda piga ngaabak
pá sia sibabara ka Tiberias, iaté ka
bet-bet pukomanda roti, lepat aikua surá
Jesus ka tubut Taikamanua

²⁴ Kelé araitsó tatat Jesus sambat
sipasiuluinia sedda, janang sia mitsá ka

bagat abak nenda leú et, ei sia ka laggai Kapernaum masigaba Jesus

²⁵ Kelé araaili Jesus ka silat paó, kuaddangan ka matania, "Ale, pigamoi anusegé kam sené, Guru?

²⁶ Iageti kuanangan ka matadda Jesus, "Ale, tá te bulat kalulut kolou ka bagamui ka kerek sigalaiku ka matamui, nugagaba kam aku; tápoi kalulut ektekmui lé mukom roti

²⁷ Bá momomoaké kam tubumui mugalai bulé ibara kan simatataket samba simabuteket. Tápoi kau lé numomoaké kam tubumui mugalai, bulé ibara ka kam kan sitaimabuteket, sibaraaké ka kam purimanuaiat sipulelelek samba sitaitatátá. Togat Manusia lé masiaaké ka kam kan néné, aipoí aipauddet'an nia Ukkui Taikamanua.

²⁸ Oto pelé nga-nganda ka tubunia, "Oto, kipa kupaeerú kai, bulé ioi kugalaiaké kai siobat bagat Taikamanua?

²⁹ Iageti kuanangan ka matadda, Jesus, "Néné lé ikikiddiy Taikamanua galaiakenenmui, iaté: kau imatonem bagamui ka tubut sikoiniakenen Taikamanua.

³⁰ Oto belan nga-nganda lé ka sia ka matat Jesus, "Oto ké kisedda baí nia, aponia toggaiat nuaaké itsoketmai, bulé imatonem bagamai ka tubum? Aponia nugagalaia ké

³¹ Aipoí kelé ka sia ka taikebbukatmai, arakom manna ka simatangeu, kelé ka sitususurat ka bagat Buko Sipunenan, sipasikukua kisé, 'Ikau kanda roti sibara ka manua.'

³² Iageti kuanangan ka matadda, Jesus, "Kau imatonem bagamui ka sikuakku néné: Ukkuiku lé masiaaké kanmui roti bulat sibulatnia sibara ka manua; tá si Mose

³³ Aipoí oniakenen roti siaket Taikamanua, iaté nia situgogorosot barana ka manua, sipasiaaké purimanuaiat ka taikapolak néné.

³⁴ Pelé nga-nganda masikua ka matania, "Oto, kau mariu-riu nuaké nia ka kai roti néné.

³⁵ Iageti kuanangan ka matadda Jesus, "Aku néné te roti purimanuaiat. Oto kasei siooi kaku, táan malalaje nia mitsá, teret buru-burú. Ialeú et kasei simatonem бага ka tubukku, táan maooggou nia mitsá, teret buru-burú.

³⁶ "Tápoi kelé paoleetku leú et simareirei ka matamui, kenanen aian nuiitsó kam aku, tápoi bulat beri tonem bagamui ka tubukku

³⁷ Aipoí sia sangamberi siaket Ukkui ka tubukku lé, momoi ka tubukku. Tá kukekera sia senen siooi ka tubukku

³⁸ Tá te masigalai siobat bagakku sarakku, akuoi barakku ka manua, tápoi masigalaiaké siobat bagat sipasikokoiniaké aku lé

³⁹ Oto néné lé siobat bagai sipasikokoiniaké aku, iaté: bulé tá kupalimai sia beri sara, sangamberi siakénia ka tubukku; tápoi bulé kususuruaké lé sia ka Gogoi Sialu

⁴⁰ Aipoí néné te siobat bagat Ukkui: Bulé sangamberidda sipasiitsó Toga samba simatonem бага ka tubunia, masiikep'aké purimanuaiat sipulelelek samba sitaitatátá; iageti ka Gogoi Sialu, suruakékungan sia mitsá.

⁴¹ Oto kalulut kukuana ka matadda Jesus, "Aku te néné roti sibara ka manua", taddaakérangan leú et nia rapungunyú masipaisit kuanenda ka sia tai Jahudi ka tubut Jesus

⁴² Pelé nga-nganda, "Kipa, tá poi nia néné Jesus, togat Josep? Ai lé kuaagai kai ukkui samba inania! Maró koí bagania masikua ka matatta kababara nia ka manua?

⁴³ Tápoi kuana lé nia ka matadda Jesus, "Bá pungu-ngunyú kam

⁴⁴ Aipoí beri sia sara simaró бага moi ka tubukku, ké tá itaroaké sia Ukkui, sipasikokoiniaké aku. Iageti kasei siooi ka tubukku, suruakékungan leú et sia ka Gogoi Sialu

⁴⁵ Beri ka bagat Bukodda tai Nabi leú, ai atusurat'aké kisé, 'Ipangangantru te sia Taikamanua, sangamberi sirimanua.' Oto sangamberi sipasiaarep nganturat Ukkui, samba sipasigegelai ka tubunia, iaté momoi ka tubukku

⁴⁶ Tápoi tá te masikua aian sia sipasiitsó Taikamanua. Aipoí sarat sara nia peilé sibabara ka Taikamanua, amasiitsó Ukkui

⁴⁷ Oto bulé nuagai kam nia: Simatonem бага ka tubukku lé masibabakkati purimanuaiat sipulelelek samba sitaitatató

⁴⁸ Aku té né roti purimanuaiat

⁴⁹ Taikebbukatmui siburú arakom manna ka simatangeu; tápoi amatei leú et sia ka sia

⁵⁰ Tápoi tá kisedda galainia ka sia roti sibabara ka manua; kasei sikom roti néné, táan mamatei nia, burú

⁵¹ Aku té néné roti sibabara ka manua; roti purimanuaiat. Sikom roti néné, muririmanua teret buru-burú. Aipoí akkuláku lé roti, akenenku sipurimanuaji sirimanua ka polak néné.

⁵² Kelé araarep nia tai Jahudi sikuania néné, paukleddangan leú et pasasambadda. Belan nga-nganda lé masikua, "Kipa ka sia néné, iaké akkulá nia ka tubutta bulé takom kam nia?

⁵³ Iageti kuanangan ka matadda Jesus, "Kau imatonem bagamui ka sikuakku néné: Ké tá nukom kam akkulat Togat Manusia, samba ké tá nuló kam logaunia, bulat buji bagamui nupurimanua kam sipulelelek

⁵⁴ Oto kasei sikom akkuláku samba siló logauku, iaté masibabakkati purimanuaiat sipulelelek samba sitaitatátá; iageti suruakékungan nia, ka Gogoi Sialu

⁵⁵ Akkuláku lé poí bulat kan, samba logauku lé poí bulat ló

⁵⁶ Oto kasei sikom akkuláku samba siló logauku, riu-riu lé patabbaratda ka tubukku, samba aku leú kaku riu-riu lé aku ka tubudda

⁵⁷ Ukkui sipuririmanua nenda te amasikoiniaké aku. Samba aku kaku leú et, ka Ukkui lé kupuririmanua. Oto kisedda leú te ka sia sikom akkuláku, ka tubukku leú te ibabara purimanuaiatda

⁵⁸ Néné peité roti sibabara ka manua: tá kelé roti sikomra taikebbukatmui siburú. Aipoí lepá arakom roti nenda, amatei leú et sia. Tápoi sikom roti néné geti, riu-riu lé rapurimanua, teret buru-burú.

⁵⁹ Aikua sangamberinia néné Jesus, iaté ka tetret ai nia mungangantoman ka uma parurukat, ka laggai Kapernaum

⁶⁰ Maigi sia ka talagadda sipasiuluinia, kelé araarep tiboiet sikuat Jesus néné, kuaddangan ka matania, "Malippat'an lé tiboiet néné. Kaseian lé iobá piú iarep nia!

⁶¹ Kirénangan ai lé iaagai Jesus pungu-ngunyúkidda nia sipasiuluinia kalulut sikuania néné. Kalulut néné, kuanangan ka matadda sipasiuluinia,

"Kipa, taleú amabelé leú bagamui ka kam ka tiboietku néné

⁶² Apa babara ké nuitsó baí kam itoili mitsá Togat Manusia ka kudduatnia siboikí

⁶³ Kalulut Ketsat Sipunenan lé rapuririmanua sirimanua. Tá anai lulunia puroronda sirimanua. Ngantoman sitiboakenenku ka matamui néné, tiboiet Ketsat Sipunenan lé; elé tiboiet sibaraaké purimanuaiat lé

⁶⁴ Tápoi kenanen kisedda, ai peilé kam, ka talagamui néné, sitaimatonem бага ka tubukku." [Aipoí ka panandaatnia peilé, aian iaagai sia Jesus, kasonia sitaibá masikatonemi nia бага, samba kasonia masipajojo nia.

⁶⁵ Iageti kuanangan mitsá ka matadda Jesus, "Iaté lulunia kupopoiliat nia ka matamui, bulat beri te sia sara simaró бага moi ka tubukku, ké tá kalulut Ukkui.

⁶⁶ Oto ka tetret nenda, maigi sia sipasiuluinia amasikaddiuaké Jesus; táan raobá masitut nia

⁶⁷ Iageti kuanangan ka matadda ka sia sipasiuluinia sipulurua, Jesus, "Kipa,

taleú nukakaddiuaké leú kam aku ka kam?

⁶⁸Oto belan nga-ngania lé ka sia si Simon Petrus, "Kasei ka tubungan lé kueei kai ka kai, Tuhan? Tiboietnu lé poí, Tuhan, sibaraaké purimanuaiat sipulelelek samba sitaitatatá

⁶⁹Bulat amatonem'an bagamai ka tubum, samba amakolouan ka bagamai, ekeu lé Tuhan, sikoiniakenen sipunenan sibara ka Taikamanua.

⁷⁰Iageti kuanangan mitsá ka matadda sipasiuluinia Jesus, "Tá poi aku amasipiliy kam néné, ka puluruamui? Tápoi ai sara ka talagamui néné iaté, ketsat sikataí!

⁷¹Isasailú Jesus sené, iaté si Judas Iskariot. Aipoí kenanen ai nia ka talagat sipulurua sipasiului Jesus, si Judas néné, ipajo-jo leú et Jesus.

7¹Lepá taddaakénangan nia Jesus, masigejengi laggai Galilea. Tá iobá mei ka Judea, kalulut ai lé raiisiaké ramateiaké nia, tai bajára tai Jahudi

²Ka tetret nenda, amalegrengan iaili Punen Pusasapoura tai Jahudi

³Iageti kuaddangan ka matat Jesus sasarainania, "Kaddiuaké kudduat néné,

nuei ka Judea, bulé raitsó nia ka sia sipasiuluinu sigalaiakenennu

⁴Aipoí tá te anai sia sipakele sigalaiakenenda, ké ai baí obána imasingin oninia. Buítá raagai nia sangaliot polak, ké nugalaiaké baí kelé néné!

⁵(Sasarainania leú poí ka sia, tá leú et matonem bagadda ka tubut Jesus.

⁶Iageti kuanangan ka matadda sasaraiania, Jesus, "Tápei aiaili tetrenia kaku. Tá kelé ka kam, kaipa lé nuteúaké kam tetrenia, tá anai sisaila kam

⁷Aipoí ka kam, tá rapulalagaki kam бага taikapolak. Tápoi aku kaku geti, kirénangan lé malagá bagadda taikapolak ka tubukku, tá poí muaari kukukua kataínia sigalaira taikapolak

⁸Kenan'an kam ka kam mupunen. Aku geti kaku, tápei memei aku, aipoí tápei aiaili tetrenia kaku.

⁹Oto néné te aikua ka matadda sasaraiania Jesus; iageti nia ka sia, kuddu ka Galilea

¹⁰Kelé araei sasaraianan Jesus mupunen, ei nia ka sia Jesus sipinakele, taiaagaietda sabagei

¹¹ Ai sia mupupunen, airagagaba nia tai bajára tai Jahudi; paisérangan, pelé nga-nganda, "Kaipa nia?

¹² Iageti sia sikukuddu sedda, taddaakérangan rapakasat nga-nganda rakua nia. Ai sia sipasikukua, "Sirimanua simatopit lé nia." Tápoi arakua geti sabagei, "Tá matopit nia! Sipataju sirimanua simigi lé nia.

¹³ Tápoi beri sia sara simaró бага masipaarep tiboietda ka simigi, pagalaiat tubut Jesus, kalulut lotóra ka tubudda tai bajára tai Jahudi

¹⁴ Oto talagat pupupunenda, gurú nia Jesus ka Uman Taikamanua, iageti taddaakénangan mungantoman

¹⁵ Bulat kisei lé ka bagadda tai bajára tai Jahudi ka tubut Jesus, pelé nga-nganda, "Kaipa aisese pusoppinan simakopé igi néné, aipoí sitaipusisikola lé nia néné?

¹⁶ Iageti kuanangan ka matadda Jesus, "Nganturat singantoman'akenenku ka matamui néné, tá sibara kaku, tápoi sibara ka tubut sipasikokoiniaké aku lé

¹⁷ Ka sia simareddet ka siobat bagat Taikamanua, raagai masipatup-tup ka bagadda, sibara ka Taikamanua leú pá nganturatku néné, elé sibara kaku lé

¹⁸ Aipoí ké tiboiet sibabara ka tubunia leú et inga-ngantoman'aké, oto masigaba umun ka tubunia lé igagalai. Tápoi sipasibebesíaké bulé onin sipasikokoiniaké nia lé tuuumun'aké, oto simaroipo paatuat lé nia sirimanua néné, tá anai patajuat ka bagat paatuatnia

¹⁹ Kipa, tápei poi aiaké surukat Taikamanua ka tubumui, si Mose? Tápoi mandé kam sara ka talagamui néné sipasirereddet surukat néné. Angoi peilé nuiisiaké kam numateiaké kam aku?

²⁰ Iageti alegiddangan nia sirimanua simigi, "Ai le rorónu! Kasonia poi iisiaké imateiaké ekeu?

²¹ Kuana lé ka matadda Jesus, "Sarat sangamata lé galajet akugalai ka gogoi Sabbat, tápoi seget kisei ka bagamui nuitsó kam nia

²² Aiaké ka kam surukat musunat, iaté si Mose, kenanen baí tá nia amasiaké, tápoi siakéra lé taikebbukatmui, ainangan tá babara nia ka sia si Mose. Oto sené toilá, ai leú kam masisusunat sirimanua ka ipot gogoi Sabbat

²³ Oto ké pasigagalaiakémui kelé néné, bulé tá nupasabau kam surukat Mose siorak pususunat, angoi peilé

nupugogoluki kam aku kaku, kalulut
aaleakéku sangamberi besíra sirimanua
ipot gogoi Sabbat

²⁴Oto ale, buí nuhakimi kam sirimanua
siripot simatotoilá, tápoi kau siripot
keadilan.

²⁵Ai sia piga pá tai Jerusalem
sipasikukua, "Taleú pá niangan néné
gabaetda, bulé ramateiaké nia

²⁶Itsó peité kam, bulat tá igigí-gí
ipanibo ka matadda siberikabaga; tápoi
bulat beri kuadda apa pá ka matania!
Taleú pá araseseakéan ka sia tai bajáta
Puririmata Sipaarau nia sinéné

²⁷Tápoi ioi ka sia geti Rimata Sipaarau,
tá tuagai kabaraiaitnia! Ka sia geti néné,
taagai kam kabaraiaitnia.

²⁸Lepá, ai nia munga-ngantoman Jesus
ka Uman Taikamanua, pugereinangan
leú et, "Oto ai lé nuaagai kam aku,
samba ai lé nuaagai kam kaipa akubara?
Akuoi sené, tá teú bagakku. Tápoi ka
teú bagat sibakkat hak masikoiniaké
aku, samba nia néné, katonemiet lé nia.
Tápoi ka kam geti tá nuagai kam nia

²⁹Aku geti kaku, kuagai nia, ka tubunia
lé poí akubara; nia lé amasikoiniaké aku.

³⁰ Ka tetret nenda, bulat araisiakéan ralabá Jesus, tápoi beri sia sara simaeme kabei masilabá, tápei poí aiaili tetrenia

³¹ Tápoi maigi leú sia ka talagadda simatonem бага ka tubunia, arakua, "Ké moi baí nia ka sia Rimata Sipaarau, momoi leú pá isaliuaké igalai maigi kerek, belé peilé ka sia néné?

³² Tápoi ka sia geti tai Parise, ai lé sia mutatalinga, masiarepi rapakasat nga-nganda sirimanua simigi, ka tubut Jesus. Kalulut néné, pakerénangan bagadda sambadda tai imam sabeu, koiniakérangan piga pá tai tenterat Uman Taikamanua, bulé raei masilabá Jesus

³³ Iageti kuanangan Jesus ka matadda sirimanua simigi sikukuddu ka bagat Uman Taikamanua, "Táan te mauju kupaalei kam. Lepá toili aku mitsá ka tubut sipasikokoiniaké aku

³⁴ Nugagaba te kam aku, tápoi tá nusesese kam aku; aipoí tá momoi nuoi kam ka kudduatku.

³⁵ Iageti patiboddangan pasasambadda tai bajára tai Jahudi, pelé nga-nganda, "Kaipa poi ieei sirimanua néné, pat koí taisesettangan nia? Taleú pá ka

tubudda tai Jahudi sikukuddu ka laggai bagei, iaté ka talagadda tai Junani, bulé ipangantoman tai Junani

³⁶ Aponia katukolobat sikuania néné, nugagaba te kam aku, tápoi tá tasesese nia, samba tá momoi taei ka kudduatnia?

³⁷ Ka gogoi katulaibiat punen, iaté ka matat punen siabeunia, puriónangan Jesus ka Uman Taikamanua, sogakénangan nga-ngania, masikua, "Kasei simaoggou, kau raoi ka tubukku muló

³⁸ Ka sia geti simatonem бага ka tubukku, ai atusurat'aké ka Buko Sipunenan, sipasikukua kisé, 'Muguguruk te matat bubuakat oinan purimanuaiat sibara ka paatuatda.'

³⁹ (Ikukua Jesus sené, iaté pagalaiat Ketsat Sipunenan, siloketda simatonem бага ka tubunia. Aipoí ka tetret nenda, tápei atuuruaké ka tubudda Ketsat Sipunenan; tápei poí atulastsat'aké Jesus ka kamateiatnia.

⁴⁰ Bulat maigi sia sipasiaarep ngantomannia Jesus, amasikua, "Bulat Nabi te nia sinéné!

⁴¹ Ai sia sipasikukua, "Nia té néné Rimata Sipaarau!" Tápoi arakua geti

sabagei, "Táanbuu ale, kaipa te ibabara Rimata Sipaarau ka Galilea

⁴² Ka Buko Sipunenan ai atusurat'aké, sipasikukua, "Punuteteu Dapid lé nia Rimata Sipaarau néné, ka laggai Betlehem lé kabaraiaitnia, iaté laggai putútukat matat Dapid.

⁴³ Oto kalepakatnia, pajoggloddangan leú et pasasambadda, kalulut Jesus

⁴⁴ Ai sia siisiaké masilabá Jesus, tápoi beri sia sara simaeme kabei masilabá

⁴⁵ Kelé aratoili tai tenterat Uman Taikamanua sikoiniakenenda masilabá Jesus, nou-nourangan sia tai imam sabeu, "Kipa, tá koí anuabbít kam nia sené?

⁴⁶ Belan nga-nganda lé tai tenterat Uman Taikamanua, "Ale, bulat tá anai siai kopet againa manibo!

⁴⁷ Iageti kuaddangan ka matadda tai Parise, "Taleú sambat kam'an lé aipepeaké

⁴⁸ Taleú aian sia ka talagadda tai bajáta, elé ka talagadda tai Parise simatonem бага ka tubunia

⁴⁹ Aipoí ka sia sirimanua simigi, tá raagai surukat Mose, oto kenanen kipa pá, aiorak'an sia pateleiat.

⁵⁰Tápoi ai sara ka talagadda tai Parise, iaté sipuoni si Nikodemus, sieei siburú ka tubut Jesus. Kuanangan ka matadda tai Parise sabagei

⁵¹"Siripot Ukum, tá momoi tuukum'aké sara sirimanua, ké tápei atuarep pakaronia, samba tupareksa sigalaiakenennia.

⁵²Iageti kuaddangan ka matat Nikodemus, "Taleú ka Galilea leú kekeu anubara?" Lelek'aké peité sitususurat ka Buko Sipunenan! Sedda kolou ka bagam, beri sara nabi sibabara ka Galilea!

⁵³[Lepá arapaukle, toili sia sangamberidda ka lalepra.

8¹Tápoi ka sia geti Jesus, ka Leleu Zaitun lé aiei

²Matsepnia lé, maseggei peilé, ameian nia mitsá Jesus ka Uman Taikamanua. Iageti eirangan leú et sirimanua simigi ka tubunia. Puuddetnangan leú et. Lepá taddaakénangan ipangantoman sia

³Tá amauju, ei sia tai guru paamian sambadda tai Parise masiabbít sara sinanalep siailidda ai nia muoolop tubu. Kuaddangan ka matat sinanalep néné ipurió ka talagadda

⁴ Lepá kuaddangan nia ka matat Jesus, "Guru, akuaili kai sinanalep néné, ai nia muoolop tubu

⁵ Siripot ka Surukat Mose, buítá tubaijuk nia bukkú sinanalep kelé néné, teret matei. Oto kipa siripot sipinaatum kekeu, galaiakenen ka tubunia?

⁶ Rakukua nia geti kelé néné ka tubut Jesus, masikabli tiboietnia lé, bulé ioi raseleaké nia. Tápoi amulukuk lé nia Jesus, surat'akénangan singongaínia ka polak

⁷ Kelé aimaole ranáná nia, suruakénangan uténia, kuanangan ka matadda ka sia, "Oto kiséan lé, kasei ka talagamui siagai tubuna sitáanai jo, nia té muboboikí masibabaijuk'aké bukkú ka tubut sinanalep néné.

⁸ Lepá aikua néné Jesus, pulukkuknangan mitsá, suratnangan mitsá polak

⁹ Kelé araarep nia sikuat Jesus néné ka matadda, taddaakérangan mutui-tui, barana ka simabajá, tuian-tuian, legeina lé saria nia Jesus, sambat sinanalep sipununui-nui ka kudduatnia

¹⁰ Iageti teilaakénangan matania Jesus, kuanangan ka matat sinanalep,

"Kaipangan né sia sangamberidda? Táan anai sia siukum'aké ekeu?

¹¹ Kuanangan ka matat Jesus, sinanalep néné, "Táan anai sia, Ukkui." Iageti kuanangan ka matania Jesus, "Kauan, aku kaku leú et, tá leú et kuukum'aké ekeu. Kineneiget momoian nutoili, tápoi baán tebaí gagalai mitsá jo."

¹² Lepá pungantomannangan mitsá Jesus, ka matadda sirimanua simigi, pelé nga-ngania, "Aku te néné sipatóaké taikapolak. Kasei sipasitutum aku, tá mueenung sia ka bagat pugep-geman, tápoi raiikep'aké lé pató sipurimanuaji sia.

¹³ Iageti kuaddangan ka matat Jesus tai Parise, "Oto kineneiget anutaddaakéan masimuneng'aké tubum. Simuneng'akenennu néné, tá sineseat.

¹⁴ Belan nga-ngania lé Jesus, ialegi nga-nganda, "Kenanen tubukku leú et amasimuneng'aké tubukku, tápoi simuneng'akenenku néné, bulat sibulatnia; aipoí kaku kuagai kabariatku, samba kuagai kaipa kueei. Tápoi ka kam geti, tá nuagai kam kaipa akubara samba kaipa kueei

¹⁵ Ka kam nupasihakimi kam sirimanua, siripot enung'akenenda sirimanua lé nugagalaiaké kam; tápoi aku kaku geti, bulat beri sia sara akuhakimi

¹⁶ Iageti kéan baí kuhakimi sia, siteúakenenku nenda maroipo lé, aipoí tá sarakku; aipaaalei aku Ukkui sipasikokoiniaké aku

¹⁷ Beri leú poí ka Surukat Mose, ai atusurat'aké kisé: Simuneng'akenenda rua sirimanua lé tuseseseaké

¹⁸ Oto simuneng'aké aku, ai kai rua; aku, sambat Ukkui sipasikokoiniaké aku.

¹⁹ Iageti kuaddangan ka matania, tai Parise, "Oto kaipa ikukuddu ka sia Ukkuinu?" Aleginangan nga-nganda Jesus, pelé nga-ngania, "Tá nuagai kam aku, sambat Ukkuiku. Aipoí ké nuagai kam aku kaku, tá isoppi nuagai leú kam nia ka sia Ukkuiku.

²⁰ Aikua sangamberinia néné Jesus, iaté ka tetret ai nia mungangantoman ka Uman Taikamanua ka bet-bet petit bulagat panguruat. Tápoi bulat beri sia sara simaró бага masilabá Jesus, kalulut tápei poí aiali tetrenia

²¹ Iageti kuanangan mitsá ka matadda Jesus, "Memeian lé aku; tápoi gabamuian

tebaí aku. Oto mateimuian te ka jomui. Aipoí tá momoi nuoi kam ka kudduatku.

²² Pelé nga-nganda tai bajára tai Jahudi, "Imamateiaké lé pá tubunia, aikua koí, 'Tá momoi nuoi kam ka kudduatku.'

²³ Iageti kuanangan ka matadda Jesus, "Kam ka kam néné, ka repé lé anubara kam; tápoi aku kaku geti, ka pata lé akubara. Kam ka kam ka ka polak lé anubara kam; tápoi aku kaku geti, tá ka taikapolak akubara

²⁴ Iaté lulunia kukukua nia ka matamui, mateimuian te ka jomui. Kirénangan tedda mamatei kam ka jomui, ké tá matonem bagamui, 'aku néné te oniakenen, AKU T+ë NIA.'

²⁵ Oto kuaddangan ka matania, "Oto kasonia lé ekeu néné?" Kuana lé ka matadda Jesus, "Táan anai lulunia kupanibo ka matamui

²⁶ Bulat maigi peilé bukkaietku pagalaiat galai tubumui, samba hakimietku. Tápoi katonemiet te nia sipasikokoiniaké aku. Akupoiliat'an ka tubudda taikapolak sangamberi siarepku sibabara ka sia.

²⁷ Tápoi tá airaaagai kolou, itiboi ka matadda Jesus, pagalaiat Ukkui

²⁸ Kalulut néné, kuanangan ka matadda Jesus, "Kiséan lé, anubuak'akéan geti kam nia Togat Manusia néné, iapeité agaimuian nia, 'aku néné te oniakenen AKU T+ë NIA,' samba bulat kolou ka bagamui taigagalaiku beri sara apa pá ka teú bagakku sarakku. Sarat singantruakenen Ukkui ka tubukku lé, kusesegéaké ka matamui

²⁹ Mariu-riu lé ipaalei aku ka sia sipasikokoiniaké aku néné. Bulat beri pei saraakéna aku; mariu-riu lé poí kugalaiaké sangamberi siobat bagania.

³⁰ Kelé aikua sangamberinia néné Jesus, maigiddangan simatonem бага ka tubunia

³¹ Lepá kuanangan nia Jesus ka matadda tai Jahudi, simatonem бага ka tubunia, Jesus, "Ké anuparimanuaakéan baí kam siripot sangamberi singantoman'akenenku ka matamui, bailiunangan kam sipasiului aku bulat sipulelelek

³² Agaimuian leú et Taikamanua bulat sibulatnia. Oto kalulut néné, ujaakénangan leú et kam.

³³ Iageti kuaddangan ka matania, "Sapunuteteu Abraham lé kai

ka kai néné. Beri peité agaimai
 arapupagugulet'aké kai kasei pá!
 Apa katukolobat sikuam ka tubumai,
 'Tuujaaké kai'?

³⁴ Oto kuanangan ka matadda Jesus,
 "Ale, bulat aisese te sikuakku néné ka
 matamui. Sangamberi sirimanua sigalai
 jo, iaté pagugulet jo

³⁵ Tá anai kudduatda simakolou, ka sia
 sapagugulet ka bagat lalep, tápoi ka sia
 toga geti, mariu-riu lé nia mukuddu ka
 bagat lalep

³⁶ Iaté lulunia, ké togangan amasiujaaké
 kam, amuujuangan te kam bulat sibulatnia

³⁷ Kirénangan, ai lé kuaagai
 pupupunuteteuna kam si Abraham. Tápoi
 kenanen kisedda, ai lé nuiisiaké kam
 numateiaké kam aku, kalulut taiobámui
 masisiló nganturatku

³⁸ Aku kaku, siitsóku ka Ukkuiku lé
 kugagalaiaké. Kelé nugalaiaké kam nia
 ka kam, singantruakenenda saukkuimui
 ka tubumui.

³⁹ Iageti kuaddangan ka matania,
 "Ukkuimai iaté si Abraham." Tápoi kuana
 lé nia ka matadda Jesus, "Ké bulat nia
 baí togat Abraham kam néné, tá isoppi

nugalaiaké kam kelé sigalaiakenen nia ka sia si Abraham

⁴⁰Tápoi kelé kusegéaké ka matamui siobat bagat Taikamanua siarepku sibabara ka tubut Taikamanua, tú-tú ka paatuatmui nuisiaké kam numateiaké kam aku. Ka sia si Abraham tá aiperú kelé sigalaiakenenmui néné

⁴¹Sigalaiakenen ukkuimui leú et nuusut'aké kam." Iageti kuaddangan ka matat Jesus, "Ale, tá te togat siuilak kai néné. Aipoí sarat sara lé Ukkuimai, iaté Taikamanua.

⁴²Oto kuanangan ka matadda Jesus, "Bulat ké Taikamanua baí nia Ukkuimui, tá isoppi imanuntu bagamui ka tubukku, aipoí aku kaku néné, ka Taikamanua lé akubara. Tá tenan aku oi, sibara ka teú bagakku sarakku, tápoi nia lé aikoiniaké aku akuoi

⁴³Aponia lé poi lulunia tá isasak-sak ka bagamui ka sikuakku ka matamui? Tápoi kalulut taioommui nia masiarep nganturatku

⁴⁴Bulat Sanitu lé ukkuimui; siripot ka siobat bagat ukkuimui lé numareré-ré kam. Baranangan ka panandaatnia peilé, bulat sipamamatei lé nia ka sia Sanitu

néné. Beri ré-ré nia ka katuripoat,
aipoí ka tubunia tá anai katuripoat.
Oto ké igalai paboko, siripokatnangan,
amuarat'an poí ka tubunia paboko. Bulat
sipatataju lé nia; bulat turot boko

⁴⁵Tápoi aku kaku geti, siripot siobat
bagat Taikamanua lé kutitiboi, oto kalulut
néné, taimatonemnangan bagamui ka
tubukku

⁴⁶Kasei ka talagamui simaró бага
masisusui matakku, masipatoilá ka
sirimanua, kababarat jokku? Ké kutiboi
ka matamui siobat bagat Taikamanua,
kipangan lé poi tá imatotonem bagamui
ka tubukku

⁴⁷Sia sibabara ka Taikamanua lé iobá
piú masiarepi ngantoman. Tápoi kam
geti ka kam, tá ka Taikamanua anubara
kam, iaté lulunia tá ioobá piúmui
masiarepi nganturat.

⁴⁸Iageti alegiddangan nia sikuat Jesus,
pelé nga-nganda, "Kipangan, tá amei nia
ka nga-ngamai, bulat tai Samaria lé baí
ekeu néné, sipinasaileura sanitu?

⁴⁹Tápoi kuana lé ka matadda ka sia
Jesus, "Tá airapasasaileu aku sanitu.
Aikuhohormati nia Ukkuiku, tápoi ai lé
nupalololoi kam aku

⁵⁰Tá umun ka tubukku kugagaba. Ai nia sara sipasibabaraaké kehormatan ka tubukku, nia té masihahakimi

⁵¹Bulat sibulatnia sikuakku néné ka matamui, kasei sireddet tiboietku, táan mamatei nia, burú.

⁵²Oto belan nga-nganda lé tai Jahudi ka tubunia, "Bulat iapeité aimakolou ka kai, pasasaileura ekeu sanitu! Aipoí ka sia si Abraham samba tai nabi amateian sia. Tápoi anukua peilé kekeu, 'Sangamberi sireddet tiboietku, táan mamatei sia, burú.

⁵³Ké amateian baí nia ka sia si Abraham samba sangamberidda tai nabi leú et amateian sia, oto ekeu néné kasonia takukua ekeu kekeu? Bulat kaipa te iooi nusaliuaké beunan tiboí tubut ukkuimai si Abraham!

⁵⁴Iageti kuanangan ka matadda Jesus, "Ké aku leú et masigagaba umun ka tubukku, oto tá anai lulunia. Tápoi sipasihohormati aku geti, iaté Ukkuiku, oniakenenmui Taikamanuamui

⁵⁵Tápoi tá nuagai kam nia. Aku geti kaku, kuagai nia. Aipoí ké kukua baí tá kuagai nia, aibailuan lé aku sara

sipabobokoí, kéan lé kam'an lé. Ai lé kuaagai nia, tiboietnia leú aikurereddēt

⁵⁶ Bulat maangká bagania ukkuimui si Abraham iitsó kaoijananku. Oto aiitsóan. Bulat seget kopet angkat bagania!

⁵⁷ Belan nga-nganda lé ka sia tai Jahudi ka tubut Jesus, "Tápei aiaili lima ngapulu ngarura ekeu, anuitsóan poi nia si Abraham?

⁵⁸ Iageti kuanangan ka matadda Jesus, "Bulat sibulatnia te sikuakku néné ka matamui: ainangan tá mututú-tú matania ka sia si Abraham, aian turerere kaku kababarakku.

⁵⁹ Iageti aláranan bukkú tai Jahudi néné, ragelai rabaijuk Jesus. Tápoi aipalipput lé tubunia Jesus, iageti tuiakénangan nia ikaddiuaké Uman Taikamanua.

9 ¹ Talagat pueenungnia Jesus, itsónangan sara simapeset mata, barania ka pusulekatnia peilé

² Iageti nou-nourangan nia sipasiuluinia, pelé nga-nganda, "Angoi ka sia, Guru, tú-túna lé matania amapeset'an matania? Taleú kalulut jonia, elé jodda lé saeppunia?

³ Kuanangan ka matadda Jesus, "Tá leú kalulut jonia, elé kalulut jodda saeppunia, aiputú-tú matania, simapeset mata; tápoi bulé raitsó lé ipugalai geget Taikamanua ka tubunia

⁴ Ai peilé matatágó sulu, buítá tagalai galajetnia sipasikokoiniaké aku. Aipoí ké iaili tetrenia imasoibó, beringan te sia sara sipugagai galajetna

⁵ Burúku mukuddu ka polak néné, aku néné te sipatóaké taikapolak.

⁶ Lepá aikua néné Jesus, lujinangan polak, pagalúnangan lujinia ka polak. Iageti lokot'akénangan nia ka matat simapeset mata néné, kuanangan ka matania

⁷ "Kenan nubui matam ka Kolam Siloam." (Katukolobat Siloam, iaté 'Sikoiniakenen'.) Iageti einangan leú et masibui matania. Kelé aitoili, amakoinongan matania

⁸ Iageti kuaddangan nia ka sia pabébéakenennia lalep samba sipasiiitsó nia siboikí, ipaniddou bulagat, "Tá poi nia sinéné, simarei-rei taitsó sipututukkú maniddou bulagat?

⁹ Tápoi ai sia sabagei sipasikukua, "Oo, bulatnia tedda, néné." Tápoi ai leú

sia mitsá sabagei sipasikukua, "Tá nia néné, keret tubudda lé." Tápoi nia ka sia masakua tubunia, "Aisesengan, aku tedda néné.

¹⁰ Iageti nou-nourangan nia, pelé nga-nganda, "Kipa anuperú aimakoinong matam?

¹¹ Kuanangan ka matadda, "Ai sara sipuoni Jesus, aialá goisó polak simalotí, iageti lokot'akénangan nia ka matakku, lepá kuanangan ka matakku, 'Kenan nubui matam ka Kolam Siloam.' Iageti eikungan leú et. Oto aikububui matakku, makoinongnangan leú et matakku.

¹² Kuaddangan ka matania, "Kaipa nia?" Aletinangan nia, kuanangan, "Tá kuagai.

¹³ Aipagalú lujinia Jesus ka polak, masilaggek matat simapeset mata néné, iaté ka gogoi Sabbath. Kalulut néné, abitrangan leú et simamale mata néné, ka matadda tai Parise

¹⁴ (9:13)

¹⁵ Iageti nou-nourangan leú et nia ka sia, kipa aipaerú aimakoinong matania. Kuanangan ka matadda, "Ailokot'aké lotí ka matakku, buikungan nia, makoinongnangan leú et matakku.

¹⁶Oto ai sia piga pá ka talagadda tai Parise sipasikukua, "Tá ka Taikamanua aibara sipasigagalaiaké kelé néné, tá koí aisurú gogoi Sabbath." Tápoi arakua geti sabagei, "Kaipa iooi ragalaiaké nia sirimanua sijo, galajet pukerengan kelé néné?" Kalulut néné, bara paukelatda pasasambadda

¹⁷Bulé imatune raagai nia nou-nourangan nia mitsá tai Parise, "Oto kekeu, kipa nukukua ka tubut sipakoinong matam néné?" Kuanangan ka matadda, "Nabi lé nia.

¹⁸Tápoi ka sia geti tai bajára tai Jahudi, tá matonem bagadda peset matania siboikí ka sia néné, samba leú kakokoinong matania kineneiget. Kalulut néné sogairangan saeppunia

¹⁹Nou-nourangan sia, pelé nga-nganda, "Bulatnia leú togamui nia sinéné, kuanenmui simapeset mata barana ka pusulekatnia peilé? Kipa aiperú aimakoinong matania kineneiget?

²⁰Iageti kuaddangan nia saeppunia, "Oo, bulat togamai nia néné; bulat kirénangan lé mapeset matania barana ka pusulekatnia peilé

²¹ Oto pagalaiat aimakoinong geti matania kineneiget, tá kuagai kai ka kai. Ialeú et kasonia amasiperú matania aimakoinong, tá leú et kuagai kai. Obána lé niangan lé nunonou-nou kam, aipoí amaabeuan nia; iagaian masialegi.

²² Rakukua kelé néné geti saeppunia, kalulut lotóra lé ka tubudda tai bajára tai Jahudi; aipoí apakeréan bagadda masikua, kasei masimuneng'aké pagalaiat Puririmata Sipaarau nia, Jesus néné, táan tuoobáaké raguruki uman paniddogat

²³ Iaté lulunia arakua saeppunia ka matadda, "Abeuan nia; niangan lé reré kam.

²⁴ Iageti sogairangan nia mitsá nenda simapeset mata siboikí, kuaddangan ka matania, "Kiséan lé. Pusuppangan lé masikua pububulatnia sikuam néné. Aipoí ai lé kuaagai kai, tubut sijo lé nia sirimanua nenda.

²⁵ Oto kuanangan ka matadda ka sia, "Sirimanua sijo pá nia, élé taá; nenda geti kaku, tá te kuagai. Sarat néné lé kuagai, siburú mapeset matakku, tápoi kineneiget amakoinongán matakku.

²⁶ Iageti kuaddangan mitsá ka matania, "Apa aigalai ka tubum? Kipa aipaerú aimakoinong matam?

²⁷ Kuanangan ka matadda, "Akutiboian ka matamui, tápoi tá nuaarepi kam. Anuobáan koí kam mitsá masiarep? Taleú ai lé nugegelai kam ka kam, ibailiu kam sipasiuluinia?

²⁸ Iageti pulagajiddangan nia, kuaddangan ka matania, "Ekeuan té né sipasiuluinia; kai geti ka kai, taá! Aipoí kai ka kai néné, sipasiului Mose lé kai

²⁹ Kelé siagaimai, aipatiboaké Taikamanua ka sia si Mose. Tápoi ka sia geti néné, tá kuagai kai kaipa kabaraiaitnia.

³⁰ Iageti kuanangan ka matadda, "Ale, bulat makisei ka bagakku ka tubumui, taiagaimui kabaraiaitnia; tápoi amakoinongán matakku aiperú nia

³¹ Aipoí kelé siagaiatta, bulat tá te iaarepi sia Taikamanua, sijo; tápoi sarat sia sikalotóaké samba sigalaiaké siobat bagania lé iaarepi

³² Ka panandaat polak peilé, bulat tápei ataarep kam, kababaradda siperú matadda simapeset mata barana ka

pusulekatda peilé, pat makoinongnangan matadda

³³ Ké tá ka Taikamanua baí nia aibara ka sia sinéné, tá momoi igagalai apa pá.

³⁴ Iageti kuaddangan ka matania, "Kipa baí anukua? Bulat sisusut jongan lé koí ekeu, barana ka pusulekatnu peilé, nupangangantru peilé koí kai?" Oto ka tetret nendangan té, táan araobáaké nia, iguruki uman paniddogat

³⁵ Kelé aiagai nia Jesus, bebelaakéra nia ka uman paniddogat, gabanangan nia Jesus. Kelé aiaili nia, kuanangan ka matania, "Kipa, ale, matonem leú bagam ka tubut Togat Manusia?

³⁶ Kuanangan ka matat Jesus, "Kasonia poi? Kua pei kaku, bulé kukatonemi nia.

³⁷ Iageti kuanangan ka matania Jesus, "Aian nuiitsó nia. Nia té néné nupatitiboaké kineneiget.

³⁸ Bulat kuana lé nia, "Matonem bagakku ka tubum, Tuhan." Iageti purapponangan ka matat Jesus

³⁹ Lepá kuanangan ka matania Jesus, "Akuoi ka polak néné, iaté masihakimi; bulé makoinong matadda simapeset mata; iageti mitsá bulé mapeset matadda simakoinong mata.

⁴⁰ Oto ai sia piga pá sedda tai Parise, amasiarep sikuat Jesus néné. Kelé araarep nia kuaddangan ka matania, "Oto ka sikuam néné, simapeset mata leú kai ka kai néné nuooniaké nia elé?

⁴¹ Iageti kuanangan ka matadda Jesus, "Ké mapeset baí matamui, oto tá anai jomui. Tápoi anukua lé poí kam, 'Makoinong matamai,' oto sirimanua sijo peilé, tuooniaké kam ka kam néné."

10 ¹ "Bulat sibulatnia te sikuakku néné: Ké kekeret geli lé arakaraí aratugurú ka bagat geli, elé tá ka matatbaliu geli aratugurú ka bagat geli, tápoi ka enungan bagei lé arapangaraí, bulat sipananangkou, elé sipasirarau-rau lé sia néné

² Tápoi ké geti ka matatbaliu aratugurú ka bagat geli, iapeité oniakenen bulat sipasijajago biri-biri

³ Bukánangan leú et nia sipasijajago geli, tutrangan leú et nga-ngania sabiri-biri, ké isogai oninda pasasara; iageti palulunangan leú et sia rabela ka gerat

⁴ Kelé arasegé ka gerat, ei nia boikí ka sia sipasijajago néné, tutrangan leú et nia sabiri-biri, raagai poí nga-ngania

⁵Tá raobá ratut'aké sabagei, tápoi rapulolotó lé sia, tá poi raagai nga-nganda.

⁶Tá raagai apa katukolobat pasikat siniboi Jesus néné ka matadda

⁷Iageti kuanangan mitsá ka matadda Jesus, "Bulat sibulatnia te sikuakku néné: Aku te matatbaliura sabiri-biri

⁸Sangamberi siooi boikí kei moi aku kaku, sipananangkou,élé sipasirarau-rau lé sia. Tápoi tá raarepi nga-nganda sabiri-biri

⁹Aku te matatbaliu. Kasei siguruki aku, iaté maaarau; oto kipa raperú, bela,élé tugurú pá ragalai, sarat airasesese kanda

¹⁰Ka sia sipananangkou, sarat manangkou,élé masimateiaké,élé masipakataí lé ragagai araoi. Tápoi aku kaku geti, masipurimanuaji sia lé akuoi; masakau purimanuaiat simakaplu, bulat pat lé tim-bura, kopet iginia

¹¹Aku te sipasijajago sipulelelek. Ka sia sipasijajago sipulelelek, ibubuluaké engania punu tubudda sabiri-birinia

¹²Tápoi ka sia geti siupaji, rakakaddiuké lé sabiri-biri, ké moi harimau simasagbak; aipoí

sia néné, tá sipasijajago biri-biri;
paobánangan pei bagei, tá biri-biridda.
Oto pasagbanginangan biri-biri néné
harimau; iageti pasabunangan leú et
tubunia

¹³ Ka sia sipasijajago siupaji, mututui-
tui lé sia, aipoí arapugalai bulé ibara
lé upadda. Tá maletsei ka bagadda ka
tubut biri-biri

¹⁴ Aku lé sipasijajago biri-biri bulat
sipulelelek. Kelé kipa againa aku Ukkui,
samba agaiku kaku Ukkui, kisedda leú
te agaiku sia kaku sabiri-biri; iageti ka
sia leú et raagai aku. Engakku leú et
kububuluaké punu tubudda

¹⁵ (10:14)

¹⁶ Iageti ai peilé biri-birikku bagei,
tápoi tápei atugurú sia ka mungkuat
biri-biri néné. Oto sia ka sia néné
leú et, buitá kuabbat sia, bulé raarep
ka sia nga-ngakku. Bulé ibailiu sia
sangamberidda sangamungkuat, samba
sarangan lé sipasijajago sia

¹⁷ Bulat manuntu bagat Ukkui ka
tubukku, kalulut bubuluakéku engangku,
tápoi lepá purimanuakkungan mitsá

¹⁸ Bulat beri sia sara sialá
purimanuaiatku néné. Aipoí bulat

sibara ka teú bagakku lé akubuluaké engangku néné. Ai ka tubukku gege masibuluaké engangku, samba leú gege masialá mitsá. Nenda te galajet sisilóku sibara ka Ukkui.

¹⁹ Kalulut tiboiet Jesus néné, pajoggloddangan leú et ka sia tai Jahudi

²⁰ Maigi sia amasikua, "Ai lé sanitut tubunia sirimanua néné! Ai rorónia! Apananmui nuaarepi kam tiboietnia?

²¹ Tápoi ai leú et sia sabagei sipasikukua, "Tá kisé galai rapanibo ka sia sipinasaileura sanitu! Momoi poi ipakoinong matadda simapeset mata, ka sia sanitu?

²² Ka tetret nenda, talagat pueenungnia punenda, iaté Punen Pasirepdeman Raguruki Uman Taikamanua ka Jerusalem. Gogoi nenda, aiipó rura simaleppet

²³ Aigegejengi kudduat sikokoiakenen kai Salomo ka Uman Taikamanua

²⁴ oirangan leú et ka bé-bénia Jesus masikua ka matania, "Kipangan lé burúnia nukau puingoat bagamai? Kua peité ka matamai bulat simakolou, ké baí bulat ekeuan néné Rimata Sipaarau.

²⁵ Iageti kuanangan ka matadda Jesus, "Tápei baí akukua ka matamui, tápoi bulat beri tonem bagamui. Ka onin Ukkui lé akugalai galajet néné, masipatoilá pagalaiat tubukku

²⁶ Tá imatotonem geti bagamui ka tubukku, kalulut tá poí sabiri-birikku kam néné

²⁷ Aipoí sia sabiri-birikku raobá raarepi nga-ngangku. Aku kaku leú et kuagai sia. Oto tutrangan leú et aku

²⁸ Kaukungan ka sia purimanuaiat sipulelelek samba sitaitatátá. Táan te ilalangó sia, burú. Bulat beri te sia sara simaró бага masioppu sia néné ka kabeiku

²⁹ Aipoí ka sia Ukkui sipasiaaké sia ka kabeiku, sisaliu sangamberinia lé nia. Oto beri te sia sara simaró бага masioppu sia néné ka kabei Ukkui

³⁰ Aku, samba leú ka sia Ukkui, sara lé kai, kuania.

³¹ Kalulut néné, alárgan bukku tai Jahudi rabaijuk Jesus

³² Tápoi kuana lé ka matadda Jesus, "Anuigbuk'an kam sangamberi sigalaiakenenku simaerú, siripot sinegéakenen Ukkui ka kabeiku. Oto

aponiangan lé ka talagat sigalaiakenenku néné, sibaraaké pugolukatmui, pat gelaimuian nubaijuk kam aku bukkú?

³³Tápoi kuaddangan ka sia ka matat Jesus, "Kugegelai kai nia geti kubaijuk kai ekeu bukkú, tá kalulut sangamberi sigalaiakenennu simaerú, tápoi kalulut palololoinu lé, onin Taikamanua.

Ainangan taagai pusisirimanuam, tápoi anubailiuaké lé tubum kelé Taikamanua.

³⁴Tápoi kuanangan ka matadda Jesus, "Tá poi ai atusurat'aké ka bagat Buko Surukatmui sipasikukua kisé: Aikua Taikamanua, 'taikamanua lé kam néné'

³⁵Kelé siagaita, apa sitususurat ka bagat Buko Sipunenan, iaté tueenung'aké teret buru-burú. Oto ké tubut Taikamanuangan amasioniake sia sangamberi sipasisisiló tiboietnia, 'taikamanua'

³⁶apangan lé lulunia nukukua kam akupaloloi onin Taikamanua, kalulut kukuakku aku néné Togat Taikamanua? Aipoí sipiliy Ukkui lé aku, samba sikoiniakenennia moi ka polak néné

³⁷Ké tá baí kugalaiaké galajet sisegéakenen Ukkui ka tubukku, oto buí imatonem bagamui ka tubukku

³⁸Tápoi ai lé poí kugagaiaké, oto kauan imatonem bagamui ka tubut sigalaiakenenku, kenanen baí tá matonem bagamui ka tubukku néné. Iageti agaimuian kolou nia, Ukkui ai nia ka tubukku, kisedda leú et aku kaku, ai aku ka tubut Ukkui.

³⁹Iageti gelairangan ralabá Jesus, tápoi tá amoi; amutui-tui lé poí nia ka talagadda

⁴⁰Toilinangan leú et, ei nia mukuddu ka silat Oinan Jordan, ka kudduat Johannes siburú ai nia masiraráú

⁴¹Maigi sia amei sedda, masiailiaké Jesus. Iageti patiboddangan pasasambadda, pelé nga-nganda, "Ka sia kai Johannes, tá aigalai kerek; tápoi sangamberi sikuania pagalaiat tubut sirimanua néné, bulat sibulatnia.

⁴²Oto maigiddangan leú et sedda simatonem бага ka tubut Jesus.

11 ¹Ai sara sipuoni si Latsarus. Ikukuddu iaté ka laggai Betania, sambadda samaniunia si Maria sambat si Marta

²Si Maria néné, iaté sara sinanalep siuruaké tula simasingin ka reret Jesus; lepá posaakénangan alainia

masigarak'aké. Ka sara gogoi, bara besínia si Latsarus néné

³ Kalulut néné, segéakérangan pubebesit Latsarus néné samaniunia, ka tubut Jesus, kuaddangan, "Maniumai simanuntut bagam, si Latsarus, ai nia mubebesí.

⁴ Kelé aiarep nia Jesus, pangasegekat néné, kuanangan, "Besí néné geti, tá sibaraaké kamateiat. Tápoi bulé itulatsat'aké onin Taikamanua lé, ibabara kelé néné. Iageti kalulut néné leú, bailiu tulatsat'aké leú et nia ka sia Togat Taikamanua.

⁵ Kirénangan makaté bagania Jesus ka tubut Marta, ka tubut Maria, samba ka tubut Latsarus

⁶ Tápoi ka tetret nenda, kelé aiarep katuareman pubebesit Latsarus, palínangan táiei ibalou sia; tápoi amukuddu peilé nia rua ngagogoi burúnia ka kudduatnia

⁷ Lepá geti kuanangan ka matadda sipasiuluinia Jesus, "Tatoili kam ka Judea.

⁸ Kuadda lé nia ka sia sipasiuluinia ka matania, "Ale, Guru, simaruei peilé

araisiaké rabaijuk ekeu bukkú tai Jahudi, lepá ai peilé nugegelai mitsá mei sedda?

⁹Tápoi kuana lé nia ka matadda Jesus, "Kipa poi, tá poi pulu rua ngajam ka bagat sangogoi?" Sipueenung sinágó, tá isosok-sok reredda apa pá, aipoí raiitsó pató, sipatóaké taikapolak néné

¹⁰Tápoi sipueenung sinoibó geti, ipasoksongi lé reredda apa pá, kalulut tá poí anai sipatóaké puenungananda

¹¹Oto iaté né aikua Jesus. Lepá kuanangan nia mitsá ka matadda sipasiuluinia, "Amauneng'an nia suruakta si Latsarus, tápoi memei lé aku, kusuruakénia.

¹²Iageti kuaddangan ka matania sipasiuluinia, "Kisé lé, Tuhan, ké baí aian nia mauuneng, oto mamalengan besínia.

¹³Ikukua geti Jesus sené, iaté, ailangóan nia si Latsarus. Tápoi ka bagadda lé te sipasiuluinia, kelé kauuneng simarei-rei lé

¹⁴Kalulut néné, bulat kuanangan nia simakolou ka matadda sipasiuluinia Jesus, "Ailangóan nia si Latsarus

¹⁵Tápoi bulat akobáan tá akubara sedda; aipoí nenda te bulat pasese ka kam, bulé imatonem bagamui ka

tubukku. Sita kam kineneiget kai Latsarus.

¹⁶Tápoi belan nga-ngania lé ka sia si Tomas, oniakenen, "Tairua", ka tubudda saaleinia pasasambadda sipasiului Jesus, "Kauan taei kam, bulé tamatei kam sambatta!

¹⁷Segé Jesus sedda, epat ngagogoian burúnia aitureteiaké si Latsarus

¹⁸Malegre lé laggai Betania ka Jerusalem. Elé ai telu ngakilometer lé reunannia

¹⁹Maigi sia tai Jahudi amei masipusuibi bagadda tai Marta samba tai Maria, kalulut kalalangot maniura si Latsarus

²⁰Kelé aiarep nia kaooi Jesus si Marta, bela nia masiroroi Jesus. Tápoi ka sia geti si Maria, ai lé nia ka bagat lalep mukukuddu

²¹Kuana lé ka matat Jesus si Marta, "Ké ai baí ekeu sené ka tetret nenda, Tuhan, bulat tá ilalangó nia maniuku

²²Kenanen kisedda, ai lé kuaagai, mandé kineneiget leú et, iaaké Taikamanua sangamberi siniddounu ka tubunia.

²³Iageti kuanangan nia Jesus ka matat Marta, "Tususuru nia mitsá maniunu.

²⁴ Kuana lé ka sia si Marta ka matat Jesus, "Kirénangan tedda, ai lé kuaagai katususuru nia mitsá si Latsarus, ké aiailingan baí tetrenia isuruaké sia simamatei, Taikamanua, ka Gogoi Sialu.

²⁵ Iageti kuanangan ka matania Jesus, "Aku té néné, sipurimanuaji, samba sipasisusuruaké simamatei." "Oto kasei simatonem бага ka tubukku, muririmanua lé nia mitsá, kenanen amateian nia

²⁶ Oto sia sipuririmanua, simatonem бага ka tubukku, táan mamatei sia, burú. Matonem leú bagam ka sikuakku néné ka tubum?

²⁷ Iageti kuanangan ka matat Jesus si Marta, "Matonem bagakku ka tubum, Tuhan. Aipoí Togat Taikamanua lé ekeu, Tuhan, Rimata Sipaarau, siooi ka polak néné.

²⁸ Lepá aikua kelé néné si Marta, ei nia masisogai baginia si Maria; kasat'akénangan nga-ngania ka tubut Maria, pelé nga-ngania, "Amoian nia sené si Guru, aigagaba ekeu.

²⁹ Kelé aiarep nia si Maria sikuat Marta néné, olaakénangan leú et mei masiailiaké Jesus

³⁰ Ka tetret nenda, tápei asegé nia Jesus ka laggai; ai peilé nia ka kudduat paailiatda si Marta

³¹ Oto ka sia tai Jahudi leú et sieei ka lalep Maria masipusuibi bagadda, kelé araitsó olat bagania si Maria bela ka gerat, olaakérangan leú et nia ka sia, raei masitut si Maria, ka bagadda lé poí, musou ka ratei lé ieei

³² Kelé aisegé si Maria ka tubut Jesus, purekkuknangan leú et, kuanangan ka matat Jesus, "Bulat ké ai baí ekeu sené, ka tetret nenda, Tuhan, bulat tá ilalangó nia maniuku.

³³ Kelé aiitsó nia Jesus, ipusou si Maria samba rapusou ka sia tai Jahudi sipaaleiaké si Maria, bara ka sia sou bagania. Bulat kopé lepá reu-reu bagania, ituitsó

³⁴ Iageti nou-nounangan sia, "Kaipa anurateiaké kam nia?" Kuaddangan ka matania, "Konan, Tuhan, nuitsó nia." Iageti pusounangan leú et ka sia Jesus

³⁵ Kuadda lé nia tai Jahudi, "Itsó peité kam, bulat kopet nuntut bagania ka sia ka tubut Latsarus!

³⁶ (11:35)

³⁷ Tápoi ai leú sia sabagei sipasikukua, "Ale, bulat kipa pá; simapeset mata aiperú matadda imakoinong; oto tá koí amoi aikeraaké, bulé buí ilangó nia ka sia si Latsarus néné?

³⁸ Iageti suggrunungan nia mitsá purereu-reu бага Jesus. Kalulut néné, einangan leú et ka ratei. Ratei néné, iaté sara ngaliu bukkú, tápoi atukauan takkénia bukkú sabeu

³⁹ Iageti kuanangan ka matadda, Jesus, "Akkat'aké kam bukkú néné." Tápoi kuana lé ka sia si Marta, maniu silalangó néné, ka matat Jesus, "Epat ngagogoian burúnia aitureateiaké, Tuhan. Amabutéan!

⁴⁰ Iageti kuanangan ka matat Marta, Jesus, "Kipa, tápei poi akukua ka matam: Ké matonem bagam, tá isoppi nuitsó nia, kipa kopet beunan geget Taikamanua!

⁴¹ Iageti akkat'akérangan leú et bukkú takket ratei. Lepá teilaakénangan matania Jesus ka manua, kuanangan, "Surá sabeu kukua ka matam Ukkui, aarepim paniddogatku

⁴² Kirénangan ai lé kuaagai riu-riu nia nuarepi paniddogatku; sarat kaluluddangan lé siparururú sené kukukua nia kelé néné, bulé imatonem

bagadda puekeu nia amasikoiniaké aku ka polak néné.

⁴³ Lepána lé aikua néné Jesus, gereiakénangan nia musoga, "Latsarus, belaaké ekeu!

⁴⁴ Iageti belanangan leú et simamatei néné. Ai peilé itatabut kabei sambat rerenia komang poposa. Matania leú et ai peilé itatabbó, komang tabbot mata. Iageti kuanangan ka matadda sikukuddu sedda Jesus, "Rugut kam komang poposa ka rerenia, imaerú ipuenung.

⁴⁵ Maigi sia tai Jahudi, sieei masibalou tai Maria, amatonem бага ka tubut Jesus, kalulut araitsó sibabara néné

⁴⁶ Tápoi ai leú et sia piga pá, ka talagadda amei ka tai Parise, masisegéaké sigalaiakenen Jesus néné

⁴⁷ Kalulut néné, baraakérangan leú et rapat, tai Parise, tai imam sabeu, samba leú et Mahkama Puaranan. Pelé nga-nganda, "Kipa tapaeerú kam ka tubunia? Aipoí amaingingan kerek aigalai sirimanua néné

⁴⁸ Ké taoreaké baí iriuriuaké igalaiaké kelé kisé, tá isoppi imatonem bagadda sangamberi sirimanua ka tubunia. Iageti kalepakatnia, oi sia tai Roma

masiragat Uman Taikamanua, iageti subuakérangan sangamberi bangsatta!

⁴⁹ Iageti panibonangan sara ka talagadda, iaté si imam sabeu, sipuoni si Kayapas, pelé nga-ngania, "Bulat tá nuagai kam apa pá

⁵⁰ Kipa, taleú tá lé ainuaagai kam, kalulut tasurú ramakataí siberikabaga, maerú peilé sara matei; aipoí makopéan lé kataí nia ramasubu sangamberidda sabangsatta néné?

⁵¹ Tápoi kei ikukua kelé néné si Kayapas, tá bulat sibabara ka bagat paatuatnia. Tápoi ka siripokat puiimam nia ka tetret nenda, aisiblaakéan kamamatei Jesus, sibailiu puuktunganda bangsa Jahudi

⁵² Iageti tá sarat uktukra saradda tai Jahudi, tápoi samba leú et, masirurúaké samba masikau sia musara sangamberit tatogat Taikamanua simasasaragai

⁵³ Ka tetret nendangan té, aipakeré bagadda tai bajára tai Jahudi, raisiaké ramateiaké Jesus

⁵⁴ Kalulut néné, taipabelanangan tubunia Jesus, ka talagadda tai Jahudi. Tuinangan leú et ikaddiuaké laggai Judea, ei nia ka laggai Epraim, ka

bet-bet laggai simatangeu. Iageti kuddu sia sedda sambadda sipasiuluinia

⁵⁵ Ka tetret nenda, amalegrengan iaili Gogoi Punen Paskadda tai Jahudi. Amaingingan sia tai Jahudi sibabara ka laggaira, amei ka Jerusalem, masimagri tubudda, bulé ramaliná ka sikataí, kei iaili matat punenda

⁵⁶ Iageti gabaddangan leú et Jesus sedda. Kelé araparurú ka Uman Taikamanua, patiboddangan pasasambadda, masikua, "Kipa sipinaatumui ka kam? Momoi leú pá nia ka punen néné.

⁵⁷ Rakukua geti ka sia kelé néné, kalulut araparentaakéan poí tai imam sabeu, samba tai Parise, arakua, kasei iagai kudduat Jesus, buítá rasegéaké nia ka matadda, bulé ioi ralabá nia.

12 ¹ Ai pei enem ngagogoi, iaili tetrenia Punen Paska, ei nia Jesus ka laggai Betania, ka kudduat Latsarus sisuruakenennia ka simamatei

² Raumandangan nia Jesus sedda; oto si Marta te amasipasikeli sia. Iageti puuddetrangan tai Latsarus sambadda tairauma sabagei, masipaaleiaké Jesus mukom

³ Lepá oinangan leú et ka sia si Maria, ai ka kabeinia sitenga liter iginia tula narwastu simasingin, simakopé kepput saki. Uruakénangan nia ka reret Jesus; lepá posaakénangan alainia ka reret Jesus. Iageti masinginnangan leú et sangaliot bagat lalep, beu tula simasingin néné

⁴ Tápoi kuana lé nia ka sia si Judas Iskariot, iaté sara sipasiului Jesus, sipajonia ka gogoi sibabara

⁵ "Ale, tá koí atusakiaké lé, tula simasingin néné, telu ngotu ngaperak iginia, bulé itupauruaké bulagat sakinia néné, ka simagebá?

⁶ Ikukua kelé néné geti ka sia si Judas, tá kalulut letsei ka bagania ka tubudda simagebá; tápoi pananangkou nia lé; sarapei bagei bulat amareireian ka tubunia, ipakomi bulagat kas, samba bulagat sikukuddu ka tubunia

⁷ Iageti kuanangan ka matadda, Jesus, "Bá sasaila kam nia, sinanalep néné! Masipatarek kei iaili tetrenia iturateiaké aku lé igagalai néné

⁸ Aipoí ai lé turerere kababaradda ka sia simagebá ka talagamui; tápoi aku

geti kaku, tá mariu-riu kukuddu ka talagamui.

⁹ Kelé araagai nia sirimanua simigi kababarat Jesus ka Betania, eirangan leú et sedda. Tápoi bulat arabesíaké geti mei sedda, tá sarat kalulut kababarat Jesus, tápoi obára leú masiitsó si Latsarus sisuruakenennia ka simamatei

¹⁰ Lulut néné leú te, raiksiaké ramateiaké nia ka sia si Latsarus, tai imam sabeu

¹¹ Aipoí kalulut Latsarus néné, maigiddangan tai Jahudi sipasikakaddiuaké sia, aramatonem бага ka tubut Jesus

¹² Kelé aimamatsep, arepdangan nia, ka sia sangamberidda siooi mupunen Paska, kaooi nia Jesus ka laggai Jerusalem

¹³ Iageti ei sia masialá rorot poula, pulatsanan; lepá ailiakérangan nia, bulé raroroi nia. Ai sia memei airasosogaaké, "Umun kam Taikamanua! Tupanunukani te nia siooi ka onin Tuhan. Tupanunukani te nia Rimatadda tai Israel!

¹⁴ Iageti alánangan sangamuneng kalidei sikabbaugat, Jesus; janang nia ka tei-teinia. Bulé ipuaili kelé ka sitususurat ka bagat Buko Sipunenan, sipasikukua kisé

¹⁵ "Buí numalotó kam, ale kam tatogat Sion! Aian te nia momoi Rimatam, sipukakalidei, kalidei sikabbaugat!

¹⁶ Tápoi ka tetret nenda, tápei araagai katukolobat sangamberinia néné, ka sia sipasiului Jesus. Teret aitulatsat'aké lé Jesus ka simamatei, iapeité ararepdem nia sigalaiakenenda ka tubunia néné, atusurat'akéan ka Buko Sipunenan

¹⁷ Sia sangamberi sipasiigbuk ka tetret aisogai si Latsarus Jesus, ibela ka bagat ratei, samba aisuruaké nia ka simamatei, bulat tá muaari rapungu-nguan'aké nia siitsóra sigalaiakenen Jesus néné

¹⁸ Iaté lulunia araei ka tubut Jesus, sirimanua simigi néné, kalulut araarep, nia lé amasigalai pukerengan néné

¹⁹ Kuadda lé nia ka sia pasasambadda tai Jahudi, "Táan taagai kam peruketta! Itsó peité kam, sangaliot polak'an lé amei masitut nia!

²⁰ Ka talagadda sieei mupunen Paska ka Jerusalem ka tetret nenda, ai sia piga pá tai Junani

²¹ Iageti eirangan leú et ka tubut Pilipus, kuaddangan ka matania, "Ale Saraina, ké momoi baí nia, anurop'akéan kai; aipoí aikukikiddiy kai paaili ka tubut

Jesus." (Nia poí ka sia si Pilipus néné, sibabara ka Betsaida ka propinsi Galilea lé nia.

²²Iageti ei nia ka tubut Andareas, masisegéaké isiatda tai Junani néné, lepá ei sia ruadda masisegéaké ka tubut Jesus

²³Oto kuanangan ka matadda Jesus, "Aiailingan te tetrenia itulatsat'aké Togat Manusia

²⁴Bulat sibulatnia te sikuakku néné ka matamui: Ké tá tukarap'aké sangambé buat gandum ka polak bulé ianau nia, sangambénangan té nenda, lepá. Tápoi ké aianauan geti ngambet gandum nenda, iapeité ibara buania simigi

²⁵Kasei simanuntu бага ka engania, nia té malilimai purimanuaiat. Tápoi kasei simalagá бага ka engania ka polak néné, nia té masipasisikeli purimanuaiatnia, siaili ka purimanuaiat sipulelelek samba sitaitatátá

²⁶Kasei siobá mupagugulet ka tubukku, kau itut aku; bulé kaipa kukuddu, ai leú et sia sedda ka sia sapaguguletku. Aipoí bulat ihohormati te sia Ukkuiuku, sangamberi siobá mupagugulet ka tubukku.

²⁷ "Apangan lé páonia, kukukua kineneiget? Aipoí, ai lé murerekké bagakku. Kiséan lé pá kukukua, 'Belaakéan lé aku Ukkui, ka tetre pasisiboat néné'? Tápoi mitsá, akuoi tebaí ka polak néné, masienungi tetre pangoringan lé

²⁸ Oto ale, Ukkui, patoiláan pulatsanannu!" Iageti maarepnangan nga-ngan Taikamanua, pelé nga-ngania, "Akupatoiláan pulatsananku; oto ai leú kupatoilá nia mitsá.

²⁹ Iageti kelé araarep nga-nga néné, sia sikukuddu sedda, kuaddangan nia, "Néné, gululuu nga-ngan leleggu!" Tápoi ai leú sia sabagei amasikua, "Taá! Ai lé ipatitiboaké nia malaika!

³⁰ Tápoi kuana lé ka matadda Jesus, "Kalulumui lé te, aimaarep nga-nga néné; tá kalulukku

³¹ Aiailingan te tetrenia ihakimi sia Taikamanua, taikapolak néné; samba kineneiget'an te isisikkáaké sia ka uddenan purimataatda, Taikamanua, sauté ka polak néné

³² Tápoi aku geti kaku néné, ké atubuak'akéan aku ka polak néné,

tiktikkungan sia sangamberi sirimanua ka tubukku.

³³ Ikukua néné geti, Jesus iaté masipatoilá kipa enungnia imatei

³⁴ Iageti kuaddangan ka matania sirimanua simigi, "Aikua ka Buko Surukatmai ka kai, mariu-riu lé ipurimanua ka sia Rimata Sipaarau. Nukukua koí ka matamai, tububuak'aké nia Togat Manusia ka polak? Kasonia poi takukua Togat Manusia?

³⁵ Tápoi kuana lé nia ka sia Jesus, ialegi nga-nganda, "Táan te mauuju ikuddu pató néné ka talagamui. Oto kau nupuenung kam ka tetret ai peilé nia mukukuddu pató néné ka talagamui, bulé buí isaggemi kam pugep-gepman. Aipoí sia sipueenung ka gep-gep, tá raagai kaipa raeei

³⁶ Oto kau imatonem bagamui ka tubut pató néné, ka tetret ai peilé nia mukukuddu ka talagamui, bulé ibailiu kam tatogat pupatokat." Lepá aikua néné Jesus, tui nia sedda. Táan iobá ipatoilá mitsá tubunia ka tubudda

³⁷ Aipoí kenanen amaingingan araitsó kerek sigalainia, tápoi bulat beri tonem bagadda ka tubunia

³⁸ Bulé ipuaili kelé ka sikuat Nabi Jesayas, sipasikukua kisé: "Ale Tuhan, kasoniangan lé matonem бага ka simuneng'akenenmai? Kasei ka tubungan lé itupatotoilá geget Tuhan?

³⁹ Iaté lulunia tá imatotonem bagadda, aipoí beri ka sia si Jesayas aikuangan leú et, "Aikua Taikamanua

⁴⁰ 'Kusasapui te matadda, samba kukekeláaké te paatuatda; bulé tá imakoinong matadda, samba bulé buí imakolou ka bagadda. Bui ratoili ka tubukku, bailiu aleakékungan leú sia.'

⁴¹ Aikua kelé néné geti si Jesayas, kalulut aiitsóan poí ka sia pulatsanan Jesus. Iaté lulunia ititiboi nia ka sia pagalaiat tubut Jesus néné

⁴² Tápoi kenanen kisedda, maigi leú sia simatonem бага; elé beri leú ka talagadda tai bajára tai Jahudi leú, ai leú et sia simatonem бага ka tubut Jesus. Tápoi tá maró bagadda rapatoilá tonem bagadda néné, kalulut lotóra ka tai Parise, babara tá raoobáaké ratugurú ka uma Parurukat

⁴³ Aipoí raumun sia sirimanua peilé abeu ka paatuatda, belé peilé obára katumun sibara ka Taikamanua

⁴⁴ Iageti kuanangan ka matadda Jesus, "Kenanen baí aku arakatonemi бага, tápoi tá te aku arakatonemi; sipasikokoiniaké aku lé arakatonemi бага

⁴⁵ Samba sipasiiitsó aku, aiitsóan leú te nia sipasikokoiniaké aku

⁴⁶ Masipatóaké taikapolak te néné akuoi, bulé sangamberi simatonem бага ka tubukku, tá mukukuddu sia ka simagep-gep

⁴⁷ Oto kasei sipasiaarep tiboietku, tápoi tá rarereddet, tá aku iuukum'aké sia. Aipoí kaooiku ka polak néné, tá masihahakimi taikapolak, tápoi masipaarau sia lé

⁴⁸ Ialeú et sia simamit бага ka tubukku samba sitaiobá masiarepi ngantomanku, aian sia sipasihahakimi sia. Aipoí ngantoman sitiboakenenku néné te, ihahakimi sia, ka Gogoi Sialu

⁴⁹ Tiboiet sitiboakenenku néné, tá sibara ka teú bagakku; tápoi Ukkui sipasikokoiniaké aku lé amasipangantru aku, apa kukukua ka tubumui, elé apa kusesegéaké ka matamui

⁵⁰ Aipoí aku kaku néné, ai lé kuaagai, surukat Taikamanua néné, iaté sibaraaké

purimanuaiat sipulelelek samba sitaitatá lé. Oto iaté lulunia bulat kusesegéaké nia ka matamui kelé singantruakenen Ukkui ka tubukku."

13 ¹ Ai peilé sangagogoi iaili tetrenia Punen Paska, againangan tubunia Jesus iaili tetrenia ikaddiuaké polak néné, itoili mitsá ka Ukkuinia. Bulat makaté bagania ka tubudda bakkatnia ka polak néné. Tá lelepá ipukateki sia бага, teret kalepakatnia

² Ai sia mukokom sinoibó sipasiuluinia Jesus, sambat Jesus leú ka sia, guruinangan nia Sanitu ka sia si Judas, togat Simon Iskariot, bulé ipajo Jesus

³ Ai lé iaagai ka sia Jesus sesegéakéna nia Ukkui, sangamberi gege ka tubunia. Samba leú et mitsá, ai leú et iaagai kababarania ka Taikamanua, samba katotoili nia mitsá ka tubut Taikamanua

⁴ Kalulut néné puriónangan leú et Jesus, bukánangan saraubánia, lepá appraakénangan komang poposa ka tengania

⁵ Iageti uruakénangan oinan ka gararau, taddaakénangan masibui reredda sipasiuluinia; lepá posanangan

nia komang poposa siappaakenennia ka tengania

⁶ Kelé aiaili kai Simon, kuanangan ka matat Jesus si Simon, "Kipa ale, Tuhan, ekeu lé koí ibubui rerekku?

⁷ Iageti kuanangan ka matania Jesus, "Tápei nuaagai katukolobatnia sigalaiakenenku kineneiget; tápoi lepá geti, againungan nia.

⁸ Oto kuanangan nia ka sia si Petrus ka matat Jesus, "Tá pasese Tuhan. Bulat buí nubui rerekku Tuhan!" Tápoi kuana lé nia ka sia si Tuhan ka matat Petrus, "Ké tá kubui ekeu, tá anai patabbaratnu ka tubukku.

⁹ Oto kuanangan nia si Petrus ka matat Jesus, "Ké kisedda baí galainia Tuhan, buí sarat rerekku nububui, kau nubui leú et uté sambat kabeiku!

¹⁰ Iageti kuanangan ka matania Jesus, "Ké amuraúan sia, amalináan te sangamberinia. Táan tububui sia mitsá, sarat rereddangan lé tububui lepá. Kelé kam leú et ka kam, amalináan kam, tápoi tá sangamberimui amaliná.

¹¹ (Aiagaian poí nia Jesus sipasjo nia. Iaté lulunia ikukua, "Amalinaán kam, tápoi tá sangamberimui amaliná."

¹² Lepá aibui reredda Jesus, kaunangan mitsá saraubánia, iageti puuddetnangan leú et. Oto kuanangan ka matadda sipasiuluinia Jesus, "Kipa makolou leú ka bagamui sigalaiakenenku simaruei néné ka tubumui

¹³ Ai tebaí nuooniaké kam aku Guru sambat Tuhan. Kirénangan tedda kisedda nukukua kam

¹⁴ Ké beringan aku kaku sipuoni Tuhan sambat Gurumui akubuian reremui buítá kisedda leú te nugagalaiaké kam ka kam nupabui kam rere pasasambamui

¹⁵ Néné kuaké uluietmui, bulé nugalaiaké kam nia ka kam kelé sigalaiakenenku kaku néné ka tubumui

¹⁶ Oto bulatniate néné kukukua ka matamui: tá abeu pagugulet ka tubut tuannia, samba leú et tá abeu pakoiniet ka sipasikokoiniaké nia

¹⁷ Ké amakolouan ka bagamui sangamberinia néné, bulat uktuk kam, ké nugalaiaké baí kam nia

¹⁸ Tá siorak ka tubumui sangamberimui sangamberi sikuakku néné. Ai lé poí kuaagai sia sipiliyku. Aipoí buítá muaili sangamberinia sitususurat ka bagat

Buko Sipunenan, iaté, 'Sipaaleiaké aku mukom, nenda te masilalawan aku.

¹⁹ Kupopoiliat lé nia ka matamui kineneiget, einangan tá muaaili, baleú muaili, bailiu tonem bagamui puaaku nia sipuoni AKU T+ë NIA

²⁰ Bulat sibulatnia sikuakku néné: Kasei sipasisiló sapakoinietku, aku lé te galainia arasiló. Samba leú et, kasei sipasisiló aku, sipasikokoiniaké aku lé te galainia arasiló.

²¹ Kelé aikua néné Jesus, suggrunungan nia purereu-reu бага. Iageti kuanangan ka matadda, "Bulat sibulatnia sikuakku néné: Ai sara ka talagamui masipajo-jo aku.

²² Oto paitsóranan mata pasasambadda, kalulut kopet kisei ka bagadda, aipoí tá raagai kasonia ikukua néné, Jesus

²³ Iageti ai sara sipasiului simanuntut bagat Jesus sipuuuddet ka bet-bet Jesus

²⁴ Oto ngeí-ngeínangan nia, si Petrus, bulé iiséaké nia ka tubut Jesus, ipoiliat kasonia ikukua néné

²⁵ Iageti legreakénangan tubunia sipasiului néné ka tubut Jesus,

kuanangan ka matat Jesus, "Kasonia nenda nukukua, Tuhan?

²⁶ Pelé nga-ngan Jesus ikua ka matania, "Kasei ka tubu kukau roti sisuu-suuakenenku ka bagat mangkó, niaté nenda tubunia." Oto alánangan sangatippú roti Jesus, suu-suuakénangan nia ka bagat mangkó; kaunangan nia ka tubut Judas, togat Simon Iskariot

²⁷ Oto silóna lé nia nenda roti si Judas, sikau Jesus, gurukinangan paatuatnia Sanitu. Iageti kuanangan ka matania Jesus, "Kauan, galaiakéan simaruei siripot sipinaatum galaiakenennu.

²⁸ Tápoi bulat beri sia sara ka talagadda sipuuuddet sedda simakolou ka бага paluluatnia ikukua kelé néné Jesus ka tubut Judas

²⁹ Ai sia sabagei, ka bagadda lé te aikoiniaké lé nia Jesus si Judas, masisaki apa komen ka punen, elé aikoiniaké lé nia Jesus, masikau goisó bulagat ka tubudda simagebá, aipoí sipasiomet bulagatda lé nia ka sia néné si Judas

³⁰ Oto silóna lé nia roti si Judas, bela nia ka gerat. Ka tetret nenda amasoibóan

³¹ Kelé aibela si Judas, kuanangan ka matadda sipasiuluinia Jesus,

"Kineneiget'an té itulalatsat'aké nia ka sia Togat Manusia; iageti ka sia Taikamanua leú et tulalatsat'aké kalulunia

³² Oto ké tulatsat'aké Taikamanua kalulunia, bailiu latsat'akénangan leú et nia ka sia Taikamanua; tápoi tubunia leú et Taikamanua amasilatsat'aké. Momoi takua bulat simaruei lé ilatsat'aké nia Taikamanua

³³ Ale kam tatogakku, táan te mauuju kukuddu ka talagamui. Nugagabangan te kam aku. Tápoi kelé sikuakku ka tai bajára tai Jahudi, kisedda leú te kukukua ka matamui ka kam; tá momoi nuoi kam ka kudduat kuddujietku

³⁴ Oto kuaké ka kam surukat sibau: Kau nupakaté kam бага pasasambamui. Kelé pukakatekikku kam бага ka kam, buítá kisedda leú te kam ka kam nupakaté kam бага, pasasambamui

³⁵ Ké pakaté baí kam бага pasasambamui, agairangan nia sangamberi sirimanua pupapasiuluimui aku.

³⁶ Iageti kuanangan nia si Simon Petrus ka tubut Jesus, "Tuhan, Tuhan, kaipa nueei?" Oto kuana lé nia ka sia Jesus ka

matat Petrus, "Tápei momoi nutut aku kineneiget ka kudduat ailiakenenku. Ai leú nutut aku ka gogoi sibabara.

³⁷ Kuanangan ka matat Jesus si Petrus, "Angoi poi tá iooi kutut ekeu kineneiget, Tuhan? Aipoí amatarek'an aku matei kalulum, Tuhan!

³⁸ Iageti kuanangan ka matania Jesus, "Kipa, bulat sibulatnia leú tareknu matei kalulukku? Bulé nuagai nia, ainangan te tá mutotokki goú-goú, anupakelengan againu aku, telu ngamitsá!"

14 ¹ Iageti kuanangan ka matadda Jesus, "Buí imakarat bagamui. Kau lé imatonem bagamui ka tubut Taikamanua samba ka tubukku kaku leú et

² Maigi kudduat ka lalep Ukkuiuku. Memei aku sedda masipatarek kudduatmui. Tá baí kisedda nia, tá kukukua ka matamui kelé néné

³ Lepá kupatarek kudduatmui, oi aku mitsá kualá kam, bulé kaipa kukuddu, sedda leú et nukukuddu kam ka kam

⁴ Iageti agaimuian leú et enungan sieei ka kudduatku.

⁵ Oto kuanangan nia ka sia si Tomas ka tubut Jesus, "Beringan eijatnu tá kuagai

kai, kaipa kuaagai kai enungan sieei sedda?

⁶Kuanangan ka matania Jesus, "Aku té néné enungan bulé ituagai Taikamanua, samba ibara purimanuaiat. Bulat beri te sia sara sisesege ka Ukkui, ké tá kalulut aku

⁷Ké nuagai baí kam aku, tá isoppi nuagai leú kam nia ka sia Ukkui. Kineneiget anuagaian kam nia, sambat anuitsóan kam nia.

⁸Iageti kuanangan nia ka sia si Pilipus ka tubut Jesus, "Patoilá peité nia Ukkui ka tubumai, bulé isegé bagamai.

⁹Tápoi kuana lé nia Jesus ka matat Pilipus, "Ale Pilipus, táan tagai burú akupaalei kam, tápei nuagai aku? Kasei siitsó aku, aiitsóan te Ukkui. Kipa peilé nukukua, 'Patoilá ka tubumai tubut Ukkui?

¹⁰Ale Pilipus! Tápei matonem bagam, aku, Ukkui, elé Ukkui sambat aku sara lé kai karuamai? Aipoí sangamberi sikuakku ka matamui, tá sibara ka teú bagakku sarakku. Aipoí Ukkui simariu-riu patabbra ka tubukku nenda lé, masigagalaiaké sangamberinia néné

¹¹ Kau imatonem bagamui ka sikuakku néné, aku sambat Ukkui, elé Ukkui sambat aku sara lé kai karuamai. Elé ké tá, kauan lé imatonem bagamui ka sigalaiakenenku

¹² Bulat sibulatnia te sikuakku néné: Simatonem бага ka tubukku lé masigagalaiaké kelé sigalaiakenenku, elé isasabau peilé sigalaiakenenku ragagalaiaké ka sia, memeian lé poí aku ka Ukkui

¹³ Aipoí apa lé nutiddou kam ka Ukkui ka oningku, akékungan leú et nia ka kam, bulé tulatsat'aké onin Ukkui kalulut Toga

¹⁴ Apa lé nutiddou kam ka oningku, akékungan leú et nia ka kam.

¹⁵ "Iageti, ké manuntu baí bagamui ka tubukku, tá isoppi nureddet kam surukatku

¹⁶ Oto tiddoukungan ka tubut Ukkui, bulé ikoiniaké ka kam Sipasirorop bagei, masipaalei kam teret buru-burú

¹⁷ Nia nenda iaté Ketsat Sipunenan, sipasitotoiláaké ka tubudda sirimanua, kipa bulat tubut Taikamanua sibulatnia. Tá momoi rasiló nia taikapolak, kalulut tápei poí araitsó nia sambat tápei raagai

nia. Tápoi kam geti ka kam, nuagai kam nia, aipoí nia mukukuddu ka talagamui, samba musasara te kam ka tubunia

¹⁸Tá te kukakaddiuaké kam, nupukuddu kam saramui, kelé silusaí samba siputatáina. Totoili lé aku mitsá ka tubumui

¹⁹Táan te mauuju taiitsóranan aku taikapolak. Tápoi kam geti ka kam, nuiitsó kam aku. Kalulut aku kaku ai aku muririmanua, bailiu kam leú et ka kam muririmanua leú et kam

²⁰Oto ké iaili baí gogoinia, iapeite nuagai kam nia, aku, Ukkui, sara lé kai karuamai, samba kam musara ka tubukku, ialeú et aku kaku musara ka tubumui

²¹Kasei sisiló surukatku samba sipasirereddet, sia te simanuntu бага ka tubukku. Iageti pukatekinangan sia бага, ka sia Ukkui, sangamberi simakaté бага ka tubukku. Beri aku leú et kaku pukatekikkungan sia бага, samba patoilákungan tubukku ka tubudda.

²²Iageti kuanangan ka matat Jesus si Judas (tápoi tá si Judas Iskariot), "Ka tubumai lé kodda nupatotoilá tubum, Tuhan, tá ka tubudda taikapolak?

²³ Oto kuanangan ka matania
 Jesus, "Simakaté бага ka tubukku
 lé masirereddet ngantomanku. Iageti
 pukatekinangan nia бага ka sia Ukkui.
 Oto ei kai ruamai Ukkui ka tubunia,
 kuddu kai kupaaleiaké kai nia

²⁴ Tápoi sitaimakaté бага ka tubukku
 geti, tá rarereddet ngantomanku. Aipoí
 ngantoman siarepmui ka tubukku, tá
 ka tubukku aibara, sibabara ka Ukkui
 sipasikokoiniaké aku lé

²⁵ Kutitiboi lé sangamberinia néné
 ka tubumui, ka tetret ai peilé aku
 mukukuddu ka talagamui

²⁶ Ai leú Ketsat Sipunenan,
 Sipasirorop'aké kam, koiniakenen
 Ukkui ka oningku, niangan lé
 te masipangangantru kam ka
 sangamberinia, samba masiparerepdem
 kam ka sangamberinia sisegéakenenku
 ka matamui

²⁷ Aban бага kugalak ka tubumui.
 Iageti aban bagakku leú kuaké ka
 tubumui. Oto aban бага akenenku ka
 tubumui néné, tá kelé akenenda ka sia
 taikapolak. Buí imakarat bagamui samba
 buí leú numalotó kam

²⁸ Anuarep'an kam akukua nia ka matamui, 'Memeian lé te aku, tápoi momoi lé aku mitsá ka tubumui.' Oto ké manuntu baí bagamui ka tubukku, tá isoppi imangká bagamui kaeeku ka Ukkui, aipoí Ukkui peilé abau kaku

²⁹ Kutitiboi lé ka matamui kineneiget, ainangan tá muaaili sangamberinia. Oto ké muaili baí, iapeité imatonem bagamui

³⁰ Táan maiigi kuanenku ka matamui, aipoí aiailingan tetrenia ioi sipasiuutéaké polak néné. Tápoi tá momoi igalai siobánia ka tubukku

³¹ Tápoi buítá muaili sangamberinia néné, bulé raitsó nia taikapolak punununtukikku nia бага Ukkui, samba galalaiakéku sangamberinia sikuat Ukkui, ka tubukku. Oto kauan tatui-tui kam sené."

15 ¹ Iageti kuanangan mitsá ka matadda Jesus, "Aku té né loinat anggur sipulelelek. Ukkui iaté sipasikeli mone

² Sangamberi ranku sitaipububua, tugglunangan nia. Tápoi ranku geti sipububua, getainangan bagei buluknia, samba palinánangan nia, bulé ipureddet buania

³Oto kisedda leú te kam ka kam,
amalináan kam kalulut nganturat
siakéku ka tubumui

⁴Oto kau imariu-riu nupusara kam
ka tubukku, bailiu aku kaku leú et,
riu-riu kupusara ka tubumui. Kelé ka
sia leú ran, tá te babara buania, ké tá
mariu-riu ipusara ka tubut loinánia. Oto
kisedda leú te kam ka kam, tá te babara
buamui ké tá mariu-riu nupusara kam ka
tubukku

⁵Aku té né loinat anggur sipulelelek.
Oto kam te rannia. Kasei mariu-riu
musara ka tubukku, samba aku ka
tubudda, iaté masibubuaaké bua
simaigi; aipoí beri sara momoi nugalai
kam ké tá kalulut aku

⁶Sangamberi sitaimariu-riu musara ka
tubukku, turiribbaiaké lé nia, kelé ran,
imagarak. Sangamberi ran kelé nenda
turururúaké lé, ituribbaiaké nia ka api,
imalabó

⁷Tápoi ké mariu-riu nupusara kam
ka tubukku, samba tiboietku mariu-riu
ikuddu ka bagat paatuatmui, bailiu apa
lé nutiddou kam siobámui ka tubut
Ukkui, tá isoppi iaké nia

⁸ Ké mureddet buamui, bailiu tuumun'aké Ukkui. Iageti kam leú et, bailiu bulat sipasiuluiku sipulelelek

⁹ Kelé kipa nuntut bagat Ukkui ka tubukku, kisedda leú te nuntut bagakku ka tubumui ka kam. Oto kau imariu-riu nupuparaboat kam siripot puoonimui kanuntukietku бага

¹⁰ Ké nureddet kam surukatku, mariu-riumuian ka katet bagakku, kelé kaku leú et, mariu-riu lé aku ka katet bagat Ukkui, kalulut riu-riu nia kugalaiaké sangamberi sikuania ka matakku

¹¹ Bulat sangamberinia lé kutitiboi ka matamui, bulé imariu-riu angkat bagakku ka bagat paatuatmui, imasut puangkakat bagamui ka kam

¹² Oto néné te surukatku: kau nupakaté kam бага pasasambamui, kelé leú et katet bagakku ka tubumui ka kam

¹³ Sia oniakenen simakopé nuntut бага ka tubudda sapunualeinia, sia te masibubuluaké engania punu tubudda

¹⁴ Sasuruakkungan lé te kuooniaké kam néné, ké nureddet kam sangamberinia sikuakku ka matamui

¹⁵ Kam leú et táan kuooniaké kam sapagugulet, aipoí ka sia pagugulet,

tá iagai aponia igagalai tuannia.
Kuooniaké geti kam sasuruakku, kalulut
sangamberinia siarepku sibabara ka
Ukkui, akusegéakéan ka matamui

¹⁶ Aipoí tá kam aipiliy aku. Aku lé
amasipiliy kam, samba aikoiniaké
kam, bulé nuei kam masibuaaké bua
simigi, iaté bua sitaimasususu. Iageti
akénangan ka kam Ukkui sangamberi
siniddoumui ka oningku

¹⁷ Oto nia té néné surukatku ka
tubumui: Kau nupakaté kam бага
pasasambamui.

¹⁸ "Ké rapulagaki kam бага taikapolak,
repdemmuian, aku lé boikí arapulagaki
bage taikapolak

¹⁹ Aipoí ké taikapolak baí sibakkat kam
néné, oto makaté bagadda taikapolak
ka tubumui sipuoni bakkatnia. Tápoi
kam geti ka kam, akupiliyan kam ka
polak néné. Oto táan taikapolak sibakkat
kam. Iaté lulunia imalalagá bagadda
taikapolak ka tubumui

²⁰ Kau nurepdem kam kelé sikuakku
ka matamui, 'Tá te abeu tiboí tubut
pagugulet ka tubut tuannia.' Oto ké
arapaorejingan aku kaku, rapaoorei
leú te kam ka kam. Ké rareddet

nga-nganguku kaku, reddetdangan leú te nga-ngamui ka kam

²¹ Ragagalaiaké nia sangamberinia néné, kalulut pupapasiuluimui aku; tá poi raagai nia ka sia sipasikokoiniaké aku

²² Aipoí ké tá moi aku, kukua ka matadda sangamberinia néné, tá iaagai tubudda kababarat jodda. Oto kineneiget táan momoi rakaróaké tubudda ka jodda

²³ Kasei masipulagaki aku бага, malagá leú te bagadda ka tubut Ukkuiuku

²⁴ Ké tá baí kugalai ka talagadda sangamberinia sitaigagalaiakenenda sabagei, tá raaagai kababarat jodda. Tápoi kineneiget araitsóan sangamberi sigalaiakenenku, tápoi malalagá peilé bagadda ka tubukku sambat ka tubut Ukkuiuku

²⁵ Tápoi siripokatnangan ibara sangamberinia néné, bulé ipuaili siripot sitususurat ka Bukot Surukatda, sipasikukua, 'Sitálulu lé rapulalagaki aku бага.

²⁶ Ai leú kukoiniaké ka tubumui Sipasirorop sibara ka Ukkui. Nia té Ketsat sipasitotoiláaké kipa bulat tubut Taikamanua. Oto ké amoian baí nia,

muneng'akénangan leú et pagalaiat
tubukku

²⁷Iageti kam leú et ka kam,
muneng'akémuian aku, aipoí baranangan
ka panandaatnia peilé anupaaleian kam
aku.

16 ¹Kupopoiliat lé nia ka matamui
sangamberinia néné, bulé buí
nusik-sik kam tei-teimui muarat

²Aipoí rabebelaaké te kam ka uma
paniddogat. Samba iaaili te tetrenia,
ka bagadda te sipasimamateiaké kam
néné, ai lé ragagalaiaké siobat bagat
Taikamanua

³Tápoi ragagalaiaké nia geti kelé néné,
kalulut taiagaira lé Ukkui sambat aku

⁴Oto kineneiget kupopoiliat'an lé
nia ka matamui, baleú iaili tetrenia,
repdemmuian kukuakku nia ka
matamui." "Tápoi néné geti, tápei
akutiboi ka matamui, kalulut ai peilé aku
mukukuddu ka talagamui

⁵Kineneiget geti memeian lé aku ka
tubut sipasikokoiniaké aku; tá te anai ka
talagamui néné sipasikukua, kaipa pá
kueei

⁶ Oto kineneiget amureu-reuan kam
baga, kalulut kukuakku nia kelé néné ka
matamui

⁷ Tápoi bulat sibulatniate kuanenku
néné ka matamui: Bulat ai erúnia ka
kam, kaeeku néné. Ké tá mei baí aku,
taioinangan Sipasirorop'aké kam. Ké mei
geti aku, koiniakékungan nia ka kam

⁸ Ké moi nia, iapeité ikolouaké nia ka
taikapolak, aponia bulat katukolobat jo,
samba aponia obaket bagat Taikamanua,
samba aponia ukuman Taikamanua

⁹ Kolouakénangan ka matadda,
taimatonem бага ka tubukku, iaté nenda
jo

¹⁰ Pakolounangan ka matadda, aku
néné simaroipo lé, aipoí memeian lé aku
ka Ukkui. Oto táan te nuiitsó kam aku
mitsá

¹¹ Kolouakénangan leú et tataddaakéna
ipasiukum, Taikamanua, aipoí
atuukum'akéan sia siutéaké polak
néné

¹² Maigi peilé bagei kuanenku ka
matamui, tápoi tápei iom tubumui
masisiló

¹³ Tápoi ké geti amoian nia Ketsat
néné, iaté sipatoilá ka tubumui pagalaiat

tubut Taikamanua bulat sibulatnia,
iapeité rop'akénangan kam bulé
nuagai kam sangamberinia siobat
bagat Taikamanua. Ka sia leú et tá
sipabarania sangamberi tiboiet, tápoi
apa lé siarepnia ka Ukkui, iaté ititiboi
ka matamui, samba tiboinangan leú et
ka matamui sangamberinia sipuaaili ka
gogoi sibabara

¹⁴Iageti latsat'akénangan leú et aku,
aipoí sibabara kaku lé sangamberi
sinegéakenennia ka matamui

¹⁵Sangamberinia sibabara ka Ukkui,
aku lé sibakkat nia. Iaté lulunia
kukukuania ka matamui, sangamberinia
siaket Ketsat Sipunenan ka tubumui,
sibabara kaku lé.

¹⁶"Táan te mauju taiitsómuian aku;
tápoi tá leú mauju mitsá itsómuian aku.

¹⁷Iageti patiboddangan pasasambadda
sipasiuluinia Jesus, pelé nga-nganda,
"Apa páonia ikukua ka matatta: 'Táan
mauju taiitsómuian aku, iageti tá leú et
mauju mitsá itsómuian aku'? Samba apa
páonia ikukua ka matatta: 'Memeian lé
aku ka Ukkui'?

¹⁸ Oto sarat paisé lé ragagalai, masikua, "Apa katukolobatnia, 'táan mauju'? Bulat tá taagai apa páonia ikukua!

¹⁹ Kelé aiagai nia Jesus iisiakéra ranou-nou nia, kuanangan ka matadda, "Simaruei néné peilé akukua nia ka matamui, 'Táan te mauju taiitsómuian aku, tápoi tá mauju mitsá itsómuian aku'. Elé, tiboiet néné leú nupauukeli kam

²⁰ Bulat kau imatonem bagamui ka sikuakku néné, tá te isosoppi nupusou kam, élé nupugeru kam, tápoi ka sia geti taikapolak mangká lé bagadda. Murereu-reu te kam бага, tápoi pureu-regat bagamui nenda bailiu lé puangkakat бага

²¹ Kelé galainia imalegre laggóra saina sipususulé lé, bulat reu-reu lé bagania, iaailingan lé poí tetrenia ipangorik. Tápoi lepána lé ipusulé, kalipoginangan pangoringan sioriknia, kalulut angkat bagania pututútut matat sara tatoga sigoisó ka polak néné

²² Oto kisedda te galainia ka kam: Kineneiget mareu-reu bagamui, tápoi momoi te aku kubalou kam mitsá, oto maangkánangan bagamui; bulat beri

te sia sara sipasirarau-rau puangkakat
baga néné ka bagat paatuatmui

²³ Ka gogoi nenda, táan nupanonou-
nogi kam apa pá ka tubukku. Oto kau
imatonem bagamui ka sikuakku néné:
Bulat apa lé nutiddou kam ka tubut
Ukkui ka oningku, akénangan nia Ukkui
ka tubumui

²⁴ Teret kineneiget, tápei anutiddou
kam apa pá ka oningku. Tiddou kam,
nusionó kam, bulé imasut puangkakat
bagamui.

²⁵ "Sarat ka pasikat lé kutiboi
sangamberinia ka matamui. Tápoi
iaaili te tetrenia, bulat simakolouan lé
kukolouaké nia ka matamui pagalaiat
tubut Ukkui

²⁶ Nutitiddou te kam ka tetret nenda
ka tubut Ukkui ka oningku; tápoi bulé
nuagai kam nia, tá te kutitiddou apa
pá ka tubut Ukkui iaké akenennia ka
tubumui

²⁷ ai lé poí ipukakateki kam бага Ukkui.
Ipukakateki geti kam бага Ukkui, kalulut
katet bagamui ka tubukku samba tonem
bagamui kababarakku ka Ukkui

²⁸ Kirénangan sibabara ka Ukkui lé aku
néné, samba amoián aku ka polak néné.

Tápoi kineneiget kukakaddiuakéan lé polak néné, kutoili mitsá ka tubut Ukkui.

²⁹ Iageti kuaddangan ka matat Jesus, sipasiuluinia, "Kineneiget simakolouan lé nupanibo ka matamai Tuhan, táan mupapasikat ekeu ka tubumai

³⁰ aipoí ai lé kuaagai kai againu sangamberinia. Táan anai lulunia rapaiseki ekeu kasei pá, ranou-nou apa pá ka tubum Tuhan. Oto bailiu katonemimaian nia kababaram ka Taikamanua.

³¹ Iageti kuanangan ka matadda sipasiuluinia Jesus, "Oto amatonem'an leú bagamui kineneiget

³² Repdem kam! Iaaili te tetrenia, elé momoi takua, aiailingan tetrenia, nupasabu kam tubumui. Patoilimuian tubumui ka lalepmmui sene-senemui, nukaddiuaké kam aku kupusara. Tápoi tá te musasara aku, aipoí ipaalei aku Ukkui

³³ Kutitiboi lé sangamberinia néné ka matamui, bulé imaaban puririmanuamui, kalulut pusaraatmui ka tubukku. Mangongorik lé te kam ka polak néné. Tápoi paom kam bagamui, aipoí akukalaakéan polak néné!"

17 ¹Lepána lé aikua néné
 Jesus, teilanangan manua,
 paniddounangan leú et ka tubut Ukkui,
 pelé nga-ngania, "Aiailingan te tetrenia,
 Ukkui. Latsat'akéan nia Togam, bulé
 ilatsat'aké ekeu kekeu Togam, Ukkui

²Anukauan poí gege ka tubut Toga,
 kalulutda sangamberi taikapolak, bulé
 ikau purimanuaiat sipulelelek samba
 sitaitatatá, ka tubudda sangamberi
 sirimanua, sikau Ukkui ka tubunia

³Oto néné te purimanuaiat sipulelelek
 samba sitaitatatá; bulé raagai ekeu
 Ukkui, samba bulé raagai leú nia ka sia
 Jesus Kristus sikoiniakenennu, Ukkui

⁴Akulatsat'akéan ekeu Ukkui, ka
 pasilelepáakéku galajet sinégéakenenu
 ka tubukku

⁵Ale Ukkui, latsat'akéan aku kineneiget
 ka tubum Ukkui, iaté pulatsanan
 siikep'akenenku ka tetret ai peilé aku ka
 tubut Ukkui, einangan tá babara polak
 néné

⁶Akupatoiláan ekeu, Ukkui, ka tubudda
 taikapolak néné, iaté sia siakénu kaku.
 Ekeu lé sibakkat sia, Ukkui, oto anuakéan
 sia ka tubukku, samba araredet'an
 nga-ngam, Ukkui

⁷ Kineneiget araagaian, sangamberinia siakénu kaku, Ukkui, ka tubum lé aibara

⁸ Akusegéakéan ka tubudda tiboiet siakénu kaku, Ukkui; oto arasilóan. Oto araagaian bulat kababarakku ka Ukkui, samba amatonem'an bagadda pueekeu nia Ukkui, amasikoiniaké aku

⁹ Oto kutiddouaké sia. Tápoi tá siaili taikapolak néné kupaniddou, tápoi siaili sia lé sangamberi siakénu kaku, aipoí ekeu lé sibakkat sia, Ukkui

¹⁰ Aipoí sangamberinia bakkatku, bakkatnu leú et kekeu, Ukkui; samba leú et sangamberinia sipuoni bakkatnu, bakkatku leú et kaku. Oto atulatsat'akéan aku ka talagadda

¹¹ Oto momoian aku ka tubum kineneiget Ukkui. Táan mukukuddu aku mitsá ka polak néné; tápoi ka sia geti ai peilé sia mukukuddu ka polak néné. Ale, Ukkui Sipunenan! Jago sia ka geget onim Ukkui, iaté oni siakénu kaku, bulé rapusara, kelé ekeu Ukkui samba aku kaku, sara lé sita ka sita

¹² Ai peilé aku ka talagadda, akujagongan sia ka geget onim Ukkui, iaté oni siakénu kaku. Akujagongan sia, bulat beri sia sara simalilimai, sarat

sarania lé simateú malimai, bulé kalulut nenda, puailinangan kelé ka sitususurat ka bagat Buko Sipunenan

¹³ Kineneiget momoian aku ka tubum, Ukkui. Kutitiboi lé sangamberinia néné, ai peilé aku mukukuddu ka polak néné; bulé imamuiné raagai puangkakat bagakku

¹⁴ Akusegéakéan sangamberinia tiboietnu, Ukkui, oto bailiu malagánangan bagadda taikapolak ka tubudda, aipoí tá taikapolak sibakkat sia, kelé aku kaku néné, tá taikapolak sibakkat aku

¹⁵ Tá kutitiddou bulé nualá sia ka polak néné, tápoi bulé nujago lé sia ka tubut si Jo

¹⁶ Makeré lé galainia kaku, taibabakkatina aku polak néné, kisedda leú te ka sia, taibabakkatina sia polak néné

¹⁷ Bailiuaké sia néné, Ukkui, bulat bakkatnu, kilibet bagam siripot katuripoat, aipoí tiboietnu lé poí katuripoat

¹⁸ Kelé kokoiniakénu aku kaku ka polak, kisedda leú te kaku kukoiniaké sia ka polak néné

¹⁹ Kalulutda néné, buluakékungan tubukku bailiu bakkatnu kilibet bagam, Ukkui, bulé ibailiu leú sia ka sia néné, kilibet bagat Ukkui, kalulut katuripoat

²⁰ Tápoi tá saratda néné kutitiddouaké. Beri leú et sia simatonem бага ka tubukku, kalulut katuareman sinegéakenenda leú, kutitiddouaké

²¹ Kutiddou ka tubum Ukkui, bule rapusara ka sia sangamberidda, kelé tapusara ka sita ruatta, Ukkui. Bulé musara sia sangamberidda ka tubutta, imatonem bagadda taikapolak kokoiniakénu aku

²² Akulatsat'akéan sia siripot siakénu, kaku Ukkui, bulé rapusara, kelé tapusara ka sita ruatta

²³ Aku ka tubudda, iageti ekeu kekeu Ukkui ka tubukku, bulé bulat rapusara sipulelelek. Raagai nia taikapolak kokoiniakénu aku Ukkui, samba bulé raagai nia pukakatekim sia бага, kelé katet bagam ka tubukku kaku

²⁴ Ale, Ukkui, simakiddiy ka bagakku, bulé sia siakénu kaku néné, kaipa kukuddu, ai leú et sia ka sia, bulé raitsó pulatsananku, iaté pulatsanan siakénu ka tubukku, kalulut katet bagam ka

tubukku, ainangan tápei babara polak néné

²⁵ Ale, Ukkui simaroipo бага! Tá raagai ekeu taikapolak néné. Tápoi aku geti kaku, kuaagai ekeu. Samba sia leú et ka sia néné, raagai pueekeu nia amasikoiniaké aku

²⁶ Akupaagaian onim, Ukkui ka tubudda, samba riu-riu lé kugalaiaké nia néné, bulé nuntut bagam ka tubukku, Ukkui, riu-riu ikuddu ka bagat paatuatda, samba aku kaku leú et musara ka tubudda."

18 ¹ Iageti kelé ailepá aipaniddou kelé nenda Jesus, eirangan leú et sambadda sipasiuluinia ka silat Oinan Kidron. Sedda, ai sangamata mone. Oto einangan leú et Jesus sambadda sipasiuluinia ka mone nenda

² Ka sia si Judas sipajo nia, ai lé iaagai kudduat nenda, kalulut marei-reiiei sedda Jesus parurú sambadda sipasiuluinia

³ Oto einangan leú et si Judas, abbitnangan sangapasukan tenterat Roma samba piga pá sia sipasijajago Uman Taikamanua, sikoiniakenenda tai imam sabeu sambat tai Parise. Iageti

abbitrangan leú et pamateira, alito sambat oong

⁴Tápoi ai lé iaagai Jesus sipuaaili ka tubunia. Oto legreakénangan tubunia ka tubudda, kuanangan ka matadda, "Kasonia nugagaba kam?"

⁵Iageti kuaddangan ka matania, "Ai lé kugagaba kai Jesus si Natsaretna." Oto kuanangan ka matadda Jesus, "Aku té néné." Ka sia si Judas sipajo nia, ai leú et nia sedda muririó sambadda

⁶Tápoi kelé aikua nia ka matadda Jesus, "Aku té néné," sik-sikrangan tei-teira, iageti belé sia ka polak

⁷Lepá nou-nounangan sia mitsá Jesus, "Kasei baí nugagaba kam?" Oto alegiddangan nia, pelé nga-nganda, "Ai lé kugagaba kai Jesus si Natsaretna.

⁸Kuanangan ka matadda Jesus, "Aian kukukua ka matamui, aku té néné. Samba bulat ké aku baí nugagaba kam, oto obáaké kam sia ka sia sabagei néné ratui-tui.

⁹(Ikukua kelé néné geti, bulé ipuaili lé kelé ka sikuat Jesus siboikí, iaté, "Ale Ukkui, sangamberidda siakénu kaku, bulat beri sia sara simalilimai."

¹⁰ Oto ka sia si Simon Petrus ai aiabbitt sara lanjau. Oto golok'akénangan lanjaunia, tétéakénangan nia ka tubut pagugulet imam sabeu, bulat pat belé talingania. Onin pagugulet néné, iaté si Malkus

¹¹ Tápoi kuana lé nia Jesus ka matat Petrus, "Buluk'aké mitsá lanjaunu ka sagbungnia! Kipa, ai lé poi nupaaatu tá kuloló pulokat pangoringan siaket Ukkuiku ka tubukku?

¹² Iageti labáranan nia, Jesus tai perajurit Roma sambat tai komandannia samba leú et tai Jahudi sipasijajago Uman Taikamanua

¹³ Taddanangan abbitranan nia ka matat Hannas, talikut Kayapas simanteu. Si Kayapas néné, iaté sara imam sabeu ka rura nenda

¹⁴ Nia té amasipangantru sauté ka tai Jahudi masikua, maerú peilé matei sara sirimanua punutubut sangamberi bangsa

¹⁵ Ka sia si Petrus sambat sara sipasiului, airatutut Jesus. Tápoi ka sia sipasiului néné sara, iagai nia si imam sabeu; oto bailiu oi aitugurú ka sia sambat Jesus ka gerat lalep imam sabeu

¹⁶ Ka sia geti si Petrus, ai lé nia ka gerat, ka matatbaliu. Lepá bela nia sipasiului bagei néné ipatiboaké pagugulet sinanalep sipasijajago matatbaliu, iapeité oi aitugurú ka бага ka sia si Petrus

¹⁷ Iageti kuanangan ka matat Petrus pagugulet sinanalep néné, "Ei, ekeu te néné sara aleinia si nenda, elé?" Kuana lé nia si Petrus ka matat sinanalep, "Tá aku.

¹⁸ Ka tetret nenda, maleppet manua. Oto rusuirangan api sapagugulet samba sipasijajago, bulé ibara purakaatda. Beri leú et ka sia si Petrus, amei leú et nia ka sia sedda, murió rapuraka sambadda ka api

¹⁹ Iageti paisekinangan Jesus si imam sabeu, inou-nou pagalaiat sipasiuluinia sambat ngantomannia

²⁰ Oto kuanangan ka matania Jesus, "Bulat sarat simakolou lé kupanibo ka matadda siberikabaga. Marei-rei lé kupungantoman ka uma paniddogat, sambat ka Uman Taikamanua, iaté ka kakudduat parurukatda tai Jahudi simarei-rei. Bulat tá te anai akutiboi apa pá ka simalipput

²¹ Oto apangan lé lulunia nuisé aku? Reréakéan lé ka tubudda sipasiaarep kupungantoman. Bulat ai lé raaagai aponia sikuakku ka matadda.

²² Iageti kelé aikua kelé néné Jesus, tipaknangan nia sara sipasijajago sikukuddu sedda, kuanangan ka matat Jesus, "Bulat apangante rot bagam masikua kelé néné ka matat imam sabeu!

²³ Tápoi kuana lé ka matania Jesus, "Ké ai baí simasele sikuakku, kua lé sené aponia simasele! Tápoi ké sineseat baí sikuakku néné, angoi peilé nutitipak aku?

²⁴ Lepá kuanangan ka matadda si Hannas, bulé rataroaké Jesus situkakabé néné, ka tubut Kayapas Imam Sabeu

²⁵ Iageti ka sia si Petrus, ai peilé nia muririó sedda. Oto kuaddangan ka matania, "Ekeu té néné sipasiuluinia, elé?" Kuanangan ka matadda si Petrus, "Tá aku!

²⁶ Lepá mitsá kuanangan ka matania sara pagugulet imam sabeu saepput sisepprit Petrus talingania, "Ekeu te néné akuitsó ka mone ainupaaleiaké nia, elé?

²⁷ Oto pakelenangan mitsá againa Jesus si Petrus, pelé nga-ngania, "Tá aku." Iageti ka tetret nenda leú et putokkinangan goú-goú

²⁸ Iageti mamatsep peilé araabbít'an Jesus barana ka istanat Kayapas ei sia ka lalep gubernur Pilatus. Ka sia tai Jahudi tá atugurú sia ka istana, bulé tá itukasit-sit'aké sia siripot ka puaranan, kalulut airagegelai mei mukom komen Paska

²⁹ Kalulut néné, bela nia si Pilatus inou-nou sia, kuanangan, "Aponia panganduatmui pagalaiat tubunia sinéné?

³⁰ Iageti kuaddangan ka matania, "Ké tá baí masele nia sirimanua néné, tá kuaabit kai nia ka tubum Ukkui Gubernurmai.

³¹ Oto kuanangan ka matadda si Pilatus, "Aláan lé kam nia, iageti ukum'akémuian nia siripot ukummui ka kam!" Tápoi kuadda lé ka matat Pilatus, tai Jahudi, "Ka kai, tá momoi kuukum'aké kai sirimanua simateiakenen.

³² (Néné geti, bulé ipuaili lé kelé ka siniboi Jesus pagalaiat enung kamamateinia.

³³ Iageti gurú nia mitsá si Pilatus ka bagat istana, sogainangan Jesus, kuanangan ka matania, "Elé, Rimatadda tai Jahudi lé ekeu néné?

³⁴ Oto aleginangan nia Jesus, kuanangan ka matat Pilatus, "Kipa, bulat sibara ka bagat paatuatnu saram leú panou-nogatnu néné ka tubukku, élé ai lé sia sabagei sipasikukua ka matam pagalaiat tubukku néné?

³⁵ Kuana lé nia ka sia si Pilatus ka matat Jesus, "Tai Jahudi poi aku néné? Sabangsam samba tai imam sabeu lé amasiaké ekeu sené ka tubukku. Aponia anugalai?

³⁶ Oto kuanangan ka matat Pilatus Jesus, "Tá ka polak néné aibara purimataatku. Bulat kelé baí ka polak nia aibara purimataatku néné, tá isoppi rapasaggak sapaguguletku, bulé tá ioi rasegéaké aku ka kabeira sautéra tai Jahudi. Tápoi bulat sibulatnia, tá ka polak néné aibara purimataatku!

³⁷ Iageti kuanangan nia mitsá ka matat Jesus si Pilatus, "Oto ké kisedda baí nia, rimata lé ekeu, élé? Kelé sikuam, rimata te ekeu néné. Akuputútú mata samba akuoi ka polak néné sarat sara lé lulunia,

iaté masimuneng'aké katuripoat
Taikamanua. Oto sia sibabara ka
katuripoat lé masiaarepi nga-ngangu.

³⁸Iageti nou-nounangan Jesus si
Pilatus, "Aponia poi katukolobatnia
nenda katuripoat?" Iageti bela nia
mitsá si Pilatus ka istana, kuanangan ka
matadda tai Jahudi, "Bulat beri te sara
akusese selenia

³⁹Tápoi kelé simarei-rei ka tubumui,
senen ipot gogoi Punen Paska belaaké
aku sara siukum. Kipa nuobá leú kam
kubelaaké ka kam rimatadda tai Jahudi?

⁴⁰Iageti alegiddangan nia
sigereiakenen, pelé nga-nganda,
"Tá, tá nia nubebelaaké ka kai, si
Barabas lé!" (Si Barabas néné, iaté sara
sibaraaké pulamagat.)

19¹Iageti gurú nia mitsá si Pilatus,
gugluakénangan leú et sia, bulé
rapabóboki Jesus

²Lepá tikairangan kirit purimataat
sibara ka ran loiná simarui, kaurangan
nia ka utet Jesus. Lepá mitsá kaurangan
leú et saraubánia simasuan laiket

³Oto paoledangan raei ka tubunia,
kuaddangan ka matania, "Tabé ka

tubut rimatadda tai Jahudi!" Lepá patipangindangan leú et nia

⁴Iageti bela nia mitsá si Pilatus ikua ka matadda sirimanua simigi, pelé nga-ngania ka tubudda, "Aikoí nia! Kubelaaké nia ka matamui, bulé nuagai kam tatat sele sigalainia.

⁵Oto bela nia Jesus, aian ka uténia kirit purimataat sitikaira rui samba saraubá simasuan laiket ka tubunia. Kuanangan ka matadda si Pilatus, "Itsó kam nia sirimanua néné.

⁶Kelé araitsó nia Jesus, tai imam sabeu sambat sipasijajago, pugereirangan leú et, pelé nga-nganda, "Pattáaké lé nia ka loiná siliktenga! Pattáaké lé nia ka loiná siliktenga!" Iageti kuanangan ka matadda si Pilatus, "Oto kam'an lé ipapattáaké nia ka loiná siliktenga, aipoí tá akusese sele sigalainia.

⁷Belan nga-nganda lé tai Jahudi ka tubunia, "Siripot ka surukatmai, buítá tuukum'aké lé nia simateiakenen, kalulut ooniakéna tubunia Togat Taikamanua.

⁸Oto kelé aiarep nia si Pilatus sikuadda néné, kokkopé mitsá lotónia

⁹Iageti buluk nia mitsá ka bagat istana. Kelé aitugurú ka sia Jesus,

nou-nounangan nia si Pilatus, pelé nga-ngania, "Kaipa lé kabaraiaitnu kekeu?" Tápoi amumeng-meng lé nia Jesus

¹⁰ Oto kuanangan mitsá ka matat Jesus si Pilatus, "Kipa tá nuobá tapatibo? Ai leú nuaagai kababarat gege ka tubukku kubelaaké ekeu, elé kupattáaké ekeu ka loiná siliktenga!

¹¹ Iageti kuanangan ka matania Jesus, "Bulat ké tá iaké ka tubum gege, Taikamanua, beri oi nia nugalai apa pá ka tubukku. Oto sia sipasitataroaké aku ka tubum peilé abeu jo, ka tubum.

¹² Kelé aiarep nia si Pilatus sikuat Jesus, néné, bulat besíakénangan ibelaaké Jesus. Tápoi memei lé maro-ron rapugerei tai Jahudi masikua, "Bulat ké nubelaaké baí nia, Tuan, tá suruak Kaisar ekeu néné! Oto senen sikua tubunia rimata, saggak Kaisar lé nia!

¹³ Iageti kelé' aiarep nga-nganda ka sia tai Jahudi si Pilatus, abbitnangan Jesus ka tulaibó, iageti uddet nia ka uddenan pengadilan, iaté sara kudduat sipuoni Bagat lalep Bukkú. (Ka nga-ngan Ibrani, katukolobatnia, iaté Gabata.

¹⁴ Oto kelé aimalegre bóbo pulu rua sinágó, ké pei iaili Punen Paska, kuanangan ka matadda sirimanua simigi si Pilatus, "Aikoí né nia rimatamui!

¹⁵ Oto pugereirangan leú et, pelé nganganda, "Mateiaké lé nia! Mateiaké lé nia! Pattáaké lé nia ka loiná siliktenga!" Iageti kuanangan ka matadda si Pilatus, "Kipa, kupapattáakéan lé nia rimatamui?" Tápoi kuadda lé nia ka matat Pialtus tai imam sabeu, "Sarat si Kaisar lé rimatamai!

¹⁶ Oto segéakénangan Jesus ka tubudda, si Pilatus, bulé rapattáaké nia ka loiná siliktenga. Iageti ei sia masialá Jesus, abbitrangan leú et nia

¹⁷ Iageti bela Jesus aibabairat loiná siliktengania, raailiaké kudduat sipuoni, "Kudduat Lakkupat". (Oninia ka nga-ngan Ibrani, Gulgata.

¹⁸ Oto sedda te arapattáaké nia ka loiná siliktenga. Ai sia rua sabagei arapattáaké siparará-rá ka tubunia. Iaté sara kai katsiunia, sara mitsá kai kattoatnia; oto ka sia Jesus ka tenga aikuddu

¹⁹ Ka loinat siliktengan Jesus, ai aikua si Pilatus bulé rasurat'aké kelé néné, "Jesus tai Natsaret, Rimatadda tai Jahudi"

²⁰ Oto maigi sia tai Jahudi amasibatsa sitususurat néné, aipoí tá mareunan nia ka laggai, kudduat pasipattakat Jesus. Sisurat'akenan néné, ai ka nga-nganda tai Ibrani, ai ka nga-nganda tai Latin, samba ai leú et ka nga-nganda tai Junani

²¹ Iageti kuaddangan ka matat Pilatus tai imam sabeu, pelé nga-nganda, "Buí itusurat'aké, 'Rimatadda tai Jahudi', tápoi kisé lé nususurat'aké, 'Aikua ka sia sinéné, aku néné, Rimatadda tai Jahudi.'

²² Tápoi kuana lé nia ka sia si Pilatus ka matadda, "Kipa kusurat, iangan té nenda.

²³ Oto lepá arapattáaké Jesus tai perajurit, alárganan bibilet tubunia. Rubeirangan nia oi epat. Senenda pasasangarubeiat sia. Beri saraubánia leú et araalá. Tubut saraubá néné, tá anai suilaknia. Arabibli lé barania ka pata, pat aili ka repé

²⁴ Oto patiboddangan pasasambadda tai perajurit, "Buí tapabirit nia saraubá néné. Kau lé tapauktuk, bulé taagai kasei simateú masibabakkati." Ibabara kelé néné geti, bulé ipuaili lé, kelé ka sitususurat ka Buko Sipunenan, sipasikukua, "Raparurubei lé bibilet

tubukku, samba apauktuk lé sia ioi raikep'aké saraubáku." Kirénangan kisedda te aragalai tai perajurit

²⁵ Oto ka sia sainan Jesus, samba sakalabainia, si Maria sinanalep Keleopas, samba si Maria Magdalena, ai sia muririó sedda ka bet-bet siliktengan Jesus

²⁶ Kelé aiitsó sia Jesus, sainania sambadda sipasiuluinia simanuntut bagania, kuanangan ka matat inania, "Ina, aikodda sia tatogam.

²⁷ Lepá mitsá kuanangan ka matadda ka sia sipasiuluinia Jesus, "Aikodda nia inamui." Oto ka tetret nendangan té araala inan Jesus sipasiuluinia ipukuddu ka lalepra

²⁸ Oto ai lé iaagai Jesus katulelettunia kineneiget sangamberinia, samba leú et bulé ipuaili sangamberinia sitususurat ka bagat Buko Sipunenan, kuanangan, "Maoggouan aku.

²⁹ Sedda ai sangapulokat suat anggur simalagá. Iageti sop-sop'akérangan romot ka suat anggur, ettet'akérangan nia ka sangagogo manggeá, totoiakérangan nia ka bibot Jesus

³⁰ Iageti kelé ainanam nia Jesus suat anggur néné, kuanangan, "Atuléléan!" Oto lukkuk'akénangan uténia, Jesus, langónangan nia

³¹ Ka sia sauté ka tai Jahudi, tá raobá ikuddu tubudda simamatei ka loiná siliktenga ka gogoi Sabbat. Paobánangan pei bagei gogoi Sabbat nenda Punen sikokoiakenen. Kalulut gogoi pasipattakatda Jesus, iaté gogoi ké pei iaili gogoi Sabbat. Oto nia té lulunia aratiddou ka tubut Pilatus bulé ratakkíaké reredda sipattáakenen ka loiná siliktenga, samba ragorosot'aké tubudda simamatei ka loiná siliktenga

³² Iageti eirangan leú et tai perajurit, takkíakérangan boikí reredda sirua alei Jesus

³³ Tápoi kelé araei ka tubunia ka sia Jesus, itsóranangan ailingóan nia. Oto táan aratakkíaké ka sia rerenia

³⁴ Iageti punuakénangan simuiné bakkat ka ruak usut Jesus ka sia sara perajurit; oto belanangan leú et logau pagalú oinan

³⁵ Oto sia sipasiiigbuk sibabara néné te amasipoiliat, bulé imatonem bagamui ka kam. Samba simuneng'akenennia

néné bulat sibulatnia, samba makolou ka bagania sesesena nia

³⁶ Aibara kelé néné geti, bulé ipuaili lé kelé ka sinurat'akenen ka bagat Buko Sipunenan, sipasikukua, "Bulat beri te sara tolatnia atubakbak'aké"

³⁷ Ka Buko Sipunenan leú et ai atusurat'aké, kisé, "Rakikinere te nia simunudda néné.

³⁸ Lepá ei nia ka sia si Josep sibara ka Arimatea ka tubut Pilatus, itiddou bulé ialá tubut Jesus simamatei. (Si Josep néné, iaté sara sipasiului Jesus, tápoi sipinakele lé, kalulut lotó nia ka tubudda sauté ka tai Jahudi.) Oto obáakénangan nia si Pilatus. Iageti einangan leú et masialá tubut Jesus simamatei

³⁹ Beri leú et ka sia si Nikodemus sieei ka tubut Jesus tengamoi, amei leú et nia ka sia ipaaleiaké si Josep. Abbitnangan leú et pasingi-singin iaté, muno samba simoité; ai telu ngapulu ngakilo gram iginia

⁴⁰ Oto aláranangan nia ruadda tubut Jesus simamatei néné, tabutrangan nia komang poposa sambat pasingi-singin, siripot aratda tai Jahudi

⁴¹ Iageti ka bet-bet kudduat pasisiliktengaat Jesus, ai sangamata mone. Ka mone nenda ai sara ratei sibau, sitaipapakeiet peilé

⁴² Kalulut legre nia ratei néné, paobánangan pei bagei iaailingan lé gogoi Sabbat, bailiu rateiakérangan nia Jesus, sedda.

20 ¹ Iageti gogoi Menggui simatsep, maseggei peilé, ameian nia si Maria Magdalena ka ratei. Oto kelé aiitsó katuguguilut bukkú takket ratei

² pabalaunangan leú et, iei masigaba si Simon Petrus sambat sipasiuluinia simanuntut bagat Jesus. Kuanangan ka matadda, "Araaláan si Tuhan ka bagat ratei, oto tá kuagai kaipa pá arakau nia.

³ Iageti eirangan leú et tai Petrus sambat sipasiuluinia sabagei ka ratei

⁴ Ka sia ruadda, apabalau lé sia araei, tápoi sia sipasiului sabagei peilé maruei tubu ka tubudda tai Petrus, oto siangan lé boikí asege ka ratei

⁵ Loggouakénangan bagat ratei, itsónangan komang poposa situgagalak sedda, tápoi tá atugurú nia ka bagat ratei

⁶Tápoi ka sia geti si Simon Petrus aian iaailiaké. Oto barana lé ka sia gurú ka bagat ratei. Itsónangan leú et komang poposa situgagalak sedda

⁷Tápoi komang apprat utet Jesus geti, tá anai sedda ka bé-bénia, tápoi ai lé nia kaleleúlekat sarania

⁸Iageti gurú sia ka sia sipasiului sieei boikí ka bagat ratei. Itsórangan nia ka sia sibabara néné, iapeité aimatonem bagadda ka sia

⁹(Oto ka tetret nenda, tápei araagai katukolobatnia siripot sitususurat ka bagat Buko Sipunenan, pagalaiat katususurunia Jesus ka simamatei.

¹⁰Lepá toiliddangan leú et sipasiuluinia

¹¹Iageti ka sia si Maria Magdalena, ai nia muririó ka bet-bet ratei, ai nia musosou. Oto ai nia musosou, loggouakénangan bagat ratei

¹²Itsónangan rua sia samalaika sipuleppei leppei simakirisau. Ai sia muririó ka pasigalangan tubut Jesus simamatei, sara ka saigit uté, sara mitsá saigit reret Jesus

¹³Oto nou-nourangan nia samalaika, "Angoi nupusosou Ina?" Kuanangan nia si Maria ka matadda, "Aratakkouan si

Tuhanku, oto tá kuagai kaipa pá arakau nia.

¹⁴ Lepá aikua néné si Maria, pitsanangan tei-teinia, itsónangan ai nia muririó sedda Jesus

¹⁵ Iageti kuanangan ka matania Jesus, "Angoi nupusosou Ina? Kasonia nugagaba?" Oto ka bagania te ka sia si Maria, sipasijajago mone lé nia nenda. Lulut néné, kuanangan ka matania si Maria, "Ké ekeu baí nia Ukkui, amasialá tubut Jesus, kuanungan nia ka matakku, kaipa anukau nia, bulé kuei kualá nia.

¹⁶ Iageti kuanangan ka matania Jesus, "Maria!" Oto pitsanangan Jesus si Maria, kuanangan nga-ngan Ibrani ka tubut Jesus, "Rabbuni!" (Katukolobatnia, "Guru".

¹⁷ Oto kuanangan ka matat Maria, Jesus, "Bá rarape aku, aipoí tápei atusakai aku ka Ukkui. Tápoi kenan lé ka tubudda sasarainanguku, nusegéaké ka matadda, katusasakaiku kineneiget ka Ukkuiku, samba ka Ukkuimui leú et, elé ka Taikamanuangku samba ka Taikamanuamui leú et ka kam.

¹⁸ Iageti einangan leú et si Maria masisegéaké ka tubudda sipasiului

Jesus, pagalaiat iitsóna si Tuhan
sambat kukuana ka matania si Tuhan,
sangamberinia néné

¹⁹ Oto ka menggui nia nenda leú et,
soibó, parurúrangan sipasiuluinia ka
sara lalep; tápoi ai lé kakukuksingan
matatbaliu, kalulut lotóra ka tubudda
sautéra tai Jahudi. Iageti sinulut ei nia
murió Jesus ka talagadda, kuanangan ka
matadda, "Aban ka kam.

²⁰ Lepá aikua kelé nenda Jesus,
patoilánangan ka tubudda kabeinia
sambat usúnia. Oto bulat angká lé
bagadda simakopé sipasiuluinia, araitsó
tubut Jesus

²¹ Iageti kuanangan mitsá ka matadda
sipasiuluinia Jesus, "Aban ka kam. Kelé
kipa aikoiniaké aku kaku Ukkui, kisedda
leú te kaku kugagalai, kukoiniaké kam
ka kam.

²² Oto ulup'akénangan engania Jesus ka
tubudda, kuanangan, "Siló kam Ketsat
Sipunenan

²³ Ké nuappéaké kam jodda sara
sirimanua, appéakénangan leú et nia
Taikamanua. Tápoi ké tá nuappéaké kam
jodda sara sirimanua, tá leú te iappéaké
jonía Taikamanua.

²⁴ Oto ka sia si Tomas, (sipuoni, "Tairua"), iaté sara ka talagat sipulurua sipasiului Jesus, tá anai nia sambadda sipasiului sabagei, ka tetret aiei Jesus masibalou sia

²⁵ Bailiu ka sia sipasiuluinia sabagei, pangasegé ka tubut Tomas, pelé nga-nganda ka tubunia, "Akuitsóan kai nia si Tuhan!" Tápoi kuana lé nia ka sia si Tomas ka matadda, "Bulat ké tápei kuitsó balak sipattakat ka kabeinia, samba kuusuaké singongaíku ka lobok sipattakat, samba leú et mitsá ké tá kubuluk'aké kabeiku ka sipunuat ka usúnia, bulat beri tonem bagakku.

²⁶ Oto sangamenggui burúnia atusabau, parurúrangan mitsá sipasiuluinia, ka kudduat nenda leú et. Oto aian te nia ka sia sedda si Tomas. Ka sia matatbaliu, ai lé nia kakukuksingan sangamberinia. Tápoi amoi aitugurú Jesus ka бага, iageti puriónangan ka talagadda, kuanangan ka matadda, "Aban ka kam.

²⁷ Iageti kuanangan ka matat Tomas, Jesus, "Itsó peité kabeiku, kau singongaínu sené. Totoiaké kabeinu, nukau nia ka usúku. Buían imarua bagam

ka tubukku, tápoi kau lé imatonem bagam!

²⁸ Belan nga-ngania lé ka sia si Tomas, "Tuhanku, Taikamanuangku!

²⁹ Oto kuanangan ka matat Tomas, Jesus, "Bulat teret itsónu lé aku, elé, tonem bagam? Mauktuk te sia simatonem бага kenanen tá raitsó!

³⁰ Oto maigi peileú bagei kiseiet sigalaiakenen Jesus ka matadda sipasiuluinia, tá atusurat'aké ka bagat buko néné

³¹ Samba aitusurat'aké geti néné, bulé imatonem lé bagamui, Jesus néné, iaté Rimata Sipaarau, Togat Taikamanua, samba kalulut tonem bagamui ka tubunia, bara ka kam purimanuaiat.

21 ¹ Lepá patoilánangan tubunia mitsá Jesus, ka tubudda sipasiuluinia, ka Paot Tiberias

² Oto kisé galainia: Ka sara gogoi aparurú sia tai Simon Petrus, tai Tomas sipuoni Tairua, si Natanael sibara ka laggai Kana ka propinsi Galilea, tatogat Sebedeus, sambat rua sia sipasiului Jesus sabagei

³ Iageti kuanangan nia si Petrus, ka matadda saaleinia sabagei, "Ai

te kupaatu mei mujalo iba." Oto kuaddangan nia ka sia sabagei ka matania, "Kai leú et ka kai, kuobá leú te kai taei kam sambatta." Iageti eirangan leú et muabak. Tápoi sangasoibónia nenda, bulat beri sangamuneng arajalo iba

⁴ Kelé aibela sulu, ei Jesus murió ka bet-bet paó, tápoi tá raagai ka sia pu-Jejesus nia

⁵ Iageti kuanangan ka matadda Jesus, "Ale kam tatoga, taleú ai ibatta sijalomui?" Kuaddangan ka matania, "Tá anai.

⁶ Oto kuanangan ka matadda Jesus, "Jaloaké kam jalomui kai kattoet abak, bulé ialá iba." Iageti jaloakérangan jalodda, tápoi tá amoi aratiktik nia mitsá, kalulut kopet igit iba ka bagat jalo

⁷ Iageti kuanangan ka matat Petrus sara simanuntut bagat Jesus, "Si Tuhan te nenda!" Oto kelé aiarep nia si Petrus putu-Tuhan nia, kaunangan leppeinia (tá poí anai leppeinia), puteipunangan leú et ka bagat oinan

⁸ Tápoi ka sia geti sipasiuluinia sabagei, muabak'an lé aragalai raei ka kapí. Oto ai sia muaabak airatitiktik jalodda sibara

iba. Tá leú makareunan sia ka kapí, elé sangotu ngameter lé pá reunannia

⁹ Oto kelé aratujolou ka kapí, itsóranan bot api, ai iba sambat roti ka uddutnia

¹⁰ Iageti kuanangan ka matadda Jesus, "Abbit kam sené piga ngamuneng pá, iba sibau sialámu.

¹¹ Tujanangnangan leú et ka sia si Simon Petrus ka bagat abak, tiktikrangan jalodda ka kapí. Asut'an jalodda sarat iba sabeu; ai sangotu lima ngapulu telu ngamuneng iginia sangamberinia. Tápoi kenanen kisé kopet igit iba, tá leú amabirit jalodda

¹² Oto kuanangan ka matadda Jesus, "Konan kam mukom." Bulat beri sia sara ka talagadda sipasiuluinia simaró бага масиква ка матаня, "Kasonia ekeu, Ukkui?" Aipoí bulat amakolouan araagai putu-Tuhan nia

¹³ Lepá rengeiakénangan tubunia Jesus ka tubudda sipasiuluinia, alánangan leú et roti, kaunangan nia ka tubudda. Oto kisedda leú te aigalai ka tubut iba ka sia

¹⁴ Oto sikateluniangan té né aipatoilá, tubunia Jesus, ka tubudda sipasiuluinia, lepat aitusuru ka simamatei

¹⁵ Oto lepá arapukom, kuanangan ka matat Simon Petrus, Jesus, "Ale Simon togat Jona, kipa makopé leú nuntut bagam ka tubukku, belé peilé nuntut bagadda ka sia néné, ka tubukku?" Iageti kuanangan ka matat Jesus si Petrus, "Kirénangan Tuhan, ai lé nuaagai kipa bulat punununtut bagakku ka tubum." Oto kuana lé ka matania Jesus, "Oto jago sabiri-birikku.

¹⁶ Lepá kuanangan ka matat Petrus, Jesus sikaruania, "Ale Simon togat Jona, kipa makaté leú bagam ka tubukku?" Aleginangan nia si Petrus, "Kirénangan Tuhan, ai lé nuaagai kipa bulat punununtut bagakku ka tubum." Iageti kuanangan ka matania Jesus, "Oto jago sabiri-birikku.

¹⁷ Lepá mitsá kuanangan ka matat Petrus, Jesus, sikatelunia, "Ale Simon togat Jona, kipa makaté leú bagam ka tubukku?" Oto kalulut putetelungamitsá nia inou-nou si Petrus, Jesus, mareu-reunangan bagania. Bailiu kuana lé nia ka matat Jesus si Petrus, "Ai lé nuaagai sangamberinia Tuhan, kipa bulat punununtut bagakku ka tubum." Iageti

kuanangan ka matat Petrus Jesus, "Oto jago sabiri-birikku

¹⁸ Bulat sibulatnia te sikuakku néné ka matam: Ai peilé mababau tubum, ekeu saram lé iaapra tengam, samba kaipa lé nuobá ei. Tápoi ké mabajá ekeu, totoiakénungan kabeinu, bailiu sabageian lé ikakabéaké ekeu, samba abbitrangan leú et ekeu, kataioobaket bagam.

¹⁹ (Oto ka tiboiet nenda te ipatoilá ka matania Jesus, pagalaiat enung kamamateinia ka sia, masilatsat'aké Taikamanua.) Lepá kuanangan ka matat Petrus, Jesus, "Konan nutut aku!

²⁰ Iageti kelé aipitsa tei-teinia si Petrus, itsónangan aitutut sia sara sipasiului simanuntut bagat Jesus. (Nia té nenda sipuuuddet ka bet-bet Jesus, ka tetret ai sia mukokom, sambat sipasinonou-nou nia masikua, "Kasonia poi Tuhan ipajojo ekeu?"

²¹ Oto kelé aiitsó nia, si Petrus, kuanangan ka matat Jesus si Petrus, "Kipa ka sia kai néné?

²² Iageti kuanangan ka matania Jesus, "Ké baí kuobá ipurimanua teret oiku

mitsá, néné tá galajetnu. Tápoi kekeu geti, konan nutut aku!

²³Oto makakranangan leú et katuareman pagalaiat taimamateinia sipasiului néné, ka tubudda sipasiului Jesus. Nenda geti, tá aikua taimamateinia sipasiului néné, Jesus, tápoi aikua lé, "Ké baí kuobá ipurimanua teret oiku mitsá, néné tá galajetnu.

²⁴Sipasiului sipasimumuneng'aké sangamberinia sibabara néné, nia leú te amasisurat'aké. Samba leú et, ai lé taaagai sangamberi simuneng'akenennia, bulat sineseatnia

²⁵Oto maigi peilé bagei sigalaiakenen Jesus. Ké sangamberinia baí tusurat'aké, pasasara, kupaatu tá mememet sangaliot polak néné, kudduat pasigalangan sangamberinia buko surat'akenen peilé.

Kisah Para Rasul

1 ¹Ale Teopilus simatopit.
Ka bagat bukokku siboikí
akukolouakéan sangamberinia ka
tubum pagalaiat sigalaiakenen sambat
singantoman'akenen Jesus, ka tetret
aitaddaaké galajetnia

²pat aili ka gogoi katusakaiatnia ka
manua. Tápoi kei tusakai nia ka manua,
bulat ka geget Ketsat Sipunenan,
galaknangan nganturat ka tubudda
sipasiuluinia, iaté sipasiului sipiliynia

³Lepá aimatei, ka epat ngapulu
ngagogoinia nenda, marei-rei
ipatoilá bulat simakolou, ka tubudda
sipasiuluinia, bulat puririmanua nia.
Araitsóan nia samba aipatiboakéan
sia, ipakolou ka matadda pagalaiat
Purimataat Taikamanua

⁴Samba ka tetret ai sia parururú
sangamberidda, kaunangan parenta ka
tubudda, Jesus, ikua, "Buí nukaddiuaké
kam Jerusalem. Ngenaaké kam
tubumui sedda teret akéna nia Ukkui

sangamberi sitonéakenennia, iaté kelé
sinegéakenenku ka matamui siburú

⁵Aipoí ka sia si Johannes, oinan
lé ikakau masiraú, tápoi ai pei piga
ngagogoi pá burúnia, raúnangan kam
Ketsat Sipunenan.

⁶Kelé araparurú tai Apostel sambat
Jesus, nou-nourangan nia, pelé
nganganda, "Kipa Tuhan, taleú
nuririóakéan lé mitsá kineneiget
Purimataat Israel?

⁷Iageti aleginangan nia Jesus,
kuanangan ka matadda, "Ukkuiku lé
masiteteúaké gogoi sambat tetrenia.
Táan leú anai lulunia nuagai kam nia ka
kam, aipoí sarat Ukkui lé sibakkat teú

⁸Tápoi babara te ka tubumui gege,
ké isop-sop ka tubumui Ketsat
Sipunenan. Oto bailiunangan kam
sipasimumuneng'aké aku ka Jerusalem,
samba ka sangalio Judea, ka Samaria,
pparat aili ka sangaliot polak néné.

⁹Lepá aikua kelé néné Jesus, ka
mataddangan leú et akkat-aituakkat ka
manua. Iageti sakkerinangan nia tinobut

¹⁰Oto airateteila manua, ka tetret
aitusasakai Jesus, tulut rió sia rua
sipuleleppei simakirisau ka bé-béra

¹¹ Iageti kuaddangan nia ka matadda tai apostel ka sia sirua néné, "Ale kam tai Galilea, sarat puririoán lé koí nugagalai kam sedda, masiteila manua? Aipoí ka sia Jesus néné siitsómui situsasakai ka manua; momoi lé nia mitsá kelé kisedda leú et ka siitsómui nia simaruei néné.

¹² Oto lepá toiliddangan leú et ka sia tai apostel, baradda ka Leleu Zaitun. Ai sangakilo meter pá reunannia leleu néné ka Jerusalem

¹³ Iageti eirangan leú et ka Jerusalem ka kudduatda leú et, gurú sia ka bagat bilí ka pata. Oninda tai apostel néné, iaté si Petrus sambat si Johannes, si Jakobus sambat si Andareas, si Pilipus sambat si Tomas, si Bartolomeus sambat si Mateus, si Jakobus togat Alpeus, si Simon Patriot sambat si Judas togat Jakobus

¹⁴ Simakeré бага lé sia sangamberidda ka paniddogat. Oto rapaniddou, sambadda tainanalep leú et, kelé si Maria inan Jesus, samba leú et sia sasarainan Jesus

¹⁵ Oto ka sara gogoi, talagat parururúra, ai sia sangotu rua ngapulu pá sia igidda, puriónangan leú et si

Petrus mungantoman. Pelé ngangania ka tubudda

¹⁶ "Ale kam sasaraina! Buítá muaili sangamberinia sitususurat ka bagat Buko Sipunenan. Kelé siburú ka sikuat Dapid, aisiblaaké pagalaiat tubut Judas, iaté siutéaké sia ralabá Jesus

¹⁷ Ka sia si Judas néné, iaté sara ka talagatta, sambat atupiliyan nia bulé tapugalai kam sambatta.

¹⁸ (Kai Judas ka sia geti, aian polak purateiatnia sialat pajoatnia sikataí. Iageti belé nia matei, puk-puknangan leú et balugúnia, bela sangamberi sibabara ka bagat balugúnia

¹⁹ Raagai lé sangamberidda tai Jerusalem pagalaiat sibabara ka tubut Judas néné. Iaté lulunia araoniaké polak néné ka nganganda, Akeldama, tibonannia 'Polak Logau'.

²⁰ "Aipoí ka bagat Buko Mazmur ai atusurat'aké kisé, 'Eddangan nia imatangeu kudduatnia; buían rakuddu beri sara ka kudduatnia.' Tápoi ai leú te atusurat'aké bagei kisé, 'Eddangan nia rakudduji nia sabagei kudduatnia néné.

²¹ Oto buítá bara sia sara situt sita sipasimumuneng'aké puririmanuania

mitsá Tuhan Jesus ka simamatei. Nia nenda, buítá sara simarei-rei masitut sita kaipa taei, barania ka tetret aitaddaaké si Johannes masiraú, pat aili ka tetret aitusakai Jesus sibara ka talagatta néné.

²²(1:21)

²³Iageti saú-saúrangan rua sia, iaté si Josep oniakenenda si Barsabas (elé oniakenenda leú si Justus) sambat si Matias

²⁴Iageti paniddourangan leú et, pelé nganganda, "Ale Tuhan, ai lé nuaagai pupaatuananda sirimanua. Ka sia si Judas amuaringan nia ka galajetnia muapostel, samba amateian nia. Oto saú-saú kakai Tuhan, kasei karuadda néné nupipiliy, kaunen masipasikeli galajet silit tubut Judas.

²⁵(1:24)

²⁶Lepá galairangan pauktungan masigaba kasei karuadda néné tupipiliy. Oto si Matias lé aikerek pauktungan. Kalulut néné, pauddetrangan nia bailiu apostel masipaaleiaké sipasiului sipulusara.

2¹ Kelé aiaili tetrenia gogoi Pentakosta, parurúangan leú et sangamberi

simatonem бага ка tubut Tuhan Jesus
ка sara kudduat

²Iageti tulut maarepnangan nganga
sipuuukkú ка manua, kelé ipuukkú rusa
simapiRET. Masutnangan leú et ngangan
sipuuukkú néné ка sangaliot багат lalep
kudduatra

³Oto itsóRangan leú et ipujuluu api
ipajalai tubunia, lepá leu nia ка tubudda
sangamberidda

⁴Sopsopnangan leú et sia
sangamberidda Ketsat Sipunenan.
Iageti taddaakérangan masitiboaké
sene ngamata nganga. Kipa ikua Ketsat
Sipunenan tiboakenenda, iaté nenda
ratitiboaké

⁵Ка tetret nenda maigi sia tai Jahudi
sibabara ка senen laggai ка sangaliot
polak, amei mukuddu ка Jerusalem. Sia
néné sangamberidda, simasurú ка tubut
Taikamanua lé sia

⁶Iageti kelé araarep nga-nga sipuuukkú
néné, eirangan leú et sirimanua simigi
parurú sedda. Oto bulat kisei lé ка
bagadda sangamberidda raarep rapanibo
simatonem бага, ка nga-ngan laggaira
sene-senenda

⁷Oto ka kisei ka бага sambat ka get-get ka bagadda, patiboddangan pasasambadda, pelé nganganda, "Kipa, tá tai Galilea poi sia sangamberidda sipaninibo néné

⁸Kipa aigalai, aioi atarep kam nia arapanibo ka senen ngangan laggaita

⁹Aipoí sita ka sita néné sibabara ka Partia, sibabara ka Media, sibabara ka Media Elam, sibabara ka Mesopotamia, sibabara ka Judea, samba leú et sibabara ka Kapadokia; iageti sibabara leú ka Pontus sambat ka Asia

¹⁰sibabara ka Pirigia sambat ka Pampilia, sibabara ka Misir samba sibabara ka laggai Libia ka bet-bet Kirene, tápoi ai leú et sita sibabara ka Roma

¹¹Beri leú et ka sia tai Jahudi ai leú et sia ka sia, sambat sia sibabara ka bangsa bagei situgugurú ka aratda tai Jahudi; iageti ai leú et sia sibabara ka Kereta sambat ka Arab. Bulat ataarep'an kam sangamberitta arapanibo ka ngangan laggaita sene-senenta, ratiboi smakisei ka bagatta, sigalaiakenen Taikamanua!

¹²Oto ka kisei ka бага sambat ka get-get ka бага patiboddangan

pasasambadda masikua, "Aponia pá katukolobatnia néné?

¹³Tápoi ai leú et sia sipaloloi sia; arakua, "Ai lé ipupuineng sia!

¹⁴Iageti puriónangan leú et si Petrus sambadda saaleinia tai apostel sipulusara, taddaakérangan masipangantoman sirimanua simigi. Abeuakénangan nga-ngania masikua ka matadda, pelé ngangania, "Ale kam sasaraina, sangamberimui tai Jahudi, samba leú et kam sangamberimui sikukuddu ka Jerusalem! Arep'aké kam sipulelelek kukua nia ka matamui, aipoí bulat maerú kupakolou nia ka matamui

¹⁵Ka sia geti néné, tá aipupuineng sia, kelé sipinaatumui ka kam; aipoí iapeí aiaili bó-bó siba simatsep

¹⁶Oto néné geti aipakolouan Taikamanua ka sikuat Nabi Joel, sipasikukua

¹⁷Aikua Taikamanua, 'Ka kalepakat polak uruakékungan Ketsatku ka tubudda sangamberi sirimanua. Rapaaagai te tatogam taimanteu sambat tatogam tainanalep sangamberinia kuanenku ka matadda. Raiitsó te tatogam sibau tubu sipatoilakku ka tubudda. Mangangamut

te sia saeppum, pagalaiat pangamutet
sikauku ka tubudda

¹⁸Kuuuruaké leú te Ketsatku ka
tubudda ka sia sapaguguletnu taimanteu
sambat sapaguguletnu tainanalep,
ka tetret nenda. Segéakérangan leú
et sangamberinia sisegéakenenku ka
matadda

¹⁹Kubabaraaké te kiseiet ka manua ka
pata, sambat katugégekat sabeu ka repé
sené iaté ka polak néné; babara te logau
sambat api, tinobut sambat kujuk

²⁰Magegep-gep te matat sulu,
mabobonan te matat laggó kelé logau,
kei iaili Gogoi Tuhan, iaté gogoi sabeu
sambat sipulubeunan

²¹Oto ka tetret nenda, kasei sisogai
onin Tuhan, silóranan puaragat.

²²Ale kam sasaraina kam tai Israel!
Arep'aké peite kam kuanenku néné:
Aikauan Taikamanua ka tubut Jesus
si-Natsaretna néné galajet bulé ipuukú
kam. Kelé ka sigalaiakenen Taikamanua
iaté pukerengan sambat kiseiet
sabeu ka talagamui ka simatotoilá
ka sigalaiakenen Jesus. Momoi takua,
anuagaian kam sangamberimui pagalaiat
néné

²³ Kelé siripot ka pinaatunia sarania, teúakénangan nia Taikamanua isegéaké Jesus ka kabeimui. Kelé aisegéaké nia ka kabeimui, mateiakémuian nia, iaté anuobáaké kam sia sirimanua sijo rapattáaké nia ka loiná siliktenga

²⁴ Tápoi kenanen kisedda, aisuruaké lé nia mitsá Taikamanua ka simamatei. Aiguk tedda nia kamateiat, tápoi aibelaaké lé nia mitsá Taikamanua, aipoí tá momoi imariu-riu ikup-kup'aké nia kamateiat

²⁵ Beri leú ka sia si Dapid, aitiboi leú te pagalaiat tubut Jesus néné, aikua, 'Mariu-riu lé kuitsó Tuhan ka matakku, ai lé ipaalei aku, bulé tá ipageu-geu aku apa pá

²⁶ Iaté lulunia imamangká bagakku, samba iuumun'aké si Tuhan ngu-ngungku: samba inge-ngenaaké tubunia tubukku néné, ka aban бага ka bagat ratei

²⁷ Aipoí tá nuooreaké ikuddu ketsatku ka laggaira simamatei. Samba tá nuooreaké ikuddu paguguletnu simatopit néné imaanau elé itatá

²⁸ Anupatoiláan poí ka tubukku enungan sieei ka purimanuaiat sipulelelek. Oto

buggra lé pugoraat bagakku, kalulut paaaleinu aku.

²⁹ Ale kam sasaraina, eddangan nia kutiboinia simakolou ka matamui pagalaiat tubut Dapit néné, iaté taikebbukatta. Amateian nia samba aturateiakéan nia; iageti rateinia ai peilé ka talagatta pat aili kineneiget

³⁰ Aigalaian Taikamanua pakerekat бага ka tubut Dapit ka bagat suppa, uuddet'akéna sara sibara kapunuteteunia bailiu rimata. Kalulut againa nia si Dapit pakerekat бага нéné, sambat kalulut punanabinia

³¹ againangan leú et galaiakenen Taikamanua. Oto amusiblangan nia masikua, katususuru nia mitsá Rimata Sipaarau néné ka simamatei. Aikua si Dapit, 'Tá iooreaké ikuddu ka laggaira simamatei, sambat tubunia leú et tá maaanau sambat tá tatatá.

³² Jesus néné te airimanuaaké mitsá Taikamanua. Samba bulat tubumaian amasiitsó sibabara néné

³³ Aipauddet nia Taikamanua bailiu siabeu tiboí tubu. Gege leú et aikau Taikamanua ka tubunia, samba silónangan leú et Ketsat Sipunenan

sitonéakenen Ukkui. Oto kelé siarepmui sambat siitsómui kineneiget, iaté Ketsat Sipunenen siuruakenennia ka tubumai

³⁴ Ka sia si Dapit, tá atusakai nia ka manua, tápoi ai leú te aikua ka sia kisé, 'Aikua si Tuhan kai Tuhanku: Uddet'aké ekeu kai kattoetku

³⁵ teret kalaakéku sia saggaknu!

³⁶ Iaté lulunia itukukua bulé buítá raagai nia sipulelelek sangamberidda tai Israel, Jesus sipattáakenenmui ka loiná siliktenga, nia té nenda aipaudet Taikamanua bailiu Tuhan samba Rimata Sipaarau!

³⁷ Oto kelé araarep nia sikuat Petrus néné, paanunangan bagadda. Iageti kuaddangan nia ka matat Petrus, samba leú et ka matadda tai apostel sabagei, "Ale kam sasaraina, aponia galaiakenenmai?

³⁸ Kuana lé nia ka matadda ka sia si Petrus, "Kau lé nubauaké kam paatuatmui. Samba leú et, buítá turaú kam ka onin Jesus Kristus, bulé ituappéaké jomui. Iageti silómuian panguruat, iaté Ketsat Sipunenen sibara ka Taikamanua

³⁹ Aipoí puuktunganmui te, sambat sapunuteteumui, samba puuktunganda leú te ka sia sikukuddu ka simareunan, sipinatonet Taikamanua néné, iaté sia sangamberi sinogai Tuhan Taikamanua, bulé taei kam ka tubunia.

⁴⁰ Oto kisedda te aigalai si Petrus, masipakolou ka tubudda pagalaiat tubut Kristus néné. Samba maigi peilé bagei aikua ka matadda si Petrus, masináná sia, bulé rabelaaké tubudda ka tubut bangsa sikataí paraboat, iaté bangsa ukumen Taikamanua

⁴¹ Iageti maigiddangan simatonem бага ka ngantoman Petrus, lepá raúrangan leú et sia. Oto uraunangan mitsá igidda simatonem бага ka gogoi nenda, ai telu ngaribu sia igidda

⁴² Mariu-riu lé sia ka nganturatda tai apostel, samba mariu-riu lé sia ka bagat parurukat. Mariu-riu leú rapataddé mukom samba mariuriu sia musara ka paniddogat

⁴³ Bulat maigi kerek aragalai tai apostel, pat bara kisei ka bagadda, elé lotóra sirimanua simigi

⁴⁴ Mariu-riu lé sia sangamberidda simatonem бага ka bagat

pusaraat. Samba apa lé sibabara
ka tubudda sipuoni bakkatda saradda,
sangamberidda ibabakkati nia

⁴⁵ Iageti pasakiddangan sangamberinia
bibiletta, lepá parubeirangan bulagat
sakit bibiletta nenda ka pasasambadda,
siripot igit pakeietta ka sia senen-
senenda

⁴⁶ Senen gogoi lé raparurú ka Uman
Taikamanua; samba pataddé mukom, ka
angkat бага samba ka epet paatuat, ka
lalepra

⁴⁷ Riu-riu lé raumun'aké Taikamanua,
samba bulat mangká bagadda sirimanua
ka tubudda. Senen gogoi lé iurau igidda,
kalulut ikau ka tubudda si Tuhan,
sirimanua arauakenennia néné.

3 ¹ Ka sara gogoi, iaté ka bó-bó telu ka
soibokat, amei si Petrus sambat si
Johannes ka Uman Taikamanua, ka ipot
gogoi paniddogat

² Sedda ka sara matatbaliu, sipuoni,
"Matatbaliu Simalainge", aimuuuddet
sara simasakit barania peilé ka
pusulekatnia. Senen gogoi lé raabbit
nia sedda simasakit néné, masitiddou
paroman ka tubudda sieei ka Uman
Taikamanua

³ Oto kelé aiitsó ai sia tugugurú tai Petrus sambat tai Johannes ka Uman Taikamanua, tiddounangan ka tubudda, bulé rakau apa pá ka tubunia

⁴ Iageti kinereddangan leú et nia, lepá kuanangan ka tubut simasakit néné si Petrus, "Kinere peite kai!

⁵ Oto lelek'akénangan leú et sia, ikaroni бага ibara apa pá sibabara ka tubdda

⁶ Tápoi kuana lé nia si Petrus ka tubunia, "Bulat beri te bulagatku. Tápoi apa sibabara kaku, nia té kuaaké ka tubum: Ka geget Jesus Kristus tai Natsaret, kukua ka matam, enung'aké ekeu!

⁷ Iageti alánangan kabeinia sikattoet simasakit néné si Petrus, irop'aké nia ipuenung. Oto niangan leú et nia, ron-aimaron rerenia sambat pauilakat tolat rerenia

⁸ Puattatnangan leú et irióaké tubunia, iageti taddaakénangan ipuenung, kaipa iobá ei. Lepá gurú nia ka Uman Taikamanua masipaaleiaké si Petrus sambat si Johannes. Ai nia mueenung aipaaattat tubunia samba leú et ai nia masiumun'aké Taikamanua

⁹ Oto sangamberidda sirimanua
araitsóan aipuenung sambat aipasiumun
Taikamanua

¹⁰ Iapeité kolou ka bagadda puniniana
nenda simarei-rei muuudet ka
"Matatbaliu Simalainge" ka Uman
Taikamanua masitiddou paroman. Oto
bulat kisei lé ka bagadda raitsó sibabara
néné

¹¹ Oto ka sia simamale sakit néné,
riu-riu lé itut si Petrus sambat si
Johannes. Iageti kelé arasegé teludda
néné ka laibokat sipuoni, "Laibokat
Salomo", ei sia sirimanua rapurut sia,
bulat kopet kisei ka bagadda ka tubudda

¹² Kelé aiitsó sia si Petrus, kuanangan
ka matadda, "Ale kam tai Israel,
makikisei kodda ka bagamui kalulut
sibabara néné? Táan koí bebelé matamui
ka tubumai. Ta leú ai lé nupaaatu kam
ka bagamui aipuenung sirimanua néné
kalulut kababarat gege ka tubumai,
elé kalulut reddetmai pá ka tubut
Taikamanua

¹³ Aipoí ka sia Paguguletnia iaté Jesus,
ailatsat'akéan nia Taikamanua, iaté
Taikamanua paniddogiet Abraham, Isak,
sambat Jakob, samba Taikamanuanda

taikebbukatta. Oto Jesus nenda te anusegéaké kam ka kabeira sauté sambat lawanenmui ka matat Pilatus, ka tetret aigegelai ibelaaké nia si Pilatus

¹⁴ Simalina paatuat sambat simaerú paraboat lé nia néné, tápoi anusaggangi lé kam nia, iageti ron'akémuian ngangamui ka tubut Pilatus, bulé ibelaaké kakam sara sipasimamateiaké sirimanua

¹⁵ Iageti mateiakémuian nia; oto nia lé sibaraaké purimanuaiatda sangamberi sirimanua. Tápoi aisuruakéan nia mitsá Taikamanua ka simamatei. Bulat tubumaian amasiitsó sibabara néné

¹⁶ Beri kam leú et bulat tubumuian amasiitsó samba amasiigbuk sibabara ka tubut simasakit néné. Amaron'an tubunia samba táan mabesí nia kalulut tonem bagania ka tubut elé ka geget Jesus. Kalulut tonem bagania ka tubut Jesus te néné aimaron tubunia mitsá ka matamui sangamberimui

¹⁷ Ale kam sasaraina! Akuagaian kineneiget sigalaiakenenmui sambat sigalaiakenenda sautémui ka tubut Jesus néné, iaté kalulut taiagaimui lé nia, apa sigalaiakenenmui néné

¹⁸Ialeú té né lulunia aipuaile kelé
ka sikuat Taikamanua siburú ka
sinegéakenenda tai nabinia, pagalaiat
pangongorik nia Rimata Sipaarau,
sitonéakenen Taikamanua néné

¹⁹Oto kalulut néné, kau nubauaké
kam paatuatmui, alé kam Sasaraina,
samba kau nutoili kam mitsá ka tubut
Taikamanua, bulé iappéaké jomui

²⁰Momoi te nia si Tuhan itaget'aké kam,
bulé imasásá tubut ketsatmui. Samba si
Tuhan leú et masikokoiniaké Jesus ka
tubumui, aipoí nia lé aipiliy Taikamanua
bailiu Rimata Sipaarau kam

²¹Buítá mukuddu nia ka manua, teret
bauakéna sangamberinia Taikamanua,
kelé ka siniblaakenennia siburú ka
sikuadda tai nabinia

²²Beri leú poí ka sia si Mose, aiku kisé,
'Ikokoiniaké te si Tuhan Taikamanuam
sara nabi sibara ka bangsamui leú et,
kelé aikoiniaké aku kaku. Oto buítá
nuarepi kam sangamberinia sikuat nabi
néné ka tubumui

²³Sangamberidda sitaipasilelelek'aké
sikuat nabi néné, tubebelaaké sia
ka paamian Taikamanua, samba
tusububuaké.

²⁴ Oto sangamberi tai nabi
 sipasimumuneng'aké katuareman
 sibara ka Taikamanua, barania kai Nabi
 Samuel pat aili ka tai nabi sabagei
 siooi ka tei-tei, masipakolou pagalaiat
 sibabara kineneiget te aragalaiake

²⁵ Sangamberinia palelengan
 Taikamanua ka sinegéakenenda tai
 nabi, sibailiu puuktunganmui te. Ka
 pakerekat бага sigalai Taikamanua
 ka tubudda taikebbukatmui, aikua
 Taikamanua ka tubut Abraham
 kisé, 'Kalulutda sapunuteteunu,
 sukat'akékungan sangamberidda tai
 bangsa ka polak néné.' Oto palelengan
 nenda leú, siaili kam leú et

²⁶ Iaté lulunia aipiliy Paguguletnia, lepá
 koiniakénangan nia itaget'aké kam boikí,
 bulé isukat'aké kam. Galai pasisusukat
 nia ka sia Taikamanua, iaté ibauaké
 paatuatmui ka puparaboananmui
 sikataí."

4¹ Oto talagat pungangantomanda
 tai Petrus sambat tai Johannes,
 lotsit-aratulotsit tai imam sabeu
 sambadda tai komandan sipasijajago
 Uman Taikamanua, samba leú et tai

Saduki, raamiaké si Petrus sambat si Johannes

²Amugolú sia, kalulut kukuadda nia tai Petrus sambat tai Johannes, puririmanua nia mitsá Jesus, ka simamatei, ka matadda sirimanua. Aipoí nenda te masipatotoilá puririmanuanda mitsá sirimanua simamatei

³Iageti labáranan sia karuadda tai apostel néné, kaurangan sia ka bagat penjara. Tápoi kalulut soibónangan, kuaddu sia sedda tai Petrus sambat tai Johannes teret pató

⁴Tápoi maigi sia sipasiaarep ngantomanda tai apostel, amatonem бага ka tubut Jesus. Iageti tuppainangan leú et igidda, pat pá ailí sia lima ngaribu

⁵Oto matsepnia lé parurúranan leú et sia siabeunia ka Mahkama Puaranan, sautéra tai Jahudi, sambat tai guru paamian ka Jerusalem

⁶Paailiddangan leú et si Imam Sabeu si Hannas, sambat si Kayapas, si Johannes, si Aleksander, sambat sangamberidda sipuoni saepput imam sabeu

⁷Iageti abbitranan si Petrus sambat si Johannes ka tubudda, kuaddangan ka matadda, "Kipa nupaeerú kam nualeaké

kam simasakit? Kasei ka ron, elé kasei ka gege nugagalaia ké kam nia néné?

⁸Oto aleginangan nia si Petrus ka pinalulut Ketsat Siupunenan, pelé ngangania ka tubudda, "Ale kam tai Tuan siutéaké tai bangsa, sambat kam tai Tuan saladdou mahkama

⁹Anuadili kam kai kineneiget, kalulut gagalaimai simaerú, iaté akurop'aké kai simasakit, sambat kalulut obámui nuagai kam nia kipa akugalai kai akualeaké kai nia simabesí néné

¹⁰Oto bulé nuagai kam nia ale kam sangamberimui tai Tuan, samba laú et kam sangamberimui bangsa Israel bulé nuagai kam nia ka kam; aioi geti aipuenung mitsá sinéné ka ron tubu ka matamui tai Tuan, kalulut puroron sambat geget Jesus Kristus tai Natsaret lé. Anupattáakéan kam nia ka loiná siliktenga Jesus néné, tápoi aisuruakéan nia mitsá Taikamanua

¹¹Jesus néné te kuanennia ka ruang néné kelé sitususurat ka Buko Sipunenana, sipasikukua, 'Bukkú sitaipapakeietda tai tukang, aibailiuan nia bukkú bongen inan arigi.

¹² Oto sarat kalulut Jesus lé rasisiló puaragat sirimanua. Aipoí bulat beri te sia sara ka talagadda sirimanua ka sangaliot polak néné sipasisiló gege sibara ka tubut Taikamanua bulé raarauaké sita.

¹³ Bulat kisei lé ka bagadda saladdou Rapat Mahkama Puaranan raitsó gegedda manibo tai Petrus sambat tai Johannes. Paobánangan pei bagei ka ruadda tai apostel néné, sirimanua kelé simarei-rei lé sia, sitaipusisikola. Oto iapeité kolou ka bagadda, karuadda tai apostel néné sipasiului Jesus

¹⁴ Tápoi bulat beri sangatakó tá abela nga-nganda, kalulut ai lé raiitsó nia sialeakenen néné ai nia muririó sedda ka matadda masipaaleiaké si Petrus sambat si Johannes

¹⁵ Iageti kuaddangan ka matat Petrus ambat kai Johannes bulé rabela ruadda ka purappanan, lepá taddaakérangan masipatiboji

¹⁶ pelé nganganda, "Kipa tagagalai kam ka tubudda néné? Aipoí araagaian sangamberidda tai Jerusalem pussia nia ruadda amasigalaiaké kiseiet sabeu

néné. Oto beri sita ka sita leú et, táan iagai tatátáaké nia

¹⁷Tápoi tapanuungan lé sia ka ruadda néné, buían rapanibo mitsá ka onin Jesus ka tubudda kasei pá, makokopéan lé imararat katuaremannia ka tubudda sirimanua simigi.

¹⁸Lepá sogairangan sia mitsá karuadda tai apostel néné ratuguru ka bagat purappanan, iageti kuaddangan nia ka matadda bulat tá momoi rakua elé rapungantoman ka onin Jesus

¹⁹Tápoi kuadda lé nia ka sia tai Petrus sambat tai Johannes, "Kau lé nupaatu kam nia boikí apa simaroipo ka matat Taikamanua: elé masireddet ngangamui lé kugagalai kai, elé masireddet nga-ngan Taikamanua lé

²⁰Aipoí kai kakai, tá iagai kuariaké kai masitiboí apa bulat tubut siitsómai samba siarepmai.

²¹Oto ka sia sipurarappat, bulet tá arasese apa pá selet tubudda tai Petrus sambat tai Johannes, imateú ituukum'aké sia. Iageti ron'akérangan nga-nganda rakua buí ragalaiaké nia mitsá, lepá belaakérangan leú et sia karuadda tai apostel,

aipoi sangamberidda sirimanua
 araumun'akéan Taikamanua kalulut
 sibabara néné

²² Ka sia poí sialeakenen bulat kiseiet
 néné, ai epat ngapulu ngarurangan legei
 bajánia

²³ Oto kelé arabelaaké sia tai Petrus
 sambat tai Johannes, toili sia mitsá ka
 saaleira, iageti pungungan'akérangan
 sangamberinia sikuadda ka tubudda tai
 imam sabeu sambat sautéra tai Jauhudi

²⁴ Kelé araarep nia saaleira sikuadda
 néné, paniddourangan leú et ka
 keret бага ka tubut Taikamanua.
 Pelé nganganda, "Ale Tuhan, ekeu lé
 amasibaraaké manua sambat polak,
 koat sambat sangamberinia sibabara ka
 bagania

²⁵ Kelé ka sikuat Ketsatnu ka
 sinegéakenennia ka taiebbukatmai si
 Dapit paguguletnu; anukua, 'Mugogolú
 kodda sia, sitaiagai si Tuhan; rapaaatu
 kodda sitá galai sabangsa-bangsa

²⁶ Arapatarek'an tubudda tai rimata ka
 polak pasaggak, sambat sia sauté leú et
 amusarangan sia masisaggangi si Tuhan
 sambat Rimata Sipaarau.

²⁷ Aipoí ka sia si Herodes sambat ka sia si Pilatus arabaraakéan parurukat sambadda sitaiagai si Tuhan, sambat sambadda tai Israel ka laggai néné. Arabaraaké parurukat masisaggangi Jesus paguguletnu sipunenan néné, sipauudetnu bailiu Rimata Sipaarau

²⁸ Arabaraaké parurukat masigalaiaké sangamberinia, siripot ka siteúakenennu siburú. Anuteúaké nia néné iaté ka gege, sambat ka puobánu saram lé

²⁹ Oto kineneiget Tuhan, igbuk peite kipa ragelai ramateiaké kai. Obáaké lé kai sapaguguletnu néné, masipakarap katuaremannu néné, sitá lotó

³⁰ Aké panguruatnu bulé ramale simabesí, samba baraaké pukerengan samba leú et kiseiet sabeu sibara ka gege samba ka ron onin Jesus, Paguguletnu sipunenan néné.

³¹ Oto lepána lé arapaniddou, pueggeunangan leú et kudduat parurukatda. Sop-sopnangan sia sangamberidda Ketsat Sipunenan, iageti magegeddangan simakopé masingantoman'aké katuareman sibara ka Taikamanua

³² Oto simakeré бага lé sia sangamberidda simatonem бага. Beri sia sara sikua ka paatuatna, nia sарania lé sibabkkatnia, sangamberi sibabara ka tubunia. Sangamberinia sibabara ka tubudda sene-senenda, sangamberidda lé masipapakei

³³ Ka gege sabeu lé rapasimuneng'aké tai apostel pagalaiat katususuru nia mitsá Jesus ka simamatei. Oto bailiu bulat makopé beunan panukanan Taikamanua ka tubudda

³⁴ Bulat beri sia sara ka talagadda simagulai apa pá. Aipoí ka sia sibara polak elé lalep, sakiakérangan nia polak sambat lalepra nenda; lepá, abbitrangan nia bulagat sakit bibiletra nenda

³⁵ kaurangan nia ka tubudda tai apostel. Oto lepá parubeirangan nia bulagat néné tai apostel ka sangamberidda, siripot simagulai ka sia

³⁶ Kisedda leú te ka sia aigalai si Josep. Sakiakénangan polaknia, iageti abbitnangan bulagat sakit monenia néné, kaunangan nia ka tubudda tai apostel. Si Josep néné, iaté sara sapunuteteura tai Lepi sibara ka Siprus; oninia arakau tai

apostel iaté si Barnabas (katukolobatnia, si Pusuibi бага)

³⁷ (4:36)

5¹ Tápoi ai leú mitsá sara saukkui sipuoni si Annanias. Karuadda sinanalepnia sipuoni si Sapira, arasakiaké sangamata monenda

² Tápoi sangarubeiat sakit monenda nenda, arakoiriaké pakeietda saradda. Bagei geti aikauan ka tubudda tai apostel. Ai lé iaagai sinanalepnia sigalaiakenennia néné

³ Iageti kuanangan ka matania si Petrus, "Ale Annanias, anuobáaké koí itubbui bagam Sanitu, pat koí bokoínungan Ketsat Sipunenan, kalulut anukoiriaké kekeu sangarubeiat bulagat sakit monem nenda

⁴ Aipoí einangan tá nusasakiaké monem nenda ekeu lé sibakkatnia. Iageti beri leú et anusakiakéan monem nenda, ekeu leú et sibakkatnia. Tápoi angoi peilé ipututú-tú ka bagat paatuatnu nugalaiaké kelé nenda? Tá te sirimanua anubokoí, tápoi Taikamanua le!

⁵ Oto kelé aiarep nia si Annanias sikuat Petrus, belé nia ka polak, iageti langónangan leú et nia. Oto

malotórangan leú et sangamberidda sipasiaarep sibabara néné

⁶Lepá eirangan leú et sibautubu masitabut tubut Annanias, abbitrangan leú et nia ka gerat, rarateiaké nia

⁷Iageti, ai pá telu ngajam burúnia, gurú nia ka sia sinanalepnia. Tápei aiagai ka sia aponia sibabara simaruei néné

⁸Kuanangan ka matania si Petrus, "Kua peite ka matakku: Kipa, kisé leú nuntunia sakit polak sisakiakenenmui ruamui simanteunu?" Oto kuanangan nia sinanalep Annanias ka matat Petrus, "Oo kisedda tedda igit sakinia.

⁹Pelé nga-ngan Petrus ka tubut Sapira, "Angoi aipakeré bagamui karuamui simanteunu nusibo kam Ketsat Sipunenan? Arep'aké peite! Atoilingan te sia sieei masirateiaké simanteunu. Abbitrangan tebaí ekeu kekeu ka gerat.

¹⁰Niangan leú et nia belé nia ka polak ka sia sinanalep Annanias néné, iageti langónangan nia ka matat Petrus. Kelé aratugurú sibautubu, itsórangan nia ailangóan nia. Oto abbitrangan leú et nia ka sia ka gerat, ei sia rarateiaké nia ka betbet simanteunia

¹¹ Iageti malotórangan leú et sangamberidda simatonem бага samba sia sabagei sipasiaarep sibabara néné

¹² Kalulut pupasikelenanda tai apostel, bailiu maigi kisiet sambat pukerengan abara ka talagadda siberikabaga.

Iageti parurúrangan sangamberidda simatonem бага ka keret бага ka Laibokat Salomo ka Uman Taikamanua

¹³ Tápoi sia geti sabagei tá anai sia simaeme mei parurú ka tubudda simatonem бага. Kenanen kisé bulat makopé rahormati sia siberikabaga simatonem бага néné

¹⁴ Oto memei mabuburú, memei itutuppai igidda simatonem бага ka tubut Tuhan; iaté taimanteu sambat tainanalep

¹⁵ Pat ka tetret nenda, kaurangan simasakit ka pereman elé ka lapé, iageti kaurangan sia ka enungan, bulé iorak sia goisó ailiggou Petrus, ké isabau sia sedda

¹⁶ Oto bulat kununung lepá sia igidda sirimanua sibabara ka sangaliot laggai Jerusalem. Abbitrangan simabesi sambat sipinasaileu ketsat sikataí. Iageti aleakénangan sia sangamberidda

¹⁷ Kalepakatnia pugegeddangan leú et tai imam sabeu sambadda sipasiuluira, iaté saladdoura tai Saduki, kalulut sit-sit bagadda

¹⁸ Iageti labáranan sia tai apostel néné, kaurangan sia ka bagat penjaradda siberikabaga

¹⁹ Tápoi soibó, oi sara malaikat Tuhan masibuká matatbaliu penjara, belaakénangan sia tai apostel ka bagat penjara. Kuanangan ka matadda tai apostel

²⁰ "Kenan kam murió ka bagat Uman Taikamanua, nusegéaké kam pagalaiat puririmanua sibau néné.

²¹ Iageti reddetrangan leú et nia tai apostel sipinatonet malaikat néné. Oto maseggei peilé ei sia tai apostel ka Uman Taikamanua, pungantomanranan leú et sedda. Ka sia tai imam sabeu sambat sapaguguletda amei leú et sia ka sia, barakérangan rapat mahkama sambadda sautéra tai Jahudi. Lepá koiniakérangan sia raei masialá tai apostel ka bagat penjara, bulé raabbit sia ka matadda

²² Tápoi kelé arasegé ka penjara sapakoiniet néné, táan anai sia sedda

tai apostel. Iageti toilidangan leú et, masisegéaké ka matadda tai mahkama

²³ Pelé nganganda, "Segé mai lé ka penjara, itsómaian ai nia kakukuksingan matatbaliu penjara, sambat ka sia leú et sipasijajago penjara ai sia muririó ka matatbaliu. Tápoi kelé akubukáaké kai nia matatbaliu, beri sia sara akusese kai sikukuddu ka bagania.

²⁴ Oto kelé araarep nia tai perwira sipasijajago Uman Taikamanua sambat tai imam sabeu sinegéakenenda néné, bara ingon bagadda pagalaiat tubudda tai apostel néné, samba leú et mitsá bara lotóra masipaatu aponia sipuaaili ka gogoi sibabara

²⁵ Tápoi lepá oi nia sara simanteu sipasisesegéaké sibabara néné, pelé ngangania ka matadda, "Arep'aké peite kam! Sia siukum'akenenmui ka bagat penjara, ai sia mungangantoman kineneiget ka Uman Taikamanua!

²⁶ Iageti eirangan leú et tai perwiran Uman Taikamanua sambadda saaleinia, masialá mitsá tai apostel. Tápoi tá amugege sia ka tubudda tai apostel, kalulut lotóra ka tubudda sirimanua simigi; babara rababaijuk sia bukkú

²⁷ Oto abbitrangan sia tai apostel ka matadda tai mahkama. Iageti pareksanangan sia si imam sabeu

²⁸ Kuanangan ka matadda,
"Akukeraakéan kai kam simakopé,
bulé tá nungantoman'aké kam pagalaiat sirimanua nenda. Tápoi kineneiget itsó peite kam aponia anugalai kam! Anupararat lé kam ngantomanmui néné ka sangaliot Jerusalem, tápoi mitsá nusujuk-suk peilé kam kai, kai lé aibaraaké kamateiatnia sirimanua nenda.

²⁹ Iageti panibonangan leú et ka sia si Petrus sambadda saaleinia, pelé nga-nganda, "Buitá Taikamanua lé kurereddet kai, tá kurereddet kai nganganda sirimanua

³⁰ Aipoí ka sia Jesus sipattáakenenmui ka loiná siliktenga, aisuruakéan nia mitsá Taikamanuanda taikebbukatta

³¹ Sambat aikauan ka tubunia
Taikamanua galajet sambat gege sabeu, bailiu Uté sambat Sipaarau; bulé ibara tetre ka tai Israel rabauaké paatuatda, ituappéaké jodda

³² Oto kai té néné sipasimumuneng'aké sangamberinia néné; iaté kai sambat

Ketsat Sipunenan sipanguruat'akenen Taikamanua ka tubudda simareddet ka ngangania.

³³Tápoi kelé araarep nia tai Mahkama Puaranan sikuadda néné, bulat oriknangan bagadda ka tubudda tai apostel, iageti pakerénangan bagadda ramateiaké tai apostel

³⁴Tápoi ka talagadda tai mahkama néné, ai sara tai Parise sipuoni si Gamaliel. Nia néné, iaté sara guru paamian bulat hormatietda sangamberi sirimanua. Puriónangan leú et, kuanangan ka matadda bulé rabelaaké sia boikí ka tulaoibó tai apostel néné

³⁵Oto kuanangan ka matatda tai Mahkama Puaranan, "Ale kam sasaraina tai Israel! Bulat paatu kam sipulelelek aponia galaiakenenmui ka tubudda tai néné

³⁶Aipoí siburú ai amuaili ka tubut Teudas, sikua tubuna sirimanua siabeu tiboí tubu, pat elé aiaili epat ngotu sia sipasitutut nia. Tápoi aramateiaké lé nia, iageti pasabunungan leú et sia ka sia sipasitutut nia, samba mungkuatda leú et tatá

³⁷ Lepá mitsá ka tetret aimusesensus, ottou mitsá ka sia si Judas, tai Galilea. Kalulut alat bagadda ka tubunia, bailiu maigiddangan sipasitutut nia. Tápoi beri nia ka sia leú et aramateiaké leú et nia. Iageti pasabunangan leú et sia ka sia sipasitutut nia

³⁸ Oto kineneiget kalulut sibabara néné ka matatta, nganturatku, néné lé: buí nugalai kam apa pa ka tubudda néné, bá puuukú kam sia. Aipoí ké bai ka sirimanua aibara ngantoman samba parurukatda néné, tá isoppi itatá ngantomanda sambat parurukatda néné

³⁹ Tápoi ké baí ka Taikamanua lé kabariai nia, bulat tá momoi nukalaaké kam sia. Elé momoi takua Taikamanua lé anusaggangi kam, galainia." Iageti reddetdangan nganturatnia si Gamaliel tai mahkama

⁴⁰ Oto sogairangan sia tai apostel, palisojiddangan leú et sia, lepá keraakérangan buían rangantoman'aké pagalaiat Jesus. Iapeité belaakérangan sia

⁴¹ Oto kaddiuakérangan Mahkama Puaranan tai apostel ka angkat бага,

kalulut pateteúna sia Taikamanua
masiorik paloloiat kalulut Jesus

⁴² Bailiu senen gogoian lé raei
ka Uman Taikamanua sambat ka
lalepra sirimanua; samba riu-riu lé
rapungantoman sambat rasegéaké
Katuareman Simaerú pagalaiat tubut
Jesus, masikua, nia té néné Rimata
Sipaarau sitonéakenen Taikamanua.

6 ¹ Memei mabuburú, memei itutuppai
igidda sipasiului Jesus. Ka tetret
nenda aian tá maaangká bagadda
tai Jahudi sipunga-ngangan Junani,
ka tubudda bulat tubut sipuoni tai
Jahudi. Oto pelé nga-nganda tai Jahudi
sipunga-ngangan Junani, "Tá aiaaili sia
ka sia tainanalep tailumang ka talagamai
kakai, paroman rubeiat pakeietda senen
gogoi, siripot parubeiet ka sirimanua.

² Oto kalulut néné, rurúakérangan
sia sangamberidda sipasiului,
kuaddangan ka matadda, "Táan lé
maeerú kukaddiuaké kai galajet
masingantoman'aké tiboiet Taikamanua,
kalulut kupasikeli kai siorak ka komen

³ Maerú peilé nupiliy kam ka talagamui
pitu sia simaerú katuareman tubu
sambat sisop-sop katubu Ketsat

Sipunenan, samba leú et simasiku paatuat, kaunenmai masipasikeli galajet néné

⁴Aipoí galajetmai ka kai, sarat maniddou lé kugagalai kai sambat masipaarep katuareman simaerú sibara ka Taikamanua.

⁵Oto pasesenangan ka bagadda ka sia ka sikuadda tai apostel. Iageti piliyangan si Sitepanus, sara simakopé ron tonem бага ka tubut Jesus, sambat sisop-sop katubu Ketsat Sipunenan. Sambat sia sipiliy sabagei, iaté: si Pilipus, si Prokorus, si Nikanor, si Timon, si Parmenas, sambat si Nikolaus sibabara ka Antiokia. Nia ka sia néné tá tai Jahudi, tápoi atugurúan nia ka aratda tai Jahudi

⁶Kapitudda néné te arasegéaké ka tubudda tai apostel, iageti paniddourangan tai apostel ratiddou, bulé ipanukani sia Taikamanua

⁷Oto memei marararat katuareman simaerú sibara ka Taikamanua; beri leú et sipasiului Jesus ka Jerusalem, memei itutuppai leú et igidda. Beri leú ka sia tai imam, maigi leú et sia amatonem бага ka tubut Jesus

⁸ Bulat makopé aipanukani nia ka sia si Sitepanus, Taikamanua, pat galainangan maigi kerek samba kiseiet sabeu ka talagatda siberikabaga

⁹ Tápoi kenanen kisedda, maigi leú et sia sipasisasaggangi nia; tápoi sipasisasaggangi nia geti, iaté saladdou uman parurukat, kelé oniakenen Uma Paniddogatda Sirimanua Sipuuuja. Sia saladdou uman parurukat néné, iaté tai Jahudi sibabara ka laggai Kirene sambat sibabara ka Aleksandria. Oto sambadda te tai Jahudi sibabara ka Kilikia sambat sibabara ka Asia apaukle ka tubut Sitepanus

¹⁰ Tápoi bulat beri oi nia ratátáaké sikuat Sitepanus, ai lé poí ikakau ka tubunia Ketsat Sipunenan pusisikut paatuat, bulé iagai tiboakenennia

¹¹ Oto upajiddangan piga pá sipasikukua, "Akuarep kai ipaloloi si Mose sambat Taikamanua!

¹² Kisedda te ragagalai masipatubbuji bagadda sirimanua, samba sautéra tai Jahudi, samba leú et tai guru paamian. Iageti eirangan leú et masilabá si Sitepanus, abbitrangan nia ka Mahkama Puaranan

¹³ Iageti abbitrangan sia sipasimumunengáke boko pagalaiat si Sitepanus. Pelé nganganda sipasimumuneng'aké boko, "Ka sia sirimanua néné, mariu-riu lé ipaloloi Uman Taikamanua sipunenan, samba leú et masipaloloi surukat Taikamanua sinegéakenen Mose

¹⁴ Bulat tubumaian amasiarep aikua, raragat'akéna Uman Taikamanua néné, Jesus tai Natsaret, lepá siliynangan sangamberinia arat siaket Mose ka tubutta!

¹⁵ Oto kinereddangan nia sangamberidda siparururú ka purappananda tai Mahkama Puaranan. Tápoi ka tetret nenda ituitsó matania si Sitepanus bulat kéan lé matadda samalaika.

7 ¹ Iageti nou-nounangan nia imam sabeu si Sitepanus, pelé ngangania, "Kipa bulat sibulatnia leú sangamberi sikuania ka sia nenda?

² Oto aleginangan nia ka sia si Sitepanus, pelé ngangania, "Ale kam Sasaraina samba kam Saukkuimai! Arep'aké peite kam sikuakku néné! Ainangan tá mujajau-jau

nia taikebbukatta si Abraham ka
laggai Haran, ka tetret nenda ai
peilé nia mukukuddu ka laggai
Mesopotamia, einangan leú et
Taikamanua sipulubeunan itaget'aké nia
³kuanangan ka matania, 'Kaddiuaké
laggainu sambat sasarainam. Kenan
nuailiaké laggai saú-sauketku ka tubum.

⁴Iageti kaddiuakénangan laggai
Kasdim si Abraham, ei nia mujaujau
ka laggai Haran. Oto kelé ailangó
ukkuinia si Abraham, jaujauakénangan
nia Taikamanua si Abraham ka laggai
néné, iaté ka kudduatmui sasarainamai
sambat saukkuimai kineneiget

⁵Bulat ka tetret nenda, beri
sangarubeiat laggai néné, tá anai
aikau Taikamanua ka tubut Abraham
sibailiu ikep'akenennia; bulat beri
sangatakep tá aikau Taikamanua ka
tubunia. Tápoi kenanen kisé, aipatonéan
Taikamanua kakauna nia ka tubut
Abraham sibailiu ikep'akenennia
sambatda sapunuteteunia. Ka tetret
nenda, tápei anai tatogania si Abraham

⁶Tápoi néné te aikua Taikamanua
ka matat Abraham, 'Muisitoi te sia
sapunuteteunu ka laggaira sirimanua.

Rapupapagugulet'aké te sia ka laggai nenda, samba ragagalai te ka tubudda sikataí, rapaoreji sia ka bagat epat ngotu ngarura burúnia

⁷Tápoi kuuukum'aké leú te sia ka sia bangsa sipupapagugulet'aké sia, iageti bela sia ka kupkumen laggai nenda, paniddogiddangan aku ka kudduat nenda.

⁸Oto lepá aikua néné, kaunangan apprat palelengan ka tubudda Taikamanua, iaté ka enung pususunat. Kelé aiaili balu ngagogoi burúnia aiputútú matat Isak, iaté togat Abraham, sunatnangan nia si Abraham. Lepá sunatnangan leú et ka sia toganian si Isak, iaté si Jakob. Ka sia leú et si Jakob pasunatinangan sia tatogania sipulurua, iaté sibailiu sapunuteteura sabangsa Jahudi

⁹Sia sapunuteteuta siburú amatutu bagadda ka tubut Josep, pat sakiakérangan nia, bulé ibailiu nia pagugulet ka laggai Misir. Tápoi ai lé ipaaalei nia Taikamanua

¹⁰samba belaakénangan leú et nia, ka sangamberi pugejaat bagania. Kaunangan ka tubunia Taikamanua,

erut бага sambat pusisikut paatuat ka
tetret aiei ka matat Parao, rimatadda tai
Misir, pat bailiukénangan nia si Parao
mugubernur ka laggai Misir sambat
sipasikukup-kup'aké istanat Parao

¹¹Tápoi lepá bara pulajeat sabeu ka
sangaliot laggai Misir sambat ka Kanaan,
pat pangorikrangan simakopé. Tá anai
rasesese kan ka sia sapunuteteuta

¹²Oto kelé aiarep nia si Jakob,
kababarania gandum ka laggai Misir,
koiniakénangan leú et tatogania,
taikebbukatta néné, raei sedda, iaté né
panandaatnia araei

¹³Tápoi teret araeian lé sikaruania,
iapeité poiliatnangan tubunia ka
Sasarainania, ikua pu-Jo Josep nia. Oto
ka tetret nenda leú et againangan sia ka
sia rimatadda tai Misir, saepput Josep
néné

¹⁴Lepá kaunangan si Josep
pangasegekat ka tubut ukkuinia si
Jakob, masitiddou bulé rapujau-jau
sangamberidda saeppunia ka laggai
Misir. Oto ai pitu ngapulu lima sia igidda

¹⁵Oto pujau-jaunangan leú et si Jakob
ka laggai Misir, bailiu seddangan lé
ailangó nia sambadda taikebbukatta

¹⁶Tápoi tubudda simamatei geti raabbit
lé ka laggai Sikem, rarateiaké sia ka ratei
sinakit Abraham, sinakinia simakopé
kepput saki sibara ka sukutda sabangsa
Hemor ka Sikem

¹⁷Kelé aimalegre tetrenia ipuaili siripot
sitonéakenennia Taikamanua ka tubut
Abraham, amaingingan sia sabangsatta
ka laggai Misir

¹⁸Kalepakatnia purimatatdangan
sabagei sitaiagai si Josep ka laggai Misir

¹⁹Tápoi ka sia rimata néné aipajo
lé sia sabangsatta, samba aipaorei
lé sia taikebbukatta. Kuanangan bulé
raribbaiaké tatoga sipututútú mata
sibau, rapulaje, ramatei

²⁰Oto ka tetret nenda te, aiputútú
matania ka sia si Mose; bulat toga
simakopé laingen tubu lé nia. Telu
ngalaggó burúnia arapasikeli nia ka
lalepra

²¹Tápoi kelé araribbaiaké nia,
alánangan nia togat Parao siokkó,
uraunangan nia, bailiu kelé bulat bakkat
toganangan lé ikakau nia

²²Iageti gelaiakérangan nia sangamberi
pusoppinanda tai bangsa Misir, samba

bulat simakopé gege lé nia, ka paninibo
samba ka pasigagalaiaké

²³ Kelé aiaili epat ngapulu ngarura
beunannia, si Mose, tutunangan bagania
masibalou sabangsanian tai Israel

²⁴ Iageti itsónangan sara ka talagadda
aipaoorei nia sara tai Misir, oto
ei nia masirop'aké sipaorei néné,
mateiakénangan leú si Misirna

²⁵ Ka baganangan lé te ka sia si
Mose, aian raaagai kolou nia ka sia
sabangsanian, papakeina nia Taikamanua,
masibelaaké sabangsanian. Tápoi
bulatnia, tá airaagai kolounia

²⁶ Matsepnian mitsá, itsónangan
sia rua tai Israel sipalalabá, iageti
besiakénangan iaban'aké sia karuadda.
Oto kuanangan ka matadda, 'Ale, kam
néné sipusasarainan lé kam. Palalabá
koddan kam?

²⁷ Iageti tukklukénangan si Mose
ka sia sipasibobóbó aleinian néné, lepá
kuanangan ka matania, 'Kasonian aikau
ekeu sipasiuutéaké, élé sipasihahakimi
kai

²⁸ Taleú, ai leú et nugegelai numateiaké
aku kaku, kelé anumateiaké tai Misir,
sokat?

²⁹ Oto kelé aiarepnia si Mose sikuania néné, tui-tuinangan leú et si Mose ka Misir, ei nia mukuddu ka Midian. Sedda bara tatogania rua

³⁰ Epat ngapulu ngarura burúnia, lotsit sara malaika kai Mose ka simatangeu ka Leleú Sinai. Ka api puo sipuju-juluu lé aipatoilá tubunia malaika ka tubut Mose

³¹ Bulat kisei lé ka bagania si Mose masiitsó sibabara néné, pat legreakénangan tubunia, ibesíaké iagai nia. Iageti arepnangan nga-ngan Tuhan sipasikukua ka matania

³² 'Aku te Taikamanuanda taikebbukatmui; aku té né Taikamanuan Abraham, Taikamanuan Isak, samba Taikamanuan Jakob.' Oto katenan lé geret tubunia si Mose kopet kataí lotónia, pat taimarónangan bagania masikinere puo nenda

³³ Lepá kuanangan nia mitsá si Tuhan ka matat Mose, 'Rugut tarangaínu, aipoi polak sipunenan lé puriokatnu néné

³⁴ Bulat akuitsóan samba akuigbuk'an kopet pongitnia pangoringanda taikaumangku ka laggai Misir. Akuarep'an katsidda, kalulut néné gorosot aku masibelaaké sia. Oto

kineneiget konan! Kukoiniaké ekeu bulé nutoili mitsá ka laggai Misir.

³⁵ Oto si Mose néné te tá araakui sambat tá arasiló sabangsa Israel, arakua lé ka tubunia, 'Kasonia amasirióaké ekeu siutéaké kai, élé sipasihahakimi kai?' Tápoi nia té néné sikoiniakenen Taikamanua sibailiu siutéaké samba sibelaaké sia, kaparoman malaika siooi ka tubunia ka puo simalalabó

³⁶ Si Mose néné te amasiutéaké bangsa Israel arabela ka laggai Misir, sambat aigalai pukerengan samba kiseiet sabeu ka laggai Misir, ka Koat Simabonan samba ka simatangeu ka bagat epat ngapulu ngarura burúnia

³⁷ Nia leú te sipuoni si Mose sipasikukua ka matadda sabangsa Israel, 'Ikokoiniaké te ka kam sara nabi sipiliynia ka talagamui leú et, kelé aipiliy aku kaku.

³⁸ Si Mose néné te amukuddu ka talagadda sabangsa Israel ka simatangeu, bailiu sipatalaga ka tubut malaika sipaninibo ka Leleú Sinai sambat taikebbukatta. Nia té néné amasisiló katuareman sipuririmanua sibailiu segéakenen ka talagatta

³⁹Tápoi kenanen kisé, bulat beri tonem bagadda ka tubunia. Tá araobá nia, tápoi aragelai lé toili mitsá ka laggai Misir

⁴⁰Arakua lé ka matat Aron, 'Galai bulungan ka kai, bulé iutéaké kai. Aipoí táan akuagai kai apa sibabara ka tubut Mose sipasibebelaaké kai ka laggai Misir!

⁴¹Oto ka tetret nenda, galairangan tularat togat jauí, lepá buluakérangan pasibuluatda ka tubut tularat bulungan, iageti taddaakérangan mupunen, masibuluji bibilet sibaraakenen kabeira leú et

⁴²Oto kalulut néné kaddiuakénangan sia Taikamanua sambat oreakénangan leú et sia rapaniddogi panyanyat ka manua. Bulé ipuaili lé kelé ka siniboi suratda tai nabi, sipasikukua, 'Ale kam tai Israel! Tá kaku nujajá-já elé nububuluaké kam tarimeumui ka bagat epat ngapulu ngarura burúnia ka simatangeu

⁴³Sapou buluat Molok lé nupaaabbít kam sambat tularat tarimeu bulunganmui, iaté bulungan Repan tularat nenda te anugalai kam paniddogietmui. Oto kalulut nenda te,

akuribbaiaké kam, pat aili ka silá ka laggai Babel.

⁴⁴ Kema kudduat kaoijanan Taikamanua ka tubudda sirimanua, ai ka tubudda taiebbukatta ka simatangeu. Aitugalai kema néné siripot ka sikuat Taikamanua ka tubut Mose, samba siripot tubut kema sipatoilánia ka tubut Mose

⁴⁵ Lepá abbitdangan nia taiebbukatta kema néné ka tetret araei taiebbukatta sambatda tai Josua masioppu laggaita néné ka tai bangsa-bangsa sipasikukup-kup'aké, iaté siusiakenen Taikamanua airaiitsó. Oto kuddu nia sedda kema néné, pat aili ka tetret Dapid

⁴⁶ Ka sia si Dapid amaangká bagat Taikamanua ka tubunia, oto tiddounangan ka tubunia, bulé iobáaké igalai uman Taikamanua paniddogiet Jakob

⁴⁷ Tápoi si Salomo lé amasirióaké uman Taikamanua

⁴⁸ Kenanen kisedda, tá amukuddu nia Taikamanua sipulubeunan néné, ka bagat uma sigalai kabeira sirimanua; aipoí ka suratda tai nabi ai atusurat'aké, aikua si Tuhan

⁴⁹ 'Manua uddenan purimataatku, samba polak kalak rerekku. Aponia nenda lalep, nuririóaké kam kaku? Kaipa kudduat pasiariatku tubukku

⁵⁰ Aikua Taikamanua, tá poi bulat tubukku néné, amasibaraaké sangamberinia?

⁵¹ Bulat apangan té kopet kelat paatuatmui, bulat besí lé katubumui masireddet nga-ngan Taikamanua! Bulat simatakkep piú lé kam ka tiboiet Taikamanua! Bulat kelé taikebbukatmui leú tedda kam néné, sarat masisaggangi Ketsat Sipunenan nugagalai kam

⁵² Kipa ai poi sia siagaimui tai nabi taipaoorejietda taikebbukatmui? Pamateirangan leú et sia sapakoiniet Taikamanua siburú, sipasisesegéaké kaooi nia Pagugulet Taikamanua simaroipo бага. Oto kineneiget anupajongan kam nia samba anumateiakéan kam nia Pagugulet Taikamanua néné

⁵³ Arasegéakéan tai malaika ka tubumui surukat Taikamanua, tápoi bulat beri reddetmui nia!

⁵⁴ Oto kelé araarep nia tai Mahkama Puaranan sangamberi sikuat Sitepanus,

oriknangan bagadda samba golúnangan
bagadda ka tubunia

⁵⁵Tápoi ka sia geti si Sitepanus
sisop-sop katubu Ketsat Sipunenan,
aiteila lé manua. Iageti itsónangan
pulatsanan Taikamanua, samba Jesus ai
nia muririó ka kudduat pulatsanannia kai
kattoet Taikamanua

⁵⁶Iageti kuanangan nia si Sitepanus,
"Itsó peite kam, akuitsó aitubuká
manua, samba ka sia Togat Manusia ai
nia muririó kai kattoet Taikamanua!

⁵⁷Oto pet-petrangan talinganda
saladdou Mahkama Puaranan, samba
pugereirangan leú et; iageti keré,
riurigitdangan nia si Sitepanus, ralabá
nia

⁵⁸Pagiritdangan nia ka tei-tei irip
laggai, lepá pabaijungindangan nia
bukú. Oto ka sia sipasiiigbuk sibabara
néné, galakrangan leppeira ka tubut sara
silainge iaté sipuoni si Saulus

⁵⁹Oto airapababaijungi nia bukku
si Sitepanus, pusoganangan leú et si
Sitepanus, pelé ngangania, "Ale Tuhan
Jesus, siló ketsatku!

⁶⁰Iageti purekkuknangan leú et,
lepá pugereinangan masikua, "Ale

Tuhan, buí nulumun'aké jodda néné!"
Lepána lé aikua kelé néné si Sitepanus,
langónangan leú et nia.

8¹ Beri leú et ka sia si Saulus, bulat
mangká bagania aitumateiaké si
Sitepanus. Iageti gogoi nia nenda leú
et, pakukurujiddangan sia sapaamian ka
Jerusalem. Oto bailiu pasabunangan leú
et sia sangamberidda simatonem бага
ka sangaliot Judea sambat Samaria,
legeira lé tai apostel

² Iageti eirangan leú et simasurú ka arat
masirateiaké tubut Sitepanus simamatei
sambat masisoibi nia bulat ka reu-reu
bagadda simakopé

³ Tápoi ka sia geti si Saulus, riu-riunia
lé ibesíaké ipakataí paamian. Einangan
leú et masisenei lalep, pagiritnangan
sia simatonem бага ka gerat, lepá
gurúakénangan leú et sia ka bagat
penjara

⁴ Tápoi ka sia geti sapaamian simatonem
baga sipusasabu pakakraddangan leú et
Katuareman Simaerú ka senen kudduat

⁵ Beri leú et ka sia si Pilippus, amei nia
ka laggai Samaria. Iageti paarepnangan
leú ka tubudda sedda pagalaiat

tubut Rimata Sipaarau, sitonéakenen
Taikamanua

⁶Oto kelé araarep ipanibo samba
araitso aigalai kerek simigi si Pilipus,
maigiddangan silelek'aké sikuat Pilipus
néné

⁷Aipoí maigi sia sibara katubu ketsat
sikataí, aiusiaké ka tubudda si Pilipus.
Bulat ai sia bebela, ai sia mugegerei.
Samba maigi leú et sia simasakit samba
simajegeu menung aialeaké

⁸Oto bailiu maangkánangan bagadda
simakopé tai Samaria

⁹Ka laggai nenda, ai sara sipuoni si
Simon, bulat amaujungan aibaraaké
kakiseiat ka bagadda tai Samaria kalulut
againia musihir. Aikua tubunia, bulat nia
lé siabeu tiboi tubu

¹⁰Oto bailiu alánangan bagadda
sangamberi sirimanua ka sangaliot
laggai Samaria. Arakua, "Nia néné, iaté
sara puroron Taikamanua, kuanenda
kelé, 'Puroron Sabeu'.

¹¹Bulat amaburúan arakisei nia
sirimanua, kalulut ron sihirnia, pat bulat
alánangan bagadda ka tubunia

¹²Tápoi ka sia geti si Pilipus, pagalaiat
Purimataat Taikamanua samba pagalaiat

tubut Jesus Kristus Rimata Sipaarau
lé aisegeáké ka matadda. Iageti
matonemnangan bagadda ka ngantoman
Pilipus, lepá raúnangan leú et sia. Iaté
taimanteu sambat tainanalep

¹³ Bailiu beri leú ka sia si Simon,
amatonem leú et bagania ka sia. Oto
lepá aituraú, tutnangan si Pilipus. Bulat
kisei lé ka bagania si Simon masiitsó
kerek

¹⁴ Iageti kelé araarep nia tai apostel ka
Jerusalem sisilóra tiboiet Taikamanua
tai Samaria, koiniakérangan si Petrus
sambat si Johannes sedda

¹⁵ Oto kelé arasegé tai Petrus sambat
tai Johannes sedda, paniddourangan leú
et ratiddouaké tai Samaria, bulé isop-sop
ka tubudda Ketsat Sipunenan

¹⁶ aipoí beri pei sia sara ka talagadda
sisop-sop katubu Ketsat Sipunenan;
sarat ka onin Tuhan Jesus peilé araturaú
néné

¹⁷ Iageti tonem'akérangan kabeira tai
Petrus sambat tai Johannes ka utéra tai
Samaria; oto silóranan leú et Ketsat
Sipunenan

¹⁸ Kelé aiitsó nia si Simon, kalulut
totonem'akéra kabeira tai apostel ka

utéra lé, itukakau Ketsat Sipunenan ka tubudda, abbitnangan bulagat si Simon ikau nia kai Petrus sambat kai Johannes

¹⁹Iageti kuanangan ka matadda, "Aké pei kam kaku gege kelé nenda leú et, bulé kasei katubu kutonem'aké kabeiku, silórgan Ketsat Sipunenan.

²⁰Tápoi kuana lé ka matania si Petrus, "Mateinungan te sambat bulagatnu! Bulat ka bagam lé te momoi itusaki nia bulagat panguruat Taikamanua néné, ele

²¹Bulat tá anai haknu nutut'aké kai ka galajetmai, aipoí tá maroipo paatuatnu ka tubut Taikamanua

²²Oto kau nugalak'aké nia sipinaatum sikataí néné; tiddou lé ka tubut Taikamanua, bulé iappéaké ekeu ka sipinaatum sikataí néné

²³Ai lé poí kuaagai kasusutnia pusisit-sit бага ka bagat paatuatnu sambat pupapagugulet'akéna ekeu pukakataí.

²⁴Iageti kuanangan ka matat Petrus sambat ka matat Johannes si Simon, pelé ngangania, "Kau lé nutiddouaké kam aku kai Tuhan, bulé tá ikerek aku beri sara ka sangamberinia sikuamui néné.

²⁵ Oto lepana lé arapasimuneng'aké samba arapaarep tiboiet Tuhan, toili sia tai Johannes sambat tai Petrus ka Jerusalem. Samba ka puenunganan leú et, paareprangan Katuareman Simaerú ka tubudda piga ngalaggaiat pá ka Samaria

²⁶ Iageti kuanangan ka matat Pilipus, malaikat Tuhan, "Olaaké nuei! Kenan ka saigit kayaman ka enungan sitabbraaké laggai Jerusalem ka Gasa." Simatangeu lé enungan nenda

²⁷ Iageti einangan leú et si Pilipus. Oto ka tetret nenda, ai nia totoili ka laggainia ka sia sara pegawai istanat Etiopia. Amei nia ka Jerusalem maniddou ka tubut Taikamanua. Kineneiget ai nia mukekereta itoili ka laggainia. Ai nia mukukuddu ka bagat keretania, aibabatsa Bukot Nabi Jesayas

²⁸ (8:27)

²⁹ Iageti kuanangan ka matat Pilipus, Ketsat Sipunenan, "Kenan nulegreaké tubum ka tubut kereta nenda.

³⁰ Oto legreakénangan leú et tubunia si Pilipus ka kereta, arepnangan leú ibatsa Bukot Nabi Jesayas, si Etiopiana. Iageti nou-nounangan nia si Pilipus, "Kipa, ai

leú nuaagai katukolobatnia sibatsam néné?

³¹ Iageti aleginangan nia, "Kaipa poi kuaagai kolounia, ké tá anai sia sipasikokolouaké ka tubukku?" Iageti ná-nánangan leú et si Pilipus, bulé itusakai ka bagat kereta, bulé ipuuddet ka bé-bénia

³² Oto ruang ngantoman sibatsania, iaté, "Kelé biri-biri ka pasijá-jakat lé nia, kelé togat biri-biri, tá ibubuká ngangania ké tusapu bulunia, kisedda leú te ka sia, bulat beri sangatakó tá aikua kuanennia

³³ Arapaloloi nia samba arapajo nia. Araalá lé engania ka polak néné pat beri sia sara siagai masinunuaké pagalaiat turunan tubunia.

³⁴ Iageti kuanangan nia ka matat Pilipus, pegawai simabuak tiboï tubu ka Etiopia néné, "Kua peite ka matakku, kasonia isasaú-saú nabi néné? Bulat tubunia leú pá ititiboï, elé sabagei lé?

³⁵ Oto taddaakénangan nia si Pilipus masitiboï; pakeinangan ruang-ruang nenda, pasitadda nia isegéaké Katuareman Simaerú pagalaiat tubut Jesus ka tubut pegawai simabuak tiboï tubu néné

³⁶ Ka tangan puenunganda, segé sia ka sara kudduat sibara oinan. Oto kuanangan si pegawai néné ka matat Pilipus, "Aikodda oinan! Aponiangan lé simagulai, bulé ioi nuraú aku?"

³⁷ [Iageti kuanangan nia si Pilipus ka matania, "Ké bulat sibulatnia baí tonem bagam néné, oi turaú ekeu." Kuana lé nia ka sia pegawai simabeunan tiboí tubu sibara ka Etiopia, "Matonem bagakku, Jesus Kristus néné, iaté Togat Taikamanua."

³⁸ Oto kuanangan nia bulé ipuari keretania, lepá gorosot sia ruadda ka bagat oinan, iageti raúnangan nia si Pilipus

³⁹ Kelé aratusakai baradda ka oinan, alánangan nia Ketsat Sipunenan sedda si Pilipus. Oto taitsonangan si Pilipus ka si pegawai simabuak tiboí tubu néné. Iageti riu-riuakénangan puenunganannia ka sia si pegawai simabuak tiboí tubu néné, ka angkat бага

⁴⁰ Againa lé nia si Pilipus, aian nia ka Asdod. Kelé airiu-riuaké puenunganannia si Pilipus, paarepnangan leú et Katuareman Simaerú pagalaiat tubut

Jesus ka sangamberi laggai, pat toili nia mitsá ka Kesarea.

9¹ Oto ka sia si Saulus riu-riu lé igelai ipalotoki sambat ipamatei sipasiului Jesus. Iageti ei nia ka tubudda tai imam sabeu

² tiddounangan leú et surat pugegenia, iei ka siutéaké uman paniddogat ka laggai Damsik, bulé ké iaili sia sedda simatonem бага ka tubut Jesus, momoian ilabá sia, iageti abbitnangan sia ka Jerusalem

³ Tápoi talagat airaaailiaké ka laggai Damsik, kei raaili kota, tulut bara toro sibara ka manua itoroji sangaliot tubut Saulus

⁴ Iageti belé nia ka polak, lepá arepnangan sara nga-nga sipasikukua ka matania, "Saulus, Saulus! Angoi nupaoorei aku?

⁵ Oto kuanangan nia ka sia si Saulus, "Kasonia ekeu, Tuan?" Pelé nga-ngan sipaninibo ka tubunia, "Aku té néné Jesus sipaoreinu

⁶ Kineneiget suruaké ekeu, nuei ka kota. Seddangan lé geti kua ka matam, aponia galaiakenennu.

⁷ Ka sia sipasitutum Saulus leú, atugégé leú et sia ka sia, pat taioinangan rapanibo; kalulut sarat nga-nga lé araarep, tápoi tubu geti beri sara tá araitsó

⁸ Iageti puriónangan si Saulus, mataakénangan matania, tápoi táan momoi mitsá iitsó apa pá. Oto omet'akérangan kabeinia, rapalulunia, raei ka laggai Damsik

⁹ Telu ngangagogoi burúnia tá aimakoinong matania. Oto ia leú te burúnia tá aipukom samba tá aipuló, beri goisó

¹⁰ Ka laggai Damsik, ai sara sipasiului Tuhan Jesus, sipuoni si Annanias. Oto ka siitsot matania, ai aikua si Tuhan ka matania, "Ale Annanias!" Iageti aletinangan nia si Annanias, "Aikoí aku Tuhan.

¹¹ Oto kuanangan nia mitsá si Tuhan ka matania, "Olaaké nuei kineneiget, ka lalep Judas ka Enungan Simaroipo. Reréakénungan sipuoni si Saulus sibara ka laggai Tarsus. Ai nia maniniddou kineneiget

¹² samba ka siitsot matania leú ka sia si Saulus, aiaailiaké nia sara

simanteu, sipuoni si Annanias, iageti tonem'akénangan kabeinia ka utét Paulus, bulé imakoinong mitsá matania.

¹³ Kuana lé nia si Annanias, "Tuhan, akuarep maigi sia sitiboi pagalaiat tubunia sirimanua nenda, iaté pagalaiat ipaorei sapaamiannu ka Jerusalem

¹⁴ Oto kineneiget aian nia sené, ka siteúakenenda tai imam sabeu, bulé ipalabaki sia sangamberi simatonem бага ka tubum.

¹⁵ Tápoi aikua lé si Tuhan ka matania, "Kenan'an lé! Aipoí akupiliyan nia masipuukú galajetku, bulé ipakakra pagalaiat tubukku ka tubudda sabangsa bagei, taú sipuaarat arat Jahudi, sambat ka tubudda tai rimata samba ka tubudda tai Israel leú et

¹⁶ Ai leú kukua ka matania, sangamberinia pangoringan bairanennia, kalulut aku.

¹⁷ Iageti einangan leú et si Annanias ka lalep kudduat Saulus, tonem'akénangan kabeinia ka tubut Saulus. Kuanangan ka matania, "Ale Saraina Saulus, Tuhan Jesus nenda siitsónu ka tengenungan ai ekeu momoi sené te, amasikoiniaké aku kuoi masibalou

ekeu, bulé imakoinong mitsá matam, samba bulé isop-sop ka tubum Ketsat Sipunenan.

¹⁸Oto niangan leú et nia, bela-aibela nenda kelé susrut iba ka matat Saulus, makoinongnangan leú et mitsá matania. Iageti tusurunangan si Saulus, lepá raúnangan nia si Annanias

¹⁹Lepá aipukom si Saulus, ron mitsá tubunia. Iageti kuddu nia si Saulus ka laggai Damsik piga ngagogoi pá burúnia sambadda sipasiului Jesus

²⁰Oto ei nia ka uma paniddogat, taddaakénangan mungantoman masikua, Jesus iaté Togat Taikamanua

²¹Bulat kisei lé ka bagadda raarep pagalaiat tubut Saulus. Arakua, "Tá poi nia néné sikukuddu ka Jerusalem, sipasimamateiaké sangamberi simatonem бага ka tubut Jesus? Kaooi nia sené iaté masilabá samba masitaroaké sia ka tubudda tai imam sabeu!

²²Tápoi memei lé maaalá bagadda ka tubut Saulus. Sangamberi sikuania pagalaiat tubut Jesus, bulat paorak ka bagadda, masikua Jesus néné iaté Rimata Sipaarau, bulat pat taioinangan

rasiddot tiboietnia, sangamberidda tai Damsik

²³Tápoi kelé aitukapplu piga ngagogoi pá burúnia, pakerénangan bagadda tai Jahudi ramateiaké nia si Saulus

²⁴Tápoi aiagai lé tataikodda nia. Oto taikoddangan nia sinágó samba sinoibó ka matatbaliu laggai, bulé ramateiaké nia

²⁵Tápoi ka sara soibo, alárangan nia sipasiuluinia si Saulus, gorosot'akérangan nia ka bagat karagjang ka gelit laggai

²⁶Iageti einangan leú et si Saulus ka laggai Jerusalem. Oto besíakénangan nia sedda iloplop'aké tubunia ka sipasiului Jesus sabagei. Tápoi bulat malotó sia ka tubunia, aipoí tápei matonem bagadda, bulat babailiuna nia ka sia néné sipasiului Jesus

²⁷Lepá einangan leú et si Barnabas iailiaké nia, abbitnangan nia ka tubuda tai apostel. Oto pungu-nguan'akénangan ka tubudda si Barnabas pagalaiat iitsóna Jesus si Saulus ka tangan enungan, samba patitiboakéna nia si Tuhan. Samba tiboinangan leú et mitsá gegenia

mungantoman si Saulus ka laggai
Damsik, ka onin Jesus

²⁸Oto kuddu nia sambadda, si Saulus,
samba tá malotó nia mungantoman ka
sangaliot Jerusalem, ka onin Jesus

²⁹Pungantomannangan sambat
pauklenangan leú et ka tubudda tai
Jahudi sipunganga-ngan Junani, tápoi
beri leú et ka sia araisiaké leú et
ramateiaké nia

³⁰Oto kelé araagai nia simatonem
baga sabagei pagalaiat isiatda néné,
abbitrangan si Saulus ka Kesarea, lepá
geti mitsá abbitrangan nia ka laggai
Tarsus

³¹Iapeí tatá pulamagat ka laggai
Judea, Galilea sambat ka laggai
Samaria. Samba kalulut paroman Ketsat
Sipunenan, sambat ka lotó ka tubut
Tuhan, tuppainangan leú et puroron
sambat igidda, sapaamian

³²Iageti einangan leú et ka sia si Petrus
ka senen kudduat masibalou sapaamian.
Oto ka sara gogoi, balounangan saladdou
paamian ka Lidda

³³Sedda paailiddangan sara sipuoni si
Eneas, simasakit; aiailingan balu ngarura

burúnia, bulat beri pasuruna tubunia ka peremannia

³⁴Oto kuanangan ka matat Eneas si Petrus, "Ale Eneas, bulé ialeaké ekeu Jesus Kristus. Suruaké ekeu, purut'aké peremannu." Bailiu ka tetret nendangan leú et, suru-aitusuru si Eneas

³⁵Kelé araitsó nia si Eneas sangamberidda tai Lidda samba tai Saron, matonemnangan bagadda ka tubut Tuhan

³⁶Ka laggai Joppe leú et, ai sara sinanalep sipuoni si Tabita. Simatonem бага ka tubut Jesus lé nia. (Oninia ka nga-ngan Junani si Dorkas, katukolobatnia, simatsurá.) Sarat masigalaiaké simaerú sambat masirop'aké sirimanua simagebá lé igagalai

³⁷Ka tetret nenda, bara besínia si Tabita, iageti langónangan leú et nia. Lepána lé arabui tubunia simamatei, galak'akérangan nia ka bilí ka pata

³⁸Tá bulat areu laggai Joppe néné, ka laggai Lidda. Oto kelé araarep nia sipasiului Jesus ai sia ka laggai Joppe, kababarania si Petrus ka laggai Lidda, koiniakérangan sia rua sieei masisogai si

Petrus, rakua ka matania, "Olaaké nuoi sené.

³⁹ Bulat arepna lé nia si Petrus sikuadda néné, suru nia einangan leú et itut sia. Segéra lé sedda, abbitrangan nia ka bilí ka pata. Aian rapupurut nia si Tabita néné tailumang, samba airasosoibi nia, airapakokoinong paleppe-leppeí samba leú et saraubá sisuilak Dorkas, sikaunia ka tubudda ka tetret ai peilé nia muririmanua

⁴⁰ Iageti kuanangan ka matadda sangamberidda si Petrus, bulé rabela ka tulaibó, lepá purekkuknangan maniddou. Matainangan tubut Dorkas simamatei, kuanangan, "Tabita, suruaké ekeu!" Iageti bukáakénangan matania si Tabita. Kelé aiitsó si Petrus, putukkúnangan leú et

⁴¹ Alánangan kabeinia si Petrus irop'aké nia ipurió. Lepá sogainangan sia si Petrus sangamberidda simatonem бага sedda sambadda tailumang, iageti segéakénangan leú et si Dorkas sipuririmanua mitsá néné ka tubudda

⁴² Iageti mararatnangan katuareman sibabara néné ka sangaliot laggai Joppe,

pat igi sia simatonem бага ka tubut
Jesus, Rimata Sipaarau sia

⁴³Oto kuddu peilé nia sedda si Petrus
piga ngagogoi pá burúnia ka lalep Simon
tukang kulit.

10¹Ka laggai Kesarea, ai sara
simanteu sipuoni si Kornelius, iaté
sara kapten tenteradda tai, "Pasukan
Italia"

²Simasurú ka Taikamanua lé nia samba
sangamberidda ka bagat lalepnia sarat
Taikamanua lé loulogatda. Maigi sia
simagebá tai Jahudi airop'aké, samba
mariu-riu lé ipaniddogi Taikamanua

³Oto ka sara gogoi, ka bó-bó telu ka
soibokat, bulat toilá ka matania ka siitsot
matania, amoi sara malaikat Taikamanua
masisogai nia, "Kornelius!"

⁴Iageti kinerenangan malaika si
Kornelius pagalú lotó, pelé ngangania,
"Aponia Tuhan?" Pelé nga-ngan malaika
ka tubunia, "Aiarep'an paniddogatnu
sambat erut bagam Taikamanua, oto
airepdem'an ekeu Taikamanua

⁵Koiniaké sia kineneiget sieei ka laggai
Joppe, masisogai si Simon sipuoni si
Simon Petrus

⁶ Ai nia mukukuddu ka lalep tukang kulit sipuoni si Simon, sipulalalep ka bet-bet koat.

⁷ Oto kelé aitui-tui malaika sipatiboaké si Kornelius, sogainangan sia rua sapaguguletnia sambat sara tai tentera sipasija-jagonia simasurú ka arat

⁸ Iageti tiboinangan ka matadda sipuaaili ka tubunia, lepá koiniakénangan sia ka laggai Joppe

⁹ Matsepnia lé ai sia mueenung, raaailingan lé laggai Joppe, sakai nia ka sia si Petrus ka tei-tei lalep, maniddou

¹⁰ Iageti malajenangan leú et, oto tutunangan bagania mukom. Aitutatarek'aké kan, bara siitsot matania si Petrus

¹¹ Itsónangan itubuká manua. Iageti itsónangan leú et kelé komang simalio aimutotoak ka polak, ai nia ka sesereat ka epatnia talingania

¹² Asut'an ka bagania sene ngamata tarimeu sipurerere epat, samba sene ngamata leití sipulalató samba pauma-umá

¹³ Iageti bara nga-nga sipasikukua ka matania, "Suruaké ekeu Petrus! Já-já, lepá komnungan leú et nia!

¹⁴Tápoi kuana lé nia ka sia si Petrus, "Tá, Tuhan! Aipoí beri pei te komku apa páonia keraet sambat kasit-sit'akenen.

¹⁵Tápoi kuanangan nia mitsá nga-nga néné ka tubut Petrus, "Apa sioi tukom aikua Taikamanua, buí nuoniaké nia takei-kei.

¹⁶Oto telu ngamitsá aipaole tubunia siitsot matania néné ka tubut Petrus, tápoi lepá tik-tiknangan nia mitsá komang néné ka manua

¹⁷Bulat ingo lé nia si Petrus igaba katukolobat siitsot matania néné. Tápoi talagat paaatuna nia si Petrus, segé sia ka sia ka lalep Simon, sikoiniakenen Kornelius; aian sia ka bet-bet matatbaliu

¹⁸Iageti sogairangan sirimanua, isérangan sia, "Taleú ai nia sené sara tairauma, sipuoni si Simon Petrus?

¹⁹Ai peilé ipatutup-tup ka bagania si Petrus katukolobat siitsot matania, kuanangan ka matania Ketsat Sipunenan, "Ale Petrus, ai sia telu sipasigagaba ekeu

²⁰Olaaké nutugorosot ka repé samba buí nukagilaaké nutut sia, aipoí aku lé amasikoiniaké sia ka tubum.

²¹ Iageti tugorosotnangan leú et si Petrus, kuanangan ka matadda, "Aku te néné gabaetmui. Apo nia nuaalá kam sené?

²² Iageti kuaddangan ka matat Petrus, "Aikoiniaké lé kai sené si Kapten Kornelius. Sirimanua simaerú paraboa lé nia, samba simasurú ka Taikamanua, samba leú et bulat airahohormati nia sangamberidda tai Jahudi. Aikua ka matania sara malaikat Taikamanua, bulé itiddou nuei ka lalepnia, kelé alegiat paniddogatnia, samba leú aigugluaké nia bulé iarep'aké sangamberinia sikuam ka tubunia.

²³ Iageti kuanangan ratuguru ka lalep, bulé rapugogoi sedda. Oto matsepnia lé suru nia si Petrus, tutnangan sia. Ai leú et sia piga pá igidda simatonem бага sibabara ka laggai Joppe, amei masitut sia

²⁴ Sangagogoi atusabau, segé sia ka laggai Kesarea. Aian range-ngena sia tai Kornelius sambat sangamberidda saeppunia samba leú et sapunualeinia sinogai nia

²⁵ Oto kelé arasegé, ei nia si Kornelius masiroroi si Petrus, iageti purapponangan ka matania

²⁶ Tápoi aialá lé kabei Kornelius si Petrus irióaké nia, pelé nga-ngania kai Kornelius, "Suruaké ekeu! Aipoí aku kaku leú, sirimanua leú et.

²⁷ Ai sia patitibo si Kornelius, gurú nia si Petrus ka bagat lalep. Itsónangan maigi sia siparururú sedda

²⁸ Iageti kuanangan ka matadda, "Ale kam sasaraina, ai lé nuaagai kam ikeraaké sia aratda tai Jahudi masibalou elé pagalú ka tubudda sabangsa bagei. Tápoi aikuangan ka tubukku Taikamanua, bulé tá kukua sia kasit-sit'akenen elé haram

²⁹ Iaté lulunia kuanu lé nia kuoi, tá akutiktik tubukku moi. Oto kineneiget kuoba kuagai paluluatnia anutiddou kuoi sené.

³⁰ Iageti kuanangan nia ka sia si Kornelius ka matat Petrus, "Telu ngagogoi situsasabau, iaté kelé néné sulunia, ka bó-bó telu ka soibokat, ei aku maniddou ka lalep. Oto sinulut puriónangan sara simanteu ka matakku. Leppeinia simakirisau

³¹ Kuanangan ka matakku, 'Ale Kornelius! Aisilóan Taikamanua paniddogatnu samba airepdem'an pueerut bagam

³² Koiniaké sia sieei ka laggai Joppe, rasogai sipuoni si Si Simon Petrus. Ai nia mugogogoi ka lalep sara tukang kulit sipuoni si Simon, ai lé nia ka bet-bet koat lalep nenda.

³³ Iaté lulunia akuolaaké kukoiniaké sia rasogai ekeu, Tuan. Bulat simatopit lé ekeu Tuan, anuobá moi sené. Oto kineneiget aparurúan kai sené sangamberimai ka matat Taikamanua, masiarep'aké sangamberinia sikuat Taikamanua, kuanennu ka tubumai.

³⁴ Pelé ngangan Petrus, "Bulat kineneiget peité akuagai kolounia, tairaraseina nia si Tuhan sangamberi sirimanua

³⁵ Kasei sikalotóaké Taikamanua samba simaroipo бага, silónangan sia Taikamanua, bulat tá ipagagaba elé sibabara ka bangsa apa pá nia

³⁶ Aian turerere agaimui nia bagat katuareman simaerú sinegéakenen Taikamanua ka tubudda bangsa Israel. Bagat katuareman nenda, iaté pagalaiat

Katuareman Simaerú siorak pagalaiat
 paabanan sibabara ka tubut Jesus
 Kristus, Tuhanda sangamberi sirimanua

³⁷ Anuagaian kam apa sipuaaili ka
 sangaliot Judea, aitutaddaaké iaté ka
 Galilea, lepat pasiraukat sikuat Johannes

³⁸ Samba leú et anuagaian kam pipiliyna
 Jesus tai Natsaret Taikamanua, samba
 kakauna Ketsat Sipunenan sambat
 gege ka tubunia. Iageti anuagaian
 leú et kam eeina ka senen kudduat
 Jesus, masigalaiaké simaerú; aaleakéna
 sangamberi sirimanua sipinasaileu Sanitu,
 kalulut paaleiana nia Taikamanua

³⁹ Oto bulat tubumaian te néné
 amasiitsó sangamberi sigalaiakenennia
 ka laggaira tai Jahudi sambat ka
 Jerusalem. Tápoi kenanen kisedda,
 arapattáaké peilé nia ka loiná siliktenga
 sambat aramateiaké peilé nia

⁴⁰ Ka gogoi sikatelunia suruakénangan
 nia mitsá Taikamanua ka simamatei,
 samba patoilánangan nia ka tubudda
 sirimanua

⁴¹ Tápoi tá ka tubudda sangamberi
 sirimanua, sarat ka tubumai lé
 sipiliy Taikamanua siboikí, sibailiu
 sipasimumuneng'aké nia: Amukom'an

kai samba leú et amulóan kai sambamai,
lepána aitusuru mitsá ka simamatei

⁴² Iageti koiniakénangan kai masipaarep
Katuareman Simaerú néné ka tubudda
sirimanua samba masimuneng'aké
puninia nia airióaké Taikamanua, sibailiu
Hakimra sirimanua sipuririmanua samba
simamatei

⁴³ Sangamberidda tai nabi aratiboian
pagalaiat tubunia. Arakua, sangamberi
simatonem бага ka tubut Jesus,
tuaappéaké jodda ka geget Jesus.

⁴⁴ Talagat pungangantomannia si
Petrus, tuurunangan Ketsat Sipunenan,
iageti sop-sopnangan ka tubudda
sangamberidda sipasiaarep katuareman
sikuat Petrus

⁴⁵ Oto sia tai Jahudi simatonem бага
ka tubut Jesus, samba sia sipasitutut
si Petrus barana ka laggai Joppe,
amakisei ka bagadda, araitsó kakauna
nia Taikamanua Ketsat Sipunenan ka
tubudda ka sia sabangsa bagei taú
sipuoni tai Jahudi

⁴⁶ Araarep poí arapanibo ka sene
ngamata nga-nga, samba araumun'aké
pulatsanan Taikamanua. Oto kuanangan
ka matadda si Petrus

⁴⁷ "Itsó peite kam, arasilóan ka sia Ketsat Sipunenan kelé ka sita. Momoi leú pá rapasailaji sia, bulé turaú sia oinan?

⁴⁸ Iageti kuanangan ka matadda, bulé raraú sia ka onin Jesus Kristus. Lepá tiddourangan bulé ipukuddu si Petrus ka tubudda piga ngagogoi pá burúnia.

11 ¹ Iageti areprangan nia tai apostel sambat sangamberi simatonem бага ka sangaliot laggai Judea, bulat beringan sia sitaipuaarat Jahudi arasilóan Tiboiet Taikamanua

² Oto kelé aiei si Petrus ka Jerusalem, paanujiddangan leú et nia simatonem бага

³ Kuaddangan ka matania, "Angoian lé nueei ka lalepra sitaipususunat? Sarapei bagei amukom'an kam sambamui!

⁴ Kalulut néné, kolouakénangan nia si Petrus sangamberinia sipuaaili barania ka panandaatnia. Pelé ngangania ka matadda

⁵ "Ai aku maniniddou ka laggai Joppe, bara siitsot matakku. Itsókungan sara komang simalio sigorosot'akenen barania ka manua, ai seserenia ka epatnia talingania, toak segé ka bé-béku

⁶Oto kelé akulelek'aké ka bagania, itsókungan patarime-tarimeu siepat rere, tarimeu simaliá, leití sipulalatá, samba leú et pauma-umá

⁷Iageti arepkungan nga-nga sipasikukua ka matakku, 'Suruaké ekeu, Petrus! Já-já, lepá komnungan leú et nia!

⁸Tápoi kuakku lé nia kaku, 'Tá, Tuhan! Aipoí beri pei komku simaharam sambat kasit-sit'akenen

⁹Iageti kuana lé nia nga-nga sibabara ka manua, Sangamberi sikuat Taikamanua tá takei-kei nukom nia, buí nukua maharam.

¹⁰Telu ngamitsá akuitsó nia aipaole tubunia ka matakku, lepá tik-tiknangan nia mitsá sangamberinia ka manua

¹¹Tápoi ialeú et tetrenia, segé sia ka sia kateludda sikoiniakenenda ka tubukku, sibabara ka laggai Kesarea, ka lalep pugogoiatku

¹²Iageti kuanangan ka matakku Ketsat Sipunenan, bulé buí imakarat bagakku kutut sia. Oto kaenemra saalei leú et, amoi leú et sia ka sia ratut aku ka laggai Kesarea. Iageti gurú kai sangamberimai ka lalep Kornelius

¹³ Ka sia si Kornelius leú et, punguan'akénangan leú et ka tubumai pagalaiat aiitsó aipurió sara malaika ka lalepnia, sipasikukua ka matania, 'Koiniaké sia ka laggai Joppe, masisogai sara simanteu, sipuoni si Simon Petrus

¹⁴ Ai leú isegéaké ka matam katuareman simaerú sipaarau kam sangalalepmui.'

¹⁵ Oto nga-ngan Petrus, "Aikukukua kelé néné, sop-sopnangan leú et ka tubudda Ketsat Sipunenan, kelé aisop-sop ka tubutta ka sita siboikí

¹⁶ Iageti repdemkungan ai aikua si Tuhan, kisé, 'Ka sia si Johannes, oinan lé iraraúaké, tápoi ka kam geti Ketsat Sipunenan lé turaraúaké ka tubumui.

¹⁷ Oto sené toilá ikakau leú et ka tubudda ka sia sitaipuaarat aratda tai Jahudi, panguruat, kelé siakénia ka tubutta ka sita, ka tetret atamatonem kam бага ka sita ka tubut Tuhan Jesus Kristus. Oto, kipa iooi kukeraaké nia Taikamanua!

¹⁸ Oto kelé araarep nia sikuat Petrus néné, amumeng-meng'an lé sia. Iageti umun'akérangan Taikamanua. Pelé nga-nganda, "Oto ké kiseda baí galainia, beri leú et sia taú sipuoni tai Jahudi,

ikakau leú et ka sia tetre, bulé rabauaké paatuatda, rananam purimanuaiat bulat sipulelelek!

¹⁹Lepá aramateiaké si Sitepanus, pakukrujiddangan leú et sia simatonem бага ka tubut Jesus, pat pasabuddangan tubudda ka senen kudduat. Ai sia sipututuitui ka laggai Penisia, tápoi ai leú et sia sabagei sieei ka laggai Siprus sambat ka laggai Antiokia. Segéakérangan leú et Katuareman Simaerú sibara ka Taikamanua, tápoi sarat ka tubudda tai Jahudi lé

²⁰Tápoi beri leú et sia simatonem бага sibabara ka laggai Siprus, ai leú et sia sieei ka laggai Antiokia, masipaarep Katuareman Simaerú pagalaiat tubut Jesus, ka tubudda sitaipuaarat aratda tai Jahudi

²¹Ai ka tubudda gege sibara kai Tuhan, pat igi sia simatonem бага, samba sisegéaké tubuna ka tubut Tuhan

²²Oto pagalaiat pungu-nguan sibabara néné leú et, asege leú ka tubudda ka sia sapaamian ka Jerusalem. Iageti koiniakérangan si Barnabas iei ka laggai Antiokia

²³ Kelé aisege sedda, si Barabas
 samba kelé aiitsó panununganina sia
 Taikamanua, mangkánangan leú et
 bagania simakopé. Oto tiddounangan ka
 tubudda, bulé bulat ramariu-riu ka tubut
 Tuhan bulat tubut sibara ka miuinet
 paatuatda

²⁴ Bulat simaerú paraboat lé nia ka
 sia si Barnabas néné, samba aisop-sop
 ka tubunia Ketsat Sipunenan, samba
 simakopé ron tonem бага ka tubut
 Tuhan lé nia, pat igi sia sipasitutum si
 Tuhan

²⁵ Lepá einangan leú et si Barnabas ka
 laggai Tarsus masigaba si Saulus

²⁶ Kelé arapaaili si Saulus, abbitnangan
 nia ka laggai Antiokia. Iageti kuddu
 sia sedda sangarura burúnia, parurú
 ka tubudda sapaamian, sambat maigi
 sia sirimanua arapangantom. Oto ka
 Antiokia te panandaatnia araoniaké sia
 simatonem бага ka tubut Tuhan, tai
 Kariten

²⁷ Ka tetret nenda, maigi sia tai nabi
 sibabara ka Jerusalem, amei ka laggai
 Antiokia

²⁸ Ka talagadda tai nabi néné, ai sara
 sipuoni si Agabus. Kalulut patubbuiat

Ketsat Sipunenan, pusiblanangan leú et ikua kababarania pulajeat sabeu ka sangaliot polak néné. (Oto bulat amuaili sisiblaakenennia néné, ka tetret aimuririmata si Kaisar Klaudius.

²⁹Iageti pakerénangan bagadda simatonem бага масикау пароман ка tubudda saalei sikukuddu ka Judea, siripot siooi rapanguruat'aké

³⁰Oto puriu-riunangan kelé sipinatibojidda néné, lepá koiniakérangan si Barnabas sambat si Saulus masitaroaké пароман нéné ка tubudda siutéaké paamian.

12¹Ka oggak nenda leú et, taddaakénangan nia ka sia si Herodes masipaoreji saladdou paamian

²Oto koiniakénangan sia rasaggri nia lanjau si Jakobus, iaté sarainan Johannes

³Kelé aiitsó nia si Herodes, kelé ioobá lé bagadda tai Jahudi sigalaiakenennia néné, galaiakénangan mitsá kelé nenda leú et: kuanangan bulé ralabá leú et nia ka sia si Petrus. Aigalaiaké néné, iaté ka tetret Punen Pukoman Roti Sitá ragi

⁴Kelé aralabá nia si Petrus, kaurangan nia ka bagat penjara. Ai sia epat ngamungkuat tai tentera sipasijajago

si Petrus, senen mungkuat ai sia epat igidda tai tentera. Lepat Paska peité isosogai si Petrus si Herodes bulé iadili nia ka matadda siberikabaga

⁵ Oto pat-pat'akérangan nia ka bagat penjara si Petrus. Tápoi ka sia geti sapaamian, riuriunia lé ratiddouaké si Petrus ka tubut Tuhan, bulat sibara ka muinet paatuatda

⁶ Soibot kei iaili tetrenia iabbit si Petrus si Herodes ka matadda siberikabaga, perepnangan leú et si Petrus, tápoi kabeinia geti atukabéakéan rua paleggi, ai nia ka talagadda rua tai tentera sipujajago. Beri leú et ka matatbaliu penjara ai leú et sia sabagei sipujajago

⁷ Iageti tulut puriónangan sedda malaikat Tuhan, putoronangan itoroji bagat penjara. Pajiujiginangan si Petrus malaika, teret suru nia. Kuanangan ka matania malaika, "Olaaké nutusuru!" Iangan leú et tetrenia, belé rattei labá ka kabeinia si Petrus

⁸ Lepá mitsá kuanangan ka matania malaika, "Kau leppeinu, samba appraaké talit tarangáinu." Iageti puleppeinangan leú et si Petrus sambat appraakénangan talit sipatunia. Oto kuanangan mitsá ka

matat Petrus malaika, "Kau saraubánu, lepá tutnungan aku.

⁹Iageti tutnangan malaika si Petrus, rabela ka bagat penjara. Tápoi ka sia si Petrus geti, tá aiaagai bulat puaaili nia sangamberinia sigalaiakenen malaika néné. Ka bagania lé te ka sia si Petrus, kelé sara siitsot matania lé

¹⁰Tápoi kelé arasabau pujagoat siboikí sambat sikarua, segé sia ka matatbaliu labá, sibebela ka kota. Oto teú nia lé buká-aitubuká matatbaliu, iageti bela sia ka enungan sigoisó, lepá tulut kaddiukénangan nia malaika si Petrus

¹¹Lepá iapeité aiagai kolou nia si Petrus aponia sibabara ka tubunia néné, oto kuanangan nia, "Bulat iapeí akuagai kolou nia kineneiget kokoiniakéna si Tuhan malaikania masibelaaké aku ka kabei Herodes, samba ka sangamberinia sigalaiakenenda bangsa Jahudi ka tubukku.

¹²Lepá aimakolou ka bagania sibabara néné, ei nia si Petrus ka lalep Maria, inan Johannes sipuoni si Markus. Maigi sia sedda siparururú, sambat talagat paniniddoura

¹³Iageti luu-luunangan matatbaliu si Petrus. Oto einangan leú et sara pagugulet sinanalep, sipuoni si Rode, masibukáaké matatbaliu

¹⁴Tá asele nia aiarep nga-ngan Petrus. Oto kalulut angkat bagania, tá ibubukáaké boikí matatbaliu, tápoi aiolaaké lé tugurú mitsá ka baga, kuanangan ka tubudda sikukuddu ka bagat lalep, kababarat Petrus ka tulaibó

¹⁵Iageti kuaddangan ka matania, "Taleú ai lé rorónu!" Tápoi ron'akénangan ngan-gania masikua pububulat Petrus nia. Tápoi arakua lé mitsá ka matania sinanalep néné, "Malaikania lé nenda!

¹⁶Oto ka sia si Petrus, riu-riu lé iluu-luu matatbaliu. Kelé arabukáaké matatbaliu sambat araitsó nia si Petrus, makiseinangan ka bagadda simakopé

¹⁷Iageti totoiakénangan kabeinia si Petrus kelé sara toggaiat rapumeng-meng, lepá kolouakénangan nia ka matadda sigalai Tuhan, aibelaaké nia ka bagat penjara. Iageti kuanangan ka matadda, "Segéaké kam sibabara néné ka tubut Jakobus, samba ka tubudda saalei sabagei." Oto lepána lé aikua kelé

néné si Petrus, tui nia sedda, ei nia ka kudduat bagei

¹⁸Oto matsepnia lé bara pulamagat ka talagadda sipasijajago. Bulat ingo lé sia kalulut sibabara ka tubut Petrus néné

¹⁹Iageti koiniakénangan sia bulé ragaba si Petrus, tápoi beri sesedda nia. Lepá koiniakénangan sia bulé rapaiseki sia sipasijajago, lepá mateiakérangan sia. Lepá nenda, tui nia ka Judea si Herodes, samba piga pá burúnia aikuddu ka laggai Kesarea

²⁰Bulat simakopé golúnia si Herodes ka tubudda tai Tirus sambat tai Sidon. Oto kalulut néné ei sia simakeré rataget'aké nia. Pusumrangan boikí si Balastus, siutéaké istanat Herodes, pat lop-lop'akénangan tubunia ka tubudda. Lepá ei sia rataget'aké si Herodes, ratiddou paaban, aipoi ka laggai Herodes lé rakakaroni бага kanda

²¹Oto ka sara tetre siripot ka siteúakenen, pakeinangan si Herodes leppei purimataat, lepá puuddetnangan ka uddenan purimataat, iageti panibonangan leú et ka matadda tai rayat

²² Oto kuaddangan nia ka sia sipasiaarep nga-ngan Herodes, "Bulat nga-ngan dewa lé néné, tá nganganda sirimanua!

²³ Ka tetret nendangan leú et, tipaknangan nia malaikat Tuhan si Herodes néné, kalulut tá aihormati Taikamanua. Oto pagut-gutinangan nia balak, matei nia

²⁴ Oto memei marararat tiboiet Taikamanua samba memei leú et maroron

²⁵ Iageti kelé aralepáaké galajetda ka sia tai Barnabas sambat tai Saulus, toili sia baradda ka Jerusalem, abitrangan leú et si Johannes Markus, aleira.

13 ¹ Iageti ai ka paamian Antiokia tai nabi sambat tai guru, iaté si Barnabas, si Simeon oniakenenda si Pusú, si Lukius sibabara ka Kirene, si Menahem sikeré pauraatda si Herodes, samba leú et si Saulus

² Ai sia maniniddou ka tubut Tuhan sambat mupupuaso, kuanangan ka matadda Ketsat Sipunenan, "Piliy kam kaku si Barnabas sambat si Saulus, bulé ragalai galajet siteúakenenku galaiakenenda.

³Oto kelé ailepá arapaniddou sambat arapupuaso, tonem'ake'rangan kabeira ka tubut Barnabas sambat ka tubut Saulus, lepá koiniakérangan sia ruada

⁴Kalulut pakoiniat Ketsat Sipunenan, eirangan leú et tai Barnabas sambat tai Saulus ka laggai Seleukia. Baradda sedda, pulajoddangan raailiaké laggai Siprus

⁵Kelé arasegé ka laggai Salamis, segéakérangan tiboiet Taikamanua ka uma paniddogatda tai Jahudi. Iageti ka sia si Johannes Markus, masirop sia ka puenunganan lé igagalai

⁶Oto gejengiddangan nia sangaliot nusa nenda, pat aili sia ka Papos. Sedda paailiddangan leú et sara tai Jahudi sipuoni si Bar Jesus. Si tukang sihir lé nia, tápoi aikua lé tubunia sara nabi

⁷Si Sergius Paulus gubernurda ka nusa nenda, bulat alei tukang sihir. Bulat simaagai paatuat samba simasiku paatuat lé nia si gubernur néné. Oto sogainangan sia tai Barnabas sambat tai Saulus kalulut obána masiarep tiboiet Taikamanua

⁸Tápoi aisaggangi lé sia tai Barnabas sambat tai Saulus si Elimas si tukang

sihir néné, kalulut ibesiaké nia si Elimas (iaté katukolobat oninia ka nga-ngan Junani) buí imatonem bagania si Gubernur ka tubut Jesus

⁹Tápoi sop-sopnangan nia Ketsat Sipunenan ka sia si Saulus, sipuoni si Paulus. Iageti kinerenangan matat tukang sihir nenda

¹⁰Kuanangan ka matania, "Ale turot patajuat, togat sinitu! Bulat saggak sangamberi simaerú lé ekeu néné. Táan koí anuariaké masipakataí sipinaatut Taikamanua masipaarau sirimanua

¹¹Oto kineneiget bulé nuitsó nia iukum'aké ekeu si Tuhan! Mapepeset'an te matam, pat taimakoinongnangan nuitsó torot sulu piga ngagogoi pá burúnia." Iangan leú et nia againangan tubunia si Elimas kelé ai ka matania simagep-gep isakkeri matania, pat pagagónangan leú et nia masigaba sipalulunia

¹²Kelé aiitsó nia ka sia si gubernur sipuaaili néné ka tubut Elimas, matonemnangan bagania ka tubut Jesus, aipoí bulat makisei ka bagania masiarep ngantoman siorak ka pagalaiat tubut Tuhan

¹³ Baradda ka Papos, pulajoddangan leú et tai Paulus sambat saaleinia ka Perga ka Pampilia. Sedda kaddiuakénangan sia si Johannes Markus itoili ka Jerusalem

¹⁴ Iageti baradda ka laggai Perga, riu-riuakérangan puenungananda ka Antiokia ka Pisidia, lepá ka gogoi Sabbat kuddu sia ka uma paniddogat

¹⁵ Lepá arabatsa Bukotda tai Nabi, koiniakérangan sia siutéaké uma paniddogat ranou-nou si Paulus sambat saaleinia, pelé nganganda, "Ale kam Sasaraina, ké ai nupaaatu kam masikau panganturat ka tubudda néné, pangantrumuiian sia.

¹⁶ Iageti puriónangan leú et si Paulus, maí-maíakénangan kabeinia kelé sara toggaiat, kuanangan ka matadda, "Ale kam Sasarainangku bangsa Israel samba leú et kam sangamberimui sené saaleimai sabagei, simasurú ka arat Taikamanua! Arep'aké kam sikuakku néné

¹⁷ Aipiliyan sia taikebbukatta, Taikamanuanda sabangsa Israel, samba aibailiuakéan sia sabangsatta sara bangsa sabeu ka tetret ai sia mukukuddu ka laggai Misir kelé taitoi. Tápoi lepá ka

gege sabeu, belaakénangan sia ka laggai Misir

¹⁸ Om'akénangan bagania Taikamanua ka galai tubudda ka simatangeu ka bagat epat ngapulu ngarura burúnia

¹⁹ Pitu ngabangsa sia igidda aisubuaké ka laggai Kanaan, bulé iparubei nia ka tubudda sabangsa Israel, ibailiu nia bakkatda

²⁰ Ai lima ngotu ngarura burúnia aipuriu-riu sangamberinia néné. Oto lepá aiparubei nia laggai Kanaan néné, kaunangan ka sia Taikamanua, hakim. Oto hakim sikatei-tei iaté Nabi Samuel

²¹ Tápoi lepá tiddourangan sara rimata. Iageti kaunangan ka tubudda Taikamanua sipuoni si Saul, togat Kis, sibara ka muntogat bangsa Benyamin, sibailiu rimatada ka bagat epat ngapulu ngarura burúnia

²² Kelé aitukkluaké nia Taikamanua ka uddenan purimataatnia, rióakénangan leú et si Dapid bailiu rimatadda. Oto ka sia kai Dapid, ai aikua Taikamanua pagalaiat tubunia, 'Akusesengan si Dapid togat Isai, iaté sara kilibet bagakku. Nia té néné masigagalaiaké siobat bagakku.

²³ Sibara ka punuteteu Dapid te aipatarek Taikamanua ka bangsa Israel sara Rimata Sipaarau, kelé ka sitonéakenennia. Oto Jesus nenda te Rimata Sipaarau

²⁴ Einangan tá itataddaaké galajetnia Jesus, aisogaakéan si Johannes ka tubudda tai Israel, bulé rabauaké paatuatda, bulé turaú sia

²⁵ Samba kei ikappluaké galajetnia si Johannes, aikuangan ka tubudda sirimanua, 'Kasonia aku néné nukukua kam? Tá te aku néné ngenaetmui. Sarat néné lé repdemenmui, kurukku oi nia ka sia; aipoí beringan masirugut sipatunia tá mateú aku.

²⁶ Ale kam Sasaraina sapunuteteu Abraham, samba leú et kam sangamberimui sené simasurú ka arat Taikamanua! Aiakéan ka sita katuareman nenda

²⁷ aipoí ka sia sikukuddu ka Jerusalem sambat sia sautéra, tá airaagai, nia nenda sipaarau. Tá raagai kolou nia sinurat'akenenda tai nabi, kenanen senen gogoi Sabbath rabatsa nia, pat ukum'akérangan Jesus. Tápoi kalulut

gagalaiakéra kelé nenda, puailinangan
sangamberi siniblaakenenda tai nabi

²⁸ Kenanen tá arasese apa pá ka
tubunia sele, bulé imateú tuukum'aké
nia ukuman simateiakenen, aratiddou
peilé ka tubut Pilatus bulé itumateiaké

²⁹ Samba kelé ailepá aragalaiaké
sangamberinia sitususurat ka
Buko Sipunenan pagalaiat tubunia,
gorosot'akérangan tubunia simamatei ka
loiná siliktenga, lepá galak'akérangan
nia ka bagat ratei

³⁰ Tápoi lepá suruakénangan nia mitsá
Taikamanua

³¹ Lepá piga ngagogoi pá burúnia
patoilánangan tubunia ka tubudda
sieei sambadda baradda ka Galilea ka
Jerusalem. Sia nenda te kineneiget
aibailiu sipasimumuneng'aké pagalaiat
tubunia ka tubudda bangsa Israel

³² Oto kai kakai kineneiget kusegéaké
kai Katuareman Simaerú ka tubumui:
Apa sitonéakenen Taikamanua ka
tubudda taikebbukatta

³³ aigalaiakéan ka tubutta, aisuruaké
mitsá Jesus ka simamatei. Aipoí ka bagat
Buko Mazmur sikarua, ai atusurat'aké

kisé, 'Ekeu te Togakku, ka gogoi néné aibailiuan aku Ukkuinu.

³⁴ Aisuruakéan nia mitsá Taikamanua ka simamatei. Oto kineneiget táan inananam mitsá kamamatei ka bagat ratei. Pagalaiat néné leú et, ai atusurat'aké kisé, 'Kuaaké ka tubum palelengan simaliná, bulat tubut muaaili, kelé sipinatonéku ka tubut Dapid.

³⁵ Ka ruang bagei leú et ai leú aikua, 'Tá nuoreaké paguguletnu simatopit néné ianau ka ratei.

³⁶ Ailangóan nia si Dapid, samba aturateiakén nia sambadda taikebbukatta, lepat aragalai sangamberi sikuat Taikamanua galaiakenenda. Tubut Dapid simamatei leú et aianauan, oto atatáan sangamberinia

³⁷ Tápoi ka sia geti Jesus, sisuruakenen Taikamanua mitsá ka simamatei, tá aianau nia pat tatá

³⁸ Oto ale kam Sasaraina, kau nuagai kam nia, sibara ka tubut Jesus néné te aitusegéaké ka tubumui katuareman pagalaiat katuappekat jo. Samba bulé nuagai kam nia, sangamberi simatonem бага, tubebelaaké ka sangamberi jo

sitaioi iposa surukat Taikamanua siaket
Mose

³⁹ (13:38)

⁴⁰ Oto kau nulelek'aké kam nia
sipulelelek, bulé buí ipuaili kelé ka
sikuatda tai nabi kisé

⁴¹ 'Lelek'aké kam sipulelelek, ale kam
néné siobá masipaloloi! Nukikiseiaké
te kam, lepá matei kam! Aipoí
kineneiget aikugagalaiaké sara galajet
sitaimatonem bagamui, kenanen baí ai
sia sipasikokolouaké ka tubumui.'

⁴² Kelé arakaddiuaké uma paniddogat
tai Paulus sambat tai Barnabas,
tiddourangan ka tubuda bulé raoi
mitsá ka gogoi Sabbat sibabara, bulé
rariu-riuaké rakolouaké nia ka matadda
pagalaiat sibabara nenda

⁴³ Kelé arabela ka uma paniddogat, bulat
maigi sia tai Jahudi sambat tai bangsa
bagei sieei muarat aratda tai Jahudi,
amei masitut sia. Pangantruddangan leú
et sia tai apostel, bulé mariu-riu rakaroni
baga panguruat katet bagat Taikamanua

⁴⁴ Oto ka gogoi Sabbat sibabara, bulat
malegre sangamberidda sikukuddu ka
kota, amei masiarep tiboiet Tuhan

⁴⁵ Kelé araitsó nia tai Jahudi sirimanua simigi néné, matutunangan bagadda simakopé. Paloloirangan leú et si Paulus samba saggangiddangan sangamberi sikuania

⁴⁶ Tápoi bulat amakopé lé gegedda tai Paulus sambat tai Barnabas rakua nia bulat simakolou. Pelé nganganda, "Kirénangan buitá ka tubumui lé boki itusegéaké tiboiet Taikamanua néné. Tápoi kalulut taio bámui nia masisiló, oto kam'an lé saramui amasiteúaké taimateúmui masisiló purimanuaiat sipulelelek sambat sitaitatátá. Kineneiget kukakaddiuakéan lé kai kam, kuei kai ka tubudda bangsa bagei

⁴⁷ Aipoí néné lé aikua Taikamanua ka tubumai: Aikua si Tuhan, 'Akusaú-saúan kam bailiu sitoroji bangsa bagei taú sipuoni tai Jahudi, bulé nubaraaké kam puaragat ka sangaliot polak.'

⁴⁸ Oto kelé araarep nia néné sabangsa bagei taú sipuoni tai Jahudi, bulat angká lé bagadda simakopé, oto umun'akérangan leú et tiboiet Tuhan. Sambat sia siteúakenen Taikamanua masiikep'aké purimanuaiat sipulelelek

samba sitaitatató, tonem leú et ka sia bagadda

⁴⁹ Beri leú et ka sia tiboiet Taikamanua mararatnangan ka senen kudduat ka sangaliot laggai nenda

⁵⁰ Tápoi sia siabeu tiboí tubu sambat tainanalep sibara ka rubeiat simabuak tiboí tubu simalotó ka tubut Taikamanua, arapatubbuji leú et bagadda ka sia tai Jahudi. Tútúakérangan pasaggangan ka tubudda tai Paulus sambat tai Barnabas, sambat usiakérangan sia ruadda ka laggai nenda

⁵¹ Iageti só-sóakérangan abu ka reredda aiiraitsó, kelé sara toggaiat, iageti tui sia raei ka laggai Ikonium

⁵² Oto bulat simakopé angkat bagadda lé sipasiului ka Antiokia, samba sia leú et aisopsop'an ka tubudda Ketsat Sipunenan.

14 ¹ Makeré lé siorikra tai Paulus sambat tai Barnabas ka laggai Ikonium. Aipoí amei leú et sia ka uma paniddogatda tai Jahudi iageti pungantomanrangan leú et sedda bulat teret katubudda, pat maigiddangan tai Jahudi samba taú sipuioni tai Jahudi amatonem бага ka tubut Jesus

²Tápoi ka sia geti tai Jahudi
sitaimatonem бага, patubbujiddangan
bagadda taú sipuoni tai Jahudi néné,
pat malagánangan bagadda ka tubudda
simatonem бага ka tubut Jesus

³Oto kalulut nenda, maburúnangan
arakuddu sedda tai Paulus sambat tai
Barnabas. Bulat tá malotó sia ratiboi
pagalaiat onin Tuhan. Ka sia leú et si
Tuhan patoilánangan pusingeseatnia
simuneng'akenenda pagalaiat nuntut
bagania. Oto kaunangan leú et ka
tubudda gege masigalai kerek sambat
kiseiet sabeu

⁴Pat bara paukeladda pasasambadda
taikalaggaiat; ai simaré-ré ka tubudda
tai Jahudi, samba ai leú et sia simaré-ré
ka tubudda tai apostel

⁵Oto pakerénangan bagadda tai
Jahudi sambadda taú sipuoni tai Jahudi,
rapaorei sambat rabaijuk tai apostel,
bukú

⁶Tápoi kelé araagai nia tai apostel
isiatda néné, tui-tui sia raei ka laggai
Listra sambat ka laggai Derbe, iaté kota
ka Likaonia, samba ka simalegre sedda

⁷Oto sedda paareprangan mitsá
Katuareman Simaerú

⁸ Ka laggai Litra, aisara simanteu simasakit re-re barania peilé ka pusulekatnia. Oto beri pei puenung nia, kalulut kopet saggot re-renia

⁹ Ai nia sedda muuuddet masiaarep'aké ipungantoman si Paulus. Aiiitsó si Paulus tonem bagania, kalulut néné momoi itualeaké besínia. Iageti kinerenangan nia si Paulus

¹⁰ abeuakénangan nga-ngania masukua, "Rióaké ekeu!" Oto puattatnangan leú et, iageti pariu-riunangan leú nia aipuenung

¹¹ Kelé araitsó nia sirimanua simigi sigalaiakenen Paulus néné, pugereirangan leú et ka nga-ngan Likaonia, pelé nganganda, "Atugorosot'an sia tai Dewa ka polak siputubu sirimanua.

¹² Oto oniakérangan nia ka sia si Barnabas si Seus, ka sia geti si Paulus arakau oninia si Hermes, aipoí nia lé amanibo

¹³ Iageti oinangan leú et si Imam Dewa Seus, kuilnia ai ka matat laggai, masiabbít jaui simanteu sambat paogo-ogó ka matatbaliu laggai. Iobá itabbraaké tubunia ka tubudda

sirimanua simigi raei rakau panguruat
buluakenenda ka tubudda tai apostel

¹⁴Oto kelé araarep nia tai Paulus sambat
tai Barnabas isiatda néné, pabiritdangan
leú et leppeira, iageti pabalaurangan raei
ka talagadda sirimanua simigi; ai sia
memei, airagegereiaké

¹⁵"Ale, nugagalaiaké kodda kam kelé
néné? Aipoí kai ka kai néné sirimanua
leú et, kelé kam! Akuoi kai sené iaté
masipaarep Katuareman Simaerú, bulé
nukaddiuaké kam galajet siboboi, nuei
kam ta tubut Taikamanua sipuririmanua,
sibaraaké manua sambat polak, koat,
samba sangamberinia sibabara ka
bagania

¹⁶Aipoí siburú aioreaké sia Taikamanua
tai bangsa-bangsa, ragalai siobára

¹⁷Tápoi tá aikalipogi ipatoilá tubunia,
iaté ka pasigagalaiakéna simaerú. Iageti
akénangan leú ka kam urat sibara
ka manua sambat buat siureman ka
tetrenia. Samba akénangan kanmui
samba pagoranangan leú et bagamui.

¹⁸Tápoi kenanen rakua kisedda tai
apostel, mabesí peilé rasaila sia tai
apostel, rabesíaké rakau panguruat
buluakenen ka tubudda

¹⁹ Oto ai sia piga pá tai Jahudi sieei ka laggai Listra sibabara ka Antiokia ka Pisidia samba leú et sibabara ka laggai Ikonium, masipatutubbuji bagadda sirimanua simigi, pat maré-rérangan sirimanua simigi ka tubudda. Oto baijukrangan nia bukkú si Paulus, lepá girit'akérangan nia ka teitei irip laggai. Bulat ka bagaddangan lé te amateian nia

²⁰ Tápoi kelé arageilik nia simatonem бага, suruinangan nia, iageti suru nia, einangan leú et mitsá ka laggai. Matsepnia lé eirangan leú et ka laggai Derbe sambat si Barnabas

²¹ Ka laggai Derbe leú et arapararat leú et tai Paulus sambat tai Barnabas, Katuareman Simaerú, oto bailiu maigi sia amatonem бага ka tubut Jesus. Lepá toili sia ka laggai Listra, iageti mitsá eirangan leú et ka Ikonium, oto pariu-riurangan leú mei ka Antiokia ka Pisidia

²² Oto paronrangan leú et tonem bagadda sedda sipasiului Jesus, samba pangantomanrangan sia bulé mariu-riu putotonem bagadda ka tubut Jesus. Iageti kuaddangan kisé, masipangantru sia simatonem бага ka laggai nenda,

"Buítá mangorik sita boikí, oto iapeité nanamtangan pugoraat бага ka Laggai Taikamanua Sibau.

²³ Piliyangan leú et ka senen paamian tai Paulus sambat tai Barnabas sipugagalai ka paamian. Oto ka paniddogat samba ka pupupuaso, segéakérangan sia sipugagalai ka paamian néné ka tubut Tuhan katonemietda бага

²⁴ Lepá riu-riuakérangan puenungananda tai Paulus sambat tai Barnabas, sabaurangan laggaira tai Pisidia papparat segé sia ka Pampilia

²⁵ Oto lepá arapaarep tiboiet Taikamanua ka Perga, eirangan leú et ka Atalia

²⁶ Baradda sedda, pulajoddangan leú et ratoili mitsá ka Antiokia. Laggai nenda te kudduat pasisegekat ka tubudda panguruat katet bagat Taikamanua, bulé ragalaiaké galajet kelé silepáakenenda kineneiget

²⁷ Kelé arasegé ka laggai Antiokia, rurúakérangan sapaamian, iageti tiboirangan sangamberinia sigalaiakenen Taikamanua, ka sigalaiakenenda. Samba tiboirangan leú et kipa aigalai

Taikamanua aibuká enungan, bulé ramatonem бага ka tubut Jesus ka sia taú sipuoni tai Jahudi

²⁸Iageti kuddu sia simaburú ka laggai nenda sambadda simatonem бага sipulalaggai sedda.

15 ¹Iageti ai sia piga pá sibabara ka Judea amei ka Antiokia masipangantoman simatonem бага ka Antiokia, masikua, ké tá tusunat sia siripot surukat Mose, tá tupaaarau sia

²Oto lawandangan nia sipinaatudda néné tai Paulus sambat tai Barnabas. Oto lepá saú-saúrangan sia, bulé raei tai Paulus sambat tai Barnabas samba leú et piga pá sia sabagei ka Jerusalem, masipatiboji pagalaiat néné, ka tubudda tai apostel samba tai bajá sedda

³Iageti taroakérangan sia sapaamian ka Antiokia, pat aili ka tei-tei irip laggai, oro eirangan leú et, silajiddangan laggai Penisia sambat Samaria. Pungungan'akérangan leú et ka matadda sedda, pagalaiat sesegéakéra tubudda ka sia taú sipuoni tai Jahudi ka tubut Taikamanua. Oto bulat makopé angkat bagadda simatonem бага sedda, raarep katuareman néné

⁴ Kelé arasegé ka Jerusalem silórganan sia sipulelelek sapaamian, sambat tai apostel, samba leú tai bajá sedda. Iageti pungu-nguan'akérangan sangamberinia sigalaiakenen Taikamanua, ka sigalaiakenenda

⁵ Iageti puriórganan leú et piga pá ka saladdou Parise simatonem бага, pelé nga-nganda, "Buítá tusunat lé sia ka sia sabangsa bagei simatonem бага, samba buítá ratut leú et surukat Mose.

⁶ Oto parurúrganan tai apostel sambat tai bajá masipatiboji pagalaiat paukelatda néné

⁷ Bulat maburú arapatiboji nia. Tápoi lepá puriónangan leú et si Petrus, kuanangan ka matadda, "Ale kam Sasaraina! Aian nuaagai kam pipiliyna aku Taikamanua piga ngagogoi pá burúnia ka talagamui masipakakra Katuareman Simaerú ka tubudda taú sipuoni tai Jahudi, bule raarep nia ka sia imatonem bagadda ka tubut Jesus

⁸ Oto ka sia Taikamanua siagai masiitsó pupaaturan sirimanua, aipatoiláan obána isiló sia. Aipatoilá nia, iaté ka pasikakaunia Ketsat Sipunenan ka tubudda, kelé aakéna ka sita leú et

⁹Tá aipabaggei sita Taikamanua ka tubudda. Aipalináan paatuatda, kalulut tonem bagadda

¹⁰Oto apangan lé lulunia nusasaggangi kam Taikamanua kineneiget, anukau kam ka tubudda sipasiului néné bairanenda simasané, ké beringan ka sia taikebbukatta samba sita leú et, ka sita, tá amoi atagalaiaké kam nia

¹¹Kelé ka sita leú et, sarat kalulut katet bagat Tuhan Jesus lé atamatonem kam бага, samba ataturau; kelé ka sia leú et.

¹²Iageti pumeng-mengrangan leú et sangamberidda siparururú sedda. Lepá arep'akérangan rapungu-nguan'aké nia tai Barnabas sambat tai Paulus sangamberi kerek sambat kiseiet sabeu sigalaiakenen Taikamanua ka sigalaiakenda, ka talagat bangsa bagei taú sipuoni tai Jahudi

¹³Lepá arapanibo ka sia, kuanangan nia ka sia si Jakobus, "Ale kam Sasaraina! Arep'aké peite kam kukua nia kaku

¹⁴Ka sia si Simon, simaruei peilé aikolouaké kipa aipatoilá nia Taikamanua paatuna sia taú sipuoni tai Jahudi, iaté

ka pasipipiliyna sia ka talagadda sabagei
sibailiu sapaamiannia

¹⁵Néné geti bulat paseke ka
siniblaakenenda tai nabi. Aipoí ai
atusurat'aké kisé

¹⁶'Lepá oi aku mitsá,' ngangan
Tuhan, 'rióakékungan nia mitsá
Uman Taikamanua simabubukkat,
samba masiperú simararagat, lepá
rióakékungan nia mitsá

¹⁷bulé ragaba si Tuhan ka sia
sipulelegei, sambadda sangamberi
bangsa bagei taú sipuoni tai Jahudi
sinogaiku bailiu bakkatku.' Oto kisedda
te aikua si Tuhan

¹⁸sipasisisiblaaké pagalaiat néné,
baranangan ka siburú.

¹⁹Iageti kuanangan ka matadda si
Jakobus, "Siripot sipinaatukku baí
nia kaku, táan tagegejaaké bagadda
ka sia taú sipuoni tai Jahudi néné,
sipasisesegéaké tubuna ka tubut
Taikamanua

²⁰Tápoi buítá takau lé kam surat
ka tubudda, tapangantru kam sia,
bulé buían rakom kan kasitsit'akenen
sibuluakenen ka tubut sabulungan,
elé rakom akkulat tarimeu sipetsut,

elé masikom logau. Samba leú et bulé raareuaké tubudda ka pusilaingeat

²¹ Aipoí baranangan ka siburú, atubatsaakéan senen gogoi Sabbat surukat Mose néné ka uma paniddogat, samba atupaarep'an ka sangaliot laggai.

²² Akutakkíaké kai ka patiboatmai tai apostel, tai bajá sambat sangamberi tatogat paamian, iaté masipiliy piga pá ka talagadda koiniakenen ka laggai Antiokia sambadda tai Paulus sambat tai Barnabas. Iageti piliyangan si Silas sambat si Judas sipuoni leú si Barsabas. Karuadda néné te oniakenen simaerú galai tubu ka talagadda simatonem бага ka Jerusalem

²³ Ai leú araabbit surat sialei tubudda sikoiniakenen, néné sipasikukua, "Ka tubudda sasarainamai sibabara ka bangsa bagei taú sipuoni tai Jahudi, sikukuddu ka laggai Antiokia, Siria, sambat Kilikia. Segé salammai, kai sipuoni tai apostel sambat tai bajá, iaté sasarainamui

²⁴ Akuarep kai ai sia piga pá siooi masibalou kam sibabara ka kai, sipakataí samba sipaingo pupaaturanamui

kalulut nganturatda. Tápoi tá te kai
 amasikoiniaké sia ragalaiakké kelé nenda

²⁵Iaté lulunia akupurappat kai
 masipatiboji pagalaiat néné. Oto
 apakeréan bagamai sangamberimai
 masipiliy piga pá sia, koiniakenen ka
 talagamui. Oto momoi te sia sambada
 Sasarainanta tai Barnabas sambat tai
 Paulus simanuntut bagamai

²⁶Karuadda néné iaté sibuluaké engania
 kalulut Tuhanta Jesus Kristus

²⁷Oto koiniakémaian ka kam si Judas
 sambat si Silas. Siangan té nenda
 masisisesegéaké ka tubumui pagalaiat
 sitususurat ka bagat surat néné

²⁸Beri Ketsat Sipunenan aiobáan,
 samba beri kai leú et akobáan kai,
 bulé táan tuaké ka kam galaiakenen
 simasané, bulé sarat galaiakenen néné
 lé

²⁹iaté buían nukom kam kan
 sibuluakenen ka sabulungan; buían
 nukom kam logau, buían nukom kam
 akkulat tarimeu sibutsit, samba areuaké
 kam tubumui ka galajet pusilaingeat.
 Oto ké nuareuaké kam tubumui ka
 sangamberinia néné, anugalaiakéan

te kam simaerú. Oto niangan té boikí,
maron sita!

³⁰ Kelé aratiddou mutui-tui, eirangan leú
et sikoiniakenen néné ka Antiokia. Iageti
sogairangan sangamberidda sapaamian
sedda, parurú, lepá segéakérangan surat
siabbitda

³¹ Oto kelé arabatsa nia saladdou
paamian bagat surat nenda, bulat angka
lé bagadda ka sikuat surat sipusuibi
bagadda

³² Maburú arapatibo tai Judas sambat
tai Silas, oniakenen nabi leú et, ka
tubudda saalei simatonem бага ka
laggai Antiokia, masitubbui samba
masitataáké lotóra

³³ Iageti piga pá burúnia arakuddu
sedda tai Judas sambat tai Silas,
koiniakérangan sia tai Antiokia
simatonem бага, ratoili mitsá, sambat
tiddourangan ka tubudda, bulé rasegéaké
salamra ka tubut sipasikokoiniaké sia

³⁴ [Tápoi ka sia geti si Silas, aiobáan lé
bulat mukuddu ka Antiokia.

³⁵ Beri leú et ka sia tai Paulus
sambat tai Barnabas amukuddu leú
sia sedda piga pá burúnia ka Antiokia.
Pungantomanrangan leú et samba

segéakérangan tiboiet Tuhan samba
maigi sia sabagei aleira

³⁶Oto tá amauju, kuanangan nia ka sia
si Paulus ka matat Barnabas, "Taei mitsá
masibalou sasarainanta simatonaem
baga ka tubut Jesus ka sangaliot laggai
sipaarepta tiboiet Tuhan; bulé taitsó sia.

³⁷Tápoi aigelai lé ka sia si Barnabas
iabbit si Johannes Markus

³⁸tápoi ka sia geti si Paulus, aipaaatu
taimaerú nia ituabbitt si Markus,
sitaibá mugalai simakeré samba
sipasikakaddiuké sia ka laggai Pampilia

³⁹Oto pagolúrgan leú et smakopé
tai Paulus karuadda si Barnabas, pat
pasaraddangan leú et. Iageti alánangan
si Markus ka sia aleinia si Barnabas,
pulajoddangan leú et ka Siprus

⁴⁰Tápoi kai Paulus geti si Silas lé aialá
aleinia, iageti eirangan leú et, lepána
arasegéaké sia saalei ka Antiokia ka
katet bagat Tuhan

⁴¹Oto ka sia leú et, bokkórgan Siria
sambat Kilikia. Sedda parondangan
pupaamianan.

16¹Iageti riu-riuakénangan
puenunganannia si Paulus ka
laggai Derbe, lepá ei nia ka laggai

Listra. Oto sedda ai sara sipasiului Jesus sipuoni si Timoteus. Inania tai Jahudi, simatonem бага ka tubut Jesus; tápoi ukkuinia geti tai Junani lé

² Ka talagadda simatonem бага ka laggai Listra sambat ka laggai Ikonium, nia lé si Timoteus simaerú paraboat

³ Iageti besíakénangan nia si Paulus bulé iei itut sia. Kalulut néné, sunatnangan si Timoteus si Paulus. Aigalaiaké nia geti kelé néné, kalulut aagaira nia sangamberidda tai Jahudi ka laggai nenda, putatai Junani nia ukkui Timoteus

⁴ Kaipa raei ka senen laggai, segéakérangan nia ka tubudda simatonem бага sangamberi sitakkíakenenda ka rapatda tai apostel sambat tai bajá ke Jerusalem. Iageti pangantruiddangan sia saalei simatonem бага, bulé ratut sangamberinia peraturan sisegéakenenda

⁵ Oto memei maroron tonem bagadda sapaamian, samba senen gogoi memei itutuppai iggida

⁶ Oto tá aiobáaké sia Ketsat Sipunenan raei tai Paulus sambat tai Silas rapakarap tiboiet Taikamanua ka propinsi Asia.

Bailiu riu-riuakérangan puenungananda ka laggai Prigia sambat ka laggai Galatia

⁷ Kelé arasegé ka pasongan laggaira tai Misia, siboddangan ratugurú ka propinsi Bitinia. Tápoi aikeraaké lé sia Ketsat Sipunenan raei sedda

⁸ Iageti pariu-riurangan raei ka Misia pat aili ka Troas

⁹ Oto soibónia ka Troas bara siitsot matania si Paulus. Siitsot mata nia nenda, iaté, aiitsó aimuririó ka matania sara tai Makedonia, aiteitiddou simakopé kai Paulus, bulé iei ka laggai Makedonia masirop'aké sia

¹⁰ Lepá aibara siitsot matania néné si Paulus, patarekmaian tubumai kuei kai ka laggai Makedonia. Aipoí bulat amatonem'an bagamai kokoiniakéna kai Taikamanua masipaarep Katuareman Simaerú ka tubudda sedda

¹¹ Iageti kaddiuakémaian laggai Troas, pulajomaian masiailiaké laggai Samotrake. Oto matsepnia lé segé kai ka laggai Neapolis

¹² Baramai sedda ei kai ka laggai Pilippi, iaté sara laggai ka distrik siboikí ka laggai Makedonia. Laggai Pilippi néné iaté kupkumen purimataat Roma. Iageti

kuddu kai sedda piga ngagogoi pá
burúnia

¹³ Ka gogoi Sabbat ei kai ka bet-bet
oinan ka tei-tei matatbaliu laggai,
aipoí kupaatu kai ai sedda kudduat
paniddogatda tai Jahudi. Iageti kuddu
kai sedda patiboakémaian tainanalep
siparururú sedda

¹⁴ Oto ai sara ka talagadda
sipasijajagaaké komang simasuan
laiket, sipuoni si Lidia sibabara ka laggai
Tiatira. Simanuntu бага ka Taikamanua
lé nia néné. Oto tubbuinangan bagania
Taikamanua, bulé isiló sangamberinia
singantoman'akenen Paulus ka tubunia

¹⁵ Iageti raúrangan nia ka sia si Lidia
sambat sangamberidda sikukuddu
ka bagat lalepnia. Oto lepá araraú
sia, sogainangan kai si Lidia ka
lalepnia, kuanangan ka matamai,
"Ké bulat amatonem'an bagamui
pusisibulatnia tonem bagakku ka tubut
Jesus, oi kam mukuddu ka lalepku."
Iageti ná-nánangan kai kureddet kai
paniddogatnia

¹⁶ Ka sara gogoi ai kai memei masiailiaké
uma paniddogat, paseseakémaian sara
sinanalep. Nia néné iaté sara pagugulet.

Ai sabulungannia, bailiu momoi ipoiliat sipuaaili ka gogoi sibabara. Oto kalulut ooi nia ikua sibabara ka puririmanuanda sirimanua, bara puuktungan sabeu ka tubut majikannia

¹⁷ Riu-riu lé itut si Paulus sinanalep néné. Aitutut nia ai nia mugegerei masikua, "Pagugulet Taikamanua sipulubeunan te sia néné! Araoi néné, iaté masisegéaké ka tubumui kipa igagalai Taikamanua ipaarau kam!

¹⁸ Oto piga ngagogoi pá aigalai sarat mugerei sinanalep néné, parat taiomnangan nia si Paulus, kuanangan ka matat bulungan nenda, "Ka onin Jesus Kristus, kukua ka matam belaaké ekeu ka tubut sinanalep néné!" Oto niangan leú et nia, kaddiuakénangan nia sinanalep néné bulungannia

¹⁹ Oto kelé araagai nia tai majikannia katatatat pasigabaiatda bulagat, labáranan leú et si Paulus sambat si Silas, abitrangan sia ka tanah lapang ka tubudda sauté

²⁰ Abbitrangan leú et si Paulus sambat si Silas ka tubudda tai pejabat ka purimataat Roma, kuaddangan ka matadda, "Tai Jahudi lé sia néné.

Masibaraaké pulamagat ka laggaita lé araoi

²¹ Arakua ka sirimanua bulé ragalaiaké arat katukelatda sitaipaaakkup ka surukatta ka sita, sipuoni tai Roma. Oto tá momoi tatut'aké kam arat katukelat nenda!

²² Oto bailiu ka sia siberikabaga leú et saggangindangan sia tai Paulus sambat tai Silas. Iageti eirangan leú et sapamarentah masipabirit leppeira karuadda tai apostel néné, lepá koiniakérangan sia rapajiguji sia ruadda

²³ Lepá arapajiguji sia simalabbu, kaurangan leú et sia ka bagat penjara. Koiniakérangan utet penjara bulé ijago sia bulat sipulelelek

²⁴ Kalulut parentah, kaunangan sia utet penjara néné, tai Paulus sambat tai Silas ka bilit penjara bulat ka бага, sambat kabéakénangan rere sambat kabeira ka baló

²⁵ Elé tengamoi pá, ai sia maniniddou sambat muuurai pasiumun Taikamanua tai Paulus sambat tai Silas, samba beri leú et ka sia siukum'akenen sabagei ai leú raaarep rapuurai

²⁶ tulut bara teteu sabeu bulat
 simakopé ron, pat pungeu-ngeunangan
 leú et bongan arigit penjara. Iageti
 tubukánangan sangamberi matatbaliu
 penjara, sambat sangamberi talit
 palenggui tubukánangan leú et ka
 kabeira situukum

²⁷ Iageti tugégénangan utet penjara,
 suru nia. Kelé aiitsó aitubuká matatbaliu
 penjara, oppatnangan leú et lanjaunia
 imateiaké tubunia, kabagania poí
 amutui-tuian sia sangamberidda
 situukum

²⁸ Oto pugereinangan leú et si Paulus,
 "Buí numateiaké tubum! Ai peilé kai sené
 sangamberimai!

²⁹ Iageti tiddounangan alitó utet
 penjara néné, pabalaunangan ka baga,
 aimugegeret tubunia purapponangan ka
 matat Paulus sambat Silas

³⁰ Lepá abbitnangan sia ka tulaibó,
 kuanangan ka matadda, "Aponia
 galaiakenenku bulé kukep'aké kaku
 puaragat?

³¹ Kuanangan ka matania si Paulus,
 "Kau imatonem bagam ka tubut Tuhan
 Jesus! Iapeité arau ekeu sambat
 sangamberi sikukuddu ka bagat lalepnu!

³² Lepá kolouakérangan nia tai Paulus sambat tai Silas tiboiet Tuhan, ka tubut utet penjara sambat ka tubudda sangamberi sikukuddu ka lalepnia

³³ Oto soibónia nenda leú et, abbitnangan sia utet penjara, palinánangan maujúra. Iageti pariu-riurangan leú et raraú nia ka sia sambat sangamberi sikukuddu ka lalepnia

³⁴ Lepá abbitnangan sia tai Paulus sambat tai Silas ka lalepnia, tat-tat'akénangan kanda. Bulat angka lé bagania, sambat sangamberidda sikukuddu ka lalepnia, kalulut amatonem'an poí bagadda kineneiget ka tubut Taikamanua

³⁵ Simatsep, koiniakérangan tai polisi tai pejabat pamarentat Roma, rasegéaké ka matadda, bulé rabelaaké sia tai Paulus sambat tai Silas

³⁶ Iageti segéakénangan nia ka matat Paulus utet penjara néné, "Ale kam saukkuimai, arakuanan tai pejabat pamarentah, bulé tubelaaké kam. Oto momoian nubela kam kineneiget. Kau lé numangká kam бага ka puenunganan!

³⁷ Iageti kuanangan ka matadda tai Polisi si Paulus, "Kai néné warga

Negaradda tai Roma lé kai. Tápoi tápei atuadili kai, anupajigujingan kam kai ka matatda siberikabaga, samba gurúakémuian kam kai, ka bagat penjara. Oto kineneiget mitsá koiniakérangan kutui-tui kai sipinakele? Oto tá kuobá kai! Buítá tubudda lé momoi masibelaaké kai.

³⁸Oto pangasegérangan nia tai Polisi sikuadda tai Paulus néné ka tubudda tai pejabat pamarentat Roma. Kelé araarep nia puwawarga negerat Romana sia tai Paulus sambat tai Silas néné, malotóranan leú et

³⁹Iageti eirangan leú tai pejabat pamarentah néné masitiddou maaf ka tubut Paulus sambat kai Silas, lepá belaakérangan sia ruadda ka bagat penjara, iageti tiddourangan ka tubudda, bulé rakaddiuaké laggai néné

⁴⁰Iageti kaddiuakérangan nia penjara tai Paulus sambat tai Silas, ei sia ka lalep Lidia. Lepá arapaaili ka tubudda simatonem бага sedda, samba raparon pupaaturananda, tuirangan leú et sedda tai Paulus sambat tai Silas.

17 ¹Iageti riu-riuakérangan puenungananda tai Paulus

sambat tai Silas baradda ka Ampipolis
sambat ka Apolonia, lepá segé sia ka
Tessalonika. Sedda ai uma paniddogatda
tai Jahudi

²Oto einangan leú et si Paulus ka uma
paniddogat, kelé simarei-rei igalaiaké, ké
ai baí sara uma paniddogatda tai Jahudi.
Iageti patiboakénangan sia sikukuddu
sedda, pagalaiat Buko Sipunenan. Telu
ngasabbat sipatutut aigalaiaké nia kelé
néné si Paulus

³Oto pakolounangan samba
patoilánangan Rimata Sipaarau
sitonéakenen Taikamanua néné, buítá
iorik pangoringan, lepá suru nia mitsa
ka simamatei. Iageti kuanangan nia
si Paulus, "Jesus segéakenenku ka
matamui néné, nia té nenda Rimata
Sipaarau sitonéakenen Taikamanua.

⁴Oto piga pá sia amatonem бага, oto
tutangan si Paulusambat si Silas.
Samba bulat maigi leú sia tai Junani
simalotó ka Taikamanua, samba sia
tainanalep siabeu tiboitubu, amatonem
бага

⁵Tápoi ka sia geti tai Jahudi masísí
bagadda. Iageti sogairangan sirimanua
simalilimai, sipukukuddu ka enungan,

baraakérangan mungkuat sibaraaké pulamagat. Taddaakérangan leú et masibaraaké kataí ka sangaliot laggai, riu-riugiddangan sara lalep simatonem бага sipuoni si Jason ragaba si Paulus samba si Silas, rabesíaké ibela si Paulus sambat si Silas, bulé raei ka tubudda sirimanua simigi

⁶Tápoi kelé tá arasese sia tai Paulus sambat tai Silas, labáranan leú et si Jason sambat piga pá sia simatonem бага sabagei, abbirangan sia ka matadda tai pejabat siutéaké laggai nenda. Pugereirangan leú et masikua, "Sia néné te masibabaraaké pulamagat ka senen kudduat! Kineneiget amoian sia ka laggaita

⁷aisiló poí sia si Jason ka lalepnia. Arapasabauan sangamberidda surukat Kaisar Roma, aipoí arakua ai mitsá bagei rimata, iaté sipuoni Jesus.

⁸Oto kalulut tiboietda néné ngoí-ngoínangan bagadda sirimanua simigi sambat siutéaké laggai

⁹Iageti kuaddangan ka matat Jason sambat ka matadda simatonem бага, bulé rabaya bulagat itatá suk-suk

bagadda ka tubudda. Lepá rabaya nia,
iapeité belaakérangan leú et sia

¹⁰ Soibónia nenda koiniakérangan tai
Paulus sambat tai Silas, sia simatonem
baga ka laggai nenda, bulé ratui-tui
sedda raei ka laggai Berea. Segéra lé
sedda eirangan leú et tai Paulus sambat
tai Silas ka uma paniddogatda tai Jahudi

¹¹ Tápoi tai Berea peilé makatopit
tubu ka tubudda tai Tessalonika.
Bulat ka angkat бага lé raarepi
katuareman pagalaiat tubut Jesus.
Samba senen gogoi lé ragelai Buko
Sipunenan, bulé raagai pusisineseatnia
singantoman'akenen Paulus

¹² Oto maigi sia ka talagadda
amatonem бага ka tubut Jesus, samba
tá leú magulai sia tai Junani siabeu tibo
tubu amatonem бага; tainanalep samba
taimanteu

¹³ Kelé araarep nia tai Jahudi sikukuddu
ka Tessalonika paaarepna leú et sedda
tiboiet Taikamanua si Paulus, ka laggai
Berea, eirangan leú et ka laggai Berea,
patubbujiddangan bagadda samba
baraakérangan pukaranan bagadda
sipulalaggai sedda

¹⁴ Oto olaakérangan nia ka sia saalei ka laggai Berea masitaroaké si Paulus ka bet-bet koat. Tápoi ka sia geti si Silas sambat si Timoteus riu-riu lé rakuddu ka laggai Berea

¹⁵ Lepá arataroaké si Paulus ka laggai Atena, toili sia saalei néné ka laggai Berea, abbitrangan leú et patonekat Paulus, bulé raei simaruei tai Silas sambat tai Timoteus ka tubut Paulus

¹⁶ Bulat reu-reu lé bagania si Paulus aingengena raei tai Silas sambat tai Timoteus raailiaké nia, kalulut aiitsó sut lé laggai Atena sarat tularat bulungan

¹⁷ Oto patiboakénangan sia si Paulus tai Jahudi sambat sia sabagei ka uma paniddogat, sieei sedda maniddou ka tubut Taikamanua. Beri ka pasar leú et, senen gogoi ipatiboaké sia sangamberi sirimanua sikukuddu sedda

¹⁸ Abara leú te paukeladda saladdou Epikuros sambat saladdou Stoa ka tubut Paulus. Oto ai sia piga pá amasikua, "Aponia poi siagainia sirimanua néné? Bulat goisó lé siagainia, tápoi tiboiet geti táanbuu!" Tápoi ai leú et sia piga pá amasikua, "Ai lé isesegéaké pagalaiat sabulunganda sabangsa bagei." Arakua

geti nia kelé néné, kalulut kukuana
pagalaiat tubut Jesus samba leú
pagalaiat katususuru nia mitsa tubu
simamatei

¹⁹Iageti abbitrangan nia si Paulus ka
parurukat ka Leleú Areopagus. Oto
sedda, kuaddangan ka matania, "Kuobá
kai kuagai kai nia pagalaiat nganturat
sibau sisegéakenennu

²⁰Aipoí kuarep kai nia nutiboi
sangamberinia, bulat makisei ka
bagamai. Oto bulat makiddiy ka bagamai
kuagai kai katukolobatnia.

²¹(Aipoí ka sia sangamberida tai
Atena samba siooiaké sedda bulat
raobá rasappruaké tetret da simaoggak
masiarep'aké élé masipakubbuki
sangamberi sipuoni gelaiet sibau.

²²Kelé aipurió si Paulus ka matadda
siparururú ka Areopagus, kuanangan
ka matadda, "Ale kam tai Atena!
Bulat akukereng'akéan, bulat kopet
puroronmui ka arat

²³Aipoí ka tetret akugejengi sangalonia
laggaimui, samba akulelekáké kudduat
paniddogatmui, itsókungan leú sara
kudduat pasibuluatmui; ka kudduat
nenda ai anusurataké kam, 'Ka Tubut

Taikamanua Taiaagaietmai.' Oto
 Taikamanua sitaiaagaietmui, tápoi
 ainupaniniddogi kam nia, nia té néné
 kusesegéaké ka tubumui

²⁴Taikamanua sibaraaké polak sambat
 sangamberinia ka bagania, nia té Tuhan
 manua sambat polak. Tá mukukuddu
 nia ka uman sabulungan sigalai kabeira
 sirimanua

²⁵Tá leú et ikikiddiy paromanda
 sirimanua, aipoí nia lé masikakau
 purimanuaiat, enga sambat
 sangamberinia ka tubudda sirimanua

²⁶Sibara ka sara sirimanua,
 baraakénangan sangamberinia
 bangsa, samba koiniakénangan leú
 et sia bulé rasut'aké sangaliot polak
 néné. Nia leú et amasiteúaké barania
 ka panandaatnia peilé, pigamoi samba
 kaipa rapuririmanua

²⁷Aigalaiaké nia geti kelé néné
 Taikamanua, bulé ragaba lé nia. Ké
 pei rasese nia ka tetret airagagaba
 nia. Tápoi siripokatnia geti, tá areu nia
 Taikamanua ka tubutta sene-senenta

²⁸Arakua baí sirimanua, 'Tapuririmanua
 samba tapungongoíngói samba atabara
 ka polak néné, sarat ka gegenia lé.' Oto

makeré leú te kelé ka sikuadda piga pá siagai mutitiboat ka kam. Arakua, 'Tatogania lé sita sangamberitta.

²⁹ Kalulut tatogat Taikamanuan poí sita néné, oto buían takua kam Taikamanua makeré lé nia kelé ka tularat emas elé perak, elé bukkú sigalai, siripot sipinaatudda sirimanua

³⁰ Aikalipogingan Taikamanua galai tubutta ka tetret tápei taagai simaerú, tápoi kineneiget geti aikoiniakéan sia sangamberi sirimanua bulé rabauaké paatuatda

³¹ Aipoí aitetreakéan sara gogoi iadili sangaliot polak néné, bulat ukum simaroipo. Tápoi masigagalaiaké galajet néné, iaté sara sirimanua, sipiliynia ka galajet néné. Samba bulé imatonem bagadda sangamberi sirimanua ka pagalaiat néné, suruakénangan nia Taikamanua sirimanua néné ka simamatei!GÇ

³² Oto kelé araarep nia pagalaiat katususuru nia mitsá tubu simamatei, ai sia piga pá amasigágati si Paulus. Tápoi ai leú et sia sabagei sipasikukua, GÇ£Kuobá kuarep kai nia mitsá nutiboi ka matamai pagalaiat sikuam néné.GÇ

³³Iageti tui nia si Paulus ka parurukat

³⁴Tápoi ai leú et sia simaré-ré ka sikuat Paulus, iagetimatonemnangan bagadda ka tubut Jesus, iaté: si Dionisius, laddou majelis Areopagus, samba sara sinanalep sipuoni si Damaris, samba ai leú sia piga pá igidda sabagei.

18¹Oto lepá tui nia si Paulus ka
laggai Atena, ei nia ka laggai
Korintus

²Iageti ailiddangan leú et sara tai Jahudi sipuoni si Akuila, sibabara ka Pontus. Barania peilé ka Italia si Akuila néné karuadda sinanalepnia si Piriskila. Araoi ka sia ka Korintus, kalulut bebelakéna sia si Kaisar Klaudius sangamberidda tai Jahudi ka Roma. Oto einangan leú et si Paulus ibalou sia karuadda

³Iageti kuddu nia sedda samba pugalairangan sambadda, aipoí makeré lé pasigabaiatda purimanuaiatda si Paulus, iaté masigalai kema

⁴Tápoi senen gogoi Sabbat, ei nia si Paulus patibo ka uma paniddogat, bulé ramatonem бага ka sia tai Jahudi sambat tai Junani ka tubut Jesus

⁵Kelé arasegé tai Silas sambat tai Timoteus ka Makedonia, pakeinangan

sangamberi tetrenia si Paulus, masipakarap Katuareman Simaerú sibara ka Taikamanua, ka tubudda tai Jahudi, masikolouaké ka tubudda, Jesus néné iaté Rimata Sipaarau, sitonéakenen Taikamanua

⁶Tápoi kalulut taipuaarinia rasaggangi nia samba raasá nia si Paulus, só-sóakénangan leú et abu ka leppeinia kelé sara toggaiat ka sia, kalulut sele sigalaira. Kuanangan ka matadda, "Ké bara sikataí ka tubumui, kalulut selet tubumui lé! Tá iaaili aku! Barania kineneiget, ei aku ka tubudda sabangsa taú sipuoni tai Jahudi.

⁷Iageti kaddiuakénangan sia si Paulus, ei nia ka sara lalep ka bet-bet uma paniddogat. Iaté ka lalep sara taú sipuoni tai Jahudi, tápoi aipaniniddogi Taikamanua, iaté sipuoni si Titius Justus

⁸Tápoi ka sia geti si Krispus utet uma paniddogat, bulat sangalalepra sambat tatogania, amatonem бага ka tubut Tuhan Jesus. Samba maigi leú et sia tai Korintus sabagei, sipasiaarep katuareman sisegéakenen Paulus, amatonem бага ka tubut Jesus, iageti raúrangan leú et sia

⁹ Oto ka sara soibó, ka siitsot matania si Paulus, amanibo si Tuhan ka tubut Paulus, "Buí numalotó! Buí nuariaké nupanibo, bá pumemeng-meng

¹⁰ Ai lé poí kupaaalei ekeu. Bulat beri te sia sara simaró бага masigalai sikataí ka tubum, aipoí maigi sia ka laggai néné sipuoni bakkatku.

¹¹ Kalulut néné, kuddu nia ka Korintus si Paulus sangarura sitenga burúnia, samba pangantomannangan sia tiboiet Taikamanua

¹² Tápoi kelé aipugubernur ka sia si Galio ka Akaya, baraakérangan pusaraat tai Jahudi masisaggangi si Paulus, samba abbitrangan leú et nia ka matat pengadilan

¹³ Oto panganduatra iaté, "Aikakau paalakat бага ka tubudda sirimanua simigi, bulé rapaniddogi Taikamanua sitaipaaakkup ka surukat Mose!

¹⁴ Ai peilé igegelai ialegi nia ka sia si Paulus, kuanangan nia ka sia si Galio ka matadda tai Jahudi, "Ale kam tai Jahudi! Ké baí kalulut pasiaapaaké elé kalulut pasigagalaiaaké jo lé baí nia paganduatmui néné, mateú kuom'aké kuarepi panganduatmui néné

¹⁵ Néné geti, kalulut paukelatmui lé pagalaiat tiboiet, oni sambat surukatmui saramui! Bulat tá kuobá ipasikeli pakaro kelé néné!

¹⁶ Iageti keklenangan sia si Galio raei ka gerat

¹⁷ Oto labáranan leú et si Sostenes, siutéaké uma paniddogat. Bóbóranan nia ka matat mejat pengadilan. Tápoi beri puletseina nia ka sia si Galio pagalaiat néné

¹⁸ Lepá nenda, maburú peilé aikuddu si Paulus ka Korintus. Lepá geti kuanangan salam pasaraat ka tubudda simatonem бага sedda, iageti pulajoddangan sambadda tai Priskila sambat si Akuila ka laggai Siria. Oto ka Kengkrea, sapunangan alainia si Paulus pat sappru; iaté sioreakenennia kalulut palelengan nia ka tubut Tuhan

¹⁹ Kelé arasegé ka laggai Epesus, kaddiuakénangan sia tai Priskila sambat tai Akuila, gurúnia ka uma paniddogat patibo ka tubudda tai Jahudi sedda

²⁰ Tiddourangan bulé maburú peilé ikuddu sedda ka tubudda, tápoi tá iobá

²¹ Tápoi kenanen kisedda, ka tetret aitui-tui, kuanangan ka matadda, "Ké

iobáaké baí nia Taikamanua, momoi aku mitsá sené." Lepá aikua kelé néné, tui sia raei ka Epesus

²² Kelé aitugorosot ka Kaisarea, ei nia ka Jerusalem masisegéaké salamnian ka paamian sedda, iageti riu-riuakénangan iei ka Antiokia

²³ Lepá aikuddu sedda piga pá burúnia, tuinangan leú et iei masibalou laggaira tai Galatia sambat Prigia masiparon putotonem bagadda simatonem бага

²⁴ Oto tá amauju, oi sara tai Jahudi ka laggai Apesus, iaté siputututú mata ka Aleksandria, sipuoni si Apollos. Bulat iagai manibo sambat bulat iagai bagat Buko Sipunenan

²⁵ Atupangantoman'an nia pagalaiat tubut Jesus. Oto bulat magege nia masigelaiaké pagalaiat Jesus, kenanen baí sarat pasirauklat Johannes peilé iagai

²⁶ Oto bulat magege nia si Apollos itaddaaké mungantoman ka uma paniddogat. Kelé araarep nia tai Priskila sambat tai Akuila singantoman'akenennia, abbitrangan nia ka lalep. Iageti kolouakérangan ka tubunia bulat sipasesese, pagalaiat

sipinaatut Taikamanua, masipaarau sirimanua, iaté ka sigalaiakenen Jesus

²⁷ Lepá repdemnangan si Apollos mei ka Akaya. Iageti galairangan surat, ka sia simatonem бага ka tubut Jesus, ka Epesus ka tubudda saalei ka Epesus, ka Akaya, bulé matarek sia masisiló kaooi Apollos. Oto kelé aisegé si Apollos ka Akaya, bulat ai lulunia paromannia ka tubudda, kalulut panguruat katet bagat Taikamanua, matonemnangan bagadda ka tubut Jesus

²⁸ Oto bulat ka lelek tubunia, oi ikalaaké tai Jahudi si Apollos, ka paukelatda ka matat siberikabaga. Saú-saúnangan leú et ruang ka bagat Buko Sipunenan, masikua, pu-Jejesus nia Rimata Sipaarau sitonéakenen Taikamanua.

19 ¹ Ai nia mukukuddu si Apollos ka Korintus, aigegejengi ka sia si Paulus palagga-laggaira sikukuddu ka tirí, lepá segé nia ka Epesus. Oto sedda paailiddangan piga pá simatonem бага ka tubut Jesus

² Iageti nou-nounangan leú et sia, pelé ngangania, "Anusilóan leú kam Ketsat Sipunenan, ka tetret anumatonem kam бага ka tubut Jesus?" Alegiddangan

nia, "Tápei. Bulat beri peite arepmai nia kababarat Ketsat Sipunenan?"

³Kuanangan mitsá ka matadda si Paulus, "Oto pasiraukat aponia lé poi aturaúaké ka tubumui?" Kuaddangan nia, "Pasiraukat Johannes lé.

⁴Iageti kuanangan nia si Paulus ka matadda, "Pasiraukat kai Johannes geti masipatoilá katubabau paatuatda sirimanua ka jodda lé. Tápoi aitaggei leú et ka tubudda tai Israel si Johannes, bulé imatonem bagadda ka tubunia siooi kuruk teiteinia, iaté Jesus.

⁵Kelé araarep nia sikuania néné, raúnangan sia ka onin Tuhan Jesus

⁶Oto kelé aitonem'aké kabeinia si Paulus ka tubudda, sop-sopnangan ka tubudda Ketsat Sipunenan, iageti taddaakérangan manibo ka nga-nga simakisei ka bagatta samba paareprangan leú et katuareman simaerú sibara ka Taikamanua

⁷Ai pá sia pulu rua igidda sangamberidda

⁸Oto telu ngalaggó burúnia aipungantoman taipuaari samba taigigí-giket si Paulus, ka tubudda siparururú ka uma paniddogat samba paukle ka

tubudda, ibesíaké imatonem bagadda pagalaiat Purimataat Taikamanua

⁹Tápoi ai sia piga pá simakelá paatuat sitaimatonem бага. Oto ka matadda siberikabaga asáranan sipinaatut Taikamanua masipaarau sirimanua ka onin Jesus. Oto kalulut néné, kaddiuakénangan sia si Paulus, einangan leú et ka bilit pusikolaat Tiranus. Senen gogoi lé ipatibo ka tubudda sedda

¹⁰Riuriu lé aigalaiaké kelé néné si Paulus ka bagat rua ngarura burúnia, teret arepda nia sangaberidda sikukuddu ka propinsi Asia, iaté tai Jahudi sambat sia taú sipuoni tai Jahudi, tiboiet Tuhan néné

¹¹Iageti galainangan kiseiet sabeu Taikamanua ka sigalaiakenen Paulus

¹²Ké raabbit poposat kabei, elé komang apparat tengen Paulus sipakeinia rakau nia ka simabesí, ale besíra, samba bela sanitu ka tubudda

¹³Ai sia piga pá igidda tai kerei ka tai Jahudi, kaipa sia ei, masiusiaké sanitu ka tubudda sirimanua. Beri ka sia leú tai kerei néné, ai leú et rasisibo ralou-logi onin Tuhan Jesus, rausiaké sanitu. Kuadda lé nia ka matat setan, "Ka onin

Jesus sisegéakenen Paulus, kuusiaké ekeu!

¹⁴Oto ai sia pitu igidda taimanteu tatogania, sara imam sabeu, sipuoni Skewa, sipasigagalaiaké kelé néné

¹⁵Tápoi aikua lé ka sia sanitu ka tubudda néné "Kuagai nia ka sia Jesus, sambat si Paulus, tápoi kam geti ka kam, kasonia kam néné?

¹⁶Iageti paattatnangan tubunia sipinasaileu sanitu néné, tarakupnangan sia, bulat seget kopet golúnia, pat pakukruddangan leú et ratui-tui ka lalep, sibara maujú samba simabulutut, aipoí aipabirit'an leppeira ka tubudda

¹⁷Oto malotórgan leú et sangamberidda tai Jahudi samba sabangsa bagei sikukuddu ka Epesus, masiarep sibabara néné. Bailiu makopénangan raumun onin Tuhan Jesus

¹⁸Maigi sia simatonem бага ka tubut Jesus, amei masiseseké jodda sigalaira siburú

¹⁹Samba leú et sia siagai masigalai gaut pasimatei, rurúakérangan bukodda, labórgan nia ka matadda siberikabaga.

Ké itururúaké nuntut sakit buko nenda,
ai lima ngapulu ngaperak iginia

²⁰ Oto ka enungan kiseiet sabeu néné,
bailiu memei marararat samba memei
maroron patiktingannia tiboiet Tuhan ka
tubudda

²¹ Kelé aitukapplu sibabar néné,
teúakénangan nia si Paulus mei ka
Makedonia sambat ka Akaya, iageti
pariu-riunangan leú et nia iei ka
Jerusalem. Aikua si Paulus, "lepá sedda,
buíta mei leú aku ka Roma.

²² Iageti koiniakénangan sia rua
sapaguguletnia, iaté si Timoteus sambat
si Erastus raei ka Makedonia, ka tetret ai
peilé piga pá burúnia ikuddu ka propinsi
Asia

²³ Oto ka tetret nenda te aibara
pulamagat sabeu ka Epesus, kalulut
ngantoman pagalaiat Jesus

²⁴ Ai poí sedda sara tukang perak
sipuoni si Demetrius, sipasigagalai uman
dewa, iaté Dewi Artemis. Oto bulat abeu
uktukra sangamberi sipugagalai sedda

²⁵ Iageti rurúakénangan sia
sangamberidda sipugagalainia samba
sia tai tukang perak sabagei, kuanangan
ka matadda, "Ale kam Sasaraina! Kelé

siagaimui, ka galajet néné lé ibabara purimanuaiatta

²⁶Tápoi kineneiget anuitsóan kam sambat anuarep'an kam, sigalaiakenen Paulus. Aikua, tai dewa sigalaira sirimanua, bulat tá dewa. Oto amaingingan sia simatonem бага kalulut ngantomannia, tápoi tá te sarat sené ka Epesus, pat lé aili ka sangaliot Asia

²⁷Bulat jagoet imakataí onin pasigabaiatta néné. Sambat tá sarat néné, tápoi beri leú et ka tubut uman Dewi Artemis taimaletseinangan bagadda sirimanua ka tubunia, samba pulatsanannia leú, paperakiddangan nia; ai lé poí taaagai, nia lé dewi paniddogietda sangamberi sirimanua ka Asia sambat ka sangaliot polak!

²⁸Oto kelé araarep nia, bulat ngoí-ngoínangan bagadda, pugereirangan leú et masikua, "Tuumun'aké lé nia si Artemis, dewidda tai Epesus!

²⁹Iageti mararatnangan leú et pulamagat néné pat salú ka sangaliot laggai. Lepá ei sia sibaraaké pulamagat néné masilabá si Gayus sambat si Aristarkus, iaté tai Makedonia

sipaaleiaké si Paulus ka puenunganan,
abitrangan leú sia ka stadion laggai

³⁰ Oto besíakénangan nia si Paulus itut
sia, tápoi arakeraaké lé nia simatonem
baga sedda

³¹ Beri leú et ka sia piga pá siabeu tiboí
tubu ka propinsi Asia leú, iaté sasuruak
Paulus, arakua leú et bulé raei rasegéaké
nia ka tubut Paulus, buí ipatoilá tubunia
ka stadion

³² Ka tetret nenda bulat aipakataían sia
siparururú ka stadion. Ai sigereiaké kisé,
ai leú et sia sigereiaké kisedda, aipoí
maigi sia sitaiagai paluluatnia araparurú
sedda

³³ Bulat ka bagadda te sabagei si
Aleksander lé aibaraaké pulamagat,
aipoí, nia lé rapatutukklu tai Jahudi
ka mata. Oto kaunangan kabeinia si
Aleksander bulé rakau tetre ka sia
ikolouaké ka matadda taimaselenia ka
tubudda sirimanua simigi

³⁴ Tápoi kelé araagai pu-Jajahudi
nia, pakerénangan nga-nganda
masigereiaké, "Tuumun'aké lé nia si
Artemis, dewidda tai Epesus!

³⁵ Oto teret sekretaris laggaian lé, oi
aikua rapumengmeng sirimanua simigi.

Pelé ngangania ka tubudda, "Ale kam tai Epesus! Ai lé raaagai sangamberidda sirimanua pusasarat Epesus nia sipasikeli uman Dewi Artemis, sambat bukkú simaliná sibebelé ka manua

³⁶ Bulat beri sia sara siputatánia. Oto kalulut néné, buían nulamau kam nia, samba buí nugalaiaké kam apa pá sitaipaatu et boikí

³⁷ Aipoí anuabbat kam sia sené, tá kalulut rarau-rauakéra uman dewa, élé kalulut palololoira onin dewitta

³⁸ Ké ai nganduakenennia ka sia si Demetrius sambat sia sipugagalainia, ranganduaké sara sirimanua, edda rasegéaké pakarodda néné ka pengadilan. Ai lé nia kabubukakat ka sia pengadilan, sambat mariu-riu lé rakuddu sedda sapamarenta

³⁹ Tápoi ké ai peilé bagei kiddiyet bagamui, buítá ka rapat simakolou itupatiboji

⁴⁰ Aipoí sibabara kineneiget geti, masipakataí sita lé. Babara rakukua sita sibaraaké pulamagat, aipoí tá anai enunganta bagei masikua sesesena nia ibara pulamagat néné.

⁴¹ Oto kelé aikua sangamberinia néné, kuanangan ka matadda sirimanua simigi, sekretaris laggai néné, ratuitui.

20 ¹ Oto kelé aitatá pulamagat ka Epesus, rurúakénangan sia sapaamian si Paulus, paronnangan pupaaturananda. Lepá kaunangan tiboiet pasaraat, iageti riu-riuakénangan puenunganannia ka Makedonia

² Iageti gejenginnan sangaliot laggai Makedonia, si Paulus samba pangantrunangan sia simakopé, iparon putotonem bagadda simatonem бага ka tubut Jesus. Lepá tui niaiei ka Junani

³ Kuddu nia sedda telu ngalaggó burúnia. Oto aipataterek tubuniaiei mulajo ka Siria, arepnangan katuareman iisiakéra nia tai Jahudi ramateiaké nia. Kalulut néné teúakénangan itoili, tápoi barania lé ka Makedonia

⁴ Ka sia leú et si Sopater sibara ka Berea, amei leú nia masipaaleiaké si Paulus; kisedda leú ka sia si Aristarkus, si Sekundus sibara ka Tesalonika, samba si Gayus tai Derbe. Beri si Timoteus, si Tihikus sambat si Tropimus sibara ka propinsi Asia, amei leú et sia ka sia

⁵Araboikiáké lé tubudda, lepá
ngenaddagan kai ka Troas

⁶Lepat Punen Roti Sitá ragi,
pulajomaian kutuitui kai ka Pilippi.
Lima ngagogoi burúnia, parurúmaian
mitsá sambamai ka Troas. Iageti kuddu
kai sedda sangamenggui burúnia

⁷Iageti soibot gogoi Menggui
pataddémaian mukom, kelé siripot ka
pusarainaat. Oto patiboakénangan sia si
Paulus, kalulut ai lé poí ibabagai bagania
itui-tui matsep. Panibonangan leú et si
Paulus, bulat papparat aili tengamoi

⁸Oto ka bagat bilí ka pata, ka kudduat
parurukatmai, ai maigi alito

⁹Ka sia sara silainge sipuoni si Eutikus,
ai nia mukukuddu ka bet-bet jendela.
Kalulut nantania ipanibo si Paulus,
matuddunangan matania simakopé
silainge néné, pat perep nia ka jendela;
oto belénangan leú et barania ka
tingkat sikatelu. Kelé araakkat'aké nia,
ailangóan nia

¹⁰Iageti tugorosotnangan leú et si
Paulus ka repé, perep'akénangan tubunia
ka tubut silainge néné, lakkaiakénangan
nia. Kuanangan ka matadda si Paulus,

"Buí imakarat bagamui, ai peilé nia muririmanua!

¹¹ Lepá sakai nia mitsá si Paulus ka pata, parubeinangan leú et roti, pukomrangan sambadda. Kelé ailepá ipanibo simaburú pat pató si Paulus, tuinangan leú et

¹² Iageti abbitrangan silainge néné ka lalepnia, aian nia muririmanua. Oto bulat angká lé bagadda, aipoí bulat atupusuibingan bagadda

¹³ Iageti eimaian leú et ka kapá, puabakmaian boikí ka Asos, masialá si Paulus sedda ka kapá. Aibagai lé kisedda, kalulut aipaatu musila

¹⁴ Oto kelé arapaaili ka Asos, riu-riu aitusakai si Paulus ka kapá, iageti riuriuakémaian mukapá masiailiaké Metilene

¹⁵ Baramai sedda pukapámaian leú et mitsá, oto matsepnia lé segé kai ka kudduat sipaiipó ka Kios. Matsepnia mitsá segé kai ka Samos, iageti sangagogoi burúnia, segé kai ka Miletus

¹⁶ Oto aiteúakéan si Paulus tá kutusappai kai ka Epesus, buí isappru tetremai ka laggai Asia. Bulat aibebesíaké

si Paulus imaola kusegé kai ka Jerusalem
ka Punen Katuuruat Ketsat Sipunenan

¹⁷ Iageti kaunangan suratnia si Paulus
itiddou rataget'aké nia tai bajára
sapaamian Epesus, ka Miletus

¹⁸ Oto kelé arasegé, kuanangan ka
matadda si Paulus, "Ai lé nuaagai kam
pagalaiat tubukku, burúnia akukuddu ka
talagamui, barana ka gogoi kasegekatku
peilé siboikí ka Asia

¹⁹ Bulat kaepet paatuat, samba sigalú
elu lé akupugalai galajet Tuhan, ka
talagat pangoringan siorikku, kalulut
sipinaatudda sikataí ka tubukku tai
Jahudi

²⁰ Ai lé nuaagai kam ale Sasaraina,
taigigí-gíku masikua ka matamui aponia
sibailiu puuktunganmui. Kupangantoman
kam, ka matat siberikabaga sambat ka
lalep

²¹ Mariu-riu lé kupangantru sia, elé tai
Jahudi pá nia elé sabangsa bagei, bulé
rabauaké paatuatda samba raoi ka tubut
Taikamanua, samba bulé imatonem
bagadda ka tubut Tuhan Jesus

²² Oto kineneiget, kelé masireddet
nga-ngan Ketsat Sipunenan, memeian

lé te aku ka Jerusalem. Bulat tá kuagai
 aponia pá sipuaaili ka tubukku sedda

²³ Sarat néné lé kuagai, kukuana
 ka tubukku simaron, Ketsat
 Sipunenan, katupepenjaraakéku
 sambat pangongorikku

²⁴ Tápoi bulat beri pulatseiku nia
 purimanuaiatku néné, sarat kau lé ioi
 kulepaaké galajet siaket Tuhan Jesus ka
 tubukku, samba sarat kau lé kumariu-riu
 ka topit, masipaarep Katuareman
 Simaerú, pagalaiat panguruat katet
 bagat Taikamanua, teret ailina tetrenia
 purimanuaiatku

²⁵ Akubalouan kam sangamberimui ale
 kam Sasaraina, samba akupaarep'an
 leú et ka tubumui pagalaiat Purimataat
 Taikamanua. Bulat aian lé iaagai tubukku
 taipaaailitta mitsá

²⁶ Oto bulat kuron'aké kukua nia ka
 matamui gogoi néné, bulat buí te
 nuseleaké kam aku, ké bara simasusubu
 ka talagamui

²⁷ Bulat beri peite puarakku galajetku
 masikolouaké ka matamui pagalaiat
 sipinaatut Taikamanua

²⁸ Oto kau nujago kam tubumui,
 samba kau leú nujago kam sapaamian

sinegéakenen Ketsat Sipunenan ka tubumui jagoetmui; aipoí atupauddet'an kam sipasijajago paamian. Kau iuliu kelé sipasija-jago rapasijago tarimeura, nupasijago kam ka kam sapaamian Taikamanua; aibailiuakéan poí sia sapaamian Taikamanua néné, bakkatnia kalulut kamamatei Togania

²⁹ Kurukku te, oi ka talagamui harimau simasagbang. Oto sapaamian jagoetmui te ipasasagbangi ka sia harimau néné

³⁰ Beri ka talagamui ka kam leú et, babara sia sipaarep katuareman patajuat. Ragagalaiaké nia geti néné, bulé ramapepe ka sia simatonem бага ka tubut Jesus, ibara ioi ratut sia

³¹ Oto bulat jago kam tubumui! Repdem kam taipuarinia kupangantru kam sangamberimui sinágó samba sinoibó sigalú elu, ka bagat telu ngarura burúnia

³² Kineneiget kusegéaké kam ka kabei Taikamanua, bulé ijago kam, samba bulé nuomet'aké kam panguruat katet bagat Taikamanua. Ai gege ka tubut Taikamanua masiparon kam samba masipanguruat'aké ka tubumui panukanan, sinarek'akenennia ka sangamberi paamiannia

³³ Bulat beri peite kiddiyku, bulagat elé
leppei, ka tubudda kasei pá

³⁴ Kam lé siagai nia, bulat tubukku
lé amasigaba purimanuaiaku samba
purimanuaiatda saaleiku sipasitutum aku

³⁵ Ka sangamberinia lé akuaké
uluietmui, bulé nuagai kam,
pasimomomoaké tubu kelé néné
lé, iooi tarop'aké kam saaleita sitaiooi
tubu. Aipoí buítá tarepdem kam kelé ka
sikuat Tuhan Jesus, 'Sipasikakau peilé te
mauktuk, belé peilé sipasisisiló.'

³⁶ Oto kelé ailepá ipanibo si Paulus,
purekkukrangan leú et sangamberidda,
lepá paniddourangan leú et

³⁷ Iageti pusourangan sangamberidda,
lakkaiakérangan nia si Paulus,
kuaddangan ka matania, kaunumaangká
baga ka puenunganan

³⁸ Bulat simakopé reu-reu bagadda lé,
sarapei aikua ka matadda si Paulus,
taiiitsóra taan te raiitsó nia mitsá. Iageti
taroakérangan nia ka kapá.

21 ¹ Iageti segéakémaian katutui-
tuimai ka tubudda tai bajá ka
paamian Epesus, lepá kaddiuakémaian
sia. Oto pariu-riumaian nia mukapá ka
nusa Kos; samba matsepnia lé segé

kai ka nusa Rodos. Baramai sedda riu-riuakémaian nia mitsá mukapá, kuailiaké kai pelabuhan Patara

² Ka Patara ailimaian kapá sieei ka Penisia. Iageti sakai kai ka kapá nenda

³ Lepá tuimaian leú et, pat itsómaian nusat Siprus kai katsiumai, tápoi riu-riu lé akupukapá kai masiailiaké Siria.

Iageti jolou kai ka Tirus, aipoí sedda gau-gaurangan bibilet ka bagat kapá situtmai

⁴ Oto ei kai sedda masibalou sia simatonem бага ka tubut Jesus, iageti kuddu kai sedda ka tubudda sangamenggui burúnia. Ka sipinalulut Ketsat Sipunenan, pangantruddangan si Paulus, buí iei ka Jerusalem

⁵ Tápoi kelé aisappru tetrenia kukuddu kai sedda, kaddiuakémaian leú et sia, riu-riuakémaian puenungananmai. Oto sangamberidda sambat tainanalepra samba leú et tatogadda, oi masitaroaké kai kapplut laggaira. Sedda ka bet-bet coat, purekkukmaian maniddou

⁶ Lepá pasalammaian leú et, iageti sakai kai ka bagat kapá, oto ka sia leú et toili sia ka lalepra

⁷ Oto riu-riuakémaian leú mukapá, baramai ka Tirus segé ka Ptolemais. Eimaian leú sedda masibalou sia simatonem бага, masiroroi sia, iageti kuddu kai sedda ka tubudda sangagogoi burúnia

⁸ Matsep tuimaian leú et, segé ka Kaisarea. Ei kai sedda masibalou si epanggelis sipuoni si Pilipus, kuddu kai ka lalepnia. Nia néné te ka talagat sipitu sipiliy ka Jerusalem

⁹ Ai sia epat tatogania tainanalep aikau Taikamanua ka tubudda puaagai masipaarep katuareman simaerú sibara ka Taikamanua

¹⁰ Piga ngagogoi pá burúmai sedda, oi sara nabi sibara ka Judea sipuoni si Agabus

¹¹ Iageti taget'akénangan kai, alánangan apprat tangan Paulus. Oto serenangan rere sambat kabeinia, pelé ngangania, "Kisé te aikua Ketsat Sipunenan: Kelé kísé te rakabéaké nia tai Jahudi, samba rasegéaké nia ka kabeira taú sipuoni tai Jahudi, sibakkat apprat tenga néné, ka Jerusalem.

¹² Oto kelé akuarep kai nia sikuania néné, tiddoumaian nia simakopé

sambamai saalei sikukuddu ka Kesarea ka tubut Paulus, buían iei ka Jerusalem

¹³Tápoi aikua lé ka matamai, "Apangan lé lulunia nupusosou kam kelé kisé, pat bailiu kokkopé beunannia reu-reu bagakku? Aipoí tá sarat bulé ralabá aku akupatarek tubukku, tápoi beri matei kalulut Tuhan Jesus leú amatarek'an aku.

¹⁴Oto bulat tá iobá si Paulus iarepi sikuamai ka tubunia. Kalulut néné, ariakémaian kukera kai nia. Akukua lé kai ka kai, "Eddangan lé iteúaké nia si Tuhan.

¹⁵Kelé akukuddu kai sedda piga ngagogoi pá burúnia, tui-tui kai ka Jerusalem

¹⁶Oto ai sia piga pá saalei sibara ka Kesarea amoi masipaaleiaké kai, rataroaké kai ka lalep Manason; ka lalepnia lé poí kupugogogoi kai. (Si Manason néné iaté tai Siprus, amaburúan ka sia aimatonem bagania ka tubut Jesus.

¹⁷Kelé akusegé kai ka Jerusalem, silórgan kai saalei sedda ka angkat бага

¹⁸ Matsepnia lé, ei kai sambamai tai Paulus, masibalou si Jakobus. Ka sia tai bajá gareja, ai leú et sia sedda sangamberidda

¹⁹ Lepá akukau kai paroroiatmai ka tubudda, pungungan'akénangan nia si Paulus sangamberinia sigalaiakenen Taikamanua ka sigalaiakenennia, ka talagadda taú sipuoni tai Jahudi

²⁰ Kelé araarep nia sipunguan'akenen Paulus néné, umun'akérangan leú et Taikamanua sangamberidda. Lepá kuaddangan nia ka matat Paulus, "Ale, Sarainamai Paulus! Bulé nuagai nia. Amuribungan te sia igidda tai Jahudi simatonem бага ka tubut Jesus. Sangamberidda néné, iaté simareddet ka surukat Mose

²¹ Oto kineneiget araarep'an pangangantomannu sia sangamberi tai Jahudi sikukuddu ka talagadda sabangsa bagei, bulé ragalak'aké surukat Mose. Kuanungan ka matadda buí rasunat tatogadda, samba buí ragalaiaké siripot aratta tai Jahudi

²² Kineneiget tá isoppi raarep nia tai Jahudi simatonem бага kababaram

sené. Oto kipangan lé tapaeerú kam kineneiget

²³ Maerú peilé nutut nganturatmai. Ai sia epat igidda sené sigalai palelengan ka tubut Tuhan

²⁴ Kenan'an lé kam sambamui nubaraaké kam punen pasimagirat tubu, samba bulaganinungan sia, bulé ioi rasapu ka sia alaira, sapu tatá. Bulé imatoilá ka tubudda sangamberi sirimanua taipububulat sineseatnia siarepda pagalaiat tubum, aipoí ekeu leú et kekeu, ai leú nugagalaiaké surukat Mose

²⁵ Iageti ka sia taú sipuoni tai Jahudi simatonem бага ka tubut Jesus, akukauan kai surat ka tubudda masukua pagalaiat sitakkíakenenmai, iaté tá momoi rakom kan sibuluakenen ka bulungan, tá momoi rakom logau, elé rakom tarimeu sibutsit; samba tá momoi ragalaiaké pusilaingeat.

²⁶ Iageti einangan leú et si Paulus itut sia siepat néné, masibaraaké punen pasimagirat tubu matsep. Lepá gurú sia ka Uman Taikamanua masisegéaké, aipei piga ngagogoi ilelepá punen pasimagirat

tubu, samba itububuluaké nenda buluat buluakenen ka senen tubudda

²⁷ Tukakapplungan lé tetrenia sipitu ngagogoi sitetreakenen, itsóranan si Paulus tai Jahudi sibara ka Asia, ka Uman Taikamanua. Iageti patubbujiddangan bagadda sirimanua simigi, lepá omet'akérangan leú et nia si Paulus

²⁸ Airaomet'aké nia, ai sia mugegerei, masikua, "Ale kam tai Israel, rop'aké kam kai! Nia té néné sieei ka senen kudduat masipangantoman sangamberi sirimanua nganturat sipasisasaggangi tai Israel, samba sitaipaaakkup ka surukat Mose, samba sisaggangi Uman Taikamanua néné. Paobánangan pei bagei, aipaabbit'an sia taú sipuoni tai Jahudi ka Uman Taikamanua, kelé masipalolit kudduat sipunenan néné!

²⁹ (Arakua nia geti ka sia kelé néné, kalulut araitsó si Tropimus si Epesusna aipaaleiaké si Paulus; kabagadda poí aiabbit'an nia si Paulus ka Uman Taikamanua.

³⁰ Iageti malamaunangan sangaliot laggai. Oto pabalaurangan leú et sangamberi sirimanua raei parurú. Labáranan leú et nia si Paulus,

giritdangan nia rabelaaké nia ka bagat Uman Taikamanua. Ka tetret nenda leú et pat-pat'akérangan matatbaliu Uman Taikamanua

³¹ Ai peilé rapaaatu ka sia sibaraaké pulamagat néné ramateiaké si Paulus, ei sia sabagei masisegéaké ka tubut komandan tenterat Roma, kababarania pulamagat ka sangaliot laggai Jerusalem

³² Oto olaakénangan nia si komandan ialá piga pá tai perwira, sambat tai perajurit, iageti eirangan leú et ka kudduat pulamagat. Kelé araitsó si komandan sambat tai pasukannia, ariakérangan nia masipabóboki si Paulus

³³ Iageti taget'akénangan si Paulus si komandan, labánangan nia, kuanangan rakabéaké nia. Lepá nou-nounangan kasonia si Paulus néné samba aponia aigalai

³⁴ Ai sipasikukua kisé, ai leú et sia sabagei sipasikukua kisedda lé. Oto kalulut kopet beunannia pulamagat, taiagainangan pulelengan nia si komandan pagalaiat sibabara néné. Iageti kuanangan bulé raabbit si Paulus ka markasda tai tentera

³⁵ Kelé araaili ka orat, bulat pugaú-gaúrangan leú et simakopé sibaraaké pulamagat néné, pat bairatdangan leú et si Paulus tai perajurit

³⁶ Iageti tutrangan sia mungkuat sibaraaké pulamagat néné, ai ratutut sia ai sia muge-gerei masikua, "Mateiaké kam nia!

³⁷ Oto ai sia tugugurú ka markas, kuanangan ka matat komandan si Paulus, "Kipa, ale, momoi leú kupanibo goisó ka tubumui, ukkui?" Iageti kuanangan si komandan ka tubut Paulus, "Kipa, momoi leú nupanibo ka ngangan Junani

³⁸ Oto tá tai Misir ekeu elé, sibaraaké pulamagat siburú, lepá abbitnangan leú et epat ngaribu sia igidda sibaraaké pulamagat ka simatangeu?

³⁹ Kuana lé nia ka sia si Paulus, "Tai Jahudi lé aku, tai Tarsus, laggai simaarep erut oni ka Klikia. Obáaké peite kupanibo ka tubudda néné.

⁴⁰ Oto kelé aiobáaké nia si komandan ipanibo si Paulus, puriónangan si Paulus ka orat, kaunangan kabeinia kelé sara toggaiat ka tubudda. Iageti pumengmengrangan leú et. Lepá

panibonangan ka tubudda ka nga-ngan Iberani, pelé nga-ngania,

22¹ "Ale kam Saukkuimai samba Sasarainamai sangamberimui! Kukua peite kuanenku kukolouaké ka kam, pagalaiat tubukku. Arep'aké kam!

² Kelé araarep nia ipanibo si Paulus ka nga-ngan Iberani, kopé arapumeng-meng mitsá. Oto riuriuakénangan nia si Paulus ikolouaké nia

³ "Tai Jahudi lé aku néné. Akuputútú mata ka Tarsus ka laggai Klikia; tápoi akupuurau geti ka Jerusalem lé, samba aisikolah'aké aku, iaté sara guru sabeu sipuoni si Gamaliel ka pagalaiat surukat siaket Mose ka tubudda taikebbukatta. Kelé ngamangmui ka kam leú et sangamberimui sené gogoi néné, kaku leú et bulat mabesí ka bagakku mugalai galajet Taikamanua

⁴ Pat paoreikungan leú et sia teret matei sipasitutut arat sibau néné. Iageti palabakikkungan sia sangamberidda taimanteu sambat tainanalep, kaukungan sia ka bagat penjara

⁵ Bulat tá te bokokku, ai sia sené tai Imam Sabeu sambat tai Mahkama Puaranan, sipasimumuneng'aké. Aipoí

sia lé amasiaké ka tubukku surat abbinenku ka tubudda tai Jahudi ka Damsik. Oto surat nenda te kupapakei masipalabaki sia sedda simatonem бага ka tubut arat sibau, abbitkungan sia ka Jerusalem, ituukum'aké sia sedda.

⁶"Oto sinágó ai aku ka tangan enungan kei tuaili laggai Damsik, bara toro simakirisau sibara ka manua, masitoroji sangaliot tubukku

⁷Iageti belé aku ka polak, lepá arepkungan sara nga-nga sipasikukua ka tubukku, 'Saulus, Saulus! Angoi nupaoorei aku?

⁸Alegikku lé nia kaku, 'Kasonia ekeu?' Kuanangan ka matakku, 'Aku te néné Jesus tai Natsaret sipaoreinu.

⁹Oto beri ka sia leú et saaleiku, araitsó leú et ka sia toro, tápoi tá araarep nganga sipasiteteká aku

¹⁰Lepá kuakkungan nia mitsá kaku, 'Oto aponia kugagalai Tuhan?' Kuana lé nia ka matakku, 'Suruakéan ekeu, nuei ka Damsik. Seddangan lé kuakkungan nia ka matam sangamberi obaket bagat Taikamanua galaiakenennu.

¹¹ Oto pat peset matakku kalulut aialá matakku toro. Iageti paluluddangan aku saalei kuei kai ka laggai Damsik

¹² Ka Damsik ai sara sipuoni si Annanias. Simatopit samba simasurú ka surukat Mose lé nia. Sangamberidda tai Jahudi ka laggai Damsik, airahohormati nia

¹³ Oinangan leú et masibalou aku, puriónangan ka bé-béku, kuanangan ka matakku, 'Kauan imakoinong mitsá matam ale Saraina Saulus!' Oto niangan leú et nia, teilaakéku lé matakku, itsókungan nia

¹⁴ Lepá kuanangan ka matakku, 'Aipiliyan ekeu Taikamanuanda taiebbukatta, bulé nuagai siobat bagania, samba nuitsó Jesus, Pagugulet Taikamanua sipasigagalaia ké siobat bagat Taikamanua samba sipasiaarep nga-ngan Jesus

¹⁵ Ibabailiu te ekeu sipasimu-muneng'aké samba sipakakra ka tubudda sangamberi sirimanua, sangamberi siitsónu samba siarepnu

¹⁶ Oto kineneiget buían nupaburú nia. Kauan, suruaké ekeu, segéaké tubum bulé turaú. Pusoga ka tubut Tuhan, bulé tubelaaké ekeu ka sangamberi jom.'

¹⁷ "Lepá toili aku ka Jerusalem. Oto aiaku maniniddou ka Uman Taikamanua, sop-sopnangan ka tubukku Ketsat Sipunenan

¹⁸ Itsókungan leú et si Tuhan; iageti kuanangan ka matakku, 'Olaaké nukaddiuaké Jerusalem, aipoí tá raobá tai Jerusalem masisiló muneng'akenennu pagalaiat tubukku néné.

¹⁹ Kuakku lé nia, 'Bulat araagaian te simakopé Tuhan, gugurukikku uma paniddogat kulabá sia samba pabobó-bokikku sia simatonem бага ka tubum

²⁰ Kisedda leú te ka tetret aitumateiaké sipasimumuneng'aké ekeu sipuoni Sitepanus, ai aku sedda, samba aku leú et kaku akuteúaké aitumateiaké. Momoi takua, aku lé masijajago leppeira sipasimamateiaké.

²¹ Tápoi kuanangan mitsá ka matakku si Tuhan, 'Kenan'an lé, kukokoiniaké poí ekeu ka kudduat simareunan ka tubudda taú sipuoni tai Jahudi.'

²² Oto riu-riu lé raarepi ipanibo si Paulus. Tápoi kei lepá ipanibo, pugereirangan leú et masakua, "Mateiaké

lé kam nia sirimanua kelé néné. Táan mateú ipurimanua!

²³ Ai sia mugegerei, airapaguguu-guu saraubára, samba pataddúranan leú et abu

²⁴ Iageti kuanangan si komandan pasukan bulé raabbit si Paulus ka markas, bulé rapareksa nia simakopé, ituagai apangan lé lulunia rapugegereji nia tai Jahudi

²⁵ Kelé arakabéaké nia si Paulus bulé rapajiguji nia, kuanangan ka matat perwira sipuririó sedda si Paulus, "Kipa, momoi leú tupajiguji sia tai warga negara Roma, ké tápei atuadili sia?

²⁶ Arepna lé nia siperwira sikuat Paulus néné, einangan leú et ka tubut komandan pasukan, masikua ka matania, "Aponia nugagalaiaiké kam Ukkui? Aipoí warga negara Roma lé nia ka sia sinéné!

²⁷ Iageti einangan leú et si komandan ka tubut Paulus, kuanangan ka matania, "Kua peite ka matakku, warga negara Roma leú ekeu, ale!" Aletinangan nia si Paulus, "Oo, warga negara Roma lé aku néné.

²⁸ Kuanangan mitsa ka matat Paulus si komandan, "Akupuwarga negara

Roma kaku néné, bulat tá amagulai akubaya bulagat!" Tápoi kuana lé nia ka sia si Paulus, "Tápoi aku kaku geti, tú-túnangan matakku warga negara Romangan aku.

²⁹Oto ka tetret nendangan leú et sik-sikrangan tubudda sipasipapareksa si Paulus, samba ka sia si komandan leú et, bara lotónia, kalulut kakabéakéna si Paulus, aipoí warga negara Roma lé nia

³⁰Oto bulat aiikikiddiy si komandan, bulé iagai apa lulunia raseseleaké nia si Paulus néné. Kalulut néné, sogainangan tai imam sabeu sambat tai Mahkama Puaranana parurú. Iageti rugutdangan palegguinia si Paulus, abbitrangan nia ka matadda sangamberidda.

23 ¹Iageti kinerenangan sia tai anggota mahkama si Paulus, lepá kuanangan ka matadda, "Ale kam Sasaraina! Pat aili gogoi néné, bulat beri pei kuana ka paatuatku selenia sigalaiku ka tubut Taikamanua, siripot agai bagakku ka purimanuaiatku.

²Oto kelé aikua kelé néné si Paulus, koiniakénangan sipuririó ka bet-bet Paulus si Imam Sabeu Annanias, bulé itipak ngungun Paulus

³Iageti kuanangan ka matat imam sabeu si Paulus, "Bulat tá te isosoppi itipak ekeu kekeu Taikamanua, aipoí sirimanua sipatataju lé ekeu, sikau tubuna kelé simaliná! Kuddu ekeu sedda nuhakimi aku siripot surukat Mose, tápoi beringan ekeu leú et ai leú nupaaapa surukat kalulut anukoiniaké sia ratipak aku!

⁴Iageti kuaddangan nia ka sia sipukukuddu ka bet-bet Paulus ka tubut Paulus, "Anupaloloi koí imam sabeu Taikamanua!

⁵Oto kuanangan ka matadda si Paulus, "Ei, tá kuagai puiimam sabeu nia, ale kam Sasarina. Kirénangan tedda ai atusurat'aké ka Buko Sipunenan, sipasikukua, 'Buí nupaloloi siutéaké bangsam.'

⁶Kelé aiitsó nia si Paulus tai mahkama néné, ai tai Saduki, ai leú et sia sangarubeiat tai Parise, kuanangan ka matadda tai mahkama, "Ale kam Sasarina! Tai Parise lé aku, punuteteura tai Parise. Kalulut kakatonemikku katusuruat tubu simamatei lé atuadili aku sené.

⁷ Kuana lé kelé néné si Paulus, bara paukelatda tai Parise sambat tai Saduki, pat bailiu sia rua ngarubeiat

⁸ (Aipoí ka sia sipinaatutda tai Saduki, táan tususuru sia mitsá ka sia sirimanua simamatei, sambat samalaika tá anai sia, beri leú et ketsat tá anai. Tápoi ka sia geti tai Jahudi, matonem bagadda sangamberinia néné.

⁹ Oto bara pulamagat sabeu. Iageti puriórganan piga pá sia tai Parise sibailiu guru, bulat lawanrganan sia. Pelé nganganda, "Siripot sipinaatumai ka kai, bulat tá anai beri sara selenia sirimanua néné! Elé ai lé pá ketsat élé samalaika sipatiboaké nia!

¹⁰ Oto kopet kataínia paukeladda, pat bara karat bagania ka sia si komandan, babara memei sia sangamberidda ralabá si Paulus. Kalulut néné, koiniakénangan tai tenterania raei masialá si Paulus ka talagadda raabbit nia ka markasda

¹¹ Tápoi soibó nia mitsá, puriónangan Tuhan Jesus ka betbet Paulus, kuanangan ka matania, "Paron paatuatnu! Anumuneng'akéan aku ka Jerusalem. Oto buíta numuneng'aké aku leú et ka Roma.

¹² Oto maseggei peilé ka matsepnia nenda, taddaakérangan nia tai Jahudi masibaraaké mungkuatda. Pusupparangan tá mukokom samba tá muloló sia, ké tápei ramateiaké si Paulus

¹³ Ai sia epat ngapulu sia legei igidda sibaraaké mungkuat sikatai néné

¹⁴ Iageti eirangan leú et ka tubudda tai imam sabeu sambat ka tubudda tai bajára tai Jahudi masikua ka matadda, "Apakeréan bagamai musuppa, taipukokomma elé taipulolómai apa pá, ké tápei kumateiaké kai nia si Paulus

¹⁵ Oto kineneiget alé kam Sasaraina sambat kam leú et tai Mahkama Puaranan, bulé nukau kam surat ka tubut komandan tenterat Roma, nutiddou kam ka tubunia, bulé iabbít si Paulus mitsá ka tubumui, kéan lé baí nupapareksa lé kam mitsá pakaronia bulat sipulelelek. Tapoi kai ka kai amatarek'an kai muleket bulé kumateiaké kai nia, ainangan tá iaaili sené.

¹⁶ Tápoi kelé aiarep nia buánia si Paulus isiatda tai mungkuat néné bulé ramateiaké si Paulus, einangan leú et ka markas masisegéaké ka tubut Paulus

¹⁷ Iageti ka sia si Paulus, sogainangan sara perwira kuanangan ka matania, "Taroaké silainge néné ka tubut komandan, ai kuanennia apa pá ka tubunia.

¹⁸ Oto abbitnangan silainge néné si perwira ka tubut komandan, kuanangan ka matania, "Aisogai aku si Paulus siukum nenda, ikua kuabbit silainge néné ka tubum, Ukkui, ai kuanennia ka tubum.

¹⁹ Iageti alánangan kabei silainge néné si komandan raei ka bé-bé ruadda, kuanangan ka matania, "Aponia baí nusesegéaké ka tubukku?

²⁰ Aleginangan nia silainge, pelé nga-ngania, "Apakeréan bagada tai Jahudi, ratiddou ka tubum, bulé nuabbit si Paulus ka matat Mahkama Puaranan, kéan lé baí tupapareksa lé nia mitsá bulat sipulelelek

²¹ Bulat buí nuretdet tebaí nia paniddogatda néné, aipoí ai sia epat ngapulu legei igidda sipulilipput masilelekeni nia ka enungan. Amusuppangan sia sangamberidda taipukokomra samba taipulolóra ké tápei ramateiaké si Paulus. Kineneiget

amatarek'an sia, sarat masingena alegiatmuian lé, Ukkui.

²²Iageti kuanangan nia ka sia si komandan, "Buí tebaí nupoiliat nia ka tubudda kasei pá sesegéakénu nia pagalaiat néné ka tubukku." Lepá koiniakénangan nia silainge néné itoili

²³Iageti sogainangan rua tai perwira si komandan, kuanangan ka tubudda, "Tarek'ake rua ngotu sia igidda tai perajurit, samba pitu ngapulu sia igidda tai tentera sibara simuinébakkat, raei bó-bó siba sinoibó néné leú et ka Kesarea

²⁴Samba terek'akénungan leú kurónia ka sia si Paulus, abbitnungan nia pat segé ka angkat бага ka tubut Gubernur Pelik.

²⁵Oto galainangan suratnia si komandan sipasikukua kisé

²⁶"Ale Tuan Sabeu Gubernur Pelik. Segé salam sibara kai Klaudius Lisias

²⁷Aralabáan nia tai Jahudi sirimanua néné, bulat ai pei goisó ramateiaké nia. Maerú amei aku sambat tai pasukan, kalulut aarepku puwawarga negara Roma nia

²⁸ Oto obáku kuagai sele sigalainia aranganduaké nia, abbitkungan nia ka matadda tai Mahkama Puarananda

²⁹ Sedda toilá tatat sigalainia apa pá imateú tuukum nia ukuman simateiakenen, elé tupenjaraaké nia. Araseleaké nia geti, sarat pagalaiat siorak ka surukat aratda saradda lé

³⁰ Lepá mitsá kuaddangan ka matakku kababarania isiatda sikataí ka tubunia tai Jahudi. Bailiu akékungan nia ka tubumui Tuan Gubernur. Samba akukuangan leú et ka matadda sipasinga-nganduaké nia bulé raabbit surat panganduatda ka tubumui, Tuan.

³¹ Iageti enung'akérangan galajetda tai tentera néné. Eirangan leú et masialá si Paulus, abbitrangan nia soibónia nenda leú et ka Antipatris

³² Matsepnia lé teúakérangan nia bulé rariu-riuaké puenungananda tai pasukan sipukukuró sambadda tai Paulus, tápoi ka sia geti toili sia ka markas

³³ Oto kelé arasegé ka Kesarea, kaurangan leú et surat ka tubut Gubernur, iageti segéakérangan si Paulus ka tubunia

³⁴ Lepá aibatsa nia ka sia si gubernur surat nenda, nou-nounangan si Paulus, kaipa laggai kabaraiaitnia. Kelé aiagai kababara nia ka Klikia

³⁵ kuanangan, "Kauan, amaerúan! Buítá aku masipapareksa pakaromui, ké amoian bai sia sipasinga-nganduaké ekeu." Lepá kuanangan ka matadda, bulé tutahan nia si Paulus ka istanat Herodes.

24 ¹ Oto lima ngagogoi burúnia, ei sia tai Imam Sabeu Annanias sambat tai bajára tai Jahudi ka Kesarea sambat sara pengacara sipuoni si Tertullus. Iageti eirangan leú et ka tubut Gubernur Pelik, masinganduaké si Paulus

² Kelé aitusogai si Tertullus ka mata, joakénangan leú et si Paulus, pelé nga-ngania, "Ale Tuan Sabeu Gubernur! Ka tetret anupuuté, lelek puririmanuan laggaimai. Sambat kalulut sikut paatuatnu, amaingingan simaeerú ka bangsamai

³ Oto sangamberinia néné, kukua kai surá samba kuabeuaké kai onim ka senen kudduat

⁴Tápoi bulé buí imasibbu tetrem,
kutiddou bulé nuarepi panganduatmai
siteté néné

⁵Akuaili kai nia sirimanua néné
sibaraaké pulamagat bulat kalotóakenen.
Ka senen kudduat aibaraakéan
pulamagat ka talagadda tai Jahudi
samba aibailiuan nia sipasiuutéaké
pusaraatda tai Natsaret

⁶Sarapei bagei aipalolit'an Uman
Taikamanua, tápoi akulabáan kai nia.
[Aikupaaatu kai kuadili kai nia siripot
surukat aratmaian lé

⁷Tápoi aialá lé nia si komandan Lisias
ka talagamai

⁸sambat kuanangan bulé raoi sipasinga-
nganduaké nia ka tubumui, Tuan.] Oto
ké nupareksa baí nia sirimanua néné,
iapeité againungan pusisineseatnia
sangamberinia singanduakenenmai ka
kai pagalaiat tubunia.

⁹Beri leú et sia tai Jahudi sikukuddu
sedda, ai leu rajo-joaké si Paulus, samba
ai leú rakukua sesesena nia sangamberi
sikuat Tertullus néné

¹⁰Iageti kaunangan toggaiat si
gubernur ka tubut Paulus, masakua
momoian ipanibo. Oto taddaakénangan

nia si Paulus manibo, pelé nga-ngania,
 "Ai lé kuaagai piga ngarurangan pá
 burúnia anupuhakim ka laggai néné.
 Iaté lulunia imamangká bagakku kutiboi
 pagalaiat tubukku ka tubum

¹¹ Ai leú nuitsó nia bulat tubum, bulat
 tá aturitsí nia ka pulurua ngagogoi
 situsasabau, amei aku ka Jerusalem
 maniddou

¹² Bulat beri peite ailidda aku tai Jahudi,
 ai aku pagogolú ka tubudda kasei pá,
 elé akururúaké sirimanua kugalai kai
 pulamagat ka Uman Taikamanua, elé
 ka uma paniddogat, elé mitsá ka senen
 kudduat ka laggai néné

¹³ Sia leú ka sia sipasinga-nganduaké
 aku, tá momoi rapatoilá nia kelé siripot
 singanduakenenda ka tubum pagalaiat
 tubukku

¹⁴ Kirénangan tedda kuseseseaké
 ka matam Tuan, paniniddogikku
 Taikamanuanda taikebbukatmai
 siripot singantruakenen Jesus, kelé
 oniakenenda masele. Tápoi ai peilé
 kukakatonemi sangamberinia sitususurat
 ka Bukot Mose sambat ka Bukodda tai
 Nabi

¹⁵ Keré lé kai, kaku leú et aikukakaroni
baga ka Taikamanua katususurutda
sangamberi sirimanua simamatei,
iaté sirimanua simaerú paraboat, élé
sirimanua sikataí paraboat

¹⁶ Iaté lulunia bulat imaririu-riu
kujajago nia sipulelelek, bulé imaliná
pupaatuananku ka tubut Taikamanua
samba maliná leú et ka tubudda
sirimanua

¹⁷ Oto kelé aiaili piga ngarura pá
burúnia akukaddiuké Jerusalem néné,
toili aku mitsá sedda masitaroaké
paroman bulagat kaunen ka tubudda
sabangsakku, samba masibuluaké
buluakenen ka tubut Taikamanua

¹⁸ Aikugagalaiaké sangamberinia néné,
ailiddangan aku ka Uman Taikamanua,
lepat akugalai punen pumagirat tubukku.
Tá anai sia sirimanua simigi saaleiku,
samba tá anai leú et pulamagat ka tetret
nenda

¹⁹ Sarat piga lé pá sia tai Jahudi
sibabara ka Asia. Sia lé mateú momoi
sené masinga-nganduaké ka tubum,
ké ai baí nganduakenenda ka tubum
pagalaiat tubukku néné

²⁰ Elé siangan lé masipopoiliat aponia kataíku siitsóra ka tetret arataroaké aku ka matadda tai Mahkama Puaranan

²¹ Arasese geti iaté sarat sara lé nga-ngangku sikuakku ka matadda, iaté, Atuadili geti aku gogoi néné, kalulut kakatonemikku lé katususurudda mitsá sirimanua simamatei.

²² Oto ka sia si Pelik amaingingan aiagai pagalaiat ngantoman pagalaiat tubut Jesus, bailiu lepáakénangan sidang néné, kuanangan, "Teret oi nia si komandan Lisias, iapeité takkiakékungan pakaro néné.

²³ Iageti kuanangan ka matadda tai perwira sikokoiaenen masipasikeli si Paulus, bulé ratahan si Paulus, tápoi buítá rakau goisó puujaat tubunia samba raobáaké rakau ka tubunia saaleinia apa simagulai ka sia

²⁴ Piga ngagogoi pá atusabau oi nia si Pelik, sambat sinanalepnia sipuoni si Durusilla; tai Jahudi lé nia. Iageti kuanangan ka matadda si Pelik raalá si Paulus, lepá arep'akénangan ipanibo si Paulus si Pelik, itiboi pagalaiat mutonem бага ka tubut Jesus Kristus

²⁵Tápoi kelé airiu-riuaké ipanibo si Paulus, ikolouaké pagalaiat puroroipot бага sambat taimabot-bot akkulá samba leú et pagalaiat ukuman ka Gogoi Sialu, bara lotónia si Pelik, iageti kuanangan ka matat Paulus, "Momoian nutoili boikí kineneiget. Ai leú kusogai ekeu mitsá ké ai oggak.

²⁶Ka tetret nenda aikakaroni бага si Pelik ikau bulagat ka tubunia si Paulus. Iaté lulunia imarerei-rei ikua ka matadda rasogai si Paulus rapatibo

²⁷Kaplu rua ngarura burúnia, si Perkius'an lé amugubernur sailit Pelik. Tápoi kalulut ikau paalakat bagadda tai Jahudi ka tubunia, oreakénangan ikuddu si Paulus ka bagat penjara.

25 ¹Iageti kelé aiali telu ngagogoi burúnia aisegé si Pestus ka laggai nenda, einangan leú et barania ka Kesarea ka Jerusalem

²Oto sedda segéakérangan panganduatda tai imam sabeu sambat tai bajára tai Jahudi ka tubunia pagalaiat tubut Paulus. Bulat pusumrangan leú et si Pestus tai Jahudi

³kalulut erut bagania ka tubudda, kuanangan ka matadda rataroaké si

Paulus ka Jerusalem, apakeréan poí bagadda ramateiaké nia ka talagat enungan

⁴Tápoi aikua lé si Pestus ka matadda, "Ka sia si Paulus ai nia ka tahanan ka Kesarea; oto beri aku leú et kaku tá mauju toili aku mitsá sedda

⁵Ai leú nukoiniaké kam piga pá sia siabeu tiboí tubu ka talagamui aleiku mei ka Kesarea, nupakaro kam sedda, ké baí bulatnia ai sele sigalainia.

⁶Ai pá balu elé pulu ngagogoi burúnia aikuddu si Pestus ka Jerusalem, toili nia mitsá ka Kesarea. Oto matsepnia lé baraakénangan pupakaroat si Pestus, kuanangan ka matadda bulé raabbit si Paulus ka tubunia

⁷Kelé aisegé si Paulus, puriórangan leú et rageilik nia tai Jahudi sibara ka Jerusalem, iageti taddaakérangan rajoaké nia simakopé. Tápoi tá momoi rapatoilá bulat pusisineseatnia sikuadda néné

⁸Oto ikolouaké pagalaiat tubunia si Paulus, kuanangan ka matadda, "Bulat beri te akugalai apa pá sitaipasesese ka surukat Mose sambat ka Uman Taikamanua, elé ka tubut Kaisar Roma.

⁹Tápoi ka sia si Pestus aigagalai paalakat бага ka tubudda tai Jahudi. Oto kuanangan ka matat Paulus, "Kipa nuobá leú mei ka Jerusalem, bulé tuadili ekeu sedda ka matakku pagalaiat selem sisusúakenenda ka tubum?

¹⁰Kuana lé nia ka sia si Paulus ka matat Pestus, "Ai aku muririó kineneiget ka matat mahkama Kaisar Roma, samba buítá ka kudduat nenda te ituaadili aku. Beringan kam Ukkui, ai lé nuaagai kam taimaselekku ka tubudda tai Jahudi

¹¹Bulat ké lé baí akupasabauan surukat samba akugalaiakéan galajet simateú tuorak'aké ka tubukku ukuman simateiakenen, matarek lé aku matei. Tápoi ké tá sineseat sele sisusúakenenda ka tubukku, bulat beri sia sara tá momoi isegéaké aku ka tubudda. Paniddogatku, bulé ka pengadilan Kaisar'an lé ituaadili aku!

¹²Oto kelé arapatiboji nia sambadda penasehetnia si Pestus, kuanangan ka matat Paulus, "Anutiddou bulé tuadili ekeu ka pengadilan Kaisar; oto buítá nuei ka tubut Kaisar.

¹³Tá amauju, oi nia ka Kesarea Rimata Agrippa sambat si Bernike, masikua selamat ka tubut Pestus

¹⁴Kelé aiaili piga ngagogoi pá burúnia arakuddu sedda, kuanangan pagalaiat pakarot Paulus si Pestus ka tubut Rimata Agrippa. Pelé ngangania, "Ai sené sara tahanan sigalak'akenen Pelik

¹⁵Kelé akusegé ka Jerusalem, oi sia tai imam sabeu sambat tai bajára tai Jahudi rasegéaké panganduatda pagalaiat tubut Paulus, tiddourangan leú et ka tubukku bulé kuukum'aké nia

¹⁶Tápoi akukua lé ka sia, ka tai Roma tá matukle tusegéaké sara sirimanua ituukum'aké kalulut pasuk-sungan aigalai apa pá, ké sia suk-sungen néné tápei apatuggut sia mata sambadda sipasisusuk-suk, samba tukang leú et ka tubunia oggak ipoiliat sele, elé taimasele nia sigalainia

¹⁷Oto kelé araoi sené tá akuburúaké. Matsepnia lé baraakékungan pupakaroat sambat kuakkungan bulé rataroaké nia sirimanua nenda

¹⁸Tápoi kelé arapurió sipasijo-joaké nia, bulat beri sara arakua selenia kelé kiddiyet bagakku poilianenda ka tubukku

¹⁹ Sarat kalulut taimakeret sipinaatutda lé enung puarananda saradda, sambat pagalaiat sara sirimanua sipuoni Jesus. Amateian nia sirimanua nenda, tápoi maron nga-ngania si Paulus, ikua ai nia muririmanua

²⁰ Oto kalulut ingongku taiagaiku pasigabaiatku katukolobat pubakkanan pakaro nenda, kuakkungan kai Paulus, bulé iobá mei ka Jerusalem, ituadili nia sedda kalulut pasuksungan ka tubunia

²¹ Tápoi aitiddou lé ka sia si Paulus naik banding, samba aitiddou bulé mariu-riu ikuddu ka pat-pat teret takkiákéna pakaronia si Kaisar. Oto kuakkungan bulé mariu-riu ratahan nia teret ibara oggaku kukau nia ka tubut Kaisar.

²² Iageti kuanangan ka matat Pestus si Agrippa, "Beri aku kaku leú et kuobá kuarep pakaronia sirimanua nenda." Kuanangan nia ka sia si Pestus, "Matsep arepnungan nia.

²³ Oto matsepnia lé oi nia si Agrippa sambat si Bernike, bulat silórganan nia siripot siabeu tiboí tubu. Gurú sia ka pupakaroat sambadda siabeu tiboí tubu siutéaké pasaggangan samba sia leú et ka sia siabeu nia ka laggai nenda. Kalulut

parentania si Pestus, gurúakérangan nia ka бага si Paulus

²⁴Iageti kuanangan nia si Pestus, "Ale Baginda Agrippa samba sangamberimui siparururú sené! Aranganduakéan nia sangamberidda tai Jahudi ka tubukku sirimanua néné, iaté sia sikukuddu ka Jerusalem, samba leú et sia sikukuddu sené. Bulat sialei gerei lé arakua, táan mateú ipurimanua sirimanua néné

²⁵Tápoi beri sara tá akusese sigalaiakenennia sikau imateú ituukum'aké nia simateiakenen. Sambat kalulut bulat tubunangan poí amasitiddou bulé ka pengadilan Kaisar'an lé ituaadili nia, oto teúakékungan kukau nia ka tubut Kaisar

²⁶Tápoi tápei anai kaku bulat katukolobat sipulelelek pagalaiat tubunia néné, bulé ioi kugalai suratku kai Kaisar. Iaté lulunia akuabbat nia sené ka matamui ale kam Saukkuimai, sarapei bulat ka tubut Ukkui si Tuan Sabeu Agrippa! Sipinaatukku poí kaku, lepá pamareksaan néné, aian kuanenku ka surat

²⁷Aipoí ai lé iaagai tubukku taimateú nia tukang sara tahanan einangan tá

tukokolouaké sele sisusúakenen ka tubunia."

26¹ Iageti kuanangan ka matat Paulus si Agrippa, "Tuoobáaké ekeu nukua taimaselem." Oto totoiakénangan kabeinia si Paulus, taddaakénangan nia si Paulus itiboi pagalaiat taimaselenia, kisé

² "Ukkuimai Tuan Sabeu Agrippa! Bulat mauktuk aku kalulut kaooi nia kukua taimasele nia sigalaiku ka tubut Baginda, pagalaiat sangamberi panganduatda tai Jahudi siorak ka tubukku

³ paobánangan pei bagei bulat ai lé nuaagai kam ale Baginda pagalaiat arat tubudda tai Jahudi samba sangamberinia sibabara ka tai Jahudi. Oto kalulut néné kutiddou ka kam Baginda, bulé nuobá kam masiarepi tiboietku néné ka om бага

⁴ Ai lé raaagai sangamberidda tai Jahudi pagalaiat puririmanuangku, barania ka silaingekku peilé. Ai lé raaagai taddanangan aku lainge tubukku, aian aku mukukuddu ka talagadda sabangsakku ka Jerusalem

⁵ Amaburúan araagai aku. Sambat ké raobá baí nia, momoi ramuneng'aké nia,

bulat panandaatnia peilé akutaddaakéan
muparise, kureddet sangamberi
surukatnia simaron ka puarananmai

⁶Oto kineneiget kupuririó sené bulé
tuadili aku, kalulut tonem bagakku
ka palelengan sigalai Taikamanua ka
tubudda taikebbukatmai

⁷Pakerekat бага nenda te
rakakaroni бага ka sia sipulurua
ngasuku ka bangsa Israel, pat
paniddogiddangan Taikamanua sinágó
sambat sinoibó. Kalulut tonem bagakku
ka palelengan néné, Baginda tuan sabeu,
seleakérangan aku tai Jahudi

⁸Oto apangan lé lulunia tá
nukakatonemi kam nia бага kam
saalei tai Jahudi susuruakéna sia mitsá
simamatei Taikamanua

⁹Beri aku leú et siburú, akupaatu buítá
kugalaiaké apa pá masisaggangi Jesus
tai Natsaret

¹⁰Kirénangan nenda te akugalaiaké ka
Jerusalem. Oto kalulut surat kuasa sibara
ka tai imam sabeu, bailiu bulat maigi
sia simasurú ka Taikamanua akukau
ka bagat penjara. Beri aku kaku leú et
bulat aikuteteúaké bulé tuukum'aké sia
ukuman simateiakenen

¹¹ Bulat maigi sia akupaorei ka uma paniddogat, bulé raputatá nia katonemietda. Bulat maorik bagakku ka tubudda, pat ei aku ka laggai bagei kukukru sia sedda.

¹² "Oto nenda leú te paatuatku akuabbt surat kuasa sibara ka tai imam sabeu akuei ka Damsik

¹³ Iageti sinágó, ai aku ka tangan enungan, ale Baginda tuan sabeu, itsókungan leú et sara toro sibara ka manua, saliu peilé torot matat sulu toronia. Oto toro nenda torojinangan sangaliot tubukku sambat sangaliot tubudda saaleiku sipaaleiaké aku ka puenunganan

¹⁴ Iageti belé kai sangamberimai ka polak. Lepá arepkungan leú et nga-nga sipasikukua ka tubukku ka nga-ngan Ibrani, 'Saulus, Saulus! Tá koí nuaariaké nupaorei aku? Tubum leú te masioorik, ké nuriu-riuaké nusaggangi pupasikelanannia sibailiu tuannu.

¹⁵ Iageti kuakkungan nia, 'Kasonia ekeu, Tuan?' Aleginangan nia ka sia si Tuhan, 'Aku té néné Jesus sipaoreinu

¹⁶ Suruakéan ekeu, lepá puriónungan! Kupatotoilá poí tubukku ka tubum,

bulé kupauddet ekeu bailiu sipuukú galajetku. Buítá nusegéaké ka tubudda sabagei sangamberinia siitsónu gogoi néné pagalaiat tubukku, sambat sangamberinia sipatoiláku ka tubum ka gogoi sibabara

¹⁷ Ai leú kubelaaké ekeu ka kabeira bangsa Israel samba ka kabeira sabangsa bagei taú sipuoni tai Jahudi. Kukokoiniaké te ekeu ka tubudda

¹⁸ bulé nubukaaké matadda, rabela ka pugepgepman, ratugurú ka pató; rabela ka pajoat Sanitu, iageti kup-kup'akénangan sia Taikamanua. Oto kalulut tonem bagadda ka tubukku, appéakénangan jodda Taikamanua, samba bailiunangan sia sikauman Taikamanua sipiliynia.'

¹⁹ "Kalulut néné, alé Baginda Agrippa, bulat mariu-riu kureddet apa siitsot matakku, sisilóku sibara ka Taikamanua

²⁰ Oto tá kugigí-gí kukua nia ka tubudda sirimanua, buítá rabauaké paatuatda, samba rasegéaké tubudda ka tubut Taikamanua, samba kau leú rapatoilá nia ka paraboatda babauakéra paatuatda ka jodda. Ka tai Damsik te akukua nia boikí, lepá ka tubuddangan ka sia tai

Jerusalem sambat ka sangaliot Judea,
samba leú et ka talagadda taú sipuoni
tai Jahudi

²¹ Niangan té aikabaraji aralabá aku
tai Jahudi ka Uman Taikamanua, iageti
isiakérangan leú et ramateiaké aku

²² Tápoi teret kineneiget ai lé isasakkeri
aku Taikamanua, pat oi kupurió sené,
kupasimuneng'aké pagalaiat Jesus
ka tubudda sangamberi sirimanua,
sigoisó samba sabeu. Oto sangamberinia
sikuakku néné, tá aijulut kelé ka
siniblaakenenda tai nabi sambat si Mose,
sipasikukua

²³ buítá mangorik nia Rimata Sipaarau
sitonéakenen Taikamanua néné, samba
ibailiu nia sara sirimanua sitususuru
siboikí ka simamatei, bulé kalulut
néné, oi ipaarep pagalaiat pató, iaté
puaragatda tai Jahudi, samba sia taú
sipuoni tai Jahudi.

²⁴ Oto aikokolouaké si Paulus taimaselet
sigalainia, pugereinangan leú et si
Pestus, masikua, "Airoróan ekeu Paulus!
Igit siagainu néné te aibara rorónu!

²⁵ Tápoi kuana lé nia ka sia si Paulus ka
tubut Pestus, "Tá maroró aku, alé Tuan
Sabeu. Sangamberinia sikuakku néné,

bulat sineseat, samba bulat sibara ka
paatuatku simakolou lé

²⁶ Bulat ai lé poí iaagai sipulelelek
ka sia Baginda Agrippa sangamberinia
néné. Iaté lulunia tá kugigí-gí kupanibo
simakolou ka matat Baginda. Matonem
bagakku, bulat beri sara ka talagat
sipuaaili néné, taiaagaiet Baginda, aipoí
tá ka simalipput aipuaaili sangamberinia
sibabara néné

²⁷ Ale Tuan Sabeu Baginda Agrippa,
kipa matonem leú bagam ka sikuat nabi?
Kupaatu matonem bagamui, Baginda!

²⁸ Iageti kuanangan ka matat Paulus
si Agrippa, "Ka bagam te malabbei
nu-Kariten'aké aku ka oggak siteté néné,
elé?

²⁹ Tápoi kuana lé nia ka sia si
Paulus, "Elé ka oggak siteté pá, elé ka
oggak simananta, kutiddou ka tubut
Taikamanua, bulé kam alé Baginda
sambat kam leú et sangamberimui
saukkuimai sipasiaarep tiboietku gogoi
néné, bailiu kelé aku néné, táan leú
takukua ka sia ka palenggui néné!

³⁰ Kalepakatnia, puriórgan leú et,
baginda rimata néné, si gubernur sambat

si Bernike, sambat sangamberidda sabagei

³¹ Oto kelé arabela ka gerat, patiboddangan pasasambadda, "Bulat beri sara aigalai apa pá simateú tuorak'aké ka tubunia ukuman simateiakenen, elé tupenjaraaké.

³² Iageti kuanangan si Agrippa ka tubut Pestus, "Momoian itubelaaké nia sinéné, ké baí tá ibesiaké ituadili pakaronia ka pengadilan Kaisar."

27 ¹ Kelé aipakeré bagamai kuei kai mulajo ka Italia, kaurangan sia tai Paulus sambat tai tahanan sabagei ka tubut Julius, iaté perwira tenterat Roma kuanenda, "Resimen Kaisar.

² Iageti sakai kai ka kapá sibabara ka Adramitium, oto tutmaian kapá nenda, arapatarek'an tubudda mulajo ka pelabuhan propinsi Asia. Ka sia si Aristarkus tai Makedonia, sibabara ka Tessalonika, amoi leú et nia masipaaleiaké kai

³ Oto matsepnia lé segé kai ka laggai Sidon. Bulat makopé erú nia si Julius ka tubut Paulus. Aioobáaké ibalou saaleinia si Paulus, bulé rakau apa pá simagulai ka sia

⁴ Baramai sedda, riu-riuakémaian puabanganmai. Tápoi kalulut ai lé kususosro kai rusa, puabakmaian ka puriringan nusa Siprus, kalulut aisasakkeri kai goisó rusa sedda

⁵ Lepá abangimaian koat simaipó ka Klikia sambat Pampilia, iageti segé kai ka Mira ka laggai Likia

⁶ Sedda, ailinangan si perwira sara kapá sibabara ka Aleksandria siisiaké mulajo ka Italia. Iageti kaunangan leú et kai ka kapá nenda

⁷ Piga ngagogoi pá akupukapá kai; tápoi bulat tá manangká kutui-tui kai, samba bulat siagai kabagangan lé, segé kai, kelé reunan nia ka laggai Kinidus. Oto kalulut kataí manua, taioinangan kuriu-riuaké kai puabanganmai ka ipot eijatmai siboikí. Bailiu puabakmaian ka isit kayaman nusat Kereta, kusabauaké kai Tunang Salmone, bulé isakkeri kai ka rusa

⁸ Bulat siagai kabaga lé kuabangi kai puriringan nusa nenda, pat segé kai ka sara kudduat sipuoni Pelabuhan Simalainge, tá leú bulat areu nia ka laggai Lasea

⁹ Ka tetret nenda, atusabauan Punen Paabananda tai Jahudi. Amaingingan tetremai amasibbu, oto aisaliuan tetrenia puabangan simalebak. Kalulut néné, kaunangan panganturat ka tubudda, si Paulus, pelé ngangania

¹⁰ "Ale kam Sasaraina, siripot sipinaatukku kaku, bulat makataí te ké tariu-riuaké bai kam puabanganta néné. Bulat marurugi te sita simakopé, purugiatta néné, tá sarat bibilet ka bagat kapáta, elé kapáta, beri leú et enganta malilimai.

¹¹ Tápoi ka sia geti si perwira, matonem peilé bagania ka tubut jurumudi, belé peilé ka tubut Paulus

¹² Paobánangan pei begei pelabuhan nenda tá maerú ikuddu sedda kapá, ka tetret gogoi simaleppet. Lulut néné maigi sia tatogat kapá siobá masiriu-riuaké muabak mitsá rakaddiuaké pelabuhan nenda, rabesíaké rasegé ka Penik, iageti kuddu sia sedda teret kapplut gogoi simaleppet. Penik néné, iaté sara pelabuhan ka Kereta simattai ka usut buggei samba leú et sikaolak

¹³ Ka tetret nenda, aimuboboroi goisó ka sia rusa kayaman, bulat leppet

lepá. Oto ka bagaddangan lé te ka sia
tatogat kapá momoian rapulajo. Iageti
tattanrangan sao, puabakmaian leú et
ka puri-ringan nusa Kreta

¹⁴Tápoi tá amauju buraakénangan
rusa simapiret, iaté rusa Sikalaut Baré,
siburaakenennia sibabara ka leleu

¹⁵Iageti papau-paunangan kapámai.
Oto kalulut taiooi nia kusososro kai rusa,
obáakémaian ireu-reuaké kapámai rusa

¹⁶Kelé akusabau kai saigit kayaman
nusat Kauda sigoisó, sakkerinangan kai
goisó. Oto bulat siagai kabagangan lé
sedda oi kupasikeli kai sikotsit kapámai

¹⁷Kelé aioi akutik-tik kai sikotsi ka bagat
kapá, paronmaian kapá; akuappraaké
kai tali ka tubut kapá. Kalulut lotómai
babara tusasagga kapámai ka buggei
simakale ka Sirtis, gorosot'akémaian
lajomai, bailiu tenan lé kai obáaké
kapámai ireureuaké nia rusa

¹⁸Ka sia rusa riu-riu lé iburaaké nia,
oto matsepnia lé paribbaimaian bibilet
ka bagat kapá ka koat

¹⁹Matsepnia mitsá, bulat tubuddangan
lé tatogat kapá amasiparibbai pugalai
kapá ka koat

²⁰ Piga ngagogoi pá burúnia tá akuitsó kai matat sulu sambat panyanyat, samba ka sia rusa leú, riu-riunia le iburaaké nia. Oto pat táan akukaroni kai бага puririmanuamai

²¹ Piga ngagogoi pá tá arapukom. Iageti ei nia si Paulus murió ka talagadda kuanangan ka matadda, "Ale kam Sasarainamai! Ké nureddet baí kam sikuakku tá tariu-riuaké mulajo ka Kreta, tá babara simakakataí sambat tá marurugi sita

²² Tápoi kineneiget leú et, kutiddou simaron ka tubumui, bulé nupusurá kam бага. Aipoí bulat beri te kam sara ka talagamui simamatei; sarat kapáta lé malilimai

²³ Aipoí soibó amoi malaikat Taikamanua paniddogietku, iaté Taikamanua sibakkat aku

²⁴ Aikua malaika ka matakku, 'Buí numalotó, Paulus! Aipoí buítá mei ekeu ka tubut Kaisar. Oto kalulut erut bagat Taikamanua ka tubum, sambat kalulum, maselamatdangan leú et ka sia sabagei.

²⁵ Kalulut néné, ale kam Sasaraina, kau imaangká bagamui! Aipoí matonem

bagakku ka tubut Taikamanua, puaaili
nia sangamberi sikuania ka tubukku

²⁶ Tápoi buítá tusagga sita ka sara nusa.

²⁷ Kapuluepat ngasoibónia, ai peilé kai
mutetebbuk ka Laut Adria. Elé tengamoi
pá, againangan tubudda tatogat kapá
legremai ka kapí

²⁸ Iageti toak'akérangan tali sibara
bukkú, masijuujugi kerut bagat koat. Oto
ai pá epat ngapulu ngameter kerunia.
Tá amanju juu-jugiddangan nia mitsá,
agairangan kerut koat ka ipóra ai telu
ngapulu ngameter kerunia

²⁹ Kalulut lotóra itusaggat kapá ka
bukkú, kaurangan epat ngambua sao
ka murit kapá, karoniddangan бага ké
momoi lé baí nia maola tutuitui sedda

³⁰ Iageti ka sia tatogat kapá,
sipinakele, tui sia rakaddiuaké kapá.
Gorosot'akérangan sikotsi, ké lé baí
airabebele sao ka utet kapá

³¹ Oto kuanangan ka matadda tai
perwira sambat tai perajurit sikukuddu
ka kapá, si Paulus, "Ké tá baí mukuddu
sia ka bagat kapá néné tatogat kapá,
bulat beri te sia sara sipuririmanua.

³² Iageti tippúrangan nia talit sikotsi
tatogat kapá, maraggainangan leú et

³³ Kei mapató, ná-nánangan sia si Paulus bulé rapukom sangamberidda. Pelé nga-ngania, "Aiailingan pulu epat ngagogoi burúnia sarat pasingengenaaké tubu lé kam ka bagat karat бага samba taipukomom apa pá

³⁴ Oto kutiddou ka kam bulé nupukom kam goisó. Aipoí nenda lé simaerú, bulé imaron tubumui mitsá. Sangamberimui poí néné maseselamat lé kam, samba tá anai simagulai ka kam apa pá.

³⁵ Lepá aikua kelé néné si Paulus, alánangan roti, kuanangan surá ka tubut Tuhan, ka matadda sangamberidda. Iageti parubeinangan leú et nia roti ka tubudda, pukomrangan leú et

³⁶ Oto maronnangan mitsá tubudda, eirangan leú et ka sia sabagei mukom

³⁷ Ai sia rua ngotu pitu ngapulu igidda ka bagat kapá

³⁸ Kelé aramaektek sangamberidda, ribbaiakérangan gandum ka bagat kapá ka coat, bulé imanangká kapá

³⁹ Oto kelé aimapató, itsóranan buggei ka sia tatogat kapá, tápoi tá raagai tobbou apa páonia nenda. Itsóranan leú et sara gukguk sambat buggeinia.

Iageti siboddangan masijolouaké sedda kapá, ké moi baí nia

⁴⁰Oto saggritdangan talit sao, kuddu ka sia sao ka bagat koat. Lepá rugutrangan leú et tali seseret murit kapá. Lepá karaíakérangan leú et lajo ka utet kapá, bulé iboroi kapá iei ka kapí

⁴¹Tápoi aisaggat lé nia ngaí ka kale, iageti saggat ka sia utet kapá, oto ottotnangan nia, pabuubuginangan leú et nia onu sabeu ka sia murit kapá, iageti maragatnangan leú et

⁴²Iageti isiakérangan nia tai perajurit ramateiaké sangamberidda tai tahanan, kalulut seddéra rabara sipulalak ka kapí, iageti tui-tuirangan leú et

⁴³Tápoi aiolei lé bagadda ka sipinaatutda néné tai perajurit, kalulut obára raselamat'aké si Paulus. Kuaddangan ka tubudda siagai mulalak, raputeipu boikí ka koat, iageti pulalakrangan ka kapí

⁴⁴Ka sia sabagei leú, buítá raei masitut'aké sia, raalá lalakra lappri, elé karagatat kapá. Oto kisedda te akugalaiaké kai akumaselamat kai, pat segé ka kapí.

28 ¹Kelé akutusappai kai ka angkat бага, iapeité agaimaian pununusat Malta nia

²Bulat matopit sia sikukuddu ka nusa nenda. Silóranan kai sangamberidda simalelek, samba rusuirangan api purakaatmai kalulut aitaddaakéan ibelé urat, samba manua leú et maleppet

³Iageti ei si Paulus masirurúaké ngaimang purusu, kaunangan nia ka api. Oto airururúaké ngaimang, bojjlo sangamuneng ulou, kalulut oloi api, pilanangan kabei Paulus

⁴Kelé araitsó nia sikukuddu ka nusa nenda iputoak ulou ka kabei Paulus, patiboddangan pasasambadda, "Bulat sipasimamatei sirimanua lé sirimanua néné, kalulut kenanen abelangan nia ka onut koat, tápoi ka sia Dewit Puroipoat, tá ioobáaké ipurimanua.

⁵Tápoi kelé aisó-sóaké ulou nenda si Paulus, ka api, bulat beri goisó tá aipulaplapi nia

⁶Arapaatu ka sia tá mauju pugónangan leú et kabei Paulus, elé tulut belé nia matei. Tápoi kelé aimaburú ranguanaaké tubudda, tá anai apa paonia sibabara kiseiet ka tubut Paulus, oto kiséan lé

arakua, dewa lépa nia ka sia néné, si Paulus

⁷ Ka bet-bet kudduatmai sedda, ai sangamata monen Publius, simaabeu tiboí tubu ka nusa nenda. Bulat ka erut bagania silónangan kai ka lalepnia telu ngagogoi burúnia

⁸ Ka tetret nenda, ai nia mabebesí ka sia ukkuinia, ai roketnia samba logau ka kannia. Iageti einangan leú et si Paulus masibalou ukkui, simabesi, tiddouakénangan nia ka Taikamanua samba tonem'akénangan kabeinia si Paulus ka tubunia, iageti ale-aimale besínia

⁹ Oto kalulut sibabara néné, bailiu eirangan leú et sangamberidda simabesi ka nusa ka tubut Paulus, iageti aleakénangan sia

¹⁰ Akérangan leú ka kai panguruatda, samba kelé akuteúaké kai mulajo, taroakérangan sangamberi balutmai ka puabangan

¹¹ Telu ngalaggó burúnia akukuddu kai sedda, tui kai ka nusa nenda, sakai kai ka sara kapá sibara ka Aleksandria, sipusasao sedda burut aibara leppet manua ka nusa nenda. Kapá nenda ai

lambangnia, iaté "Dewa Tairua, si Kastor sambat si Poluks.

¹² Pusaomaian ka laggai Sirakusa, iageti kuddu kai sedda telu ngagogoi burúnia

¹³ Oto baramai sedda pulajomaian mitsá masiriringi bet-bet koat, pat segé ka Regium. Matsepnia lé akénangan rusa kayaman, pat aili rua ngagogoi burúnia segé kai ka laggai Putioli

¹⁴ Iageti paailimaian sedda simatonem бага ka tubut Jesus, oto kalulut paniddogatda, kuddu kai sedda ka tubudda sangamenggui burúnia. Lepá riuriuakémaian nia mei ka Roma

¹⁵ Arepda lé nia saalei ka Roma simatonem бага ka tubut Jesus, oirangan leú et ka Pasar Apius sambat ka Pasanggrahan Telu, masisiló kaooimai. Kelé aiaili sia si Paulus, kuanangan surá ka tubut Taikamanua, samba bara om bagania

¹⁶ Kelé arasegé ka Roma, obáakérangan ikuddu sarania si Paulus, tápoi buítá ijago nia sara perajurit

¹⁷ Telu ngagogoi atusabau, sogainangan sia siabeu tiboí tubu ka tai Jahudi. Kelé araparurú kuanangan ka matadda, "Ale kam Sasaraina! Bulat beri te akugalai

sele ka bangsatta, elé akupasabau
 arat simatukle ka sita sisilóta ka
 taikebbukatta. Tápoi kenanen kisedda,
 aralabá peilé aku ka Jerusalem,
 segéakérangan aku ka kabeira tai Roma

¹⁸ Kelé arapareksa pakarokku,
 obáranan rabelaaké aku, aipoí
 tá akugalai beri sara sele simateú
 ituorak'aké ka tubukku ukuman
 simateiakenen

¹⁹ Tápoi kalulut ai lé rakekeláaké
 paatuatda tai Jahudi, oto tiddoukungan
 bulé ituadili pakarokku néné ka
 pengadilan Kaisar Roma. Akugalaiaké
 kelé néné geti, tá te kalulut kababarat
 nganduakenenku pagalaiat tubudda
 sabangsakku

²⁰ Nia té lulunia akutiddou tapaaili kam,
 bulé tapatibo kam; aipoí aitupaleggi
 aku, kalulut kukuakku lé Sipaarau
 karonietda sabangsa Israel.

²¹ Iageti kuaddangan ka matania,
 "Bulat beri peite silómai surat sibara ka
 Judea, masikolouaké pagalaiat tubum,
 ale Saraina. Samba mitsá bulat beri
 peite sia sara siooi masisegéaké, elé
 masitiboi ka kai pagalaiat tubum sikataí

²² Tápoi bulat aikukikiddiy kai kuarep kai putotonem bagam, akuarep'an poí kai palololoira nia arat sienung'akenennu.

²³ Iageti pakerénangan bagadda rateúaké sara tetre parurukatda. Oto ka tetret nenda, maigi sia amei ka kudduat Paulus. Barania simatsep, pat aili ka soibokat ikolouaké samba isegéaké pagalaiat Purimataat Taikamanua. Alánangan ruang sibara ka Bukot Mose sambat Bukotda tai Nabi, si Paulus, ibesíaké imatonem bagadda ka tubut Jesus

²⁴ Oto ai sia simatonem бага ka sikuat Paulus, tápoi ai leú sia sitaimatonem бага

²⁵ Ai peilé sia tá pakekeré бага, kaddiuakérangan leú et kudduat Paulus, ka tetret aikua mitsá ka matadda si Paulus kelé néné, "Kirénangan bulat amuailingan kelé ka sikuat Ketsat Sipunenan ka sikuat Nabi Jesayas ka tubudda taikebbukatmui

²⁶ Aikua Taikamanua 'Kenan nukua ka matadda sabangsa néné: Mariu-riu lé nuarep kam nia, tápoi tá ainuaagai kam kolounia; mariu-riu lé nulelek'aké kam nia tápoi tá nuagai kam apa sipuaaili

²⁷ Aipoí aikummúan pupaaturananda bangsa néné, aitaikkep'an piúra arauneng'akéan matadda. Aibara kelé néné geti bulé buí imakoinong matadda, samba buí imaarep piúra, buí imakolou ka bagadda, samba bulé buí ratoili ka tubukku, iageti aleakékungan sia.'

²⁸ Kalepakatnia kuanangan ka matadda si Paulus, "Bulé nuagai kam nia ale kam Sasaraina, katuareman pagalaiat puaragat sibara ka Taikamanua, atupaarep'an te kineneiget ka tubudda taú sipuoni bangsa Jahudi. Oto araturut'akéan ka sia!

²⁹ [Kelé aikua kelé néné si Paulus, kaddiukérangan kudduat nenda tai Jahudi, ai sia mututui-tui, ai sia pauukle pasasambadda.

³⁰ Rua ngarura burúnia aikuddu si Paulus ka Roma, ka lalep sisewania. Bulat mangká bagania si Paulus masisiló kaooira sipasibabalou nia

³¹ Tá amagilá nia si Paulus masisegéaké ka tubudda pagalaiat Purimataat Taikamanua, sambat pagalaiat Tuhan Jesus Kristus. Bulat beri sara pasailaat, igalaiaké néné, si Paulus.

Roma

1 ¹Ale kam sangamberimui
Sasarainamai ka Roma simanuntut
bagat Taikamanua, sambat sinogai
Taikamanua bailiu sikaumania.

Aipauddet'an samba aipiliyan aku
Taikamanua kelé sara sikokoiakenen
bailiu sipaarep Katuareman Simaerú

²Aipoí Katuareman Simaerú néné,
aipatonéan Taikamanua barania ka
siburú peilé ka sikuadda tai nabinia kelé
ka sitususurat ka Buko Sipunenan

³Katuareman Simaerú néné, iate
siorak pagalaiat Togat Taikamanua,
iaté Tuhanta Jesus Kristus. Siripot ka
pusirimanuaat, nia néné punuteteu
Dapid lé

⁴tápoi siripot ka putaikamanuaat
geti, nia néné iaté Togat Taikamanua.
Aimatoilá néné, iaté ka gegenia simaron
ka katusuruatnia ka simamatei

⁵Samba nia leú te aiaké kaku panguruat
aibailiu aku apostel, kapasiaabeuakéku
onin Kristus, palulukungan sia

sangamberi bangsa ramatonem бага
samba ramareddet

⁶Oto sené oniakenen sangamberi
bangsa, iaté kam leú et sikukuddu
ka Roma; aipoí kam leú et ka kam,
aisogaian kam Taikamanua, bulé ibailiu
kam sapaamian Jesus Kristus

⁷Iaté lulunia akugalai suratku néné ka
tubumui. Bulé ipanukani samba ibujai
kam Taikamanua Ukkuita samba Tuhanta
Jesus Kristus

⁸Boikí ka onin Jesus Kristus, kukua
surá ka tubut Taikamanua, kalulumui
sangamberimui; aipoí sangamberi
sirimanua ka polak néné, araarep'an
putotonem bagamui simakopé ka tubut
Kristus

⁹Mariu-riu lé kurepdem kam ka
paniddogatku. Ai lé isasaksiaké
Taikamanua pusisibulatnia sikuakku
néné. Taikamanua nenda te pasikelietku
bulat sibara ka muinet paatuatku
masipaarep Katuareman Simaerú
pagalaiat Togania

¹⁰Bulat akutiddouan simakopé ka
tubut Taikamanua, bulé iobaáaké kuoi
kineneiget kubalou kam

¹¹ Aipoí bulat aian kukikiddiy simakopé, tapaaili kam bulé ioi kuaké ka kam panguruat Ketsat Sipunenan, imaron pupaaturanmui

¹² Kukukua kelé néné geti, kalulut amakeréan atamatonem kam бага ka tubut Jesus Kristus, bailiu oi tapasopo kam katubu

¹³ Ale kam Sasaraina! Bulé nuagai kam nia, bulat amakopéan akubesíaké kubalou kam, tápoi sarat ai lé pasailaatnia. Beri ka talagamui leú et ka kam, aikuobá ibara buania sigalaiakenenku, kelé aipubua ka sigalaiakenenku ka talagada ka sia taú sipuoni tai Jahudi, ka kudduat bagei

¹⁴ Aipoí ai galaiakenenku ka tubudda sangamberi bangsa; siagai arat samba ka tubudda sitaiagai arat, sipusisikola samba sitaipusisikola peilé

¹⁵ Iaté lulunia kubebesíaké kusegé'aké Katuareman Simaerú néné ka tubumui ka kam leú et sikukuddu ka Roma

¹⁶ Bulat matonem bagakku simakopé ka tubut Katuareman Simaerú néné, kalulut katuareman néné, iaté sara gege sibara ka Taikamanua, masipaarau

sangambaridda simatonem бага; siboikí iaté, tai Jahudi, lepá sabangsa bageian

¹⁷ Aipoí kalulut Katuareman Simaerú, patoilánangan nia Taikamanua, kipa aipaerú aioi aipatabbra mitsá sirimanua ka tubut Taikamanua; enungnia geti, iaté tukatonemi Taikamanua barania ka panandaatnia, pat aili ka kalepakatnia. Bulé ipuaili kelé ka sitususurat ka Buko Sipunenan sipasikukua kisé, "Simatonem бага ka tubut Taikamanua, pat erú mitsá patabbaratda ka tubut Taikamanua, nia té muririmanua!

¹⁸ Aipatoiláan Taikamanua golúnia ka manua, ka tubut sangamberinia jo samba pukakataíra sirimanua, aipoí kalulut jot sirimanua lé isasaila sirimanua raagai nganturat masikolouaké bulat simakolou, pagalaiat tubut Taikamanua

¹⁹ Aponia siooi raagai sirimanua pagalaiat tubut Taikamanua, amakolouan ka bagat paatuatda sirimanua, aipoí bulat tubut Taikamanuangan aipatoila nia ka tubudda sirimanua

²⁰ Ka panandaatnia peilé aibaraaké polak néné Taikamanua, pagalaiat putubuat Taikamanua sitaimatotoilá, iaté pagalaiat tubunia siripot pu-

Tataikamanuania, samba gegenia
simatom, amoian araagainia sirimanua
iaté ka sangamberi sibaraakenennia.
Oto táan anai enunganda sirimanua
masikaróaké tubudda ka seledda

²¹ Araagaian nia sirimanua ka sia
Taikamanua, tápoi bulat beri hormatidda
nia siripot pu-Tataikamanua nia, sambat
bulat beri kuadda surá ka tubunia. Tápoi
bagei lé rapaaatu, samba paatuatda
amagep-gep'an

²² Arakuangan tubudda simasiku
paatuat, oto sitaiagai paatuat lé

²³ Tá Taikamanua simatom
rapaniniddogi, tápoi tularat simakeré ka
tarimeu simamateiet lé, iaté sirimanua,
umá, tarimeu siepat rere, samba tarimeu
sipulalatá

²⁴ Oto kalulut néné, oreakénangan
sia Taikamanua ragalai siobat bagadda
sikataí, pat galaiakérangan sikataí ka
pasasambadda

²⁵ Taikamanua bulat sibulatnia,
siliyangan nia ka tubut tá sibulatnia.
Tá ka tubut Sipasibabaraaké, tápoi ka
tubut sibaraakenen lé rapaniniddou
samba rapasisikeli. Oto sipasibabaraaké

lé siripokatnia tuuumun'aké teret
buru-burú! Amen

²⁶ Kalulut gagalaiakéra nia sirimanua
kelé néné, oreakénangan sia Taikamanua
ratut'aké pubobot-bot akkulára kasit-
sit'akenen. Táan ka tubudda taimanteu
iaalá bagadda tainanalep, tápoi
ka tubuddangan lé pasasambadda
tainanalep

²⁷ Ka sia taimanteu leú et, kisedda leú
et ragagalaiaké, táan ka siripokatnia
rapaalei ka tubudda tainanalep, tápoi
ka tubuddangan lé pasasambadda
taimanteu iaalá bagadda. Ka tubudda
pasasambadda taimanteu lé rababaraaké
paaleiat pakailaat ka tubudda
pasasambadda taimanteu, pat silórgan
palumunan siripot sigalaiakenenda
sikataí

²⁸ Kalulut tá anai kaura nia ka
sia sirimanua raagai Taikamanua,
oreakénangan nia Taikamanua imakataí
pupaatuananda, pat galaiakérangan
sitaimateú ragalaiaké

²⁹ Asut'an pupaatuananda sangamberi
sikataí, sitaimaroipo, pualagat бага,
asut'an paatuatda simabuté, orot mata,
pupaatuanan obat pamatei, obat palabá,

pataju, samba obat masisiliaké jo. Raobá masitiboi sirimanua

³⁰ raobá masipakatai oninda sabagei, mabuak paatuatda, tá raagai arat, simalagá бага ka tubut Taikamanua, samba masaliu kuananenda. Raagai masigaba enungan sibau ragalaiaké sikataí. Raobá masilawan saepputda

³¹ tá raobá rasese'aké sikuadda sabagei, tá matopit sia muarat, sambat tá anai ka tubudda arat puririmanua siripot kapasasamba sirimanua

³² Ai lé raaagai, siripot surukat Taikamanua, sangamberi sirimanua sigalaiaké kelé néné, buítá tuorak'aké ka tubunia ukuman simateiakenen. Tápoi kenanen kisedda, ai leú ragagalaiaké kelé néné, elé momoi takua, beri sia leú et, ai lé ioobá bagadda ragalaiaké nia sabagei.

2¹ Oto kalulut néné ale kam Sasarainamai, kasonia lé poi takukua nia kam néné, pat koí obámuian masisele'aké sabagei? Tá te anai enunganmui bagei, masikua tatat selemui! Aipoí ké nusele'aké kam sabagei, tápoi beri kam leú et ka kam ai leú et nugaalaiaké kam kelé

sigalaiakenenda ka sia, anuukum'akéan
te kam tubumui

² Kelé siagaita poí, ké iorak'aké ukum
Taikamanua ka tubudda sipasigagalaiaké
kelé néné, maroipo ukumnia

³ Tápoi ka kam geti, ai lé nugagalaiaké
kam sigalaiakenenda sabagei
sisusuiakenenmui ka tubudda. Bulat ka
bagamui lé pá momoi nukatsliaké kam
tubumui ka kam ka ukuman Taikamanua

⁴ Elé ai lé pá nupulalabbei kam anggai
baga samba taipuleletseina nia elé
om bagania simakopé Taikamanua?
Kirénangan ai lé nuaagai kam patotoilána
erut bagania Taikamanua, kalulut obána
nubauaké kam paatuatmui

⁵ Tápoi ai lé nukekeláaké kam
paatuatmui, elé tá nususiliy kam
paraboatmui. Oto kam lé ipasasané
ukumanmui ka Gogoi Sialu, ké
iaili tetrenia ipatoilá golúnia samba
iorak'aké ukuman simaroipo ka tubumui
Taikamanua

⁶ Aipoí ilulumun'aké te sia Taikamanua
siripot sigalaira

⁷ Ikakau te Taikamanua purimanuaiat
sipulelelek sambat sitaitatatá ka tubudda
simariu-riu masigalaiaké simaerú, bulé

rasese pulatsanan, pubebeunan sambat simatom

⁸Tápoi sia geti sigalai sarat purimanuaiatda saradda, samba sitaimareddet ka tubut Taikamanua, tápoi masitut'aké sikataí lé, bulat pugolukiet Taikamanua simakopé lé sia

⁹Bulat muge-geja te sia бага samba mango-ngorik te sia, sangamberi siobá masigalaiaké sikataí; siboikí iaté sia tai Jahudi lepá siangan ka sia sabangsa bagei

¹⁰Tápoi sia geti siobá masigalaiaké simaerú, rasisiló pulatsanan, pubebeunan samba lelek puririmanua sibara ka Taikamanua; siboikí iaté sia tai Jahudi, kisedda leú et sia sabangsa bagei

¹¹Aipoí tá irarasei sia sirimanua Taikamanua

¹²Ka sia bangsa bagei aramajo tá araagai surukatda tai Jahudi. Oto tá tuaadde'aké ka tubudda surukat néné. Tápoi ka sia geti tai Jahudi aramajo lepá araagai surukat; oto kalulut néné tuorak'aké ka tubudda ukuman siripot surukat

¹³Ramaeerú poí mitsá sirimanua ka tubut Taikamanua, tá kalulut aagaira

surukatda tai Jahudi, tápoi kalulut
gagalaiakéna lé siripot sitususurat ka
bagat surukat

¹⁴ Ka sia sabangsa bagei, tá te raagai
surukatda tai Jahudi. Tápoi ké sibara
ka paatuatda raobá masigalaiaké sikuat
surukat nenda, oto paatuatdangan
té nenda ibabailiu ukum ka tubudda,
kenanen baí tá raagai surukatda tai
Jahudi

¹⁵ Ka paraboatda lé imatotoilá
katususurat nia sikuat surukat ka bagat
paatuatda. Beri ka pupaaturananda
ka бага leú ipatotoilá pagalaiat
nenda, aipoí kakkau seleakénangan
elé sineseat'akénangan sia paatuatda
saradda

¹⁶ Oto kisedda te muaaili ké iaili
tetrenia. Ka tetret nenda, siripot ka
sikuat Katuareman Simaerú sipaarepku,
hakiminangan sangamberi pupaaturan
simalipput Taikamanua ka sigalaiakenen
Jesus

¹⁷ Oto ale kam Sasaraina, kipangan
kam ka kam kineneiget? Anukua kam
tubumui tai Jahudi. Omet'akenenmui iaté
surukat arat Jahudi, samba bulat abeu

ka paatuatmui, kalulut patabbaratmui ka tubut Taikamanua

¹⁸ Sedda ka surukat ai anusesse kam panganturat, pat bailiu agaimuian siobat bagat Taikamanua, elé agaimuian kipa simaerú

¹⁹ Bulat amatonem'an bagamui ka tubumui, nukua kam tubumui sipalulu simapeset, sambat sipatóaké sia sikukuddu ka pugepgeman

²⁰ Sipasigegelaiaké sia sitaiagai simaerú, sambat gurudda sitaimaagai. Ai lé nukakatonemi kam kababaranian sangamberi puagaiat samba arat bulat sibulatnia ka surukat aratda tai Jahudi

²¹ Kam anupangantoman'an kam sia sabagei, oto, kipa, tá koí nupangangantoman kam tubumui ka kam? Kam anupangantrungan kam sirimanua buí rapanangkou, tápoi kam leú et ai leú kam mananangkou

²² Kam ainupangangantoman kam sirimanua sabagei, bulé buí rapaelet, tápoi kam ka kam, ai kam paelet! Bulat maasá bagamui ka tubut bulungan, tápoi ainupararauragi kam bibilet ka uman buluat

²³ Anuumun'akéan kam tubumui iikep'akémui nia surukat Mose, tápoi ai lé nupalololoi kam Taikamanua, kalulut taimareddetmui ka surukatnia

²⁴ Ai atusurat'aké ka bagat Buko Sipunenan kisé, "Kalulumui te tai Jahudi, arapalolit onin Taikamanua, ka talagatda sabangsa bagei.

²⁵ Ke nureddet kam surukatda tai Jahudi, bailiu ai leú lulunia ka tubumui sunatmui néné. Tápoi ké geti tá matukle nureddet kam apa sikuat surukat, oto bulat tá anai lulunia ka tubumui sunatmui néné

²⁶ Ké ai baí sia sara sipasirereddet surukat aratda tai Jahudi, tápoi tá atusunat nia, tá pá iaadde'aké nia Taikamanua sipususunat

²⁷ Oto tá isosoppi te rasesele'aké kam ka sia sitaipususunat, ale kam tai Jahudi, aipoí, ai ka kam surukat arat Jahudi samba atusunat'an kam, tápoi ai lé nupaaapa kam sikuat surukat néné. Kenanen tá atusunat sia, tápoi sia peilé masirereddet surukat aratda tai Jahudi

²⁸ Aipoí tá puonidda lé tai Jahudi, kuantangan sia tai Jahudi bulat sipulelelek; elé katususunatda lé,

kuattangan sia bulat sipususunat bulat sipulelelek

²⁹Oto oniakenen geti tai Jahudi bulat sipulelelek, iaté siparaboat'aké siripot puparaboananda tai Jahudi; ia leú et oniakenen bulat sipususunat bulat sibulatnia, iaté sipususunat ka paatuat sibaraakenen Ketsat Sipunenan, tá sitususurat ka bagat buko. Ka Taikamanua lé rasisiló katuumun kalulut sigalaira, tá sibara ka sirimanua.

3¹Oto ké kisedda baí nia, apangan lé onia uktukta ibailiu sita tai Jahudi? Apangan lé katukaunannia tutut'aké surukat musunat

²Kirénangan tedda maigi katukaunannia! Siboikí, kalulut ka tubudda tai Jahudi lé poí, aisegéaké tiboietnia Taikamanua

³Tápoi kipa pá, ké ai bai sia sangarubeiat tai Jahudi sitaimatopit ka tubut Taikamanua? Elé kalulut nenda, taimatopitnangan pá ka sia Taikamanua

⁴Bulatnia tá kisedda! Aipoí bulat mariuriu lé puroipoat Taikamanua, kenanen sangamberi sirimanua maboko. Ka bagat Buko Sipunenan leú et ai atusurat'aké kisé, "Buítá matoilá roipom

ka sangamberi titiboatnu, samba
mamanang ekeu ka tetret tuhakimi
ekeu.

⁵Oto ké amakopéan toilá nia puroipoat
bagat Taikamanua, kalulut taimaroipo
nia sigalaita ka sita, oto apangan lé
onia takukua kam ka sita? Elé takukua
pá kam taimaroipo nia Taikamanua ké
iukum'aké sita? (Bulatnia takukua tedda
kam kelé néné, siripot sipinaatutta ka
sita sirimanua)

⁶Tápoi bulatnia tá kisedda! Aipoí kipa
te iooi iadili polak néné Taikamanua, ké
tá maroipo baí nia

⁷Tápoi ké kalulut galajet sitaipasesese,
bailiu memei makokopé imatoilá
puroipoat Taikamanua pat umun'ake
oninia, angoi peilé ituseseseleaké sia
sirimanua sikataí paraboat kelé sara
sirimanua sijo

⁸Tá koí momoi takukua kam kisé,
"Kauan tagalai kam sikataí, bulé ibara
puerukat?" Kirénangan tedda ai sia
sipaloloi aku, arakua, akukua kelé
néné. Oto sia kelé néné bulat mateúan
iukum'aké sia Taikamanua

⁹Oto kipa, sita peilé pá maerú tiboitubu
sipuoni tai Jahudi, ka tubudda sabangsa

bagei? Bulat sibulatnia tá! Akukuangan,
tai Jahudi pá nia, elé sabangsa bagei,
sangamberidda aian sia ka kupkumen jo

¹⁰Kele sitususurat ka bagat Buko
Sipunenan, "Bulat beri sia sara sirimanua
simaroipo ka matat Taikamanua

¹¹beri sia sara simakolou ka бага,
samba beri sia sipaniddogi Taikamanua

¹²Araareuakéan tubudda
sangamberidda ka tubut Taikamanua
amapepengan sia sangamberidda. Beri
sia sara sigalaiaké simaroipo; bulat
mandé sara

¹³Totolonlolokkatda, bulat kéan lé ratei
situngangá-ngá. Amugorok'an patajuat
ka jalaira, amubuggrangan ka bibodda
pakataikat nga-nga, kelé lagat ulou

¹⁴Asut'an ka ngu-ngunda pateleiat
sambat tiboiet palotokat

¹⁵Bulat pababalawan sia raei
masipaorei, elé masimateiaké sirimanua

¹⁶Arapakarap'an kasubuat sambat
pugejaat бага

¹⁷Mapeset lé pupaaturananda ka
enungan paabanan

¹⁸samba tá rasusurú Taikamanua.

¹⁹Oto kineneiget amakolouan ka sita,
sangamberinia sitususurat ka surukat

aratda tai Jahudi néné, sarat ka tubudda sikukuddu ka kupkumen surukat nenda lé. Kalulut néné beringan sia sara sipasikakaróaké tubuna rakua apa pá, samba momoian ituntut sia Taikamanua sangamberi taikapolak

²⁰ Aipoí bulat beri sia sara momoi paerú mitsá ka tubut Taikamanua kalulut pasigagalaiakéra surukat arat. Sarat masipatoilá jodda sirimanua lé poí, ka sia igagalai surukat néné

²¹ Tápoi kineneiget geti, aikauan enungan Taikamanua ka tubudda sirimanua, kipa rapaeerú, bulé ioi rapaeerú mitsá ka tubut Taikamanua. Enungan siaket Taikamanua néné, tá anai pasakkunannia ka surukat aratda tai Jahudi. Bulat tubut Bukot Mose samba bukodda tai nabingan aipatoilá nia néné

²² sarat kalulut tonem bagadda siriamanua ka tubut Jesus Kristus lé, iooi ipaerú mitsá Taikamanua patabbaratda sirimanua ka tubunia. Tápoi sarat ka sia simatonem бага ka tubut Jesus Kristus lé, aigalai nia Taikamanua; tá poí anai pabaggeiatnia

²³ Aipoí sangamberi sirimanua atuareuan sia ka tubut Taikamanua siarauaké sia

²⁴ Oto sarat kalulut panguruat katet bagat Taikamanuangaan lé siakénia sitá saki, aimærú mitsá patabbaratda sirimanua ka tubut Taikamanua; enung nia aigalai iaté: itebui sia Jesus Kristus, taikapolak néné

²⁵ Ibuluaké Jesus Kristus, Taikamanua, bulé kamamateinia néné, kolou tetebuina sia Taikamanua ka jodda, ké matonem baí bagadda ka tubunia. Aigalaiaké geti kelé néné Taikamanua, bulé imatoilá ka sita roipot bagania. Aipoí baranangan ka siburú peilé, aipaom'an bagania Taikamanua ka jodda sirimanua, iaté lulunia tá aiukum'aké sia

²⁶ Tápoi kineneiget geti, táan iooreaké Taikamanua jodda sirimanua, masipatoilá roipot bagania ka tubudda. Ka enungan néné te ipatotoilá roiponia Taikamanua. Oto sangamberi simatonem бага ka tubut Jesus, amaerúan mitsá patabbaratda ka tubut Taikamanua

²⁷ Oto táan anai atsiakenenta, bulé ioi taumun'aké kam tubutta. Angoi poi aibara kelé néné? Kalulut

pasigagalaia kéta pá siripot surukat aratda tai Jahudi? Tá nia. Sarat kalulut tonem bagatta lé

²⁸Oto momoi takua: Tá kalulut pasigagalaia kéra sangamberi sikuat surukat aratda tai Jahudi, imaeerú mitsá patabbaratda ka tubut Taikamanua. Tápoi kalulut tonem bagadda lé, ka tubut Jesus Kristus

²⁹Elé kipa, sarat Taikamanuanda lé poi tai Jahudi Taikamanua néné? Tá poi Taikamanuanda ka sia sabangsa bagei? Oo, kirénangan tedda Taikamanuanda leú et ka sia sabangsa bagei Taikamanua néné

³⁰Aipoí sara lé Taikamanua. Oto kalulunia lé aioi aimaerú mitsá patabbaratda tai Jahudi ka tubut Taikamanua, kalulut tonem bagadda. Oto beri leú et ka sia sabangsa bagei, kalulunia leú te aimaerú mitsá patabbaratda ka tubut Taikamanua, kalulut tonem bagadda leú et ka sia

³¹Taleú kisé lé, atakatonemingan poí kam nia Kristus, putatátangan nia surukat aratda tai Jahudi? Tá kisedda! Tápoi kalulut putotonem bagatta néné,

maabeunangan ka paatuatta surukat
néné.

4¹ Oto ké kisedda baí nia, kipangan
lé takukua kam ka tubunia ka
sia taikebbukatta si Abraham? Kipa
pengalamannia

² Ké kalulut sigalaiakenennia baí
aikabaraji aimaangká bagat Taikamanua
ka tubunia, oto ai palulut nia aiumun'aké
tubunia. Tápoi tá momoi iumun'aké
tubunia ka matat Taikamanua

³ Ai atusurat'aké ka bagat Buko
Sipunenan kisé, "Kalulut tonem bagania
si Abraham ka tubut Taikamanua,
silónangan nia Taikamanua kelé sara
siangkáaké bagat Taikamanua.

⁴ Aipoí sangamberi sipugagalai,
rasisiló upadda; tápoi upadda nééné, tá
raooniaké nia kelé panguruat, aipoí nia
lé sibakkatnia

⁵ Tápoi ai leú te sia sitaikaroni
tubunia; tápoi ka tubut Taikamanua lé
rasesegéaké tubudda sipasiteteibui sia
ka jodda. Kaputotonem bagadda nenda
te aiadde'aké sia Taikamanua kelé sara
siangkáaké bagat Taikamanua

⁶ Oto kisedda leú te ka sia sipinaatunia
si Dapid; iaté lulunia aikua ka tubudda

sioniakenen Taikamanua siangkáaké bagania, kauan numauktuk kam. Tápoi beri pulatseina sigalaiakenenda. Kisé aikua si Dapid

⁷"Mauktuk te sia ké aiappéakeán Taikamanua sangamberinia pinasabaura samba jodda leú et airateiakéan Taikamanua

⁸Mauktuk te sia ké tá ituntut jodda si Tuhan!

⁹Kipa, sarat ka tubudda sigalaiaké enungan pususunat lé poi, sausaket nga-nga sipasikukua mautuk kam, néné? Elé ka tubudda leú et ka sia sitaitut'aké enungan pususunat? Akukuangan siboikí ka matamui, aisiló nia ka sia si Abraham, Taikamanua kelé siangkáaké bagania, kalulut tonem bagania ka tubut Taikamanua lé

¹⁰Oto pigamoi aipatoilá nia Taikamanua ka tubut Abraham? Lepat aipusunat, élé einangan nia tá mususunat? Kirénangan einangan tá tususunat nia, tá lepat aipusunat

¹¹Katei-teian lé aipusunat. Tápoi sunatnia néné geti, kelé sara toggaiat sisilóna nia Taikamanua siangkáaké bagania, kalulut tonem bagania

ka tubut Taikamanua. Einangan tá igagalaiaké enungan pususunat. Samba aibailiuan nia si Abraham néné, ukkuira sangamberi simatonem бага siripot ka puketsanan, kalulut nenda, silónangan nia Taikamanua siangkáaké bagania, kenanen tá airatut'aké enungan pususunat

¹² Iageti, si Abraham néné leú et, ukkuira leú et sangamberi sipususunat siripot ka puketsanan. Aibailiu nia ka sia si Abraham ukkuira siripot ka puketsanan, tá sarat kalulut gagalaiakéra enungan pususunat, tápoi kalulut putotonem bagadda ka tubut Taikamanua leú et, kelé ka sia kai Abraham einangan tápei igagalaiaké enungan pususunat

¹³ Aipatoné si Abraham Taikamanua sambat sapunuteteunia, ikua iikep'akéna polak néné si Abraham, tá kalulut reddetnia ka surukat aratda tai Jahudi, tápoi kalulut tonem bagania lé ka tubut Taikamanua, pat silónangan nia Taikamanua bailiu siangkáaké bagania

¹⁴ Aipoí ké baí sarat sia simareddet ka surukat aratda tai Jahudi lé, masisisiló sangamberi sitonéakenen Taikamanua,

oto bailiu tonem bagatta ka sita ka tubut Taikamanua leú siboboi lé, iageti ka sia patonekat Taikamanua leú et sitá бага lé

¹⁵ Masibaraaké ukuman Taikamanua lé poí ka sia surukat aratda tai Jahudi néné. Iageti mitsá, ké tá anai baí nia ka sia ukum néné, tá leú te babara pasiaapaaké surukat

¹⁶ Oto kalulut tonem bagadda sirimanua lé ka tubut Taikamanua, isisiblaaké patonekatnia Taikamanua. Patonekat néné, iaté sara jaminan ka tubudda sangamberi sapunuteteu Abraham, samba aikau nia Taikamanua ka tubudda tenan lé nia kau sitá saki; tápoi tá sarat ka tubudda simareddet ka surukat aratda tai Jahudi, beri leú ka tubudda ka sia simatonem бага ka tubut Taikamanua, aikau leú et ka sia Taikamanua, kelé tonem bagania ka sia si Abraham ka tubunia. Aipoí ukkuita sangamberitta lé nia si Abraham néné, siripot ka puketsanan

¹⁷ Aikua poí ka matat Abraham Taikamanua, kisé, "Akubailiuakéan ekeu ukkuira tai bangsa-bangsa." Oto kisedda te aikau patonekatnia Taikamanua ka tubut Abraham. Ka sia si

Abraham leú, matonem bagania ka tubut Taikamanua. Aipoí nia lé Taikamanua sisuruaké simamatei; samba nia leú et néné Taikamanua, sarat tiboietnia peilé baraakénangan sitaibabara peilé

¹⁸ Mariu-riu lé ikaroni samba ikatonemi Taikamanua si Abraham, kenanen táan anai karonan бага. Kalulut néné te aibailiu nia ukkuira tai bangsa-bangsa. Kelé ka sitususurat ka Buko Sipunenan, sipasikukua kisé, "Bulat maiigi te sia sapunuteteunu.

¹⁹ Kenanen ka tetret nenda aian iaagai si Abraham taibabarat tuppai tubunia, kalulut bulat bajánangan, malegrengan lé poí sangotu ngarura bajánia, sarapei bagei sinanalepnia si Sara sipututukkú tubu lé nia. Tápoi tonem bagania si Abraham ka tubut Taikamanua tá aibeleki

²⁰ Bulat riu-riu lé tonem bagania ka tubut Taikamanua, samba bulat tá aiparua bagania ka patonekat Taikamanua. Tápoi kalulut tonem bagania, tuppainangan ron paatuatnia, pat umun'akénangan leú et Taikamanua

²¹ Bulat ikakatonemi simakopé
si Abraham, puririu-riu nia ipuaili
sangamberinia sitonéakenen Taikamanua

²² Iaté lulunia aisiló nia Taikamanua
sibailiu siangkáaké bagat Taikamanua

²³ Tiboiet, "siangkáaké bagat
Taikamanua" néné, tá sarat ka
tubut Abraham aitukua

²⁴ tápoi ka tubutta leú et ka sita.
Sita leú ka sita, aisilóan sita sibailiu
siangkáaké bagat Taikamanua, kalulut
tonem bagatta ka tubut Taikamanua,
sisuruaké Jesus Tuhanta, ka simamatei

²⁵ Kalulut jotta, bailiu tusegéaké Jesus
itumateiaké, tápoi lepá suruakénangan
nia mitsá Taikamanua, bulé ioi tapaerú
kam mitsá ka sita ka tubut Taikamanua.

5 ¹ Oto kineneiget, apaerúan sita mitsá
ka tubut Taikamanua kalulut tonem
bagatta ka tubut Jesus Kristus. Iaté
lulunia tapuririmanua kam ka aban бага,
ka tubut Taikamanua, kalulut Tuhanta
Jesus Kristus

² Kalulut tonem bagatta ka tubut Jesus,
bailiu oi atasiló kam nuntut bagat
Taikamanua. Oto ka katet бага nenda te
tapuririmanua kam ka sita kineneiget.
Kalulut néné, kau imangká bagatta, aipoí

ai ka sita karoniettta, taiikep'aké poí kam puuktungan sibara ka Taikamanua

³Iageti mitsá, sita leú et ka sita, kau imangká bagatta kapugejaat bagatta, aipoí ai lé taaagai kam, pugejaat baga néné, masikau sita muom baga

⁴samba om baga masikau sita muturoi kenanen bara pasisiboat; samba néné te masibabaraaké pukakaronan baga

⁵Bulat tá te ipabubuji bagatta pukakaronan kelé néné, aipoí aitim'akéan paatuatta Taikamanua, nuntut bagania

⁶Ai sita malululuk te, aimatei Kristus punu tubutta, iaté ipot ka sara tetre sipasesese, kasiteúakenen Taikamanua, kenanen baí sita néné, oniakenen simareunan ka tubut Taikamanua

⁷Beringan kalulut sara sirimanua simaroipo baga, bulat makopé besí rabuluaké enganda punu tubudda sirimanua. Tápoi elé babara leú pá sia siobá masibuluaké tubunia, kalulut sara sirimanua simaerú paraboat

⁸Tápoi aipatoilá geti ka sia nuntut bagania Taikamanua ka tubutta, iaté ka tetret aimatei Kristus punu tubutta, ai peilé sita muooni sirimanua sijo

⁹ Kineneiget geti, apaerúan sita mitsá ka tubut Taikamanua kalulut kamamatei Kristus, oto tá isoppi ikatsliaké sita ka golut Taikamanua, kalulut Kristus

¹⁰ Aipoí beringan ai peilé sita tá paeerú ka tubut Taikamanua, aipaaban'an sita ka tubunia kalulut kamamatei Togania, oto bulat sarapeite kineneiget aian sita paeerú mitsá ka tubut Taikamanua, tá isoppi ipaarau sita leú et Taikamanua kalulut puririmanuan Kristus

¹¹ Tápoi bulat sabeunia, mangká bagatta kalulut erut bagat Taikamanua ka sigalaiakenennia simatotoilá ka tubut Kristus. Aipoí kineneiget, kalulut Kristus, bara mitsá patabbaratta simaerú ka tubut Taikamanua

¹² Aibara jo ka polak néné, kalulut sara sirimanua. Oto kalulut jo, bara kamateiat. Iageti mararatnangan kamateiat néné ka sangamberi sirimanua, aipoí amajongan sia sangamberidda sirimanua néné

¹³ Ainangan tápei ikakau kai Mose Taikamanua surukat aratda tai Jahudi, aian turerere kababarania ka sia jo ka polak néné. Tápoi tá itutuntut

Taikamanua jodda sirimanua kalulut tápei enai surukat sipinasabaura

¹⁴Tápoi kenanen kisedda, baranangan ka tetret Adam pat aili kai Mose, aikup-kup'akéan sia kamateiat sangamberi sirimanua. Pat beri leú et sia sitaipasiaapaaké surukat kelé ka sigalaiakenennia ka sa si Adam, aikup-kup'akéan leú et sia ka sia kamateiat néné. Ka sia si Adam néné, iaté sara tularat tubunia siooi ka tei-tei

¹⁵Tápoi sia karuadda néné, tá makeré: aipoí panguruat Taikamanua peilé abeu, belé peilé ka sigalaiakenen nia ka sia si Adam, aipasabau surukat. Kalulut pasasabauna surukat sara sirimanua, bailiu maigiddangan sirimanua mamatei. Tápoi sarapeite beunan nia katet bagat Taikamanua, elé panguruat puaragat sikaunia ka tubudda sirimanua simigi, kalulut erut bagat sara sirimanua, iaté Jesus Kristus

¹⁶Panguruat Taikamanua peileú abeu ka tubut jo sigalaiakenen sara sirimanua. Aipoí lepá aipasabau surukat ka sia sara sirimanua néné, bela nga-nga sipasikukua, "amaselengan ekeu". Tápoi kelé aramaigi sigalai jo, oi ka

sia panguruat katet bagat Taikamanua sipasikukua, "Tá anai selem"

¹⁷ Kalulut pasasabauna surukat sara sirimanua, bailiu mararatnangan kamateiat ka senen kudduat, sibara ka sara sirimanua néné. Tápoi sarapeite kopet beunan nia babara kalulut sigalaiakenen sara sirimanua bagei, iaté Jesus Kristus. Kalulunua kaunangan ka tubudda maigi sirimanua, Taikamanua, panguruat sipususukkra, samba kaunangan sia mitsá paerú ka tubut Taikamanua sitá saki; samba rakukup-kup'aké te polak néné, kalulut Kristus

¹⁸ Oto ké kipa aituukum'aké sangamberi sirimanua kalulut pasasabauna surukat sara sirimanua, kisedda leú te, kalulut sigalaiakenen sara sirimanua aireddet siobat bagat Taikamanua, bailiu tubelaaké sirimanua ka ukuman jodda, iageti kaunangan ka sia purimanuaiat

¹⁹ Samba kelé kipa aramaigi sirimanua majo kalulut sara sirimanua sitaimareddet ka surukat Taikamanua, kisedda leú te kalulut sara sirimanua simareddet ka tubut Taikamanua, bailiu

oi rapaerú mitsá sirimanua ka tubut Taikamanua

²⁰ Bulat tubut Taikamanua te amasiaké surukat aratda tai Jahudi néné. Tápoi iapei imakopé rabesíaké nia sirimanua rareddet surukat néné, iapei rapasabau nia, samba iapei ramajo ka tubut Taikamanua. Tápoi, iapei imakopé ramajo sirimanua ka tubut Taikamanua, iapei leú imakaté bagat Taikamanua ka tubudda

²¹ Oto buítá matei sita kalulut jotta. Tápoi makaté lé bagania Taikamanua ka tubutta, samba aigalai lé enungan bulé imaerú mitsá patabbaratta ka tubunia. Bailiu kalulut amaerúan poí mitsá patabbaratta ka tubut Taikamanua, akénangan leú et purimanuaiat sipulelelek samba sitaitatatá ka tubutta kalulut Jesus Kristus Tuhanta.

6 ¹ Oto ké kisedda baí nia, kipangan lé takukua kam? Taririu-riuakéan lé pá kam mugalai jo, bulé imakopé katet bagat Taikamanua ka tubutta

² Tá kisedda! Aipoí táan aikukup-kup'aké sita jo; oto kipangan lé iooi tariu-riuaké kam mugalai jo

³ Kipa ai leú nuaagai kam, ka tetret ataturaú, apatabbrangan sita ka tubut Jesus Kristus? Oto momoi takua, amusarangan sita ka kamateiatnia

⁴ Ka pasiraukat, rateiaké sita sambat Kristus, samba amateian sita sambat nia, bulé kelé kipa atusuruaké nia ka sia Kristus ka simamatei kalulut geget Ukkui sipulubeunan, kisedda leú te sita ka sita taenungi kam puriririmanua sibau

⁵ Ké amusarangan sita ka sita ka tubut Kristus kalulut kamamateita ka sita samba nia, oto musasara leú te sita ka sita ka tubunia, kalulut aisuruaké sita ka sita Taikamanua kelé ka sia

⁶ Kelé siagaiattangan leú et, galai tubutta siburú siripot ka pusirimanuaatta, atumateiakéan sambat Kristus ka loiná siliktenga, bulé itupakataí geget bot-bot akkuláta sijo néné. Oto táan ipapagugulet'aké sita mitsá jo

⁷ Aipoí ké amateian nia sara sirimanua, bela nia ka kup-kupmen jo

⁸ Oto ké amateian sita ka sita sambat Kristus, tonem bagatta susuruakéna sita ka sita samba nia

⁹ Aipoí ataagaian aitusuru Kristus ka kamateiat samba taimamatei nia mitsá; kalulut táan ikukup-kup'aké nia kamateiat

¹⁰ Kamateiat siorik Kristus néné, iaté kamateiat kalulut jo. Oto sangamitsá lé lepá ipuaili ka tubunia, samba táan babara mitsá ka tubunia kelé néné teret buru-burú. Purimanuaiat sisilónia kineneiget, iaté murimanua ka Taikamanua

¹¹ Oto kam leú et ka kam, ale Sasaraina, buíta leú ikua ka bagamui amateian kam ka jo, tápoi murimanua ka patabbarat simaron, ka tubut Taikamanua, kalulut Jesus Kristus

¹² Buían nuobáaké kam puririmanuamui simamateiet néné ikup-kup'aké nia jo, bulé tá nutut'aké kam siobat bagania sikataí

¹³ Ialeú et buí nusege'aké kam laddou tubumui néné ikupkup'aké nia jo, bulé igalaiaké siobat bagania. Tápoi segé'aké lé kam tubumui ka tubut Taikamanua, kelé sara sialá barana ka pulangokat tukau ka purimanuaiat. Segé'aké kam sangamuinet tubumui ka

tubut Taikamanua, bulé ibara pakeietnia masigalaiaké siobat bagat Taikamanua

¹⁴Táan momoi ikup-kup'aké kam jo, aipoí táan ai kam ka kupkumen surukat aratda tai Jahudi, tápoi aian lé kam ka kupkumen pukatekat bagat Taikamanua

¹⁵Oto kipangan lé takukua kam? Momoian pá tagalai kam jo kalulut táan poí aikukup-kup'aké sita surukat aratda tai Jahudi, tápoi aian lé sita ka kupkumen panguruat katet bagat Taikamanua? Bulatnia tá momoi

¹⁶Nuagai leú kam, ké nusegé'aké kam tubumui ka tubut sara sirimanua bulé nugalaiaké kam siobat bagania, bailiunangan kam pagugulet sirimanua tunenmui nenda, elé bailiu pagugulet jo sikau kam ka kamateiat, elé pagugulet simareddet ka tubut Taikamanua, bailiu paerúmuian mitsá ka tubut Taikamanua

¹⁷Oto bulat suráan lé takua kam ka tubut Taikamanua. Aipoí pagugulet jo lé kam siburú! Tápoi kineneiget, bulat sibara ka muinet paatuatmui nureddet kam arat bulat sibulatnia siaké ka tubumui

¹⁸ Abelangan kam ka kupkumen jo; oto kineneiget aibailiuan kam pagugulet ka siobat bagat Taikamanua

¹⁹ Kalulut tá bulat malabbei isaksak ka bagamui sikuakku, bailiu pasikat'akékungan nia kapupagugulenan, imalabbei imakolou ka bagamui. Siburú anupagugulet'akéan kam sangamberi laddou tubumui néné ipupagugulet'aké nia pulolinan sambat pukakataí, ka siripokat sipinaatunia sikataí. Oto kisedda leú te kineneiget, bulé nusegé'aké kam sangamberi laddou tubumui, bulé imasipunenan tubumui, iei ka siripokat obaket bagat Taikamanua

²⁰ Aipoí ai peilé ipagugugulet'aké kam jo, tá anai kam ka kupkumen siobat bagat Taikamanua

²¹ Oto ka tetret nenda, aponiangan abara uktukmui ka tubut oniakenenmui kineneiget amailangan kam masigalaiaké? Aipoí sigalaiakenenmui néné, sibaraaké kamateiatmui lé

²² Tápoi kineneiget geti, aibelaakéan kam Taikamanua ka jo, aibailiuan kam pagugulet Taikamanua. Uktukmui iaté bailiu masipunenan tubumui ka Taikamanua, samba néné sibaraaké ka

kam purimanuaiat sipulelelek samba
sitaitatatá

²³ Aipoí upat jo, iaté kamateiat,
tápoi purimanuaiat sipulelelek sambat
sitaitatatá ikep'akenenta sambatta
Jesus Kristus Tuhanta, iaté panguruat
Taikamanua ka sita, sitásaki.

7 ¹ Ale kam Sasarainamai! Anuagaian
kam sangamberimui surukat. Oto
geget surukat leú, ka tubudda sirimanua,
sarat ka tetret ai peilé sia muririmanua
lé

² Kisedda leú te ka sia tainanalep sibara
simanteu, mariu-riu lé iappra sia surukat
pusisimanteu, ka tubut simanteura, ké ai
peilé sia muririmanua taimanteura. Tápoi
ké amateian baí nia simanteunia néné,
iapeité ibela ka surukat pusisimanteunia
ka tubut simanteunia

³ Oto ké paalei nia sinanalep néné ka
tubudda taimanteu bagei, einangan
nia muririmanua ka sia simanteunia,
oniakétangan nia sinanalep néné,
sipaeet. Tápoi ké geti amateian
simanteunia sinanalep néné, siripot
ka surukat, abelangan nia sinanalep
néné ka surukat pusisimanteu. Bailiu ké

mutalimou nia ka taimanteu bagei, táan te tuooniaké nia sipaeet

⁴Oto kisedda leú te galainia ka kam néné, ale kam Sasarainangku. Amateian leú te kam ka kam ka surukat aratda tai Jahudi, kalulut amusarangaan poí kam ka tubut Kristus, bulé ibailiu kam bakkatnia sisuruakenen ka simamatei, ibara kauna sita Taikamanua ka purimanuaiatta

⁵Aipoí puririmanuanta siburú, sarat mugalai siobat bagat pubobot-bot akkuláta lé sirimanua, tagagalaiaké kam. Ka tetret nenda, pubobot-bot akkulá sikau sita mujo, iaté sipuoottou kalulut kababarania surukat, ipatubbuji bagatta. Iaté lulunia tagagalaiaké kam galajet sibaraaké kamateiatta

⁶Tápoi kineneiget geti, táan ai sita tuaappa ka tubut surukat aratda tai Jahudi. Amateian sita ka surukat sikup-kup'aké sita siburú. Puaaratta néné, táan kelé enung puaarat siburú, siripot ka sitususurat ka surukat. Tápoi puaaratta geti kineneiget, siripot enungan sibauan lé tagagalaiaké kam, siripot sinaúsaú Ketsat Sipunenan ka tubutta

⁷Oto ké kisedda baí nia, kipangan lé takukua kam? Makataí pá surukatda

tai Jahudi néné? Kukua ka matamui, tá makataí. Aipoí surukat néné lé amasipangantru aku akuagai pagalaiat jo. Kelé pagalaiat puaalau бага, bulat ké tá kuaagai, ké tá ikua nia surukat, masikua, "Buí numaalau бага.

⁸ Surukat lé ibabaraaké oggak ka tubut jo masitú-túaké sene ngamata puaalau бага ka багат paatuatku. Aipoí ké tá baí anai nia ka sia surukat, ka sia jo leú et matei

⁹ Siburú sitá surukat lé kupurimanua. Tápoi kelé aipuottou ka sia surukat, rimanua-aipurimanua ka sia jo

¹⁰ Bailiu matei aku kaku. Iageti mitsá ka sia surukat, kapanandaatnia galajetnia iaté masibaraaké purimanuaiat, tápoi aibailiu lé nia sibaraaké kamateiat

¹¹ Aipoí ka surukat nenda lé ibabara sara oggak ka jo, bulé ipataju aku, elé imateiaké aku

¹² Ka Taikamanua lé aibara surukat, iageti sangamberi parenta ka багат surukat leú, ka Taikamanua leú et aibara, oto maroipo elé maerú lé

¹³ Oto kipa, taleú kuanenta simaerú néné sibaraaké kamateiatku lé? Taá! Jo lé ibabaraaké kamateiatku. Ka

pasipapakei Simaerú bara kamateiatku,
bulé imakolou ituitsó galai tubut jo.
Kalulut surukat Taikamanua, toilá bukti
bulat kopet kataínia jo

¹⁴ Kelé siagaita, ka Ketsat Sipunenan
lé aibara surukat aratda tai Jahudi,
tapoi aku geti kaku simagulai tubu lé.
Atusakiakéan aku bailiu pagugulet jo

¹⁵ Aipoí tá kuagai aponia
sigalaiakenenku. Kelé pagalaiatnia,
aponia kiddiyet bagakku galaiakenenku,
tá kugagalaiaké. Tápoi aponia geti
galajet simalagat bagakku, iaté nenda
kugagalaiaké

¹⁶ Oto ké kugalaiaké sitaioobaket
bagakku, bailiu sené toilá seseseakéku
nia erut surukat aratda tai Jahudi

¹⁷ Sené geti tá aku masigagalaiaké,
tápoi jo sipasikukupkup'aké tubukku lé
masiagalaiaké

¹⁸ Kirénangan aikuseseseaké tatánia
simaerú ka tubukku, siripot galai
tubukku ka pusisirimanuangku. Aipoí ai
obáku mugalai simaerú, tapoi tá momoi
kugalaiaké nia

¹⁹ Tá kugagalaiaké simaerú siripot
kiddiyet bagakku. Tápoi sikataí
sitaioobaket bagakku lé kugagalaiaké

²⁰ Iageti ké kugalaiaké sitaioobaket bagakku, oto táan te aku masigagalaia ké, tápoi jo sipasikukup-kup'aké tubukku nenda lé, masigagalaiké

²¹ Oto momoi takua, surukat néné lé mugagalai ka tubukku, ké aikugegelai masigalaia ké simaerú, tápoi sarat kataí lé babara ka tubukku

²² Paatuatku ka бага, ai obána masireddet surukat Taikamanua

²³ tápoi ai lé iaagai tubukku kababaranian surukat bagei ka tubukku simuriaké aku, iaté surukat sipasisasaggangi surukat sikuat paatuatku. Iaté lulunia kutuaappra ka surukat jo, sipugagalai ka tubukku

²⁴ Oto kelé néné te aku: ka siripot sinaatukku, mareddeet aku ka surukat Taikamanua; tápoi galai tubukku siripot ka pusisirimanuangu geti, ka jo lé kumatututru. Oto mateikungan te! Kaseian lé masibebelaaké aku ka putubuatku néné, sibaraaké kamateiatku? Bulat suráan lé kukua ka tubut Taikamanua! Aipaarau aku, kalulut Jesus Kristus

²⁵ (7:24)

8¹ Tápoi kineneiget geti, táan
tuukum'aké sia sipatatabbra ka tubut
Jesus Kristus

² Aipoí surukat siaket Ketsat Sipunenan
sipatabbraaké sita ka tubut Jesus
Kristus, aibelaakéan aku kaku ka surukat
sibaraaké jo sambat kamateiat

³ Oto apa sitaiooi igalaiaké surukat,
amoian aigalaiaké nia Taikamanua;
kalulut sirimanua simagulai tubu lé
poí sita néné. Aikalaakéan Taikamanua
geget jo, iaté pubobotbot akkulá ka
sirimanua, ka pasikokoiniakéna Togania,
aipusirimanua tubunia, keré kelé ka
tubut sirimanua sijo, bulé iposa jotta

⁴ Aigalaiaké nia geti kelé néné
Taikamanua, bulé teú bagania
sipatoilánia ka surukatda tai Jahudi,
momoi ituenung'aké ka tubutta
siparaboat'aké siripot teú bagat Ketsat
Sipunenan; tá ka tubudda sirimanua
siparaboat'aké siripot pubobot-bot
akkulá ka sirimanua

⁵ Oto sia siparaboat'aké siripot pubobot-
bot akkulá, sarat obaket pubobot-bot
akkulá lé te rapaaatu. Tápoi sia geti
siparaboat'aké siripot obaket bagat

Ketsat Sipunenan, sarat siobat bagat
Ketsat Sipunenan lé rapaaatu

⁶Iageti mitsá, ké aisop-sop'an ka
tubumui siripot pubobot-bot akkulá,
kamateiat'an lé te babara ka tubumui.
Tápoi ké geti aisop-sop'an ka tubumui
Ketsat Sipunenan, iapeité silómuian
purimanuaiat samba paabanan ka tubut
Taikamanua

⁷Aipoí pasasaggak lé sia ka tubut
Taikamanua sangamberi sisop-sop
katubu pubobot-bot akkulá, kalulut
taimareddetda ka surukat Taikamanua;
kirénangan lé poí sitaimareddet ka
surukat Taikamanua lé nia néné

⁸Oto bulat tá te maangká bagat
Taikamanua ka tubudda sipupaparaboat
siripot obaket pubobot-bot akkulá

⁹Tápoi kam geti ka kam, tá anai
kam mupaparaboat siripot obaket
pubobot-bot akkulá; tápoi ai lé kam
mupaparaboat siripot obaket bagat
Ketsat Sipunenan, ké baí bulat Ketsat
Sipunenan'an amugalai ka tubumui. Oto
tá te ibabakkati sia Kristus, ké tá baí
rabakkati Ketsat Kristus

¹⁰Tápoi ké geti aimukukuddu Kristus
ka tubumui, bailiu kenanen baí mamatei

kam kalulut jo, akénangan purimanuaiat ka tubumui Ketsat Sipunenan, kalulut kaeerú nia mitsá patabbaratmui ka tubut Taikamanua

¹¹ Oto ké aian baí nia mukukuddu ka tubumui Ketsat Sipunenan, iaté Ketsat sipasisusuruaké mitsá Kristus ka kamateiat, bailiu nia sipasisusuruaké mitsá Kristus ka kamateiat leú te, masisusuruaké tubumui ka kam simamateiet néné. Ketsatnia sikukuddu ka tubumui te masigagalaiaké néné

¹² Iaté lulunia ale kam Sasarina, ai tanggung jawabta; tápoi tanggung jawabta néné, tá siripot obaket bagat pubobot-bot akkuláta, tá tatutut'aké kam siobat bagania

¹³ Aipoí ké nuparaboat'aké kam kelé siripot pubobot-bot akkulára sirimanua, oto mateimuian te. Tápoi ké geti kalulut geget Ketsat Sipunenan riu-riu numateiaké kam geget jo sigalaiakenenmui; oto iapeité purimanuamuian

¹⁴ Tatogat Taikamanua te sia sipinalulut Ketsat Sipunenan

¹⁵ Aipoí Ketsat Sipunenan siaket Taikamanua ka tubumui, tá masikau

kam pagugulet sipuririmanua sarat mulotó. Tápoi Ketsat Sipunenan néné te aibailiuaké kam tatogat Taikamanua. Samba kalulut geget Ketsat Sipunenan, oi takua kam ka tubut Taikamanua, "Ukkui, elé, ale Ukkuimai!

¹⁶ Ruadda néné, Ketsat Sipunenan sambat ketsatta masibubulat'aké, sita néné iaté tatogat Taikamanua

¹⁷ Oto ké amuoningan sita tatogania, oto sita néné, bailiu sipasiiikep'aké panukanan, sinarek'akenen Taikamanua ka tatogania. Keré sita kelé Kristus, tapasisiló kam sinarek'akenen Taikamanua ka sita. Aipoí ké makeré tapangorik kam Kristus, latsat'akénangan leú te sita ka sita Taikamanua sambat nia

¹⁸ Siripot sipinaatukku baí nia kaku, sangamberi paoreat siorikta kineneiget, bulat tápei iaaili takireki beunannia pulatsanan akenen Taikamanua ka tubutta

¹⁹ Sangaliot polak ai lé range-ngenaaké tubudda kangelei бага iaaili tetrenia ipatoilá sia tatogania Taikamanua

²⁰ Aipoí aiore'akéan Taikamanua imamúmú polak néné; tápoi tá sibara ka

teú bagat polak néné, bulat oore'akéna
lé nia Taikamanua. Tápoi kenanen
kisedda, ai leú te sibailiu karoniatta

²¹ iaté ka sara tetre, belaakénangan
leú et sangamberi sibaraakenennia
Taikamanua ka kabeira sisubuaké
nia, bailiu silónangan leú et puujaat
sambat pulatsanan sambadda tatogat
Taikamanua

²² Kelé siagaita leú, teret kineneiget
muhoi-hoi lé ragagalai sangamberi
sibaraakenennia, kalulut rapangorik,
kéan lé saina sipususulé

²³ Tá sarat sangaliat polak sambat
manua muhohoi-hoi, tápoi beri leú et sita
ka sita, ai sita muhohoi-hoi ka paatuatta
ka бага. Atasilóan tedda kam Ketsat
Sipunenan kelé panguruat Taikamanua
siboikí ka tubutta, ibelaaké sangamuinet
tubutta, ibailiu sita tatogania

²⁴ Kalulut kakaronitta nia бага,
arauakénangan sita Taikamanua.
Tápoi ké baí kuanenta karonietta
бага amatoiláan nia ka matatta,
táan te taooniaké nia karoniet. Aipoí
kasoniangan lé masikakaroni бага, ké
araitsóan baí tubunia karonietda

²⁵Tápoi ké takaroni kam бага sitaiitsokettta peilé, tá isoppi tangena kam nia ka om бага

²⁶Kisedda leú te ioi ka sia Ketsat Sipunenan, masirop'aké sita, ké bara gulai tonem bagatta ka tubut Taikamanua. Aipoí ka sita néné, tá taagai kam kipa tapaeerú kam maniddou ka tubut Taikamanua. Ketsat Sipunenan lé memei ka tubut Taikamanua maniddou punu tubutta, bulat sibara ka ngelei bagania, pat tá momoi tatiboi kam nia

²⁷Oto Taikamanua siagai bagat pupaaturan sirimanua, iagai siripot siobat bagat Ketsat Sipunenan. Ketsat Sipunenan lé poí amaniddou ka tubut Taikamanua, punu tubudda sapaamian Taikamanua, siripot sipasesese ka teú bagat Taikamanua

²⁸Kelé siagaita, Taikamanua lé masiaatur sangamberinia, masibaraaké katuerukatda simanuntu бага ka tubunia, elé katuerukatda sia sinogainia siripot ka sinaatunia ka sia

²⁹Sia sipiliy Taikamanua néné leú, aian aikau Taikamanua katukuanan tubudda, barania ka panandaatnia peilé, iaté bulé ibailiu sia simakeré ka tubut Togania,

iaté Jesus Kristus. Oto toga néné,
bailiu siboikí ka talagadda sangamberi
sasarainania

³⁰ Kisedda te igagalai Taikamanua
ipasogaji sia sibara katukuanan tubu,
barania ka panandaatnia peilé, iageti sia
sinogai néné, paerúnangan leú et mitsá
patabbaratda ka tubut Taikamanua.
Oto sia sipaerúna patabbaratda mitsá
Taikamanua, ikep'akérangan pulatsanan
Taikamanua

³¹ Oto kipangan lé takukua kam
kineneiget pagalaiat sangamberinia
néné? Ké aipaaleian sita Taikamanua,
kaseian lé maró бага масилawan sita

³² Beringan bulat bakkat Togania tá
aibaijí, tápoi aibuluaké lé nia punu
tubutta sangamberitta; oto kipangan pá
tá iaaké sangamberinia pabage-bagei ka
tubutta

³³ Kaseian lé masijo-joaké sita, ké bulat
tubut Taikamanuangan amasikua tatat
seletta

³⁴ Ele kipa, taleú ai sia sigelai masijoaké
sita? Ai Jesus Kristus sirop'aké sita! Nia
né te amatei, elé nia né té aisuruaké
Taikamanua ka simamatei; oto aian nia

kisé ka betbet Taikamanua ka kudduat sipulubeunan

³⁵ Kaseian lé masikekeraaké Kristus ipununtuki sita бага? Momoi leú pá ikeraaké nia pureuregat бага, élé pugejaat бага, élé paoreat, élé pulajeat, élé pugebakat, élé kalotóakenen, élé kamateiat

³⁶ Kelé ka sitususurat ka Buko Sipunenan, sipasikukua kisé, "Ai lé kai ka tei ailiggou kamateiat, kalulut ekeu. Rakakau lé kai kelé biri-biri jájaket.

³⁷ Taá! Sangamberinia siorikta néné, tasisiló kam kamanangan sibulatnia sibara ka tubut Kristus sipununtuki sita бага

³⁸ Aipoí bulat ai lé kukakatonemi бага, ka sangaliot polak néné, kamateiat pá nia, élé purimanuaiat; élé malaika pá nia, élé simagege, élé kalotóakenen pá nia kineneiget, élé kalotóakenen ka gogoi sibabara; élé apa páonia bagei oniakenen simagege

³⁹ élé apa páonia sikukuddu ka manua, élé sikukuddu ka polak, élé apa pá onia bagei, sangamberinia néné, tá momoi rasaila ipukateki sita бага Taikamanua,

sipatoilánia ka tubut Tuhanta Jesus Kristus.

9¹ Bulat sibulatnia te sikuakku néné, kalulut bakkat Kristus lé aku néné. Tá kubobokoí. Aipoí pupaaturananku ka бага sipinalulut Ketsat Sipunenan, masiparoron aku mitsá masukua bulat pububulatnia sikuakku néné

² Bulat makopé reu-reu bagakku, samba bulat aiorik'an bagakk

³ kalulut galai tubudda sasaraingku sisangabangsa kai néné. Pat obákungan ipateleji aku Taikamanua, elé ipasaraaké aku ka tubut Kristus

⁴ Aipoí sia néné sapaamian sipiliy Taikamanua, samba aibailiukéan sia bakkat tatogania, samba patoilánangan leú et ka tubudda pulatsanannia. Galainangan pakerekat бага ka tubudda, lepá kaunangan ka tubudda surukat puaarat. Ngantrunangan leú et sia kipa rapaeerú maniddou, samba arasilóan leú et sangamberi patonekatnia

⁵ Sia néné, iaté sapunuteteura taikebbukatta. Ka sia Kristus néné, siripot ka pusirimanuaat, sibara ka bangsadda lé nia. Nia lé mabuak ka

sangamberinia. Oto tuumun'aké lé
Taikamanua teret buru-burú! Amen

⁶Tápoi tá te masikua, patonekat
Taikamanua néné táan aitueenung'aké;
tápoi tá sangamberidda sipuoni bangsa
Israel néné, bailiu sapaamian sipilit
Taikamanua

⁷Elé tá sangamberidda sapunuteteu
Abraham muoni tatogat Taikamanua.
Aipoí ai patonekat Taikamanua
sikuania ka tubut Abraham, kisé,
"Sarat sapunuteteu Isak lé tuooniaké
sapunuteteunu.

⁸Oto sia sapunuteteu Abraham,
oniakenen tatogat Taikamanua, iaté
sarat sia lé sapunuteteunia sipututú-tú
mata kalulut patonekat Taikamanua,
tápoi tá sangamberidda sapunuteteunia

⁹Aipoí kisé lé aikua patonekat
Taikamanua, "Ipot ka sara tetre, oi aku,
samba itutú-túaké te ka sia si Sara, sara
toga simanteu.

¹⁰Iageti mitsá aikua Taikamanua,
Itutú-túaké te si Rebekka rua sia
tatogania sibara ka tubut sara ukui, iaté
si Isak taikebbukatta

¹¹Ainangan tá mututú-tú matadda
ruadda, aikokoia kéan piliyetnia

Taikamanua ka gogoi sibabara. Ipasipiliy poí ka sia Taikamanua, tá masiitsó apa momoi ragalaiaké, tápoi masitut pasogaiat Taikamanua lé. Aipoí ainangan tá raagai masigalaiaké simaerú elé sikataí tatogat Rebekka néné

¹² aikuangan ka matat Rebekka, Taikamanua kisé, "Sikebbukat lé mupapagugulet ka tubut bagi.

¹³ Beri ka Buko Sipunenan leú et, ai akua Taikamanua kisé, "Kai Jakob lé makaté bagakku, tápoi kai Esau geti malagá bagakku ka tubunia.

¹⁴ Oto kipangan lé takukua kam kineneiget? Tá pá maroipo ukumnia Taikamanua? Kirénangan tedda maroipo lé ukumnia Taikamanua

¹⁵ Aipoí aikua ka matat Mose, Taikamanua, kisé, "Kupatotoilá te panguruat katet bagakku ka tubudda siobáku kupatotoilá panguruat katet bagakku, samba kupatotoilá te punununtut bagakku ka tubudda siobáku kupatotoilá ka tubuda punununtut bagakku.

¹⁶ Oto teú bagania ka sia Taikamanua, tá siripot teú bagadda sirimanua, elé siripot ka sigalaiakenenda sirimanua,

tápoi sarat erut bagat Taikamanua lé, ka tubudda sipiliynia

¹⁷ Ka Buko Sipunenan leú ai atusurat'aké kisé, "Aikua Taikamanua ka matat Rimatadda tai Misir, 'Kubabailiuaké te ekeu rimata, tápoi sarat kalulut néné lé itukakau ekeu, bulé kalulut ekeu, patoilákungan gegekku sambat agairangan aku sangamberi taikapolak.'

¹⁸ Oto ké iteúaké Taikamanua ipununtuki бага sara sirimanua, pununtukinangan nia бага; tápoi ké iteúaké imakelá paatuat sara sirimanua, makelánangan leú et paatuatnia

¹⁹ Oto ale kam Sasaraina, nukukua te kam ka matakku kisé, "Ké kisedda baí galainia, isesele'aké peilé kodda sia sirimanua Taikamanua? Tá pá beri sia sara sirimanua simaró бага masitá-táaké teú bagat Taikamanua?

²⁰ Tápoi ale kam Sasaraina! Sirimanua lé kam. Tá momoi imaró bagamui masialegi nga-ngan Taikamanua! Momoi leú pá ka sia kudduat ogó iiséaké sipasigagalai nia, ikua, "Kisé koí anugalai putubuatku néné?

²¹ Tá pá momoi ka sia sipugagalai kudduat ogó néné, igalai siobánia ka

tubut polak galajet kudduat ogó néné?
Ka sangatappá polak, momoi igalai rua
ngamata kudduat ogó; sara simaerú
sara mitsá tá bulat simakaerú

²² Kisedda leú te igagalaia ké ka sia
Taikamanua. Ai paatuatnia Taikamanua
masiségé'aké golúnia elé ipatoilá
gegenia. Tápoi kenanen kisé, ai leú
ipaom bagania ka tubudda ukumen
kalulut babaraakéra golúnia

²³ Iageti mitsá, ai leú et paatuatnia
Taikamanua masipatoilá ka tubutta
puuktungan simakopé igi siuruakenennia
ka sita simanuntut bagania. Aipatarek'an
sita Taikamanua masisiló puuktungan
néné

²⁴ Oto sita te néné sinogainia, tá sarat
sia sipuoni bangsa Jahudi, sambat sia
sabangsa bagei leú et

²⁵ Aipoí ka bukot Nabi Hosea, leú, ai
aikua Taikamanua kisé, "Sia oniakenenku
tá sikaumangku, bailiukékungan sia,
'Sikaumangku'. Bangsa oniakenenku tá
simanuntut bagakku, oniakékungan sia,
'Simanuntut bagakku'

²⁶ Sambat ka kudduat pasikuananda
ka tubut sirimanua, 'Tá sikaumangku

kam néné,' sedda te itukukua sia tatogat Taikamanua sipuririmanua.

²⁷ Ka sia Nabi Jesayas leú bulat maron aikua ka tubudda bangsa Israel, kisé, "Kenanen kéan lé nuntut ngaí igidda tai Israel, tápoi bulat goisó lé sia isisiló puaragat

²⁸ aipoí táan mauuju iorak'aké si Tuhan ukum ka tubudda sangamberi taikapolak.

²⁹ Samba aikua leú mitsá ka sia si Jesayas, kisé, "Bulat ké tá baí iinou sapunuteteuta, Taikamanua Sipulugege, aibailuan sita ka sita kelé Sodom sambat Gomora.

³⁰ Oto katumuinekatnia kisé lé: Ka sia sabangsa bagei taú sipuoni Jahudi, tá airabebesíaké imaerú mitsá patabbaratda ka tubut Taikamanua. Tápoi kalulut tonem bagadda, bailiu paerúnangan mitsá Taikamanua patabbaratda ka tubunia

³¹ Tápoi ka sia geti tai Jahudi, bulat airabebesíaké rareddet surukat, bulé imaerú mitsá patabbaratda ka tubut Taikamanua. Tápoi bulat beri sesedda nia

³² Apa pá lulunia tá rasesese nia?
Tá poí ka tonem bagadda ka tubut
Taikamanua ragagalaia ké néné, tápoi
bulat sibesíakenenda lé saradda. Kalulut
néné, belé sia, aitusoksok reredda ka
tubut, "Bukkú Katusoksongan"

³³ Oto pagalaiat bukku néné, ai
atusurat'aké ka bagat Buko Sipunenan
sipasikukua kisé, "Lelek'aké kam néné:
Akugalak'akéan ka Sion sara bukkú
katusoksongan reredda sirimanua; iaté
sara bukkú sabeu, sikau kabelekatda
sirimanua. Tápoi simatonem бага
ka tubunia geti bulat tá tupabubuji
bagadda."

10 ¹ Ale kam Sasaraina! Bulat
aikubebesiaké bulé rasiló ka
sia puaragat sabangsakku néné. Oto
kaluludda, bulat paniddoukungan
sipulelelek ka tubut Taikamanua

² Bulat tá magí-gí aku masimuneng'aké;
bulat maron sia muarat ka tubut
Taikamanua. Tápoi puroronda muarat
néné geti, tá puaagai sibara ka
Taikamanua

³ Tá raagai sipinaatut Taikamanua kipa
ipaeerú ipatabbra mitsá sirimanua ka
tubunia. Kalulut sipinaatutda saradda

lé poí ragagalai, taitutrangan kelé ka siripokat sikuat Taikamanua ka tubudda

⁴ Aian ka tubut Kristus kasunan surukat. Oto kasei simatonem бага ka tubut Kristus, amaerúan te mitsá patabaratda ka tubut Taikamanua

⁵ Kelé ka sia si Mose leú, ai aisurat'aké, iaté, simaeerú mitsá patabbaratda ka tubut Taikamanua kalulut surukat, muririmanua sia kalulut rereddetda surukat

⁶ Tápoi simaeerú mitsá patabbaratda ka tubut Taikamanua kalulut tonem bagadda ka tubut Taikamanua, aikua ka Buko Sipunenan kisé, "Buí nukua ka paatuatnu, 'Kasonia tusasakai ka manua?' (katukolobatnia sigorosot'aké Kristus)

⁷ elé, 'Kasonia tugogorosot ka taikabaga?' (katukolobatnia sipasisusuruaké Kristus ka kamateiat).

⁸ Katukolobatnia kisé, "Malegre lé Katuareman Simaerú néné ka tubum; ai nia ka ngu-ngum sambat ka bagat paatuatnu." Nia té nenda Katuareman sipinaarepmái; katuareman sipasikukua, buítá ramatonem бага sirimanua

⁹ Aipoí ké ngu-ngumuian amasimuneng'aké, "Jesus néné iaté Tuhan", samba anukatonemingan kam nia бага ka багат паатuatmui susuruakéna nia Taikamanua ka kamateiat, iepeité silómuian puaragat

¹⁰ Kalulut sibara ka багат паатuatda lé ramatotonem бага, bailiu silónangan sia Taikamanua kelé simaerú patabbarat mitsá ka tubut Taikamanua. Samba sibara ka ngu-ngunia lé rapasimumuneng'aké, bailiu silóranan puaragat

¹¹ Beri ka Buko Sipunenan leú, ai atusurat'aké kisé, "Bulat tá te ipabubuji bagadda simatonem бага ka tubunia.

¹² Sangamberit sirimanua lé iorak tiboiet néné, tá anai pabaggeiatnia, tai Jahudi elé sabangsa bagei. Aipoí ka sia Taikamanua sisasara néné, Tuhanda sangamberi sirimanua lé nia. Ikakau Taikamanua panukanan sipususukkra ka tubudda sangamberi sipasititiddou paroman ka tubunia

¹³ Ai atusurat'aké ka багат Buko Sipunenan kisé, "Maarau te sia sangamberi sipasisosogai onin Tuhan.

¹⁴Tápoi kipa te iooi rasogai onin Tuhan, ké tápei anai tonem bagadda ka tubunia? Elé kipa imatotonem bagadda ka tubut Tuhan, ké tápei araarep katuareman tubunia? Iageti mitsá, kipa iooi raarep pagalaiat tubut Tuhan, ké tá anai sia sieei masisegé'aké Katuareman Simaerú ka tubudda

¹⁵Samba kipa te iooi raei masipakakra Katuareman Simaerú ké tá anai sia sipasikokoiniaké sia? Ai atusurat'aké ka Buko Sipunenan kisé, "Apanganté erúnia kaoijananda sipakakra Katuareman Simaerú sibabara ka Taikamanua!

¹⁶Tápoi tá te sangamberidda sirimanua masisiló Katuareman Simaerú néné. Kelé ka sia kai Jesayas leú, ai akua kisé, "Tuhan, kaseian lé matonem бага ka sipinaarepmai?

¹⁷Aipoí kapasiaarep Katuareman Simaerú lé ramatotonem бага sirimanua. Oto Katuareman Simaerú leú ituaarep kalulut kababaradda sirimanua sipakakra Katuareman Simaerú pagalaiat Kristus

¹⁸Tápoi kenanen kisé, ai peilé nounogetku kaku: Bulatnia leú pá tápei araarep Katuareman Simaerú

néné? Arasilóan! Aipoí ka bagat
Buko Sipunenan ai atusurat'aké kisé,
"Amaarep'an nga-nganda ka sangaliot
polak, tiboietda leú et, aiailingan ka
tut-tut polak.

¹⁹Iageti kunou-nou peite kam mitsá:
Tápei pá raagai ka sia tai Israel néné?
Oto si Mosengan lé masiaalegi boikí
panounogatku néné. Aikua si Mose, "Kisé
te aikua Taikamanua, 'Kubabaraaké te
oron matamui ka tubudda sara bangsa
taú sipuoni sikauman Taikamanua samba
kubabaraaké te pungoí-ngoikat bagamui
ka tubudda sara bangsa sitaiagai
paatuat.'

²⁰Sarapeite taigí-gína nia ka sia
si Jesayas masikua, "Kisé aikua
Taikamanua, 'Ka sia sitaipasigagaba aku,
arasesengan aku; kupatotoilá te tubukku
ka tubudda sitaipasirereré pagalaiat
tubukku.'

²¹Tápoi sipaoorak ka galai tubudda
geti tai Israel, aikua si Jesayas kisé,
"Aikua Taikamanua, 'Sanganantat gogoi
lé kutotoiaké kabeiku ka tubudda bangsa
simakelá paatuat samba sitaimareddet.'"

11 ¹Kunou-nou peite kam: Kipa,
taleú airibbaiakéan sia sikaumania

Taikamanua? Bulatnia tá! Beri aku kaku, tai Israel lé aku, punuteteu Abraham, sibara ka muntogat Benyamin

²Tá! Tá airibbaiaké sia sikaumania Taikamanua, sipiliynia baranangan ka panandaatnia peilé. Kelé siagaiatmui leú et siripot sitususurat ka Buko Sipunenan pagalaiat tubut Elia, ainganduaké galai tubudda tai Israel ka tubut Taikamanua, aikua kisé

³"Ale Tuhan, aramateiakéan sia tai nabim. Samba kudduat buluat buluakenen ka tubum leú et arapakataían. Legeina lé sarakkungan lé; tápoi beringan nenda, aian leú raiisiaké ramateiaké aku kaku.

⁴Oto kipa aikua Taikamanua masialegi nga-ngan Elia? Oto aikua, "Aian akukeleiaké pitu ngaribu sia igidda. Tápei arabuluji ka sia sabulungan Baal.

⁵Kisedda leú te kineneiget: Ai sia goisó sipiliy Taikamanua kalulut panguruat katet bagania

⁶Tápoi tá te kalulut sigalaiakenenda aipiliy sia Taikamanua, kalulut panguruat katet bagania lé. Aipoí ké kalulut sigalaiakenenda lé baí aipiliy sia Taikamanua, oto táan katet бага

sipulelelek ituooniaké katet bagat
Taikamanua néné

⁷ Oto kipangan lé? Tá arasese tai Israel gabaietda. Sia lé sipilit Taikamanua goisó néné amasisese. Ka sia geti sabagei, arakeláaké lé paatuatda ka pasogaiat Taikamanua

⁸ Aipoí ka Buko Sipunenan, ai atusurat'aké kisé, "Taikamanua lé aibaraaké kelat paatuatda, pat aili teret kineneiget, tápei amaitsó matadda, élé tápei amaarep piúra.

⁹ Ka sia si Dapid leú ai aikua kisé, "Bulé papune-punenda, bailiu kelé lulup-lup, tápoi sia leú et iaalá, samba sibailiu uuggungan, katubulunganda rabelé bulé ramabubu

¹⁰ Eddangan nia imagep-gep matadda, bulé tá ioi rapaitsó; élé eddangan nia rapukou-kou tei-tei teret buru-burú.

¹¹ Kunou-nou kam mitsá: Kipa, taleú ramakataí lé tai Jahudi, aipuaili kelé néné ka tubudda ka tetret arabelé? Kirénangan tá! Kalulut jodda lé; tápoi abara lé katuaragatda sabangsa bagei, pat sí-sí bagadda tai Jahudi ka tubudda bangsa bagei

¹² Kalulut sele sigalaira tai Jahudi, elé taimareddetda ka teú bagat Taikamanua, bailiu panukaninangan sia Taikamanua sabangsa bagei. Sarapeite ké amaerúan mitsá patabbaratda tai Jahudi ka tubut Taikamanua, tá isoppi iaké mitsá ka tubudda Taikamanua panukanan simakopé igi

¹³ Kineneiget, ka tubumuian lé ale sasaraina sipuoni taú sipuoni tai Jahudi kukukua kuanenku! Burúnia néné, bulat makopé kuabeuaké ka bagat paatuatku galajet, puukuketku siripot puooningku apostelda taú sipuoni bangsa Jahudi

¹⁴ Bulat akugeléan imaoro matadda sia bulat tubut sabangsakku, bulé ka sigalaiakenenku néné, oi iarauaké sia Taikamanua sangarubeiat ka talagadda

¹⁵ Kalulut taisisilóna sia Taikamanua, bailiu erú mitsá patabbaratda taikapolak ka tubut Taikamanua; sarapeite ké isiló baí sia Taikamanua! Bulat galainia baí, kelé atusuru sia mitsá simamatei

¹⁶ Ké atukauan siboikí sangatippú roti ka tubut Taikamanua, oto momoi takua sangamberinia roti, tukakau leú et ka tubut Taikamanua. Ia leú et ké ungat loiná Taikamanua sibakkatnia, oto

paran-rannia leú et Taikamanua leú et sibakkatnia

¹⁷Oto piga pá ran zaitun, iaté tai Jahudi atutugglu. Oto ka sinunggulat néné te atuettet'aké ran loinat zaitun leleu, iaté kam néné ale Sasaraina taú sipuoni tai Jahudi. Atuettet'aké kam ka sinuggulat ran néné, bulé nunanam kam sangamberi simaerú sibara ka purimanuaiat puketsananda tai Jahudi

¹⁸Oto buí imamit bagamui ka tubudda ran sinugglu kelé néné. Buí nukalipogi kam nia, kam néné ran lé kam. Aipoí tá te ran masikakau kan ungat, tápoi ungat lé masikakau kan ran

¹⁹Tápoi tá isoppi nukua kam nia ale kam Sasaraina, "Kirénangan tedda tututugglu paran-rannia, bulé ioi ituettet'aké aku kaku ka loinánia!

²⁰Aisese tedda sikuamui. Tápoi aituribbaiaké sia ka sia kalulut taimatonem bagadda lé, iageti aitusiló kam ka kam, kalulut tonem bagamui lé. Oto buí nuumun'aké kam tubumui kalulut néné; tápoi kau lé ibara lotómui

²¹Aipoí beringan tai Jahudi sipuoni bulat ran, tá aibaijí iribbaiaké sia Taikamanua, sarapeite kam néné, buí ikua ka bagamui

ibabaijí kam, iribbaiaké kam ka kam
Taikamanua

²² Oto sené mitsá momoi taitso kam
kopet pueerúnia Taikamanua, tápoi
sené leú et, taitso ronnia Taikamanua
masipaanuji sia sirimanua sijo, tápoi
maerú bagania ka tubumui ka kam ale
Sasaraina, sarat kau lé nupurimanua kam
ka erut bagania. Ké tá kisedda, mandé
kam leú et ka kam ribbaiakénangan kam

²³ Ialeú et ka sia tai Jahudi, ké raariaké
baí mutaimatonem бага, silónangan sia
mitsá Taikamanua; ai poí gege ka tubut
Taikamanua isiló sia mitsá

²⁴ Kam sipuoni taú tai Jahudi néné,
kelé ran loinat zaitun leleu lé kam,
bulat ké nusaggangi baí kam galai
tubumui, oi ituettet'aké kam ka loinat
zaitun sibulatnia, sarapeite sia tai
Jahudi sipasikat'akenen ran loinat zaitu
bulat sibulatnia. Bulat labbei lé katubut
Taikamanua masitoiliaké sia mitsá ka
tubut loinat zaitunda leú et

²⁵ Ale kam Sasaraina! Buí nukua kam
tubumui anuagaian kam sangamberinia.
Aipoí ai sara kiddiyet bagat Taikamanua
agaietmui. Tápoi einangan tá raaagai
sirimanua. Ai sara kuanenku paagaietku

ka tubumui, bulé nuagai kam nia.
Iaté: Sangarubeiat tai Jahudi makelá
paatuatda. Tápoi galai tubudda kelé
néné geti itukakapplu, teret lélé nia
igidda sieei ka tubut Taikamanua, sia
sipuoni taú tai Jahudi

²⁶ Iapeité silóranan nia ka sia tai Jahudi
puaragat néné. Aipoí aian atusurat'aké
ka Buko Sipunenan sipasikukua kisé,
"Mmoi te nia Rimata Sipaarau sibara
ka Sion; iageti posanangan sangamberi
jodda sapunuteteu Jakob

²⁷ Kubabaraaké te pakerekat бага néné
ka tubudda ka tetret aikuaappéaké
jodda.

²⁸ Kalulut taiobára nia tai Jahudi
masisiló Katuareman Simaerú néné,
bailiunangan sia saggak Taikamanua;
tápoi aibailiu lé nia puuktunganmui ka
kam, ale kam Sasarina sipuoni taú
tai Jahudi. Tápoi kalulut pipiliyna sia
Taikamanua, bailiu riu-riu lé ipukateki sia
baga Taikamanua, kalulut taikebbukatda

²⁹ Aipoí ka sia Taikamanua, ké aipiliyan
sia sirimanua, élé aipanukaningan
sia, táan te iaalá mitsá ka tubudda
sangamberi sigalaiakenennia

³⁰ Sitaimareddet ka tubut Taikamanua lé kam siburú. Tápoi kineneiget geti, aipoiliat'an Taikamanua bebelakéna kam kaukuman jomui, kalulut taimareddetra tai Jahudi

³¹ Oto kisedda leú te ka sia tai Jahudi. Kineneiget tá maredet sia ka tubut Taikamanua, bulé imatoilá katubebelakémui ka kam, ka ukuman jomui. Tápoi lepá geti toiláaké bebelakéna sia ka sia Taikamanua, ka ukuman jodda

³² Aioreaké poí sia Taikamanua sangamberi taikapolak, bulé ikup-kup'aké sia putataimareddet, bulé ipatoilá punununtut bagania ka tubudda sangamberidda

³³ Bulat sipususukkra lé pukayoatnia Taikamanua. Bulat simakopé sikut paatuat sambat puaagai lé nia Taikamanua! Kasei te momoi masikeruji siteúakenennia? Kasei te momoi iagai kipa igagalai Taikamanua, igalai galajetnia

³⁴ Ka Buko Sipunenan, ai atusurat'aké kisé, "Kasei momoi masisinogi pupaaturan Taikamanua? Kasei momoi masikau panganturat ka tubunia

³⁵ Kasonia ataagai kam amasikau apa pá ka tubut Taikamanua? pat ró bagadda masitiddou sili ka tubunia?

³⁶ Taikamanua lé aibaraaké sangamberinia. Ka tubut Taikamanua lé kabaraiať sangamberinia, samba Taikamanua leú et sibakkatnia. Oto tuumun'aké lé Taikamanua teret buru-burú! Amen.

12 ¹ Ale kam Sasaraina! Bulat seget kopet erúnia lé Taikamanua ka tubutta néné. Iaté né lulunia kutitiddou ka tubumui simakopé, bulé nusegé'aké kam tubumui bailiu kelé sara buluakenen sipuririmanua, sikokoiakenen ka Taikamanua, samba bailiu obaket bagania. Oto buítá kisedda pusururúmui ka tubut Taikamanua

² Buí nutut'aké kam siobat bagat polak néné. Bulé Taikamanua isiliy galai tubumui, imabau paatuatmui, ioi nuagai kam apa siobat bagat Taikamanua, iaté, apa sipuoni simaerú samba siobat bagania, samba aponia simasut pueerú

³ Aipoí aku kaku néné, aipanguruaningan aku Taikamanua. Iaté lulunia kupangangantru kam ka kam, ale Sasaraina: Buí nukua kam tubumui

simabuak tiboï tubu, kam néné, pat saliuakémuian siripot tubumui. Tápoi kau lé nupusigoá kam, nuitsó kam tubumui, ka repet paatuat. Bulé senemui musigoá, isiripoki ron siaket Taikamanua ka tubunia, kalulut tonem bagania ka tubut Jesus

⁴Tubutta néné maigi laddounia. Senen laddou tubutta néné, ai galaijetda pasasaradda

⁵Oto kisedda leú te ka sita néné. Kenanen maiigi sita, tápoi sara lé sita, kalulut atapatabbra kam, ka tubut Kristus. Samba sita leú et senenta, ai patabbaratta ka pasasambatta, kelé sipuoni laddou ka sara tubu

⁶Ka senen tubutta leú et, ai ka tubutta panguruat sitaimakeré. Pasiaaké nia panguruatnia leú et Taikamanua ka tubutta, siripot panguruat katet bagania lé. Oto kau tapakei kam nia panguruatnia néné. Ké panguruat masipakakra Katuareman Simaerú isiló, kau ipakakra Katuareman Simaerú sibara ka Taikamanua néné, siripot siooi igalaiaké

⁷Sipasisisiló panguruat masirop'aké sirimanua, kau bulat sibulatnia ipasikeli

sabagei. Iageti sipasisisilo panguruat masigelaiaké sabagei, kau bulat imalelek igelaiaké sia

⁸Sipasisisiló panguruat masiparon putotonem bagadda sirimanua sabagei, kau bulat ipulelek iparon pupaatuananda sirimanua sabagei. Sipasisisiló panguruat masipauruaké apa pá sibabara ka tubunia, kau iapupanguruat bulat sibara ka anggai bagania, siripot simateú tugalaiaké. Sisilo panguruat masiutéaké sabagei, kau bulat ipulelek ipasiutéaké. Iageti sisiló panguruat masipatoilá katet bagania ka tubudda sabagei, kau igalaiaké nia ka angkat бага

⁹Kau bulat sibara ka linat paatuatnu nupukateki sia бага sirimanua. Kau imalagá bagam ka sikataí, samba kau numariu-riu ka simaerú

¹⁰Kau nupakaté kam бага pasasambamui, bulat sibara ka lalai bagamui, kelé siripot sipusasaraina ka sangakeluarga. Iageti kau nupaola kam muboikí, masikau paroroiat ka pasasambamui

¹¹Kau numangamang kam masigalai galajetmui. Buí numabeili kam. Kau

nupugalai kam galajet Tuhan, bulat sibara ka ron Ketsat Sipunenan

¹² Kau ka angkat бага nupukaronan kam, ka tubut Tuhan, elé kau imaom bagamui masisiló paoreat, samba kau leú imariu-riu nupaniddou kam ka tubut Taikamanua

¹³ Pauruaké kama pa sibabara ka tubumui, masirop'aké sia simatonem бага ka tubut Taikamanua, samba leú et siló kam sia siooi ka lalepmui ka angkat бага, kenanen tá nuagai kam sia

¹⁴ Tiddou kam ka tubut Taikamanua bulé isukat'aké sia simalagá бага ka tubumui. Bulatnia, tiddou kam ka tubut Taikamanua isukat'aké sia, bá pateteleji kam sia

¹⁵ Ké ai sia sipuaangká бага, puangkámuian бага sambamui. Ialeú et, ké ai sia sipusosou, pusoumuian leú et sambamui

¹⁶ Kau imaaman puririmanuamui ka pasasambamui. Buí nubuak'aké kam tubumui. Buí nukua kam tubumui, kam lé bulat simaagai, nupubara kam tubumui, oto tá kisedda puaagaimui bulat sibulatnia

¹⁷ Ké ragalai sikataí ka tubumui, buí nulumun'aké kam nia ka kam, nugalaiaké leú kam sikataí, ka tubudda ka sia.

Apa oniakenenda sangamberi sirimanua simaerú, nenda te nugagalaiaké kam

¹⁸ Bulat besíaké kam, sibara ka mungkuatmui néné, murimanua ka bagat aban бага, ka tubudda sangamberi sirimanua

¹⁹ Ale kam Sasarainangku! Buí nulumun'aké kam pukakataíra sirimanua ka tubumui. Ai leú iukum'aké nia Taikamanua. Aipoí ai atusurast'aké ka Buko Sipunenan kisé, "Aikua si Tuhan, Aku lé masilulumun'aké sia. Elé Aku lé iuukum'aké nia.

²⁰ Tápoi kisé lé nugagalaiaké kam, ké malaje sia saggaknu, kaumuian kanda. Samba ké maoggou sia, kau kam lóra. Aipoí kapasigagalaiakémui nia kelé néné ka tubudda, mailanangan leú et ka tubumui

²¹ Buí nuobáaké ikalaaké kam sikataí, tápoi kau lé nukalaaké kam sikataí néné, ka pasigagalaiakémui simaerú ka tubudda.

13 ¹ Buítá nureddet kam nganganda sapamarenta. Aipoí bulat beri sia

sara sapamarenta sitaisiló gege sibara ka tubut Taikamanua. Parenta raenung'aké sapamarenta kineneiget, iaté parenta sibabara ka tubut Taikamanua

²Oto sikuat Taikamanua lé te galainia atasaggangi kam, ké tá tareddet kam nga-nganda sapamarenta. Kasei sigalaiaké kelé néné, tá isoppi rasiló ukuman

³Aipoí ka sia sigalaiaké simaerú, buían ramalotó ka tubudda sapamarenta. Sia sikataí paraboat lé masikakalotóaké sapamarenta. Oto ké ainuoobá kam tá numalotó kam ka tubudda sapamarenta, kau imaerú paraboatmui. Sedda peité raumun kam sapamarenta

⁴Aipoí sapagugulet Taikamanua lé sia sapamarenta néné, sigalaiaké katuerukatmui. Tápoi ké tá geti maerú paraboatmui, kau nukalotóaké kam sia. Tá poí siboboi aibara gege ka tubudda rapaukumi sirimanua. Pagugulet Taikamanua lé sia, sipasioorak'aké ukum Taikamanua ka tubudda sirimanua sikataí paraboat

⁵Iaté lulunia numarereddet kam ka nga-nganda sapamarenta, tá sarat kalulut taiobámui tuukum, tápoi beri

leú et paatuatmui ka бага, aikukua ka tubumui, bulé numareddet kam

⁶Nenda leú te lulunia aikabaraji nubabaya kam pajá, aipoí pegawai Taikamanua lé sia sapamarenta néné, sipasigagalaiaké galajet sikokoiaenen

⁷Oto бага kam ka tubudda sapamarenta apa simateú багаet ka tubudda. Бага kam pajá ké siorak pajá peilé kam; samba бага kam cukai ké siorak pucucukai peilé kam. Abeuaké kam sia simateú abeuakenen, samba kau nuhormati kam sia simateú hormatiet

⁸Buí nupuutak kam apa pá ka tubudda kasei pá ké tá, sarat siorak ka pununtuat бага ka pasasambamui lé kelé utakmui. Aipoí kasei simanuntu бага ka pasasamba sirimanua, atukapplungan te aragalaiaké nia sangamberi surukat Mose

⁹Surukat aratda tai Jahudi, iaté; Buí nupaelet; buí nupamatei; buí nupanangkou; buí imakiddiy bagam ka bibiletda saaleinu sirimanua; sambat sangamberinia pasuru-surukat bagei, atupaloprungan nia; oto bailiu sarangan lé surukat, iaté, "Kau imakaté bagam ka

tubudda saaleinu sirimanua, keleú katet bagam kekeu ka tubum.

¹⁰ Ké manuntu bagadda ka tubudda sabagei, tá ragagalaiaké sikataí ka tubudda. Oto ké apakatéan sia бага kere-keré, asut'an te aragalaiaké nia sangamberi sikuat surukat

¹¹ Iageti ka sangamberinia néné, kam leú anuagaian kam, aailina kineneiget tetrenia nutusuru kam. Aipoí gogoi Taikamanua iarauaké sita, bulat amalegrengan nia ka tubutta kineneiget, belé peilé legrenia ka tetret baunia peilé atamatonem kam бага ka tubut Kristus

¹² Tukakapplungan lé te soibó, iageti táan mauuju imapató. Oto kauan taariaké kam mugalai galajet pugepgeman. Buítá tapatarek kam tubutta masipakei pamatei pupatokat

¹³ Kau lé tagalaiaké kam galajet simateú, kelé sigalaiakenenda sirimanua ka sinágó. Kila-kilangan leú nusabauaké kam beunan punenmui, elé mupuineng. Buí imaolop tubumui, elé ibara galai tubumui kelé sitaiagai arat. Buí nupalabá kam, elé buí imaoro matamui

¹⁴ Bulé Kristus'an lé masiteteúaké aponia galaiakenenmui. Samba buí

nutut'aké kam galai tubut pusirimanuaat sijo, bulé nusegé'aké kam bagamui mugalai siripot ka pubobotbot akkulá.

14¹ Kau imalelek nusiló kam sia sasarainamui simagulai peilé ka putotonem бага ka tubut Tuhan Jesus. Bui nupajoggloaké kam nia kalulut sipinaatunia sarania

² Ai sia sipaatu ka bagania, momoi ikom apa masese. Tápoi ka sia geti simagulai putotonem бага, ai peilé ka paatuatnia masakua, sarat gulei lé momoi ikokom

³ Oto ka sia sikom apa masese, buí imamit bagadda ka tubut sikom sikokoiakenen; iageti ka sia leú et sikom komen sikokoiakenen, buí rasele'aké sia sikom sangamberinia, aisilóan poí nia Taikamanua

⁴ Kasonia poi ekeu néné, pat koí ró bagam masiadili paguguletda sabagei? Ka sia pagugulet néné, belé elé tusuru pá nia, tuannia lé sibakkat pasikelat. Kirénangan muririó nia pagugulet néné, kalulut momoi poí kai Tuhan irióaké nia mitsá

⁵ Ai sia sabagei siadde'aké gogoi sikokoiakenen peilé maerú ka gogoi bagei, tápoi ka sabagei geti raoniaké

gogoi nenda, makeré lé. Oto edddangan
nia raenung'aké siripot sipinaatudda
saradda

⁶ Aragalaiaké nia ka sia masiaddeaké
sara gogoi sikokoiaenen peilé maerú,
masisurú si Tuhan lé. Ka sia leú et
sipasikokom sangamberinia, aragalaiaké
nia kelé néné, masiumun Tuhan leú et,
kelé masikua surá ka tubut Taikamanua
kalulut komen sikomra néné. Oto kisedda
leú te ka sia sikom komen simakokoi,
masisurú Taikamanua leú te ragagalai,
masikua surá ka tubunia

⁷ Aipoí beri sia sara ka talagatta néné
murimanua sarat uktuknia sarania; elé
beri sia sara ka talagatta simamatei
uktuk tubunia sarania

⁸ Ké murimanua sita, puririmanuatta
néné, murimanua kai Tuhan lé. Ialeú et
ké matei sita, matei kai Tuhan leú et.
Oto, murimanua elé matei pá sita, Tuhan
lé saibakkat sita

⁹ Ka sia Kristus amatei nia, lepá suru nia
mitsá. Iaté lulunia aibailiu nia Tuhanda
sipuririmanua sambat simamatei

¹⁰ Kalulut néné, kam Sasaraina!
Apangan lé lulunia nusesele'aké kam sia
saaleimui sikeré tonem бага? Samba

apangan lé lulunia imamimit bagam ka tubunia? Aipoí sangamberitta lé muririó ka matat Taikamanua, bulé iadili sita

¹¹ Ka Buko Sipunenan, ai atusurat'aké kisé, Aikua si Tuhan, "Bulatnia, murerekkuk te sangamberi borklo rapaniddogi aku; samba sangamberidda masiumunaké pu-Tataikamanuangku.

¹² Oto sangamberitta néné, buíta tapertanggung jawab'aké sangamberinia sigalaiakenenta ka matat Taikamanua

¹³ Oto kalulut néné, buían tapasele kam katubu. Tápoi kau lé tajago kam tubutta, bulé buí tabaraaké kam apa pá sikau ialá bagadda saalei ka sikataí sambat ramajo

¹⁴ Kalulut akupusara ka tubut Tuhan Jesus, bulat kopé tonem bagakku, beri sara apa pá, tútúnangan kasit-sit'akenen. Ikasisit-sit'aké nia geti ka sia sara sirimanua, kalulut ooniakéna lé nia kasit-sit'akenen

¹⁵ Tápoi ké kalulut komenmui lé baí aibaraaké asat bagadda saalei ka tubumui, oto táan te ka siripokat pununtuat бага sigalaiakenenmui néné. Ké amateian Kristus kalulut sara sirimanua, oto buían nuobaaké kam ipakataí pupaaturanannia kalulut sikomnu

¹⁶ Iaté lulunia, buían nugalaiaké kam
apa kuanenmui simaerú ka kam, tápoi tá
pasesese ka bagadda ka sia sabagei

¹⁷ Aipoí ka purimataat Taikamanua,
táan pagalaiat apa momoi rakom,
elé tá momoi rakom sirimanua, bulat
besíakenen. Tápoi bulat besíakenen geti
iaté, bulé rareddet teú bagat Taikamanua
ka aban бага, samba masisiló pugoraat
baga sibara ka Ketsat Spunenan

¹⁸ Oto sia sipuukú galajet Kristus,
kelé néné te siangkáaké bagat
Taikamanua; beri sirimanua sabagei leú
et, rahohormati sia

¹⁹ Bulat besíakenenta geti, iaté
buítá tabaraaké kam paabanan ka
pasasambatta, samba pasopo katubu

²⁰ Buí kalulut komenmui, pakataímuian
sigalaiakenen Taikamanua. Kirénangan
tedda tá takei-kei takom kam
sangamberi komen, tápoi ké baí kalulut
komennu ibaraaké jodda sabagei, oto
amaselengan te ekeu

²¹ Bulat merú peilé tá nukom akkulá,
elé tá nuló anggur, elé tá nugalai apa
pá, ke sikau imajo sara sarainam sikeré
tonem бага le, sigalaiakenennu néné

²² Ka matat Taikamanua lé nugagalaia ké nia katonemietnu saram néné. Aipoí sia sitaiaddeaké sigalaiakenennia néné masele, kalulut kolou ka bagania sesesenanian sigalaiakenennia néné, sia té néné oniakenen, simauktuk

²³ Tápoi sia geti simatik-tik ngu-ngu masikom apa pá, tápoi lepá komrangan nia, sia té isesele'aké Taikamanua; aipoí tá aigalaiaké siripot tonem bagania apa sipasesese elé apa sitaipasesese. Oto sangamberinia sigalaiakenen tá ka bagat tonem бага, jongan lé te nenda ituooniaké.

15 ¹ Oto sita oniakenen bulat sikatonemi katonemietta, kau tapaom kam bagatta ka tubut sitaipaoorak ka bagadda sia simagulai putotonem бага. Buí sarat tubutta saratta le' tasasanang'aké kam

² Tápoi bulé senenta masakau puangkakat bagadda ka sia saalei sikeré tonem бага, sibailiu katuerukatnia, bulé ituppai puroron tonem bagania

³ Aipoí beringan ka sia Kristus, tá aipaatu pusanangan nia sarania. Ai atusurat'aké ka Buko Sipunenan sipasikua kisé, "Atusappóakéan ka

tubukku sangamberinia paloloiat ka tubum.

⁴ Sipangantru sita lé poí sangamberinia tiboiet Taikamanua sitususurat ka bagat Buko Sipunenan néné. Aipoí nganturat sisilóta sibara ka Buko Sipunenan, sikau sita muom бага, élé masiparon sita lé, pat oi tapukaronan kam бага ka tubut Taikamanua

⁵ Bulé Taikamanua sipaom bagadda sirimanua, élé sipusuibi bagadda sirimanua, irop'aké kam, ibara ka kam keret бага, nuului kam galai tubut Jesus Kristus

⁶ Bulé keret bagamui sangamberimui néné, umun'akémuian Taikamanua, Ukkui Tuhanta Jesus Kristus

⁷ Oto kalulut néné, kutiddou ka tubumui, bulé pasiló kam katubu pasasambamui, tápoi kau bulat sibara ka angkat бага, kelé leú et aisiló kam ka kam Kristus, bulé nuumun'aké kam Taikamanua

⁸ Néné lé repdemenmui, aipasikelingan sia Kristus tai Jahudi, masipatoilá topitnia Taikamanua masisut'aké pakerekat bagania ka tubudda sapunuteteuta siburú

⁹ Samba Jesus leú et kalulut erut bagania ka tubudda sabangsa bagei, kaunangan sia masiumun Taikamanua. Ka Buko Sipunenan leú et ai atusurat'aké kisé, "Oto kalulut néné, umun'akékungan ekeu ka talagadda sabangsa-bangsa, uraiakékungan urai pusurakat masiuraji onim.

¹⁰ Ai leú et bagei atusurat'aké ka Buko Sipunenan sipasikukua kisé, "Puangká kam бага sambamui sikauman Taikamanua sipiliy, alé kam sabangsa-bangsa!

¹¹ Samba ai leú et mitsá sipasikukua, "Umun kam Taikamanua kam sangamberi bangsa, bulé sangamberi sirimanua masiumun'aké nia!

¹² Ka sia leú et si Jesayas, aikua, "Babara te ka punuteteu Isai siuté'aké bangsa-bangsa; ka tubunia lé rapukakaronan sangamberi bangsa.

¹³ Ka tubut Taikamanua lé nueei kam mukaronan. Bulé nia masisut'aké ka bagat paatuatmui, élé masisut'aké erut puririmanua ka tubumui, kalulut tonem bagamui ka tubunia, bulé kalulut geget Ketsat Sipunenan, tuppainangan ron pukakaronanmui ka tubut Taikamanua

¹⁴Ale kam Sasaraina! Bulat aikukakatonemi бага игиниа симаеру́ ка tubumui. Beri kam leú et ka kam, nuagai kam sangamberinia; momoi nupangantru kam katubu pasasambamui

¹⁵Tápoi pabage-bagei geti bulat kuron'aké kukua nia ka matamui ka suratku néné, kalulut aiakéan Taikamanua ka tubukku galajet néné

¹⁶Aibailiuakéan aku, Taikamanua pagugulet Jesus Kristus, koiniakenennia masipangantoman taú sipuoni tai Jahudi. Oto aku néné kelé imam lé, sipakakra Katuareman Simaerú sibara ka Taikamanua, bulé ibailiu sia taú sipuoni tai Jahudi néné buluakenen ka tubut Taikamanua, sioi isiló Taikamanua. Bulé Ketsat Sipunenan ibailiuaké sia néné buluakenen simakokoi bakkat Taikamanua

¹⁷Oto kalulut amusarangan poí aku ka tubut Jesus Kristus, bailiu umungkungan tubukku ka galajetku, masipuukú Taikamanua

¹⁸Simarot bagakku kutitiboi sené, iaté sarat pagalaiat sigalaiakenen Kristus, ka sigalaiakenenku lé, iaté masitubbui sia bangsa taú sipuoni tai Jahudi néné,

mureddet ka tubut Taikamanua; ka sigalaiakenenku ka titiboat samba ka pasigagalaiaké

¹⁹ sialei pukerengan sambat kiseiet sabeu, sigalaiakenen Ketsat Sipunenan. Akupakakrangan sangamberinia Katuareman Simaerú, pagalaiat Kristus néné, ka tubudda sirimanua; tutaddaaké barania ka Jerusalem, pat aili ka Ilirikum

²⁰ Ai lé kubebesiaké mei masipakakra Katuareman Simaerú néné, ka tubudda sitaipasiaarep peilé pagalaiat Kristus. Aipoí kaku néné, tá kuobá masigalai galajet ka uddut bongan sigalaira sabagei

²¹ Ka Buko Sipunenan ai atusurat'aké kisé, "Raiitsó te sia sitaipasisisiló peilé, Katuareman Simaerú pagalaiat Kristus néné; elé raagai te kelounia, sia sitaipasiaarep peilé.

²² Iaté lulunia marei-rei ibara pasailaatnia kuoi kubalou kam

²³ Tápoi kineneiget geti alepáan galajetku ka palagga-laggai. Bulat piga ngarurungan pá burúnia akuisiaké kubalou kam

²⁴ Kiséan lé tagagalai, atusabauan geti kai kuei kai masibalou tai Spanyol, ari

kai goisó sedda. Bulat aikukakaroni бага tapaaili kam sedda, tapuangká kam бага sambatta. Iageti bulat ai leú te kukakaroni бага, nurop'aké kam aku kapuenungananku masiailiaké laggai Spanyol

²⁵Tápoi kineneiget geti memei peilé aku ka Jerusalem masitaroaké paroman ka tubudda sapaamian Taikamanua sedda

²⁶Aipoí apakeréan bagadda sapaamian Makedonia sambat paamian Akaya masirop'aké saaleira simagebá ka talagat paamian Taikamanua ka laggai Jerusalem

²⁷Bulat ka angkat бага lé arateúaké nia rarop'aké sia. Kirénangan tedda mateú lé rarop'aké sia sasarainanda simagebá ka laggai Jerusalem. Aipoí ka sia taú sipuoni tai Jahudi, ka tai Jahudi lé arasiló panukanan. Oto mateú lé ka sia taú sipuoni tai Jahudi néné, rarop'aké tai Jahudi, rapauruaké panukanan sisilóra, iaté pukayoatda

²⁸Oto ké atukapplungan baí kugalai galajetku néné, iaté masitaroaké paroman sirurúakenenda néné, ka tubudda sapaamian ka Jerusalem, iapeité

oi aku ka laggaimui katusabagatku
kuailiaké laggai Spanyol

²⁹ Ké moi aku kubalou kam, abbitkungan
ka kam panukanan simakopé igi sibara
ka tubut Kristus

³⁰ Oto ka onin Jesus Kristus Tuhanta,
samba ka nuntut бага siaket Ketsat
Sipunenan, moi aku ka tubumui kunáná
kam, bulé kam leú et ka kam nurop'aké
kam aku tapaniddou kam simakeré ka
tubut Taikamanua bulat sibara ka muinet
paatuatmui, nusopo kam aku

³¹ Tiddouaké kam aku, bulé kubela ka
kabeira sitaimatonem бага, sikukuddu
ka laggai Judea. Elé bulé galaiakenenku
néné, iaté masitaroaké panguruat ka
Jerusalem, rasiló sapaamian Taikamanua
sedda, ka angkat бага

³² Oto ké aiteúakéan baí Taikamanua
iaili tetrenia kuoi, oi kuoi sedda ka
angkat бага. Sedda bara pusuibiat
bagakku kukuddu ka talagamui

³³ Bulé Taikamanua, sipasikeli
puririmanuan sirimanua, masipaalei kam
sangamberimui. Amen.

16 ¹ Sené ai maniuta si Pebe. Kuobá
nuagai kam nia. Nia néné, iaté
sara sipasirorop'aké paamian Kengkrea

² Oto siló kam nia, siripot puoninia sara paamian Taikamanua. Kisedda poí galainia simatonem бага ka tubut Taikamanua, buítá parauma sia katubu pasasambadda. Ké itiddou paroman ka tubumui, rop'akémuian nia, aipoí nia ka sia néné, amaingingan sia airop'aké; beri aku kaku léu et, airop'akéan aku

³ Segéaké kam salamku ka tubut Priska sambat ka tubut Akuila, saaleiku mugalai galajet Jesus Kristus

⁴ Bulat aian lé goisó ramamatei kalulut rarop'aké aku. Oto bulat surá lé kukua ka tubudda; iageti tá sarat aku masikukua surá ka tubudda, tápoi beri leú et sia taú sipuoni tai Jahudi, arakua leú surá ka tubudda

⁵ Samba segéaké leú kam salamku ka tubudda sapaamian siparururú ka lalepra. Segé salamku ka tubut Epenetus simanuntut bagakku. Nia té néné simatonem бага siboikí ka tubut Kristus ka Asia

⁶ Segé leú salamku kai Maria. Bulat aimomongan tubunia ipasikeli kam

⁷ Iageti paniddogatku, bulé nusegéaké kam salamku ka tubut Andronikus, sambat ka tubut Junias. Sangabangsa

lé kai, samba makeré atupenjaraaké kai. Einangan tá matotonem bagakku kaku ka tubut Kristus, amuboikían sia kaku. Bulat maerú katuareman pagalaiat tubudda ka talagadda tai apostel

⁸Segé leú et salamku ka tubut Ampiliatus, simanuntut bagakku, kalulut makeré akupatabbra kai ka tubut Tuhan

⁹Segéaké kam hormatku ka tubut Urbanus, aleita mugalai ka galajet Kristus. Iageti segé leú salamku ka tubut Stakis, simanuntut bagakku

¹⁰Segé leú salamku ka tubut Apeles. Bulat amatoiláan putotopitnia ka tubut Kristus. Salamku leú et ka sia ka tai Aristobulus sangalalepra sambat kai Herodion

¹¹Sisangabangsa kai ruamai. Iageti segé leú et salamku ka tubudda sasarainamai sangalalepra tai Narkisus sikeré tonem бага ka tubut Jesus

¹²Oto segé leú salamku ka tubut Tripena sambat ka tubut Triposa, sipasimomomoaké tubunia, masipuukú galajet Tuhan, samba leú et ka tubut Persis Simanuntut bagakku. Beri leú et ka sia aimomoakéan leú et tubunia mugalai galajet Tuhan

¹³ Salam leú ka tubut Rupus sambat ka tubut inania, siaddeakenenku bulat tubut inangkungan lé. Si Rupus néné, iaté sara sipiliy Tuhan, umun'akenen kalulut sigalainia

¹⁴ Segéaké leú kam salamku ka tubut Asinkritus, kai Pelegon, kai Hermes, kai Patrobas, kai Hermas, samba leú et ka tubudda sangamberi saaleira sedda sabagei sikeré tonem бага ka tubut Tuhan Jesus

¹⁵ Iageti segé leú salamku ka tubut Pilologus sambat kai Julia; kai Nereus sambat ka maniunia; ka tubut Olimpás samba ka tubudda ka sia sangamberi saaleira sedda sikeré tonem бага ka tubut Tuhan Jesus

¹⁶ Bulat kau nuparoro kam pasasambamui sibara ka ngelei bagamui, siripot simateú ka pusarainaatda sipu-Kakariten. Iageti sia leú sangamberi sapaamian Kristus ka Korintus segé leú et salamra ka tubumui

¹⁷ Ale kam Sasarainamai! Bulat paniddogatku sabeu ka tubumui: Kau nujago kam tubumui ka tubudda sibaraaké karaganan paamian, elé sipakataí putotonem bagadda sirimanua

ka tubut Tuhanta. Néné poí, tá paaakkup
nia ka singantruakenen ka tubumui. Oto
bá palelegre kam tubumui ka tubudda

¹⁸Aipoí ka sia sipasigagalaiaké kelé
néné, tá mugalai galajet Tuhanta Jesus
Kristus ragagalai, tápoi masisegé'aké
bagadda mugalai siobára lé. Rakau
tiboiet simananam, ranáná sia, bulé ialá
bagadda ka sikuadda, ioi rapataju sia
sitaiagai apa pá

¹⁹Araagaian sangamberidda sirimanua,
riu-riunia nuomet'aké kam sangamberi
sigelaiakenen ka tubumui, pagalaiat
Katuareman Simaerú sibara ka
Taikamanua. Oto bulat maangká
bagakku kuarep pagalaiat tubumui néné.
Iageti kutiddou ka tubumui, bulé masiku
paatuatmui ka simaerú, tápoi mabodo
ka pagalaiat sikataí

²⁰Bulé Taikamanua sipasibubujai
sirimanua, masiaké ka kam gege, bulé
ioi nukalaaké kam, elé nupakataí kam
geget Setan. Bulé mariu-riu ipanukani
kam Tuhanta Jesus Kristus

²¹Beri leú et ka sia si Timoteus aleiku
ka galajet, segé leú et salarnia ka
tubumui. Kisedda leú et ka sia si Lukius
sambat si Jason sambat si Sosipater

sisangabangsa kai, segé leú salamra ka tubumui

²² Aku lé sipuoni si Tertius amasigalai surat néné. Segé salam pusarainaatku ka tubumui ale kam Sasarainamai

²³ Iaké leú salamnia ka sia si Gayus ka tubumui. Ka lalepnia lé kukukuddu, beri pumengguiatmai leú et, ka lalepnia lé. Beri leú si Erastus, segé salamnia ka tubumui. Kisedda leú et sarainanta si Kuartus

²⁴ [Bulé Tuhanta Jesus Kristus masipanukani kam sangamberimui. Amen.

²⁵ Tuumun'aké lé Taikamanua! Kalulut kababarat gege ka tubunia masirop'aké tonem bagamui siripot Katuareman Simaerú sisegéakenenku ka tubumui, iaté pagalaiat Jesus Kristus. Siripot sipinatoilat Taikamanua ka tubukku lé kaku kupakakakra Katuareman Simaerú néné, iaté pagalaiat sipinaatut Taikamanua, sitaiaagaietda sirimanua, barania ka siburú peilé, ka piga ngarura pá burúnia situsasabau

²⁶ Tápoi kineneiget geti, kalulut parentat Taikamanua sipuririmanua teret buru-burú, bailiu sipinaatut

Taikamanua néné tupatoilá elé tupaagai
ka tubudda sangamberi bangsa iaté
ka sinurat'akenenda tai nabi, bule
ramatonem бага samba ramareddet ka
tubut Taikamanua

²⁷ Sarat nia lé Taikamanua. Samba
simasiku paatuat lé nia. Bulé tuabeuaké
oninia, teret buru-burú, ka onin Jesus
Kristus! Amen. Sibara ka kai, Paulus,
pagugulet Jesus Kristus

1 Korintus

1 ¹ Ale kam Sasarainamai sapaamian Taikamanua ka Korintus! Aipiliyan kam Taikamanua, ibailiu sapaamiannia, kalulut aibailiu kam bakkat Kristus, samba leú et sia sangamberi sipaniddogi Jesus Kristus Tuhanta, iaté Tuhanmui, elé Tuhanta simakeré. Aku sipuoni si Paulus sambat sarainanta si Sostenes, ruamai bulat kukaroni kai бага, bulé Ukkuita Taikamanua sambat Tuhanta Jesus Kristus masipanukani samba masibujai kam. Amugalai surat néné, iaté aku sipuoni apostel Jesus Kristus, bulat tubut sipauddet Taikamanua siripot ka teú bagania

² (1:1)

³ (1:1)

⁴ Bulat mariu-riu lé kukua surá ka tubut Taikamanua kalulumui, sisilómui anggai bagat Taikamanua siaket Jesus Kristus

⁵ Kalulut babakkatina kam Kristus, bailiu kayo kam ka sangamberinia. Samba bulat makeru puaagaimui pagalaiat

sangamberinia néné, samba nuagai kam masigelaiaké puaagaimui néné

⁶Oto néné te masipatotoilá katuareman pagalaiat Jesus Kristus néné bulat anupaakkuláakéan kam

⁷pat beri sara panukanan simagulai ka kam, pangenan ioi Tuhanta Jesus Kristus, bulé raitsó nia sangamberi sirimanua

⁸Aipoí bulat tubut Kristus lé masijajamin kam teret kalepakat, bulé ké moi nia iailiaké kam, tá anai kuat tubumui ka sikataí

⁹Bulat katonemiet бага te nia Taikamanua. Aipoí nia té néné Taikamanua, amasisogai kam, bulé nupusara kam ka tubut Toganía Tuhanta iaté Jesus Kristus

¹⁰Ale kam Sasarainamai! Ka onin Jesus Kristus Tuhanta, kutiddou ka kam, kau ibara keret bagamui sangamberimui, bulé tá bara karaganan ka talagamui. Kau nupusara kam, elé kau ipusara paatuatmui

¹¹Aipoí ai akuarep sisegéakenenda sikukuddu ka lalep Koloe pauuklemui pasasambamui

¹² Kukukua sené iaté kababaranian ka talagamui sipasikukua kisé, "Aku kaku, si Paulus lé kututut.", tápoi ai leú et sia sabagei sipasikukua, "Aku geti kaku si Apollos lé kututut." Iageti ka sabagei arakua ka sia, "Kristus lé kututut kaku.

¹³ Kaipa te iooi ituparubei tubut Kristus! Aipoí tá amatei si Paulus punu tubumui! Aturaú leú et kam, tá bulé ibailiu kam sipasiului Paulus, ele

¹⁴ Bulat uktuk'an lé sarat si Krispus sambat si Gayus akuraú ka talagamui

¹⁵ Buí rabara kasei pá sipasikukua akuraúan nia bulé ibailiu nia sipasiuluiku

¹⁶ (Ei oo, sangalalepra si Sitepanus leú aku airaú sia ka sia. Tápoi sabagei geti, ké baí tá kukalipogi nia, táan anai sia akuraú.

¹⁷ Aipoí aku néné kaku, tá masiraú sirimanua aikoiniaké aku Kristus, tápoi masipakakra Katuareman Simaerú sibara ka Taikamanua lé. Kapasigagalaiakéku nia leú et, tá ka puaagaira manibo sirimanua, bulé buí imasibbu geget kamateiat Kristus ka siliktenga

¹⁸ Aipoí ka sia sieei ka kamateiat, katuareman pagalaiat katusiliktengaat Kristus néné, sitá pagalajat lé. Tápoi

ka sita geti sipaarau Taikamanua,
katuareman katusiliktengaat nenda, kelé
sara enungan Taikamanua, masipatoilá
gegenia lé

¹⁹ Beri ka Buko Sipunenan leú, ai
atusurat'aké kisé, "Kupakakataí te
puaagai paatuatda sirimanua, samba
sipinaatudda simaagai paatuat leú,
kutatatáaké.

²⁰ Oto apangan lé katukaunanda
simasiku paatuat? Apangan lé
katukaunanda simabuak sikola?
Apangan lé katukaunanda simaagai
paatuat ka polak néné? Aipoi aipatoiláan
Taikamanua, pusisikut paatuat polak
néné siboboi lé

²¹ Kenanen poí kipa pá, kopet
pusisikut paatuatda sirimanua, bulat
tá lé raaagai Taikamanua, siripot ka
puaagaira saradda, lepá. Tapoi kalulut
sikut paatuatnia Taikamanua, bailiu
teúakénangan ipaarau sia simatonem
baga, kalulut katuareman sipinaarepmi,
kuanenda taikapolak sitá pagalajat

²² Ka sia tai Jahudi bulat rabebesiaké
ibara kiseiet, masipatoilá pububulatniana
Katuareman Simaerú néné, tápoi ka
sia geti tai Junani kapusisikut paatuat

polak néné lé, rapapakei masigaba katukolobatnia

²³ Ka sita geti néné, sarat masipakakra pagalaiat Kristus simamatei ka siliktenga lé. Oto katuareman siliktenga néné te aimabelé bagadda tai Jahudi, samba ka sia sipuoni taú tai Jahudi, arakua, Katuareman Simaerú néné, sitá pagalajat lé, samba taiagai paatuat lé

²⁴ Tápoi ka sia geti sinogai Taikamanua, iaté sia tai Jahudi elé taú sipuoni tai Jahudi, Katuareman Simaerú néné, iaté, sara enungan Taikamanua, masipatoilá gege sambat pusisikut paatuatnia

²⁵ Aipoí oniakenen taituagai paatuat ka Taikamanua peilé bulat masiku paatuat, ka pusikuat paatuatda sirimanua. Elé apa oniakenen simasaggo ka Taikamanua peilé, maron ka puroronda sirimanua

²⁶ Ale kam Sasarainamai! Repdem peite kam galai tubumui siburú, ka tetret aisogai kam Taikamanua. Sedda bulat goisó lé kam simasiku paatuat. Tá maigi kam sauté. Siabeu tiboí tubu siripot sipasesese ka sirimanua leú et, tápei maigi kam

²⁷ Aipoí aibagai lé Taikamanua ipiliy sia oniakenen taikapolak sitaagai paatuat,

bulé ipakaila sia simaagai paatuat.
Samba aipiliy leú et sia Taikamanua
oniakenen taikapolak sitaiooi tubu, bulé
ipakaila sia simagege

²⁸ Samba aipiliy leú et sia oniakenenda
taikapolak simarepé tiboí tubu,
taiaaddeakenen ka polak néné, samba
leú et sia sitákatukaunan, bulé isubuaké
sia oniakenenda taikapolak siabeu tiboí
tubu

²⁹ Oto bulat táan anai sia simaró
baga masiabeuaké tubuna ka matat
Taikamanua

³⁰ Aipoí bulat tubut Taikamanua
lé amasikau kam musara ka tubut
Jesus Kristus. Kalulut Kristus, bailiu
masukungan paatuatta. Aipoí kalulut
Kristus leú et, paerúnangan mitsá
patabbaratta Taikamanua ka tubunia,
iageti bailiunakéngan sita sapaamiannia
sikokoiaakenen, samba belaakénangan
leú et sita

³¹ Iaté lulunia kelé ka sitususurat ka
bagat Buko Sipunenan sipasikukua
kisé, "Ké ai sia situtu baga masiumun
tubu, buítá sigalaiakenen Tuhan lé,
rauumun'aké."

2¹ Ale kam Sasarainamai! Ka tetret akubalou kam siburú, akuoi masipaarep ka tubumui sipinaatut Taikamanua, sitaiaagaietda peilé taikapolak, tá siripot pusisikut paatuatda taikapolak kupapakei ele paalakat бага kupanibo néné

² Aipoí bulat akuron'akéan kapaatuatku, bulat burúku ka talagamui, tá anai bagei kuanenku ka matamui, sarat pagalaiat tubut Jesus Kristus lé lepá; iaté siorak ka pagalaiat kamamatei nia ka loiná siliktenga

³ Ai aku mukukuddu ka talagamui, bulat simasaggo tubu lé aku, samba geret lé tubukku, lotóku

⁴ Ialeú et Katuareman Simaerú sinegéakenenku ka tubumui, tá akusegéaké nia ka tubumui, ka tiboiet paalakat бага, siripot ka pusisikut paatuatda sirimanua. Masipatoilá kababarania geget Ketsat Sipunenan lé, akusegéaké ka tubumui

⁵ Akugalaiaké nia geti kelé néné ka tubumui, iaté bulé tá ka siripokat pusisikut paatuatda sirimanua, ipubobongen tonem bagamui, tápoi ka geget Taikamanua lé

⁶Tápoi kenanen kisé, ai leú te kutitiboi pagalaiat pusisikut paatuat ka tubudda simatuá putotonem бага. Tápoi tá te pusisikut paatuatda taikapolak, elé pusisikut paatuatda sauté kineneiget, iaté gege sitatatá ka gogoi sibabara

⁷Pusisikut paatuat kuanenku geti néné, iaté pusisikut paatuat sibara ka Taikamanua. Tá raagai taikapolak pusisikut paatuat néné, tápoi aitarek'akéan Taikamanua sibailiu puuktunganta, einangan tápei babara polak néné

⁸Bulat beri te sia sara, sauté kineneiget, siagai pagalaiat pusisikut paatuat kelé néné. Aipoí ké araagaian baí pusisikut paatuat néné, bailiu tá rapapattáaké Tuhan sipulubeunan néné, ka loiná siliktenga

⁹Pagalaiat néné geti, ai atusurat'aké ka Buko Sipunenan sipasikukua kisé, "Aponia sitaiitsoket elé sitaiaaremen, samba sitaipaatueta peilé sirimanua, iaté nenda itatarek'aké Taikamanua kaunennia ka tubudda simanuntu бага ka tubunia.

¹⁰Tápoi aipatoilláan Taikamanua ka tubutta, ka sigalaiakenen Ketsatnia.

Aipoí ka sia Ketsat Sipunenan, momoi isinogi sangamberinia, pat beri ka sipinaatut Taikamanua bulat simalipput leú et, momoi

¹¹ Aipoí ketsatda lé sirimanua siagai pupaaturananda, elé? Oto kisedda leú te ka sia Taikamanua, sarat Ketsat Sipunenan lé siagai pupaaturan Taikamanua

¹² Tá ketsat polak néné aipanguruat'aké Taikamanua ka tubutta, tápoi Ketsat sibara ka Taikamanua lé, bulé taagai kam sangamberinia, sipanguruat'akenen Taikamanua ka tubutta

¹³ Iaté lulunia, ké kukolouaké kai pagalaiat tubut Taikamanua, ka tubudda sisop-sop Ketsat Sipunenan, tá siripot pusisikut paatuatda sirimanua kusegéaké kai nia ka matadda, tápoi siripot singantruakenen Ketsat Sipunenan lé

¹⁴ Oto ké tá isop-sop sia Ketsat Sipunenan, tá leú te momoi rasisiló sipinatoilat Ketsat ka tubudda. Aipoí ka sia kelé néné, raoniaké lé nia, kelé sara putaiagaiat paatuat. Tá isasak-sak ka bagadda, aipoí sarat puketsanan lé momoi masininilai kelé néné

¹⁵ Sia sisop-sop katubu Ketsat Sipunenan, momoi ranilai sangamberinia, tápoi beri sia sara momoi masinilai nia ka sia

¹⁶ Beri ka Buko Sipunenan leú, ai atusurat'aké kisé, "Kasonia momoi masikeruji pupaaturan Tuhan? Samba kasonia momoi masipangantru nia?" Sita néné te, sibara pupaaturan simakeré ka Kristus!

3 ¹ Bulat siripokatnia, táan maninibo aku ka tubumui, kelé ka tubudda sisop-sop katubu Ketsat Sipunenan. Tápoi kelé manibo ka tubudda sipupaparaboat siripot obaket polak'an lé kupanibo ka tubumui; élé kelé tatoga simagulai putotonem бага ka tubut Kristus

² Siburú kelé komenda tatoga sigoisó lé kuaaké kanmui; tá kelé kanda sikebbukat; aipoí magulai peilé ronmui masisiló. Tápoi kineneiget leú tápei maron kam masisiló

³ kalulut ai peilé kam mupaparaboat siripot arat tubudda taikapolak néné. Aipoí ké ai peilé kam musisí-sí бага samba palalabá pasasambamui, tá pá nenda masipatotoilá kababaranian peilé

ka tubumui arat tubudda taikapolak,
kelé arat tubudda sitaiagai Taikamanua

⁴Aipoí ké ai peilé kam sipasikukua,
"Aku kaku si Paulus lé kututut," samba
ka sia sabagei rakua, "Aku kaku geti
si Apollos lé kututut," tá pá nenda
masipatotoilá paparaboat'akémui nia
peilé puparaboananda taikapolak néné

⁵Kasonia poi nukukua kam nia ka sia si
Apollos néné? Elé kasonia poi nukukua
kam nia ka sia si Paulus néné? Kai ruamai
néné sigalaiaké galajet Taikamanua lé
kai, sipalulu kam, imatonem bagamui
ka tubut Kristus. Masienung'aké galajet
siaket Tuhan ka tubumui sene-senemui
lé, kugagalaiaké kai

⁶Aku masiurep, si Apollos masisubui
bakkatnia, tápoi Taikamanua lé
masitutú-túaké

⁷Oto bulat addeakenen geti iaté
Taikamanua, aipoí nia lé masitutú-túaké
siureman. Ka sia geti sipasiuurep sambat
sipasisusubui bakkatnia, tá tupuukú sia
ka sia

⁸Aipoi sikeré lé tiboí tubudda. Senenda
masisiló upadda siripot momon tubudda

⁹Kai néné ruamai, makeré kupugalai
kai galajet Taikamanua, iageti kam ka

kam néné, iaté monen Taikamanua. Kam leú et ka kam, kelé uman Taikamanua lé kam

¹⁰Oto siripot puaagaiku kabei, kalulut puaagai siaket Taikamanua kaku, akugalak'akéan bongan puriokat lalep, oto lepá oi sia sabagei masirióaké lalep ka uddutnia. Oto senen sirimanua buítá ralelek'aké kipa rapaeerú rapasibangun ka uddut bongan nenda

¹¹Aipoí bulat tubut sarat nia lé Jesus Kristus néné aipauddet Taikamanua bailiu bongan lalep; tá anai bongan bagei

¹²Ai sia sipasiririóaké ka uddut bongan néné, iaté emas, ai sia sipakei perak, ai leú et sia sipasipapakei bukkú simakirisau, ai sipakei loiná, élé puo simagarak sambat singitinan gandum

¹³Teret ioi peité Kristus sikaruania, imatotoilá sigalaiakenenda sangamberit sirimanua. Api lé poí masipatotoilá sigalaiakenenda sangamberi sirimanua. Api lé masisisibo élé masiteteúaké mutunia sigalaiakenenda néné

¹⁴Ké tá malabok ka api, lalep sirióakenenda ka uddut bongan néné, iapeité silórganan hadiadda

¹⁵ Tápoi ké malabó lé sigalaira néné marugiddangan leú et, taan tedda malalabó nia, tápoi kéan lé silalau ka apingan lé sia néné

¹⁶ Ai leú nuaagai kam ale Sasaraina, tubumui néné iaté Uman Taikamanua? Samba kukuddu nia Ketsat Sipunenan ka tubumui

¹⁷ Oto ké ai sia sipakataí Uman Taikamanua néné, pakataínangan leú te sia ka sia Taikamanua. Aipoí sarat Taikamanua lé muuma ka Uman Taikamanua. Oto kam te néné Uman Taikamanua

¹⁸ Buí ibara ka talagamui néné sipataju tubuna. Ké ai sia katalagamui sikua tubuna simasiku paatuat siripot kirekat pusiikut paatuat polak néné, buíta ibailiuaké tubunia sitaiagai paatuat; bulé ipusiku paatuat sipulelelek

¹⁹ Aipoí apa oniakenen simasiku paatuat ka polak néné, sitaiagai paatuat lé ituooniaké nia, ka matat Taikamanua. Ka Buko Sipunenan ai atusurat'aké kisé, "Puaagai patuatda sirimanua lé, ipapakei Taikamanua, iukum'aké sia.

²⁰ Aikua leú bagei ka Buko Sipunenan kisé, "Ai lé iaagai Taikamanua,

pusisiboboinia pusisikut paatuatda sirimanua.

²¹ Oto buían rabara siobá masiabeuaké sirimanua, aipoí sangamberinia aiakéan Taikamanua ka kam

²² Elé si Paulus, elé si Apollos, elé si Petrus, elé polak néné, elé purimanuaiat samba kamateiat, kineneiget elé gogoi sialu, sangamberinia néné kam sibakkatnia

²³ Kam ka kam néné leú, Kristus lé sibakkat kam. Iageti ka sia Kristus, Taikamanua lé sibakkat nia.

4¹ Oniaké lé kam kai, pagugulet Kristus, sipugagalai masisegéaké sipinaatut Taikamanua, sitaiaagaietda peilé taikapolak

² Bulat siboikí besiákenen galaiakenenda sapagugulet, iaté mutopit ka tubut tuanda

³ Kaku geti, tá leú makopé kupaatu nia, apa sinaatumui elé kipa nukukua kam pagalaiat tubukku néné. Beringan koí sinaatukku kaku pagalaiat tubukku leú, tá leú makopé kupaatu nia

⁴ Beri pei kuagai apa pá selekku, tápoi tápei momoi tukua tá anai selekku. Tuhan lé siagai nia, masele pá aku, elé tá

⁵Oto ké tápei aiaili tetrenia, buí maruei nususui kam matatda sirimanua, masikua masele nia elé tá. Ngena kam teret oi Tuhan. Nia lé masipatotoilá sangamberi keleat sipinalipput ka simagep-gep. Nia lé masibubukkai sangamberi sipinaatut sirimanua ka bagat paatuatda. Sedda peité rasiló katumun sibara ka Taikamanua siripot simateú siloketda

⁶Ale kam Sasarainamai! Kalulumui, bailiu akuorak'akéan kai tiboiet néné, ka tubumai ruamai si Apollos, samba ka tubukku kaku. Katukolobatnia, iaté, bulé ka uluiet sigalaimai néné, momoian nugelai kam apa katukolobat nga-nga sipasikukua kisé, "Buí nusabauaké kam masiaddeaké sara sairimanua pat saliunangan ka sitususurat pagalaiat tubunia." Oto bailiu táan anai sia ka talagamui siabeuaké sara sirimanua, lepá paloloinangan sabagei

⁷Kasei poi aikua ka matam ekeu peilé abeu tiboitubu ka sabagei? Tá poi ka Taikamanua lé ai bara sangamberinia néné kekeu. Angoi nuumun'aké tubum pat kéan lé tá panguruat Taikamanua sangamberinia sibabara ka tubum néné

⁸ Kirénangan tedda táan anai kaunu nia apa pá. Aipoí amakayongan kam! Aibailiuan kam rimata! Tápoi kai geti ka kai tá. Bulat pasesesengan lé, ké aibailiuan kam rimata, bulé ioi tapuuté kam sambatta

⁹ Aipoí siripot sipinaatumai ka kai, kai néné aibailiukéan kai Taikamanua ibbungenda taikapolak, elé ibbungenda samalaika. Kai néné bulat kéan lé sirimanua sikataí paraboat, ukumen simateiakenen, ka matat siberikabaga, samba gegeietda taikapolak

¹⁰ Aibailiuan kai kakai néné sitaiagai paatuat, kalulut Kristus; tápoi kam geti kakam tai Kariten nuagai kam paatuat! Kai masaggo, kam maron! Kai rapaloloi; tápoi kam geti kakam raabeuaké onimui

¹¹ Pat aili kineneiget sarat mulaje, elé muoggou lé kai, bibilet tubumai, sarat ka tubumaian lé amulegei, lepá. Sarat paoreiet sirimanua lé kai; kudduatmai leú tá anai simakolou

¹² Sarat masimomoaké tubu lé kai masigaba purimanuaiatmai. Tápoi kai geti ka kai, ké rapatelei kai kupanunukani lé kai sia; ké rapaorei kai om'akémaian nia

¹³ Ké rapakataí nga-nga ka tubumai, tiboiet simaerú lé kukakau kai masialegi nga-nganda. Bulat kelé porá lé kai néné ka matanda taikapolak; pat aili kineneiget bulat kelé lotit polak lé kai rakukuania

¹⁴ Tá masipakaila kam kugagalai suratku néné, tápoi nganturatku lé, kelé kupangantru bakkat tatogakku

¹⁵ Kupaatu ka puoonimui tai Kariten, elé aian sangaribu sia igidda tai gurumui; tápoi tá anai beri sia sara oniakenen ukkui. Aipoi sarakku lé amasipakakra Katuareman Simaerú, iaté pagalaiat Kristus, ka tubumui

¹⁶ Oto bulat paniddogatku ka tubumui, bulé nuului kam aku

¹⁷ Iaté lulunia akukoiniaké si Timoteus ka kam. Ka puooni nia sipasiului Kristus, oniakékungan nia kelé bakkat togakkungan lé nia, kilibet bagakku. Sara toga bulat katonemiet bagakku. Ai leú ipaagai nia ka kam, kipa galai puparabooan kelé sigalaiakenenku kaku ka tetret akukatonemi Kristus, iaté kelé puparabooan, singantruakenenku ka senen paamian kaipa-kaipa rakuddu

¹⁸ Aian sia piga pá ka talagamui siumun tubuna, ka bagadda poí, táan momoi aku kubalou kam

¹⁹ Oto momoi aku kubalou kam; ké iteúaké baí nia si Tuhan, táan mauju kuoi. Sedda peité kuitsó kipa ragagalai ka sia siumun tubuna néné; buí sarat masikua lé raagai

²⁰ Ka wibawadda sirimanua lé, imatotoilá, uutéakéna puririmanuanda Taikamanua, tá ka titiboatda

²¹ Oto kam'an lé masipipiliy, kipa siobámui, elé ka nga-nga simalippat lé kuoi masipangantru kam, elé ka leppet бага, elé ka nuntut бага?

5¹ Akuarep pangasegekat kababara nia ka talagamui sigalaiaké pusilaingeat simasaliu kataí. Iaté, ai sia ka talagamui sipuoolop tubu ka ina sialinia. Ale, beringan sia sipuarat sabulungan, tá araperú kelé néné

² Tápoi kenanen kisé, ai peilé nububuak'aké kam tubumui. Siripokatnia murereu-reu lé kam бага, iageti belaakémuian sia ka talagamui sigalaiaké kelé néné

³ Siripot ka putubuat, areu aku ka tubumui; tápoi siripot ka pupaaturan

geti, ai lé aku ka talagamui galainia. Oto kukua kuanenku ka matamui néné, bulat kelé galainia, ai lé aku ka talagamui, "Ka Onin Tuhan Jesus Kristus, kukua ka matamui, bulé nuukum'aké kam sia sipupaparaboat simakopé kataí lolit néné!" Ké parurú kam, kau nuoniaké kam nia ai lé aku ka talagamui, oto bulé ka geget Tuhanta Jesus

⁴ (5:3)

⁵ nusegéaké kam sia néné ka kabei Sanitu, bulé imasubu tubudda néné, oto bailiu ipaarau ketsatnia si Tuhan, ka kaoijanannia mitsá ka polak néné

⁶ Oto tá mateú nuumun'aké kam tubumui. Kupaatu anuagaian kam tiboiet néné sipasikukua kisé, "Ragi, goisó nenda, aipagó sangamberinia roti sipinagalú!

⁷ Oto ribbaiaké kam ragi siburú, iaté ragit jo, bulé ibailiu kam roti sipinagalú sibau, simaliná ka ragit jo siburú, ai lé poí kuaagai pukekelé kiseddana kam néné. Sarapei Punen Paskatta aian malelegre. Kristus sibailiu buluakenenta atubuluakéan

⁸ Oto tapunen'aké kam nia punenta néné, tapakei kam roti sitá anai ragi,

iaté roti kelé sara patuaggaiat pulinakat
elé toggaiat sangamberi obaket bagat
Taikamanua. Buí tapunen'aké kam Paska
néné, tápoi tapapakei sibara ragi siburú
peilé, iaté ragit jo, elé pukakataí

⁹ Ka suratku siboikí, aku taggeian kukua
nia ka matamui, bulé buí nupaaleiaké
kam sia sirimanua siobá musilainge

¹⁰ Kukukua néné, tá sia oniakenen
sipusisilainge, elé sia simaalau бага,
elé sia sipaboboko, elé sia sibuluji
sabulungan sitaiagai peilé Taikamanua.
Tá sia kukua. Aipoí ké nureunan'aké kam
tubumui ka tubudda, oto kau leú bulat
nubelaaké kam tubumui ka polak néné

¹¹ Bulat kukukua geti sené, iaté, bulé
buí nupaaleiké kam sia sikua tubuna
Kariten, tápoi sipusisilainge, elé simaalau
бага, elé sipasibubuluji sabulungan lé
nia. Elé siobá masipakataí nga-nga lé
igagalai, elé sarat mupuineng lé igagalai
kalulut masiló ló simapuinengen, elé
mitsá sipananangkou lé nia. Bulat beri
nupataddé kam mukom ka tubudda tá
momoi

¹² Tá galajetku masiadili saalei
sitaipuarat Kariten, peilé. Aipoí
Taikamanua lé masiaadili sia ka sia.

Tápoi ka sia geti sapaamianmui, tá poi kam leú et masiaadili sia? Beri ka Buko Sipunenan leú, ai atusurat'aké, sipasikukua kisé, "Usiaké kam sia sikataí paraboat ka talagamui.

¹³ (5:13)

6¹ Ai peilé koí sia ka talagamui simaró бага mei masinganduaké saaleinia sikeré tonem бага ka tubut hakim sitaimatonem бага ka tubut Taikamanua, ké bara pajoggolatda? Tá koí aitiddou ka tubudda sapaamian ralepaaké pakarodda

² Tápei poi nuagai kam aadilidda taikapolak sapaamian Taikamanua néné? Oto ké sibulatnia kam masiaadili sia taikapolak néné, táan pa momoi nulepaaké kam pakarot pengadilan sitálulu néné

³ Kipa tápei nuagai kam aadilitta sia tai malaika? Oto sarapeite pakaro ka purimanuaiat senen gogoi

⁴ Ké bara baí kelé néné, taleú ka tubudda sitá anai galajet ka paamian lé nusesegéaké kam nia

⁵ Bulat maila sita galai tubumui néné! Kirénangan poí ai sia ka

talagamui simasiku paatuat, masipagaba pajoggolatumui pasasambamui tai Kariten

⁶Tápoi néné geti, tá. Amei lé kam sara ka talagamui nunganduaké kam sarainamui pasasambamui tai Kariten ka tubudda tá sipuoni tai Kariten

⁷Bulat bá eei kam masipatiboji pakaromui ka tubudda sitaipuaarat tai Kariten. Aipoí beringan pajoggolat peilé ka talagamui, atuoniakéan nia sara kakalaatmui. Oto kam peilé maerú ipajo, elé irugiaké

⁸Tápoi néné geti, kam lé amasipajo sabagei. Elé kam leú et amasirugiaké sabagei. Anugalaiaké kam kelé néné leú, ka tubudda sasarainamui sikeré tonem бага

⁹Kipa nuagai leú kam taibabailiuna sia sapaamian Taikamanua, sitaimareddet ka siripokat siobat bagat Taikamanua? Buí rapajo kam. Aipoí sia sipusisilainge, sipasibubuluji sabulungan, elé sipaeet, sipusisilainge ka pasasambadda taimanteu elé pasasambadda tainanalep

¹⁰sipananangkou, simaalau бага, sipupupuineng, siobá masipakataí nga-nga, sipasiraurau. Sangamberi

sirimanua sipasigagalaiaké kelé néné, tá ibabailiu sia sikauman Taikamanua

¹¹ Ai piga pá kam ka talagamui néné siburú sipasigagalaiaké kelé néné. Tápoi kineneiget geti amakolouan, kalilinámui ka jomui. Aibailiuan kam bakkat Taikamanua sikokoiaenen. Aipaerúan kam mitsá ka tubut Taikamanua, kalulut tonen bagamui ka tubut Tuhan Jesus Kristus, samba kalulut geget Ketsat Sipunenan sibara ka Taikamanuanta

¹² Ai sia sipasikukua kisé, "Sangamberidda sirimanua momoi ragalaiaké apa pá." Tápoi kaku geti, tá sangamberinia sibailiu puuktungan. Kenanen baí momoi kugalai sangamberi apa pá. Iageti kenanen moi kagalai apa pá, tápoi tá kuobáaké igalai siobánia ka tubukku apa pá

¹³ Ai leú sia sikua kisé, balugú lé ipuuktungi kan; ia leú et ka sia balugú aitubaraaké bulé ibara kudduat kan. Tápoi itatataáké lé karuania néné Taikamanua. Tá momoi tupakei tubut sirimanua néné ka pusilaingeat; tápoi buítá masipuukú galajet Tuhan lé katupakeiat nia. Tubu néné, ipuuukú nia si Tuhan

¹⁴ Ai suruakéan mitsá Tuhan Jesus ka kamateiat, oto kisedda leú te sita ka sita, isusuruaké leú te sita ka sita Taikamanua kalulut gegenia

¹⁵ Ai lé nuagai kam, pulaladdou Kristusna tubumui néné. Oto momoi leú pá kualá sangaladdou tubut Kristus néné kubailiuaké nia laddou tubut sara sinanalep sipuolop tubu? Bulat tá momoi

¹⁶ Elé tápei nuagai kam, sia sipuoolop tubu ka tubut tainanalep simaolop tubu aibailiuan sia sisara akkulá karuadda sinanalep si maolop tubu néné! Aipoi ka Buko Sipunenan, ai atusurat'aké kisé, "Bailiu sisangaakkuláan lé sia ruadda.

¹⁷ Tápoi sia geti sitabbraaké tubuna ka tubut Tuhan, musasara leú te Ketsat Tuhan samba ketsatda

¹⁸ Areuaké kam tubumui ka galajet pusilaingeat. Aipoi sangamberi jo pabage-bagei sigalaiakenenda sirimanua, tá isasappó ka tubudda. Tápoi sigalaiaké pusilaingeat geti, ka tubunia lé galainia aigalai jo

¹⁹ Buítá nuagai kam nia, tubumui néné, iaté Uman Ketsat Sipunenan lé. Oto ai nia ka tubumui ikukuddu Ketsat Sipunenan néné. Bulat tubut Taikamanua

lé amasipanguruat'aké Ketsat Sipunenan
néné ka tubumui. Oto bailiu tubumui
néné tá kam sibakkatnia, Taikamanua lé

²⁰ Ai sakingan kam Taikamanua.

Sakimui leú atuléléan aikau nia. Oto
pakei kam tubumui néné ka siripokatnia,
bulé itulatsat'aké Taikamanua.

7 ¹ Oto kineneiget kutiboi ka matamui
pagalaiat sikuamui ka bagat
suratmui. Ké ai sara taimanteu
sitaiputatalimou, nenda maerú

² Tápoi bulé tá itubbui бага nia
masigalaiaké sitaipasesese, simaerúnia
sangamberi taimanteu musinanalep
sarat ka sinanalepnia sarania, élé
sangamberi tainanalep musimanteu
sarat ka simanteunia sarania

³ Buítá igalaiaké siripot galaiakenen
simanteu, ka sia simanteu néné, ka tubut
sinanalepnia, siripot pusisinanalepna nia
sinanalep néné; ialeú et ka sia sinanalep,
buítá igalaiaké leú et siripot galaiakenen
sinanalep, ka tubut simanteunia;
siripot pusisimanteuna nia simanteu
néné. Senenda masigalaiaké siripot
galaiakenenda ka pasasambadda

⁴ Tá sia tubudda tainanalep ikukup-
kup'aké tubudda, tápoi taimanteura lé

ikukupkup'aké sia. Kisedda leú et ka sia taimanteu, tá tubudda ikukupkup'aké tubudda, tápoi tainanalepra lé ikukupkup'aké sia

⁵Buí nupareunan kam siripot pusisikalalep. Momoi leú pareunan goisó, tápoi ka keret bagadda ruadda. Bailiu momoian rapaniddou senen-senenda, táan anai sigeu-geu sia. Tápoi lepá geti mitsá, pataddérangan mitsá, siripot pusisikalalep. Aipoí ké tá kisedda nugalai kam, babara nututut'aké kam panánakat sanitu, kalulut taioinia nupaom kam bagamui

⁶Tápoi néné, tá masiparentaaké kam; nganturatku lé

⁷Siripot siobat bagakku lé baí nia, bulé aku rauului sangamberi sirimanua. Tápoi senen sirimanua arasilóan panguruat simakokoi sibara ka tubut Taikamanua. Ai sabagei sipasisisiló panguruat kelé néné, tápoi ai leú et sia sipasisisiló panguruat kelé nenda

⁸Iageti néné lé nganturatku ka tubudda sitaiputatalimou peilé, elé ka tubudda tailumang; bulat maerú peilé tá mutalimou sia kelé kaku

⁹Tápoi ké geti tá nuoom kam, maerú peilé nuputalimou kam. Aipoí maerú peilé nuputalimou kam, babara isusuggru kam pubobot-bot akkulá

¹⁰Iageti ka sia siputatalimou, néné lé kuanenku ka matadda: (Siripokatnia tá aku amasiaké tiboiet néné, Tuhan lé). Sia tainanalep siputatalimou, buían rakaddiuaké taimanteura

¹¹Tápoi ké geti amutui-tuian nia ka simanteunia, oto maerú peilé tá musimanteunia, elé toili nia mitsá ka tubut simanteunia. Oto taimanteu, buí ragalak sia tainanalepra

¹²Nganturatku geti ka tubudda sabagei, néné lé: tápoi néné nganturatku lé, tá sibara kai Tuhan. Ké mutalimou sia sara tai Kariten ka tubudda sitaimatonem бага ka tubut Kristus, tápoi sinanalep néné iobá rapulalep ruadda, buí igalak sinanalepnia néné

¹³Ialeú et ké ai sara sinanalep siputatalimou ka tubut sara simanteu, sitaimatonem бага peilé ka tubut Kristus, buí igalak simanteunia sinanalep néné

¹⁴Aipoí kalulut putatalimounia simanteu sitaimatonem бага néné, ka tubut sara

sinanalep bakkat Taikamanua, bailiu mateúnangan simanteu néné ibailiu nia paamian Taikamanua. Ialeú et kalulut putatalimounia sinanalep, sitaimatonem бага нéné ka tubut sara simanteu bakkat Taikamanua, bailiu teú nia sinanalep néné ka matat Taikamanua. Aipoí ké tá kisedda rapaerú, bailiu tatoga néné tuoniaké kelé tatogadda sipuarat sabulungan; aituoniakéan nia toga néné paamian Taikamanua

¹⁵Tápoi ké ikaddiuaké sinanalepnia elé simanteunia tai Kariten, sitaimatonem бага нéné, bá kekera kam nia itui-tui. Aipoí abelangan kam ka pupasikelanan. Ai lé poí ikikiddiy Taikamanua, nupurimanua ka aban бага

¹⁶Kelé kam sipuoni tainanalep, simatonem бага kai Tuhan, kaipa bulat anuagai kam nia simakolou, taiooinia nurop'aké kam sia taimanteumui? Kisedda leú et kam ka kam taimanteu sipuoni tai Kristen, kaipa bulat anuagai kam nia simakolou, taiooi nia nurop'aké kam sia tainanalepmui

¹⁷Buíta nupasikeli kam puparaboananmui sene-senemui, sipaakkup ka pinalulut Tuhan, kelé

siteúakenen Taikamanua ka tubunia, ka tetret aisogai nia si Tuhan, masikatonemi nia бага. Iaté nenda peraturan sigelaiakenenku ka senen paamian

¹⁸ Pasikatnia, ké atusunat'an nia ka tetret aisogai nia Taikamanua, buían ibesíaké itataáké toggaiat sunat ka tubunia. Kisedda leú et ka sia sitaipususnat peilé, ka tetret aisogai nia Taikamanua, buían itiddou musunat

¹⁹ Aipoí tugalaiaké pá pususunat, elé tá tugalaiaké, karuania, tá anai pagalaiatnia. Bulat besíakenen geti, masireddet surukat Taikamanua lé

²⁰ Bulé kiseddangan té nia puririmanuanda, kelé ka tetret aisogai sia Taikamanua

²¹ Ké ai ekeu mupapagugulet aisogai ekeu, buían igejai bagam masipaatu. Tápoi ké ai geti erut uktuknu raujaaké ekeu ka pupapagugulenán, iapeité nualá tubum, nubesíaké nia nupuuja

²² Aipoí sia sapagugulet simatonem бага kai Tuhan, aibailiuan bakkat Tuhan, sipuuja. Oto sia leú et sipuuja simatonem бага ka tubut Tuhan, aibailiuan sia pagugulet Kristus

²³ Aisakingan kam Kristus. Sakinia leú, atuléléan aibaya nia. Oto buían nuobáaké kam tubumui, ibailiu kam pagugulet sirimanua

²⁴ Iaté né, ale kam Sasaraina; kelé kipa pá nenda galai puririmanuamui ka tetret aisogai kam Taikamanua, kiseddangan té nuririu-riuaké kam enung puririmanuamui ka matat Taikamanua

²⁵ Kineneiget siangan lé sitaiputatalimou peilé kunga-ngantru. Oto pagalaiat sia néné geti, tá anai akusiló parenta sibara kai Tuhan, ibara ngantruakenenku ka tubumui. Tápoi kelé sara katonemiet poí aku néné, kalulut panguruat Tuhan, bailiu obákungan kungantru kam

²⁶ Masiitsó iginia sibabara pugejaat бага sibailiu kalotóakenen kineneiget, kupaatu maerú peilé kiséan té sia boikí kelé puririmanuanda kineneiget

²⁷ Tápoi ké aian geti sinanalepnia, buían nuoppu kam pasara ka tubut sinanalepmui néné. Tápoi ké geti tápei amutalimou kam, buían nugaba kam sinanalepmui

²⁸ Ké geti amutalimouan nia, tá tuooniaké nia jo. Kisedda leú et ka sia

taioökkó, ké mutalimou nia, tá tuooniaké nia sijo. Sarat ka sia siputata limou, maigi raorik pugejaat бага. Oto siobáku bulé nutukatsli kam ka pugejaat бага нéné

²⁹ Kukukua geti ka tubumi ale sasaraina, kisé: Goisóan lé oggakta. Oto barania kineneiget, sia sibara sinanalep, kau igalai kéan lé sitá sinanalep

³⁰ Ialeú et sia sipusosou, kau igalai kéan lé sitaipurereu-reu бага. Sia sipugagá-gá, kau igalai kéan lé sitaimaangká бага. Sia sipasisasaki bibiletda, kau ragalai kéan lé sitá anai apa pá

³¹ Samba leú et sia situturi galajet pupolongan, kau ragalai kelé sitaimageja бага, kalulut pupolongan нéné. Aipoí táan mauju ka sia polak нéné, kelé siitsóta galai tubunia kineneiget, itukaplu

³² Bulat aikubebesíaké nutukatsli kam ka pugejaat бага нéné. Sia sitá sinanalep, momoian ramuinéaké pupaatuananda, ka siorak pu-Tuhanan, obára imaangká bagat Tuhan ka tubudda

³³ Tápoi ka sia geti sibara sinanalep, apabulá rapaatu pagalaiat pupolongan

néné, ibesíaké imangká bagat
sinanalepnia

³⁴ Kalulut néné parubeinangan
pupaatuanannia. Sia geti tainanalep sitá
simanteu, elé sara siokkó, maigi ipaatu
siorak ka pu-Tuhanan, aipoí ibesíaké
bulé ibakkati nia Taikamanua tubu
sambat ketsatda néné. Tápoi sinanalep
sibara simanteu geti, masimuinéaké
paatuat siorak ka pupolongan lé igagalai,
ibesíaké imangká bagat simanteunia

³⁵ Sibailiu katuerukatmui lé, akugalai
sangamberinia suratku néné, tá masikua
tá momoi nugalai kam néné, elé tá
momoi nugalai kam nenda. Bulat
kubebesíaké geti, iaté, bulé nugalaiaké
kam simaroipo samba simateú, bulé ioi
numuinéaké kam pupaatuananmui ka
tubut Tuhan

³⁶ Ké iagai tubunia, tá momoi igalaiaké
simateú galaiakenen ka tubut tunangan
nia, elé ké tá moi ikera tubunia
ka puobat tubu, samba leú ipaatu
maerúan italimouaké siokkó néné, kauan
ienung'aké nia sipinaatunia simaerú
néné tá tukukua nia sijo, ké motalimou
baí sia

³⁷ Tápoi ke geti asegeán ipaatu nia, ikua táan mutatalimou nia ka tunangannia, samba sinaatunia néné bulat ka teú bagania, sigalaiakenennia néné maerú, ké maron paatuatnia masigalaiaké

³⁸ Oto kiséan lé takua, kei maerú sigalaiakenenda ka sia siputatalimou, maerú peilé ka sigalaiakenenda sitaiputatalimou

³⁹ Ka sia tainanalep sipukekebbukat, ké ai peilé muririmanua sia taimanteura, riu-riu lé sia tuappra ka simanteura. Tápoi ké geti ailangóan sia, iapeité momoian iputalimou mitsá ka taimanteu siobánia; sarat kau lé putatalimoura, siripot putatalimoura tai Karisten

⁴⁰ Tápoi mauktuk peilé nia, ké táan mutalimou nia mitsá. Tápoi sipinaatukku lé sarakku néné. Tápoi kupaatu geti nia kaku, ai geget Ketsat Sipunenan masipalululu aku kukua kuanenku néné.

8¹ Kineneiget kutitiboi iaté pagalaiat kan sibuluakenen ka sabulungan. Kirénangan tedda aisese kelé sikuadda néné. "Amaagaian sita sangamberitta." Ka sia puaagai masikau sirimanua masiumun tubu lé, tápoi nuntut

baga geti; masibangun puririmanuan sirimanua

² Sikua tubuna migi siagai, tápoi tápei momoi bulat rakeruji nia

³ Tápoi bulat sipununtuki бага Taikamanua geti, iagai sia Taikamanua

⁴ Pagalaiat masikom komen sibuluakenen ka sabulungan, ataagaian, bulungan néné masipatoilá apa páonia tapoi siripokatnia anai. Samba kelé siagaiatta leú, sarat sara lé Taikamanua; tá anai bagei

⁵ Kirénangan maigi oniakenen taikamanua elé tuhan; iaté sikukuddu ka manua, elé ka polak

⁶ Tápoi ka sita geti sarat sara lé Taikamanua. Nia Ukkui, sipasibabaraaké sangamberinia. Uktuknia lé tapuririmanua kam. Tuhan leú sarat sara lé, iaté Jesus Kristus. Ka tubunia lé aibara sangamnerinia néné, samba kalulunia lé atapurimanua kam

⁷ Tápoi kenanen kisé, tá sangamberidda sirimanua iagai nia pagalaiat néné. Ai sia sabagei siburú sipasibubuluji sabulungan lé sia. Oto bailiu, pat aili kineneiget, ai peilé raoniaké nia kan sibuluakenen ka sabulungan néné,

kanda sabulungan. Oto ké rakom kan sibuluakenen ka sabulungan néné, kelé majojo lé sia raoniaké nia. Aipoí tápei maron putotonem bagadda

⁸Siripokatnia ka sia komen, tá situppai erúnia patabbaratta ka tubut Taikamanua. Ké takom kan néné, tá anai apa pá babara uktukta. Tápoi mitsá ké tá takom kan néné, tá leú et marurugi sita

⁹Tápoi bulat pasikeli kam! Buí kalulut ooi nia nugalai kam ka kam apa pá, bara jodda sabagei, aipoí magulai peilé putotonem bagadda ka sia

¹⁰Kukukua geti kisé: Pasikatnia baí, ké talagat pukokomnu ka kudduat pasibuluat, itsónangan ekeu sara simagulai tonem бага ai ekeu mukokom sedda, tápoi ekeu geti kekeu maron tonem bagam, tá pá babara rot bagania ka sia masikom kan sibuluakenen ka sabulungan

¹¹Oto kalulut putotonem bagam néné, bailiu mapepenangan putotonem bagania ka sia simagulai putotonem бага néné. Oto amateian Kristus kalulunia leú et ka sia

¹²Ké nugalai sele kelé néné leú et ka saaleinu tai Karisten, iaté masipakataí

putotonem bagadda simagulai néné,
amajongan te ekeu ka tubut Kristus

¹³Iaté lulunia, ké kalulut komen,
ibabaraaké jodda sasarainanku, maerú
peilé, táan kukokom mitsá akkulá,
lepá. Aipoí buí kalulukku, majonangan
sarainanku.

9¹Tá poi sirimanua sipuuja aku kaku
néné? Tá poi apostel aku kaku néné?
Tápei poi akuitsó nia Jesus, Tuhanta?
Tápoi buat sigalaiakenenku kam néné,
kaunen kai Tuhan

²Kenanen baí tá anai sia siobá
masimuneng'aké puaapostelku, tápoi
simatatánia kam imumuneng'aké nia!
Aipoí ka puririmanuamui siripot pu-
Kakariten te masipatotoilá puaapostelku

³Ké ai sia sisusui matakku, néné lé
alegiatku ka tubudda

⁴Tá pá anai hakku masisiló kan elé ló
kalulut galajetku néné

⁵Tá pá momoi kupaabbít sinanalepku
tai Kariten ka puenungananku, kelé
sigalaiakenenda ka sia sasarainan Tuhan
Jesus, elé kelé siperúra ka sia tai apostel,
elé kelé kai Petrus leú

⁶ Elé sarat kai lé pá ruamai si Barnabas tukukua buítá kumomoaké kai tubumai masigaba purimanuaiatmai

⁷ Bulat tá te anai sia tai tentera, sia saradda lé ibubulagani tubudda mutentera! Elé tá te anai sia sipangu-ngurep anggur sitaipuuktungi buat anggur siuremannia ka monenia! Iageti mitsá, tá te anai sia sipasijajago terimeu, sitailó suat tot-tot jai siuragatda

⁸ Sikuakku néné tá sarat masiloulogi siripot simarei-rei taitso ka purimanuaiatta si senen gogoi, beri leú et ka Buko Sipunenan, ai leú et atusurat'aké pagalaiait néné

⁹ Ka Bukot Mose ai leú et atusurat'aké kisé, "Buí ituratsat ngu-ngun jai, ké ai nia masingingitit ottit gandum." Jaiian lé pá ipasisikeli Taikamanua

¹⁰ Elé nenda lé pá ikukua ka tubutta? Kirénangan tedda uktukta aitusurat'aké néné. Aipoí sia sipasigagalai moné samba sipasigagabui gandum, bulat airakakaroni бага rasiló sangarubeiat buat sigalaiait kabeira

¹¹ Akukarap'akéan kai karamen puketsanan ka purimanuaiatmui. Oto ké kumonei kai panukanan, sipuoni bibilet

ka tubumui, taleú nukukuangan lé kam, makopéan lé iginia kutitiddou kai ka tubumui

¹² Ké beringan sia sabagei ai hakra rakaroni бага нéné ka tubumui, sarapeite kai ka kai kopénia kababarat hakmai, masikaroni бага, belé peilé ka sia? Tápoi tápei akuenung'aké siripot hakku. Siobáku geti kaku, aku lé masitataroi tubukku, sarat builé kubaraaké sisaila galajet masipararat Katuareman Simaerú pagalaiat tubut Kristus

¹³ Kelé siagaimui, sibara ka Uman Taikamanua lé ibabara kanda sipugagalai ka Uman Taikamanua. Beri leú et ka sia sipugagalai ka kudduat pasibuluat, rasisiló sangarubeiat sibara ka buluakenen sibuluakenenda sedda

¹⁴ Oto kisedda leú te ka sia kai Tuhan aiteúakéan, buítá ka pugagalaira masipakakra Katuareman Simaerú leú et rasisiló purimanuaiatda

¹⁵ Tápoi beri pei sara akuenung'aké hakku нéné. Tápoi tá te masikua bulé nugalaiaké kam nia ka tubukku kineneiget, akugalai suratku нéné ka tubumui. Bulat maerú peilé kumatei;

sarat buí lé rarau-rau ka tubukku
umun'akenenku simaerú

¹⁶ Aipoí ké sarat pagalaiat masipakakra
Katuareman Simaerú sibara ka
Taikamanua lé baí nia, tá anai ronku
masiumun tubu, aipoí galajetku lé néné.
Babara kamateiatku ké tá kupaarep
Katuareman Simaerú néné

¹⁷ Ké ka teúku lé baí nia kugalai galajet
néné, mateú kungenaaké tubukku
kusiló upa. Tápoi néné geti kupakakra
Katuareman Simaerú, kalulut aikua lé
ka tubukku Taikamanua buítá kugalai
galajet néné. Elé aiaké lé ka kabeiku
Taikamanua kugalai galajet néné

¹⁸ Oto apa upakku? Néné lé upakku: iaté
momoi kupakakra Katuareman Simaerú,
tápoi tá aikugegejaaké bagadda kasei pá
rabaluti aku; aipoí tá aikututuntut hakku
sipuoni sipakakra Katuareman Simaerú

¹⁹ Tá airapagugugulet'aké aku kasei
pá; ai lé aku ka uujaat. Tápoi kenanen
kisedda, akukauan lé tubukku néné
pagugulet'akenenda sangamberi
sirimanua. Kugagalaiaké nia geti kelé
néné, bulé ramigi sirimanua kuabbít ka
tubut Kristus

²⁰ Ka tubudda tai Jahudi, perúkungan tubukku kelé tai Jahudi, bulé ramigi tai Jahudi kuabbrit ka tubut Kristus. Iageti ka tubudda situt surukat Taikamanua siaket Mose, perúkungan tubukku kéan lé simaré-ré ka surukat. Kugagalai kelé néné geti, bulé kuabbrit sia ibailiu sia sipasiului Kristus

²¹ Ka tubudda leú taú sipuoni tai Jahudi, kaukungan tubukku kelé taú sipuoni tai Jahudi, sikukuddu ka kupkumen surukat Taikamanua siaket Mose. Kugagalaiaké nia geti kelé néné, bulé ioi kuabbrit sia néné bailiu sipasiului Kristus. Tápoi tá tebaí masikua, aku kaku néné, tá kurereddet surukat Taikamanua; ai lé ikukup-kup'aké aku surukat Kristus

²² Ka talagadda simagulai tonem бага ka tubut Kristus, perúkungan galai tubukku kéan lé simagulai tonem бага, bulé ioi kuabbrit sia ibailiu sia sipasiului Kristus. Kiséan lé baí takua; bulat kipa aku Perú tubukku néné kupakeréaké sia sangamberi sirimanua, kubesiaké sene ngamata enungan, ioi ituarauake sangarubeiat ka talagadda

²³ Kugagalaiaké sangamberinia néné, kalulut Katuareman Simaerú sibara ka

Taikamanua, bulé ipanukani aku kaku
Taikamanua

²⁴Anuagaian kam, ka patakaiat,
sangamberi sipatata kai pabalau, tápoi
sarat sara lé sia masisisiló hadia. Oto
kau bulat pabalau nugagalai kam, pat
oi nusiló kam hadiania

²⁵Sangamberi sipulalatian, bulat
masurú tubudda ka sangamberinia
apa pá. Igagalaiaké kelé néné, kalulut
kababarat ka paatuatnia bulé rasaggaaké
kalung ogó ka lolokkatnia, iaté ogó
simaruei malajú, kele sara toggaiat
kamamanangnia. Tápoi tasusurú geti
tubutta ka sita, ka sangamberinia apa
pá, kalulut bebesiakéta rasaggaaké
kalung ogó sitaimalajuket ka lolokkatta

²⁶Iaté lulunia kaku kupababalau
masiailiaké ailiakenen bulat simakolou.
Kelé ka patakaiat pabukup, kaku
kupabukup, tá kugagalai tenan lé aku
pabukup kabeiku ka sitá galai

²⁷Bulat kuom'aké tubukku néné
bulat itupaddai simakopé, teret oi nia
kupasikeli tubukku. Kugagalaiaké nia
kelé néné geti, kalulut taiobáku ipuaili
ka tubukku kelé néné, babara lepána lé

kunáná sabagei bulé raoi ka patakaiat néné, taiovárangan aku kaku.

10¹ Ale kam Sasarainamai! Kau pei nurepdem kam sipuaaili ka taiebbukatta siburú ka tetret aratut si Mose. Ai kunemi sia tinobut, bailiu tá anai sinaila sia apa pá, aratalipoki Koat Simabonan

² Bulé ioi ibailiu sia sipasitutut si Mose, buítá turau sia ka tinobut samba ka bagat koat

³ Rakom sangamberidda kan siripot ka puketsanan simaker

⁴ samba raló leú et ló siripot ka puketsanan simakeré. Sangamberidda araló ka leleu bulak puketsanan sipaalei sia; leleu bulak néné, iaté Kristus

⁵ Tápoi kenanen kisé, maigi sia sitaimaangkat bagat Taikamanua masiitsó sia. Iaté lulunia apareppa sia simamatei ka simatangeu

⁶ Sangamberinia néné kelé sara toggaiat ka sia, masiparepdem sita bulé buí taobá kam mugalai sikataí kelé taiebbukatta néné

⁷ Samba leú et iparepdem sita, buí tabuluji kam sabulungan kelé sigalaiakenenda ilétalaga ka talagadda

néné. Ka Buko Sipunenan leú ai atusurat'aké, sipasikukua kisé, "Iageti taddaakérangan leú et nia tai bangsa mukom samba muló samba muturú rapaniddogi sabulungan.

⁸Buí leú tagalai kam pusilaingeat, kelé sigalaiakenenda ilétalaga ka talagadda. Aipoí kalulut gagalaiakéra kelé néné, bailiu bara kamamateira; ka bagat sangagogoi ai sia rua ngapulu telu ngaribu igidda

⁹Buí tasibo kam Taikamanua, kelé sigalaiakenenda ilétalaga ka talagadda taikebbukatta siburú; pat matei sia ipataútaki sia ulou simalagá sot

¹⁰Buí leú taputetet, kelé sigalaiakenenda ilétalaga ka talagadda taikebbukata, pat subuakénangan sia Malaikat Kamateiat

¹¹Sangamberinia sipuaaili ka tubudda néné, bailiu nia toggaiat ka sabagei. Ialeú et sangamberinia atusurat'aké ibara repdementa ka sita. Aian lé poí sita ka tetre sialu

¹²Oto kasei sipaatu maron'an tonem bagania, kau ipagaba buí ibelé

¹³Aipoí sangamberi pasisiboat siooi ka tubumui, pasisiboat simarei-rei ka

sirimanua peilé. Tápoi mariu-riu lé irepdem palelengan nia Taikamanua. Tá iooreaké kam Taikamanua ioi pasisiboat ka tubumui pat saliu ronmui. Ka tetret iorak kam pasisiboat, sedda te tetrenia iaké ka kam enungan Taikamanua, bulé numaron kam, ioi nuom'aké kam nia

¹⁴ Oto ale kam Sasarainamai simanuntut bagakku, buítá nupuasaki kam nia бага buluat néné

¹⁵ Kelé ka tubudda simasiku paatuat kupanibo néné ka matamui. Kam'an lé masipaaatu sikuakku néné ka bagat paatuatmui

¹⁶ Ai sita muloló anggur samba aitaakukua kam surá ka tubut Taikamanua, tá pá nia nenda masipatotoilá patabbaratta ka tubut Kristus ka kamateiatnia? Samba ka tetret aitaapaaabbó roti tapukom kam sambatta, tá pá nia nenda masipatotoilá patabbaratta ka tubut Kristus

¹⁷ Kalulut sarat sara lé roti, lepá komtangan nia sangamberitta ka sita roti sisara néné leú et, bailiu sisangatubungan lé sita simigi néné

¹⁸ Igbuk peite kam sia tai Jahudi. Sia sipukokom kan sibuluakenen ka kudduat

buluat, aibailiau sia sara ka kudduat nenda

¹⁹ Aponia kukukua sené? Bulungan elé kan sibuluakenen ka sabulungan néné tá anai katukolobatnia

²⁰ Tá nia kukukua! Kukukua geti iaté, sibuluakenenda ka sabulungan ka kudduat buluat, tá ka tubut Taikamanua arabuluaké nia, tápoi ka tubudda lé paketsa-ketsat sikataí. Tá kuobá nupusara kam ka tubut ketsat sikataí

²¹ Bulat tá momoi, lepá nupuloki kam pulokat Tuhan, pulokimuian mitsá pulokat sanitu. Tá momoi, lepá nupukom kam ka mejat Tuhan, pukommuian leú et ka mejat ketsat sikataí

²² Kipa, taleú ai lé nukikiddiy kam ibara tutut bagat Taikamanua? Sita peilé poi maron ka tubut Tuhan

²³ Arakua sirimanua, "Momoi tagagalai kam apa pá siobáta." Oo kirénangan tedda momoi! Tápoi tá sangamberinia siobat bagatta, nenda ai kauta nia. "Momoi tagagalai kam apa pá siobata", tapoi tá sangamberinia siobáta nenda sipaerú purimanuaiatta

²⁴ Buí ibara sara sigaba sarat purimanuaiatnia sarania. Buítá

sangamberi masibebesíaké sikau
puuktunganda leú ka sia sabagei

²⁵Tá tukekera nukom kam sene
ngamata akkulat tarimeu ka pasakiat
akkulá. Tá leú nubebesíaké kam
nulelek'aké kam nia boikí, kenanen
makei-kei bagamui

²⁶Aipoí beri ka Buko Sipunenan ai
atusurat'aké kisé, "Taikamanua lé
sibakkat sangamberinia néné, samba
sangamberi sibabara ka bagania.

²⁷Ké ai sia sipasisosogai kam mukom,
siló kam pasogaiatda, kenanen nia néné
taú tai Kariten. Iageti apa itattat'aké,
kommuiian leú et nia. Báan bebesíaké
kam nulelek'aké kam kaipa kabaraiaitnia
kan néné, bulé buí ibara kei-kei ka
bagamui ka kam

²⁸Tápoi ké geti ai sia sipasikukua
ka matamui, "Arabuluakéan te
ka sabulungan kan néné," iapeité
taikommuian nia, nujago kam
katuerukatniaélé nujago kam kei-kei ka
bagania ka sia sipasikukua ka matam
néné

²⁹Kukukua sené, tá agai bagam ka
baga, tápoi agai bagania lé néné sikua
ka matam. Tápoiélé ai sia sikua ka

matam kisé, "Isasaila kodda aku kugalai siobáku, kalulut masisurú sipinaatudda ka bagat paatuatda sabagei

³⁰ Ké ka surat bagakku ka tubut Taikamanua baí kukom kan néné, raaanu peilé kodda aku kukom kan néné, beringan aku ai lé kukukua surá ka tubut Taikamanua kalulut kan néné?

³¹ Oto aponia pá nugalai kam, mukom elé muló pá, kau nugalaiaké kam sangamberinia néné masilatsat'aké onin Taikamanua

³² Kau nupuparaboat kam bulat sipulelelek, bulé buí kalulut paraboatmui sitaimaerú, baraakémuian jodda sabagei; iaté tai Jahudi pá nia néné, elé taú sipuoni tai Jahudi, elé sapaamian Taikamanua

³³ Ului kam paraboatku. Sarat kubesiaké lé imaangká bagadda sangamberi sirimanua ka tubukku, tápoi tá masialá bagadda kugagalai bulé ibara uktukku sarakku. Bulat besíakenenku geti, iaté bulé rasiló sangamberidda puaragat sibara ka Taikamanua.

11 ¹ Ului kam galai tubukku, kelé kaku kutut galai tubut Kristus

² Bulat surá lé kukua ka tubumui, kalulut mariuriu nurepdem kam aku, sambat mariu-riu leú nureddet kam sigalaiakenenku ka tubumui

³ Tápoi ai peilé mitsá sené sara kuanenku ka kam, bulé nuagai kam nia, iaté néné, sangamberi taimanteu siutéaké sia iaté Kristus, siutéaké tainanalep, iaté taimanteura, iageti, siutéaké Kristus iaté Taikamanua

⁴ Ké ai tabbot utéra taimanteu rapaniddou, elé rapungantoman ka matat siberikabaga, sigalaiakenenda néné, masipaloloi Kristus lé aragalai

⁵ Tápoi ka sia tainanalep, ké tá anai tabbot utéra komang rapaniddou, elé rapungantoman ka matat siberikabaga, oto sigalaiakenenda néné, masipaloloi simanteura lé aigalai. Aipoí kelé atukuiló lé alainia sinanalep néné

⁶ Oto ké ai sia tainanalep sitaiobá masitabut utéra komang, maerú peilé tukuiló alainia. Tápoi ké tukuiló baí alainia sinanalep néné, kelé sara paloloiat lé ka tubunia. Oto maerú peilé ikau tabbot uténia komang

⁷ Buían leú ratabbó utéra ka sia taimanteu, aipoi nia ka sia

masitularat'aké ka sita putubuat
Taikamanua, elé masitularat'aké ka sita
pulatsanan Taikamanua. Tainanalep leú
masitularat'aké pulatsanan simanteunia

⁸Aipoí tá ka tainanalep aibaraaké
taimanteu Taikamanua, tápoi ka sia geti
tainanalep ka taimanteu lé arabara

⁹Tá kaluludda tainanalep aitubaraaké
taimanteu néné, tápoi kaluludda lé
taimanteu

¹⁰Oto bulé imangká bagadda samalaika,
bailiu ka sia tainanalep buítá ratabbó
utéra komang, masipatoilá ai nia ka tei
kupkumen simanteunia

¹¹Tápoi siripot sipasesese ka
puririmanuatta tai Kariten, tá ragagalai
tainanalep murimanua saradda, tá
sambadda taimanteura; iageti beri leú
ka sia taimanteu tá ragagalai murimanua
saradda, tá sambat sinanalepnia

¹²Aipoí kenanen ka taimanteu
aitubaraaké ka sia sinanalep siboiki,
tápoi lepá putú-túnangan matadda
ka sia taimanteu ka tainanatep;
iageti sangamberinia sibabara néné,
Taikamanua lé aibaraaké nia

¹³Paatu peite kam ka kam; mateú leú
ka bagamui, ké sitá tabut uté komang,

ipaniddou ka Taikamanua sara sinanalep ka matadda siberikabaga

¹⁴ Kelé siitsóta simarei-rei ka sirimanua, atugelaiakéan ka tubumui, taimateúnia imananta ka sia alaira taimanteu

¹⁵ Tápoi ka sia geti tainanalep, aitukau alainia bulé itabbó uténia. Sarapei mitsá sara ka tuumun ka tubunia lé ké mananta alainia

¹⁶ Oto, ké ai sia sipauukle kalulut néné, sarat néné lé kuanenku ka tubudda iaté, sita néné, elé sia sabagei sapaamian Taikamanua, ké simarei-rei baí nia sarat sara lé simatukle tagalaiaké kam ka bagat paamian; tá anai bagei

¹⁷ Ka kuanenku néné, bulat tá kuumum kam. Tá masibaraaké katuerukat nuparururú kam maniddou, tápoi sitaimaerú lé

¹⁸ Siboikí akuarep, ka parurukatmui ka paamian, ai mungkuat sitaipaobá; mungkuat sara ka mungkuat bagei. Kupaatu aisesese goisó sikuadda néné

¹⁹ Kirénangan amateúan ibara karaganan ka talagamui; bulé imatoilá kasei bulat tai Kariten sipulelelek

²⁰ Tá mukom Komen Sipunenan nugagalai kam ka parurukatmui

²¹ Aipoí kelé nupukom kam, siolaaké ka siana, nualá kam kanmui leú et, pat taibaranangan ka sabagei, ialeú et sabagei pat bara puinengra

²² Nugagalai kodda kam kelé nenda? Tá poi anai lalepmui? Momoi nupukom kam sedda ka lalepmui. Taleú masipaloloi, elé masipakaila simagebá lé nugagalai kam? Kuumun'aké pá galai tubumui néné? Taatte matsí! Bulat tá kuumun kam, lepá

²³ Aipoí bulat sibara kai Tuhan lé singantruakenenku ka tubumui; iaté ka soibónia nenda, ka tetret arapajo Tuhanta Jesus, alánangan roti

²⁴ lepá aikua surá ka tubut Taikamanua, kalulut roti néné, paabbónangan nia, kuanangan ka matadda sipasiuuluinia, pelé ngangania "Nia té néné tubukku, segéakenen punu tubumui, galaiaké kam néné pasirepdemmui aku.

²⁵ Kisedda leú et kelé ailepá arapukom, alánangan pulokat sibara anggur, kuanangan ka matadda sipasiuluinia Jesus, pelé nga-ngania, "Anggur néné, iaté Pakerekat Bagat Taikamanua sibau, sisah'akenen ka logauku. Senen nuló kam nia néné, galaiakémuian nia, pasirepdemmui aku.

²⁶ Kirénangan tedda, senen nukom kam roti, elé nuló kam anggur néné, anupaarep'an te kam katuareman kamateiat Tuhan, pat aili ka kaoijanannia

²⁷ Oto, sia sikom rotit Tuhan, elé sipasiloló anggur Tuhan, ka enungan sitaimatéú, amajongan sia ka tubut Tuhan, sipasibubuluaké tubu sambat logaunia

²⁸ Buítá raitsó boikí tubudda senen sirimanua, iapeité oi rakom roti elé raló anggur néné

²⁹ Aipoí ke ka pukokomra roti, elé ka pulolóra anggur nenda, tá ai rapaatu, Pukoman Sipunenan néné, iaté siorak ka tubut Tuhan le; oto pukokomra elé pulolóra nenda masibaraake ukuman Taikamanua ka tubudda lé aragalai

³⁰ Iaté lulunia maigi sia ka talagamui simabesí samba simasaggo tubu; samba leú ai sia simamatei

³¹ Ké tebaí taitsó kam tubutta boikí, tá iuukum'aké sita Taikamanua

³² Tápoi kenanen iuukum'aké sita Taikamanua, masibó-bó sita lé, buí iorak sita ukuman sambatta taikapolak néné

³³ Oto, ale kam sasarainangku, ké parurú kam mukom, ka Pukoman Tuhan, kau nupangena kam

³⁴ Ké ai sia simalaje kau rapukom boikí ka lalepra. Ké nulelek'aké baí kam néné, bailiu parurukat paniddogatmui néné, tá sibaraaké ukuman Taikamanua ka tubumui leú et. Iageti pagalaiat sibabara bagei, teret oikungan lé geti kubalou kam, kolouakékungan nia ka matamui.

12 ¹ Oto kineneiget geti kutitiboi ka matamui, iaté pagalaiat panguruat siaket Ketsat Sipunenan lé, bulat kuobá nuagai kam nia, bulat sibulatnia

² Repdem peite kam, ka tetret ai peilé tá nuaagai kam nia si Tuhan, aian iaalá bagamui masitut'aké sabulungan sioú-óú

³ Buítá nuagai kam nia néné, sia sipinalulut Ketsat Sipunenan, tá rakukua, "Tutelei lé Jesus!" Oto kisedda leú te, bulat tá te anai sia sipasikukua, "Tuhan lé nia si Tuhan néné!" ké tá ipalulu sia Ketsat Sipunenan

⁴ Ai piga ngamata pá panguruat Ketsat Sipunenan, tápoi sangamberinia nenda sibabara ka sarat sara Ketsat lé

⁵Ialeú et, ai piga ngamata pá galajet masipuukú si Tuhan, tápoi Tuhan pasikelet geti, iaté Tuhan sisasara nenda leú et

⁶Ai piga ngamataat enungnia masigalai galajet Tuhan, tápoi sipasikakau geti ron ka sene-senen tubudda ioi ragalai galajet, Taikamanua sisasara nenda leú et

⁷Bulé ibara katuerukatta sangamberitta, pugalainangan Ketsat ka tubutta senen-senenta

⁸Ka sisara ikau ka tubunia Ketsat agai mutitiboat sibara wibawa. Ka sabagei geti ikau ka tubudda Ketsat sisara néné leú, iaté agai masikolouaké pagalaiat Taikamanua

⁹Ketsat sara néné leú et masikakau ka sisara, tonem бага bulat simakopé ron ka tubut Kristus; tápoi ka sabagei geti ikau ka tubudda Ketsat, gege masialeaké simabesi

¹⁰Ka sisara ikau ka tubunia gege masigalai pukerengan; tápoi ka sabagei ikau ka tubudda Ketsat agai masipoiliat apa sipinaatut Taikamanua. Ka sabagei ikau puaagai masipabaggei kipa oniakenen panguruat sibara ka Ketsat

Sipunenan, kipa tá. Ai leú bagei ikau ka tubudda agai masitiboaké sene ngamata nga-nga smakisei ka bagatta; iageti ai leú et sia mitsá sabagei ikau ka tubudda puaagai masikolouaké panganga-nganga smakisei ka bagatta

¹¹ Tápoi sipasigagalaiaké sangamberinia néné geti, iaté sarat Ketsat sara néné lé. Oto senen-senen tubut sirimanua ikau ka tubudda panguruat pasasaratda, siripot teú bagat Ketsat lé

¹² Kelé tubut sirimanua lé nia ka sia tubut Kristus néné; tubu néné sara lé, tápoi maigi laddounia. Sangamberinia ka sia laddou tubu néné, kenanen maigi, tápoi tubu sara lé

¹³ Kisedda leú te ka sita néné sangamberitta, tai Jahudi pá nia, elé taú sipuoni tai Jahudi; sapagugulet elé sia sipuuuaja; sangamberitta airaúan leú et sita Ketsat simakeré, bulé ibailiu-uaké sita sara ka tubut Kristus. Sangamberita leú et masipuuktungi Ketset sara nenda simasut

¹⁴ Aipoí ka sia tubutta néné, tá sarat sangaladdou, tápoi maigi laddounia

¹⁵ Ké baí ikua ka sia rere néné, "Aku kaku néné tá kabei. Oto aku néné tá

rubeiat tubu", néné tá masikua ka sia rere néné, tá rubeiat tubu, nia ka sia

¹⁶ Iageti ka sia leú et talinga, ké ikua baí ka sia, "Aku kaku néné tá mata, oto aku néné tá rubeiat tubu," tápoi nenda leú et tá masikua, ka sia talinga néné tá rubeiat tubu

¹⁷ Aipoí ké ibailiu nia sangaliot tubu néné sarat matangan lé sangamberinia, kipangan lé ipaeerú tubu ipasiarep? Ialeú et ké ibailiu sangaliot tubu néné sarat talingangan lé sangamberinia, kipangan lé ipaeerú tubu ipasiping

¹⁸ Ataitsóan tebai kam ipaottot nia Taikamanua laddou tubutta néné ka tubut tubutta. Iageti katugalangan nia leú, siripot teú bagat Taikamanua leú et

¹⁹ Iageti mitsá ké baí sarat sangaladdou lé nia tubutta néné, oto kipangan lé takukua nia tubu néné

²⁰ Kirénangan tedda laddou tubu néné maigi, tápoi ka sia tubu geti sara lé

²¹ Oto kalulut néné, tá momoi ikua ka sia mata ka tubut kabei, "Apananku te ekeu néné!" elé ikua ka sia uté ka tubut rere, "Apananku te ekeu néné!

²² Tápoi beringan laddou tubu oniakenenta simasaggo, bulat abeu kauta nia

²³ Elé laddou tubu sitá katukaunan, tápoi nia lé bulat abeu ka paatuatta. Iageti ka sia laddou tubutta oniakenenta sitaimalainge, tápoi nia lé bulat tababaijǐ kam

²⁴ Tápoi laddou tubu oniakenenta geti simalainge, táan bulat tapuleletsei kam. Aipaerúan poí kuddut tubutta néné Taikamanua bulat sipulelelek, pat ka sia laddou tubutta sitá katukaunan néné, bailiu bulat abeu ka paatuatta

²⁵ Oto sené toilá, tá aturubei tubu néné, tápoi ai lé sia pasosopo katubu

²⁶ Ké mangorik baí sara laddou tubutta néné, pangorikrangan leú et sangamberidda saladdou tubutta néné. Ialeú et, ké baí tuumun'aké sara laddao tubu néné, puangkárangan leú te бага, ka sia sangamberidda saladdou tubutta néné

²⁷ Oto kam néné sangamberimui, makeré lé ituoniaké kam, tubut Kristus. Iageti kam sene-senenmui néné leú et, iaté saladdou tubut Kristus

²⁸ Oto kisedda leú te ka paamian. Aikokoiakéan kuddut sene-ngamataat sirimanua; siboikí iaté tai apostel, sikarua, iaté tai nabi-nabi, sikatelú tai guru paamian, iageti siangan ka sia sigalai kiseiet, lepá siangan mitsá ka sia sisiló panguruat masialeaké simabesí, elé sipasirorop'aké sirimanua sabagei, elé muuté, elé sipasititiboaké sene ngamata nga-nga simakisei ka bagatta

²⁹ Tá sangamberidda amuapostel, elé amunabi, samba amuguru paamian. Tá sangamberidda ai gege masibaraaké kiseiet

³⁰ masialeaké simabesí, elé masitiboaké sene ngamata nga-nga simakisei ka bagatta, elé masiterjemah'aké nga-nga néné

³¹ Oto kalulut néné, bulat kau nubesíaké kam nia simakopé, bulé nuikep'aké kam panukanan bulat sabeu. Oto sené ka suratku néné, kupatoilá ka kam enungan bulat sipulelelek.

13 ¹ Kenanen baí moi kutiboaké sene ngamata nga-nganda sirimanua, elé pat oi leú kutiboaké nga-nganda samalaika, tápoi ké tá manuntu bagakku ka tubudda sirimanua sabagei, oto

nga-nganguku nenda sarat goiló siboboi lé

²Kenanen bara kaku puaagai masipakakra Katuareman Simaerú sibara ka Taikamanua, samba kuagai masikeruji sangamberinia, elé kuagai sangamberinia apa pá, elé makopé ronnia tonem bagakku ka tubut Taikamanua, pat oi kuritsiaké leleu, tápoi ké tá manuntu bagakku ka tubudda sirimanua sabagei, bailiu sitá katukaunan lé aku néné

³Kenanen kupanguruat'aké sangamberinia bibiletku ka tubudda simagebá, elé kenanen kubuluaké tubukku néné itulabóaké ka api, tápoi ké tá manuntu bagakku ka tubudda sirimanua sabagei, bailiu musisiboboi lé sangamberinia néné

⁴Aipoí simanuntu бага ka tubudda sabagei, maom bagadda samba maerú bagadda. Tá mububuggra ka paatuatda pusingit-sit бага, tá malabbu titiboatda, samba tá raobá masibuak'aké tubudda

⁵Tá raobá masiumun'aké tubudda, tá malippat titiboatda, tá raobá sarat siobára turereddet, tá maruei imabelé

bagadda, tá rarururú kataíra sabagei ka bagat paatuatda

⁶Simanuntu бага ka sabagei, bulat tá masanang sia ka pukakataí, tápoi sarat puerukat lé mangká bagadda

⁷Bulat maom bagadda masibairat sangamberinia apa pá siooi ka tubudda, samba rakakatonemi sangamberinia simaerú sibara ka tubudda sabagei. Iageti kenanen kipa pá sibabara, ka sia simanuntu бага нéné, bulat beri tatá nia pukakaronan bagadda samba bulat maom bagadda masingena sangamberinia

⁸Tápei ataagai kam, ai sara tetre, táan maperlu tupakaté бага ka pasasamba. Kelé kineneiget, ai sia simaagai masikarap'aké Katuarreman Simaerú sibara ka Taikamanua, tápoi lepá ka sara tetre, ari-ipuari ipakarap katuareman нéné. Samba kineneiget, ai sia siagai masitiboaké sene ngamata nga-nga smakisei ka bagatta, tápoi lepá ka sara tetre ari-ipuari ipanibo ka nga-nga nenda. Kineneiget ai sia siagai sangamberinia apa pá, tápoi lepá ka sara tetre, kalipogiddangan nia sangamberinia

⁹ Aipoí tápei mamumuiné sutnia
puaagaita elé puroronta masipakarap
Katuareman Simaerú sibara ka
Taikamanua

¹⁰ Iaaili te tetrenia, bulat ipamuiné nia
sangamberinia Taikamanua; oto bailiu
ka sia nenda sitaimamuiné, tatá

¹¹ Kelé ka tetret ai peilé aku tasulé,
kupanibo leú, kelé rapanibo tasulé leú
et, samba arat tubukku leú et kelé
tai gui-gui, iageti paatuatku leú kelé
pupaatuananda tatoga sigoisó peilé.
Kineneiget amakebbukat'an tubukku,
bailiu galai tubukku kelé taigui-gui
nenda, gik-gik'akékungan leú et nia

¹² Aipoí apa simatotoilá ka matatta
kineneiget, kelé sigogoá simakamung
ka totoro peilé. Tápoi lepá geti,
iapeité itsótangan nia bulat simakolou.
Kineneiget tápei kuagai sangamberinia,
tápoi lepé geti bulat agaikungan
nia sangamberinia, kelé againa nia
Taikamanua, sangamberi galai tubukku
néné

¹³ Oto ka bagat oggak néné, ai telu
ngamata bulat galaiakenenta, iaté:
tonem бага, pukakaronan, samba
punununtut бага ka pasasamba, tápoi

bulat siabeu katelunia néné, iaté masipununtuki бага sabagei.

14¹ Buítá nubesiáaké kam mununtu бага ka pasasambamui. Samba besíaké leú et kam nusiló kam panguruat sibara ka Ketsat Sipunenan; tápoi bulat nuboboikiáké kam geti, iaté panguruat puaagai masisegéaké sipinaatut Taikamanua ka tubudda sirimanua

² Aipoí ka sia sitiboaké nga-nga smakisei ka bagatta, tá te sirimanua rapatitiboaké, tápoi Taikamanua lé. Bulat beri sia sara siagai kuanennia, aipoí kalulut Ketsat Sipunenan lé aioi ititibboaké pagalaiaat sangamberi sitaiaagaiet nenda, sarat Taikamanua lé iagai nia, lepá

³ Tápoi ka sia geti sipakakra Katuareman Simaerú sibara ka Taikamanua, ka sirimanua lé rasesegéaké nia, masiparon pupaaturananda, masibaraaké gegedda, samba leú et masipusuibi bagadda

⁴ Sitiboaké nga-nga smakisei ka bagatta, sarat masiparon pupaaturananda saradda lé, tápoi ka sia geti sipasisesegéaké Katuareman Simaerú sibara ka Taikamanua, masirop paamian lé ragagalai, bulé ramamaju

⁵ Kirénangan tedda bulat simakopé erú lé, ké baí sangamberimui iagai masitiboaké sene ngamata nga-nga simakisei ka bagatta. Tápoi sarapeite kopet erúnia, ké moi nupakakra kam sipinaatut Taikamanua. Aipoí sia sipakakra Katuareman Simaerú peilé maabeu ka matat Taikamanua, ka tubudda sipasititiboaké sene ngamata nga-nga simakisei ka bagatta; iageti sara leú et galainia ké ka sia siagai masitiboaké sene ngamata nga-nga simakisei ka bagatta néné, momoi rakolouaké apa sitiboakenda, bulé ramauktuk ka sia sangamberi paamian

⁶ Kelé pasikatnia baí, ké moi aku kubalou kam, kutiboaké sene ngamata nga-nga simakisei ka bagamui, aponia kaumui nia? Bulat beri goisó tá anai katukaunannia! Tápoi sara galainia, ké kukua sara sipatoilat elé siitsot matakku sibara ka Taikamanua, elé kupakolou ka kam pagalaiat tubut Taikamanua elé kusegéaké ka kam katuareman simaerú sibara ka Taikamanua, elé kugelaiaké kam

⁷ Kelé leú galainia ka sia pipiau, sitaipueenga beri goisó, iaté kelé

suling samba kecapi, ké tá tabóbó
nada-nadania sipulelelek, kaipa raaagai
nia sirimanua urai apa iuuraiaké

⁸Iageti kelé néné leú, ké nunauaké
kam pipiau, tenan lé kam papiau siboboi,
kasei siobá masipatarek tubu mei
pasaggak

⁹Kisedda leú te puaagaimui masitiboaké
sene ngamata nga-nga simakisei ka
bagatta. Ké ka puaagamui néné
tiboakémuian nga-nga sitaimakolou,
bailiu beri sia sara siagai nia sikuam
néné, oto bailiu malilimai lé nga-ngam
siboboi

¹⁰Bulat maigi nga-nga ka polak
néné, tápoi beri sara ka talagat
panganga-nganga néné sitá katukolobat

¹¹Tápoi ké tá baí kuagai katukolobatnia
sikuania sara sirimanua néné, bailiu
sitiboaké nga-nga néné kuoniaké lé nia
sasaralaggai. Beri ka sia leú, kisedda leú
et ikukua ka tubukku kaku

¹²Kelé ka kam leú et, bulat ai lé
kuaagai obámui masisiló panguruat
sibara ka Ketsat Sipunenan. Tápoi bulat
boikíakenen geti, iaté masipakei puaagai
sipasirorop'aké ramamaju sapaamian

¹³ Iaté lulunia, ka sia sitiboaké nga-nga simakisei ka bagatta néné, bulé ratiddou ka tubut Taikamanua, ikau ka sia puaagai masikolouaké sikuania

¹⁴ Aipoí ké maniddou aku ka nga-nga simakisei ka bagatta, kirénangan tedda ka sia ketsatku ai nia maniniddou, tápoi ka sia geti paatuatku, tá aimueenung

¹⁵ Oto kipangan lé kugagalai? Kiséan lé kugagalai: Edda kupaniddou sambat ketsatku, tápoi ka paniniddouuku nenda leú et, sambat paatuatku maniniddou. Edda kupuurai sambat ketsatku, tápoi ka puuraiku nenda leú et, kobá bulé sambat paatuatku muuurai

¹⁶ Aipoí ké sarat ketsatmui lé masikukua surá ka tubut Taikamanua, tápoi ai sia sabagei sitaiagai kolounia nga-nga simakisei ka bagatta siaket Ketsat Sipunenan néné, bailiu tá iagai ikua ka paatuatnia, "Bulatnia tedda pasesese ka bagakku" paniddogat pusurakatnu néné, kalulut taiagaina nia sikuamui

¹⁷ Oto kenanen kipa pá erúnia paniddogat pusurakatnu nenda ka tubut Tuhan, bulat tá anai lulunia ka sabagei, paniddogatnu nenda

¹⁸ Oto bulat suráan lé kukua ka tubut Taikamanua, kalulut kaku leú et momoi kutiboaké sene ngamata nga-nga smakisei ka bagatta, bulat belé peilé ka kam, sangamberimui néné

¹⁹ Tápoi ka parurukat maniddou kai Tuhan, maerú peilé kutiboaké lima ngatakó tiboiet siagaira sabagei, ka sipuriribu nga-nga smakisei ka bagatta, sitaiaagaietda. Bulat kuoobá geti nia kugalaiaké kelé néné, bulé ioi kugelaiaké sabagei

²⁰ Ale kam Sasarainamai! Buí iului kelé pupaaturananda tatoga pupaaturanmui néné. Ka pujojo, kau imariu-riu kam kelé galai tubudda tatoga sigoisó. Tápoi ka pupaaturan geti, kau ibailiu kam sikebbukat

²¹ Aipoí beri ka bagat Buko Sipunenan leú ai atusurat'aké kisé, "Aikua si Tuhan, 'Ka tubudda sipaninibo nga-nga smakisei ka bagatta néné te, kupanibo ka tubudda sapaamianku néné. Beri leú ka tubudda tairauma néné, sedda kupanibo ka tubudda sapaamianku; tápoi kenanen kisedda, bulat tá raoba raarepi nga-ngangu.'

²² Oto panguruat masitiboaké sene ngamata nga-nga smakisei ka bagatta néné, toggaiat ka tubudda sitaimatonem lé, tá ka tubudda simatonem бага. Samba panguruat masipoiliat rencanat Taikamanua ka tubudda sirimanua, iaté toggaiat ka simatonen бага, tá ka tubudda sitaimatonem бага

²³ Aipoí ké sangamberimui sapaamian masitiboaké sene ngamata nganga smakisei ka bagatta néné, ka parurukat paamian, lepá oi sia piga pá sibara ka kudduat bagei, elé taú tai Kariten masiitsó, kuaddangan bulat airoróan kam sangamberimui

²⁴ Tápoi ké sangamberimui masisegéaké Katuareman Simaerú sibara ka Taikamanua, iageti oi nia sara taú sipuoni tai Kariten elé siooiaké, bailiu ka sisegéakenenmui sangamberimui nenda te, masipatotoilá jo sigalainia; kalulut néné againangan tubunia jonia

²⁵ Iageti matoilánangan leú sangamberinia simalipput ka bagat paatuatnia, bailiu repéakénangan paatuatnia, paniddounangan leú et ka tubut Taikamanua. Oto iapeité

mitsá bulat'akénangan nia, kababarat
Taikamanua ka talagamui

²⁶Oto apa katukolobatnia
sangamberinia néné, alé kam Sasaraina!
Ké parurú kam maniddou ka tubut
Tuhan, ai sipuuurai, ai sipasigegelaiaké,
ai leú et sia sipasisesegéaké pagalaiat
sibabara ka Taikamanua, samba
ai leú sia sipasititiboaké nga-nga
simakisei ka bagatta, iageti ai leú
sia sipasikokolouaké sikuania. Tápoi
sangamberinia néné, buítá nugalaiaké
kam nia kelé masipangantru, samba
ibailiu nia katuerukatmui sangamberimui

²⁷Ké ai sia sitiboaké nga-nga simakisei
ka bagatta, buítá rua, elé simiginia
telu lé sia maninibo pasaili-saili. Iageti
buí leú tá rabara sipasikokolou-uaké
nga-nganda sipaninibo néné

²⁸Tápoi ké geti tá anai sia
sipasikokolouaké, oto maerú peilé
rapumeng-meng ka sia nenda
sipasititiboaké nga-nga simakisei
ka bagatta, ka parurukatmui. Ka
paatuatnangan lé ka sia ipatiboaké
Taikamanua

²⁹Ké ai sia rua elé telu sibara
katubu Katuareman Simaerú sibara

ka Taikamanua, buítá rasegéaké
katuareman nenda, ka tetret ai peilé
rapaatu ka sia kuanenda sabagei

³⁰Tápoi ké moi baí katuareman sibara
ka Taikamanua ka tubudda ka sia
sabagei, sikukuddu ka parurukat nenda,
buítá rapuari ka sia nenda sipaninibo

³¹Bailiu kelé néné ale kam Sasaraina
sangamberimui, oi nupakakra kam nia
sangamberimui katuareman simaerú
sibara ka Taikamanua néné, bulé
sangamberimui masisiló nganturat
samba leú, memei maroron tonem
bagamui ka tubut Taikamanua

³²Aipoí panguruat Ketsat Sipunenan
masisegéaké katuareman sibara ka
Taikamanua, momoi rapagaba nia
sipasisesegéaké

³³Ka sia poí Taikamanua néné,
Taikamanua siobá simalelek le; tá
Taikamanua siobá sitaimakolou. Kelé
enung'akenen ka sangamberi paamian

³⁴Taikamanua, tainanalep buítá
rapumeng-meng ka parurukat paamian.
Bulat tá tuoobáaké rapanibo. Tá momoi
rapuuté; kelé siripot sikuat surukat ka
arat

³⁵ Ké geti raobá raagai apa pá, ka taimanteurangan lé ranonounou nia ka lalep. Aipoí simakopé ailatta lé rapanibo tainanalep, ka parurukat paamian

³⁶ Sibabara ka kam lé poi tiboiet Taikamanua? Elé sarat ka tubumui lé poi aitusegéaké tiboiet nenda

³⁷ Oto ké ai sia siagai tubuna kababarat panguruat ka tubunia, masisegéaké Katuareman Simaerú sibara ka Taikamanua, élé ngamataat panguruat bagei sikau Ketsat Sipunenan ka tubunia, buítá raseseaké ka paatuatda, sisurat'akenenku néné, bulat siparentaakenen Tuhan lé

³⁸ Tápoi ké ai sia sitaisiló tiboietku néné, bá puuukú kam nia

³⁹ Oto kalulut né ale kam Sasaraina, bulat kau nubesíaké kam nia masisegéaké Katuareman Simaerú sibara ka Taikamanua; tápoi bá kekeraaké kam sia siobá masitiboaké sene ngamata nga-nga simakisei ka bagatta

⁴⁰ Tápoi buítá maerú nugalaiaké kam nia samba malelek katugalangan nia.

15 ¹ Oto kuobá kineneiget, masiparepdem kam ka

Katuareman Simaerú sibara ka Taikamanua, sinegéakenenku ka tubumui siburú. Anusilóan kam; beri leú aimatonem bagamui ka tubut Kristus, kalulut Katuareman Simaerú lé

²Oto ké mariu-riu nuomet'aké kam nia sinegéakenenku nenda ka tubumui, bailiu paaraunangan leú et kam Katuareman Simaerú néné; ké geti sarat kakatonemimui; lé nia, tápoi tá ainuaagai kam kolounia, siboboi ka kam

³Aipoí sisilóku kaku kai Tuhan leú kusesegéaké ka tubumui ka kam ale kam Sasaraina. Iaté bulat sabeunia, kelé sitususurat ka Buko Sipunenan. Segéakenenku néné ka kam, iaté, aimatei Kristus kalulut jotta

⁴Aturateiakéan nia, tápoi lepá suruakénangan nia mitsá Taikamanua ka gogoi sikatelunia. Pagalaiat néné leú, atusurat'aké leú et ka Buko Sipunenan

⁵Akutiboian leú et ka matamui; Kristus néné sitususuru ka si mamatei, aipatoilá leú tubunia kai Petrus, lepá mitsá ka tubuddangan ka sia tai apostel si pulurua

⁶Lepá patoilánangan tubunia mitsá ka tubudda silima ngotu sipasiuluinia ka sangamberidda. Maigi peilé sia

kineneiget sipuririmanua, piga peilé pá
sia amatei

⁷Oto lepá mitsá patoilánangan tubunia
Kristus ka tubut Jakobus, lepá ka
tubuddangan sangamberidda tai apostel

⁸Pasilapánia, patoilánangan mitsá
tubunia ka tubukku kaku, iaté sipututú-
tú mata, einangan tá iaaili laggónia

⁹Oto aku lé apostel Tuhan bulat
simarepé nia. Bulat tá mateú tuoniaké
aku kaku néné apostel, aipoí sipaorei
paamian Taikamanua lé aku néné

¹⁰Tápoi kalulut panguruat katet
Taikamanua, bailiu kelé néné aku
kineneiget. Samba bulat tá siboboi
aiappéaké jokku Taikamanua. Aipoí aku
lé bulat amugalai simakopé ron, belé
peilé ka sia sangamberidda tai apostel
sabagei. Tápoi siripokatnia tá kalulut aku
aioi akugalai nia, Taikamanua simakaté
baga ka tubukku sipaalei aku mugalai lé,
amasigalai

¹¹Oto kasei ka tubu anusiló kam
Katuareman Simaerú néné, sibabara
kaku pá, elé sibara ka tai apostel
sabagei lé pá, tá anai galainia. Bulat
siabeunia geti sené, iaté, kusegéaké

kai Katuareman Simaerú néné ka kam,
iageti, katonemimuian nia

¹² Ké pagalaiat katusuruat Kristus ka
simamatei kupaarep ka kam, kipa peilé
ibabara ka talagamui sipasikukua táan
tususu sia mitsá simamatei

¹³ Ké táan baí tusuru sia mitsá
simamatei, oto ka sia leú et Kristus, táan
tususu nia mitsá ka simamatei

¹⁴ Oto ké tá baí tusuru nia mitsá Kristus
ka simamatei, bailiu tá anai lulunia
kupaarep kai apa pá ka tubumui, elé tá
anai lulunia nukatonemi kam nia бага,
aipoí tá anai pubakkanannia tonem
bagamui néné

¹⁵ Bulat apabokongan lé kai galainia
pagalaiat Taikamanua, kalulut
akusegéaké kai ka kam ririmanuaakéna
nia mitsá Kristus néné, Taikamanua, ka
simamatei; oto tá aisuruaké nia mitsá
Taikamanua ka simamatei, ké sibulatnia
baí tá tususu sia mitsá simamatei

¹⁶ Ké tá baí tusuru sia mitsá simamatei,
ka sia leú et Kristus, tá leú te tususu
nia mitsá ka simamatei

¹⁷ Iageti ké tá baí tusuru nia mitsá
Kristus ka simamatei, bailiu siboboian lé
kakatonemimui nia бага; momoi takua,

ai peilé kam ka jo galainia, bulat sitá
anai pukakaronan бага

¹⁸Oto sia leú et tai Kariten simamatei,
tá leú et anai karonietda бага

¹⁹Ké baí pukakaronenta бага ka tubut
Kristus, sarat teret purimanuaiatta ka
polak néné lé; oto bailiu sitangan lé bulat
simakopé kataí uktuk ka sangamberi
sirimanua ka polak néné

²⁰Tápoi bulat amatoiláan katususuru
nia Kristus ka simamatei. Néné te
masijajamin susuruakéna sia ka sia
Taikamanua, sangamberi simamatei

²¹Aipoí aitugurú kamateiat ka polak
néné, kalulut sara sirimanua lé;
oto kisedda leú te katusuruat tubu
simamatei, sibara ka sara sirimanua leú
et

²²Kelé ramatei ka sia sangamberi
sirimanua, kalulut katutatabbradda ka
mungkuat Adam, kisedda leú te ka sia
sangamberi sirimanua tususuruaké leú
et, kalulut katutatabbradda ka mungkuat
Kristus

²³Tápoi galai isuruaké sia geti
Taikamanua sipatutut: siboikí Kristus;
iageti ka gogoi kaoijanannia mitsá,

iapeité siangan ka sia sipuoni bakkat Kristus

²⁴Oto kapplu nenda, iapeité iaili kalepakat polak. Ka tetret nenda te ikakalaaké sangamberi pupamarentaat, purimataat, samba sangamberi puroron. Lepá segéakénangan galajet siripot puririmata nia néné, ka tubut Ukkuita Taikamanua

²⁵Iageti buítá iriu-riuaké ipuuté ka sia Kristus néné, teret kauna sia Taikamanua sangamberidda sisaggangi Kristus néné, murekkuk ka matat Kristus

²⁶Saggak kalaakenennia sikatei-tei, iaté kamateiat

²⁷Ka Buko Sipunenan leú ai atusurat'aké kisé, "Taikamanua lé aikau sia makala ka tubut Kristus." Sené amakolouan kuanennia, nga-nga, "sangamberi", sené, masikua tá sambat Taikamanua sikau sangamberinia makala ka tubut Kristus

²⁸Tápoi lepá aitukalaaké sangamberinia ka matat purimataat Kristus, iapeité, ka sia Togat Taikamanua néné, ikalaaké tubunia ka tubut Taikamanua, sipasikakau sangamberinia murekkuk ka matania ka sia. Oto nia ka sia

Taikamanua leú et, utéakénangan
sangamberinia

²⁹ Ké tá isuruaké sia mitsá simamatei,
angoi peilé ituraraú sia punu tubut
simamatei? Apangan lé nenda lulunia
ragagalaiaiké nia? Ké bulat nia baí tá
tususu sia simamatei, apangan lé
lulunia ragagalaiaiké nia nenda

³⁰ Apangan lé lulunia kuoobá kai
kukakau kai tubumai ka pasimamatei
senen gogoi

³¹ Ale kam Sasarainamai! Senen gogoi
kuom'aké kuorik pangoringan, kalulut
beunannia kupaatu putotonem bagamui
ka tubut Tuhanta Jesus Kristus

³² Bulat ké sarat siorak ka
pusirimanuaat lé baí nia, aponia
uktukku kuperjuang'aké nia, bulat
pat kéan lé kupalabáaké tarimeu
simasagbak ka laggai Epesus néné?
Ké bulat sibulatnia baí tá tususu sia
simamatei, kauan, maerú peilé tatut
kam nga-nga paloibáakenen néné,
"Kau tapukom kam, samba tapuló kam,
tasegéaké kam bagatta murimanea,
matsep lé tebaí matei sita.

³³ Bulat buí rapajo kam! Paaleiat sitaimaerú, masipakataí paraboat simaerú

³⁴ Oto kineneiget kauan nuseseaké kam nia, buían nugalai kam mitsá jo. Aipoí bulat mateúan numaila kam, kalulut ai peilé sia ka talagamui néné, sitaiagai Taikamanua

³⁵ Kupaatu ai sia sipasinonou-nou kam, rakua, "Kipa ratusuru sirimanua simamatei? Ké kipa putubudda, lepát ratusuru mitsá?

³⁶ Bulat sitaiagai paatuat lé kam! Ké nukarap'ké baí kam karamen ka polak, tá mututú-tú karamen nenda, ké tá matei boikí

³⁷ Karamen sikarap'akenenmui néné, elé karamen gandum, elé karamen apa pá oninia bagei, sarat ngambet karamen nenda lé, iageti tá sangamberit uremennia nenda mututú-tú

³⁸ Aipoí Taikamanua lé masikakau putubuat ka karamen néné, siripot putubuat simaerú iitsó, sipaakkup ka uremen néné. Ikakau ka senen karamen néné, Taikamanua, putubuat uremen pasasaradda tubudda

³⁹ Kelé ka sia makluk sipungongoí-ngoí, tá leú et makeré tubunia sangamberinia. Ka sirimanua geti makeré putubuatda, tápoi patarime-tarimeu sara putubuatnia ka sia; umá leú et ka sia sara lé putubuatnia, samba ka sia iba sara lé et putubuatnia

⁴⁰ Kisedda leú te pabula-bulá sikuddu ka manua, kele sulu, laggó, panyanyat samba leú et planit, samba pabula-bulá ka polak, iaté sangamberi sibabara ka matat polak. Pabula-bulá ka manua, ai ka sia latsatnia sarania; ialeú et pabula-bulá ka polak, kisedda leú te ka sia, aileú et laingenia sarania

⁴¹ Pulalainget matat sulu leú et, tá makeré ka pulalainget laggó. Beri leú et ka sia panyanyat ai pulalaingenia sarania. Sarapei mitsá ka sia panyanyat senenda tá makeré pulalaingenda

⁴² Kisedda leú te galainia ka sia sitususuru mitsá ka simamatei. Tubu simamatei néné, iaté tubu simabuteket, tápoi tubu sisuruakenen geti, iaté tubu simatom

⁴³ Ka tetret aiturarateiaké tubu néné, makataí lé tubu néné, samba simasaggo lé nia; tápoi kelé itusuru mitsá tubu

néné, bailiunangan nia tubu simalainge
samba simaron

⁴⁴ Ka tetret aiturarateiaké, tubu néné,
tubu sibara ka polak. Tápoi kelé itusuru
mitsá ka simamatei, bailiunangan tubu
néné tubu sibara ka Ketsat Sipunenan'an
lé. Oto, ai tubu sibara ka polak, ai leú et
tubu sibara ka Taikamanua

⁴⁵ Ka Buko Sipunenan ai atusurat'aké
kisé, "Sirimanua siboikí iaté si Adam,
bailiu mahluk sipuririmanua, tápoi
Adam sikatei-tei geti, iaté Ketsat siaké
purimanuaiat.

⁴⁶ Siooi siboikí iaté siripot putubuat
sirimanua lé, tá siripot puketsanan.
Kateiteian lé aoi ka sia siripot ketsat

⁴⁷ Ka sia si Adam siboiki ka polak lé
aitubaraaké, tápoi ka sia geti Adam
sikarua, ka manua lé aibara

⁴⁸ Sirimanuan polak, makeré lé sia ka
tubut Adam siboikí sibaraakenen ka
polak, tápoi sirimanuan manua geti,
makeré lé ka tubut Kristus sibabara ka
manua

⁴⁹ Kelé kipa sita kineneiget makeré kelé
si Adam sibaraakenen ka polak, tápoi
lepá bailiunangan sita kelé Kristus sibara
ka manua

⁵⁰ Kukukua sené geti ale kam Sasaraina, iaté néné: tubutta sibara ka akkulá sambat logau néné, tá momoi itugurú ka Laggai Taikamanua Sibau; ialeú et tubu simamateiet néné, tá ibabailiu nia simatom

⁵¹ Oto arep'aké peite kam keleat néné: tá te sangamberitta ilalangó, tápoi sita sangamberitta néné isisiliy tubutta

⁵² Bulat sangapeí-peikat mata lé ruei nia isiliy tubutta néné ka tetret ipunau pipiau pasilepá. Aipoí kelé raarep nia nga-ngan pipiau, suruakénangan sia Taikamanua, sirimanua simamatei, sibara tubu simatom; iageti sangamberitta siliynangan tubutta

⁵³ Oto tubutta simamateiet néné, buítá tusiliy nia tubu sitaimamateiet; iageti tubu sibara ka polak néné, buítá tusiliy nia sibara ka manua

⁵⁴ Ké atusiliyan tubutta simamateiet néné, tubu sitaimamateiet, samba atusiliyan tubu sibara ka polak néné, tubu sibara ka manua, iapeité puailinangan kelé sitususurat ka Buko Sipunenan, sipasikukua kisé, "Atutatáakéan kamateiat, abarangan kamanangan!

⁵⁵ "Kaipangan né nia kamanangannu, oi ekeu kamateiat? Kaipangan né nia pasorom, oi ekeu kamateiat?

⁵⁶ Pasorot kamateiat, iaté jo; oto ka sia itaddaaké ipugalai jo, paneiteiatnia iaté surukat ka arat

⁵⁷ Tápoi bulat surá lé takua kam ka Taikamanua, aiaké ka sita kamanangan sisilóta kai Tuhan Jesus Kristus

⁵⁸ Oto kalulut néné, ale kam Sasarainangku, simanuntut bagakku, kau imaron paatuatmui, elé kau imariuri putotonem bagamui ka tubut Kristus. Bulat kau sibara ka muinet paatuatmui nugalaiaké kam galajet Tuhan, aipoí anuagaian kam taipusisiboboinia nupugalai kam galajet Tuhan.

16 ¹ Oto kineneiget kelé pagalaiat bulagat panguruat kaunenmui ka tubudda saalei pasasamba tai Kariten, kukua ka matamui, bulé nugalaiaké kam nia néné, kelé enungnia sikuakku ka matadda sapaamian Galatia

² Iaté, bulé senen gogoi menggui, keleiakémuian goisó bulagat sibara ka sene-senemui siripot igit sinesemui. Koirímuian nia, teret oiku, bulé oi aku táan turururúaké

³ Amoian geti aku, koiniakékungan sia sieei masitaroaké, iaté sia sinaúsaúmui. Ai leú kukau surat abbinenda, bulé rataroaké panguruat néné ka Jerusalem

⁴ Tápoi ké geti tuitsó buítá mei lé aku sambamai, ei aku kupaalei sia

⁵ Oto ai leú kuoi kubalou kam barakku ka Makedonia, ai lé poí ibabagai bagakku tusappai sedda

⁶ Elé mukuddu aku goisó sedda ka kam, teret itukapplu gogoi simaleppet. Lepá geti rop'akémuian aku kuriu-riuaké puenungananku ka kudduat bagei

⁷ Táan lé kuobá kubalou kam tulungan lé kutusappai, tui aku. Ké iteúaké baí nia si Tuhan, kuobá imakaburú goisó kukuddu ka tubumui

⁸ Ka oggak néné, ai lé aku mukukuddu sené ka laggai Epesus, teret ailina gogoi Katuuruat Ketsat Sipunenan

⁹ Maigi tetre simaerú sené masigalai galajet sibaraaké katuerukat, kenanan baí maigi sia sipasisasaggangi aku

¹⁰ Ke moi nia sedda si Timoteus, kau imalelek nusiló kam nia, bulé imaangká bagania mukuddu ka talagamui, aipoí nia néné, sipugagalai galajet Tuhan lé; kelé aku leú et

¹¹ Buí ibara siputató nia si Timoteus néné. Bulat rop'aké kam nia, ioi iriu-riuaké puenunganannia itoili mitsá ka tubukku ka angkat бага, aipoí bulat aikungengana sia raoi sambadda saalei sabagei

¹² Pagalaiat sarainanta geti si Apollos, bulat piga ngamitsáan pá akukua ka matania ioi masibalou kam, sambat saaleita sabagei. Tápoi tápei bulat aikakaroni бага kaooinea ioi kineneiget. Tápoi ké bara geti oggaknia, kirénangan momoi nia

¹³ Bulat kau imariu-riu nusuk-suk kam tubumui, samba kau imaron pupaaturanmui siripot sipuoni tai Kariten. Kau numagege kam nugalaiaké kam galajetmui, samba leú paron kam paatuatmui

¹⁴ Kau nugalaiaké kam nia sangamberi galajetmui, ka nuntut бага

¹⁵ Ale kam Sasarina, kirénangan nuagai kam nia si Stepanus sangalalepra; sia té néné amu-Kariten siboikí ka laggai Akaya. Ka muinet paatuatda rapasikeli bulat sarat sapaamian Taikamanua

¹⁶ Bulat paniddogatku ka kam, bulé maredet kam ka nga-nganda sia kelé

néné, samba nga-nganda sabagei,
saaleira sipugagalai simakeré samba leú
et aleira masipuukú galajet

¹⁷ Bulat mangká bagakku masisiló
kaoaira tai Stepanus, Portunatus samba
leú et tai Akaikus

¹⁸ Bulat simakopé angkat bagaku lé
aragalai; kupaatu kisedda leú te angkat
bagamui ka kam, alé kam sasaraina. Oto
buitá tahargai sia kelé néné

¹⁹ Segé salamra sapaamian ka Asia ka
tubumui, ale Sasaraina. Beri leú et ka sia
si Akuila sambat si Piriskila samba leú
sapaamian siparururú ka lalepra, segé
salamra simakopé igi ka tubumui, kelé
sara oniakenen salamra tai Kariten

²⁰ Beri leú et ka tubumui ka kam
sangamberimui sapaamian sikukuddu
sene leú, segé salamra. Bulat kau
nuparoro kam pasasambamui ka ngelei
baga, siripot pusasarainanta ka sita tai
Kariten

²¹ Iageti sené, kutuppai leú et kaku
salam bulat sisurat'akenenku kaku:
Salam sibara kaku, Paulus

²² Sitaimanuntu бага ka tubut
Tuhan Jesus, eddangan nia iukum'aké sia

Taikamanua! Maranata -- katukolobatnia,
Olaaké nuoi oi Tuhan

²³ Bulé isukat'aké kam Tuhan Jesus

²⁴ Kau ipaalei kam nuntut бага, kam
sangamberimui simatonem бага ka
tubut Jesus Kristus. Sibara ka kai, Paulus

2 Korintus

1 ¹ Ale kam Sasarainamai sapaamian Taikamanua ka Korintus sambat sangamberi sapaamian ka Akaya. Aku néné si Paulus, apostel Jesus Kristus sipauddetnia siripot teú bagat Taikamanua, sambat aleita si Timoteus, bulat kukaroni kai бага

² Bulé ipanukani samba ibujai kam Ukkuita Taikamanua sambat Tuhanta Jesus Kristus

³ Tuumun'aké lé Ukkuita Taikamanua sambat Tuhanta Jesus Kristus. Aipoí bulat simaerú бага lé nia Ukkuita néné, samba nia leú te néné Taikamanua sipasikakau ka sirimanua puroron paatuat

⁴ Nia lé amasiron'aké paatuatmai ka kai masiom'aké sangamberinia pangoringan siooi ka tubumai, bulé puroron sisilómai sibara ka Taikamanua néné, bailiu oi leú ka kai kuparon kai pupaatuananda ka sia sangamberidda sabagei, siorik pugejaat бага

⁵ Ka kai leú et, amaingingan akuorik kai pangoringan kelé siorik Kristus. Oto kalulut Kristus, bulat kopé aimaron pupaaturanmai ka kai

⁶ Oto ké kuorik kai paoreat, néné masiparon paatuatmui lé, sibailiu katuaragatmui. Ké turon'ake ka kai paatuatmai, oto paatuatmui leú et ka kam turoron'aké, pat bara om bagamui masiorik pugejaat бага, kelé siorikmai ka kai leú et

⁷ Tá aimarurua bagamai ka tubumui, aipoí ai lé kuaagai kai kerénia tapangorik kam sambatta. Oto nia leú te né lulunia ituroron'aké ka kam, bulé tamakeré kam

⁸ Ale kam Sasaraina! Bulat kuobá kai nuagai kam nia pangoringan siorikmai ka Asia. Aipoí pangoringan siorikmai nenda, bulat amabesían ka tubumai masibairat, pat táan akukaroni kai бага murimanua

⁹ Bulat akuoniakéan lé kai nia kelé sara ukuman simateiakenen. Tápoi ipuaaili kelé néné geti ka tubumai, bulé buí kukaroni kai бага tubumai, tápoi sarat masikaroni lé Taikamanua, sipasisusuruaké sirimanua simamatei

¹⁰ Nia té amasibelaaké kai ka kamateiat bulat kalotóakenen simakopé néné.

Samba nia leú te masibebelaaké leú kai mitsá ka gogoi sibabara; aipoí, sarat ka tubunia lé kupukakaronan kai baga

¹¹Matonem bagamai, kalulut titiddouakémui kam kai ka Taikamanua, belaakénangan kai mitsá Taikamanua ka pugejaat baga. Aipoí matarek lé nia ka sia Taikamanua masisukat'aké kai, kelé sara alegiat paniddogatda simaigi, masitiddouaké kai; samba kalulut néné maigiddangan sirimanua sipasikukua surá ka tubut Taikamanua

¹²Bulat abeu ka paatuatmai, kalulut aipatonem bagamai pupaaturanmai ka baga, masikua, sangamberinia puririmanuamai ka polak néné, kelé patabbaratmai ka tubumui ale kam Sasarainamai, akuenung'akéan kai bulat sibara ka linat paatuatmai. Ka pasigagalaiakémai nia leú et, tá siripot ka pusisikut paatuatda sirimanua, tápoi siripot puaagai sipanguruat'akenen Taikamanua ka tubumai lé

¹³Oto sisurat'akenenmai ka kam néné, iaté sarat sioi nubatsa lé kam; elé sarat sioi isak-sak ka bagamui lé. Tápoi kineneiget, tá mamuiné kolou ka bagamui sangamberinia sikuamai;

tápoi kukaroni бага, bulé bulat imakolou ka bagamui ka sikuamai ka matamui. Oto bailiu ka gogoi sibabara, iaté ka kaoijanan Tuhan Jesus ka gogoi sibabara, angká bagamui kalulumai. Kisedda leú et ka kai puangkámaian бага kalulumui¹⁴ (1:13)

¹⁵ Ka putotonemku бага kelé nenda te siboikí akuisiaké moi kubalou kam, bulé nusiló kam panukanan Taikamanua rua ngaoleat iginia

¹⁶ Bulat aikuiisiaké kuoi kubalou kam, ka kaoijananku masibalou tai Makedonia. Iageti ka toiliatku mitsá kuddu aku sedda ka tubumui, bulé nurop'aké kam aku, ioi kuriu-riuaké puenungananku ka Judea

¹⁷ Tápoi akusiliyan lé isiatku néné. Tápoi tá pá nenda masikua taimasariana sipinaatukku? Ka tetret aibara isiatku néné, ka siobat bagakku sarakku lé pá kupuisi, tá mauju kuakkungan, "Kauan", tápoi tá mauju mitsá kuakkungan, "Tá"

¹⁸ Bulat ka Onin Taikamanua bulat katonemiet бага, palelenganku ka tubumui ale kam Sasarainamai, tá pagalaiat, "Oo," elé, "Tá.

¹⁹ Aipoí Jesus Kristus, Togat Taikamanua, sisegéakenenda ka

matamui tai Silas, elé tai Timoteus
samba sisegéakenenku kaku leú, tá
sirimanua "Oo," sambat "Tá." Tápoi
sibailiu alegiat "Oot" Taikamanua lé

²⁰ Aipoí kalulut Kristus kuanangan, "Oo"
Taikamanua, ka sangamberi pakerekat
baga sigalainia. Masiloulogi néné leú
te takukua kam, "Amen" ka tubut
Taikamanua, kalulut Jesus Kristus. Iageti
kugagalaiaké kai nia kelé néné, bulé
itulatsat'aké Taikamanua lé

²¹ Aipoí bulat tubut Taikamanua lé,
amasikau kai sambat kam ka kam,
patabbra simaron ka tubut Kristus. Oto
nia leú te amasipiliy sita ibailiu sita
kilibet bagania

²² Kalulut néné, sah'ake'nangan sita ka
sita, bailiu bakkatnia, samba akénangan
leú Ketsat Sipunenan ka bagat paatuatta,
kelé jaminan tasiló kam sangamberi
sitonéakenennia

²³ Oto Taikamanua lé saksikku, ai lé
poí iaagai bagat pupaaturananku. Tá
aipuriu-riu geti akuoi kubalou kam ka
Korintus, kalulut taiobáku lé nupureu-reu
kam бага

²⁴ Tá kupapaksaaké kam ka pagalaiat
katonemietmui; aipoí bulat amaron'an

tonem bagamui ka tubut Kristus. Sarat masipaalei kam tapugalai simakeréan lé, bulé memei itu-tuppai angkat bagamui.

2¹Oto kalulut néné te, aibara paatuatku tá akuoi kubalou kam, buí ibara pureuregat bagamui

²Aipoí ké kubaraaké pureuregat bagamui, kaseian lé ipususui bi bagakku kaku, ké tá sia leú et sikauku mureu-reu бага

³Iaté lulunia akugalai suratku néné ka tubumui. Tá kobá kubalou kam, babara nuaké kam pureuregat bagakku kaku, oto siripokatnia, kam lé iaangkáaké bagakku. Aipoí ai lé kuaagai, ké maangká bagakku, mangkánangan leú et bagamui ka kam sangamberimui

⁴Bulat ka reu-reu бага elé ka sanet paatuat samba bulat ai lé bebela elukku simigi, akugalai suratku néné ka kam. Tápoi tá te masikua bulé nupureu-reu kam бага ka kam, tápoi bulé nuagai lé kam nia, kopet beunan nuntut bagakku ka tubumui

⁵Ké ai sia sibaraaké pureuregat бага, tá ka tubukku aigalaiaké nia, tápoi ka tubumui lé sangamberimui, elé simatatánia ka tubudda ilétalaga ka

talagamui. Tá kobá imalippat kuanenku ka tubunia

⁶ Ka sia kelé néné, metnangan nenda ukuman siorak'akenenda ka tubunia piga pá ka talagamui

⁷ Oto kineneiget buítá nuappéaké kam selenia, samba kau lé nuparon kam pupaatuanannia, buí imakopé reu-reu bagania, mabebelé bagania

⁸ Kalulut néné, paniddogatku ka tubumui, bulé nupatoilá kam mitsá ka tubunia, bulat kopet punununtut bagamui ka tubunia

⁹ Masisibo kam te nenda akugalai suratku ka tubumui, masiitsó ai leú pá maririu-riu numareddet kam ka sikuakku ka matamui

¹⁰ Aipoí ké nuappéaké kam seleda ka tubumui, oto aku kaku leú et, appéakékungan seleda ka sia. Siappéakenenku poí kaku, ké ai baí sia appéakenen, ka matat Kristus lé kuaapéaké nia, sibailiu katuerukatmui lé

¹¹ Kugagalaiaké geti nia kelé néné, bulé tá anai oggak ka Sanitu ikup-kup'aké sita; ai lé poí taaagai kam sipinaatunia

¹² Kelé akusegé ka laggai Troas, masipaarep Katuareman Simaerú

pagalaiat Kristus, aibukáan si Tuhan enungan bulé kupugalai sedda

¹³Tápoi tá mangká bagakku mukuddu sedda, kalulut tá apaaili kai sarainanta si Titus. Kalulut néné, tiddoukungan mutuitui ka tubudda sikukuddu sedda; iageti eikungan leú et ka laggai Makedonia

¹⁴Tápoi bulat suráan lé takua kam ka tubut Taikamanua! Kalulut mariu-riu ipalulu kai kuei kai ka pugittebat kamanangan Kristus, kalulut patabbaratmai ka tubunia. Aipakei poí kai Taikamanua, bulé imararat Katuareman pagalaiat Kristus néné, kelé galai ipupingó simasingin ka senen kudduat

¹⁵Aipoí kai néné ka kai, kelé singin kamenyan silabóakenen Kristus, buluakenen ka tubut Taikamanua lé. Tápoi sia geti subuakenen, kai néné kelé beu tubut kamateiat sipasimamatei lé kai, ka tubudda. Ka sia geti arauakenen, kai néné, kelé singin purimanuaiat lé kai katubudda. Oto kaseian lé simaró бага mugalai galajet néné

¹⁶(2:15)

¹⁷ Aipoí kai néné ka kai, tá makeré kai ka tubudda sirimanua sabagei, sibailiuaké Katuareman Simaerú sibara ka Taikamanua néné, kelé bibilet pusakiet. Tápoi ka kai geti, simaerú lé besíakenenmai, aipoí kai néné sikoiniakenen Taikamanua lé kai. Ai lé iigbuk kai Taikamanua kupakakra kai Katuareman Simaerú siripot galajetmai sipuoni pagugulet Kristus.

3 ¹ Taleú pá ai lé kuumun'aké kai tubumai mitsá? Elé ai lé kubebesíaké kai surat katuumun ibara itsóketmui, elé surat katuumun sibara ka kam, kelé sibesíakenenda sabagei

² Kam lé surat katuumunmai, sitususurat ka bagat paatuatmai; momoi raagai nia sirimanua, elé momoi rabatsa nia sangamberi sirimanua

³ Bulat tubudda poí masiitsó; kam néné, iaté sara, surat sinurat'akenen Kristus, sikirim'akenenia ka onimai. Tá tinta atusurat'aké ka surat nenda, tápoi sinurat'akenen Ketsat Sipunenan sipuririmanua lé. Iageti tá ka leí aitusurat'aké, tápoi ka paatuatda sirimanua lé

⁴ Kukukua kai nia geti kelé néné, kalulut kakatonemimai nia бага Taikamanua, kalulut Kristus

⁵ Bulat beri te sara sibabara ka tubumai sibailiu atsiakenenmai, masipatoilá kaooinea kugalaiaké kai galajet néné; tápoi Taikamanua lé aiaké ka kai puaagai masigalaiaké galajetmai

⁶ Nia lé airop'aké kai aoi aibailiu kai sipugagalai ka sara galajet pakerekat бага sibau; iaté pakerekat бага sibau siloulogi sarat Ketsat Sipunenan; tá ka tubut surukat silepá surat. Aipoí sitususurat nenda sibaraaké kamateiat lé; tápoi ka sia geti Ketsat, sibaraaké purimanuaiat

⁷ Ka tetret aitugalai elé aitutataká ka sia nenda pakerekat бага sibaraaké kamateiat néné, bulat latsat lé torot patot Taikamanua ka matat Mose. Oto kalulut kopet patot toronia, pat taioinangan rakinere matat Mose tai Israel, kenanen aian ilelebbeu toro ka matania ka tetret nenda. Oto ké beringan pasigalaiat pakerekat бага sibaraaké kamateiat, ka pulatsanan sabeu lé aituresmiaké

⁸oto sarapeite kopet latsatnia ka sia aituresmiaké pakerekat бага siaket Ketsat Sipunenan néné

⁹Ké beringan pakerekat бага sibaraaké katuukumanda sirimanua, bulat amakopéan latsatnia, oto sarapeite bulat kopet latsatnia ka sia pakerekat бага sikau sirimanua paerú mitsá ka tubut Taikamanua

¹⁰Momoi takua, sangamberi simalatsat siburú, táan amalatsat mitsá, kalulut aibara simalatsat kineneiget

¹¹Ialeú et, ké beringan sitaimatom, amakopéan latsatnia, sarapeite kopet latsatnia ka sia simatom

¹²Kalulut kababaranian pukakaronanmai бага kelé nenda, bailiu bara rot bagamai masitiboi kelé néné

¹³Aipoí kai ka kai néné, tá makeré kai kelé ka sigalaiakenen Mose, itabbó matania komang, bulé tá raitsó tai Israel ipé elé itatá torot Tuhan, ka matania

¹⁴Paatuatda atupin'an. Pat aili kineneiget, ai peilé tupipin paatuatda, itabbó nia komang; sarapei ka tetret rabatsa buko pakerekat бага siburú. Tá tububuká tabbó nenda, teret patabbradda ka tubut Kristus

¹⁵ Oto beri leú et kineneiget, ai peileú itatabbó paatuatda, ké rabatsa bukot Mose

¹⁶ Tápoi ké moi geti sia kai Tuhan, iapeité bukkaiaké tabbó néné ka matadda

¹⁷ Tuhan, kuanennia sené, iaté Ketsat. Oto kaipa ikuddu Ketsat Tuhan, sedda ai puujaat

¹⁸ Oto kineneiget táan aitatabbó matatta sangamberitta, tápoi atasorobek'akéan lé kam pulatsanan Tuhan Jesus. Iaté lulunia tá ipuaari isiliy tubutta néné, bailiu keré kelé nia; memei mabuburú, memei itutuppai latsatnia. Ka Ketsat lé poí kabariaiat latsatta ka sita néné. Aipoi si Tuhan lé Ketsat néné.

4 ¹ Bulat kalulut aggai bagat Taikamanua lé akugalai kai galajet néné. Iaté lulunia tá itatakkí ka paatuatmai

² Tá akuenung'aké kai galajet sipinalipput sibaraaké katuailaatta. Bulat tá kuobá mugalai ka pajoat elé kupabailok kai tiboiet Taikamanua. Tápoi bulat ka linat paatuat lé kupuukú kai galajet Taikamanua, siripot ka teú bagania. Oto iaté lulunia bulat

kukakaroni kai nia бага, bulé nunilai kam kai bulat sibara ka linat paatuatmui leú et

³Oto ké tápei aimakokolou ka bagadda pagalaiat Katuareman Simaerú sinegéakenenmai nenda, kolou sarat siangan lé siailiaké katukataikat'an lé tá makokolou ka бага

⁴Aipoí nia nenda Bulungan Sanitu sikataí paraboat sipasikukup-kup'aké polak néné té, masitatabbó pupaaturananda sitaimatonem бага. Nia té masipasasailaji sia, bulé tá raitsó patot Katuareman Simaerú pagalaiat pulatsanan Kristus, kelé sara tularat putubuat Taikamanua

⁵Oto sipinaarepmai néné, tá katuareman pagalaiat tubumai. Tápoi katuareman pagalaiat tubut Jesus Kristus lé; masimuneng'aké ka kam, si Tuhan lé nia. Oto kai néné ka kai, bailiu paguguletmui kalulut Kristus

⁶Aipoí bulat tubut Taikamanua lé poí amasikua kisé, "Kau iputoro pató ka simagep-gep." Samba Taikamanua leú te masibabaraaké pató ka bagat paatuatta, imapató paatuatta, ioi takeruji

pulatsanan Taikamanua siputotoro ka matat Kristus

⁷Tápoi oniakenen pukayoat puketsanan simalainge néné, akukauan lé kai nia ka tubumai sitá katupunan néné, iaté tubu sibara ka abut polak. Oto sené toilá ka Taikamanua lé kabariaiat pubeunanan geget Katuareman Simaerú néné; tá sibara ka kai

⁸Bulat araokkip'an kai rasaggangi kai; tápoi tá atulaptip kai. Aipaingongan kai taiagaimai peruketmai, tápoi tá akukua kai, oto paan leú

⁹Maigi sia sisaggangi kai, tápoi tá amusara kai. Kenanen marei-rei rapabóboki kai pat kalapui, tápoi tá amatei kai

¹⁰Senen tetre lé iagai tubumai ka kai kamamatei, kelé kamateiat Kristus, bulé puririmanuania leú matoilá ka tubumai

¹¹Ka sanganantat purimanuaiatmai, sarat itaiko lé kai kamateiat, kalulut Jesus, bulé tupatoilá puririmanuan Jesus ka tubumai simaanaget néné

¹²Néné masikua ka tubumai, bulat ainunú-nú kai kamateiat, tápoi bulat maangká bagamai kalulut ka tubumui

ka kam, aian itataddaaké ipugalai
purimanuaiat

¹³ Ka Buko Sipunenan, ai atusurat'aké
kisé, "Kalulut tonem bagakku,
panibokkungan." Oto ron putotonem
baga kelé nenda leú te, kupaninibo kai
ka kai, aipoí kukakatonemi kai nia бага

¹⁴ Bulat seget kopet tonem bagamai,
kelé kipa aisuruaké Tuhan Jesus,
Taikamanua ka kamateiat, kisedda
leú te isuruaké kai ka kai Taikamanua
sambat Jesus; iageti taroakénangan sita
sambatta ka matat Jesus

¹⁵ Sangamberinia néné, sibailiu
puuktunganmui lé. Aipoí ké memei maigi
sia masinanam katet bagat Taikamanua,
memei maiigi leú te sia sipasikukua
surá ka tubut Taikamanua, oto bailiu
tuumun'aké Taikamanua

¹⁶ Iaté lulunia tá ipepé ka paatuatmai.
Kenanen baí kai néné siripot ka
pusirimanuaat memei lé makakataí,
tápoi ka paatuatmai geti ka бага, riu-riu
lé itubauaké senen gogoi

¹⁷ Kelé pugejaat бага sitaimakopé
néné, siorikmai ka oggak siteté néné poí,
masibaraaké lé ka kai puuktungan sabeu
samba simatom. Aipoí puuktungan

nenda peilé bulat maabeu, belé peilé ka tubut pugejaat бага nenda

¹⁸ Ka kai poí tá aikupuleletsei kai apa simatotoilá, tápoi sitaimatotoilá lé. Tá matotom nia ka sia nenda simatotoilá, sitaimatotoilá nenda lé matom teret buru-burú.

5 ¹ Aipoí ai lé kuaagai kai, ké turagat lalepta ka polak néné, iaté tubutta, tarek'akénangan ka sita Taikamanua sara lalep ka manua, bulat sigalai kabeinia Taikamanua, simatom teret buru-burú

² Sarat muhoi-hoi lé tagagalai kam ka bagat lalepta kineneiget. Aipoí tapuhohoi-hoi kam, kalulut ngelei bagatta tarepdem kam mei mukuddu ka lalepta ka manua

³ Lalep nenda te, oniakenen tubutta sibau

⁴ Oto kaburut tapulalep kam ka lalep sibara ka polak néné, sarat muhoi-hoi lé tagagalai kam, kalulut sanénia bairanenta. Tá poí masikua tagelai kam tabela kam ka tubutta sibara ka polak néné; tápoi matei bagatta lé bulé tapakei kam tubu sibabara ka manua, bulé

ikup-kup'aké nia purimanuaiat ka sia tubutta simamateiet néné

⁵Aipoí bulat tubut Taikamanua lé ipatatarek sita ka sangamberinia néné; iaké Ketsatnia ka tubutta kelé sara jaminannia

⁶Iaté lulunia imaririu-riu ronnia paatuatmai. Kirénangan ai lé kuaagai kai reunanmai ka lalep kuddujietmai sambamai Tuhan, kalulut kukuddumai peilé ka tubumai

⁷Aipoí puririmanuamai ka kai néné, sarat mubongen ka putotonem bagamai ka tubut Kristus lé, tá ai kai mubobongen ka simatotoilá

⁸iaté iooi kupaom kai bagamai. Bulat ai lé mamatei bagamai kubela kai ka tubumai néné, bulé ioi kukuddu kai sambamai Tuhan

⁹Oto iaté lulunia bulat kubebesiaké kai kuangkáaké kai bagania, ka tetret ai peilé kai mukukuddu ka lalepmai sené, elé sedda

¹⁰Aipoí tá isoppi tuabbít sita sangamberitta néné ka matat pengadilan Kristus. Oto senenta masisiló upa, siripot sigalaiakenenta ka polak néné, simerú pá atagalai kam, elé sikataí

¹¹ Kuagai kai katukolobatnia mulotó ka tubut Tuhan; iaté lulunia kubebesiaké kai kuná-ná kai paatuatda, bulé rakatonemi sikuamai néné. Aipoí bulat mamuiné againa kai Taikamanua. Oto bulat aikukakaroni kai бага, bulé nuagai leú kam kai ka kai ka багат paatuatmui

¹² Tápoi tá tebai masikua bulé nuumun'aké kam galai tubumai. Sarat masipakolou lé ka kam sipulelelek, bulé imaabeu ka paatuatmui ka tubumai, nuagai kam masikua ka matadda sipasiiitsó sarat ka putubuat sirimanua, tá masiitsó ka galai tubudda

¹³ Kai geti ka kai, kirénangan tedda nuitsó kam nia, airoróan kai. Néné kalulut galajet Taikamanua lé. Iageti mitsá ké nuitsó kam kai makolou pupaaturanamai, néné, kalulumui leú te

¹⁴ Aipoí aikup-kup'akéan kai nuntut багат Kristus, samba ai lé kuaagai kai, kamamatei nia sara sirimanua punu tubut sangamberi sirimanua; oto momoi takua, sangamberit sirimanua amateian sia

¹⁵ Amateian Kristus punu tubudda sangamberi sirimanua, bulé sangamberi sirimanua sipuririmanua, táan

murimanua saradda, tápoi murimanua ka Kristus'an lé, iaté simamatei samba sisuruakenen Taikamanua kalulutda

¹⁶Oto kalulut néné, táan kuninilai kai sia sirimanua siripot ka pusirimanuaat. Ka panandaatnia tedda, akunilai kai nia ka sia Kristus siripokat ka pusirimanuaat, tápoi kineneiget geti, táan akugalaiaké kai kelé nenda

¹⁷Aipoí sangamberi sipatatabbra ka tubut Kristus, bailiu bulat sirimanua sibauan lé sia. Tubu siburú néné, tatá, amabauan sangamberinia

¹⁸Tápoi sangamberinia néné, Taikamanua lé amugalai. Taikamanua lé aipaerú mitsá patabbaratta ka tubunia, kalulut Kristus. Tápoi lepá, koiniakénangan sita ka sita takau sia ka sia sabagei, paerú mitsá ka tubut Taikamanua

¹⁹Singantoman'akenenmai, iaté, aipaerúan mitsá Taikamanua patabbaratda sirimanua ka tubunia, kalulut Kristus. Iageti ka pasigagalaiakéna néné Taikamanua, tá aigaba selet tubudda sirimanua, sigalaiakenenda ka tubunia. Oto aikoiniakéan kai Taikamanua

masipakakra Katuareman Simaerú
néné

²⁰ Oto kai néné iaté sapakoiniet Kristus. Bulat tubut Taikamanua te amasisegéaké patonekatnia; tápoi kai masisesegéaké ka kam. Ka onin Kristus, kunáná kai kam simakopé, kau nusiló kam panguruat katet bagat Taikamanua, sikau kam paerú mitsá ka tubunia

²¹ Bulat beri te sara jot Kritis. Tápoi aikau peilé nia Taikamanua, masibairat jotta, bulé ioi tapaerú kam mitsá ka tubut Taikamanua, kalulut patabbaratta ka tubut Kristus.

6 ¹ Sikeré kabei lé kai Taikamanua mugalai galajet; oto nia té lulunia kutitiddou kai simanáná ka tubumui, bulé buí nupasibbu kam nia erut bagat Taikamanua néné

² Ka Buko Sipunenan, ai aikua Taikamanua kisé, "Ka tetret iteú bagakku, akuarepingan ekeu, samba leú et ka tetret gogoi pasiaragat, akurop'akéan akeu." Oto kau nulelek'aké kam nia néné, kineneiget'an te gogoinia teú bagat Taikamanua. Elé, kineneiget'an te gogoinia pasiaragat

³ Bulat tá kuobá kai raseleaké kai ka pupasikelananmai. Iaté lulunia kubebesiaké kai nia, bulé tá bara kuanenda kasei pá, ioi raseleaké kai

⁴ Tápoi mitsá ka sangamberinia néné, kupatoilá kai pupapagugulet'akéna kai Taikamanua. Aipoí akuorik'an kai sene ngamata pugejaat бага, ka om бага

⁵ arapaoreian kai, arapenjaraaké kai, arapurut'an kai raoi ralabá kai, akumomoakéan kai tubumai mugalai, bulat marei-rei tá kuperep kai, samba marei-rei leú et tá ibara kanmai

⁶ Bulat ka linat paatuat, elé bulat sipinagaba, elé bulat ka om бага samba ka erut бага lé kupatoilá kai pupapagugulet'akéna kai Taikamanua. Samba leú et sarat ka pukakaronan ka tubut Ketsat Sipunenan, elé ka nuntut бага simaliná

⁷ samba ka pasipaarepmai Katuareman Simaerú sibara ka Taikamanua, samba ka geget Taikamanua lé, kupatoilá kai, pupapagugulet'akéna kai Taikamanua. Teú bagat Taikamanua lé kupapakei kai kelé pamateimai masisaggangi elé masibela tubumai

⁸ Airahohormati kai, tápoi ai leú et rapalololoi kai; raumun kai, tápoi ai leú et rapulalagaji kai. Kenanen maroipo bagamai, tápoi raoniaké peilé kai simaboko

⁹ Rakua tá maabeu katuareman onimai ka sirimanua, tápoi raagai kai sangamberi sirimanua. Ka bagaddangan lé te amateian kai; tápoi ai peilé kai muririmanua. Kenanen rapaorei kai, tápoi tá amatei kai

¹⁰ Kenanen rabaraaké pureuregat bagamai, tápoi riu-riu lé kupuangká kai бага. Ituitsó simagebá lé kai tukukua, tápoi migi sia sirimanua akupakayo kai. Ituitsó kelé tá anai sibabara ka tubumai, tápoi siripokatnia geti, sangamberinia apa pá kai sibakkatnia

¹¹ Alé kam sasarainamai simanuntut bagamai ka paamian Korintus! Táan malipput kukua kai apa pá ka tubumui. Akubelaakéan kai sangamberinia sibabara ka bagat paatuatmai

¹² Tá aimamimit bagamai ka tubumui; kam lé mumimit бага ka tubumai

¹³ Eddangan nia kupanibo ka matamui kineneiget, kelé kukua kuanenku ka

matadda bulat bakkat tatogakku. Bulat buí numamit kam бага ka tubumai

¹⁴ Buí nuobá kam ibailiu kam mungkuatda sitaimatonem бага ka tubut Tuhan Jesus; tá paaakkup nia ka tubumui. Aipoí kaipa te ipaloló pueerú ka pukakataí! Tá momoi ipagalú simatoro ka simagep-gep

¹⁵ Bulat beri te pakeréna bagadda ruadda néné, Kristus sambat Sanitu. Aponia poi pakerekatnia tai Kariten ka tubudda taú sipuoni tai Kariten

¹⁶ Aponia pasakkunannia Uman Taikamanua ka kudduat sabulungan? Sita poí né ka sita, Uman Tuhan lé sita. Iaté Taikamanua sipuririmanua. Kalulut tubut Taikamanua lé amasikua kisé, "Memei te aku ka talagadda, pukuddukkungan sambamai sedda. Bailinnangan aku Taikamanuanda, bailiunangan leú et sia ka sia sikaumangku

¹⁷ Oto kalulut néné, katui-tui kam ka tubudda sitaiagai Taikamanua saraaké kam tubumui ka tubudda. Bulat buí nupatatabbra kam tubumui ka tubut kasit-sit'akenen oto iapeité silókungan kam

¹⁸ Pu-Ukkuimuian aku,
putatogakkungan leú et kam, nia
té néné sikuat Tuhan Sipulugege."

7 ¹ Ale kam Sasarainamai simanuntut
bagamai! Ka tubutta te ikukua
nia Taikamanua sangamberinia
patonekatnia néné. Oto kau tapaliná
kam tubutta ka sangamberi sipalolit
tubu sambat ketsatta. Kau takalotóaké
kam Taikamanua, bulé ioi ibailiu sita
bakkatnia sikokoiaikenennia, simasut
pueerú

² Siló kam kai bulat ka bagat
paatuatmui. Bulat beri te sara selemai ka
tubudda kasei pá. Elé beri peite sia sara
akurugiaké kai. Bulat beri te gabamai
uktukmai ka tubudda kasei pá

³ Tápoi tá te masiseleaké kam kukukua
kelé néné ka matamui. Aipoí kelé ka
sikuakku siburú ka matamui, bulat
makaté bagamai ka tubumui, alei
tubumai lé poí kam néné, sikeré bakkou
rere lé sita ka purimanuaiatta

⁴ Bulat akukatonemingan te kai kam
baga simakopé. Elé bulat akuroroian
te bagakku ka tubumui! Kenanen
maigi akuorik kai pugejaat бага, tápoi

atupusuibingan bagakku kalulumui.
Bulat makopé angkat bagakku

⁵Ka tetret akusegé kai ka laggai
Makedonia leú, bulat tá leú amoi
akuariaké kai tubumai. Bulat kaipa
kukau kai tubumai, sarat ai lé pasailaat
nia; pasailaat sibara ka sabagei, iaté
pajoggolat. Iageti ka paatauatmai leú ka
kai, ain isusuggru kai pulolotó

⁶Tápoi bulat surá lé takua kam ka
tubut Taikamanua, kalulut aiparon
pupaatuananda simasaggo paatuat;
aisakkáaké mitsá pupaatuananmai,
kalulut kaooi Titus

⁷Aipusuibi bagamai geti, tá sarat kalulut
kaooi Titus masibalou kai, tápoi kalulut
kuarep kai, pagalaiat aitupusuibi bagania
ka sia kalulumui. Aisegéaké ka matamai,
repdem bagamui paaili ka tubukku.
Kalulut aiolei bagamui sigalaiakenenmui
siburú. Oto kineneiget, anuobáan kam
masirop'aké aku ka pakarokku. Iaté né
bulat imakokopé angkat bagakku

⁸Kenanen baí amareu-reu bagamui
kalulut aakéku suratku ka tubumui,
tápoi tá aiolei bagakku kaku aakéku
suratku ka tubumui. Kirénangan tedda,
aiolei bagakku, ka tetret akuarep

anupureu-reu kam бага, kalulut suratku siakéku ka tubumui, kenanen tá leú bulat amauju anupureu-reu kam бага

⁹Tápoi kineneiget bulat amaangkáan bagakku. Iageti kupuaangká бага нéné, tá kalulut purereu-reumui бага, tápoi kalulut reu-reu bagamui bailiu, bauakémuian paatuatmui. Aipoí siripot ka siobat bagat Taikamanua lé pureuregat bagamui нéné. Oto momoi takua, bulat tá akurugiaké kai kam

¹⁰Pureuregat бага kelé нéné poí, masipabau paatuatmui lé, sikau leú et kam ka katuaragat. Oto tá babara olei bagadda sirimanua kalulut nenda. Tápoi mitsá, ké baí pureuregat бага nenda paaakkup nia ka siobat bagadda sirimanua, páan, masibaraaké kamateiat'an lé te

¹¹Oto lelek'aké peite kam, aponia abara ka tubumui kapurereureumui бага siripot teú bagat Taikamanua! Abara ka tubumui, iaté, bailiu bulat besíakémuian masipalatsat simalimó ka talagamui! Bailiu masitsinmuian ka tubut jo, suggrunungan kam pulolotó, bara pungengelei bagamui masirepdem, bara leú et puroron ka bagat paatuatmui, élé

obámuian masiukum'aké sia sipusesele!
Oto ka sangamberinia sibabara néné,
masipatotoilá tai maselemui

¹²Iageti kenanen akuakéan suratku
ka tubumui, nenda tá te kaluludda
simasele, akugalai nia, elé tá ka
tubudda sipangongorik kalulut seleda.
Akugalai geti suratku ka kam, bulé
kam bulat tubumui masiseseseaké ka
matat Taikamanua, kopet beunannia
pasikelatmui ka tubumai

¹³Nenda té lulunia aitupusuibi bagamai.
Tá sarat pusuibiat бага abara ka kai,
tápoi sarapei kopet angkat bagamai
masiitsó kopet angkat bagania ka sia
si Titus, atupusuibi bagania ka sia
kalulumui sangamberimui, ale kam
Sasarainamai

¹⁴Akuumun'akéan sigalaiakenenmui
néné ka tubunia. Bulat surá lé kukua,
kalulut tá anupakaila kam aku. Aipoí
sangamberi siniboimai ka matamui,
bulat sineseatnia. Ialeú et, sangamberi
siumun'akenenmai galai tubumui ka
matat Titus, bulat sibulatnia leú et

¹⁵Oto kineneiget, memei makokopé
nuntut bagania si Titus ka tubumui,
irepdem purereddetmui ka pasikelatnia,

samba leú et sisilómui nia ka bagat hormat samba ka reddet

¹⁶ Bulat seget kopet angkat bagakku ka tubumui, kalulut momoi tukatonemi kam бага ka sangamberinia.

8 ¹ Alé kam Sasarainamai! Ka suratmai néné, kuobá kai kupaagai kai ka tubumui, kipa pueerut bagania Taikamanua ka tubudda sapaamian ka Makedonia

² Bulat arasilóan pasisiboat, iaté pugejaat бага simasané. Kenanen ai sia ka bagat pangoringan masiorik pugejaat бага, tápoi maangká lé bagadda, samba bulat maanggai bagadda masiaké panguruatda masirop'aké sabagei, kenanen bulat simagebá lé sia tukukua

³ Bulat makolou kuagai nia, siakéra néné, bulat teret siooi ka tubudda, elé momoi takua, aisabauan iginia. Tá anai sipasigugugluaké sia bulé rapupanguruat

⁴ Aratiddou simaron ka tubumai, ké moi baí nia, bule sambat sia masirorop'aké masikau panguruat ka tubudda sapaamian Taikamanua ka Judea

⁵ Arakauan, bulat pat saliunangan siripot nuntut sipinaatumai ka kai

akenenda. Siboikí segéakérangan
tubudda ka tubut Tuhan, lepá ka
tubumaian ka kai, siripot ka teú bagat
Taikamanua

⁶Iaté lulunia bulat imaroron kutubbui
kai bagat Titus, sipasitatadda galajet
néné, bulé iriu-riuaké galajet simaerú
néné ka talagamui

⁷Bulat kam lé umun'akenen ka
sangamberinia; Tuumun'ké kam
ka putotonem бага, ka pasikukua
sipinaatumui, ka puaagai, ka puaagai
masigaba sene ngamata purimanuaiat,
ka punununtut bagamui ka tubumai.
Oto kau leú tuumun'aké kam ka galajet
simaerú néné

⁸Tá kelé sipuoni parenta kukua nia
néné ka matamui. Tápoi masipatoilá lé,
kipa ronnia pupaaturananda paamian
Makedonia, masirop'aké pasasambadda
saalei. Ialeú et kaku, bulat kuobá leú
kuitso nia, teret kaipangan punununtut
bagamui ka kam

⁹Aipoí ka kam, anuagaian kam kipa
kopénia nuntut bagat Tuhanta Jesus
Kristus ka sita. Simakayo tebaí nia ka sia
néné, tápoi aikau lé tubunia simagebá,
ibara puuktunganmui, bulé kalulut

pugebakatnia néné, makayomuian leú et ka kam

¹⁰ Bulat ka sipinaatukku baí nia kaku, mateúan nulepáaké kam galajet sitaddaakenenmui ka rura silelepá. Aipoí kam lé siboikí amasipaatu samba amasitaddaaké galajet néné

¹¹ Oto taddaakéan kam nugalaiaké kam nia, teret siooi ka tubumui. Kau imaron paatuatmui masilepáaké galajet néné, kelé puroron paatuatmui siboikí ka tetret anupaatu kam masitaddaaké galajet néné

¹² Ké bulat sibara ka teú bagamui nupupanguruat kam, silónangan leú et panguruatmui Taikamanua, siripot sibabara ka tubumui, tá siripot sitá anai ka kam isisiló

¹³ Tápoi tá te masikua bulé rabela sabagei ka tanggung jawab, bulé itusanéaké sarat ka tubumui. Tápoi kalulut ituitsó kineneiget amaingingan sibabara ka tubumui. Oto mateúan nukau kam panguruatmui masirop'aké simagulai ka sia. Oto ké ké kam'an tá anai, aiipóan imaigi sibabara ka sia, rop'akérangan leú et kam ka kam. Oto bailiu karuamui néné keré iturop'aké

¹⁴ (8:13)

¹⁵ Ka Buko Sipunenan leú, ai atusurat'aké kisé, "Sia simaigi sibabara, tá mususukkra, ialeú et, sia sitaimaigi sibabara leú, tá leú et magugulai apa pá.

¹⁶ Bulat surá lé kukua kai ka tubut Taikamanua, kalulut aiparon paatuat Titus mugalai galajet, pat keré ngamangmai mugalai

¹⁷ Aipoí ka sia kai Titus, tá sarat obána masigalaiaké apa siniddoumai ka tubunia, tápoi bulat ka ngamang lé irop'aké kam, pat bulat ka teú baganangan lé sarania, ioi masiamiaké kam

¹⁸ Iageti sené siooi sambadda tai Titus, iaté sarainanta sikoiniakenenmai. Nia néné ka sia bulat makopé rahormati nia sangamberi paamian, kalulut gagalaiakéna masipakakra Katuareman Simaerú sibara ka Taikamanua

¹⁹ Nia néné leú et, arapiliyan nia sapaamian samba arasaú-saúan nia masipaalei kai, ka puenungananmai. Aipoí ka kai leú et, mueenung leú et kai, masitaroaké panguruat néné, bulé tulatsat'aké si si Tuhan, nuitsó leú kam nia ka kam, obámai masirop'aké sabagei

²⁰ Bulat makopé kujago kai tubumai, buí ibara sijoaké kai ka pasisesegéakémai panguruat simigi néné

²¹ Kuobá kai masigalai galajet néné ka roipot бага, tá sarat ka matat Tuhan, tápoi samba ka matadda sirimanua leú

²² Tápoi ai leú te mitsá sara akukoiniaké kai masipaalei si Titus, sambat aleita nenda ka sia. Bulat piga ngamitsáan pá akusibo kai nia, tápoi toilá bulat marei-rei irop'aké saalei. Sarapeite kineneiget, bulat simakopé obána nia irop'aké kam, aipoí bulat makopé aikaroni kam бага

²³ Iageti kelé ka sia si Titus néné, nia té aleiku; sikeré kabei lé kai mugalai galajet masirop'aké kam. Samba leú et pagalaiat sia karuadda néné sieei masipaaleiaké si Titus, iaté sikoiniakenen paamian, sibailiu katulatsanan onin Kristus

²⁴ Bulat aikukakaroni kai kam бага, bulé nupatoilá kam nuntut bagamui ka tubudda, bulé raagai nia sangamberi paamian punununtukimui sia бага. Iageti sangamberinia siumun'akenenmai ka matadda pagalaiat tubumui leú et, bulat sibulatnia.

9¹ Siripokatnia táan leú kugagalai suratku masisegéaké pagalaiat panguruat sikau ka paamian Taikamanua ka Judea

²Aipoí akuagaian obámui masirop'aké saalei; pat bulat umunkungan kam ka matadda tai Makedonia. Oto akukua ka matadda, kam néné paamian ka Akaya, baranangan ka rura silelepá amatarek'an kam masikau panguruat. Oto kopet puobámui néné, bailiu maigi sia aitubbui бага ka talagadda ka sia

³Iageti kineneiget, aikoí sia saaleita si Titus sambat ka sia ruadda saaleita néné aleinia, akukoiniaké kai sia rataget'aké kam, bulé buí ipusisiboboi kelé, siumun'akenenmai pagalaiat tubumui ka tubudda tai Makedonia. Oto buítá nupatarek kam bulagat panguruatmui, aipoí akutonéakéan ka matadda. Akukua ka sia, anupatarek'an kam

⁴Aipoí ai lé maseseddé bagakku, baleú taiaagaietku, ai sia tai Makedonia situt'aké aku, ka tetret kuoi kubalou kam. Oto ké baí oi sia tápei anupatarek kam, apangante kopet ailamai ka tubudda, sarapei akutonéakéan kai ka matadda, tonem bagamai ka tubumui!

Kupaatu, beri leú et kam, mamaila leú et kam

⁵Iaté lulunia bulat akukoiniaké kai sia, rapuboikí ka kai masipagaba panguruatmui sitonéakenenmui ka kai. Iageti, akugalaiaké nia geti kelé néné, bulé ké iipó kuoi kubalou kam, anupatarek'an kam panguruatmui. Sedda te imatotoilá bulat ka angkat bagamui lé nururúaké kam bulagat, tá kalulut katukukua nia lé, kau

⁶Repdem kam néné! Sipasikakarap'aké karamen pagogoisó, goisó leú te buania ramomonei. Tápoi sipasikakarap'aké karamen simigi, maigi leú te buania ramomonei

⁷Oto senen tubu, buítá bulat sibara ka teú bagania rapupanguruat. Buí imatik-tik kabeinia masikau, buí taimalabbeinangan lé kaunangan nia. Aipoí bulat ipukakateki te sia бага Taikamanua, sipupapanguruat ka angkat бага

⁸Ai gege ka tubut Taikamanua masipanguruani kam panguruat sipususukkra, bulé imariu-riu ibara ka kam apa besíakenenmui; elé pat

pulegeinangan leú et, ioi nugalaiaké kam
simaerú samba mupanguruat

⁹ Ka Buko Sipunenan, ai atusurat'aké
kisé pagalaiat Taikamanua, "Ipauuruaké
te pukayoatnia ka simagebá; erut
bagania mariu-riu teret buru-burú.

¹⁰ Aipoí Taikamanua lé masitatarek'aké
karamen ka sipasikakarap'aké karamen,
samba leú et kanta. Iageti nia leú
et masipatatarek, elé masipaiigi
sikap'akenenmui, bulé ituppai leú
iginia buat anggai bagamui

¹¹ Oto bailiu táan anai sitaibabara
ka kam, pat mariu-riunangan ioi
nupanguruat'aké kam nia ka anggai
bagamui. Iageti panguruatmui
siparubeimai nenda, sikau migi
sirimanua masakua surá ka tubut
Taikamanua

¹² Aipoí kelé sigalaiakenenmui simaerú
nené, tá sarat masirop'aké simagulai ka
tubudda taikauman Taikamanua anugalai
kam, tápoi masakau migi sirimanua
masakua surá ka tubut Taikamanua leú
et

¹³ Oto ka pueerut bagamui
sitoiláakenenmui néné, bailiu
maigiddangan tai Kariten ka Judea

masiumun'aké Taikamanua, kalulut
raitsó topitmui masimuneng'aké
Katuareman Simaerú pagalaiat tubut
Kristus, tut'akenenmui néné. Samba
leú araumun'akéan Taikamanua kalulut
kopet anggai bagamui masiparubei ka sia
samba leú ka tubudda sangamberidda
sabagei, apa sibabara ka kam

¹⁴ Ratitiddouaké te kam ka tubut
Taikamanua, bulat tubut sibabara ka
nuntut bagadda, kalulut kopet erut bagat
Taikamanua ka tubumui

¹⁵ Oto kau takua kam surá ka tubut
Taikamanua, kalulut kopet beunan
panguruatnia ka tubutta!

10 ¹ Iageti kineneiget aku, sipuoni
si Paulus, ai segéakenenku
ka tubumui. Arakua aku sirimanua,
maleppet tiboietku ka tubumui ké ai sita
patutuggut mata; tápoi ké geti ai sita
parereunan, bulat malippat tiboietku ka
tubumui. Oto siripot puleleppet bagat
Kristus, elé pueerut bagania

² kutiddou ka kam simaná-ná, bulé
buí nuná-ná kam kukua kuanenku
simalippat ka tubumui, ké iaili tetrenia
kuoi kubalou kam ka gogoi sibabara.
Aipoí ai lé kubabagai kukua kuanenku

simalippat ka tubudda sipabara nga-nga, sikua pugagalaimai néné, siripot siobat bagat pupolongan lé

³Kirénangan tedda ai peilé kai mukukuddu ka polak néné, tápoi galaiakenenmai geti, tá siripot galajet pupolongan

⁴Pamateimai masigalai galajet néné leú et, tá pamatei sibara ka polak, tápoi tubut pamatei sibara ka tubut Taikamanua lé; iaté pamatei sibara ka tubu gege. Pamatei néné te kupapakei kai masipakataí pakekre-kekret pulippunan samba leú et masipet-pet'aké pajoggolat

⁵Elé masiragat'aké kekre pulippunan pubuangan tubu, sigalaira masisaggangi puaagai pagalaiat Taikamanua. Kupakabeki kai sipinaatudda sirimanua, bulé ramareddet ka tubut Kristus

⁶Oto ké amamuinéan purereddetmui, ka kai leú et, amatarek'an kai masiukum'aké sitaimareddet

⁷Kau nuagai kam masiritúaké sangamberinia sibabara, kipa bulat pulelengannia. Aipoí ké aikakatonemi nia néné, Kristus lé sibakkatnia, oto buíta ikua leú et ka tubunia ka sia, kai néné ka

kai leú et Kristus leú sibakkat kai, kelé nia ka sia

⁸Bulat tá maila aku ké kupaole kai masiumun'aké gege siaket Tuhan ka tubumai. Aipoí gege siakénia ka kai néné, iaté masipaerú kam lé, imakolou puaaratmui, tá masipakataí

⁹Tá kuobá kupalotoki kam ka suratku

¹⁰Aipoí arakua sirimanua, "Ka suratnia geti si Paulus, bulat malippat kuanennia, samba bulat berwibawa, tápoi kelé ioi ka talagatta, simaluluk tubungan lé nia, táan anai katukolobat sikuania!

¹¹Bulat kau iagai kolounia sirimanua kelé néné; aipoí ka kai galaiakenenmai ké moi kai ka tubumui, kelé sikuamai ka suratmai léu et kugagalaiaké kai

¹²Kirénangan tedda tá maró bagamai masipataikaiaké elé masikeréaké tubumai ka tubudda sikua tubuna simabuak tiboitubu. Bulat sitaiagai paatuat lé sia néné! Aipoí sia tubudda saradda lé aigalai kirekatda, lepá nilairangan tubudda ka kirekat sigalaira nenda

¹³Tápoi kai geti ka kai, tá kisedda kugagalaiaké kai. Tá kupubabara kai tubumai, ké kuumun'aké kai tubumai. Ka siripokat siteterit Taikamanua

galaiakenenmai lé, kugalaiaké kai ka kai. Oto beri kam ka kam leú et, ai leú kam ka bagat kudduat siteterit Taikamanua

¹⁴ Ka tetret akuoi kai masibalou kam, kupakakra kai Katuareman Simaerú pagalaiat Kristus ka tubumui, bulat tá akusabauaké kai siripot ka sitetreakenen galaiakenenmai

¹⁵ Bulat tá kuobá kai masiumun'aké tubumai ka sigalaiakenenda sabagei, sipasigagai pat sabau ka siteúakenen Taikamanua ka tubumai. Tápoi mariu-riu lé kai ka sitetreakenen Taikamanua ka tubumai, samba ai lé kukakaroni kai бага, bulé memei makokopé ron tonem bagamui ka tubut Kristus, ioi kugalaiaké kai galajet simakabeunannia peilé ka talagamui

¹⁶ Oto bailiu oi leú et kuei kai ka kai ka laggaira sabagei masipakakra Katuareman Simaerú néné, tápoi tá kuaabeuaké kai tubumai ka galajet sigalaiakenenmai ka laggai pugalajatda sabagei

¹⁷ Ka Buko Sipunenan, ai atusurat'aké kisé, "Buítá sigalai Tuhan lé rauumun'aké sia siobá masipaumun apa pá.

¹⁸ Aipoí sia sisiló katuumun sibara kai Tuhan lé, tuuumun'aké, tá siumun'aké tubuna.

11 ¹ Eddangan nia kukau boikí tubukku sitaiagai paatuat. Elé, momoi leú

² Bulat sarat kurepdem lé kam. Kelé pasirerepdemna kam ka kam Taikamanua. Aipoí kam néné, kelé sara taiokkó simaliná peilé, kelé sitonéakenenku ka matamui, bulé tatalimouaké kam ka sara simanteu, iaté Kristus

³ Tápoi ai lé maseseddé bagakku ka tubumui, baleú ai lé inaná-ná paatuatmui Sanitu, bulé tá numasetia kam ka tubut Kristus, kelé ka sia kai Eba siburú, aialá bagania ka patajuat ulou

⁴ Aipoí ituitsó mangká bagamui masisiló kaooira sipasingangantruaké pagalaiat Jesus, tá ka siripokatnia. Elé tá kelé Jesus sipoiliatmai ka tubumui. Oto kisedda leú et, ituitsó bulat nuobá kam masisiló ketsat, samba, "katuareman simaerú", sitaimakeré kelé ka Ketsat Sipunenan, elé sitaimakeré ka Katuareman Simaerú sinilómui sibara ka kai

⁵ Bulat tá te aiaagai tubukku repet tiboí tubukku ka tubudda oniakenen, "apostel-apostel", bulat siabeu tiboí tubu néné

⁶ Elé tá pá bulat kuagai manibo, tápoi ka puaagai geti, bulat tá sitaiaagai paatuat aku néné. Akubuktiakéan kai ka kam ka sangamberinia apa pá

⁷ Ka tetret akupakakra Katuareman Simaerú sibara ka Taikamanua ka tubumui, bulat beri goisó tá akutiddou, bulé nuaké kam bulagat sakín kanku; oto sedda te akuparepé tubukku. Tápoi akugalaiaké geti nia kelé néné, bulé imabuak tiboí tubumui lé ka kam. Elé aibailiu lé pá nia selekku ka tubumui

⁸ paamian bagei lé aibulagani aku, ka tetret akupasikeli kam. Elé momoi takua, kelé masirugiaké paamian lé akugalai, bulé ioi kurop'aké kam

⁹ Ké bara simagulai kaku ka tetret nenda, bulat beri gejaakéku bagadda kasei pá ka talagamui. Sia lé sasarainanta sibara ka Makedonia aipatarek sangamberinia simagulai kaku sedda. Bulat ai lé poí kujajago, buí kugejaaké bagamui ka sangamberinia apa pá.

Oto mariu-riu lé kujago nia, bule sarat kisedda kugagalaiaké, burú

¹⁰ Kelé umun'akenenku néné, tá momoi itutataaké ka senen kudduat; beri leú et ka sangaliot Akaya néné. Aipoí ai lé nia ka tubukku ngantoman bulat sibulatnia siorak ka pagalaiat tubut Kristus

¹¹ Angoi kukukua kelé néné?
Taimanuntut bagakku ka tubumui pá? Bulat ai lé iaagai Taikamanua nuntut bagakku ka tubumui

¹² Oto mariu-riu lé kugalaiaké kelé sigalaiakenenku kineneiget, bulé tá ioi raalá tubudda tai "apostel", sabagei, rabuak'aké tubudda masikua, makeré kelé ka kai lé pugagalaira ka sia néné

¹³ Bulat tai apostel sipatataju lé sia néné. Sipugagalai, siagai masipataju sirimanua, sikau tubuna kelé apostel Kristus

¹⁴ Tápoi tá leú takikiseiaké kam galai tubudda kelé néné, aipoí beri leú et ka sia Sanitu, aikau leú et tubunia kelé tubut malaika simatoro

¹⁵ Oto tá leú et tugegé-gé sita, ké rapakau tubudda pagugulet Sanitu néné, kéan lé pagugulet sigalaiaké siobat

bagat Taikamanua. Tápoi kalepakatnia silóranan nia silit sangamberi sigalaira

¹⁶Oto kuoleaké kukua nia mitsá ka matamui: Buí tebaí rabara kasei pá sipasiaaddeaké aku néné kelé sitaiagai paatuat. Tápoi ké kam leú et ka kam ainuaaddeaké kam aku sitaiagai paatuat leú et, oto eddangan nia kuumun'aké goisó tubukku kaku, oniakenen sitaiagai paatuat néné

¹⁷Sené kununuaké kelé umun'akenenku ka tubumai, tápoi tá te si Tuhan aikua nia ka matakku kukukua kelé néné. Oto sené bulat kéan lé te sitaiagai paatuat aku kukua kuanenku néné

¹⁸Kirénangan maigi sia siumun'aké pagalaiat ka polak néné. Oto kaku leú et kuobá kuumun'aké nia

¹⁹Kupaatu bulat mangká bagamui masiom'aké bagamui ka tubut sitaiagai paatuat néné, aipoí anuoniakéan kam tubumui bulat simaagai paatuat

²⁰Bulat tá nupuukú kam ragalai siobára ka tubumui, rakau kam paguguletda, elé rapauragi kam, ragaba uktukra ka tubumui, rakau tubudda sia lé abeu tiboitubu ka tubumui, pat ró bagadda ratipak bailatmui

²¹ Bulat maila aku masikua taimagegemai ka kai masigalaiaké kelé néné. Tápoi apa siumun'akenenda ka sia sirimanua sabagei, maró leú te bagakku kaku kuumun'aké nia! (Tápoi kelé sitaiagai paatuat lé te aku kupanibo néné.

²² Kasonia poi sia néné, tai Ibrani pá sia? Beri aku kaku leú et, tai Ibrani leú et. Elé tai Israel pá sia néné? Aku leú et kaku, tai Israel leú et. Sapunuteteu Abraham pá sia néné? Aku leú et kaku, kisedda leú et

²³ Sipugagalai galajet Kristus pá sia néné? Iturep, kéan lé te siroró aku néné, tápoi kirénangan aku peilé oniakenen pagugulat simaerú, belé peilé ka sia sangamberidda néné! Aipoí aku peilé makopé masimomoaké tubu mugalai, aku lé marei-rei rakau aku ka bagat penjara, aku peilé maigi iorik paoreat, samba marei-rei bulat aipei goisó kumatei

²⁴ Lima ngamitsáan arapaorei aku tai Jahudi, rapalisoji aku bobó-bó tali telu ngapulu siba ngamitsá iginia

²⁵ Telu ngamitsá leú et arapalisoji aku tai Roma; ai leú et araribbai aku bukkú.

Telu ngamitsá aimalukké abakmai ka laut, sangamitsá akumaraggai ka koat, ai rua ngapulu epat ngajam burúnia

²⁶ Marei-rei kuei masigejengi paamian, tápoi sarat itaiko lé aku pasimamatei; igelai iraggaiaké aku eba, ragelai rarau-rauaké aku sipararau-rau, rataiko aku tai Jahudi, samba leú et taú sipuoni tai Jahudi, bulé ramateiaké aku, rataiko aku ka kota, rataiko ramateiaké aku ka tei-tei irip laggai, igelai kumalou-lou ka koat, samba leú et rataiko ramateiaké aku sia sikua tubuna saalei pasasamba tai Kariten, oto tá

²⁷ Bulat masimomoaké tubu lé kupugalai masigaba purimanuaiatku, samba malegre lé matei kubesiaké masipakakra Katuareman Simaerú; marei-rei tá kuperep, marei-rei leú et tá kupukom, kumaoggou, marei-rei tá anai sipuukú aku ai aku mulalaje, marei-rei kumalopot kalulut taimaigit leppeiku, samba kudduatku leú et tá anai

²⁸ Iageti mitsá, bulat senen gogoi lé imakarat bagakku ka tubudda sapaamian, kupaatu kipangan pá puririmanuanda

²⁹ Ké ai sia sapaamian simagulai tonem baga, bailiu aku kaku leú et, saggo pupaatuananku. Ialeú et, ké ai sia sapaamian sigalai jo, bulat besí kupaatu nia

³⁰ Oto kaku néné, ké kuumun'aké apa pá, tá anai bagei umun'akenenku, sarat pagalaiat pusaggoatku lé kuumun'aké

³¹ Bulat iagai Taikamanua, Ukkui Tuhanta Jesus Kristus, tá bokoíku. Tuumun'aké lé oninia teret buru-burú

³² Ai aku ka laggai Damsik, ka tetret nenda, aikoiniaké tai tentera si gubernur, iaté Rimata Aretas, bulé rajago matatbaliu laggai, bulé ralabá aku

³³ Tápoi aratoak'aké lé aku ka bagat garágá, ka lobok rupi beton. Oto kisedda te, aoi akubela ka kabei gubernur.

12 ¹ Kirénangan tedda tá anai lulunia tuumun tubu. Tápoi kuobá kuumun sipoiliat, elé sipatoilat Taikamanua ka tubukku, elé ka siitsot matakku

² Ai sara kuagai tai Kariten ka pulu epat ngarura situsasabau, aiakkat'aké nia Taikamanua ka manua. (Tá bulat makolou kaku, elé bulat tubunia leú pá

atusakai ka manua, elé siitsot matakku lé. Taikamanua lé siagainia.

³Kuoleaké mitsá masikua: Kuagai aakkat'akéna nia Taikamanua ka Paradaiso iaté ka laggai Taikamanua. (Tá bulat kuagai, elé bulat tubunia pá atusakai ka manua, elé kelé sara siitsot matakku lé, sarat Taikamanua lé siagainia.) Sedda areprangan sangamberinia sitaiooi rapoiliat sirimanua, elé tá tuoobáaké ranunuaké nia sirimanua

⁴(12:3)

⁵Oto pagalaiat tubut sirimanua néné te kuumun'aké, tá tubukku. Aipoí siorak tubukku geti, sarat pagalaiat pusaggoatku lé kuumun'aké

⁶Iageti ké kuteúaké kuumun'aké apa pá, tá kuobá kupabara sitá anai; bulat sibulatnia lé kutitiboi. Tápoi akutengen lé tubukku, bulé buí rabara sipasiaaddeaké aku, saliu siripot siitsóra ka sigalaiakenenku, elé siripot sikuakku siarepra

⁷Tápoi bulé buí imakopé kubuak'aké tubukku kalulut siitsot matakku simakisei ka bagatta néné, baraakénangan kaku Taikamanua besí ka tubukku kelé sara

pugalai pakeiet Sanitu. Aibaraaké besí néné, iaté masibó-bó aku, bulé tá kubuak'aké tubukku

⁸Telu ngamitsá akupaniddou ka tubut Taikamanua, bulé iareuaké ka tubukku besí néné

⁹Tápoi aikua lé si Tuhan ka tubukku kisé, "Manuntu bagakku ka tubum, kupaatu nenda metnangan kekeu; aipoi ka tetret ai lé ekeu musasaggo tubu imakokopé ronnia gegekku." Iaté lulunia, masibagbang pusaggoatku peilé mangká bagakku, aipoí ka tetret nenda te kuaagai sasakkerina aku geget Kristus

¹⁰Oto bulat mangká bagakku ka pusaggoatku néné. Ialeú et, bulat mangká bagakku ké kalulut Kristus rapaloloi aku, elé kusiló pugejaat бага, ele rakukru aku, samba leú kuorik besit puririmanua. Aipoí ké masaggo aku, ka tetret nenda te ibabara ron pupaaturananku

¹¹Bulat kalulumui lé te, aibailiu aku kéan lé sitaiaagai paatuat. Siripokatnia baí, buítá kam lé masiumun'aké aku. Aipoí kenanen tá anai katukaunanku, tá makala aku ka tubudda oniakenen, "tai

apostel-apostel" simakopé beunan tiboitubu néné

¹² Sangamberinia pukerengan élé sangamberinia kiseiet sabeu élé galajet siabeunia akupatoiláan ka tubumui ka om бага masibuktiaké ka tubumui puaapostelku kaku néné

¹³ Oto ka mataat apangan lé tá atupuuku kam, ké tupakeréaké baí nia ka sapaamian bagei? Kupaatu sarat pagalaiat nénéan lé: iaté tá kugegejaaké bagamui nubulagani kam aku. Oto kutiddou nuappéaké kam selekku néné

¹⁴ Oto kineneiget sikatelunangan te, kupatarek tubukku moi kubalou kam. Tá kuobá kugejaaké bagamui; aipoí tá sibabara ka tubumui kubebesíaké, tápoi tubumui lé. Aipoí tá tatoga masigagaba purimanuaiatda saeppudda, tápoi saeppudda lé masigagaba purimanuaiatda tatogadda

¹⁵ Kalulut néné, bulat ka angkat бага kubuluaké sangamberinia, ibara puuktunganmui; beri tubukku leú et kubuluaké kalulumui. Oto ké kisé kopet nuntut bagakku ka tubumui ka kam, kipa, mateú leú pá imagulai nuntut bagamui ka tubukku kaku

¹⁶ Kirénangan pasese ka bagamui, kalulut beri gejaakéku bagamui. Tápoi kenanen kisedda, ai peilé sia sipasikukua kuagai pagalai; ai akusese uktuk ka tubumui, tápoi sialat patajuatku lé

¹⁷ Bulat kaipa te kupajojo kam! Elé sibara ka tubudda sikoiniakenenku ka tubumui pá kugagaba uktukku ka tubumui

¹⁸ Akukoiniakéan si Titus ibalou kam, tápoi akukoiniaké leú et sia saaleita tai Kariten sabagei, aleira. Taleú ai lé igagaba uktuknia ka sia si Titus ka tubumui? Tápoi kai néné ruamai si Titus, pugagalaimai, sikeré besíakenen lé kai, elé makeré lé enungnia pugagalaimai

¹⁹ Kupaatu aian nukukua kam aipá kubebela kai tubumai ka matamui? Bulat tá pasese sipinaatumui néné! Aipoí ai lé iaagai Taikamanua, sangamberinia sikuamai ka matamui, tá aijulut ka siripot siobat bagat Kristus. Ialeú et sangamberi sigalaiakenenmai néné leú, masipagaba puririmanuan ketsatmui lé

²⁰ Bulat ai lé aku maseseddé, baleú oiku lé masibalou kam, itsókungan kam, táan kelé ka sipinaatukku enung puririmanuamui. Papparat te, bara

sipalalabá, bara simatutu бага ka saalei,
bara simagolú бага, bara sia sarat
masituturi purimanuaiatda saradda,
bara paloloiat ka pasasambadda, bara
sipatutubbui бага, bara simaumun ka
tubu, elé sibaraaké pulamagat

²¹ Ai aku museddé бага, baleú oi
aku, pakailanangan aku Taikamanua ka
matamui, bailiu pusoukungan kuitsó
igidda ka talagamui sijo siburú, tá raobá
rabauaké paatuatda, elé tá raaariaké
galai tubudda musilainge, mugalai
simalolit, elé galajet simailatta.

13 ¹ Mutetelu ngamitsáan te, kuoi
kubalou kam. Beri ka Buko
Sipunenan leú et, ai atusurat'aké kisé,
"Senen ibara pakaro, buítá bara sia rua
elé telu igidda saksi, iapeité bulat itukua
masah pakaro nenda.

² Sia sigalai jo siburú, sambat sia
sangamberidda leú sabagei, amuboikían
akuteká sia, ka tetret akuoi kubalou kam
sikaruania. Oto kineneiget, aipeilé sita
parereunan, aikugegelai mitsá kukua ka
matamui simaron, bulé ké moi aku mitsá
kubalou kam, bulat beri sia sara néné,
tukakatsli ka ukuman

³ Sedda peité nuitsó kam sangamberi buktinia kelé kiddiyet bagamui, bulat paninibonia Jesus, ka sitiboakenenku. Ké ipaanuji kam Kristus, tá te ipeperú nia-nia mei, tápoi bulat ipatoilá gegenia ka tubumui

⁴ Kirénangan tedda, ka tetret aitupattáaké nia ka loiná siliktenga, masaggo lé tubunia ituitsó, tápoi kineneiget geti aipurimanua kalulut geget Taikamanua. Kelé kai leú et ka kai, simasaggo lé kai ka puririmanuamai néné sipuoni sipatatabbra ka tubut Kristus. Tápoi ké ai sita patutuggut mata, bara ronmai sambamai Kristus kalulut geget Taikamanua

⁵ Sibo peite kam tubumui, bulatniangan leú pá, aian kam muririmanua ka siripot putotonem bagamui ka tubut Kristus! Tá isoppi iagai tubumui kababara nia Kristus ka tubumui! Tápoi sara lé galainia ké tá bulat ainukakatonemi kam nia бага

⁶ Bulat aikukakaroni бага nuagai kam nia, kai néné, tá te simaruei makala ka pasisiboat

⁷ Ai lé kutitiddouaké kai kam ka tubut Taikamanua, irop'aké kam, bulé tá nugalai kam sele. Tápoi tá te masipatoilá

agaimai nia masienung'aké galajetmai, tápoi bulé ioi lé nugalaiaké kam siobat bagat Taikamanua. Kenanen ituitsó kelé tá atueddet kugalaiaké kai nia, tápoi eddangan nia

⁸Aipoí kai ka kai néné, tá momoi kugalaiaké kai sitaipaaakkup ka siobat bagat Taikamanua; buí tá kutut'aké kai siobat bagat Taikamanua

⁹Mangká lé bagamai ké masaggo kai; tápoi kam ka kam geti, ron. Ai lé kutitiddouaké kai kam ka Taikamanua, bulé imasut pueerúmui

¹⁰Iaté lulunia akugalai suratku néné ka tubumui, ainangan aku tá momoi ka talagamui. Oto ké moi aku ka gogoi sibabara, táan kutotoddoi kam kupakei gege sibara kai Tuhan sikukuddu ka tubukku. Aipoí gege siakénia ka tubukku néné, masipaerú kam lé, tá masipakataí kam

¹¹Oto kelé tiboietku pasilepá, kutiddou ka tubumui, alé kam Sasarainamai, bulat besíaké kam imasut pueerúmui. Siló kam sangamberi nganturatku siakéku ka tubumui. Kau imakeré bagamui, samba kau nupaaban kam pasasambamui. Bulé Taikamanua Sipulu katet бага samba

sipaaban sirimanua ka tubunia samba ka pasasambadda sirimanua kalulut Kristus, masipaalei kam

¹² Kau nuparoro kam pasasambamui, ka ngelei бага siripot pusasarainanda ka sia tai Kariten

¹³ (13-12b) Segé salamra sangamberi paamian Taikamanua ka tubumui

¹⁴ (13-13) Bulé ipanukani kam Tuhanta Jesus Kristus, samba ipukateki kam бага Taikamanua, samba ipaalei kam sangamberimui Ketsat Sipunenan.
Hormatmai, Paulus

Galatia

1 ¹ Ale kam Sasarainamai sapaamian ka wilayah Galatia. Aku sipuoni si Paulus, sambat sangamberidda sasarainanta tai Kariten sipaaleiaké aku, bulat aikukakaroni kai бага, bulé ipanukani samba ibujai kam Ukkuita Taikamanua sambat Tauhanta Jesus Kristus. Akupuapostel kaku, tá sibara ka sirimanua elé sipauddetra sirimanua, tápoi sipauddet Jesus Kristus sambat Ukkuita Taikamanua sipasisusuruaaké Jesus mitsá ka simamatei lé

² (1:1)

³ (1:1)

⁴ Kalulut masireddet siobat bagat Ukkuita Taikamanua, buluakénangan tubuania Kristus, bailiu buluakenen kalulut jotta, bulé ibelaaké sita ka tetre sikataí néné

⁵ Tuumun'aké lé Taikamanua teret buru-burú! Amen

⁶ Bulat makisei ka bagakku ka tubumui alé kam Sasaraina! Kalulut panguruat katet bagat Kristus lé aisogai kam

Taikamanua, tápoi kineneiget geti
bulat maruei nukatei-teiaké kam
Taikamanua, kalulut "katuareman
simaerú" sitaimakeré ka Katuareman
Simaerú sibara ka Taikamanua

⁷ Siripokatnia, bulat tá anai
"katuareman simaerú bagei". Ai
geti iaté sia sipasikakakraaké ka tubumui
katuareman simaerú pagalaiat Kristus,
tápoi sipinabailok, pat paingonangan leú
et kam

⁸ Eddangan nia iukum'aké sia
Taikamanua, sipasikakakraaké
"katuareman simaerú" sitaimakeré ka
Katuareman Simaerú sipinaarepmai ka
kai, kenanen kai pá, elé samalaika ka
manua pá, ipakakra nia

⁹ Kirénangan akukuangan kai siboikí ka
tubumui, tápoi kineneiget kukukua lé
mitsá ka tubumui: Sia sipasikakakraaké
ka tubumui, "katuareman simaerú"
sitaimakeré ka Katuareman Simaerú
sisilómui sibabara ka kai, eddangan nia
iukum'aké sia Taikamanua

¹⁰ Elé kalulut néné pá toilá kelé
aikubebesíaké raakui aku sirimanua?
Bulatnia tá kisedda! Sarat sibara
ka Taikamanua lé kukakaroni бага

pengakuannia ka tubukku. Ele, ai lé pá kugagalai paalakat бага, bulé ramaangká бага sirimanua ka tubukku? Bulatnia ké ai peilé kugagalaiaké kelé nenda, oto tá pagugulet Taikamanua aku néné

¹¹ Bulé nuagai kam nia ale kam Sasaraina, Katuareman Simaerú sipakakrakku néné, tá ka sirimanua aibara

¹² Tá ka sirimanua akusiló nia katuareman simaerú néné, samba beri sia sara amasingantru aku pagalaiat néné. Tápoi bulat tubut Tuhan Jesus lé amasipatoilá Katuareman Simaerú néné ka tubukku

¹³ Kirénangan anuarep'an kam pagalaiat tubukku siburú, iaté sipuaarat aratda tai Jahudi lé aku. Ai lé nuaagai kam kipa kupugege ka tubudda sapaamian Taikamanua, samba kipa ronnia kubesiaké kupakataí sia

¹⁴ Ka pasigagalaiaké enung puaarat leú et, bulat saliu peilé tai Jahudi sabagei simakeré pauragatmai. Bulat makopé ronnia kuomet'aké pagalaiat aratda taikebbukatmai

¹⁵ Tápoi kalulut erut bagat Taikamanua piliynangan aku, ainangan tá mututú-tú matakku, samba sogainangan leú et aku masipuukú galajetnia

¹⁶ Patoilánangan leú et Togania ka tubukku, bulé ioi kupakakra Katuareman Simaerú pagalaiat Togania ka tubudda taú sipuoni tai Jahudi. Ka tetret nenda bulat beri eiku ka tubudda kasei pá masitiddou nganturat

¹⁷ Samba tá leú et amei aku ka tubudda tai Jerusalem sipuboboikí muapostel ka tubukku. Tápoi amei lé aku ka Arab, lepá barakku sedda toili aku mitsá ka Damsik

¹⁸ Pasat telu ngarura burúnia, ei aku ka Jerusalem bulé kupaagai kai si Petrus. Kuddu aku sedda ka tubunia ai pulu lima ngagogoi burúnia

¹⁹ Tá apaaili kai tai apostel sabagei, sarat si Jakobus sarainan Tuhan lé, lepá

²⁰ Bulat sineseatnia te sisurat'akenenku néné. Ai lé iaagai Taikamanua taimabokokku

²¹ Lepá ei aku ka palagga-laggai ka Siria sambat ka Kilikia

²² Ka tetret nenda tápei raagai aku sapaamian tai Kariten ka Judea bulat sipatutuggut mata

²³ Sarat siarepra lé sikuadda sirimanua, "Sipaorei kai siburú, kineneiget ai nia masingangantoman'aké pagalaiat katonemiet, kelé besíakenennia pakataiketnia siburú.

²⁴ Iageti bailiu umun'akérangan Taikamanua, kalulut aku.

2¹ Oto pasat pulu epat ngarura burúnia, toili aku ka Jerusalem sambamai tai Barnabas, samba akuabbit leú et si Titus

² Akuei geti ka Jerusalem, kalulut aipatoilá ka tubukku Taikamanua masikua, buítá mei aku sedda. Samba ka parurukatmai sikokoiaenen sambamai sauté sedda, kolouakékungan leú et pagalaiat Katuareman Simaerú sipakakrakku ka tubudda taú sipuoni tai Jahudi. Aipoí tá kuobá ipusiboboi apa sigalaiakenenku siburú samba kineneiget néné

³ Ka sia si Titus sipaalei aku néné, tai Junani lé nia, tápoi tá atupaksaaké nia itut'aké enung pususunat

⁴ kenanen baí ai sia sipasiroron'aké nganganda ka tubunia. Iaté sia sipagalú tubunia ka mungkuatta samba sipakau tubunia kelé sarainanta. Sipinalipput

lé araoi ka tubutta masitaiko puujaat
siooi ka tubutta kalulut atapusara ka
tubut Jesus Kristus. Ai lé poí rabebesiáké
ratoiliáké sita mitsá mupagugulet kelé
ka siburú

⁵Tápoi bulat beri goisó tá akukalaaké
kai tubumai ka tubudda, kalulut kujago
kai bulé imamurni isegé ka tubumui
Katuareman Simaerú néné

⁶Tápoi kenanen kisedda, tá anai
besiákenenda sibau sibara ka tubukku,
ka sia oniakenen siabeu tiboí tubu
néné, aipoí kaku, tá anai baggeinia, elé
abeu pá tiboí tubudda elé tá, ka sia poí
Taikamanua, tá irarasei sirimanuania

⁷Tápoi bailoknia mitsá, sia oniakenen
siabeu tiboí tubu araakuian pauuddetna
aku Taikamanua masipaarep Katuareman
Simaerú ka tubudda taú sipuoni tai
Jahudi, kelé aipauddet nia ka sia si
Petrus masipaarep Katuareman Simaerú
ka tubudda tai Jahudi

⁸Aipoí aikauan Taikamanua ka tubut
Petrus puaagai, bulé ibaliu nia apostelda
tai Jahudi, oto nia leú te amasiáké ka
tubukku kaku puaagai bailiu apostelda
taú sipuoni tai Jahudi

⁹ Beringan ka sia si Jakobus, si Petrus sambat si Johannes, siagaita kelé siutéaké paamian leú et, araakuian aakéna ka tubukku kaku Taikamanua, pasikelat sikokoiakenen néné. Bulat pat salamrangan kai ruamai si Barnabas sambat aku leú et kaku, kelé sara toggaiat pasuruanganmai. Oto pakerénangan bagamai sambamai, sia sambat kai néné, bulé kai ka kai mugalai ka talagat bangsadda taú sipuoni tai Jahudi, tápoi sia geti ka sia, iaté ka talagadda tai Jahudi

¹⁰ Tápoi bulat araron'aké nganganda rakua ka matamai, bulé kupasikeli kai sia simagebá. Paobánangan pei bagei, kaku néné, bulat maangká bagakku masigalaiaké kelé nenda

¹¹ Iageti kelé aioi si Patrus ka Antiokia, bulat lawankungan nia sipatutuggut mata, kalulut sele sigalainia

¹² Panandaatnia poí, iobá pataddé mukom ka tubuda sasaraina taú sipuoni tai Jahudi. Tápoi kelé arasegé sikoiniakenen Jakobus, tik-tiknangan tubunia ka tubudda taú sipuoni tai Jahudi, sambat táan iobá pataddé mukom ka tubudda sasaraina taú

sipuoni tai Jahudi, kalulut lotónia ka tubudda siobá masikua bulé tusunat lé sia sangamberi sirimanua

¹³ Beri leú et ka sia tai Jahudi sabagei, kisedda leú et pupatajuanan tubudda kelé kai Petrus, pat tut'akénangan nia ka sia si Barnabas mugalai tubu kelé galai tubudda ka sia néné

¹⁴ Bulat kelé akuitsó nia galai tubudda néné, tá paaakkup nia ka siripokat enungan katuripoat Katuareman Simaerú, kuakkungan nia ka matat Petrus, ka talagat sirimanua simigi siparururú sedda, "Ké beringan kam leú et ka kam alé Sasaraina sipuoni tai Jahudi, anukauan kam tubumui kéan lé taú tai Jahudi, angoian lé nupapaksaaké kam sia sabagei, bulé rapugalai tubu kelé galai tubudda tai Jahudi?

¹⁵ Kirénangan tedda siripot ka pusirimanuaat, kai néné tai Jahudi lé kai, tá sipuoni "tá tai Jahudi, oniakenen sirimanua sijo"

¹⁶ Tápoi kenanen kisedda, ai lé kuaagai kai, arapaerú mitsá sirimanua ka tubut Taikamanua, sarat kalulut tonem бага ka tubut Jesus Kristus lé, tá kalulut pasigagalaiaké enung surukat arat. Beri

kai leú et ka kai, matonem bagamai ka tubut Kristus, bulé kupaerú kai mitsá ka tubut Taikamanua sibara ka tonem bagamai néné, tá kalulut pasigagalaiaikémai surukat arat. Aipoí bulat beri te sia sara momoi paerú mitsá ka tubut Taikamanua, ké kalulut pasigagalaiaikéra surukat arat

¹⁷ Oto bulat aikubebesíaké kai paerú mitsá ka tubut Taikamanua kapasitatabbraakémai tubumai ka tubut Kristus. Tápoi lepá akugalaiaiké kai nia kelé néné, matotoilá peilé kai néné, "sirimanua sijo" kelé sia leú et taú sipuoni tai Jahudi, tá pá néné takukua Kristus'an lé ikakau kai majo? Bulatnia tá

¹⁸ Ké kurióaké mitsá enung surukat sipakataíku néné, akupatoiláan paapakku nia surukat

¹⁹ Tápoi amateian aku ka surukat arat, aimateiaké aku surukat nenda, bulé ioi kupurimanua ka tubut Taikamanua. Atupattáakéan aku ka siliktenga sambat Kristus

²⁰ Oto kineneiget, táan aku muririmanua ka tubukku néné, tápoi Kristus'an lé. Puririmanua siparimanuaakenenku

kineneiget, iaté puririmanua ka putotonem бага ka tubut Togat Taikamanua, sipununtuki aku бага, samba sipasibubuluaké tubunia kalulut aku

²¹ Oto tá kupulalabbei panguruat katet багат Taikamanua нéné. Aipoí ké baí kalulut pasigagalaiaké surukat arat lé imaeerú mitsá patabbaratta ka tubut Taikamanua, oto tá anai lulunia kamamatei Kristus нéné!

3 ¹ Ale kam Sasarina tai Galatia! Bulat tá nuagai kam paatuat! Elé aialáan lé bagamui ka tubudda kasei pá? Pagalaiat kamateiat Kristus ka loiná siliktenga bulat amakolouan akukolouaké nia ka tubumui

² Oto kua peite kam ka matakku pagalaiat нéné: Kipa anusiló kam Ketsat Sipunenan, kalulut pasigagalaiakémui surukat arat, elé kalulut aarepmui Katuareman Simaerú sibara ka Taikamanua samba kalulut tonem bagamui ka tubut Kristus lé

³ Angoi bulat imakokopé taiagaimui paatuat! Anutaddaakéan kam murimanua sibau ka Ketsat Sipunenan, kipangan lé mitsá nububuluk kam

tubumui sibara ka ronmui saramui
nubesíaké kam imasut pueerúnia
puririmanuamui

⁴Siboboi lé poi sangamberinia
panguruat sisilómui? Bulat kaipa te
ipusisiboboi

⁵Aiakéan Ketsatnia Taikamanua ka
tubumui, samba aigalaian kiseiet ka
talagamui. Kalulut pasigagalaiakémui
lé pá surukat arat elé kalulut aarepmui
lé Katuareman Simaerú samba kalulut
putotonem bagamui lé ka tubut Kristus
aigalaiaké nia néné Taikamanua

⁶Oto nenda makeré kelé ka sitususurat
ka Buko Sipunenan pagalaiat tubut
Abraham, kisé, "Kalulut tonem bagania
si Abraham ka tubut Taikamanua, bailiu
putotonem bagania néné silónangan nia
Taikamanua kele sara siangkáaké bagat
Taikamanua.

⁷Oto bulé nuagai kam nia, simatonem
baga ka tubut Taikamanua lé oniakenen
bulat sapunuteteu Abraham

⁸Buko Sipunenan lé aiitsó nia boikí,
bulat Taikamanua lé masikakau sia taú
sipuoni tai Jahudi néné paerú mitsá ka
tubut Taikamanua, ké matonem bagadda
ka tubunia. Katuareman Simaerú lé

boikí atupaarep ka tubut Abraham ka pakerekat baga néné, "Kalulut ekeu, bailiu tupanukani sia sangamberi sirimaua ka polak néné.

⁹Oto kau ka sia si Abraham, katonemi, bailiu tupanukani nia ka sia. Oto kisedda leú te sia sangamberi simatonem baga, tupanunukani te sia sambat si Abraham

¹⁰Sangamberi siloulogi surukat, ai lé sia ka bagat patelejat. Aipoí ka Buko Sipunenan leú, ai atusurat'aké kisé, "Ipateteleji te sia Taikamanua sangamberi sitaimatopit masienung'aké sangamberi sitususurat ka Bukot Surukat!

¹¹Bulat beri te sia sara sipaeerú mitsá ka tubut Taikamanua kalulut pasigagalaiakéra surukat. Pagalaiat néné, aikuangan ka Buko Sipunenan, "Sarat simatonem baga ka tubut Taikamanua pat erú mitsá patabbaratda ka tubut Taikamanua lé, muririmanua!

¹²Tápoi surukat arat tá amubongen nia ka tonem baga. Atusurat'aké ka Buko Sipunenan, sia sipasieenung'aké sikuat surukat, ka tubut surukat leú te rapuririmanua

¹³Tápoi ka sia Kristus, aibelaakéan sita ka patelejat surukat. Aigalai iobáaké tubunia tutelei kalulut sita. Aipoí ka Buko Sipuenan ai atusurat'aké kisé, "Tutelei lé sia simamatei ka loiná siliktenga.

¹⁴Aigalaiaké nia geti kelé néné Kristus, bulé rasiló ka sia taú sipuoni tai Jahudi, panukanan sitonéakenennia Taikamanua ka tubut Abraham. Oto kalulut nenda, sita leú et simatonem бага ka tubut Taikamanua, oi tasiló kam ka sita Ketsat Sipunenan sitonéakenen Taikamanua

¹⁵Ale kam Sasarainamai! Eddangan nia kuaké kirekat kelé simarei-rei ka puririmanuanta sisenen gogoi. Ké ai sia sara sigalai pakerekat бага, samba pakerekat бага nenda atusah'akéan, oto bulat beri te sia sara sipajajak nia pakerekat бага nenda, elé masituppaiaké apa pá ka tubut pakerekat бага néné

¹⁶Bulat tubunia lé Taikamanua amasigalai pakerekat bagania ka tubut Abraham sambat ka sapunuteteunia. Samba ka Buko Sipunenan tá atusurat'aké, "samba ka sapunuteteu Abraham", katukolobatnia, maigi sia sirimanua. Tápoi atusurat'aké geti

sedda, iaté, "samba sapunuteteunu",
katukolobatnia, sarat sara lé sia, iaté
Kristus

¹⁷ Oto bulat kuanenku geti sené, iaté:
amuboikían pakerekat bagat Taikamanua
néné aitugalai samba aitusah'aké.

Beri leú et surukat siakénia 430
ngarura situsasabau, tá momoi ipajajak
pengesahannia samba tá leú et momoi
iposai pakerekat bagat Taikamanua

¹⁸ Aipoí ké panguruat Taikamanua
néné musiddonan ka surukat arat, oto
táan tuooniaké nia panguruat nenda
sipinatonénia. Tápoi kalulut aipatonéan
poí ka tubut Abraham, oto kaunungan
nia Taikamanua ka tubut Abraham

¹⁹ Oto ké kisedda baí nia, apangan
lé lulunia aitukau surukat nenda?
Alegiatnia geti, iaté, aitutuppai surukat
néné, masipatoilá lé pasiaapaakéra
nia sirimanua tiboiet Taikamanua. Oto
katupakeiatnia néné ka sia surukat, teret
oi nia sara punuteteu Abraham, kelé
ka sikuania Taikamanua ka pakerekat
bagania kai Abraham. Surukat néné,
sikaura samalaika lé ka tubut sara
sirimanua

²⁰ Buítá ai sia rua ngapihak, iapeité ibara sipatalaga sia. Tápoi tá ibebesíaké ibara sipatalaga ka sia Taikamanua, aipoí nia sarania lé masigagalaiaké

²¹ Oto momoi leú pá takua kam nia, ai lé nia pasasaggak, surukat ka pakerekat bagat Taikamanua? Bulatnia tá! Aipoí ké masipanguruat'aké purimanuaiat ka sirimanua lé, aiaké nia Taikamanua surukat néné, oto momoian rapaerú sirimanua ka tubut Taikamanua kalulut surukat

²² Tápoi ka Buko Sipunenan atusurat'aké, ai lé sia ka kupkumen jo sangamberi sirimanua. Oto kalulut néné, panguruat sipinaleleknia, kalulut tonem бага ka tubut Jesus Kristus, tukau ka tubudda simatonem бага

²³ Ainangan tápei iaaili tetrenia tamatonem kam бага ka tubut Kristus, aijagongan sita sipulelelek surukat néné; kéan lé sigeliakenen, teret iaili tetrenia katutoilakatnia ka sia putotonem бага

²⁴ Oto, surukat néné, bailiu sipasijajago sita teret oi nia Kristus ipaerú patabbaratta mitsá ka tubut Taikamanua, kalulut tonem bagatta ka tubut Kristus

²⁵ Bailiu kineneiget, aiailingan poí tetrenia ramatonem бага sirimanua ka tubut Kristus, oto táan ijajago sita surukat arat néné

²⁶ Kineneiget, kalulut amatonem'an poí bagamui ka tubut Kristus, oto pusaramuian ka tubunia; samba kalulut néné leú et bailiunangan kam tatogat Taikamanua

²⁷ Kam sangamberimui aturaúan kam ka onin Kristus, oto aian ka tubumui galai tubut Kristus

²⁸ Ka néné leú et, táan anai pabaggeiatnia, pagugulet ka sipuuuaja, taimanteu ka tainanalep. Kam sangamberimui amusarangan kam kalulut Jesus Kristus

²⁹ Ké aibakkatingan kam Kristus, oto aibailiuan kam sapunuteteu Abraham. Oto silómuian sitonéakenen Taikamanua.

4 ¹ Tápoi ai peilé ron'akenenku ka matamui: ké ai peilé nia masusulé ka sia sipasiiikep'aké sara ikemen, ai sia sipasijajago nia samba sipasikeli apa simagulai ka sia, teret ailina bajat puririmanuania siripot siteúakenen ukkuinia. Kelé sara pagugulet lé rakakau

nia, kenanen baí nia sipasiikep'aké
sangamberi pukayoat ukkuinia

²(4:1)

³Oto kisedda te ka sita néné:
Ainangan tá makekebbukat tubutta, ai
lé ipagugugulet'aké sita paketsa-ketsat
sikup-kup'aké polak néné

⁴Tápoi ka sara tetre sipasesese
siripot siteúakenen Taikamanua,
koiniakénangan Togania ka polak
néné. Togania néné, sinútúakenen sara
sinanalep sikukuddu ka kupkumen
surukat arat

⁵Kalulut néné, belaakénangan leú et sia
sikukuddu ka kupkumen surukat, bulé
ibailiu sita ka sita tatogat Taikamanua

⁶Kalulut putatatogana kam
Taikamanua, koiniakénangan Ketsat
Togania, bulé itugurú ka bagat
paatuatmui ale kam Sasarina, samba
ka bagat paatuatku kaku, iaté Ketsat
sipasisosogaaké, "Ukkui, ale Ukkui.

⁷Oto kam néné, táan pagugulet,
tápoi tatoganangan lé. Kalulut tatogat
Taikamanuangan lé poí kam néné,
oto akénangan ka kam Taikamanua
sangamberi sinarek'akenennia
kaunennia ka tubudda tatogania

⁸ Siburú tá nuagai kam nia Taikamanua, kalulut nenda te aibailiu kam pagugulet simagege, oniakenen taikamanua, tápoi tá Taikamanua

⁹ Tápoi kineneiget geti anuagaian kam nia Taikamanua, elé bulat sipasesese kuanen, aiagaian kam Taikamanua. Oto totoili peilé kodda kam ka tubut ketsat pupolongan néné, simasaggo tubu samba simagebá? Angoi nuobá kam ipupagugulet'aké kam mitsá paketsa-ketsat néné

¹⁰ Nugalai kam punen ka gogoi sikokoiakenen, laggó sikokoiakenen, samba rura sikokoiakenen

¹¹ Bulat ai lé aku mukakarat бага, baleú musisiboboi lé saggot tubukku kupasikeli kam

¹² Ale kam Sasarainamai! Bulat paniddogatku ka tubumui, bulé ibailiu kam kelé aku. Aipoí aku kaku néné leú et aibailiuan aku kelé kam. Beri sara anugalai kam sele ka tubukku

¹³ Kupaatu ai peilé nurerepdem kam aponia siboikí aikabaraji akupakakra Katuareman Simaerú ka tubumui. Paluluatnia geti, iaté, kalulut akumabesí lé

¹⁴ Ka tetret nenda, bulet beri sitsinmui ka tubukku, kenanen pagalaiat tubukku néné kelé sara pasisiboat ka tubumui. Tápoi anusiló lé kam aku kelé sara malaikat Taikamanua, elé kelé Jesus Kristus lé galainia

¹⁵ Bulat simakopet angkat bagamui lé ka tetret nenda. Tápoi kineneiget geti, kaipangan né nia puangkakat bagamui nenda? Bulat ai lé kuaagai, ka tetret nenda, matarek kam masikiok luikut matamui nuaké kam nia kaku, ké moi baí nugalaiaké kam nia

¹⁶ Kipa taleú aian lé nuooniaké kam aku néné saggakmui, kalulut patotoiláku katuripoat ka matamui

¹⁷ Sia sabagei bulat igegeilauan sia ragaba kam, tápoi tá maerú sipinaatudda ka tubumui. Sarat masitakkiaké patabbaratmui ka tubumai lé ragagalai, bulé numaré-ré kam ka tubudda ka gou-gou бага

¹⁸ Kirénangan tedda maerú tumagougou бага ka simaerú, sarat kau lé sarat kiseddangan nia, buí edda sarat ai lé aku ka talagamui, iapeité pugougoumuian бага

¹⁹ Ale kam tatogakku simanuntut bagakku! Kineneiget aitaddaakéan kupangorik mitsá kalulumui. Pangongorikku néné, kelé ipangorik sara ina sipususulé. Bulat riu-riu lé te kupangorik, ké tápei aisop-sop ka tubumui galai tubut Kristus

²⁰ Bulat amarepdem'an bagakku kineneiget mukuddu ka talagamui, bulé kukua kuanenku ka tubumui ka nga-nga bageian lé, aipoí táan kuagai peruketku ka tubumui

²¹ Ale kam Sasaraina siobá mukuddu ka kupkumen surukat, arep'aké peite kam aku! Kukua ka matamui apa siripot sitususurat ka bagat Buko Surukat Mose

²² Sedda ai aisurat'aké, ai sia rua tatogania si Abraham: Inania ka sia togonia sara, pagugulet, samba inania ka sia togonia bagei, sipuuja

²³ Toga sipututú-tú mata ka sara pagugulet, kelé simatuklé lé putútukat matania ka sia, iaté ka siteúakenenda sirimanua. Tápoi toga sipututú-tú mata ka sinanalep sipuuja geti, sipututú-tú mata kalulut palelengan Taikamanua lé

²⁴ Oto néné, momoi tupakei nia kelé sara kirekat. Sia ruadda tainanalep

néné, tupakeréaké lé nia rua pakerekat
baga: sara sibabara ka Leleú Sinai, iaté
si Hagar; tatogania sipututú-tú mata
sibailiu pagugulet

²⁵Oto si Hagar, iaté Leleú Sinai, ka
laggai Arab. Nia néné masilambang'aké
kota Jerusalem sambat sangamberi
sikukuddu ka bagania, sibailiu kineneiget
pagugulet

²⁶Tápoi Jerusalem ka manua, iaté
Jerusalem sipuuja, samba nia té nenda
inanta

²⁷Aipoí ka Buko Sipunenan, ai
atusurat'aké kisé, "Kau imaangká
bagam ekeu sinanalep sipututukkú
tubu, sitaipususulé! Kau nupuangká
baga samba nupugora baga ekeu
sitaiorik besit musulé! Aipoí tainanalep
sikaddiuakenen simanteunia lé maiigi
tuppai tubu ka tubudda tainanalep ka
ron lalep.

²⁸Ale kam Sasarainamai! Kam néné
ka kam, tatogat Taikamanua lé te kam,
sipututú-tú mata kalulut palelengan
Taikamanua; makeré lé kam kelé si Isak

²⁹Ka tetret nenda sia tatoga
sinútúakenen siripot kateú bagadda
sirimanua, masipaorei tatoga

sinútúakenen ka teú bagat Ketsat Sipunenan. Oto kisedda leú te kineneiget

³⁰Tápoi kipa atusurat'aké ka Buko Sipunenan? Sedda atusurat'aké kisé, "Kekle nia pagugulet sinanalep néné, karuadda tokania, aipoí toga sinútúakenen pagugulet néné tá ibabailiu nia sipasiikep'aké sambadda tatogat sinanalep sipuuja.

³¹Oto alé kam Sasarainamai, sita néné ka sita, tá sibara ka tatogat pagugulet sinanalep; tápoi sibara ka tatogat sinanalep sipuuja lé.

5¹Sita kineneiget aian sita muuja, kalulut aiujaaké sita Kristus! Ota bá oobáaké kam tubumui ka puujaatmui néné, samba buí nuobá kam ipagugulet'aké kam mitsá

²Repdem kam néné; ké nutiddou kam bulé rasunat kam, sedda toilá tá anai lulunia ka tubumui Kristus néné. Aku lé amasikua néné, sipuoni si Paulus

³Kuoleaké mitsá kukua ka matadda sipasitiddou musunat, buítá ienung'aké sangamberinia sikuat surukat

⁴Ké nubesíaké kam paerú mitsá ka tubut Taikamanua ka enungan pasieenung'aké surukat, sené toilá

patabbaratmui ka tubut Kristus atakkían. Oto aian lé kam muririmanua tá ka bagat panguruat katet bagat Taikamanua

⁵Tápoi ka kai geti, sarat masikaroni paroman Ketsat Sipunenan, sambat kalulut tonem bagamai ka tubut Kristus lé, ikakau kai Taikamanua paerú ka tubunia

⁶Aipoí ké amusarangan sita ka tubut Kristus, tatut, elé tá tatut enung pusunat, táan anai galainia. Tápoi bulat besíakenen geti, iaté mutonem бага ka tubut Jesus Kristus lé. Iageti putotonem bagatta néné, momoi imatoilá ka punununtukitta бага sabagei

⁷Siburú bulat mamateian lé tubumui nubesíaké kam mutonem бага ka tubut Kristus. Tápoi kineneiget, táan koí amabesí ka bagamui? Ka sonia aipatubbuji bagamui

⁸Kirénangan amasigalaiaké néné, tá Taikamanua sipasisosogai kam

⁹Arakua sirimanua, "Goisó raginia, tápoi pat pugónangan tapung simuimui.

¹⁰Tápoi kenanen kisedda, matonem peilé bagakku ka tubumui, tá nuobá kam nutut'aké kam sipinaatumui bagei, aipoí amusarangan sita ka tubut Kristus.

Iageti kirénangan kuagai, tá isoppi
ipaukumi sia Taikamanua, sipageu-geu
paatuatmui

¹¹ Kelé siorak ka tubukku kaku ale
Sasaraina, táan koí amuari rasaggangi
aku, kenanen aikukukua perlunia
peraturan pususunat? Oto ké aikukukua
kelé néné, bailiu singantoman'akenenku,
pagalaiat loiná siliktengan Kristus, táan
ibabailiu nia paukelat

¹² Bulat merú peilé nubelaaké kam sia
ka paamian sia sangamberi sipageu-geu
paatuatmui néné

¹³ Ale kam Sasaraina, aisogai kam
Taikamanua, bulé ibailiu kam sirimanua
sipuuja. Tápoi buí nupakei kam nia
puujaatmui néné ioi nuriu-riuaké
kam nugalai kam siobat bagamui.
Tápoi kau lé nupakaté kam бага
pasasambamui samba nupaletsei kam
katubu pasasambamui

¹⁴ Sangamberi surukat aian nia ka
surukat sisara néné, "Kau imakaté
bagam ka tubudda saaleinu sirimanua,
keleú katet bagam kekeu ka tubum.

¹⁵ Tápoi ké sarat pasaggak lé nugagalai
kam, páan ka kam, bulat kataímui lé te,
sangamberimui

¹⁶ Sipinaatukku kuanenku ka matamui geti, kísé: Bulé ipalulu kam Ketsat Sipunenan, buían nutut'aké kam siobat bagat akkulá

¹⁷ Apoí pasasaggak lé nia ka sia siobat akkulá, ka siobat Ketsat Sipunenan; kisedda leú et ka sia siobat Ketsat Sipunenan, pasasaggak lé nia ka siobat bagat akkulá. Aipoí bulat tai paobá lé sia ruadda néné, papparat taioinangan nugalai kam apa pá kiddiyet bagamui

¹⁸ Tápoi ké Ketsat Sipunenan ipalulu kam, taioinangan ikup-kup'aké kam surukat

¹⁹ Ka sia imatotoilá pubobotbot akkulá néné, iaté, ka pasigagalaiakéna puumunan, pulolinan, sitaimateú

²⁰ masibuluji sabulungan, pugagaut, pasasaggak, palalabá, tutut бага, rui isuggru nia golú, pasigagaba uktuknia sarania, masipasaragai, masimungku tubu

²¹ puoorot mata, muló ló simapuinengen, sarat mupunen, samba pasigagalaiakéna pabage-bagei simakeré kelé néné. Sangamberinia sikuakku néné, bulat kuparepdem kam kineneiget, kelé akukua ka matamui

siburú, sia sigalaiaké kelé néné, bulat
buji bagadda ibailiu sia sapaamian
Taikamanua

²²Tápoi, ké Ketsat Sipunenan ipalulu
sia, babara ka tubudda, iaté: Pakaté
baga pasasambadda, maangká bagadda,
marogdang puririmanuanda, maom
bagadda, maaggai bagadda, maerú sia
ka sirimanua, matopit sia

²³marepé paatuatda, momoi rajago
tubudda ka sikataí. Tá anai surukat ka
arat sipasikekeraaké kelé néné

²⁴Oto sia sibakkatit Kristus,
aramateiakéan galai tubut pusirimanuaat
ka tubudda iaté sangamberi pubobot-bot
akkulá sambat pukikiddiy бага ka sikataí

²⁵Aiakéan ka sita Ketsat Sipunenan,
puririmanua sibau, oto nia leú te
masikukupkup'aké puririmanuanta

²⁶Oto buí tamabuak kam paatuat, elé
tabaraaké kam pungú-ngukat bagadda
saalei ka pasasambatta, samba leú et
tapasí-sí kam бага pasasambatta.

6¹Ale kam sasarainamai! Ké ai sia
ka talagamui sigalaiaké jo, oto
kam te sipinalulut Ketsat Sipunenan
masipalululu sia ka enungan katuripoat.
Tápoi buítá ka leppet бага nugalaiaké

kam nia. Iageti kam leú et ka kam, kau nujago kam tubumui, buí ialá bagamui ka sigalaiakenennia néné

²Kau nuparop kam masibairat pugejaat bagadda saalei, bulé imatoilá rereddetmui nia surukat siaket Kristus ka tubumui

³Ké ai sia sikua tubuna, nia lé bulat abeu tiboí tubu, tápoi siripokatnia tá kisedda, oto aibokoían tubunia

⁴Buítá senemui musigoá, nuitsó kam tubumui, bulé iagai, maerú pá paraboatnia, elé tá. Ké maerú baí, momoi iumun'aké tubunia kalulut nenda. Tápoi buí ipakiréaké paraboatnia ka paraboatda sabagei

⁵Aipoí senen sirimanua masipepertanggung jawab'aké ka tubut Taikamanua sangamberinia sigalaiakenenda

⁶Sangamberidda sipasisisiló nganturat sibara ka tubut Kristus, kutiddou bulé raparubei ka tai gurudda sangamberinia simaerú, siikep'akenenda

⁷Buí rapataju kam! Tá momoi tupaguileaké Taikamanua! Aipoí apa raurep sirimanua, ialeú té nenda ramomonei

⁸ Ké iurep siripot pubobot-bot akkulánia, moneirangan leú et kamateiat sibara ka pubobot-botda néné. Tápoi ké raurep siripot sipinalulut Ketsat Sipunenan, moneirangan leú et purimanuaiat sipulelelek samba sitaitatátá, sibara ka Ketsat Sipunenan

⁹ Oto buí ingaú sita masigalaiaké simaerú, aipoí ké tá taariaké kam masigalaiaké kelé néné, ka sara tetre silótangan buat sigalaita

¹⁰ Kalulut néné, ka tetret ai peilé tetre simaerú ka sita, kau tagalai kam simaerú ka tubudda sangamberi sirimanua, tápoi bulat siboikí, iaté, ka tubudda sasarainanta sikeré tonem бага ka tubut Jesus Kristus

¹¹ Lelek'aké kam bulat sipulelelek, rubeiat sisurat'akenenku bulat tubukku, surat sabeu taká néné

¹² Sia sipabara tubuna siripot ka pusirimanuaat, sia leú te masipapaksa kam, bulé nutut'aké kam surukat pususunat. Tápoi ragagalaiaké nia geti kelé néné, bulé tá rapaorei sia tai Jahudi, kalulut siliktengan Kristus

¹³ Sia situt'aké surukat pususunat leú, tá airagagalaiaké siripot sikuat surukat.

Tápoi airabebesíaké nupusunat kam,
bulé ioi raumun'aké tubudda, kalulut
rereddetmui surukat néné

¹⁴Tápoi kaku geti, tá kuobá kuumun'aké
apa pá. Sarat Tuhanta Jesus Kristus,
simamatei ka loiná siliktenga lé, lepá.
Aipoí kalulut kamamateinia ka loiná
siliktenga, bailiu táan anai punku nia
polak néné. Samba kalulut polak néné
leú, bailiu, kelé amateian lé aku kaku
galainia

¹⁵Pagalaiat musunat, elé tá musunat,
tá nenda bulat besíakenen. Bulat
besíakenen geti, iaté ibailiu sita
sirimanua sibau

¹⁶Oto ka sia siparimanuaaké
kelé néné, samba leú et ka sia
sangamberidda sapaamian Taikamanua,
bulat aikukakaroni бага ikau ka sia
Taikamanua pabujaiat samba panguruat
katet bagania

¹⁷Oto mitsá, kutiddou, buían ibara
mitsá kasei pá sigejaaké bagakku, aipoí
ka tubukku kaku néné, aian buktinia,
masipatoilá, aku néné bulat sipasiului
Jesus

¹⁸Bulé mariu-riu ipanukani kam Tuhanta
Jesus Kristus. Amen. Hormatmai, Paulus

Efesus

1 ¹ Ale, kam sapaamian ka Efesus, simariu-riu mutonem baga ka tubut Jesus Kristus

² Aku kaku néné, sipuoni si Paulus, apostel Jesus Kristus siripot siteúakenen Taikamanua, bulat kukaroni baga, bulé ipanukani samba ibujai kam Taikamanua, samba Tuhan Jesus Kristus

³ Tuumun'aké lé Taikamanua Ukkui Tuhanta Jesus Kristus! Ipanukani sita, iaké ka sita sene ngamata panukanan, siorak ka puketsanan sibara ka manua, kalulut pusaraatta ka tubut Kristus

⁴ Ainangan tá ibabaraaké polak néné Taikamanua, aipiliyan sita Taikamanua, kalulut Kristus, bulé ibailiuké sita néné, Taikamanua, bakkatnia sikokoiakenennia, sitá kuat tubu ka sikataí ka matania. Kalulut nuntut bagat Taikamanua

⁵ teúakénangan nia Taikamanua, kalulut Jesus Kristus, ibailiuké sita bakkat toganian. Kirénangan nenda lé ikikiddiy galaiakenennia

⁶Tuumun'aké lé Taikamanua
sipulubeunan, kalulut Togania,
kopé katet bagania ka tubutta

⁷Kalulut kamamatei Kristus,
belaakénangan sita, Taikamanua,
ka ukuman kalulut seletta. Oto sené
momoi takua, aiappéakéan jotta

⁸Aigalaiaké nia geti kelé néné, kalulut
kopet nuntut bagania ka tubutta. Nuntut
bagania néné, iuruaké ka tubutta, bulat
asegéan aipaaturan samba bulat againa
pagalaiat tubutta

⁹Bulat sibara ka teú bagania lé, aipaagai
ka tubutta keleat sirencanaakenennia
néné Taikamanua. Oto aiteúakéan
Taikamanua, bulé sirencanaakenenia
néné, ienung'aké, iaté, ka sigalaiakenen
Kristus

¹⁰Sirencanaakenennia néné, iaté,
bulé sangamberinia sibaraakenennia, ka
manua sambat ka polak, musara ka tubut
Kristus, sibailiu utéra. Oto ilelepáaké
igalaiaké nia néné Taikamanua, ké iaili
tetrenia

¹¹Siripot ka siobat bagania, elé ka
teú bagania lé Taikamanua, igagaiaké
sangamberinia néné. Ka panandaatnia
peilé, aipiliyan sita Taikamanua, kalulut

obána ibailiu sita paamiannia, kalulut
pusasaratta ka tubut Kristus

¹²Eddangan nia sita néné boikí,
mukaronan ka tubut Kristus, samba
masiumun'aké Taikamanua, kalulut
pulatsanannia

¹³Kam leú et ka kam, aibailiuan
kam sapaamian Taikamanua, ka tetret
anuarep kam, palelengan Taikamanua,
iaté Katuareman Simaerú, sipaarau kam.
Matonem poí bagamui ka tubut Tuhan
Jesus Kristus, oto, akénangan toggaiat
pasiagai bakkatnia ka tubumui, iaté
Ketsatnia, sipinatonénia

¹⁴Ketsat nenda te masijajamin, sisilóta
sangamberi sitonéakenen Taikamanua,
ka tubudda sapaamiannia. Néné
masiparon tonem bagatta, bebelaakéna
sapaamiannia, Taikamanua. Oto
taumun'aké kam Taikamanua, kalulut
pulatsanannia

¹⁵Iaté lulunia, kelé akuarep,
aimatoneman bagamui, ka tubut Tuhan
Jesus, samba akuarep nuntut bagamui,
ka tubudda sangamberi paamian
Taikamanua

¹⁶taiariakékungan, masikua surá ka
tubut Taikamanua, kalulumui. Marei-rei

kukua onimui, ka paniddogatku, ka tubut Taikamanua

¹⁷ Masitiddou, bulé ipanguruat'aké Ketsatnia, Taikamanuan Tuhanta Jesus Kristus, Ukkui sipulubeunan, ka tubumui. Iaté Ketsat sikau kam musiku paatuat, samba sipatoilá Taikamanua ka tubumui, bulé nuagai kam nia

¹⁸ Samba leú et, kutiddou ka tubut Taikamanua, bulé ibukáaké matat paatuatmui, imatau-tau bulé imakolou ka bagamui, aponia siooi nukaroni kam akenen Taikamanua sipasisosogai kam. Samba leú, bulé nuagai kam, pusususukra nia panukanan simalainge, sinarek'akenen Taikamanua, ka sapaamiannia

¹⁹ Samba bulé nuagai leú kam, kipa kopet againia Taikamanua, mugalai ka gege simasut, ka tubutta simatonem бага. Geget Taikamanua néné, makeré kelé gege simakopé ron

²⁰ sipakeinia, ka tetret aisuruaké mitsá Kristus, ka simamatei. Lepá kaunangan ka tubunia, tiboí tubu simabuak, iageti kuddu nia kai kattoet Taikamanua, ka manua

²¹ Tiboi tubut Kristus, bulat abeu isó-sóaké nia, ka tiboí tubudda sapamarenta, samba sia sibara gege ka polak néné, sauté, tai tuan, elé kasei peilé pá sia sabagei, siabeu tiboí tubu; sia sipuririmanua kineneiget, elé sia sipuririmanua ka gogoi sibabara

²² Kalaakénangan sia Taikamanua, sangamberidda, ikau sia ka tei panei-neiet Kristus, samba pauddetnangan Kristus ka sapaamiannia, bailiu siutéaké sangamberinia

²³ Oto sia sapaamian, tuoniaké tubut Kristus, sisut'akénennia, sipasisusut'aké sangamberinia, ka senen kudduat.

2¹ Siburú, amatei kam, siripot ka puketsanan, kalulut jomui, sambat pasasabaumui surukat Taikamanua

² Ka tetret nenda, anutú-túaké kam, simatukle ragalaiaké taikapolak. Oto momoi takua, anureddet kam ngangan siutéaké manua, iaté ketsat, sipasikukup-kup'aké pupaaturananda sirimanua kineneiget, sitaimareddet ka nga-ngan Taikamanua

³ Kelé galai tubudda leú te ka sia, atagalaiaké kam ka sita siburú; sarat siobat bagat pubobot-bot akkuláta,

tagagalaia ké kam, sipaaakkup ka siobat
bagat tubutta sambat paatuatta. Ka
tetret nenda, aikerek'an sita golut
Taikamanua, kelé ka sabagei

⁴Tápoi bulat abeu katet bagat
Taikamanua! Abeu katet bagania ka
tubutta

⁵pat kenanen ai peilé sita ka kamateiat
ka puketsanan, kalulut puaapatta, tápoi
airimanuaakéan sita mitsá, sambat
Kristus. Oto sarat kalulut erut bagat
Taikamanua lé anusiló kam puaragat

⁶Kalulut atapusara kam ka tubut
Kristus, rimanuaakénangan sita mitsá ka
sita Taikamanua sambat Kristus, bulé
keré tapuuté kam sambat Krsitus, ka
manua

⁷Aigalaia ké nia geti kelé néné
Taikamanua, bulé ké iaili ka gogoi
sibabara, itsórganan nia sirimanua, bulat
kopet beunan katet bagania Taikamanua
ka tubudda. Nuntut bagat Taikamanua
néné, ipatoilá Taikamanua, ka erut
bagania ka sita, siakénia ka sita, iaté
sisilóta, ka tubut Jesus Kristus

⁸Manuntu bagat Taikamanua ka
tubumui. Iaté lulunia aipaarau kam,
kalulut tonem bagamui ka tubut Jesus.

Tápoi puaragat sisilómui néné, tá sibaraakenenmui saramui. Sarat kalulut panguruat Taikamanua lé. Oto buí ibara beri sara sibuaak'aké tubunia kalulut néné⁹ (2:8)

¹⁰ Aipoí sibaraakenen Taikamanua lé sita néné; kalulut Jesus Kristus, pamuinénangan sita Taikamanua bulé ioi tagalaiaké kam simaerú, siripot sinarek'akenennia ka sita

¹¹ Ale kam Sasarina, taú sipuoni tai Jahudi! Repdem kam galai tubumui siburú: Oniakenenda, "sitaipususunat", tai Jahudi, iaté sioniaké tubuna sipususunat (katukolobatnia, sibara toggaiat sigalaira sirimanua ka tubudda)

¹² Ka tetret nenda, tá anai pusaraatmui ka tubut Kristus, aipoí taitoi lé kam, tá atuaddeaké kam sapaamian sipiliy Taikamanua. Tá anai kam, ka apparat pakerekat бага, sibaraakenen Taikamanua ka paamiannia. Aipoí puririmanuamui ka polak néné, sitá karoniet бага sambat sitá Taikamanua

¹³ Tápoi kineneiget geti, kalulut amusarangan poí kam ka tubut Kristus, bailiu kam né oniakenen siburú simareunan ka tubut Taikamanua,

atupalegrengan kam ka tubunia, kalulut kamateiat Kristus

¹⁴ Aipoí bulat tubut Kristus lé, aipaaban sita. Samba aipatabbra sia tai Jahudi sambat taú sipuoni tai Jahudi, bailiu sisangabangsa. Kekre bukkú sisong'aké sia, iaté pasaggangan, aipakataían Kristus, ka tetret aibuluaké engania

¹⁵ Sangamberinia surukat aratda tai Jahudi, iaté parentania sambat peraturannia, aiposangan Kristus, bulé ioi rapusara karuadda bangsa néné, bailiu sangabangsa sirimanua sibau, sipusasara ka tubunia. Enungan kelé néné te, aigalai Kristus, ibaraaké paabanan

¹⁶ Kalulut kamamateinia Kristus ka loiná siliktenga néné te, aibaraaké pusaraatda karuadda bangsa néné, samba aipaaban sia ka tubut Taikamanua, bailiu tatá pasagganganda

¹⁷ Iaté lulunia aioi Kristus, masipakakra Katuareman Simaerú, pagalaiat paabanan ka tubumui karuamui; iaté ka tubumui ka kam taú sipuoni tai Jahudi, simareunan siburú ka tubut Taikamanua, samba leú et ka tubumui ka kam tai Jahudi, simalegre ka tubut Taikamanua

¹⁸ Kalulut Kristus, bailiu sita sangamberitta sipuoni bangsa Jahudi sambat sia taú sipuoni bangsa Jahudi, sambat kalulut Ketsat Sipunenan sara, oi talegerei kam nia Ukkui

¹⁹ Oto kam néné, táan tuooniaké kam taitoi, elé siooiaké. Kam kineneiget, amakeréan aibailiu kam, tatogat paamian Taikamanua. Kam néné iaté saladdou paamian Taikamanua

²⁰ Kam leú et aturióakéan kam ka uddut bongan sigalak'akenenda tai apostel sambat tai nabi, tápoi bukkú bongan inan arigi, iaté Jesus Kristus

²¹ Nia té nenda masipaoottot sangamberit galajet tubut lalep, bailiu Uman Taikamanua sikokoiakenen kai Tuhan

²² Kalulut pusaraatmui ka tubut Kristus, oto bailiu kam leú et ka kam, aian tupaoottot kam sambamui sabagei bailiu sara uman Taikamanua; iageti kuddu nia sedda Taikamanua sambat Ketsatnia.

3 ¹ Iaté lulunia, aku néné sipuoni si Paulus, atupenjaraaké aku, kalulut Jesus Kristus, sibailiu puuktunganmui kam, taú sipuoni tai Jahudi

² Kupaatu anuarep'an kam, kalulut erut bagania Taikamanua, akénangan ka tubukku galajet néné, kalulumui

³ Aipatoilá samba aipoiliat ka tubukku Taikamanua, rencanania, kelé sara keleatnia. (Néné akusurat'akéan siboikí, tápoi tá mananta

⁴ ké nubatsa baí kam nia ka kam, agaimuian nia ka kam, keleat pagalaiat tubut Kristus, kelé agaiku nia kaku.

⁵ Siburú, bulat beri poiliatna nia ka sirimanua, keleatnia néné. Tápoi kineneiget, bulat tubut Ketsat Sipunenan'an lé, amasipoiliat, ka tubudda tai apostel, sambat ka tubudda tai nabinia

⁶ Keleat Taikamanua néné, iaté: Kalulut Katuareman Simaerú, silórgan nia, ka sia taú sipuoni tai Jahudi, panukanan sibara ka Taikamanua. Siburú panukanan néné, sarat uktukra lé saratda bangsa Jahudi aitutarek'aké. Sia taú sipuoni tai Jahudi, aibailiuan sia laddou sara tubu simakeré, samba leú et sia, néné rasisiló leú te ka sia sangamberi sitonéakenen Taikamanua, sibara ka tubut Kristus

⁷ Aiaké kaku Taikamanua panguruat, iaté galajet masipakakra Katuareman

Simaerú. Oto sibara ka geget
Taikamanua sipugagalai ka tubukku lé,
akusiló panguruat néné

⁸ Ka talagat sangamberi paamian
Taikamanua, aku lé bulat sigoisó
tiboi tubu. Tápoi kenanen kisedda,
ka tubukku lé, aiaké nia Taikamanua,
panguruatnia néné: iaté galajet
masipakakra Katuareman Simaerú,
pagalaiat pukayoat Kristus, sitá anai
kasappurat, ka tubudda taú sipuoni tai
Jahudi

⁹ bulé kalulut aku, agairangan nia,
ka sia sangamberi sirimanua, kipa
ipaeerú Taikamanua, Sibaraaké
manua sambat polak néné, igalaiaké
sirencanaakenennia, sipinakele nia,
baranangan ka panandaatnia peilé, ka
tubudda taikapolak

¹⁰ Sipinaatunia poí ka sia Taikamanua,
bulé kineneiget, kalulut sapaamian,
agairangan nia sangamberi sibara gege
ka manua, ngamataat pusiikut paatuat
Taikamanua

¹¹ Sigalaiakenen Taikamanua néné,
iaté ka siripokat sirencanaakenennia,
sitaitatakkí, baranangan siburú, iaté

simatotoilá, ka sigalaiakenen Jesus
Kristus Tuhanta

¹² Oto kaputotonem бага ka tubut
Kristus, samba kalulut pusaraatta ka
tubunia, akénangan ka sita kebebasan,
masilegeri Taikamanua, bulat sibara ka
tonem бага simasut

¹³ Bulat paniddogatku ka tubumui
iaté; buí imakarat bagamui, kalulut
pangoringan siorikku kalulumui,
aipoí sangamberinia néné, sibailiu
katuerukatmui lé

¹⁴ Iaté lulunia kupurerekkuk, maniddou
ka matat Ukkui

¹⁵ Sibara ka tubunia lé, arasiló ka sia
sangamberi sikukuddu ka manua sambat
ka polak, galai tubudda sikokoiakenen

¹⁶ Amaniddou aku ka tubut
Taikamanua sipulubeunan, bulé
iparon pupaaturanmui, kalulut
Ketsatnia

¹⁷ Bulé kalulut tonem bagamui ka
tubut Kristus, kuddu Kristus ka bagat
paatuatmui, oto nuntut bagangan lé
ipubobongan samba ikukup-kup'aké
puririmanuamui

¹⁸ Amaniddou aku ka tubut Taikamanua,
bulé makeré kaooi nia nukeruji kam nia

sambamui sapaamian Taikamanua, kipa lionia, nantania, buaknia, samba kerunia nuntut bagat Kristus

¹⁹ sitaioi isinogi nia pupaatuananda sirimanua. Bulé nuagai kam nuntut bagat Kristus, pat tim ka tubumui pagalaiat putubuat Taikamanua simasut

²⁰ Oto kalulut geget Taikamanua, sipugagalai ka tubutta, galaiakénangan nia ka tubutta Taikamanua, saliu peilé siniddouta elé sipinaatutta

²¹ Bulé sarat Taikamanua tuumun'aké simariu-riu, pat paninínangan tubunia ka paamian, kalulut Jesus Kristus. Tuumun'aké lé Taikamanua, teret buru-burú! Amen.

4 ¹ Iaté lulunia, aku siukum'akenen néné, kalulut masipuukú galajet Tuhan, kutiddou ka tubumui, bulé nusiripoki kam puparaboananmui, siripot sipuoni, sinogai Taikamanua

² Buítá mariu-riu kam ka repet paatuat, leppet бага samba ka om бага. Patoilá kam punununtut bagamui, ka pasirorop'akémui saalei

³ Bulat besíaké kam murimanua ka aban бага, bulé ioi imariu-riu, nujago

kam pusaraat, sibaraakenen Ketsat
Sipunenan

⁴ Aipoí sarat sara lé ka sia tubu, Ketsat
ka sia leú et sara lé. Oto kiseddda leú te
kam ka kam, aisogai kam Taikamanua,
bulé pukakaronanmui leú, simakeré

⁵ Kisedda leú et, sarat sara lé Tuhan,
tonem бага, samba leú et pasiraukat,
sara lé

⁶ Taikamanua leú et ka sia, sarat sara lé,
iaté pu-Ukkuietda sangamberi sirimanua.
Nia lé pu-Tuhanen polak samba manua,
sipugagalai ka tubut sangamberinia,
samba sipasikukup-kup'aké ka bagat
sangamberinia

⁷ Sene-senenta néné, tasisisiló kam
panguruat, siripot akenen Kristus ka
tubutta

⁸ Kelé ka sitususurat ka Buko
Sipunenan, "Kelé aitusakai ka kudduat
simakopé buak, abbitnangan maigi
tawanan, samba kaunangan leú et
panguruat ka tubudda sirimanua.

⁹ Oto ké takua "atusakai nia" oto momoi
takua atugorosotnia siboikí, pat aili ka
kudduat simakopé repé, ka polak néné

¹⁰ Tápoi nia situgogorosot néné leú te
mitsá, atusakai ka kudduat simakopé

buak, pat saliu peilé buaknia sangamberi manua, samba pat sut sangaliot manua sambat polak, kaoijanannia

¹¹ Nia té néné masikakau pangurat ka tubudda sirimanua, sangarubeiat ipauddet bailiu apostel, sabagei bailiu nabi, sabagei bailiu sipakakra Katuareman Simaerú, iaté muepanggelis, samba leú et sabagei ipauddet muguru paamian, samba sipasikeli sapaamian

¹² Aigalaiaké kelé néné geti Kristus, iaté, bulé tusut'aké puaagaira sapaamian Taikamanua, ioi rapuukú galajet Tuhan, samba rabangun tubut Kristus

¹³ Oto sita sangamberitta néné, bailiu sara, kalulut putotonem bagatta simakeré, samba pukokolou ka bagatta simakeré, pagalaiat tubut Togat Taikamanua. Bailiunangan leú et sita simatuá putotonem бага, memei mabuburú, memei iurau kasusutnia, kelé Kristus

¹⁴ Bailiu táan kelé galai tubudda tatoga, galai tubutta ka sita néné, simalabbei ipaguilak samba simalabbei ipagirit kaipa-kaipa, sene ngamata nganturatda sirimanua simapajoat. Papepeddangan

sirimanua ka pusisikut paatuatda sikataí néné

¹⁵ Buí kisedda galainia ka sita néné! Tápoi buítá tapatoilá lé kam puroipoat ka nuntut бага simasut, bailiu ka sangamberinia, memei mabuburú, memei masusut pueerúta, kelé Kristus, sibailiu utéta

¹⁶ Ka pupasikelenannia, malelek katugalangan sangamberinia laddou tubu, samba ai patabbaratnia ka senen paulakat tolatnia. Samba ké baí senen laddou néné, mugalai bulat tubut pugagai sipulelelek, puriu-riunangan leú et imasikebbukat tubu néné, samba maronnangan leú et ka nuntut бага

¹⁷ Oto kalulut néné, ka onin Tuhan, kuron'aké kukua nia ka matamui: buían iului puparaboananmui, kelé puparaboananda sitaiagai Taikamanua peilé, sarat masipaatu sitá galai

¹⁸ Aipoí paatuatda ka sia amagep-gep'an. Tá raagai purimanuaiat siaket Taikamanua, kalulut tá poí anai apa pá siagaira, pagalaiat Taikamanua, kalulut kelat paatuatda

¹⁹ Táan raagai aila, pat ka siripot pubobo-bot akkuláranan lé ratutut'aké,

samba siobáranan lé, ragalaiaké
pusilaingeat

²⁰Tápoi ka sia geti Kristus, kelé
siagaimui, tá kelé kisé galai tubunia

²¹Anuarep'an kam pagalaiat tubunia!
Samba kelé puonimui sipasiuluinia,
aigelaiakéan kam pagalaiat tubut
Taikamanua, sikukuddu ka tubunia

²²Oto kalulut néné, kutiddou ka kam,
bulé nugalak'aké kam tubu siburú,
sambat galai puririmanua siburú,
pukataiket kalulut paná-nakat ka siobat
bagania, siabbít nia ka puobat tubu
sikatai

²³Buíta tubauaké ketsat sambat
paatuatmui

²⁴Kau nupuparaboat kam siripot
puparaboananda sirimanua sibau,
sipaaakkup ka siobat bagat Taikamanua,
iaté puarat tubu simakolou, simaroipo,
samba simaliná

²⁵Oto kam Sasarainamai
sangamberimui, buían tebaí nupaboko
kam mitsá. Kau bulat sibulatnia nukua
kam apa pá, ka tubudda saaleimui
pasasambamui, aipoí sita sangamberitta
néné, sarat laddou Kristus lé sita

²⁶ Ké mugolú kam, buí nuobáaké kam tubumui, igiritsini ibara jomui. Buí sarat pugogolú nugagalai kam papparat belé sulu

²⁷ bulé tá ibara ka sia oggaknia Sanitu

²⁸ Sia simaubui tubu manangkou, kau raariaké nia rapanangkou. Tápoi kau lé imomoaké tubunia mugalai, ibara purimanuaiatnia ka enungan simaroipo, bulé ioi irop'aké simagebá

²⁹ Ké manibo kam, bá kukua kam nga-nga sikataí. Tápoi tiboiet panganturat lé nukakau kam, masirop'aké sabagei. Aipoí tiboiet nenda, sikau katuerukatda sipasiaarep

³⁰ Buí nubaraaké kam pureuregat bagat Ketsat Sipunenan. Aipoí aimeteraiakéan kam Ketsat Sipunenan, ibailiu kam bakkat Taikamanua. Iageti Ketsat Sipunenan leú, masijajamin kaooi nia Gogoi Kabelaiat ka tubumui

³¹ Karit'aké kam ka bagat paatuatmui ngut-ngut бага, puaatat бага ka golú, samba golú. Ariaké kam mugerei samba masipulagaji sirimanua. Ariaké kam mulagá бага samba apa pá pupaaturan bagei, simakeré kelé nenda

³²Tápoi kau lé imaerú bagamui, samba nupakaté kam бага pasasambamui, samba kau nupaappé kam jo pasasambamui, kelé aiappéaké jomui ka kam Taikamanua, kalulut Kristus.

5¹Kam ka kam néné, tatogat Taikamanua lé kam, simanuntut bagania; oto buítá nubesíaké kam, masiului galai tubut Taikamanua

²Puparaboananmui leú, kau isaluki nia punununtut бага, kelé ipununtuki sita бага ka sita, Kristus. Bulat pat buluakénangan tubunia, bailiu buluakenen simasingin, samba bulat obaket bagat Taikamanua

³Sikauman Taikamanua lé kam. Oto táan mateú ibara ka talagamui, pusilaingeat samba galai tubu sitaipasesese, elé puaalau бага. Buí ibara enunganda sabagei, masisusúaké ka tubumui, rakua ai leú nugagalaiaké kam ka kam, kelé néné

⁴Samba tá leú et mateú, nukua kam nga-nga pakata-kataí, elé nga-nga pakailaat samba nga-nga sitaimateú kuanen. Tápoi kau lé nukua kam surá ka tubut Taikamanua

⁵ Bulat repdem kam sikuakku néné: sia sipusisilainge, elé sipupaparaboat sitaipasesese, elé simaalau бага (paraboat kelé néné, makeré lé nia atupaniddogi sabulungan). Oto sia néné, bulat tá momoi ibailiu sia paamian, utéakenen Kristus sambat Taikamanua

⁶ Buí ialá bagamui ka tiboiet sitá lulu. Aipoí néné te, masibabaraaké golut Taikamanua, ka tubudda sitaimareddet ka ngangania

⁷ Oto, buí nupaaleiaké kam sia sirimanua kelé néné

⁸ Aipoí kam siburú, ai lé kam ka bagat pugepgeman. Tápoi kineneiget, aibailiuan kam laddou paamian Taikamanua. Oto momoi takua, aian kam ka bagat pató. Oto kau nupurimanua kam ka bagat pató

⁹ Sibara ka pupatokat lé poí, ibabara sene ngamata galajet simaerú, puroipoat sambat pulilinat paatuat, ka matat Taikamanua

¹⁰ Bulat besíaké kam nuagai kam apa sipuoni siobat bagat Tuhan

¹¹ Buí nugalaiaké kam galajet sitá galai, kelé sigalaiakenenda ka sia, sikukuddu

ka bagat pugepgeman. Tápoi kau lé
nupakaila kam nia, galai tubu kelé néné
¹² (Aipoí sangamberinia sigalaiakenenda
sipinakele, bulat beri itutiboi, maila sita.

¹³ Sangamberit sitorojit pató, bulat
matoilá ituitsó

¹⁴ Aipoí sangamberi simakokoinong
ituitsó, iaté nenda pató. Iaté lulunia
itukukua, "Suruaké ekeu, sipeperrep,
samba suruaké ekeu ka kamateiat!
Mutotoro te Kristus ka tubum.

¹⁵ Oto kalulut néné, kau nulelek'aké
kam nia bulat sipulelelek, kipa enungnia
puririmanuamui. Buí nuului kam kelé
galai puririmanuanda sitaiagai paatuat;
tápoi kau kelé galai puririmanuanda
simasiku paatuat

¹⁶ Pakei kam sangamberinia oggak
simaerú siooi ka tubumui, aipoí tetretta
kineneiget, iaté tetre sikataí

¹⁷ Buí kelé sitaiagai paatuat kam néné,
tápoi kau lé nutaiko kam, apa kiddiyet
bagat Tuhan

¹⁸ Buí nupupuineng kam, kalulut
pulolómui anggur, aipoí ka sia anggur
néné, masipakataí puririmanuamui lé.
Tápoi kau lé ikupkup'aké kam Ketsat
Sipunenan

¹⁹ Pakei kam nga-nga sibara ka masmur, urai pasiumun samba urai paamian ka patiboatmui. Samba leú et, ké muurai kam masiumun si Tuhan, kau bulat sibara ka angkat bagamui

²⁰ Iageti ka sangamberinia, kau mariu-riu nukua kam pusurakat ka tubut Ukkui Taikamanua, ka onin Jesus Kristus Tuhanta

²¹ Bulé ioi nuhormati kam Kristus, kau nupareddet kam katubu pasasambamui

²² Kam tainanalep, kau numareddet kam ka nga-nganda taimanteumui, kelé ka tubut Tuhan

²³ Aipoí simanteu lé uté, ka sinanalepnia, kelé iutéaké sapaamiannia ka sia Kristus, samba nia té nenda, Rimata Sipaarau sapaamian, sibailiu tubunia

²⁴ Kelé purereddetda sapaamian ka tubut Kristus, buítá kisedda leú te purereddetda tainanalep, ka taimanteura, ka sangamberinia

²⁵ Kam taimanteu, kau imakaté bagamui ka tubudda tainanalepmui, kelé katet bagania ka sia Kristus, ka paamiannia, pat buluakénangan tubunia, punu tubudda sapaamian

²⁶ Aigalaiaké nia geti kelé néné Kristus, bulé ioi ipaliná sia sapaamiannia, kalulut ngantoman, samba kalulut oinan pasiraukat; lepá segéakénangan sia ka kabei Taikamanua

²⁷ Ka enungan kelé nenda te, aigalai Kristus, ka tubudda sapaamian, bulé rapurió ka bagat pulatsanan, maliná samba ka matania, sitá loloijet samba sitá kuat tubu ka sikataí

²⁸ Oto kisedda leú te ka sia taimanteu, buítá imakaté bagadda ka tubudda tainanalepra, kelé leú et katet bagadda ka tubudda ka sia. Aipoí sipununtuki бага sinanalepnia, tubunia lé galainia aipununtuki

²⁹ (Beri pei poí sia, ataagai kam, sipulagaki бага tubuna. Tápoi bulat ipasisikeli samba ibabají lé tubunia, kelé pasisikelina sapaamiannia ka sia Kristus

³⁰ Ataagai geti kam nia ka sita kelé néné, kalulut laddou Kristus lé poí sita.

³¹ Kelé sitususurat ka Buko Sipunenan, sipasikukua kisé, "Iaté lulunia, ikakaddiuké ukkui sambat inania simanteu, iloplop'aké tubunia ka sinanalepnia, bailiu sarangan lé sia ruadda.

³² Bulat makeru saú-saúketnia tiboiet néné. Kupatabbrania néné, ka patapinan karuania, Kristus sambat paamian

³³ Tápoi tiboiet néné leú et, ai patapinannia ka tubumui ka kam, iaté: Kau imakaté bagadda táimanteu, ka tubudda tainanalepra, kelé katet bagadda leú et ka tubudda ka sia. Ialeú et ka sia sangamberidda tainanalep, buítá rabesíaké rahormati taimanteura.

6 ¹ Kam tatoga! Kelé sipuoni sipasiului Kristus, kau nureddet kam nga-nganda saeppumui, aipoí nenda lé simateú galaiakenen

² "Hormati kam sia saukkui sambat sainamui" néné poí surukat siabeu, siaket Taikamanua sibailiu janji

³ iaté, "Bulé ibara uktuknu samba imananta puririmanuam, ka polak néné.

⁴ Kam leú sipuoni saukkui! Bá babaraaké kam pugolukatda tatogamui, tápoi urau lé kam sia ka kolou puririmanua samba ka nganturat Tuhan

⁵ Iageti kam leú et sipuoni sapagugulet! Reddet kam nga-nganda tai tuanmui ka polak néné. Kau nugalaiaké kam nia, bulat ka hormat samba ka purereddetmui bulat sibara ka muinet paatuatmui, kelé

baí ka tubut Kristus lé anugalaiaké kam nia

⁶Buí ka tetret airajajago lé kam, nugagalaiaké kam nia, sarat bulé ibara katumun sibara ka sirimanua lé. Tápoi kau lé nugalaiaké kam nia, kelé sipuoni pagugulet Kristus, sipasirereddet siobat bagat Taikamanua, bulat sibara ka muinet paatuatmui

⁷Iageti kelé galajet, galaiakenenmui nenda, siripot galajetda sipuoni pagugulet, kau nugalaiaké kam nia, ka angkat бага, nukau kam nia, kelé si Tuhan lé galainia, nupuuukú kam, tá sarat sirimanua

⁸Kau nurepdem kam néné, senen sirimanua, pagugulet pá nia elé sipuuja, makeré lé rasiló silit sigalaira simaerú, sibara kai Tuhan

⁹Kisedda leú et kam ka kam, sipuoni tai tuan! Buítá kisedda leú et nugagalaiké kam, ka tubudda sapaguguletmui. Buí sarat masipaanuji sia nugagalai kam. Repdem kam, kam ka kam néné, samba sapaguguletmui, makeré lé nupuuté kam ka sara majikan, iaté si Tuhan sikukuddu ka manua. Aipoí ka sia si Tuhan, tá iiggat kasei sirimanua nia

¹⁰ Oto kalepakatnia, kukua ka matami,
kau imaron paatuatmui, kalulut puroron
sibara kai Tuhan, aipoí amusarangan
kam ka tubunia

¹¹ Pakei kam sangamberi pugalai
pakeiet ka pasaggangan, siaket
Taikamanua ka tubumui, bulé nuom kam
masisaggangi sangamberinia patajuat
Sanitu, simapajoat néné

¹² Aipoí saggangietta, tá sirimanua,
tápoi geget pasanitu-sanitu sipasikukup-
kup'aké tetre sikataí néné. Saggangietta
iaté, pagege-geget ketsat sikataí,
sipasikukup-kup'aké manua

¹³ Oto kalulut néné, kau nupakei kam
sangamberi pakeiet, iaté pamatei ka
pasaggangan siaket Taikamanua, bulé
ké iaili tetrenia ipuaili sikataí, momoian
nukalaaké kam saggakmui. Bulé pat lepá
nupasaggak kam, bulat talagat gegemui
peilé

¹⁴ Buítá mariu-riu nusuk-suk kam
tubumui. Kau nupakei kam topit ka
tubut Taikamanua, kelé akkik tengamui,
samba linat paatuat, kelé leppeimui labá

¹⁵ Bulé puobá mei masipakakra
Katuareman Simaerú, sibaraaké erut
puririmanua, sibailiu kelé sipatumui

¹⁶ Bulé senen tetre nupakei kam, putotonem bagamui ka tubut Tuhan, kelé korabbímui, masikekreaké tai saggak. Putotonem bagamui ka tubut Tuhan néné, momoi ipéaké sangamberinia lagat logui sanitu sibara omai

¹⁷ Alá kam puaragat Taikamanua, kelé tutu labá, samba tiboiet Taikamanua, kelé lanjau sibara ka Ketsat Sipunenan

¹⁸ Kau sialei paniddogat nugalaiaké kam sangamberinia, masitiddou paroman sibara ka tubut Taikamanua. Paniddou kam ka senen tetre sipasesese, kelé singantruakenen Ketsat Sipunenan ka tubumui. Buítá mariu-riu nupanuksuk kam, buí nuobáaké kam tubumui. Kau imariu-riu nutiddouaké kam sia, sangamberi paamian Taikamanua

¹⁹ Iageti aku kaku leú et, tiddouaké kam aku, ka tubut Taikamanua, bulé ké manibo aku, akénangan ka tubukku Taikamanua, tiboiet sipasesese. Samba bulé kumagege, masisegéaké keleat Katuareman Simaerú

²⁰ Aipoí kalulut Katuareman Simaerú néné te, aibailiu aku pakoiniet Kristus, ka polak néné. Oto kineneiget aian aku ka bagat penjara. Oto tiddouaké kam aku,

bulé kumagege masipaarep Katuareman
Simaerú, kelé simateú tiboakenenku

²¹ Ai leú ipungu-nguan'aké nia ka
matamui sarainanta si Tihikus, iaté sara
simatopit masipuukú galajet Tuhan,
sangamberinia pagalaiat tubukku néné,
bulé imakolou ka bagamui, kipa aku
kineneiget samba galajetku

²² Iaté lulunia akukoiniaké nia, ioi
iailiaké kam, bulé ipungu-nguan'aké,
kipa sibabara kineneiget ka tubumai,
ka tubumui sangamberimui, itupusuibi
bagamui

²³ Bulé Ukkuita Taikamanua, samba
Tuhanta Jesus Kristus, masikau pusaraat
ka sapaamian, samba pukatekat бага
ka pasasambadda, samba riu-riu
putotonem bagadda ka tubut Kristus

²⁴ Bulé isukat'aké kam Taikamanua,
kam sangamberi simanuntu бага ka
tubut Tuhanta Jesus Kristus, iaké ka kam
katet бага sitaipepé. Hormatmai, Paulus

Filipi

1 ¹ Kam sangamberimui Sasaraina sapaamian Taikamanua sikukuddu ka Pilippi, samba sipusasara ka tubut Jesus Kristus. Samba leú et kam tai panei-nei samba tai bajá gareja ka paamian! Aku néné si Paulus sambat aleiku si Timoteus pagugulet Jesus Kristus

² bulat kukaroni kai бага bulé Ukkuita Taikamanua sambat Tuhanta Jesus Kristus masipanukani samba masibujai kam sangamberimui

³ Senen kurepdem kam, suráakékungan Taikamanua kalulumui

⁴ Ialeú et, ké kutiddouaké kam sangamberimui ka Taikamanua, bulat ka gorat бага lé kupaniddou

⁵ Oto bulat surá lé kukua ka tubut Taikamanua, kalulut riu-riunia nurop'aké kam aku masipakakra Katuareman Simaerú sibara ka Taikamanua, baranangan ka gogoi siboikí, pat aili kineneiget

⁶ Kirénangan bulat tubut Taikamanua lé aitaddaaké galajet simaerú néné

ka talagamui. Oto matonem bagakku, iriu-riuaké nia Taikamanua, galajet néné ka kam teret lepá, ka tetret iaili Gogoi kaoijanan nia mitsá Jesus Kristus

⁷ Kirénangan tedda mateú isuggru aku pupaaturan kelé néné ka tubumui, aipoí siririu-riu lé legremui ka bagat paatuatku. Paobánangan pei bagei, beri kam leú et ka kam amakeréan atasiló kam panguruat Taikamanua, sipanguruat'akenennia ka tubukku, ai aku kineneiget ka bagat penjara, elé atuujaakéan pá aku, masibela elé masijago puriurigat katukakarat Katuareman Simaerú

⁸ Ai lé iaagai Taikamanua kopet ngelei bagakku ka tubumui, kurepdem kam, bulat nuntut бага pusarainaat sibara ka Jesus Kristus

⁹ Néné lé bagat paniddogatku ka tubut Taikamanua kutiddouaké kam, iaté bulé memei makokopé nuntut bagamui ka tubut Taikamanua, samba memei pakakaté kam бага pasasambamui, ialeú et bulé memei itutuppai puaagaimui pagalaiat puroipoat samba masisiku paatuatmui masipaatu galaiekenen bulat ka siripokat enung galaiakenen

¹⁰ Kalulut néné momoian nupabaggei kam kipa bulat simaerú, bailiu liná kam ka kuat tubu sikataí samba ka sangamberi pasuk-sungan sisusúakenen ka tubumui ka kaoijanannia mitsá Kristus

¹¹ Pusukkranangan sigalaimui bulat tubut simaerú, sibaraakenen Jesus Kristus; oto kalulut nenda bailiu tulatsat'aké sambat tuumun'aké onin Taikamanua

¹² Bulé nuagai kam nia, sangamberi sipuaaili ka tubukku néné, masituppai lé igidda sipasiaarep samba sikatonemi Katuareman Simaerú

¹³ Kalepakatnia agairangan nia sangamberidda sipasijajago istana samba leú et sia sabagei sikukuddu ka laggai néné, kalulut puukúku lé Kristus, atuukum'aké aku

¹⁴ Katupepenjaraakéku néné, aibailiu lé nia masituppai ron tonem bagadda kai Tuhan, sangamberi tai Kariten ka laggai néné; samba leú et memei lé magegege sia masisegéaké patonekat Taikamanua. Bulat beri lotóra

¹⁵ Kirénangan tedda ai sia piga pá ka talagadda sipakakra Katuareman pagalaiat Kristus; kalulut sit-sit bagadda

samba obára lé pagolú. Tápoi ka sia geti sabagei, kalulut ai sipinaatudda simamurni lé arapakakra pagalaiat tubut Kristus

¹⁶Aragalaiaké nia geti ka sia kelé néné, kalulut nuntut bagadda lé ka tubut Taikamanua sambat ka tubukku, aipoí araagaian kokoiniakéna aku Taikamanua, masipatoilá ka tubudda sirimanua, pububulat sibulatnia Katuareman Simaerú néné

¹⁷Tápoi ka sabagei geti ka sia, tá erúra rapakakakra Katuareman Simaerú, tápoi masigaba uktukra lé saradda. Arapaatu poí bulé kalulut sigalaira néné, tuppainangan reu-reu bagakku ka bagat penjara

¹⁸Tápoi tá leú anai galainia! Aipoí kenanen kipa pá ragalai, elé bulat sibara ka linat paatuatda pá, elé ai sipinaatudda bagei sitaipasesese, tápoi aramuneng'akéan Kristus. Oto mangká bagakku. Oto kaku, riu-riu lé kelé kisedda paatuatku

¹⁹ai lé poí kuaagai, kalulut pasopaat ka paniddogatmui samba kalulut paroman Ketsat Jesus Kristus, belaakérangan aku

²⁰Tápoi bulat kiddiyet bagakku geti, elé bulat kukakaroni бага, iaté, bulé buí imajajak galajetku. Tápoi senen tetre lé kupasikaroni бага, sarapei kineneiget, ibara gegekku, pat bailiu sangamuinénia tubu ketsatku néné, ai aku muririmanua elé amateian pá aku, atulatsat'akéan onin Kristus

²¹Aipoí kaku, sarat Kristus lé, ailiakenenku ka puririmanuangku néné! Ialeú et kaku néné, matei, kelé sara puuktungan lé

²²Tápoi ké kapuririmanuangku ka polak néné peilé momoi kugalaiaké galajet sibaraaké puuktungan, oto táan kuagai kipa pá kupipiliy

²³Aipoí karuungasilá nia lé ititik-tik aku. Bulat siobáku geti kaku, iaté masikaddiuaké polak néné, kuei mukuddu ka bet-bet Kristus, aipoí nenda peilé bulat maerú

²⁴Tápoi kalulumui néné, bailiu maerú peilé eddangan nia boikí kukuddu ka polak néné

²⁵Bulat aikukakatonemi бага sangamberinia néné. Iaté lulunia kuaagai riu-riu nia kukuddukku ka talagamui, alé kam sangamberimui

Sasaraina, ioi kurop'aké kam, bulé
memei maroron samba memei maangká
bagamui mutonem бага ka tubut Tuhan

²⁶Oto ké toili aku, kuoi kuailiaké kam,
bailiu kam néné sipusasara ka tubut
Jesus Kristus, kokkopé beunan nia
katuumunanmui, kalulut aku

²⁷Oto kineneiget, bulat besíakenenku,
iaté bulé nupuparaboat kam siripot ka
sikuat Katuareman Simaerú pagalaiat
tubut Kristus. Oto, elé paaili peilé pá
sita, elé táan pá paaili sita mitsá, tápoi
kuobá kuarep riu-riu nia ron pusaraatmui
samba kerénia pupaaturanmui samba
puobámui masiperjuang'aké putotonem
bagamui, siripot ka sikuat Katuareman
Simaerú sibara ka Taikamanua

²⁸Kau imariu-riu numagege kam,
buí numalotó kam ka tubudda
saggakmui. Oto bailiu anupatoiláan
kam kakakaladda, tápoi kam geti
mamanang kam; aipoí Taikamanua lé
imamanang'aké kam

²⁹Panguruat siaket Taikamanua ka
kam poí, tá sarat matonem lé bagamui
ka tubut Kristus lepá; tápoi buítá leú
mangorik kam, kalulut Kristus

³⁰ Oto kineneiget, amakeréan
taperjuang'aké kam Katuareman
Simaerú, kelé siitsómui
siperjuang'akenenku siburú, samba
perjuang'akenenku peilé mitsá teret
kineneiget, kelé siarepmui kineneiget.

2¹ Numaroron geti kam, kalulut
anupusara ka tubut Kristus. Samba
atupusuibi kam, kalulut punununtukina
kam бага Kristus! Aipalululu kam Ketsat
Sipunenan, samba kam leú poí, ai leú
kam panununtu бага samba ai kam
pakakaté бага pasasambamui

² Oto kau bulat nugalaiaké kam
nia néné, bulé imangká bagakku ka
tubumui, iaté: Kau ibara keret бага
samba punununtut бага simakeré,
samba pusaraat paatuat samba leú et
sisara ailiakenen

³ Buí nugalai kam apa pá, kalulut
masigaba uktukmui saramui, elé ioi
nuumun'aké kam tubumui. Tápoi kau
leú ka repet paatuatmui sene-senemui
nukua kam tubumui, sabagei peilé abeu
tiboí tubu ka tubumui

⁴ Buí sarat tubumui nupasisikeli kam,
tápoi kau leú nupasikeli kam sia sabagei

⁵ Kau nupuparaboat kam kelé
puparaboanan Jesus Kristus

⁶ Aipoí siripokatnia baí, makeré lé nia
ka tubut Taikamanua, tápoi kenanen
kisedda, tá aipuletsei pu-Taikamanuaat
ka tubunia

⁷ Tápoi aiputatálé tubunia, samba
aibailiuaké lé tubunia, kelé sara
pagugulet. Aipusirimanua lé tubunia,
samba matoilá galai puririmanuania,
keré kelé sirimanua

⁸ Aiparepé lé tubunia, bailiu sarat
mureddet lé aigalai ka tubut Taikamanua
pat matei nia ka loiná siliktenga

⁹ Iaté lulunia, bulat aimakopé
aibuak'aké nia Taikamanua, samba aikau
ka tubunia gege sisaliu gege ka sabagei

¹⁰ Oto bulé ituhormati Jesus, bailiu
sangamberi makluk sikukuddu ka
manua, samba sangamberi sikukuddu
ka polak, samba leú et sia sikukuddu ka
taikabaga, murekkuk masipaniddogi nia

¹¹ Sangamberi masimuneng'aké, Jesus
Kristus néné, iaté si Tuhan; kalulut néné,
bailiu tuumun'aké Taikamanua Ukkui

¹² Iageti kalulut néné, ale kam
Sasaraina simanuntut bagakku, kelé kipa
riu-riu nia nureddet kam nga-ngangku

ka tetret ai peilé aku ka talagamui,
bulé kisedda leú et kineneiget, sarapei
parereunanta néné, bulé mariu-riu
nuredet kam nga-ngangku. Aipoí kam
néné, aiarauakéan kam Taikamanua.
Oto bulat galaiakéan kam simariu-riu,
bulé masut lelek puririmanuanmui néné.
Bulat kau nugelaiaké kam nia ka bagat
hormat samba ka lotó

¹³ Aipoí bulat tubut Taikamanua lé
amugalai ka bagat paatuatmui, anuobá
samba aoi anugalaiaké kam siobat
bagat Taikamanua

¹⁴ Oto galaiakéan kam sangamberinia,
tápoi buí ka ngú-ngú, elé ka pagolukat

¹⁵ Sedda te ioi nupatoilá kam ka
tubudda sirimanua sabagei, kam néné,
iaté tatogat Taikamanua, sitá lolojet,
simaliná paatuat samba simaroipo
baga, ka talagadda sirimanua sikataí
paraboat samba sijo néné. Ialeú et,
ka tetret nusegéaké kam Katuareman
Simaerú sipurimanuaji sirimanua, ka
tubudda néné, kau ibailiu kam kelé toro,
sitoroji taikapolak. Oto ké nugalaiaké
baí kam nia kelé néné, bulat aian
sikau angkat bagakku kalulumui, ké
iaili tetrenia ioi mitsá Jesus Kristus.

Aipoí néné te masipatotoilá kababarat
buania siperjuang'akenenku samba
sigalaiakenenku

¹⁶ (2:15)

¹⁷ Tá taagai elé tumamateiaké lé
aku. Logauku bailiu kelé buluat
piliakenen ka tubut buluakenen
sibuluakenenmui ka Taikamanua,
masipatoilá putotonem bagamui ka
tubunia. Oto ké nenda baí muaili ka
tubukku, bulat mangká bagakku kalulut
nenda, bailiu puangkátangan бага
sangamberitta

¹⁸ Ké pei kisedda leú et angkat bagamui
ka kam, bulé imakeré angkat bagatta

¹⁹ Matonem bagakku rorop'akéna aku
Jesus Kristus, bulé imaruei kukoiniaké
si Timoteus ibalou kam, kuarep
katuaremanmui, ibara pusuibiat bagakku

²⁰ Aipoí sariania lé si Timoteus aleiku
sikeré paatuat, sipaatu pugoraat
bagamui

²¹ Tápoi sia geti sabagei, sipasikeli
tubuna lé ragagalai, tá airapaaatu kipa
ragagalai masirop galajet Kristus

²² Bulat matamuian amasiitsó kababarat
lulunia ka tubut Timoteus néné. Bulat
aimomoakéan tubunia masipaalei

aku mugalai masipakakra Katuareman
Simaerú sibara ka Taikamanua. Karuamai
néné, kelé toga ka ukkui lé kai galainia

²³ Oto agaiku lé kipa puteterat ilepá
pakarokku, iapeité koiniakékungan nia
ioi ka tubumui

²⁴ Beri leú et kaku, matonem bagakku
taimauuju nia kuoi kaku kubalou kam,
kalulut paroman Tuhan

²⁵ Iageti kelé Sarainanta si Epaproditus
sikoiniakenenmui masirop'aké aku,
kupaatu maerú peilé kukoiniaké nia
mitsá ka kam. Bulat aipaaleian aku
mugalai galajet Kristus samba ka
perjuanganku

²⁶ Bulat amarepdem'an bagania
ka tubumui, ale kam Sasarina
sangamberimui, samba leú et bulat
tá mangká bagania, kalulut aarepmui
katuareman pubebesí nia

²⁷ Kirénangan tedda amabesí nia, bulat
aian lé goisó ilalangó nia. Tápoi makaté
bagat Taikamanua ka tubunia; elé, tá
sariana aipukateki бага Taikamanua,
tápoi beri aku leú et kaku, aipukateki aku
baga Taikamanua, bulé buían imakopé
kupureu-reu бага mitsá

²⁸Ialeú te lulunia imakokopé
kubebesíaké kugugluaké nia ioi ka
tubumui, bulé nupaaili kam, imangká
bagamui mitsá. Oto aku kaku leú et,
táan iparerekké bagakku, masipaatu

²⁹Oto siló kam nia aleita néné, bulat
ka angkat бага siripot saraina sikeré
tonem бага, ka tubut Jesus Kristus.
Kau numahormat kam ka tubudda
sangamberi sigalaiaké kelé sigalainia
néné

³⁰Kalulut ituturi mugalai galajet
Kristus, bara besínia, pat malegre matei.
Aibuluaké engania masirop'aké aku ka
onimui sangamberimui.

3¹Kalepakatnia ale kam
Sasarainanku, kau imagora
bagamui, amusarangan poí kam ka tubut
Tuhan. Tá ipabibigbing ngu-ngungku
masikua mitsá ka kam, kelé ka suratku
ka tubumui siboikí, aipoí sigalaiku néné
simaerú lé, sibailiu katuaragtmui

²Oto jago kam tubumui ka tubudda
sikataí paraboat, iaté sia simateú
tuoniaké, 'jó-jó'. Bulat aipoí rabebesíaké
bulé tusunat sia sangamberi sirimanua

³Oto sita lé amasisiló sunat sipulelelek,
tá sia. Ka sita, Ketsat Sipunenan

lé ingangantru sita tapaniddou ka tubut Taikamanua, samba takua kam surá kalulut pusaraatta ka tubut Jesus Kristus. Aipoí ka sita néné, tá aitaakaroni kam бага enung punen siripot ka pusirimanuaat

⁴Tápoi kaku geti siripokatnia momoi kukaroni бага enung punen siripot ka pusirimanuaat. Aipoí ké ai baí sia sara sipasikakaroni бага kalulut kababaranian paluluatnia ipukaronan sedda, oto sarapeite aku kaku

⁵Balu ngagogoi peilé burúnia aiputútú matakku, sunatdangan aku. Tai Israel lé aku, iaté sibara ka muntogat Benyamin; bulat tubut tai Ibrani lé aku. Ka purereddet ka surukatda tai Jahudi, momoi takua, tai Parise lé aku

⁶Elé momoi takua, aisaliu peilé ka sia ronku ka arat, pat paoreikungan sapaamian. Oto ké siripokat ka arat Jahudi, aku néné, oniakenen bulat sirimanua sipulelelek, sitá anai kuat tubu ka sikataí

⁷Tápoi kalulut Kristus, bailiu sangamberinia oniakenenku sibailiu puuktungan, akuoniakéan lé nia kineneiget sirugiaké akungan lé

⁸Iageti tá sarat nenda kuooniaké sirugiaké aku, tápoi sangamberinangan lé akuoniaké sirugiaké aku.

Siikep'akenenku kineneiget peilé makeppu saki kaku; iaté akuagaian Jesus Kristus, Tuhanku. Kalulut Kristus, katei-teiakékungan sangamberinia. Kelé poráan lé kuooniaké nia sangamberinia néné, akusesengan poí Kristus

⁹Samba leú et, bulat amusarangan aku ka tubunia. Táan kalulut sibesíakenenku sarakku, aimaerú patabbaratku ka tubut Taikamanua, iaté kalulut reddetku ka surukat. Tápoi aimaerú geti kineneiget patabbaratku ka tubut Taikamanua, kalulut tonem bagakku lé ka tubut Kristus. Oto aimaerú patabbaratta néné, sibara ka Taikamanua lé, kalulut putotonem bagatta ka tubut Jesus Kristus

¹⁰Bulat besíakenenku geti sara lé, iaté masiagai simakolou Jesus Kristus, samba masipuuktungi geget Taikamanua sipasiririmanuaaké nia ka kamateiat. Kuobá kuorik kai nia sambamai samba leú kuobá kumakeré kai ka kamateiatnia

¹¹ Bulat kukaroni бага, bulé irimanuaaké aku kaku mitsá Taikamanua ka kamateiat

¹² Tá te masikua kaooiniangan kaku, elé amakapplungan sangamberinia kaku. Tápoi riu-riu lé kubesiaké nia kualá hadia sinarek'akenen Kristus kaku. Aipoí nenda lé lulunia aioppu ialá aku, ibailiuaké aku bakkatnia

¹³ Tápoi kam ale Sasaraina, tá leú te kukukua tubukku akusilóan hadia néné. Tápoi ai sangamata galaiakenenku, iaté masikalipogi apa sikukuddu ka tei-teiku, kubesiaké kuamiaké ailiakenenku sikuddu ka mata

¹⁴ Iaté lulunia tá kuaariaké pabalau masiailiaké tetre ailiakenen, bulé ioi kuikep'aké kamanangan, iaté mukuddu ka laggai manua, aipoí nenda lé lulunia aisogai sita Taikamanua ka onin Jesus Kristus

¹⁵ Oto sita simatuá putotonem бага, buítá tagalaiaké kam kelé kisedda. Tápoi ké ai peilé sia ka talagamui sipaatu bagei, ai leú ikolouaké nia Taikamanua ka tubumui

¹⁶ Sarat néné lé repdementa: Buítá tatut kam peraturan kelé situt'akenenta teret kineneiget

¹⁷ Ale kam Sasaraina sangamberimui! Kau nuului kam paraboatku. Akuakéan kai uluietmui simaerú, oto uluian kam paraboatda sipasitutum'aké paraboatmai

¹⁸ Eddangan nia imaole kukua nia ka matamui, tápoi kukukua lé nia mitsá ka matamui ka sou bagakku, aipoí ai peilé sia sipupaparaboat masipakataí bagat kamateiat Kristus ka loiná siliktenga

¹⁹ Oto kakakataí lé te iaailiaké puririmanuanda néné, aipoí pubobot-bot akkulára lé rapu-Tataikamanua. Pakailaat nenda lé rauumun'aké; aipoí sarat siobat polak lé rapaaatu

²⁰ Tápoi sita geti ka sita, tatogat laggai manua lé sita. Oto sedda leú te ibabara ioi mitsá ka sia Rimata Sipaarau sita, iaté Tuhanta Jesus Kristus. Nia té nenda ngenaetta ka ngelei бага

²¹ Tubutta simasaggo samba simaanaget néné, siliynangan nia Kristus, bailiu kéan lé tubunia simalatsat. Aipoí aoi aigalaiaké nia kelé néné, kalulut kababarat gege ka tubunia, masikalaaké sangamberinia.

4¹ Oto kam Sasaraina simanuntut bagakku, bulat kau sibulatnia putotonem bagamui ka tubut Tuhan. Bulat amarepdem'an bagakku ka tubumui! Aipoí kam'an lé kukakaroni бага sipagora bagakku

² Kam leú et samaniumai Euodia samba si Sintike! Kau ipusara paatuatmui siripot paaleiat sikeré tonem бага kai Tuhan Jesus

³ Kutiddou ka tubum ale saraina sunsogos, aleiku ka simatopit, kutiddou ka tubum, bulé nurop'aké sia samaniuta ruadda néné. Aipoí sia néné, bulat ararop'akéan aku simakopé, masipakakra Katuareman Simaerú sibara ka Taikamanua; kelé si Kelemen samba leú et sangamberidda sabagei sipaaleiaké aku mugalai. Oninda ai ka bagat Buko Purimanuaiat

⁴ Kau imariu-riu nupugora kam бага, aipoí amusarangan kam ka tubut Tuhan. Oto kuoleaké mitsá masikua ka matamui: kau nupugora kam бага

⁵ Kau raitsó nia sangamberi sirimanua erut bagam. Aipoi táan mauuju ioi mitsá si Tuhan

⁶ Buí imakarat bagamui masipaatu apa pá onia. Tápoi sangamberinia besíakenennu, segéaké ka paniddogatnu ka tubut Taikamanua. Ialeú et apa simagulai, kau mariu-riu nusegéaké nia ka tubut Taikamanua, sialei pusurakat

⁷ Bulé pabujaiat Taikamanua, sitaioi rakeruji sirimanua, masipasikeli enga sambat paatuatmui, sipatatabbra ka tubut Jesus Kristus

⁸ Kalepakatnia, alé kam Sasaraina, kutiddou kai ka tubumui, bulé nugurúaké kam ka bagat paatuatmui sangamberi simaerú, simateú umun'akenen kalulut erúnia, iaté, pagalaiat katuripoat, apa sipuoni simahormat, simaadil, simamurni, simakai-kai, samba simaerú

⁹ Galaiaké kam sangamberi sigelaimui, samba sisilómui sibara kaku, iaté ka titiboatku elé ka sigalaiakenenku. Bulé Taikamanua, bubuakat pabujaiat, masipaalei kam sangamberimui

¹⁰ Bulat makopé angkat bagakku murimanua, siripot sipusasara ka tubut Tuhan, aipoí táan tagai burú, iapeí paatumuian kipangan aku kineneiget. Tápoi tá te masakua elé anukalipogingan

kam aku; kalulut tatat oggakmui lé
masipatoilá obámui masirop'aké aku

¹¹ Ialeú et kukukua néné, tá kalulut tatá
nia kaku, aipoí akutukelingan tubukku,
apa lé bara, iangan té

¹² Akuorik'an mugebá, tápoi mukayo leú
et akunanam'an. Akusesengan keleatnia
masienungi puririmanua néné, kenanen
kipa pá bara; elé ai aku mukakayo, elé ai
aku mugegebá, elé aimaiigi sibabara ka
tubukku, elé tá anai sibabara ka tubukku

¹³ Tápoi kalulut ron siaket Kristus ka
tubukku, oi kuom'aké nia sene ngamata
sibabara ka tubukku néné

¹⁴ Bulat amaerú anurop'aké kam aku ka
reu-reu bagakku. Oto sigalaiakenenmui
néné ka tubukku, bulat maerú

¹⁵ Alé kam Sasarainamai ka Pilippi!
Siagaimuian leú, ka tetret akukaddiuaké
Makedonia, iaté ka panandaatnia
akupakakra Katuareman Simaerú,
saramui lé sapaamian amasirop'aké aku;
elé saramui lé aipaalei aku masinanam
puuktungan, elé masiorik rugi

¹⁶ Ka tetret ai aku ka Tessalonika,
akutiddou paroman ka tubumui, piga
ngamitsáan pá anuaké kam paromanmui
ka tubukku

¹⁷ Oto tá sarat masisiló panguruatmui kugagalai, tápoi ai leú et obáku masiitsó buat sigalaimui simaerú, kelé tuppai igit puuktungan sisilómui

¹⁸ Akusilóan sangamberinia panguruatmui. Bulat amulegeian kopet iginia! Akusilóan sangamberinia sikaumui ka tubut Apaproditus. Atuléléan sangamberinia besiakenenku. Oto panguruat siakémui kaku, bulé bailiu nia singin buluat, sibuluakenen ka matat Taikamanua, sisilot Taikamanua ka angkat бага

¹⁹ Bulé Taikamanua paniddogietku, sipususukkra pukayoat sikukuddu ka tubut Jesus Kristus, masisut'aké sangamberinia simagulai ka kam

²⁰ Tuumun'aké lé Ukkuita Taikamanua, teret buru-burú! Amen

²¹ Segéaké salamku ka tubudda saalei sapaamian Taikamanua, sipusasara ka tubut Jesus Kristus. Samba leú siló kam salamra saaleiku sené

²² Segé leú et salamra ka sia sangamberi paamian Taikamanua ka laggai néné, sarapei sia sikukuddu ka lalep Kaisar leú, segé salamra ka tubumui

²³ Bulé Tuhanta Jesus Kristus
 masipanukani kam sangamberimui.
 Hormatmai, Paulus sambat Timoteus

Kolose

1 ¹ Ale kam Sasarainamai sapaamian Taikamanua ka Kolose simatopit musara ka tubut Kristus! Siripot puaapostel Jesus Kristus, sipauddet Taikamanua, aku sipuoni si Paulus, samba leú et aleita si Timoteus, bulat kukaroni kai бага, bulé Ukkuita Taikamanua ipanukani samba ibujai kam sangamberimui

² (1:1)

³ Akuarep'an kai putotonem bagamui ka tubut Jesus Kristus, samba leú et punununtut bagamui, ka tubudda sangamberi paamian Taikamanua. Iaté lulunia, ké kutiddouaké kai kam, tá muaari kukua kai surá ka tubut Taikamanua, Ukkui Tuhanta Jesus Kristus

⁴ (1:3)

⁵ Anumatonem kam бага ka tubut Jesus Kristus, elé anumakaté kam бага ka tubudda sapaamian Taikamanua, iaté kalulut kakaronimui бага aakéna ka tubumui Taikamanua sinarek'akenennia ka manua. Anuarep kam nia néné,

iaté ka tetret atusegéaké ka tubumui
Katuareman Simaerú bulat sibulatnia

⁶Katuareman Simaerú sibara ka
Taikamanua néné, tusegéaké ka
sangaliot polak. Oto kalulut néné, riu-riu
ipanukani sia Katuareman Simaerú,
kelé panunukanina kam ka kam,
taddanangan anuarep kam panguruat
katet bagat Taikamanua, sambat bulat
anuparimanuaaké kam

⁷Aisegéaké nia néné ka tubumui ale
Sasaraina, iaté si Epapras, aleimai
mugalai, simanuntut bagamai. Nia
néné sipugagalai galajet Kristus,
samba simakopé topit lé nia, sibailiu
puuktunganta

⁸Oto ka tubunia lé akuarep kai nia néné,
iaté kalulut geget Ketsat Sipunenan, oi
anupakaté kam бага pasasambamui

⁹Ialeú té lulunia, tá ipuaari kutiddouaké
kai kam ka Taikamanua, kalulut akuarep
kai sigalaiakenenmui néné. Akutiddou
kai ka tubut Taikamanua, bulé iaké ka
kam Ketsat Sipunenan sikut paatuat,
samba pukokolou ka бага simasut, pat
muiné nuagai kam apa siobat bagat
Taikamanua

¹⁰ Kalulut néné, oi nuparaboat'aké kam siobat bagat Taikamanua, samba leú et riu-riu nubaraaké kam puangkakat bagania, oto bailiu apa lé nugalai kam, sarat masibaraaké puerukat. Samba puaagaimui leú et pagalaiat Taikamanua, memei leú iurau

¹¹ Bulé kalulut geget Taikamanua sipulubeunan, iron'aké kam, pat oi nuom'aké kam masiorik sangamberinia paoreat, ka angkat бага

¹² samba sialei pusurakat ka Ukkui. Aipoí Ukkui lé aipateú kam, masisiló sangamberinia, sinarek'akenen Taikamanua, ka paamiannia, ka purimataatnia sipulu latsat

¹³ Nia leú et aibelaaké sita ka geget pugepgeman, ikau sita ka purimataat Togania, kilibet bagania

¹⁴ Kalulut Togania, bela sita; oto katukolobatnia, aiappéakéan jotta Taikamanua

¹⁵ Kristus néné, iaté tularat Taikamanua, sitaimatotoilá. Kristus néné, iaté toga sikebbukat. Nia sipuboboikí abara, ka tubut sangamberi sibaraakenen

¹⁶ Aipoí ka oninia lé aibaraaké nia Taikamanua sangamberi sibabara

ka manua sambat ka polak, iaté sangamberinia simaiitsó samba sitaimaiitsó, samba leú et paketsa-ketsat, sipasikukup-kup'aké samba sipasiuutéaké. Sibara ka tubut Kristus sambat uktuk Kristus lé, aitubaraaké manua sambat polak néné

¹⁷ Aipoí ainangan tá babara sangamberinia néné, aian turerere kababarania ka sia Kristus. Samba kalulunia lé aoi ikudduji kudduatnia sangamberinia

¹⁸ Nia lé utet tubunia, iaté sapaamiannia. Nia lé poí bakkat purimanuaiatra sapaamiannia. Nia lé toga sikebbukat, sisuruakenen Taikamanua siboikí ka simamatei, bulé sarat nia lé bulat abeuakenen, belé peilé ka pabage-bagei

¹⁹ Bulat tubut sarania lé Taikamanua amasiteúaké, bulé sangamberinia sibabara ka tubut Taikamanua, ai leú et sangamberinia ka tubut Togania

²⁰ Ka onin Toga nenda leú te aiteúaké nia Taikamanua, bulé bara mitsá paerukat ka tubunia, sangamberi sikukuddu ka polak samba sikukuddu ka manua. Aigalaiaké nia néné Taikamanua,

iaté ka kamateiat Togania ka loiná
siliktenga

²¹Kam siburú, areu kam ka tubut
Taikamanua. Ai lé nusasaggangi
kam nia, kalulut paraboaat samba
pupaatuananmui sikataí

²²Tápoi kineneiget, kalulut kamamatei
Togania, paerúnangan nia mitsá
Taikamanua, patabbaratmui ka tubunia.
Ka enungan kelé nenda lé, aioi atuabbít
kam ka matat Taikamanua, simaliná
samba sitá loloiet samba leú et sitá kuat
tubu ka sikataí

²³Tápoi buítá mariu-riu putotonem
bagamui ka tubut Tuhan Jesus, samba
tá ipaooksak kam ka katonemietmui.
Buí igelok nia pukakaronanmui, sisilómui
ka tetret anuarep kam Katuareman
Simaerú, sibara ka Taikamanua.
Atupaarep'an ka sangaliot polak
Katuareman Simaerú néné. Kalulut
nenda leú te, aibailiu aku kaku néné,
sipuoni si Paulus, pagugulet

²⁴Oto kineneiget mangká bagakku
mangorik, kalulumui. Aipoí kalulut
pangongorikku ka putubuat néné, oi
kusut'aké aponia oringeniet Kristus peilé,
kalulut paamiannia, iaté sipuoni tubunia

²⁵ Aikoiniaké aku Taikamanua,
masipuukú paamiannia, kalulumui.
Oto buítá kupakakra sangamberinia
Katuareman Simaerú sibara ka
Taikamanua néné

²⁶ iaté Katuareman Simaerú, sipinakelet
Taikamanua ka tubudda sangamberi
sirimanua, ka piga ngotu ngarura
pá situsasabau. Tápoi kineneiget,
aipatoiláan ka tubudda sapaamiannia

²⁷ Aiobá ipatoilá nia ka matadda
sapaamiannia, Taikamanua, kalulut
ibesíaké, bulé raagai nia ka sia, kopet
erú samba latsatnia keleatnia néné,
sibailiu puuktunganda sangamberi
sirimanua. Keleat Taikamanua néné,
iaté: Ai nia mukukuddu Kristus ka bagat
paatuatmui; oto néné masikua, kam
leú et ka kam, anupuuktungingan kam,
pulatsanan Taikamanua

²⁸ Kristus néné te kupakakakra kai,
ka senen sirimanua. Kuparepdem,
elé kugelaiaké kai sia sangamberidda
néné, bulat teret ka tubumai,
kugagalai kai, kupagaba kai enungnia.
Sipinaatumai iaté, bulé kei tuabbit sia
sangamberidda ka matat Taikamanua,
amakapplungan puaagaira pagalaiat

siorak ka puketsanan, kalulut arapusara
ka tubut Kristus

²⁹Oto bulé ibara néné, bulat
momoakékungan tubukku mugalai.
Pakeikungan sangamberinia puroron,
sipugagalai ka tubukku ka gege simasut,
sipanguruat'akenen Kristus ka tubukku,
masiperjuang'aké sangamberinia néné.

2¹Kuobá nuagai kam, kipa besit ka
bagakku mugalai, kalulumui, samba
kaluludda tai Laodikea, samba leú et sia
sitaipasiiitsó aku peilé

²Akugalaiaké nia geti sangamberinia
néné iaté, masiron'aké paatuatda, samba
bulé rapakaté бага pasasambadda,
samba bulé maron pusaraatra. Bailiu
kalulut néné, kope-kopé ikolou ka
bagadda, samba kopé rakatonemi elé
raagai keleat Taikamanua, iaté Jesus
Kristus

³Aipoí Kristus lé masipatotoilá
sangamberi pusiikut paatuat, samba
puaagai Taikamanua, sipinalipputnia
siburú

⁴Kutitiboi nia geti ka matamui, bulé
buí rapajo kam kasei pá, sarapei sia
simananam mutitiboat néné

⁵ Oto kenanen parereunan sita, tápoi oniaké lé kam nia, kelé ai aku ka talagamui. Bulat mangká bagakku kuitsó pukekeret bagamui, samba puroron tonem bagamui, ka tubut Kristus

⁶ Ale kam Sasarina, anusilóan kam Jesus Kristus, sibailiu Tuhanmui. Oto kalulut néné, kau nupusara kam ka tubunia

⁷ samba kau leú et nupuungat kam ka tubunia. Bulé Kristus, bailiu loulogatmui ka pasigagalaimui purimanuaiatmui. Ialeú et, kau memei makokopé ron nia, tonem bagamui ka tubut Kristus, siripot sigelaiakenen ka tubumui. Samba leú et, kau ipubuggra ka bagat paatuatmui, pasikukua surá ka tubut Taikamanua

⁸ Bulat kau nujago kam tubumui, buí aialá bagamui ka titiboat, siripot pusisikut paatuatda taikapolak, sitá anai lulu, aipoí masipapepe sirimanua lé. Titiboat siripot pusisikut paatuat néné, tá ka tubut Kristus aibara. Tápoi sibabara ka sipinaatudda sirimanua, samba sibabara lé ka tubudda paketsa-ketsat, sipasikukup-kup'aké polak néné

⁹ Aipoí sangamberi galai putubuat Taikamanua, ai ka tubut Kristus, iaté ka pusirimanuaatnia

¹⁰ Ialeú et, kalulut pusaraatmui ka tubut Kristus, bailiu akénangan ka kam Taikamanua, purimanuaiat simasut. Aipoí Kristus lé, siutéaké sangamberi paketsa-ketsat, sipasikukup-kup'aké elé sipasiuutéaké polak néné

¹¹ Kalulut pusaraatmui ka tubut Kristus, oto momoi takua, atusunat'an kam, tápoi tá te sunat sigalaira sirimanua. Tápoi sigalai Kristus lé, sipasibebelaaké kam, ka kupkumen pubobot-bot akkulá sijo néné

¹² Aipoí ka tetret aturaú kam nenda te, aturateiaké kam sambat Kristus; iageti kalulut pasiraukat leú, suruakénangan leú kam mitsá ka kam Taikamanua, ka simamatei sambat Kristus, kalulut tonem bgagamui ka geget Taikamanua, sipasisusuruaké Kristus ka simamatei

¹³ Siburú amateian kam, siripot ka puketsanan, kalulut jomui, aipoí, tá atusunat kam siripot ka putubuat. Tápoi kineneiget aisuruakéan kam mitsá Taikamanua sambat Kristus.

Aipoi aiappéakéan sangamberinia jotta,
Taikamanua

¹⁴ samba aitatáakéan surat
utakta, sipasitataiko sita, ka enung
galaiakenen simakopé sané. Tápoi kelé
aitusiliktengaaké surat utakta néné ka
loiná siliktenga, posanangan sangamberi
sele, siorak'akenen Taikamanua, ka
tubutta

¹⁵ Ka tetret ai nia ka loiná siliktenga,
Kristus, péakénangan gegedda
paketsa-ketsat sipasikukup-kup'aké
samba sipasiuutéaké polak néné. Lepá
bailiuakénangan sia néné, igbungenda
sirimanua simigi; ka tetret aiaabbat
sia kelé tawanan, ka pugittebat
kamanangannia

¹⁶ Bulat bá paoobá kam tubumui
raseleaké kam, kalulut ka komen élé ka
loketmui, élé ka pagalaiat punen sabeu
ka puaranan, élé punen ibela laggó
sabeu, élé pagalaiat gogoi Sabbath

¹⁷ Aipoí tápei nia nenda sangamberinia,
kelé ailiggounia peilé nenda
ngenaakenen siooi. Tápoi bulat
katutoilakat sangamberinia néné, iaté
Kristus

¹⁸ Buí nuobá kam rapajo kam, sia sipakau tubuna, kelé simarepé paatuat, samba sipaniddogi samalaika. Bulat makopé raumun tubudda siripot pupaaturan polak, raumun'aké ibara sara siitsot matadda simakokoi

¹⁹ pat táan Kristus raloloulogi ka purimanuaiatra, kelé siutéaké sia. Aipoí ka pupasikelanan Kristus lé, itupasisikeli sangamberi laddou tubu néné, sipataddet pauilakatnia; samba puurau nia leú et, siripot teú bagat Taikamanua leú et

²⁰ Amakeréan anumatei kam Kristus, samba aibelaakéan leú et kam Taikamanua, ka kupkumenda paketsa-ketsat, sipasikukup-kup'aké polak samba manua néné. Oto angoian lé, pupaparaboatmui néné, kéan lé puparaboananda sirimanua sikip-kup'akenen polak néné? Angoi peilé nurereddet kam nia surukat sipasikukua

²¹ "Buí nurape kam néné", "Buí nunanam kam néné", elé, "Buí nubek-bek kam néné"

²² Sangamberinia surukat néné, sarat sangapakeiat lé, páan, táan anai katukaunan nia. Aipoí ka sia

pasuru-surukat néné, elé pangantoma-
ngantoman néné, sibaraakenenda lé
sirimanua

²³ Kirénangan tedda ituitsó, bulat
asapprungan aitupaatu enungnia; ai
panánakat ka bagania, bulé tupaniddogi
samalaika, elé tuparepé paatuat, samba
bulé tupaorei tubu; tápoi sangamberinia
néné, tá irorop'aké sirimanua, bulé
ioi ramuriaké pubobot-bot akkulára
sirimanua.

3 ¹ Airimanuaakéan kam mitsá
Taikamanua, sambamui Kristus.
Oto kau nubesíaké kam, nubakkati
kam pagalaiat sangamberi siorak laggai
manua, ka kudduat purimataat Kristus
sambat Ukkui Taikamanua

² Sedda lé kau kam pupaaturanmui,
buí siorak pagalaiat sibara ka polak néné
nupaatu kam

³ Aipoí kam néné, amateian kam, tápoi
purimanuaiatmui, ai nia kalilippunan
sambat Kristus, ka tubut Taikamanua

⁴ Bakkat purimanuaiatmui sipulelelek,
iaté Kristus. Oto ké amatoiláan baí nia,
bailiu kam leú ka kam, ei kam sambat
Kristus, ka pulatsanannia

⁵ Oto kalulut néné, kau numateiaké kam siobat bagat polak néné, sipakataí purimanuaiatmui, iaté kelé pusilaingeat, muparaboat sitaipasesese, pubobot-bot akkulá, obat mugalai sikataí, samba leú et puaalau бага, (aipoí alau бага néné, makeré lé galainia, masibuluji sabulungan)

⁶ Galai tubu kelé néné te, sibaraaké golut Taikamanua, ka tubudda sitaimareddet ka nga-ngania

⁷ Aipoí kam siburú, anutut'aké kam siobat bagania, ka tetret ai peilé ikukup-kup'aké kam

⁸ Tápoi kineneiget, ribbaiaké kam sangamberinia sikataí ka tubumui néné; báan pugogolú kam, élé báan bebetu kam tubumui mugolú, élé ai peilé isusuggru kam pulalagat бага ka tubudda sabagei. Buían imaarep ka ngu-ngumui nga-nga laga, élé nga-nga sikataí

⁹ Buían nupaboko kam katubu, aipoí paraboat siburú, samba sangamberi galai tubunia sikataí, anugalak'akéan kam

¹⁰ Aipoí kineneiget, aiakéan ka kam Taikamanua, puririmanua sibau.

Aibailiuan kam sirimanua sibau, samba riu-riu lé ibauaké nia, sipasibabaraaké nia, iaté Taikamanua, iei ka siripot tularat tubunia. Katukolobatnia iaté, bulé nuagai kam nia Taikamanua, bulat sipulelelek

¹¹ Kalulut néné, tatá pabaggeiat tubudda tai Jahudi, élé taú sipuoni tai Jahudi, sipususunat, élé sitaipususunat. Táan anai pabaggeiat tubudda taitoi élé sitaiagai arat, sapagugulet, élé sipuuuja; aipoí amamuinéan ka tubut Kristus sangamberinia, samba amusarangan nia ka tubudda sangamberidda

¹² Kam néné ale Sasarina, sikauman Taikamanua lé kam. Oto makaté bagat Taikamanua ka tubumui. Aipiliyan kam samba aikokoiaakéan kam, bailiu bulat bakkatnia. Iaté lulunia, kam néné, buítá leú nupatoilá kam, nuntut bagamui ka saalei, buítá maerú bagamui ka saalei. Kau imarepé paatuatmui samba kau leú imaleppe bagamui. Ialeú et mitsá, kau imaom bagamui mangorik

¹³ Buítá nupaom kam bagamui, ka galai tubudda saalei, samba mitsá kau nupaappé kam jo, ké ai sia simaata бага ka golú, ka tubudda saalei. Bulat

mangká bagania si Tuhan, masiappéaké jomui ka kam. Oto buítá kisedda leú et tarekmui ka kam, nupaappé kam jo, ka pasasambamui

¹⁴Tápoi bulat sabeunia geti, iaté: Buítá pakaté kam бага pasasambamui. Aipoí nuntut бага lé, masipamumuiné kam sangamberimui, kam Sasarainamai, pat lelek

¹⁵Bulé apa sitakkíakenenmui ka patiboatmui, sibara ka aban bagamui, sipanguruat'akenen Kristus, ka bagat paatuatmui. Aipoí, lulunia aisogai kam Taikamanua, bulé ibailiu kam laddou sisangatubu, nupurimanua kam ka bagat aban, sibara ka tubut Kristus. Oto kau nukua kam surá

¹⁶Kau isop-sop tiboiet Kristus simasut panukanan, ka bagat paatuatmui. Kau nupangantoman kam katubu, elé kau nupangantru kam katubu, bulat sibara ka sikut paatuat simakolou. Uraiaké kam urai masmur, samba urai pasiumun, elé urai paamian. Puurai kam masiumun'aké Taikamanua, bulat sibara ka surat bagamui

¹⁷Oto apa lé nugalai kam, elé nukua kam, buítá ka onin Tuhan Jesus

nugalaiaké kam nia, elé nukua kam nia. Kua kam pusurakat ka tubut Ukkui Taikamanua, kalulut sangamberinia sigalaiakenen Jesus néné, sibailiu puuktunganmui

¹⁸ Kam saina, sibara sikalaleman! Bulat kau numareddet kam, ka nga-nganda taimanteumui. Aipoí, buítá kisedda puparaboananmui, siripot sipasesese ka arat tubudda tai Kariten

¹⁹ Ialeú et kam taimanteu, sibara sikalaleman! Bulat kau imanuntu bagamui ka tubudda tainanalepmui. Bá pugogoluki kam sia

²⁰ Kam leú et tatoga! Bulat kau mariu-riu nugalaiaké kam masireddet nga-nganda saukkui sambat sainamui, siripot galaiakenenda sipuoni tai Kariten. Aipoí nenda lé, bulat iobá bagat Taikamanua

²¹ Iageti kam saukkui! Bá babaraaké kam pungúngukatda tatogamui, babara mabebelé bagadda

²² Oto kam sapagugulet! Buítá nureddet kam sangamberinia sikuadda tai tuanmui ka polak néné. Buí sarat ai lé rajajago kam, numarereddet kam ka nga-nganda, bulé raumun reddetmui. Tápoi buítá

bulat sibara ka linat paatuatmui,
nureddet kam nga-nganda, kalulut
hohormatimui si Tuhan

²³ Apa lé raaké galajetmui, galaimui
nia, bulat sibara ka muinet paatuatmui;
kau nuaddeaké kam nia kelé si Tuhan lé
galainia nupuukú; tá sarat sirimanua

²⁴ Repdem kam, iaaké upamui si
Tuhan. Upa sinarek'akenen Tuhan ka
sapaamiannia, nenda leú te ka kam,
nususiló kam. Aipoí majikan pasikeletmui
kineneiget, iaté Kristus

²⁵ Oto kasei sigalai sele, silónangan
ukuman, silit sele sigalaira; aipoí ka sia
si Tuhan, tá irarasei sirimanuania.

4 ¹ Kam leú et ka kam, ale Sasaraina,
sipuoni tai tuan! Kau bulat ienungi
enungannia, nupupagugulet'aké kam sia,
sapaguguletmui, ka siripokatnia samba
ka adil. Kau nurepdem kam, beri kam
leú et ka kam, ai leú sara majikanmui ka
manua

² Kau imariu-riu nupaniddou kam ka
tubut Taikamanua; samba leú kau
imariu-riu tarek tubumui, tápoi sialei
pusurakat ka tubut Taikamanua

³ Iageti tiddouaké leú et kam kai, ka kai,
bulé iaké ka kai oggak simaerú, ioi kuei

kai masipakakra Katuareman Simaerú,
iaté pagalaiat keleat Kristus. Aipoí
kalulut néné te akutuukum kineneiget,
ka bagat penjara

⁴Tiddou kam ka tubut Taikamanua,
bulé ioi kukolouaké keleat néné, bulat
simakolou, ka siripot enungnia

⁵Ka paaleiatmui leú, ka tubudda
saaleimui sitaimatonem бага peilé ka
tubut Tuhan Jesus, kau bulat sipinagaba
samba pakei kam sangamberinia tetre
simaerú, bulat sipulelelek

⁶Kau iobá samba ialá bagadda
sangamberi sikuamui. Pasiaalegimui
nga-nganda leú et, bulat kau sipinagaba

⁷Oto ai leú isegéaké nia si Tihikus,
sangamberinia sipuaaili ka tubukku,
kineneiget. Bulat matopit nia ipaalei kai
mugalai, ka galajet Tuhan

⁸Lulunia geti akugugluaké nia ioi ka
tubumui, iaté, bulé nuagai kam nia,
kipangan kai kineneiget, ibara pusuibiat
bagamui

⁹Ai leú si Onesimus alei Tihikus; aipoí
nia ka sia néné, sikaumamui leú et.
Simatopit lé nia; manuntu bagamai
ka tubunia. Si Onesimus sambat
si Tihikus'an lé masisesegéaké ka

matamui, sangamberinia sibabara ka kudduatku néné

¹⁰ Oto beri leú et ka sia, si Aristarkus, aleiku ka bagat penjara, segé salamnia ka tubumui, sambat salamnia ka sia si Markus, taluban Barnabas. (Aiakéan leú te katuareman kaooinia, bulé nusiló kam kaooinia.

¹¹ Iageti segé leú et salam nia, ka sia Jesus, sipuoni leú si Justus. Iaté sibara ka talagadda tai Jahudi, simatonem бага ka tubut Tuhan Jesus. Teludda néné lé, aleiku kineneiget mugalai, masigalaiaké galajet, sibara ka Taikamanua. Bulat ararop'akéan aku simakopé, mugalai galajet

¹² Segé leú et salamnia, ka sia si Epapras, ka tubumui. Nia néné leú et, sibara ka mungkuatmui. Nia ka sia néné, pagugulet Jesus Kristus, sitaipuaari maniddou, masitiddouaké kam, ka tubut Taikamanua. Itiddou simakopé ka tubut Taikamanua, bulé memei maroron tonem bagamui samba memei masisikebbukat pupaaturanmui, imamuiné nuretdet kam siobat bagat Taikamanua

¹³ Bulat matakungan amasiigbuk momomoakéna tubunia mugalai

kalulumui, sambat kaluludda tai
Laodikea, elé kaluludda tai Hierapolis

¹⁴ Kisedda leú ka sia ruadda néné, iaté
si Dokter Lukas sambat si Demas, segé
leú et salamra, ka tubumui

¹⁵ Segéaké leú kam salammai ka
tubudda saaleita tai Kariten ka Laodikea,
sambat kai Nimpa, samba leú et
ka tubudda sapaamian siparururú
maniddou, ka lalepnia

¹⁶ Oto ké lepá nubatsaaké kam nia
suratku néné, ka tubumui ka kam,
gabamuian enungan masitaroaké
suratku néné, ka tubudda tai Laodikea,
bulé rabatsaaké nia ka sia, ka
paamianda. Kisedda leú et kam ka kam,
buítá nubatsa kam surat kirim'akenenda
tai Laodikea, ka tubumui

¹⁷ Kua kam ka matat Arkipus, "Lepáaké
galajet, sisegéakenen ka tubum, siripot
galajetnu masipuukú galajet Tuhan.

¹⁸ Iageti segé leú et salamku kaku, iaté,
aku sipuoni si Paulus, ka tubumui. Bulat
tubukku té, amugalai surat néné. Buí leú
nukalipogi kam; kineneiget ai peilé aku
ka bagat penjara! Bulé ipanukani kam
si Tuhan, sangamberimui. Harmatmai,
Paulus

1 Tesalonika

1 ¹ Ale kam Sasaraina, sapaamian Tessalonika, sibailiu sapaamian Ukkui Taikamanua, samba Tuhan Jesus Kristus. Kai telumai néné, iaté aku si Paulus, si Silas sambat si Timoteus, bulat kukaroni kai бага, bulé ipanukani samba ibujai kam Taikamanua

² Sarat masikua surá ka tubut Taikamanua lé kai, kalulumui sangamberimui. Sarat kurepdem lé kai kam, ka bagat paniddogatmai ka tubut Ukkuita Taikamanua. Bulat tá muaari kutiddouaké kai kam ka tubut Ukkui. Sarat kurepdem lé kai kipangan putotonem bagamui ka tubut Kristus ka sipatoilámui ka sigalaiakenenmui, samba kipangan punununtut bagamui, ka tubudda saaleimui sirimanua; pat oi nupasikeli kam sia, samba kipangan puroron pukakaronanmui бага, ka tubut Tuhan Jesus Kristus

³ (1:2)

⁴ Tubut ai lé kuaagai kai, ale kam Sasaraina, pukakatekina kam бага

Taikamanua, samba pipiliyna kam, bailiu bakkatnia sikokoiaakenen nia

⁵Aipoí akupakakra kai Katuareman Simaerú ka tubumui, tá sarat nga-nga, tápoi sialei gege samba Ketsat Sipunenan. Oto bulat matonem bagamai pububulat sibulatnia Katuareman Simaerú néné. Bulat siagaiatmuian leú, kipa galai tubumai mugalai kalulumui, ka tetret ai peilé kai mukukuddu, ka talagamui

⁶Anuului kam paraboatmai samba galai tubut Tuhan. Kenanen mabesí tubumui mangorik, tápoi mariu-riu lé angkat bagamui masisiló Katuareman Simaerú, sisegéakenenmai, ka tubumui. Amasipagora bagamui, iaté Ketsat Sipunenan

⁷Oto aibailiuan kam uluiet, ka tai Kariten sikukuddu ka Makedonia samba ka Akaya

⁸Aipoí sibara ka kam, mararatnangan Katuareman Simaerú pagalaiat Tuhan, pat aili ka Makedonia samba ka Akaya. Ialeú et tá sarat nenda, tápoi beri leú et pagalaiat putotonem bagamui ka tubut Taikamanua, amaarep'an ka senen

laggai, bailiu táan leú anai lulunia kukua
kai ka kai, apa pá

⁹ Arapungu-nguan'akéan
sangamberidda, kipa anuperú kam, aioi
anusiló kam kaooimai, ka tetret akuoi
kai siburú, ka talagamui. Ratiboi kipa
anupaerú kam, anugalak'aké kam arat
sabulungan, anuei kam kam ka tubut
Taikamanua sibulatnia, sipuririmanua
bulé nupaniddogi kam nia

¹⁰ Samba leú et bagei arapungu-
nguan'aké, kipa riu-riunia nukaroni
kam бага, kaoijanan Togat Taikamanua
sibara ka manua, iaté sipuoni Jesus,
sisuruakenen Taikamanua, ka simamatei.
Oto Jesus néné leú te masisasakkeri sita,
ka golut Taikamanua, ka gogoi sibabara.

2¹ Ale kam Sasaraina! Anuagaian kam
taipusisiboboinia kaooimai masibalou
kam

² Kelé siagaimui, ainangan tá kubabalou
kai kam, ka Tessalonika, arapaoreian élé
arapaloloian kai, ka laggai Pilippi. Tápoi
kenanen kipa igidda sipasisasaggangi
kai, mariu-riu lé iaké ka kai Taikamanua,
gege, masipaarep Katuareman Simaerú,
sibara ka tubunia

³ Aipoí panánakatmai ka tubumui, tá sara puseleat, elé ai paatuatmai sitaimaerú ka tubumui, elé masipataju kam

⁴ Bulat tá te nia sinaatumai! Aipoí tiboietmai néné, tá masiangkáaké bagadda sirimanua, tápoi masiangkáaké bagat Taikamanua lé, siagai masiuji bagat pupaaturanmai. Taikamanua lé poí aipateú kai masipakakra Katuareman Simaerú néné

⁵ Ai lé nuaagai kam tatat pupaaturanmai munanam titiboat, elé paalakat бага, masipakelé puaalau bagamai. Ai Taikamanua kelé saksi

⁶ Ialeú et, tá aikubebesíaké kai raumun kai sirimanua, elé nuumun kam kai, ka kam, elé sibara ka sabagei. Siripokatnia ka puoonimai apostel Kristus, momoi kutuntut kai apa pá, ka tubumui

⁷ Tápoi bulat ka leppet бага lé, ka tetret ai peilé kai ka talagamui, bulat kéan lé saina rapasikeli tatogadda, akugalai kai

⁸ Kalulut katet bagamai ka tubumui, bailiu tá sarat Katuareman Simaerú akuaké leú kai ka kam, tápoi beri leú et purimanuaiatmai, akuaké kai ka

kam. Kalulut kopet nuntut bagamai ka tubumui

⁹ Kirénangan ai lé nurerepdem kam, kumomoaké kai tubumai, mugalai, sinágó samba sinoibó, bulé buí ibara beri sara ka talagamui, sipageja mai бага, ka tetret ai peilé kai masipakakakra Katuareman Simaerú, sibara ka Taikamanua, ka tubumui

¹⁰ Maliná paraboatmai, maroipo bagamai, samba bulat beri kuat tubumai ka sikataí, ka tubumui saalei, simatonem бага ka tubut Kristus. Kam lé saksimai, samba leú et Taikamanua

¹¹ Samba siagaimui lé, kipa kupaeerú kai ka tubumui senemui, iaté bulat kéan lé galaiakenen sara ukkui ka tubut toganía

¹² Kupangantru kai kam, samba kupatubbuji kai kam, kuron'aké kai kunáná kai kam, bulé imakolou paraboatmui, imangká bagat Taikamanua ka tubumui. Aisogaian poí kam Taikamanua, bailiu tatogat Laggai Taikamanua Sibau, bulé nunanam kam pulatsanannia

¹³ Iageti ai peilé mitsá sara galai tubumui, aitutu bagamai masikua

surá simariu-riu ka tubut Taikamanua, iaté ka tetret akuoi kai, masipakakra Katuareman Simaerú sibara ka Taikamanua, ka tubumui, anuarepi samba anusiló kam katuareman néné, tá sibara ka sirimanua, tápoi Katuareman Simaerú bulat tubut sibara ka tubut Taikamanua. Nia lé amugalai ka bagat paatuatmui, kam simatonem бага ka tubut Kristus

¹⁴ Ale kam Sasarainamai, kelé siorikmui ka kam néné, araorik'an leú te ka sia sapaamian Taikamanua ka laggai Judea, sipuoni bakkat Jesus Kristus. Pangoringan siorikmui néné, sibara ka muntogatmui leú et; kelé siorikra ka sia sapaamian Taikamanua ka Judea, sibara ka tai Jahudi

¹⁵ Sia té amasimateiaké Tuhan Jesus sambat tai nabi, samba leú et amasipaorei kai ka kai. Sangamberi sirimanua rasaggangi. Oto bulat beri angkat bagat Taikamanua ka tubudda

¹⁶ Samba mitsá, bulat rapasasailaji lé kai, kupakakra kai Katuareman Simaerú ka tubudda, bangsa sipuoni taú tai Jahudi, sibailiu katuaragatda sangamberi bangsa-bangsa néné. Oto kalulut néné,

memei iuurau jodda tai Jahudi néné,
pat segé iginia. Kalepakatnia kineneiget
oraknangan sia golut Taikamanua

¹⁷ Iageti ale kam Sasarainamai, lepá
atapasara kam goisó, iaté pasara ka
siripot putubuat, tápoi ka paatuat geti, tá
apasara sita. Bulat memei lé makokopé
kurepdem kai kam, samba bulat aian
kurerepdem kai mitsá moi, kubalou kai
kam

¹⁸ Bulat akuisiakéan kai moi kubalou kai
kam. Rua ngamitsáan akusibo moi, tápoi
ai lé ikekeraaké kai Sanitu

¹⁹ Bulatnia kam lé karonietmai бага
samba siangkáaké bagamai. Aipoí ké moi
nia mitsá Tuhan Jesus, parurútangan ka
matania; bulat kam lé abeuakenenmai
ka bagat paatuatmai

²⁰ Bulatnia kam lé abeuakenenmai ka
bagat paatuatmai samba siangkáaké
bagamai!

3 ¹ Oto táan tuoom bagamai kai
kurepdem kai kam. Sipinaatumai ka
kai, maerú peilé nugalak kam kai ka
Atena, kukuddu kai saramai sedda

² pangenan kukoiniaké kai boikí
sarainanta ka kam iaté si Timoteus. Nia
ka sia néné, iaté aleimai mugalai galajet

Taikamanua, masipakakra Katuareman
Simaerú, pagalaiat tubut Kristus.
Kukoiniaké kai nia si Timoteus néné,
bulé ioi iron'aké pupaaturanamui samba
masitubbui kam, bulé memei makokopé
ron tonem bagamui ka tubut Kristus

³ Kalulut néné, bailiu táan anai ka
talagamui sipasisisik-sik tei-teinia,
kalulut pangoringanta néné. Kelé
siagaimui, pangoringanta néné, rencanat
Taikamanua lé, sibailiu puuktunganta

⁴ Aipoí ai peilé kai ka talagamui,
akutaggeian kai kukua kai nia ka
matamui, pagalaiat pangongorikta. Oto
bulatnia amuailingan; bulat kam'an leú
tubumui aiagai nia

⁵ Iaté lulunia akukoiniaké si Timoteus,
obáku kuagai, kipangan puuurau nia
tonem bagamui, ka tubut Kristus. Ai
lé aku maseseddé, ka tubumui, baleú
amoian aipataju kam Sanitu, bailiu
pusiboboinangan sangamberinia saggot
tubumai, kupasipasikeli kai kam

⁶ Oto kineneiget atoilangan nia si
Timoteus, ka tubumai. Aisegéakéan ka
matamai, sangamberinia katuareman
puangkakat бага, iaté pagalaiat
putotonem bagamui, ka tubut

Kristus, samba pakakatémui бага pasasambamui. Aipungu-nguan'akéan leú ka matamai, kipa nukau kam kai, kelé sara repdemenmui simaerú, ka bagat paatuatmui. Samba leú, aibabagai bagamui moi, nuailiaké kam kai, kelé leú ibagai bagamai ka kai, moi paaili, ka tubumui

⁷Iaté lulunia, ale kam Sasarainamai, ka purereu-reumai бага samba ka pango-ngorikmai néné, aipusuibingan bagamai, akuarep kai katuaremanmui néné. Bulat abeu kupaatu kai nia, kalulut tonem bagamui ka tubut Kristus

⁸Oto kineneiget, bulat amurimanuangan kai; sarat kau lé ituroi putotonem bagamui samba mariu-riu pusaraatmui ka tubut Tuhan

⁹Bulat abeu surat bagamai ka tubut Taikamanua, kalulut sangamberinia puangkakat бага, sisilómai ka matania, kalulumui

¹⁰Bulat sarat paniniddou lé kugagalai kai ka tubunia, sinágó samba sinoibó, bulat sibara ka muinet paatuatmai, bulé ioi tapaaili kam, ioi kusut'aké kai simagulai ka kam, ka putotonem

bagamui ka tubut Kristus, bulat ka siripokatnia

¹¹ Bulé bulat tubut Ukkuita Taikamanua samba Tuhanta Jesus, igaktuk'aké enunganmai, ioi kuoi kai ka tubumui, bulé tapaaaili kam

¹² Bulé Tuhanta masituppai punununtut bagamui ka pasasambamui, samba ka sangamberi sirimanua, pat bulat kokkopé iurau punununtut bagamui, kelé nuntut bagamai ka tubumui ka kam

¹³ Oto kalulut néné, ron'akénangan pupaaturanamui si Tuhan, bailiu malinámuian samba tatá kuat tubumui ka sikataí ka matat Ukkuita Taikamanua, ka tetret ioi Tuhan Jesus sambadda sangamberi bakkatnia.

4¹ Iageti kam alé Sasaraina, akuakéan kai uluietmui, bulé nuagai kam kipa galaiakenenmui, ka puparaboanan, imangká bagat Taikamanua ka tubumui. Kirénangan tedda, anuparaboat'akéan kam kelé nenda. Tápoi kineneiget, ka geget Tuhan Jesus, bulat kutiddou kai simaná-ná ka tubumui, bulé nubesiáké peilé kam mitsá, imakopé ituppai erúnia

² Aipoí anuagaian kam nganturat siakémai ka tubumui, ka geget Tuhan Jesus

³ Néné lé obaket bagat Taikamanua: Bulé nupuparaboat kam siripot simateú ka matania, samba nuareuaké kam tubumui, ka galai tubu pusilaingeat

⁴ Kau raagai nia, sangamberidda taimanteu, ka talagamui, pagalaiat musikalaleman ka tainanalepra, siripot obaket bagat Taikamanua, samba obaket bagadda leú et sirimanua

⁵ Buí nugalaiaké kam siripot obaket pubobot-bot akkulá, ka tubudda tainanalepmui, kelé sigalaiakenenda ka sia sitaiagai Taikamanua

⁶ Kisedda leú et, buí bara beri sara sigalai sele ka tubudda saaleinia, élé ipajo nia. Siburú bulat akuron'aké kai, kukua kai nia ka matamui, pagalaiat uukum'akéna sia si Tuhan, sangamberi sigalaiaké sele, kelé néné

⁷ Aipoí aisogai sita Taikamanua, tá bulé tagalaiaké kam galajet pusilaingeat, tápoi muparaboat siripot obaket bagania lé

⁸ Oto kasei sitaiobá masisiló nganturat néné, tá sirimanua aité-táaké, tápoi

Taikamanua lé, sipanguruat'aké
Ketsatnia Sipunenan, ka tubumui

⁹Táan leú kugagalai suratku ka
tubumui, masikua ka matamui,
kipa nupaeerú kam, masipukateki
baga saaleimui, sikeré putotonem
baga, ka tubut Tuhan Jesus. Aipoí,
aipangantrungan kam Taikamanua, kipa
enung pakaté baga pasasamba

¹⁰Néné anupatoiláan kam ka tubudda
sangamberi saaleimui, sikeré tonem
baga, ka sangaliot Makedonia. Tápoi
kenanen kisedda, alé kam Sasarainamai,
bulé memei nututuppai peilé kam, erut
paraboatmui

¹¹Besíaké kam imarogdang
puririmanuamui, samba buí nupageugebi
kam galajetda sabagei. Momoaké kam
tubumui masibaraaké purimanuaiatmui,
kelé sikuamai ka matamui siburú

¹²Oto ké kiseddangan baí
paraboaatmui, bailiu táan sarat
mukaronan ka tubudda sabagei,
nugagalai kam. Iageti hormatitdangan
kam, sitaimatonem baga ka tubut Kristus

¹³Alé kam Sasarainamai, bulat
aikubebesíaké kai, bulé nuagai kam
nia, pagalaiat sirimanua simamatei;

bulé tá imareu-reu bagamui ka kam,
kelé sabagei, sitaipukakaronan ka tubut
Taikamanua

¹⁴ Atakatonemingan kam бага
kamamateinia Jesus, samba
ririmanuaakéna nia mitsá Taikamanua,
ka simamatei. Oto iaté lulunia,
imatotonem bagatta susuruakéna
sangamberi simamatei simatonem
baga, ka tubut Jesus, Taikamanua, bulé
imakeré rapurimanua sambadda Jesus

¹⁵ Oto pagalaiat sangamberinia néné,
ai sené kuaké kai nganturat Tuhan ka
kam: Ké moi si Tuhan, tá muboboikí
sita ka sita sipuririmanua peilé néné, ka
tubudda sirimanua simamatei boikí

¹⁶ Mugegerei nia utet malaika, samba
tunanauaké pipiau Taikamanua, kelé
sara toggaiat panarengan tubu. Lepá
gorosot nia Tuhan Jesus barania ka
manua. Oto isusuruaké boikí, iaté tai
Kariten simamatei boikí

¹⁷ Lepá geti sitangan ka sita
sipuririmanua ka tetret nenda,
akkat'akénangan sita sambatta, taei
ka goá ka tinobut manua, bulé tapaaili
kam ka tubut Tuhan, ka manua. Iageti

kuddu sita sedda sambatta si Tuhan,
teret buru-burú

¹⁸Oto kau nupasopo kam ka
pasasambamui, ka tiboiet néné.

5¹Alé kam Sasarainamai, táan
leú kuaaké kai suratmai ka kam,
masikua pigamoi bulat iaaili tetrenia
ipuaili sangamberinia néné

²Aipoí bulat amakolouan ka kam,
Gogoi kaoijanan Tuhan, kelé galai raoi
sipananangkou sinoibó lé

³Ké rakua, "Tá leú anai sibabara, maerú
lé sangamberinia", ka tetret nendangan
te ibabara sinulut iorak sia kasubuat; oto
bulat tá te bebela matadda beri sara.
Aipoí bulat simatulut lé ipuaili néné, kelé
ibara besit sara sinanalep sipususulé

⁴Tápoi kam geti ka kam, táan
kuanenta ai peilé kam muririmanua
ka bagat pugep-geman, bailiu ké iaili
gogoinia, tugégémuian, kelé kaooira
sipananangkou

⁵Kam néné sangamberimui, aian kam
muririmanua ka pató; kam néné momoi
takua, aian kam ka rubeiat sinágó, iaté
simapató. Sita néné, táan anai sita
muririmanua ka bagat pugep-geman, elé
ka rubeiat sinoibó, iaté simagep-gep

⁶ Oto buían sarat merep tagagalai kam, kelé ka sabagei. Tápoi kau lé tapanuksuk kam, samba leú et kau imatau-tau pupaaturananta

⁷ Aipoí sinoibó lé rapeperrep sirimanua, ialeú et, soibó lé rapupu-puineng sirimanua

⁸ Tápoi ka sita geti sipuoni ka rubeiat sinágó, iaté simatoro, buítá mapató paatuatta. Buítá mariu-riu tonem bagatta ka tubut Tuhan, samba kau imanuntu bagatta ka sabagei. Ialeú et, kau takaroni kam nia ka tonem бага, aarauakéna sita ka sita Taikamanua. Iaté nenda pamatei sipasisasakkeri sita ka perjuanganta, masilawan pugep-geman

⁹ Aipiliy sita Taikamanua, tá bulé ibara ukum'akenennia, tápoi arauakenennia lé, ka Onin Tuhanta Jesus Kristus

¹⁰ Matei nia kalulutta, bulé ké iaili tetrenia ioi mitsá, tá taagai, elé ai peilé sita muririmanua, elé amateian pá sita, momoi tapurimanua kam sambat Tuhanta

¹¹ Oto kalulut néné, kau imariu-riu nupatubbui kam samba nupasopo kam katubu, kelé sigalaiakenenmui kineneiget

¹² Ale kam Sasaraina, paniddogatmai ka tubumui, kau nukailaaké kam sia sipugagalai ka talagamui, iaté sia sipiliy Tuhan, masipalulu samba masipangantru kam

¹³ Bulat kau nuhormati kam sia simakopé, samba kau imanuntu bagamui ka tubudda, kalulut nurepdem kam sigalaira. Kau imaaban puririmanuamui

¹⁴ Iageti kutiddou leú kai ka tubumui, ale kam Sasarainamai, bulé nuteká kam sia sitaiobá mugalai; tápoi buítá ka aban бага. Paron kam pupaaturananda simalotó; rop'aké kam sia simateú rop'akenen, samba kau nupaom kam ka bagamui ka tubudda sangamberi sirimanua

¹⁵ Jago kam, buí ibara ka talagamui sipasisisiliaké jo, silit jo. Besiaké kam mugalai simaerú, ka pasasambamui samba ka tubudda sangamberi sirimanua

¹⁶ Kau imariu-riu nupugora kam бага

¹⁷ samba leú et, kau imariu-riu nupaniddou kam ka tubut Taikamanua

¹⁸ Ka sangamberi sibabara, kau mariu-riu nukua kam surá ka tubut Taikamanua. Aipoí nenda te ikikiddiy

Taikamanua, nugagalaiaké kam, siripot
pusasaramui ka tubut Jesus Kristus

¹⁹ Buí nupéaké kam Ketsat Sipunenan

²⁰ Buí nupuarak kam sangamberi sibalat
siaket Ketsat Sipunenan

²¹ Aipoí sangamberinia, buítá tuuji
boikí. Oto apa simaerú, buítá itututut'aké

²² Reunan'aké kam tubumui ka tubut
sene ngamata pukakataí

²³ Bulé ibujai sita Taikamanua, samba
ibailiuaké kam néné, Taikamanua,
bulat bakkatnia sikokoiaKENENNIA. Bule
Taikamanua ijago sangamuinet tubumui,
iaté ketsatmui, elé paatuatmui, samba
leú et tubumui, bulé tá bara loloiet
ka tubumui, ké iaili tetrenia, ioi mitsá
Tuhanta Jesus Kristus

²⁴ Bulé Taikamanua, sipasisosogai kam,
igagalaiaké néné ka tubumui, aipoí
simatopit lé nia

²⁵ Oto alé kam sasaraina, kutiddou
kai, bulé nutiddouaké kam kai ka tubut
Taikamanuanta

²⁶ Kau nuparoro kam sangamberimui
bulat sibara ka roroi bagamui, siripot
pusasaraina pasasamba tai Kariten

²⁷ Iageti kutiddou ka tubumui ka geget
Tuhan, bulé nubatsaaké kam suratmai

néné, ka tubudda sasaraínanta sikeré
tonem бага, ka tubut Kristus

²⁸ Bulé ipanukani kam Tuhanta Jesus
Kristus. Hormatmai, Paulus

2 Tesalonika

1 ¹ Ale kam Sasarainamai, sapaamian Tessalonika, sibailiu paamian Ukkuita Taikamanua sambat Tuhanta Jesus Kristus! Kai néné, iaté, aku sipuoni si Paulus, si Silas sambat si Timoteus

² Bulat kukaroni kai бага, bulé Ukkuita Taikamanua sambat Tuhanta Jesus Kristus masipanukani samba masibujai kam

³ Ale kam Sasarainamai, bulat galajetmai lé masikua surá ka tubut Taikamanua, kalulumui. Kirénangan tedda, bulat mateú kugalaiaké kai kelé néné, aipoí putotonem bagamui memei maroron. Samba pukakatet bagamui ka pasasambamui leú et, memei makokopé ronnia

⁴ Iaté lulunia sarat kam kukukua kai, ké mei kai masibalou paamian Taikamanua. Oto seget beunan ka paatuatmai, ka tetret aikutitiboi kai pagalaiat riu-riu nia puroron tonem bagamui ka tubut Kristus, kenanen ai kam ka bagat paoreat samba pangoringan

⁵ Sené te imatotoilá adilnia ipasihakimi Taikamanua: Amangorik'an kam, kalulut nubesiaké kam Laggai Taikamanua Sibau. Oto kalulut néné, bailiu mateúmuian tugurú ka bagania

⁶ Igagalaiaaké simaadil Taikamanua, samba isisiliaké pangoringanmui néné, iaté ka tubudda sipaorei kam

⁷ Samba ka tubumui sipangongorik kineneiget, kisedda leú et ka tubumai ka kai, iaaké Taikamanua puaroiat tubu, ka gogoi katugorosan Tuhan Jesus, barania ka manua, samba ka tetret katutoilakatnia sambadda samalaikania sipulugege

⁸ sambat api sipuju-juluu. Iooi ka polak, iaté masipaukumi sia sitaimaletsei ka бага ka tubut Taikamanua, samba sitaipupaparaboat siripot Katuareman Simaerú, iaté pagalaiaat tubut Jesus Tuhanta

⁹ Sia néné, rasisiló ukuman kasubuat, teret buru-burú. Turiribbaiaké lé sia, ratuareu ka matat Tuhan samba ka gegenia sabeu

¹⁰ Ipuaaaili sangamberinia néné, iaté ka gogoi kaoijanannia, bulé raabeuaké nia sapaamiannia, samba rahormati

nia sangamberi simatonem бага
ka tubunia. Oto kam ka kam néné,
tugugurúaké leú te kam ka kam, ka
mungkuat paamian Taikamanua nenda;
aipoí anukatonemingan kam бага,
Katuareman Simaerú, sinegéakenenmai
ka tubumui

¹¹Ialeú té lulunia, tá ipuaari
kutiddouaké kai kam, ka tubut
Taikamanua. Kutiddou kai ka tubunia,
bulé ipateú kam murimanua ka
siripokat obaket bagania; aipoi
nenda lé lulunia aisogai kam. Bulé
Taikamanua ka gegenia, masisut'aké
siobat bagania, masigalaiaké simaerú,
samba masisut'aké sangamberinia
sigalaiakenenmui, kalulut tonem
bagamui, ka tubut Kristus

¹²Kalulut néné, bailiu tulatsat'aké
Tuhanta Jesus kalulumui. Oto beri
leú kam ka kam, latsat'akénangan
leú et kam Jesus, kalulut erut bagat
Taikamanuanta sambat Tuhanta Jesus
Kristus.

2¹Pagalaiat kaooi Tuhanta Jesus
Kristus, samba leú et pagalaiat
irurúaké sita ka matania, iaté néné bulat
kutitiddou simakopé ka tubumui

² bulé buí imaruei ipaingo kam, elé ipaanu bagamui, kalulut katuareman ka bé-bé, sipasikukua, aiailingan gogoinia, ioi mitsá Tuhan Jesus. Elé sibara ka sibalat pá tiboiet néné, elé sibara ka sara nganturat sigelaiakenen; elé ai pá sia sipasikukua ka matamui, ai akusurat'aké kai ka suratmai kelé néné ka sara suratmai

³ Oto kenanen kipa pá, bulat kutiddou kai ka tubumui, buí nuobá kam rapataju kam. Aipoí kei iaili Gogoinia, buíta bara boikí, néné: Tá magulai sia sisik-sik tei-teina, siputatá Kristus; samba patoiláranan leú et tubudda ka sia Sirimanua Sikataí Paraboat, iaté sia siteúakenen Taikamanua, gurúakenen ka api narako

⁴ Bulat kabuak paatuatnia, lawannangan, elé buak'akénangan tubunia ka tubut paniddogietda sirimanua, elé ka tubut bulungan, oniakenenda sirimanua Taikamanuanda. Pat ei nia ka bagat Uman Taikamanua, uddet nia sedda, masikua tubunia, nia néné, iaté Taikamanua

⁵ Oto repdem kam akukua nia siburú ka matamui, ka tetret ai peilé aku mukukuddu ka talagamui

⁶ Siagaiatmuian lé, aponiangan lé ikekeraaké nia kineneiget, ipuaili sangamberinia néné. Ai leú iaili tetrenia siteúakenen Taikamanua, rabelaaké tubudda, Sirimanua Sikataí Paraboat néné

⁷ Tápoi puroronnia ka sia sigalaiaké pukakataí néné geti, aian ieenung'aké; tápoi sipinakelé peilé; tápoi aipei lé tukekeraaké nia. Teret itukarit'aké nia ka sia sipasikekeraaké nia néné

⁸ ia peité ibelaaké tubunia ka sia nenda Sirimanua Sikataí Paraboat néné. Tápoi ké amoian geti nia ka sia Tuhan Jesus, ulup'akénangan engania, masimateiaké Sirimanua Sikataí Paraboat néné, samba subuakénangan leú nia ka pulatsanan kaoijanannia

⁹ Momoi te nia ka sia Sirimanua Sikataí Paraboat néné, ka gege sabeu sibara ka tubut Sanitu. Iageti baraakénangan sene ngamata kerek sambat kiseiet sabeu, sisusut patajuat

¹⁰ Pakeinangan sene ngamata patajuat sikataí, masipepeaké sia subuakenen.

Ramasusubu geti, kalulut taioháramasísiló Katuareman Simaerú sibara ka Taikamanua, samba tá raobá masiarep katuareman bulat sibulatnia sibara ka Taikamanua, sipaarau sia

¹¹ Iaté lulunia ibabaraaké simagege sipasipepepeaké néné, Taikamanua, pat katonemiddangan tá sineseat

¹² Oto iuukum'aké te sia Taikamanua, sangamberi siobá jo, samba sitaikatonemi sineseat

¹³ Ale kam Sasarainamai simanuntut bagat Tuhanta! Bulat tá itetek-tek kukua kai surá ka tubut Taikamanua, kalulumui; aipoí ka panandaatnia peilé, aipiliyan kam Taikamanua, bulé ipaarau kam. Aibara geti kelé néné, iaté, kalulut sigalai Ketsat Sipunenan ka tubumui, ibailiuaké kam sapaamiannia sipunenan, kalulut tonem bagamui ka katuareman bulat sibulatnia sibara ka Taikamanua

¹⁴ Iaté lulunia aisogai kam Taikamanua, sibara ka Katuareman Simaerú, sipinaarepmai ka tubumui. Aisogai geti kam Taikamanua, kalulut obána nia Taikamanua, nupuuktungi kam pulatsanan Tuhanta Jesus Kristus

¹⁵Oto kalulut néné, ale kam Sasarainamai, buí ipaoksak putotonem bagamui, samba kau imariu-riu nuomet'aké kam nia sangamberi nganturat siakémai ka tubumui; iaté nganturat sibara ka ngu-ngumai, elé ka suratmai

¹⁶Bulé Tuhanta Jesus Kristus, samba Ukkuita Taikamanua masipusuibi bagamui samba masiparon paatuatmui, bulé ioi nugalalaia kam galajet, samba masipakakra apa oniakenen simaerú. Aipoí ka sia Taikamanua, bulat makaté bagania ka tubutta, samba kalulut erut bagania ka tubutta, riu-riu taom'aké kam nia, samba oi takaroni kam бага apa simaerú

¹⁷(2:16)

3¹Kelé pamuipui tiboiet, kutiddou kai ka tubumui, ale kam Sasarainamai, bulé nutiddouaké kam kai ka kai, ka tubut Ukkuita Taikamanua. Tiddouaké kam, bulé imaruei imararat Katuareman Simaerú, samba rasiló nia sirimanua, ka erut бага, kelé anusiló kam nia ka kam siburú

²Tiddou leú et kam ka Taikamanua, bulé ibelaaké kai ka kabeira sirimanua

bulat sikataí paraboat, samba sijo.
Aipoí tá sangamberi sirimanua, iobá
masikatonemi Katuareman Simaerú
sibara kai Tuhan

³Tápoi bulat simatopit lé nia si Tuhan.
Nia té masiparoron samba masisasakkeri
kam, ka tubudda Sikataí

⁴Samba leú et, matonem bagamai
ka tubut Tuhan, kalulut aian
nugagalaiaké kam elé aian nuririu-
riuaké kam masigalaiaké sangamberinia
sitonéakenenmai ka matamui

⁵Bulé Tuhanta masipalulu kam,
bulé memei nuaagai kam simakopé
pukakatekina kam бага Taikamanua
samba pangunguruat'akéna ka tubumui,
Kristus, puoom бага

⁶Ale kam Sasarainamai, ka geget
Tuhanta Jesus Kristus, kukua kai ka
matamui, bulé nuareuaké kam tubumui,
ka tubudda sangamberi saalei simabeili
tubu mugalai, samba sitaimareddet ka
nganturat siakémai, ka tubudda

⁷Anuagaian kam, iaté buítá nuului
kam sigalaiakenenmai ka kai. Iaté tá
akukabeiliaké kai mugalai, ka tetret ai
peilé kai ka talagamui

⁸Tá akugalaiaké kai, tenan lé kai mukom kadda, sitaibabayaet. Sarat pugagai lé kai sinágó samba sinoibó, kumomoaké kai tubumai, bulé tá kupageja kai bagadda kasei pá, ka talagamui

⁹Tápoi tá te akugalaiaké kai kelé néné, kalulut taimateúnia kutiddou kai, bulé nurop'aké kam kai. Tápoi obámai lé ibara uluietmúi

¹⁰Ai peilé kai mukukuddu siburú ka talagamui, akuaké kai peraturan kelé néné, "Kasei sitaiobá mugalai, buí ipukom.

¹¹Kukukua kai nia kelé néné geti, kalulut aarepmai, ai peilé sia ka talagamui simabeili mugalai. Bulat beri apa pá tá ragagai; sarat masigeu-geu galajetda sabagei lé ragagai

¹²Ka geget Tuhan Jesus Kristus, kukua kai ka matadda, samba kuparepdem kai sia, bulé makolou rapugalai, ragaba purimanuaiatra saradda

¹³Tápoi kam ka kam, buí ingaú kam mugalai simaerú

¹⁴Iageti kupaatu, babara te sia sitaiobá masisiló sikuamai ka bagat suratmai néné. Oto jago kam tubumui ka tubudda

sipupaatuat kelé néné, samba buí
nupaaleiaké kam sia, bulé ramaila

¹⁵Tápoi buí nuaddeaké kam nia kelé
saggakmui; sarat ngantru lé kam nia,
siripot ka pusarainaat

¹⁶Kai Tuhan lé kabariaat rogdang
puririmanuatta. Bulé nia mariu-riu
iaké ka kam rogdang puririmanua ka
sangamberinia. Samba bulé Tuhanta leú
masipaalei kam sangamberimui

¹⁷Iageti segé salamku kaku, sipuoni si
Paulus ka tubumui. Tubut bulat kabeiku
te amugalai surat néné. Néné te sara
toggaiaat tanda tanganku ka sangamberit
suratku

¹⁸Bulé Tuhanta Jesus Kristus,
masipanukani kam sangamberimui.
Hormatmai, Paulus

1 Timotius

1 ¹ Ale Timoteus, bakkat togakku, ka onin Tuhan! Surat néné sibara kaku, Paulus, apostel Jesus Kristus, siripot siparentaakenen Taikamanua, Sipaarau sita samba leú et parentat Jesus Kristus, karonietta бага. Bulé Ukkuita Taikamanua samba Tuhanta Jesus Kristus masipanukani samba masipanguruani, elé masiaké kekeu rogdang puririmanua

²(1:1)

³ Kutiddou ka tubum, bulé mariu-riu nukuddu ka Epesus, kelé sikuakku ka matam siburú, kei mei aku ka Makedonia. Aipoí ai sia piga pá ka Epesus, sipasingangantruaké nganturat sitaipaaakkup ka tiboiet Taikamanua. Oto bulé nukua ka matadda, raariaké masingantruaké kelé néné

⁴ Kua ka matadda buí ialá bagadda ka pungu-nguan, elé pungu-nguan paninikat tubut taikebbukat siburú, sitá anai kalepakatnia. Aipoí sangamberinia néné, sibaraaké pajoggolat lé, tá

masituppai imariu-riu tugalaiaké
rencanat Taikamanua kelé agaietta sarat
kalulut tonem bagatta lé ka tubunia

⁵ Besíakenenku ka nganturatku néné,
iaté, bulé bara ka sirimanua paatuat
simamurni, samba agai бага simaliná,
samba leú et, putotonem бага bulat
sipulelelek ka tubut Tuhan; bailiu kalulut
nenda, oi rapununtuki бага saaleira
sirimanua

⁶ Aian sia sangarubeiat ka talagadda
sitaiparaboat'aké kelé néné,
aipapepengan sia paukelatda sitá
anai lulu

⁷ Airakikiddiy raei muguru paamian,
tápoi beringan sia tá raagai apa
tiboakenenda, samba sikuadda leú et, tá
bulat airakakatonemi

⁸ Kirénangan tedda aian taaagai kam,
erúnia surukat arat, ké tapakei baí kam
nia ka siripokat enungnia

⁹ Kau lé tarepdem kam; aitubaraaké
surukat néné, tá kaluludda sirimanua
simaerú paraboat, tápoi ka sia lé sipaapa
surukat, sikataí paraboat, turot katai,
ka sirimanua sijo, sitá arat, sipupaatuat
polak, ka sia sipasimamateiaké ukkui
sambat inanda, élé ka sia siobá pamatei

¹⁰siobá musilainge, sipusisilainge
ka pasasambadda simanteu
elé ka pasasambadda sinanalep,
sipasinanangkou sirimanua, sipaboboko,
sipasimumuneng'aké boko, elé kasei pá
sipuooni sipasabau nganturat simaroipo

¹¹Nganturat néné, ai ka tubut
Katuareman Simaerú, katukakarania
aiakéan ka tubukku Taikamanua,
iaté Katuareman Simaerú sibara ka
Taikamanua sipulubeunan, simateú
umun'akenen

¹²Bulat surá sabeu kukua ka tubut
Tuhanta Jesus Kristus, kalulut aiaké
kaku ron, masipuukú galajetnia, samba
kalulut aipateú aku, mugalai galajet
siakénia kaku néné

¹³kenanen ka tetret nenda akupakataí
nga-nga ka tubunia, elé akubesiki nia,
samba akupaloloi nia. Kenanen kisedda,
manuntu lé bagat Taikamanua ka
tubukku, kalulut ka tetret nenda, tápei
amatonem bagakku ka tubut Kristus.
Oto tá kuagai sigalaiakenenku néné

¹⁴Tápoi amoi peilé aipanguruani aku si
Tuhan simakopé. Aiaké lé ka tubukku
puroron, pat oi kukatonemi nia samba
kupununtuki бага pasasamba saalei

sirimanua. Puroron néné leú et, iaké ka tubutta sangamberitta sipusasara ka tubut Jesus Kristus

¹⁵ Bulat sineseatnia te tiboiet sipasikukua kelé néné. Oto mateú tusiló samba bulat tukatonemi: "Aioi Jesus Kristus ka polak néné, iaté masiarauaké sia sirimanua sijo." Aku te néné sara sirimanua sijo, simakopé kataí paraboat

¹⁶ Tápoi kalulut jokku néné te, aipununtuki aku бага Taikamanua, bulé isappruaké ipatoilá om bagania Jesus Kristus ka tubukku, sirimanua oniakenen bulat sikataí jo néné. Nia té néné ibabailiu uluietda ka sia sangamberi siputotonem бага sabagei ka tubunia samba sipasiiiikep'aké purimanuaiat sipulelelek samba sitaitatátá

¹⁷ Oto mateú lé tuumun'aké samba tuhormati nia, Taikamanuan, Rimatat senen tetre; aipoí nia lé simatom samba sitaimatotoilá sambat sisasara! Amen

¹⁸ Ale mateama Timoteus! Galajet néné kusegéaké ka kabeinu, kalulut masirepdem sitonéakenen Taikamanua, sisegéakenenda tai nabi ka paamian, pagalaiat tubum. Oto kau ibailiu nia

patonekat Taikamanua néné, balutnu, ka perjuangan simaerú

¹⁹ Kau mariu-riu nuomet'aké katonemiet sibulatnia, ka pupaaturan simamurni sambat simaliná. Aipoí ai sia sitaiarepi asekat sikuat teu-teu bagadda ka baga, pat kakkataí putotonem bagadda

²⁰ Oto sia néné, iaté si Himeneus sambat si Aleksander. Karuadda néné, akuukum'akéan sia, iaté akusegéaké sia ka kabei Sanitu, bulé ramakiro raasá Taikamanua.

2¹ Bulat paniddogatku sabeu ka tubumui, bulé ké nutiddou kam apa pá ka tubut Taikamanua, élé maniddou, élé nutiddouaké kam apa pá, élé masisegéaké pusurakatmui ka tubut Taikamanua, kau siaili sangamberi sirimanua

² élé siaili tai rimata, samba siaili sangamberi sauté. Tiddou kam ka tubut Taikamanua, bulé marogdang samba maaman puririmanuatta ka tubut Taikamanua, sialei puparaboanan simateú ka matania

³ Aipoí paniddogat kelé néné te maerú samba kilibet bagat Taikamanua, Sipaarau sita

⁴ Bulat kiddiyet bagania, iaté, bulé rasiló
puaragat ka sia sangamberi sirimanua,
samba bulé raagai siobat bagania

⁵ Sarat sara lé poí Taikamanua.
Beri sipatalaga sirimanua, sambat
Taikamanua leú et, sara lé, iaté Jesus
Kristus

⁶ Nia néné, iaté sara sirimanua,
sipasibubuluaké engania, bulé rabela
sangamberi sirimanua ka ukuman
Taikamanua, kalulut jodda. Oto ka
enungan pasibubuluakéna engania
Kristus néné, ipatoilá ka tubutta
Taikamanua, ka oggak sipasesese néné,
obána bulé rasiló panguruat, sangamberi
sirimanua

⁷ Iaté lulunia aikoiniaké aku, kuei ka
tubudda sipuarat sabulungan, bulé
kupakakra Katuareman Simaerú, iaté
pagalaiat katonemiet bulat sibulatnia.
Oto sipoiliatku néné, bulat sibulatnia, tá
bokokku

⁸ Bulat kiddiyet bagakku, iaté bule
sangamberi taimanteu, kenanen kaipa
pá raei maniddou, kau rapaniddou ka
tubut Taikamanua ka linat paatuat, tá ka
golú, elé ka pajoggolat

⁹ Ka sia leú et tainanalep, búan leú imasabau ralainge tubudda, samba rapubibilet tubu leú et kau imakomit tubudda. Buí ragalai alaira kipa raobá Perú, pat mabesínangan matatta iitsó nia; elé masipakei pulaingeat emas, inu mutiara, elé leppei simakeppu saki

¹⁰ Tápoi kau lé rapalainge tubudda tainanalep, ka puparaboanan simaerú, siripot simateú ka tainanalep, simasurú ka Taikamanua

¹¹ Buítá ragelai tainanalep masimonoi tubu sambat mureddet

¹² Bulat tá kuoobáaké sia tainanalep rapangantoman elé raparentaaké taimanteu; tápoi buítá ramonoi lé tubudda

¹³ Aipoí aibaraaké siboikí Taikamanua si Adam lé, lepá si Ebangan

¹⁴ Ialeú et mitsá, tá si Adam aipataju ulou, tápoi si Eba lé, pat pasabaunangan surukat Taikamanua

¹⁵ Tápoi kenanen kisedda, rasisiló leú te ka sia tainanalep puaragat, ka pasitutú-túakéra matat tatoga, sarat kau lé ka epet paatuat, iriu-riuaké ikatonemi Kristus samba mariu-riu ipununtuki бага

sabagei, samba murimanua sarat ka Taikamanua.

3¹ Bulat sineseatnia te tiboiet néné, sipasikukua kisé: "Sikiddiy muuté ka paamian, iaté masikiddiy galajet simaerú.

² Siripokatnia sia sauté ka paamian, buítá sitá kuat tubu ka sikataí sarat sara sinanalepnia lepá, iagai ipaom bagania, simasiku paatuat, makolou puririmanuania, iobá masirauma tairauma ka lalepnia, samba iobá masipangantru sirimanua

³ buí simapuinengen kalulut pulolónia ló simapuinengen, elé siobá palabá. Tápoi buítá simaleppe бага lé, siobá paaban. Tá maalau bagania ka bulagat

⁴ Buítá siagai masipasikeli pulalalepnia sipulelelek, samba siagai masipangantru tatogania, bulé ramareddet ka ngangania samba bulé ramahormat ka tubunia

⁵ Aipoí ké beringan pulalalepnia tá iagai ipagaba nia, kipangan lé iooi ipasikeli tatogat paamian

⁶ Ialeú et sia kaunen masiutéaké paamian, buí iapeí aitugurú ka arat Kariten, mabubuak paatuatnia, babara

ioorak nia pateleiat Taikamanua, kelé ka Sanitu siburú

⁷ Buítá maerú kuat tubunia ka talagat siberikabaga. Aipoí ké tá kisedda galai tubunia, paloloirangan leú et nia sirimanua, bailiu alánangan nia seseret Sanitu

⁸ Kisedda leú et tai bajá gareja, buítá sirimanua simaerú paraboat samba simaroipo бага; sitaimaalau бага ka bulagat, sitaimasosot muló, ló simapuinengen

⁹ Buítá mariu-riu raomet'aké bulat sibara ka agai bagadda simaliná tiboiet putoneman bagadda tai Kariten sipatoilat Taikamanua ka tubudda

¹⁰ Buítá tuuji sia boikí; oto ké tá anai kuat tubudda ka sikataí, iapeité ioi rapubajá gareja ka paamian

¹¹ Sinanalepra leú et, buítá simaerú paraboat, tá siobá masipabara nga-nga. Buítá raagai rapaom bagadda samba matopit sia ka sangamberinia

¹² Tai bajá gareja ka sia leú et, bulé sarat sara lé sinanalepra lepá. Buítá iagai masipagaba puririmanuanda tatogania samba masipasikeli pulalalepnia, simakolou

¹³ Sia sipasirorop sipulelelek ka paamian, rahohormati sia sapaamian. Ialeú et memei magegege sia masitiboi pagalaiat putotonem bagadda ka tubut Kristus

¹⁴ Bulat ké pei táan mauju kuoi kubalou kam. Tápoi kenanen kisedda, eddangannia kugalai surat néné ka kam

¹⁵ Bulé makaburú kuoi, anuagaian kam, kipa muparaboat simaerú, siripot puririmanuatta sipuoni sikauman Taikamanua, iaté sapaamian Taikamanua sipuririmanua. Aipoí sapaamian néné te, bulat arigi sipasiririóaké elé sipasisosopo nganturat puaranan bulat sibulatnia, sibara ka Taikamanua

¹⁶ Beri sia sara siputatá kipa kopet pubebeunannia keleat ka aratta néné. Iapatoilá tubunia kelé mutubu sirimanua, aisineseat'akéan nia Ketsat Sipunenan, samba araigbuk'an nia samalaika. Atupaarep'an katuaremannia ka tai bangsa ka polak néné, matonem bagadda sirimanua ka sangaliot polak ka tubunia, lepá akkat'akénangan nia Taikamanua, ka manua.

4 ¹ Bulat maron aisiblaaké nia Ketsat Sipunenan. Aikua ka gogoi sibabara,

ai sia sangasilá igidda sirimanua
sisik-sik tei-teina, rakaddiuaké Kristus,
raei masitut'aké nga-ngan ketsat
sipasipepepeaké sia samba nganturat
ketsat sikataí

² sisegéakenenda siriamanua sipatataju
ka pabokoatda. Aipoí teu-teu бага
sikukuddu ka bagat paatuatda,
amagep-gep'an

³ Rangantruaké ka tubudda sirimanua,
buí raputalimou, samba buí rakom
kan sikokoiaenen. Oto aibaraaké nia
Taikamanua kan néné, komen lé, kelé
pasikukuadda surá ka tubunia ka sia
simatonem бага ka tubut Kristus samba
sia siagai nganturat bulat sibulatnia
sibara ka Taikamanua

⁴ Aipoí sangamberinia sibaraakenen
Taikamanua, sarat simaerú lé. Oto
tá anai beri sara oniakenen takei-kei
itukom, ké atusilóan nia ka surat бага,
ka tubut Taikamanua

⁵ Aipoí panukanan sibara ka Taikamanua
sambat paniddogat ibabailiuaké, komen
néne momoi itukom

⁶ Ké nugalaiaké sangamberinia néné
ka tubudda sasaraina sikeré tonem
bage ka tubut Kristus, bailiunangan

ekeu sipugagalai galajet Kristus bulat sipulelelek. Riu-riu nuparimanuaaké tiboiet Taikamanua sikatonemitta, samba ngantoman bulat sibulatnia situt'akenennu ka burúnia néné

⁷Bá aarepi pungu-nguan sitá galai. Tápoi ubui lé tubum musurú ka Taikamanua

⁸Tá maigi uktukta masilati tubu, tápoi latian siorak ka puketsanan geti, maigi katukaunannia. Aipoí ka bagania, ai patonekat Taikamanua siorak ka puririmanuatta kineneiget, sambat siorak ka puririmanuatta ka gogoi sibabara

⁹Bulat sibulatnia te patonekat néné. Oto bulat buítá tasiló kam nia, samba buítá takatonemi kam nia bulat sibara ka muinet paatuatta

¹⁰Iaté lulunia tapeperjuang'aké samba tamomomoaké kam tubutta mugalai, ai lé poí bulat takakatonemi kam nia бага Taikamanua, iaté Taikamanua sipuririmanua, Sipaarau sangamberi sirimanua, sarapeite sia simatonem бага

¹¹Oto ngantruakéan sangamberinia néné, samba kua ka matadda, rareddet nia

¹² Buí rabara sipuarak ekeu sapaamian, kalulut raitsó bau tubum peilé. Tápoi kau lé ibailiu ekeu uluietda sangamberi simatonem бага, iaté ka titiboatnu samba ka paraboatnu, ka galai punununtut bagam ka pasasamba saalei sirimanua, samba ka putotonem bagam ka tubut Jesus Kristus, samba ka puririmanuam simaliná

¹³ Oto pangenan kuoi, kutiddou buítá nubatsaaké bulat sipulelelek Buko Sipunenan, ka tubudda sirimanua, masitubbui samba masingantru sia

¹⁴ Buí nuoreaké nupakei panguruat sibara ka Ketsat Sipunenan, siaké ka tubum, sibara ka siutéaké paamian, ka tetret arasukat'aké ekeu, samba leú et patonekat Taikamanua sisesege ka tubum, sibara ka tai nabi, masikua pagalaiat tubum

¹⁵ Bulat kau sibulatnia sibara ka muinet paatuatnu, nugalaiaké sangamberinia néné, bulé raigbuk nia sangamberi sirimanua, kamajuannu

¹⁶ Bulat kau nujago tubum, samba nganturatnu. Buítá numatopit masigalaiaké sangamberinia néné. Oto ké kisedda baí nugalai, oi nurop'aké

tá sarat tubum, tápoi sambat sia leú sipasiaarep ngantomannu.

5¹ Bá paaanuji sia simakabajá ka tubum; tápoi náná lé nia iarepi tiboietnu, kelé nuoniaké nia ukkuinu.

Addeaké sia sibau tubu, kelé sarainam

²ialeú et saina simabajá, addeaké sia kelé sainam. Tainanalep sibau tubu leú et, oniaké sia samaniunu, bulat sibara ka paatuatnu simaliná

³Kau nuhormati sia tailumang, sipututukká tubu

⁴Tápoi ké ai peilé geti sia tatogania elé sapunuteteunia silumang néné, sia boikí nupangangantru, bulé raagai rapasikeli saeppudda, samba bulé raagai rasiliaké sigalaira saeppu simaerú, elé sasibbuadda ka tubudda. Aipoí nenda lé siobat bagat Taikamanua

⁵Oto sia tailumang sipututukká tubu kalulut táan anai sia sipasikeli nia, kau ipukaronan sarat ka tubut Taikamanua. Kau ipaniddou ka tubut Taikamanua sinágó samba sinoibó, masitiddou paromannia

⁶Tápoi tailumang sigalai siobat tubunia geti, kenanen taitsó nia ai nia

muririmanua, tápoi amateian nia ka puketsanan

⁷Oto segéaké tiboiet néné ka tubudda, bulé rapurimanua sitá kuat tubu ka sikataí

⁸Ké ai sia sitaipasikeli sasaraiania, sarapei sia bulat sikuddu ka lalepnia, aiputatáan lé katonemietnia бага; oto bailiu nia peilé makataí paraboa, ka tubudda sitaimatonem бага

⁹Oniakenen geti bulat tailumang ka bagat paamian, iaté: buítá sienem ngapulu ngarura bajára, samba sarat sangamitsá lé aiputalimou

¹⁰Maarep galai tubunia sinanalep néné obána mugalai simaerú, iaté kelé: aiurau tatogania sipulelelek, iobá masisiló tairauma ka lalepnia, iobá masirop'aké simatonem бага, iobá masirop'aké simareu-reu бага, samba bulat sibara ka muinet paatuatnia igalaiaké galajet simaerú

¹¹Buí nuaddeaké kam sia tailumang sibau tubu. aipoí ké isuggru sia pubobot-bot akkulá, repdemnangan mitsá mutalimou, kaddiuakénangan leú et Kristus

¹² Bailiu maseleddangan leú et,
ka matat Kristus, kalulut araputató
palelengan sikau ka tubunia

¹³ Samba bagei, rasapprouaké tetretda
raei masisenei lalepra sirimanua. Tápoi
bulat makopé kataí, iaté rapaloloi
sabagei, samba raobá masipageu-gebi
galajet puukuketda sabagei. Ialeú et
raobá masitiboi apa pá sitaimatéú tutiboi

¹⁴ Iaté lulunia, siripot sipinaatukku
kaku, maerú peilé raputalimou mitsá
tailumang sibau tubu néné, bulé bara
tuppai tubudda, rapasikeli pulalalepra,
babara enunganda tai saggakta rapaloloi
sita

¹⁵ Aipoí aian sia tailumang simapepepe,
kalulut ratut'aké ketsat sikataí

¹⁶ Oto ké ai baí sia tai Kariten sibara
saeppu tailumang, buítá irop'aké
sia tailumang néné, buían rarop'aké
nia sapaamian. Bailiu puukuketda
sapaamian, sarat siangan lé tailumang
sitá anai saeppu

¹⁷ Sia siutéaké paamian simatopit
mugalai galajet, buítá bulat nuabeuaké
kam sia ka bagat paatuatmui, rua
ngaoleat iginia, sarapei sia simangamang
mungantoman samba pangantru

¹⁸ Kelé ka sikuat ngantoman ka Buko Sipunenan kisé, "Mateú lé rasiló upadda ka sia sipugagalai.

¹⁹ Buí nuarepi panganduatra kasei pá, siooi masinganduaké galai tubudda sauté ka paamian, ké tá anai sia rua elé legei igidda, sipasimumuneng'aké galai tubunia

²⁰ Buíta nuteká sia ka matat paamian, sia sipasigagalaiaké jo, bulé ramalotó ka sia sabagei

²¹ Ka matat Taikamanua samba ka matat Jesus Kristus, elé ka matadda samalaika sipiliynia, kutiddou simaron ka matam, bulé nugalaiaké nganturat néné, iaté, buí nusuk-suk kasei pá, elé buí numaré-ré ka tubudda kasei pá

²² Buí makopé ruei nukau panukanan ka tubudda kasei pá, bulé ioi raukkáaké galajet, masipasikeli galajet Tuhan. Ialeú et, ké ai jodda sabagei, buí isappó ekeu. Jago tubum bulé mariu-riu numaliná

²³ Buían sarat oinan nuloló; tápoi ló goisó anggur, imaerú kejuknu, mabesiket lé poí ekeu

²⁴ Jodda sirimanua sabagei, tápei atuadili amatoiláan simakopé. Tápoi

jodda geti sabagei, ka tei-teian lé ituaagai

²⁵ Kisedda leú te galajet simaerú, maruei ituitsó. Beringan koí simabesí tuitsó leú et, tá momoi imaburú ikuddu kalilippunan.

6 ¹ Tai Kariten sipuoni pagugulet, buítá ikua ka bagadda, mateú rahormati nia tuanda, buí rapaloloi onin Taikamanua, elé ngantoman ka aratta

² Ialeú et sia sapagugulet siputuan tai Kariten, buí rapumit бага ka tubudda tai tuanda, aipoí, makeré lé pu-Kakaritenda. Tápoi siripokatnia, memei lé matotopit sia masipuukú tuanda, aipoí situan pasikelietda néné, sikeré tonem бага, simanuntut багат Kristus. Sangamberinia néné, buítá nugelaiaké samba nungantruaké ka tubudda

³ Kasei singantruaké nganturat sitaimakeré kelé néné samba tá raobá rasiló nganturat simakolou sibara kai Tuhanta Jesus Kristus samba nganturat ka aratta

⁴ sia te siumun'aké tubuna, tápoi beri apa pá tá raagai! Oringenda iaté paukle, pagolú, masipaukeli panganga-nganga

simakeru simabesí tukolouaké, pat
puottounangan sit-sit бага, kasaragaiat,
paloloiat, pasuksungan sikataí

⁵ samba paaggarat sitá anai kalepakat.
Sirimanua sitaiaagai paatuat'an lé sia
néné, samba táan raagai simaerú. Aipoí
bulat ka bagadda te makakayo sia,
kalulut puaranan

⁶ Kirénangan tedda babara uktuk sabeu
kalulut puaranan, ké segé bagadda
siripot sibabara ka tubudda

⁷ Aipoí beri sara tá anai siabbitta ataoi
kam ka polak néné; ialeú et, beri sara
momoi taabbit kam sibara ka polak néné

⁸ Oto bara lé kan, elé leppei, páan,
metnangan

⁹ Tápoi ka sia geti siobá mukayo,
aiorak'an sia pasisiboat, elé aialáan
sia seseret sene ngamata pubobot-bot
taipaatuat, samba obat masipakataí.
Ka puaalau бага nenda leú te sikau
ramakataí elé ramatei sirimanua

¹⁰ Aipoí kalulut puaalau бага ka
bulagat lé ikakabaraji sene ngamata
pukakataí. Ai sia sabagei, kalulut sarat
ka pubulaganaan lé ieei paatuatda,
bailiu taiobárganan masitut ngantoman
ka puaranan Kariten. Kalulut néné

sak-saknangan sia sene ngamata pangoringan, sipakataí pupaaturananda

¹¹Tápoi ekeu geti kekeu, bakkat Taikamanua lé ekeu. Oto buítá nuareuaké tubum ka sangamberi sikuakku néné. Besiaké ibailiu ekeu simaroipo ka matat Taikamanua, sipaniddogi Taikamanua, simatonem бага ka tubut Kristus, simanuntu бага ka pasasamba sirimanua, simaom бага ka pangoringan, samba simaleppe бага

¹²Bulat kau imataiko ka bagam masibesiaké muparaboat siripot sara laddou paamian tai Kariten, ioi nuoppu nuikep'aké purimanuaiat sipulelelek samba sitaitatatá ka manua. Aipoí nenda lé pubakkanannia aisogai ekeu Taikamanua, ka tetret anumuneng'aké tonem bagam ka tubut Kristus, ka matadda sirimanua simigi

¹³Oto kineneiget ka matat Taikamanua sipasikakau enga ka tubut sangamberi sibaraakenennia samba ka matat Jesus Kristus sipasimumuneng'aké simakolou pagalaiat tubunia ka matat Pontius Pilatus, kutiddou ka tubum

¹⁴Bulé nureddet sangamberinia néné bulat sibara ka linat paatuatnu samba

sitá loloijet ekeu, teret iaili mitsá gogoi kaoijanan Tuhanta Jesus Kristus

¹⁵ Pagalaiat gogoi kaoijanannia geti, ai leú iteúaké nia Taikamanua ka sara tetre sipasesese. Nia lé poí sikup-kup'aké manua sambat polak. Sipulubeunan lé nia, Rimatadda tai Rimata, samba Tuhanda tai tuan

¹⁶ Sarat nia lé tá ioorak kamateiat; ka simalatsat lé ikukuddu. Tá momoi beri sara sirimanua masilegeri kudduatnia. Beri pei sia sara sirimanua sipasiiitsó matania, elé momoi masiitsó matania. Ka tubunia lé katuumun, gege teret buru-burú! Amen

¹⁷ Iageti ka tubudda ka sia simakayo ka polak néné, kutiddou ka tubum, bulé nupangantru sia, buí raumun tubudda, samba buí rakaroni бага purimanuaiatra sibara ka bibilet simatataket néné, iaté kelé bibilet pukayoat. Tápoi kau lé rakaroni бага Taikamanua sipasiaaké sangamberinia ka tubutta bulat sipususukkra kalulut kopet iginia, bulé tapuuktungi kam nia

¹⁸ Kua ka matadda bulé rapatoilá pueerut bagadda ka sirimanua, iaté masigalaiaké maigi ngamataat galajet

simaerú, kelé muaggai бага ka
saalei, samba obá masipanguruat'aké
pukayoatnia ka sabagei

¹⁹Oto bailiu sigalaiakenenda néné,
ararurúakéan ka sia pukayoat simaerú,
sibailiu puuktunganda ka gogoi sibabara.
Samba kalulut sigalaiakenenda néné
leú, silórgan purimanuaiat sipulelelek
samba sitaitatátá

²⁰Ale Timoteus, apa galajet pasikelat
sisilónu siripot aikatonemi ekeu бага
Taikamanua, bulat jago sipulelelek! Bá
oobá paukle ka sitá galai, samba paron
nga-nga ka sitaimakolou kelé oniakenen,
"Puaagai"

²¹Ai sia sikua tubuna, kalulut ka
babarat puaagai ka tubudda, pat bitsli
sia ka nganturat aratta tai Kariten
sikatoneminda siburú. Bulé Tuhanta
masipanukani kam sangamberimui, kam
Sasarainamai. Hormatmai, Paulus

2 Timotius

1 ¹ Ale Timoteus, togakku kilibet bagakku. Aku sipuoni si Paulus néné te amugalai surat néné ka tubum, samba bulat kukaroni бага bulé Ukkuita Taikamanua samba Tuhanta Jesus Kristus masipanukani, masipanguruani samba masibujai ekeu. Ka teú bagat Taikamanua pauddetnangan aku bailiu apostel Jesus Kristus, lepá koiniakénangan aku Taikamanua, masipaarep pagalaiat purimanuaiat sitonéakenennia. Tasisiló kam purimanuaiat néné, kalulut pusaraatta ka tubut Jesus Kristus

² (1:1)

³ Surá lé kukua kai ka tubut Taikamanua, puukuketku bulat tubut sibara ka paatuatku simaliná, kelé sigalaiakenenda taikebbukatku siburú. Sarat masikua surá lé kugagalai ka paniddogatku, ka tubut Taikamanua, ké kurepdem ekeu ka paniddogatku sinágó samba sinoibó

⁴ Sarat kupaatu purereu-reunu бага. Iaté lulunia imarerepdem bagakku

moi kubalou ekeu, bulé bulat imangká bagakku kaku

⁵Kuagai bulat kopénia ron tonem bagam ka tubut Kristus, kelé puroron tonem bagat sibbuam si Lois samba tonem bagat inam si Eunike. Bulat matonem bagakku tonem bagam kekeu, kisedda leú et ka tubut Kristus

⁶Oto bulat kutiddou ka tubum, bulé nujuluuaké panguruat Taikamanua sisilónu, ka tetret akusukat'aké ekeu

⁷Aipoí Ketsat Sipunenan siaket Taikamanua ka tubutta néné, tá Ketsat situbbui sita mulotó. Tápoi Ketsat Sipunenan geti, siparon paatuatta lé, élé sipatim paatuatta nuntut бага ka saalei samba siparon sita lé, bulé ioi takera kam tubutta ka sikataí

⁸Oto buí numaila masimuneng'aké pagalaiat tubut Tuhanta. Ialeú et, buí numaila masipoiliat pagalaiat tubukku, siukum'akenen ka bagat penjara, kalulunia. Tápoi bule kalulut puroron sibara ka Taikamanua, bailiu ekeu leú et kekeu, mangorik paoreat, kalulut Katuareman Simaerú

⁹Aipaarau samba aisogai sita Taikamanua, bulé ibailiu sita paamiannia.

Aigalaiaké nia geti kelé néné Taikamanua, tá kalulut sigalaiakenenta apa pá, tápoi bulat siteúakenennia samba kalulut panguruatnia lé. Panguruat Taikamanua néné, atasilóan sibara ka tubut Jesus Kristus, ainangan tá babara polak néné

¹⁰ Oto kineneiget, aipatoiláan panguruatnia ka sita, ka kaooi Rimata Sipaarau sita, iaté Jesus Kristus. Geget kamateiat néné, aikalaakéan Jesus, lepá akénangan purimanuaiat sitaitatátá sisilóta sibara ka Katuareman Simaeru

¹¹ Oto kalulut masipaarep Katuareman Simaerú néné te, airióaké aku Taikamanua muapostel sambat muguru

¹² Iaté lulunia kuorik sangamberinia néné. Tápoi kenanen kisé, tá ipakakataí putotonem bagakku. Aipoí ai lé kuaagai nia simakolou katonemietku бага.

Matonem bagakku, sangamberinia galajet sisegéakenennia kaku kalulut tonem bagania ka tubukku, mariu-riu lé ijago nia teret iaili Gogoi Sialu

¹³ Oto kau bulat sibulatnia nutut, sangamberinia nganturat sipulelelek siripot singantruakenenku ka tubum. Ialeú et, kau imariu-riu nukatonemi Jesus Kristus samba numakaté бага ka

pasasamba sirimanua, siikep'akenenta,
kalulut pusaraatta ka tubut Jesus Kristus

¹⁴ Ka paroman Ketsat Sipunenan
sipuririmanua ka bagat paatuatta, bulat
kau nujago sipulelelek sangamberinia
bibilet simakeppu saki, iaté Katuareman
Simaerú, sisegéakenen Taikamanua, ka
tubum

¹⁵ Kelé siagainu, sangamberidda
sikukuddu ka Asia, arakaddiukéan aku.
Beri leú et ka sia si Pigelus sambat si
Hermogenes arakaddiukéan aku

¹⁶ Tápoi sia geti sangalalepra tai
Onesiporus, bulat amarei-reian
arabaraaké puangkakat bagakku. Bulé
ipatoilá katet bagania si Tuhan ka
tubudda. Aipoí kenanen ai aku ka bagat
penjara, tápoi tá maila nia si Onesiporus
masiitsó katuukumku

¹⁷ Bulat segéna lé ka Roma,
besiakénangan igaba aku teret
sesena aku

¹⁸ Siagainungan leú, ka tetret ai aku
mukukuddu ka Epesus, bulat maigi
paromannia k tubukku. Oto bulé
ipununtuki nia бага si Tuhan, ka tetret
iaili gogoinia ipasiadili sangamberi
sirimanua, si Tuhan.

2¹ Ale togakku Timoteus simatopit!
Kau imaron paatuatnu, kalulut
panguruat katet бага, siaket Taikamanua
ka tubutta, kalulut pusaraatta ka tubut
Jesus Kristus

² Nganturat siarepnu siburú,
singantruakenenku ka tubum, ka
matadda sirimanua simigi, buíta
nusegéaké nia ka tubudda simatonem
bagam, siagai masipangantru sabagei

³ Buíta nuorik paoreat, siripot perajurit
Jesus Kristus, simatopit

⁴ Aipoí sipuoni sara perajurit sienung'aké
galajetnia, táan te itututuri galajetnia
saranja, kalulut ibesíaké imangká bagat
panglima ka tubunia

⁵ Kisedda leú te ka sia sieei patanding,
tá te mujujuara nia ka sara patandingan,
ké tá itut'aké siripot enung patatanding

⁶ Kisedda leú et sia sipumomone,
simomoaké tubuna lé muboboikí masisiló
buat siuremannia

⁷ Patup-tup peité ka bagam, sangamberi
sikuakku ka matam néné, aipoí iaaké
kekeu si Tuhan puaagai masikeruji
sangamberinia

⁸ Repdem sikuakku néné: Katuareman
Simaerú, sipakakrakku néné, iaté

katuareman pagalaiat Jesus Kristus,
punuteteu Dapid; nia té néné Kristus,
sipuririmanua mitsá ka simamatei

⁹Kalulut pakakakrakku Katuareman
Simaerú né te, akuorik paoreat. Momoi
takua bulat pat kabérangan aku rattei,
rakau aku kelé sirimanua sikataí
paraboat. Tápoi tiboiet Taikamanua geti,
tá momoi iturattei

¹⁰Iaté lulunia, kupaoom bagakku,
masiorik sangamberinia néné, kalulut
kubesíaké ibara puuktunganda sia sipiliy
Taikamanua, bulé rasiló leú ka sia,
puaragat sibara ka Taikamanua, sisilóra
ka tubut Jesus Kristus, sambat sialei
pulatsanan sitaitatátá

¹¹Bulat sineseat te sikuat nga-nga
néné, "Ké sambattangan Kristus amatei,
sambatta leú te Kristus muririmanua

¹²Ké mariu-riu tapaom bagatta
mangorik paoreat, puutétangan sambat
nia ka Purimataat manua. Tápoi ké geti
taputatá nia, putatánangan leú te sita,
ka sita

¹³Tápoi kenanen tá matopit sita ka
sita, nia geti ka sia riu-riu lé topit nia, ka
tubutta. aipoí ka sia, tá momoi ipakataí
palelengannia, siniblaakenennia.

¹⁴ Bulat kau nukua nia ka matadda, sangamberinia néné. Ngantru sia ka matat Taikamanua, bulé buían rapaukeli panganga-nganga simabesí tuagai. Aipoí bulat tá anai lulunia, masibaraaké puingoat pupaaturananda lé sipasiaarep

¹⁵ Bulat besíaké, iakui ekeu Taikamanua, sipugagalainia, simateú mugalai galajetnia. Bulat besíaké, bulé buí numaila ka galajetnu néné, tápoi bulat maipó nugelaiaké bagat puaranan bulat sibulatnia, sibara ka Taikamanua

¹⁶ Areuaké tubum ka paronan nga-nga sitá galai, samba ka tubudda sipaloloi onin Taikamanua. Aipoí paronan nga-nga kelé néné, sarat masituppai jodda sirimanua lé

¹⁷ Mararat lé poi nganturatda néné, kelé irarat baroang. Oto sia té néné sipuoni si Himeneus sambat si si Piletus

¹⁸ Atubitslingan sia, ka nganturat arat simakolou; bulat arapaingongan putotonem bagadda sabagei. Arakua, amuailingan katusuruat tubu simamatei

¹⁹ Tápoi bongan sirióakenen Taikamanua geti, tá ipakakataí. Ai atusurat'aké ka uddutnia, sipasikukua kisé, "Iagai sia bakkatnia", samba, "Sia

sipasikukua Tuhan lé sibakkat sia, buítá raariaké mugalai galajet sitaipasesese.

²⁰ Kelé ka bagat lalep sabeu, ai sedda sene ngamata galajet ka bagania. Ai perak, samba ai leú et emas. Tápoi ai leú et bibilet sigalai sibara ka loiná, elé galajetnia sibara ka polak. Ai katupakeiatnia ka galajet sikokoiakenen, tápoi ai leú et katupakeiatnia ka galajet simaturere

²¹ Sia silináaké tubunia ka sangamberi galajet sikataí, sia té tupapakei ka galajet sikokoiakenen. Bailiu nia bakkatiet tuan simakokoi, samba ai kauna nia si tuannia. Atupatarek'an nia ka sangamberi galajet simaerú

²² Areuaké tubum ka puobbat tubudda sipuoni sibau tubu. Besiaké muparaboat siripot obaket bagat Taikamanua. Matopit ka tiboietnia, samba manuntu бага ka pasasamba, samba ai aban бага ka bagat paatuat. Puparaboat kelé nenda sambamui sipusosoga masitiddou paroman ka tubut Tuhan, ka linat paatuat

²³ Buí nutut'aké paukelatda sitaiagai paatuat, iaté sitaiagai apa pá onia.

Aipoí anuagaian, sangamberinia néné,
sibaraaké pajoggolat lé

²⁴Tá mateú rapajogglo ka sia
sipugagalai galajet Tuhan, tápoi buítá
maerú bagania ka sangamberi sirimanua,
samba malelek ipangantru sirimanua, ka
om бага

²⁵Buítá maleppe bagania,
masipangantru sirimanua simaron
nga-nga, bulé ikau ka sia Taikamanua
oggak, rabauaké paatuatda ka jodda,
samba raagai nganturat arat bulat
sibulatnia

²⁶Kalulut néné, oleinangan bagadda,
samba bela sia ka seseret Sanitu
sipasikakabéaké sia, samba
sipasipapaksa sia, bulé ratut'aké,
siobat bagania.

3¹Repdem néné: Ka gogoi kei aiaili
Sialu, babara te pugejaat бага

²Sarat tubuddangan lé te rapasisikeli
sirimanua, maalau бага ka bulagat,
maumun tubu, masosot titiboat. Raobá
masipaloloi sirimanua, masilawan
saepu, tá raagai masikua surá, samba
leú masipulagaki бага apa simaerú,
siorak galajet puketsanan

³Tá manuntu bagadda ka pasasambadda sirimanua, tá raobá masiappéaké seleda saalei, raobá masipaloloi sabagei, maoddoi sia ka sirimanua, makopé kataí gegedda, samba tá raobá puerukat

⁴Raobá masipajo saalei bulé ramakataí, maukat tubu, samba tá makeru rapaatu apa pá. Puobbat tubu ka polak néné peilé makopé ialá bagadda, belé peilé puobá masitut siobat bagat Taikamanua

⁵Kenanen tuitsó nia ka putubuatda matopit sia masigalaiaké galajet ka puaranan, tápoi bulat bagat puaranan geti, tá rasisiló. Oto bá reunan'aké tubum ka tubudda, kelé néné

⁶Aian sia ka talagadda sieei sipinakele ka palale-lalep, nánáranan sia tainanalep simagulai pupaaturan, iaté smakopé igit jo, samba sikup-kupit sene ngamata puobbat tubu

⁷Mariu-riu lé ratiddou nia tainanalep néné, bulé ragelaiaké sia, tápoi beri pei sesedda nia, bagat arat bulat sibulatnia sibara ka Taikamanua

⁸Kelé ka tai Janes samba ka tai Jambres, arasaggangi si Mose siburú, kisedda leú te ka sia néné,

arasaggangi tiboiet ngantoman, sibara ka Taikamanua. Amakataían paatuatda, samba putotonem bagadda ka tubut Kristus leú et, atusaggat'an

⁹Tápoi tá rasesese apa pá, ai lé poi raagai sirimanua taiagaira apa pá, kelé leú et sipuaaili ka tubudda tai Janes sambat tai Jambres

¹⁰Tápoi ekeu geti kekeu, anutut'akéan nganturat singantruakenenku ka tubum, samba anuuluian arat tubukku, elé anuagaian ailiakenenku ka puririmanuangku néné. Anuitsóan kipa bulat pumumuinet paatuatku masikatonemi Jesus Kristus, samba punununtut bagakku ka tubudda saalei pasasamba sirimanua. Samba ai lé nuaagai om bagakku, samba kupaom bagakku masisiló apa pá siooi ka tubukku

¹¹Anuitsoán rapaorei aku, elé kupangorik. Beri leú sangamberinia sipuaaili ka tubukku ka Antiokia samba ka Ikonium, elé ka Listra, anuagaian; samba anuagaian sangamberinia paoreat siorikku! Tápoi tá aisoppi akubela ka sangamberinia néné, kalulut paroman Tuhan

¹² Aipoí bulat kirénangan lé, sangamberi sirimanua simaron ka arat samba siobá musara ka tubut Jesus Kristus, buítá rapaorei

¹³ tápoi ka sia sikataí paraboat samba sipatataju, memei leú iuurau pukakataíra. Rapataju sabagei, ka bagadda poí tá aiorak sia ka sia patajuat

¹⁴ Tápoi ekeu geti kekeu Timoteus, kutiddou ka tubum, kau imariu-riu nuomet'aké nganturat bulat sibulatnia, sigelainu samba sikatonemim, sibara ka muinet paatuatnu; aipoí ai lé nuagai kasei gurum sipangantru ekeu

¹⁵ Buítá nurepdem, sigoisó peilé ekeu anugelaian ngantomon sibara ka Buko Sipunenan. Aipoí Buko Sipunenan néné te masiaaké kekeu puaagai, bulé tasiló puaragat sibara ka Taikamanua, kalulut putotonem бага ka tubut Jesus Kristus

¹⁶ Sangamberi sitususurat ka bagat Buko Sipunenan, Taikamanua lé aipalulu nia, ibara pakeiet masigelaiaké puroipoat, masiteká sambat masipagaba simasele, samba masipangantru sirimanua, bulé rapuparaboat siripot obaket bagat Taikamanua

¹⁷ Oto kalulut Buko Sipunenan, bailiu tusut'aké sia bulat sipulelelek, ka sia sipuukú galajet Taikamanua néné, ka sene ngamata galajet simaeru.

4 ¹ Momoi te nia mitsá Jesus Kristus néné ka polak, masiadili sia sipuririmanua samba simamatei; samba momoi te nia murimata. Kalulut néné, kutiddou ka tubum, ka matat Taikamanua samba ka matat Jesus Kristus

² Bulé nupakakra Katuareman Simaerú sibara ka Taikamanua néné, ka sirimanua, samba bulat kau imakopé nupanánaki sia, bulé raarepi nia, raobá pá, elé tá. Kau nubesíaké isak-sak ka bagadda sikuam, nupatoilá sele sigalaira, elé nupatubbuji sia. Samba gelaiaké sia, bulat kaom бага

³ Aipoí iaaili te tetrenia tá raobá nia sirimanua raarepi ngantoman simaroipo. Tápoi siobat bagaddangan lé ratutut'aké. Rurúakérangan maigi tai guru, bulé ragelaiaké sia apa siobat piúra

⁴ Rapepet-pet'an lé talinganda, ka ngantoman simaroipo, tápoi masiarepi geti pungu-nguan, bulat ratotongiakéan talinganda, kopet obána bagadda

⁵Tápoi kenanen kisedda, bulat kau nujago tubum ka sangamberinia apa pá sibabara. Kau imaom bagam masiorik paoreat. Galaiaké galajetnu siripot sipuoni sipakakra Katuareman Simaerú, samba kau imalelek nugalaiaké nia galajetnu, siripot puoonim pagugulet Taikamanua

⁶Aku geti kaku, aiailingan tetrenia iailiaké kumatei, kelé buluakenen ka tubut Taikamanua. Táan mauuju kaddiuakékungan nia polak néné

⁷Apatakaian aku bulat sipulelelek. Oto akuailingan ailiakenen sitetreakenen. Mariu-riu lé aku ka tubut Kristus, pat kapplu sangamberinia

⁸Oto kineneiget hadiah siripot kamamanangku, aian nia pangengena. Ka Gogoi Sialu, akénangan hadiah kamamanangku néné si Tuhan, Hakim simaroipo, aipoí maerú patabbaratku ka tubut Taikamanua. Tápoi tá te sarat sarakku masisiló hadiah kamamanang néné, beri leú ka sia sangamberi singenaaké kaoijanan Tuhan, ka ngelei бага, rasisiló leú et

⁹Bulat besíaké nuoi simaruei nubalou aku

¹⁰ Aipoí ka sia si Demas, aikaddiuakéan aku, kalulut ituturi siobat bagat polak néné. Ameian nia ka Tessalonika. Iageti ka sia leú et si Kereskes ameian leú nia ka Galatia. Ka sia geti si Titus, ka Dalmatia lé aiei

¹¹ Sarat si Lukas'an lé amulegei aleiku. Kenan nualá si si Markus, nuoi kam ruamui ka tubukku, aipoí nia ka sia, momoi irop'aké aku ka galajetku

¹² Akugugluakéan si Tihikus iei ka Epesus

¹³ Iageti ké moi ekeu, abbit mantelku, sigalakku ka Troas, ka lalep Karpus. Oto pariu-riunungan leú et nuabbit pabuko-bukokku, sarapei sigalai ka karate kulit

¹⁴ Ka sia si Aleksander situkang tembaga, bulat aigalai sikataí ka tubukku. Ai leú isiliaké nia si Tuhan siripot sigalaiakenennia ka tubukku

¹⁵ Beri ekeu leú et kekeu, buítá nujago tubum ka tubunia, aipoí bulat makopé isaggangi Katuareman Simaerú sipakakratta

¹⁶ Ka tetret akukau pembelaanku siboikí, bulat beri sia sara amoi masipaaleiaké aku, tápoi amutui-tui lé

sia sangamberidda. Ké pei tá iseleaké sigalaira néné, Taikamanua

¹⁷Tápoi ka sia geti si Tuhan, aipaaalei aku. Aiaké lé paromannia ka tubukku, pat oi kupakakra Katuareman Simaerú, bulé raarep nia sia taú sipuoni tai Jahudi. Oto bela aku ka kamateiat

¹⁸Bulatnia si Tuhan lé ibebelaaké aku ka senen isiat bagadda sikataí ka tubukku. Iageti abbitnangan aku ka angkat бага ka Purimataatnia ka manua. Bulé tuumun'aké lé nia teret buru-burú! Amen

¹⁹Segé salamku kai Priskila sambat kai Akuila samba ka tubudda sangalalepra ka sia tai Onesiforus

²⁰Si Erastus ai nia ka Korintus. Ialeú et si Tropimus, talagat pubebesí nia akukaddiuké nia ka Miletus

²¹Bulat taiko nuoi, ainangan tá iaaili gogoi simaleppet. Segé salamra tai Ebulus, tai Pudes, tai Linus sambat tai Klaudia, kisedda leú et saalei sabagei sikeré tonem бага, ka tubut Kristus

²²Bulé ipaalei ekeu si Tuhan. Bulé ipanukani kam si Tuhan, kam sangamberimui ale Sasaraina! Hormatmai, Paulus

Titus

1 ¹ Ale Togakku Titus! Aku néné sipuoni si Paulus, iaté sara pagugulet Taikamanua, sambat apostel Kristus, amasigalai surat néné ka tubum. Aipiliy samba aikoiniaké aku Taikamanua masirop'aké sia sipiliy Taikamanua, bulé imaron tonem bagadda ka tubut Jesus Kristus. Aku leú et kaku, buítá kupalulu sia bulé raagai arat bulat sibulatnia, siripot sigelaiakenen ka aratta

² Ngantoman néné iaté sipaalei pukakaronan бага, masikua sisilóta nia purimanuaiat sipulelelek sambat sitaitatatá. Aitonéakéan Taikamanua puririmanua néné, ainangan tá babara tetre néné, samba ka sia Taikamanua, tá maboko nia

³ Ka sara gogoi sipasesese, patoilánangan nia pakerekat bagania néné, ka patonekatnia. Oto patonekat néné aiakéan ka tubukku kupaarepnia ka guglut Taikamanua Sipaarau sita

⁴ Ale Titus, bulat bakkat togakkungan lé ekeu néné, kalulut aku kaku sambat ekeu

kekeu néné, apakeréan atamatonem
baga ka tubut Kristus. Bulat aikukakaroni
baga, bulé isukat'aké samba ibujai ekeu
Taikamanua Ukkui sambat Jesus Kristus
Rimata Sipaarau sita

⁵ Akugalak'aké ekeu ka Kereta, bulé
nupasikeli sitaimakolou peilé. Samba leú
et bulé nupauddet sia tai bajá ka senen
laggai. Tápoi repdem sikuakku néné

⁶ Senen tai bajá buíta sitá kuat tubu;
ka sikataí buíta sarat sara sinanalepra;
tatogadda buíta amatonem'an bagadda
ka tubut Kristus samba sitaimaarep
simakopé pukekelat paatuat samba
sitaiaagai Perú

⁷ Panei-nei paamian iaté sara sipasikeli
galajet Taikamanua, oto tá momoi ibara
kuat tubunia ka sikataí. Tá momoi
imabuak paatuatnia samba buí simagolú,
elé simapuinenen kalulut puloló ló
simapuinenen, siobá palabá; elé
simaalau baga ka bulagat

⁸ Buíta siobá masirauma tairauma ka
lalepnia, iobá simaerú, masurú tubunia,
maroipo bagania, maliná paatuatnia,
samba makolou puririmanuania

⁹ Buíta iomet'aké nganturat
bulat katonemiet sipulelelek, kelé

singantruakenenku ka tubumui. Kalulut néné, bailiu oi ipangantru sirimanua sabagei, siripot arat sibulatnia, samba oi ipoiliat seleda, sipasisasaggangi nia

¹⁰ Aipoí maigi sia simalawan, sarapei sia sibabara ka arat Jahudi; sarat masipataju sabagei lé ragagalai, ka tiboietda sitá бага

¹¹ Buítá tuaséaké sia rapumeng-meng, aipoí ai lé rapaiingo pupaaturananda tatogat paamian ka senen lalep, kalulut nganturatda sitaipasesese. Ragagalaiaké nia geti kelé néné, sarat kalulut obára lé masigaba uktuk sitaimateú

¹² Ai sara nabidda leú et, sibabara ka laggai Kereta, sipasikukua, "Sarat paboboko lé ragagalai tai Kereta, bulat kelé tarimeu simasagbang sikataí pueereu samba sitaimamalá le sia.

¹³ Oto sikuania si nabi néné, bulat maipó. Iaté lulunia buíta maron nuaséaké galai tubudda néné; bulé mariu-riu raomet'aké arat bulat sibulatnia

¹⁴ sambat táan raomet'aké mitsá pungu-nguanda tai Jahudi, elé peraturan sigalaira sirimanua, sitaiobá masisiló nganturat arat sibulatnia

¹⁵ Sangamberinia lé maliná ka tubudda simaliná paatuat. Tápoi ka sia geti simalolit paatuat sambat sitaimatonem бага ka tubut Jesus Kristus, bulat beri sara simaliná, aipoí paatuatda sambat agai bagadda ka бага, amalolit'an

¹⁶ Arakua geti raagai nia Taikamanua, tápoi sigalaiakenenda nenda te masiputatatá. Oto bulat kasit-sit'akenen lé sia néné, bulat tá mareddet sia; samba bulat tá momoi ragalaiaké apa pá simaerú.

2¹ Tápoi ekeu geti ale Titus, buítá nugelaiaké nganturat arat bulat sipasesese

² Pangantru sia taimanteu simabajá, bulé imasurú tubudda, masiku paatuat sambat muparaboat siripot katuaaddeakéra hormanen. Samba buítá leú et raomet'aké nganturat puaranan bulat sibulatnia sibara ka Taikamanua, pakaté бага bulat pukakaté бага simasut, samba mangorik kaom бага

³ Samba, kau leú nupangantru sia tainanalep simabajá, bulé rapuparaboat sipaaakkup ka puoninda sikokoiaenen ka Taikamanua. Tá momoi rapakataí nga-nga ka sabagei, samba buí raubui

tubudda muló ló simapuinenen. Buítá rangantruaké simaerú

⁴ bulé kalulut néné, oi rapangantru tainanalep sibau tubu, bulé rapununtuki бага тaimanteura, samba leú et tatogadda

⁵ ramasiku paatuat, rapuparaboat simaliná, samba ibailiu sia ina simaerú ka pulalalep, samba simareddet ka simanteura. Oto bailiu táan anai sia sipaloloi katuareman simaerú sibara ka Taikamanua

⁶ Kisedda leú et, sia sibautubu kau nupangantru sia, bulé ramasiku paatuat leú ka sia

⁷ Buítá ibailiu ekeu uluiet ka sangamberi puparaboanan simaerú. Ké nugelaiaké sia, kau imaroipo bagam, samba bulat tubut kau sibara ka paatuatnu

⁸ Bulat sipinagaba lé nutiboaké tiboietnu, buí rapaloloi nia sirimanua, bulé ramaila simalawan, kalulut tatánia, pakata-kataí, susuiakenenda ka tubutta

⁹ Sia leú et sapagugulet, buítá mareddet sia ka tai tuanda, samba kau rabaraaké puangkakat bagania ka sangamberinia peruket. Bui ramasiddot ka nga-nga

¹⁰ buí rapanangkou. Kau rapatoilá galai tubudda simaerú samba matopit, bulé kalulut galai tubudda kelé nenda, umun'akérangan nganturat arat siorak ka pagalaiat Taikamanua, Sipaarau sita

¹¹ Aipatoiláan poi panguruat katet bagania Taikamanua masiarauaké sangamberi taikapolak

¹² Panguruat katet bagat Taikamanua néné té, masigegelaiaké sita, bulé buí tapuparaboat kam sitaipaaakkup ka siobat bagat Taikamanua, samba tá tatutut'aké kam siobat bagat polak néné. Ipangantru sita, bulé taagai kam musurú tubu ka puririmanuanta ka polak néné, maliná paatuat samba matopit ka tubut Taikamanua

¹³ Oto kineneiget ai sita masingenena iaili Gogoi karonietta бага; ka gogoi nenda peité raiitsó nia taikapolak pulatsanan Jesus Kristus, iaté Sipulubeunan samba Rimata Sipaarau sita

¹⁴ Aibuluakéan tubunia punu tubutta, masibelaaké sita ka sangamberi pukakataí, ibailiuaké sita paamian sibebela ka kup-kumen jo, samba bailiu

bakkatniangan lé, simangamang mugalai
simaerú

¹⁵Oto gelaiaké sangamberinia néné,
samba pangantru samba aséaké sia
sipasiaarepi ngantomannu, tápoi bulat
ka kolou tubu. Buí ibara beri sara
sipuarak ekeu.

3¹Pangantoman sia sapaamian
pasikelietnu, bulé ramareddet ka
nga-nganda sauté samba sapamarenta;
mareddet samba leú matarek sia
masigalaiaké sangamberi simaerú

²Kua ka matadda, buí rapakataí nga-
nga, elé rapajogglo ka tubudda kasei
pá, tápoi muerú бага lé ragagalai. Kau
mariu-riu rapuleppe бага, ka tubudda
sangamberi sirimanua

³Aipoí sitaiagai paatuat lé sita siburú,
simapepepe samba sitaimareddet.
Aikup-kup'ake sita sene ngamata
pubobot-bot akkulá samba pukikiddiy
baga; ai lé itututu bagatta mugalai
sikataí, samba maoro matatta, samba
sarat palagá бага lé tagagalai kam

⁴Tápoi ka sia geti Taikamanua, Sipaarau
sita, aipatoiláan erut bagania samba leú
et erut bagania ka tubutta

⁵ Aipoí aipaarau sita Taikamanua, tá te kalulut gagalaiakéta simaerú, tápoi kalulut katet bagania lé ka tubutta. Aipaarau sita kalulut Ketsat Sipunenan lé, iaté aipanguruat'aké ka sita putútukat mata sibau sambat puririmanua sibau, iaté aibui sita ka jotta

⁶ Aiuruaké Ketsatnia Taikamanua ka tubutta, kalulut Jesus Kristus, Rimata Sipaarau sita

⁷ bulé kalulut panguruat katet bagat Jesus, maerúnangan mitsá patabbaratta ka tubut Taikamanua, iageti ikep'akétangan purimanuaiat sipulelelek samba sitaitatatá karonietta kam бага

⁸ Bulat sibulatnia te tiboiet néné. Bulat kiddiyet bagakku ka tubum, bulé nuron'aké nga-ngam nukua pagalaiat néné, iaté, bulé mabesí ka bagadda simatonem бага ka tubut Taikamanua, masigalaiaké galajet simaerú sibailiu puuktunganda sangamberi sirimanua

⁹ Areuaké tubum ka paukelat sitá lulu, ka pungu-nguan pagalaiat paninikat tubut sirimanua, ka pajoggolat sambat palabakat siorak ka pagalaiat surukat ka

puaranan. Sangamberinia néné tá anai lulunia samba tá anai uktukta ka tubunia

¹⁰ Buítá nuteká sia sibaraaké karaganan paamian, sangamitsá elé pat aili rua ngamitsá; lepá nuaséaké nia, buían nupaaleiaké nia

¹¹ Anuagaian sia sipuparaboat kelé néné bulat simasut pukakataí te nia, sambat ka jonia lé imatotoilá kababarat sele sigalainia

¹² Oto segéra lé sikoiniakenenku ka tubum, iaté si Artemas sambat si Tihikus, besíakénungan nuailiaké aku ka Nikopolis, aipoí aikupaatu mukuddu sedda ka burut gogoi simaleppet

¹³ Bulat besíaké nurop'aké si Senas, Serjana Hukum sambat si Apollos, bulé muriu-riu ratui-tui, samba buí bara simagulai ka sia

¹⁴ Aipoí buítá ragelai ka sia saladdouta néné masigalaiaké simaeru, bulé rarop'aké aponia besíakenen; buí rapurimanua lé sitá katupunan

¹⁵ Iageti sia sasarainanta sipaaleiaké aku leú et, segé salamra ka tubum. Oto segéaké salammai ka saaleita sikeré tonem бага ka tubut Jesus Kristus. Bulé

ipanukani kam sangamberimui si Tuhan.
Hormatmai, Paulus

Filemon

1 ¹ Ale Sarainamai Pelemon, alei
sambat sikeré kabei ka galajet!
Aku néné sipuoni si Paulus, situukum
kalulut Jesus Kristus, sambat sarainanta
si Timoteus te, amugalai surat néné
sisesegé ka tubum

² samba ka tubudda sapaamian
siparururú ka lalepnu samba leú et mitsá
ka tubut maniuta si Appia, samba kai
Arkipus aleita sisangaperjuangan

³ Bulat kukaroni kai бага, bulé Ukkuita
Taikamanua sambat Tuhanta Jesus
Kristus masisukat'aké samba masibujai
kam

⁴ Ale Saraina, senen kupaniddou ka
Taikamanua, sarat kukua lé onim, samba
kukua leú et surá ka tubut Taikamanua

⁵ Kalulut aarepku bulat putotonem
bagam ka tubut Tuhan Jesus, sambat
punununtukim sia бага sangamberi
tatogat paamian

⁶ Akutiddou ka tubut Taikamanua,
bulé pusarainaatta siripot pukekeret
tonem bagatta ka tubut Tuhan Jesus

néné, bailiu memei makokopé kolou
ka bagatta, pagalaiat sangamberi
panukanan Taikamanua siikep'akenenta,
kalulut pusaraatta ka tubut Kristus

⁷Ale Sarainamai Pelemon, bulat
mangká bagakku kalulut nuntut bagam
ka tubudda sangamberi laddou paamian
Taikamanua. Iaté né masiroron'aké
mitsá paatuatku! Kalulut ekeu, bailiu
magoranangan bagadda sangamberi
tatogat paamian Taikamanua

⁸Kalulut néné, kelé sipuoni saraina
sikeré tonem бага ka tubut Tuhan Jesus,
mateú leú te kuparentaaké ekeu, kukua
ka matam, apa simateú galaiakenennu

⁹Tápoi kalulut nuntut bagakku ka
tubum ale Saraina, bailiu paniddogat'an
lé kuaaké ka tubum. Aku néné sara
simabajá. Kineneiget ai aku ka ukuman
ka bagat penjara kalulut Jesus Kristus

¹⁰Aku néné sipuoni si Paulus;
kineneiget moi aku maniddou ka tubum
ale Saraina, iaté masikua pagalaiat si
Onesimus, sioniakenenku togakku ka
onin Kristus. Aipoí kukuddukku sené ka
bagat penjara, aibailiuan aku ukkuinia
ka puketsanan

¹¹ Ka panandaatnia tá anai punnu nia. Tápoi kineneiget geti aian uktuknu ka tubunia. Tá sarat ekeu mauuktuk, tápoi beri aku leú et kaku mauuktuk aku ka tubunia

¹² Oto kineneiget simanuntut bagakku néné, kukoiniaké nia mitsá ioi ka tubum

¹³ Akupaatu leú te kukera nia, ikuddu peilé ka tubukku silit tubum, ioi irop'aké aku teret kipa burúnia kukuddu ka bagat penjara néné, kalulut masipakakra Katuareman Simaerú sibara ka Taikamanua

¹⁴ Tápoi tá kuobá kugalai apa pá, ké tá sibara ka teúnu. Bulat kiddiyet bagakku geti iaté, bulé bulat sibara ka teú bagam, nugalaiaké nia néné, tá kupapaksaaké kukua nia ka matam

¹⁵ Kupaatu lulunia aiareuaké tubunia goisó si Onesimus ka tubum, bulé ioi lé nubakkati nia mitsá ikuddu ka tubum teret buru-burú

¹⁶ Kineneiget geti, táan sarat paguguletnu ibabailiu nia, tápoi saliu peilé nenda. Aipoí aibailiu nia saalei simakeré pu-Kakariten, pununtukietta бага. Bulat ai kauku nia, sarapeite kaunu nia kekeu! Bulat abeu kaunu nia,

iaté sibailiu paguguletnu, elé sibailiu sarainam ka onin Tuhan

¹⁷ Oto kalulut néné ale, anuoniakéan poí aku aleinu sikeré pu-Kakariten, oto kauan nusiló nia mitsá si Onesimus kelé galai nusiló aku kaku, kuoi

¹⁸ Iageti ké ai selenia, elé ai utaknia ka tubum, akungan lé ibabaya nia sangamberinia

¹⁹ Eddangan kusurat'aké nia sené: Aku sipuoni si Paulus masibabaya sangamberi utaknia. (Kirénangan táan lé te mateú kukua nia ka matam, kababarat utaknu ka tubukku, iaté sisilónu puririmanua sibau, kelé sara sipuoni tai Kariten.

²⁰ Oto ka onin Tuhan, kutiddou ka tubum, nurop'aké aku, nuangkáaké bagakku, siripot pusasarainanta ka onin Kristus

²¹ Kalulut tonem bagakku lé nugalaiaké nia, sikuakku néné, akuaké suratku néné ka tubum. Kirénangan ai lé kuaagai sasaliuakénu nia, nugalaiaké siniddouku néné ka tubum

²² Iageti paniddogatku ka tubum, bulé nutarek'aké kaku bilí pugogoiat, ka lalepnu, aipoí bulat ai lé kukakaroni бага ka tubut Taikamanua, aarepina

paniddogatmui sangamberimui, itoiliaké
aku mitsá ka tubumui

²³ Segé salam Epapras, aleiku ka bagat
penjara, kalulut Tuhan Jesus Kristus

²⁴ Siló leú et kam salam, sibara ka
saaleiku ka bagat penjara, kalulut Jesus
Kristus. Iageti siló leú et kam salamra
saaleiku mugalai iaté si Markus, si
Aristarkus, si Demas sambat si Lukas

²⁵ Bulé ipanukani kam Tuhanta Jesus
Kristus. Hormatmai ka kam, Paulus

Ibrani

1 ¹ Siburú ka tettebda taikabbukatta,
marei-rei isegéaké tiboietnia

Taikamanua ka tubudda, tápoi tai
nabi ikakau manibo, samba galai
pasisesegéakéra leú et, maigi enungnia

² Tápoi ka gogoi kalepakat néné, ipanibo
Taikamanua ka sita iaté ka simatotoilá
ka tubut Togania. Oto sibara ka Togania
néné te, aibaraaké manua sambat polak
Taikamanua. Samba leú et aiteúakéan
Taikamanua, ikua, Togania néné te
berhak masibakkati sangamberinia

³ Nia té masitotoroaké pulatsanan
Taikamanua sipululatsat; samba nia te
tularat tubut Taikamanua simatotoilá.
Samba nia leú et masijajago puroron
manua sambat polak néné sibara ka
tiboietnia sipulugege. Lepá aibelaaké
sirimanua ka jodda, puuddetnangan ka
uddenan purimataat ka manua sambat
Taikamanua, Bulat Uté sabeu

⁴ Ka sia Toga néné mabuak tibo
tubunia, elé bulat areu kopet buaknia
ka tubudda samalaika, sambat oni

sikaunia ka tubut Toga néné leú et, bulat areu kopet hormatnia ka oninda ka sia samalaika

⁵Aipoí bulat beri pei kuana nia Taikamanua ka matat sara malaika, "Ekeu té néné Togakku; gogoi néné bailiu aku Ukkuinu." Samba leú et, bulat beri pei kuana kisé Taikamanua, ka tubudda kasei pá sipuoni malaika, "Ibabailiu te aku Ukkuinia, samba nia bailiu Togakku.

⁶Tápoi ka tetret aikoiniaké Togania sikebbukat ka polak néné, kuanangan Taikamanua kisé, "Sangamberidda samalaikat Taikamanua, buítá rapaniddogi Toga néné.

⁷Pagalaiat sia samalaika geti aikua Taikamanua kisé, "Aibailiuakéan sia rusa, Taikamanua, samalaika néné, samba sapaguguletnia, bailiu juluu api.

⁸Aikua geti ka sia ka tubut Toga, kisé, "Uddenan purimataatnu, ale Taikamanua, riu-riu lé teret buru-burú! Puririmatam leú et, puririmata simaadil

⁹Nuobá simaadil, tápoi malagá bagam ka pukoilunan; kalulut néné te aipiliy ekeu Taikamanua, pu-Taikamanuaetnu, samba aiaké ka tubum kehormatan

sibaraaké pugoraat бага, saliu peilé ka saaleinu sabagei.

¹⁰ Samba aikua leú Taikamanua,
"Siboikí ale Tuhan, anubaraaké polak,
samba bulat tubum amasibaraaké
manua

¹¹ Tápoi sangamberinia tatatá lé,
mabuburú lé kelé leppei; tápoi ekeu geti
kekeu tá isisiliy

¹² Nupaleleuléki lé polak samba manua
néné, kelé leppei, samba nuaaké silinia
bagei. Tápoi ekeu geti kekeu bulat beri
siliyna tubum, samba puririmanuam leú
et tá anai kalepakatnia.

¹³ Beri kuana nia Taikamanua kisé, ka
tubut sara malaika, "Uddet'aké ekeu
kai kattoetku, teret kalaakéku sia tai
saggaknu.

¹⁴ Oto ké kisedda baí nia, aponia lé
sibulatnia samalaika néné? Sia néné iaté,
paketsa-ketsat sipuukú Taikamanua,
samba koiniakenen Taikamanua
masirop'aké sia sisiló puaragat.

2 ¹ Iaté lulunia buítá bulat sibulatnia
sibara ka paatuatta taomet'aké kam
ngantoman siarepta, bulé tá tagalak'aké
kam katonemietta

² Aipoí sangamberinia patonekat
Taikamanua sisegéakenenda samalaika
ka tubudda taikebbukatta, bulat
sibulatnia; oto sangamberi sitaitut'aké
nia elé sitaireddet nia, rasisiló ukuman
siripot sigalaiakenenda

³ Sarapei puaragat sabeu belé peilé
ka sikuat patonekat nenda! Ké mamit
bagatta ka puaragat néné, kirénangan
tá tukakatsli sita ka ukuman néné. Aipoí
bulat tubut Tuhan lé boikí amasipakakra
pagalaiat puaragat néné, samba
sia sipasiaarep boikí arabuktiakéan
pububulat sibulatnia néné, ka tubutta

⁴ Paobánangan pei bagei ai lé iroron'aké
Taikamanua simuneng'akenenda néné,
iaté aigalai sene ngamata kerek samba
kiseiet sabeu, samba iparubei panguruat
Ketsat Sipunenan siripot teú bagania

⁵ Tá arasiló gege ka sia samalaika
sibara ka Taikamanua, bulé rautéaké
polak sibau ka gogoi sibabara, iaté polak
patibojietta kineneiget

⁶ Iageti mitsá ka sanga rubeiat ka bagat
Buko Sipunenan ai atusurat'aké kisé,
"Kasonia poi nia sirimanua néné, ale
Taikamanua, pat koí repdemnungan nia?

Sirimanua, nia né nia, sirimanua, tápoi ainupasisikeli nia

⁷ Ka oggak siteté lé, anubailiuaké nia makarepé goisó tiboí tubunia, ka tubudda samalaika. Anukau ka sia tiboí tubu sabeu sambat simahormat

⁸ samba leú et anupauddet nia masikup-kup'aké sangamberinia." Oto ké tukua aipauddet'an sia sirimanua, Taikamanua "bailiu sikup-kup'aké sangamberinia," katukolobatnia sangamberinia táan anai tá ka bagat kupkumen sirimanua. Tápoi kenanen kisedda, tá leú et aitaiitsó kam sia kineneiget sirimanua rakup-kup'aké sangamberinia

⁹ Tápoi ka sia geti Jesus, ataitsóan kam aipuuté! Kirénangan aikau nia makarepé goisó tiboí tubunia ka tubudda samalaika ka bagat oggak siteté, bulé ka erut bagat Taikamanua oi imatei punu tubudda sangamberi taikapolak. Taitso nia kineneiget aikau ka sia Taikamanua tiboí tubu sabeu sambat simahormat, néné kalulut pangongorik nia pat matei

¹⁰ Kirénangan amateúan ka sia Taikamanua sipasibabaraaké sangamberinia siripot sipinaatunia sarania, ikau Jesus sipaarau bulat

sipulelelek, kalulut pangoringannia. Bulé kalulut nenda bailiu maigi sirimanua ináná Taikamanua bulé tulatsat'aké sia sambat Jesus. Aipoí nia lé sipasibubuká enungan ka tubudda, bulé ioi ituarauaké sia

¹¹ Ipaliná sia Jesus sirimanua néné ka jodda; oto nia sipasililináaké samba sia sipaliná nia, sisara Ukkuan lé sia. Iaté lulunia tá imamaila Jesus ioniaké sia néné, sasaraianania

¹² Aikua Jesus ka tubut Taikamanua, "Kupopoiliat ka sasaraianangu pagalaiat tubum. Kuumun'aké onim ka parurukatda.

¹³ Aikua leú et Jesus, "Kukakaroni nia бага Taikamanua." Iageti aikua leú et mitsá Jesus, "Aikoí aku, sambamai tatoga siaket Taikamanua ka tubukku!

¹⁴ Kalulut ka sia néné oniakenennia tatoga, makluk simamateiet lé, oto bailiu ka sia Jesus leú, keréakénangan tubunia ka tubudda; iageti purimanuanangan, kelé puririmanuanda sirimanua. Aigalaiaké nia geti kelé néné, Jesus, bulé kalulut kamateiatnia, pakataínangan leú et geget Sanitu, siutéaké kamateiat

¹⁵ Bulé kaenungan kelé néné,
belaakénangan sia siparimanuaaké
pulolotó ka kamateiat, ka sanganantat
purimanuaiatda

¹⁶ Oto kolou, tá malaika airop'aké, tápoi
sapunuteteu Abraham lé

¹⁷ Katukolobatnia sené, iaté buítá
makeré nia ka tubudda sasaraiania ka
sangamberinia. Samba kalulut néné, oi
ibailiu nia Imam Sabeu simatopit sambat
simakaté бага. Kalulut pasikelatnia, oi
ituappéaké jodda sirimanua

¹⁸ Samba kalulut ka sia leú et amangorik
samba aiorak nia pasisiboat, bailiu oi
irop'aké sia siorak pasisiboat; beri nia ka
sia leú poí, aiorik'an pasisiboat sambat
pangoringan.

3¹ Ale kam Sasarainamai pasasamba
tai Kariten sinogai Taikamanua leú
et! Bulat keruji peité kam ka bagat
paatuatmui pagalaiat tubut Jesus néné!
Aikoiniaké nia Taikamanua ka galajet
simakokoi, iaté, bailiu Imam Sabeu ka
aratta situt'akenenta néné

² Bulat matopit nia ka tubut
Taikamanua, sipasipiliy nia ka
galajet nenda, kelé topit nia ka sia si

Mose siburú, igalaiaké galajetnia ka uman Taikamanua

³Tápoi ka sia Jesus mateúan isiló kehormatan simakopé beunan, saliu peilé kai Mose. Aipoí sia sipasigagalai lalep buítá rasiló kehormatan simakopé beunan, belé peilé ka tubut lalep

⁴Kirénangan sangamberinia lalep, ai sia sipasigagalai, tápoi sipasigagalai sangamberinia geti bulat tubut Taikamanua lé

⁵Ka sia si Mose matopit nia masipuukú galajet ka uman Taikamanua sambat masisegéaké sangamberi kuanen Taikamanua ka gogoi sibabara

⁶Tápoi ka sia Kristus matopit nia siripot puooni nia Toga, siputatanggung jawab ka uman Taikamanua. Oto sita néné te uman Taikamanua, ké mariu-riu baí puroron paatuatta samba putotonem bagatta masisiló sangamberinia karonietta

⁷Oto kalulut néné, kelé ka sikuat Ketsat Sipunenan, "Ké nuarep kam nga-ngan Taikamanua gogoi néné

⁸buí nukeláaké kam paatuatmui, kelé siperúra ka sia taikebbukatmui, ka tetret

arasaggangi Taikamanua, samba arauji
Taikamanua ka simatangeu

⁹ Aikua Taikamanua, 'Sedda te arasibo
samba arauji aku taikebbukatmui,
kenanen araitsóan sigalaiakenenku ka
bagat epat ngapulu ngarura burúnia.

¹⁰ Iaté lulunia akupugoluki sia samba
akukua ka matadda, 'Mariu-riu lé tá
ramatopit, samba maipit rareddet
parentakku.

¹¹ Oto pugolúkungan samba
pusuppakkungan leú et, kuakkungan,
'Tá te raguguruki laggai nenda bulé
raaroiaké tubudda sedda sambamai.'

¹² Ale kam Sasarainamai, bulat kau
nupasikeli kam nia, bulé buí ibara ka
talagamui sipupaatuat bulat simakopé
kataí samba sitaimatonem бага,
pat sik-sikrangan tei-teira elé pat
reunan'akérangan tubudda ka tubut
Taikamanua sipuririmanua

¹³ Oto bulé tá rabara ka talagamui
siorak patajuat jo, pat sagganginangan
Taikamanua, buítá pangantru kam
katubu senen gogoi ka burut
puririmanuanta ka tetre oniakenen,
"Gogoi Néné" ka Buko Sipunenan

¹⁴ Aipoí alei Kristus sisangaperjuangan
lé sita sangamberitta néné ituooniaké,
sarat kau lé mariu-riu taomet'aké kam
teret kalepakat, putotonem bagatta
siikep'akenenta siboikí

¹⁵ Néné te atusurat'aké ka Buko
Sipunenan, "Ké nuarep kam nga-
ngan Taikamanua ka gogoi néné,
buí nukeláaké kam paatuatmui, kelé
taikebbukatmui, ka tetret arasaggangi
Taikamanua.

¹⁶ Oto kasonia aiarep nga-ngan
Taikamanua, lepá saggangiddangan nia?
Iaté sangamberidda sibelaakenen Mose
ka laggai Misir, elé

¹⁷ Samba kasei ka tubu aipugolú
Taikamanua ka bagat epat ngapulu
ngarura burúnia? Iaté ka tubudda sijo,
simamatei ka simatangeu, elé

¹⁸ Ka tetret aipusuppa Taikamanua
aikua kisé, "Tá te raguguruki laggai
nenda, bulé raaroiaké tubudda sedda
sambamai"; oto kasonia nenda
ikukua Taikamanua? Isasaú-saú iaté
sipasisasaggangi Taikamanua, elé

¹⁹ Oto sené kolou ka sita, taiooi nia
ratugurú, kalulut taimatonem bagadda
ka tubut Taikamanua.

4¹ Oto palelengan Taikamanua ai peilé maririu-riu, samba iaaké ka tubutta puaroiatta siripot sipinatonénia. Kalulut néné, kau mariu-riu tajago kam nia, bulé buí ibara sara ka talagatta sitaipuuktungi puaroiat sitonéakenennia

² Aipoí ka tubutta ka sita atupaarep'an Katuareman Simaerú kelé ka tubudda ka sia. Tápoi ka sia, tá anai lulunia. Aipoí kelé raarep nia, tá matonem bagadda

³ Tápoi ka sita geti simatonem бага, tasisiló kam puaroiat sitonéakenen Taikamanua néné. Aipoí bulat maipó kelé ka sikuat Taikamanua kisé, "Iageti pugolúkungan samba pusuppakkungan leú et, pelé nga-ngangku, 'Tá te raguguruki laggai nenda bulé raaroiaké tubudda sedda sambamai.'" Oto aikua kelé néné Taikamanua, kenanen alepáan aigalai galajetnia ka tetret aibaraaké polak peilé

⁴ Aipoí pagalaiat gogoi sikapitunia, ai atusurat'aké ka bagat Buko Sipunenan kisé, "Ka gogoi sikapitunia, puarinangan Taikamanua ka sangamberi galajetnia.

⁵ Pagalaiat nenda leú et, ai atusurat'aké mitsá kisé, "Tá te raguguruki laggai

nenda, bulé raaroiaké tubudda sedda sambamai.

⁶ Oto sia sipuboboikí masiarep pagalaiat Katuareman Simaerú néné, tá rasisiló puaroiat, kalulut taimatonem bagadda. Bailiu, ké kisé baí nia, kolou, ai sia sabagei momoi rasiló puaroiat néné

⁷ Aipoí aitetreakéan Taikamanua sara gogoi bagei, iaté oniakenen, "Gogoi Néné". Oto piga ngarura pá burúnia panibonangan mitsá Taikamanua iaté ka sisegéakenen Dapid, ka sikuania kelé ka ruang sikuatta simaruei néné, sipasikukua, "Ké nuarep kam nga-ngan Taikamanua kineneiget, buí nukeláaké kam paatuatmui.

⁸ Ké baí aikauan ka tubudda si Josua kudduat puaroiatda siripot sitonéakenen Taikamanua, táan ikukua mitsá Taikamanua pagalaiat kababarania sara gogoi bagei

⁹ Oto, ka sia sikauman Taikamanua, ai peilé palelengan bulé rapuaroi tubu, kelé aiaroiaké tubunia ka sia Taikamanua, ka gogoi sikapitunia

¹⁰ Aipoí sia sipasisisiló puaroiat tubu, sitonéakenen Taikamanua, raaaroiaké

leú te tubudda ka sia, ka sangamberi galajetda, kelé ka Taikamanua leú et

¹¹ Kalulut néné, bulat kau tabesíaké kam nia, tasiló kam puaroiat tubu sitonéakenen Taikamanua néné.

Bulat buí ibara beri sara ka talagatta sitaitueeddet masisiló, kelé ka sia siburú, kalulut taimatonem bagadda ka tubut Taikamanua

¹² Aipoí tiboiet Taikamanua néné iaté, tiboiet sipuririmanua sambat simaron; bulat malauru, belé peilé lanjau simalauru rua ngasilánia. Bulat makeru siorangannia, pat aili ka pasongan enga sambat ketsat; sambat pasongan paulakat tolat ka unou tolat, bailiu pat oi isinogi paatuat sambat isiat bagadda sirimanua

¹³ Bulat beri sara sipungongoí-ngoí simalipput ka matat Taikamanua. Matoilá lé sangamberinia ka matania. Oto buítá takau pertanggung jawabanta ka tubunia

¹⁴ Oto iaté lulunia, buítá taomet'aké kam simaron putoneman bagatta simuneng'akenenta. Aian poí ka sita Imam Sabeu Sipulubeunan, situgugurú pat aili ka matat Taikamanua. Nia té nenda Jesus Togat Taikamanua

¹⁵ Ka sia Imam Sabeuta néné, tá imam sitaiagai gulaita. Tápoi atusibongan nia ka sangamberinia, kelé leú et sita ka sita; sarat ka sia néné, tá aigalai jo

¹⁶ Oto kauan imaeme bagatta mei ka matat Taikamanua, utéta simaerú бага. Ipukakateki sita бага samba ipanunukani sita Taikamanua, bulé tasiló kam paroman, bulat ka ipot tetrenia.

5 ¹ Sangamberidda tai imam sabeu sipiliy sibara ka talagat paamian, samba tupauddet sia masipasikeli galajet Taikamanua sibailiu punu tubudda. Galajetnia iaté, masibuluaké ka tubut Taikamanua sangamberinia panguruat samba buluakenen pasiappet jo

² Ka sia imam sabeu maigi gulainia ka sangamberinia, oto kalulut néné, buítá maleppe bagania ka tubudda sitaiagai apa pá, samba simapepepe ka enung puririmanuanda

³ Oto kalulut gulainia leú et ka sia néné, bailiu buítá ibuluaké buluakenen; samba buluakenen néné, tá sarat kalulut jodda sapaamian, tápoi kalulut jonia leú et ka sia

⁴ Tá anai beri sia sara sirióaké tubunia muimam sabeu. Ibabailiu sia geti imam

sabeu iaté, ké ai pasogaiat Taikamanua ka tubudda; kelé ka sia kai Aron

⁵ Ka sia leú et Kristus, kisedda leú et. Tá tubunia airióaké tubunia bailiu Imam Sabeu. Tápoi Taikamanua lé airióaké nia. Aikua ka matania Taikamanua, "Ekeu néné Togakku; ka gogoi néné bailiungan aku Ukkuinu.

⁶ Ka bagei leú et, ai atusurat'aké kisé, "Ekeu néné iaté imam teret buru-burú, kelé si Imam Melkisedek.

⁷ Ka tetret ai peilé nia mukukuddu Jesus ka polak néné, amaniddou nia samba aitiddou simaná-ná ka tubut Taikamanua sialei gerei samba sou, simagege masibelaaké nia ka kamateiat. Samba kalulut purereddet nia ka tubut Taikamanua bulat sibara kahormatnia, arepinangan leú et nia

⁸ Togat Taikamanua lé nia Jesus néné, tápoi kenanen kisedda, aigelai leú et mureddet iaté, ka pangoringannia

⁹ Oto kelé aitubailiuké nia sipaarau bulat sipulelelek, bailiungan leú et nia bakkat puaragat sitaitatátá ka tubudda sangamberi simareddet ka tubunia

¹⁰ samba oniakénangan nia Taikamanua Imam Sabeu, kelé kai Imam Melkisedek

¹¹ Oto pagalaiat tiboí tubut Jesus sibailiu Imam Sabeu, maigi peilé kuanenmai ka tubumui, tápoi mabesí itukolouaké, aipoí mabesí peilé isak-sak ka bagamui

¹² Bulat siripokatnia aiailingan tetrenia ibailiu kam guru, tápoi ituitsó maerú lé nupasigelai kam ka tubudda sabagei pagalaiat pubakkanan tiboiet Taikamanua barana ka panandaatnia. Aipoí tápei momoi nukom kam kan pakela-kelá; buítá sarat susu peilé nuloló kam

¹³ Aipoí ké ai peilé sia mutotot-tot, oto toga sigoisó peilé sia ituooniaké, aipoí tápei raagai kipa sineseat samba kipa sitaipasesese

¹⁴ Tápoi ka sia geti sikebbukat, simakeláan lé kanda, kalulut amasikebbukat'an poí tubudda, araagaian masipabaggei kipa simaerú, samba kipa sikataí.

6 ¹ Oto kalulut néné, kauan tariu-riuaké kam tagelai kam tuppainia, iaté siorak ka pagalaiat imakebbukat puririmanuanda tai Kariten. Buí sarat masipatup-tup pagalaiat pubakkanan siboikí ka aratta. Buían taoleaké kam mitsá tagelai kam ka

pubakkanannia, kelé, masikua, taariaké kam masigalaiaké sitá lulu, samba buíta matonem bagatta ka tubut Taikamanua

²elé sigelaiakenen pagalaiat pasiraukat, elé pagalaiat masisukat'aké sirimanua, samba pagalaiat tusuru mitsá ka simamatei elé ukuman teret buru-burú

³Maerú peilé, ké iteúaké baí nia Taikamanua, tariu-riuakéan lé kam tagelai tuppainia

⁴Aipoi ka sia sisik-sik tei-teina, táan iagai itupalulu sia mitsá bulé ratoili. Siboikí poí ka sia néné, ain sia mukukuddu ka pató sibara ka Taikamanua, samba arapuuktungingan panguruatnia. Sia leú et aisop-sop'an ka tubudda Ketsat Sipunenan

⁵Bulat araagaian kolounia ka puririmanuanda néné, pueerúnia tiboiet Taikamanua, sambat aiagaian tubudda panguruat sipulugege sipuaaili ka gogoi sibabara

⁶Tápoi lepá sik-sikrangan tei-teira! Kaipangan lé iooi itupalulu sia mitsá, bulé rabauaké paatuatda ka jodda. Aipoí aian lé rapapattáaké mitsá Togat Taikamanua ka loiná siliktenga, samba

sibaraaké katuloloiat oninia ka matat
siberikabaga

⁷ Aipoí polak sipasipopot-pot urat
simarei-rei belé ka uddutnia, lepá
baraakénangan siureman sibailiu
puuktunganda sirimanua sipasikeli
mone, oto polak néné te ipanunukani
Taikamanua

⁸ Tápoi polak sitútúaké boro-boroi
sambat bek-bekkurut geti, bulat tá
anai lulunia polak néné, itetelei lé nia
Taikamanua, lepá labó pí

⁹ Tápoi ale kam Sasarina simanuntut
bagamai, kenanen kukukua kai kisedda,
ka tubumui geti ka kam, matonem
bagamai. Matonem bagamai sisilómui
sisaliu erú peilé, iaté panukanan kelé
oniakenen leú rubeiat puaragatmui

¹⁰ Simaadil lé poí nia ka sia Taikamanua
néné. Bulat tá ikakalipogi sangamberinia
sigalaiakenenmui ka tubunia, samba
nuntut бага sipatoilámui ka tubunia,
ka tetret anurop'aké kam sasarainamui
sikeré tonem бага, siburú samba leú et
kineneiget

¹¹ Bulat aikubebesíaké kai bulé
imariu-riu puroron paatuatmui, pat aili

kalepakatnia, elé pat silómuian apa
kiddiyet bagamui

¹²Tá kuobá kai ibailiu kam sitaimamalá
tubu. Tápoi bulat besíakenenmai geti
iaté, bulé ibailiu puririmanuamui néné
kelé puririmanuanda sisiló sangamberi
sitonéakenen Taikamanua, kalulut tonem
bagamui ka tubunia samba kalulut
nge-ngenaakémui nia ka om бага

¹³Ka tetret aigalai palelengannia ka
tubut Abraham, Taikamanua, amusuppa
nia masikua puaaili nia sitonéakenennia.
Oto kalulut tá poí anai sisaliu buaknia,
bailiu pusuppanangan leú et ka oninia

¹⁴Kuanangan, "Kutonéaké ka matam,
bulat kususukat'aké te ekeu, sambat
kuiigiaké te sia sapunuteteunu.

¹⁵Kau ka sia si Abraham ngena ka
om бага. Kalulut néné, silónangan nia
si Abraham sangamberi sitonéakenen
Taikamanua ka tubunia

¹⁶Ké musuppa bai sara sirimanua,
pusuppanangan ka oninda sabagei
simabuak peilé ka tubunia, oto suppa
néné te masilelepáaké paukelat

¹⁷Iobá iron'aké palelengannia
néné Taikamanua ka tubudda sisiló
palelengannia, masikua taisisiliyna

nia sipinaatunia néné. Oto iaté lulunia
aituppai suppa ka palelengannia

¹⁸ Karuania néné, tá isisiliy: Aipoí ka
sia Taikamanua tá paboboko nia ka
palelengan sambat ka suppania. Oto
sita sipukukunem ka tubut Taikamanua,
tutubbui sita simakopé bulé taomet'aké
kam simaron karonietta sikukuddu ka
matatta

¹⁹ Pukakaronanta néné iaté, kelé sara
sao situaalup simakopé keru ka бага,
sibailiu omet'akenenta simaron sambat
bulat táan ipagegeu-geu purimanuaiatta
néné. Iageti pukakaronanta néné
pat tebeknangan komang kekret Bilí
Sipunenan ka Uman Taikamanua ka
manua

²⁰ Aipapangan Jesus enunganta sieei
sedda, samba atugurúan nia sedda bailiu
Imam Sabeu ka sita teret buru-burú,
kelé kai Imam Melkisedek.

7 ¹ Si Melkisedek néné, iaté sara
rimata sibara ka laggai Salem,
samba nia leú et iaté imam Taikamanua
Sipulubeunan. Ka tetret aitoili si
Abraham ka pasaggangan masikalaaké
tai rimata, oi nia si Melkisedek masiroroi
nia sambat masisukat'aké nia

² Oto kaunangan kai Melkisedek si Abraham seperpulu sibara ka sangamberinia sirau-raunia. (Katukolobat onin Melkisedek, iaté, "Rimatat Keadilan"; oto kalulut rimatat laggai Salem poí nia, bailiu katukolobat oninia leú et iaté, "Rimata Paabanan".

³ Iageti pagalaiat tubut Melkisedek néné, tá anai sipungu-nguan'aké kababarat ukkui sambat inania elé taiebbukatnia; samba tá anai sia sipungu-nguan'aké pagalaiat putútukat matania, elé kamateiatnia. Nia ka sia néné, kelé togat Taikamanua lé nia; nia ka sia iaté imam teret buru-burú

⁴ Oto taitso nia sené bulat abeu tiboitubunia si Melkisedek néné; samba kalulut kopet beunan tiboitubunia, pat ka sia taiebbukatta si Abraham, kaunangan ka tubunia sepersepulu sirau-raunia ka pasaggangan

⁵ Ka surukat aratda tai Jahudi, ai atutentuaké iaté, sangamberi tai imam sibara ka muntogatda tai Lepi, buíta rarurúaké sepersepulu sibara ka sangamberi pukayoat bangsa Israel, iaté sibara ka sasarainanda, kenanen baí makeré pupupunuteteura nia si Abraham

⁶ Nia ka sia si Melkisedek tá muntogatda tai Lepi, tápoi isisiló leú et ka sia sepersepulu sibara ka sangamberinia sirau-rauakenen Abraham, samba aipanukani peilé mitsá si Abraham, kenanen baí aisilóan ka sia si Abraham palelengan Taikamanua

⁷ Kirénangan tá momoi itusiddot néné, iaté, sisiló panukanan peilé marepé tiboitu ka tubudda sipasisusukat'aké

⁸ Tai imam sipasisisiló ruruket sepersepulu néné, iaté sirimanua simamateiet lé sia. Tápoi ka sia geti si Melkisedek, sipasisisiló panguruat sepersepulu néné, siripot ka Buko Sipunenan, mariu-riu lé ipurimanua

⁹ Momoi takua, sia tai Lepi oniakenen muntogatda néné sipasirururúaké sepersepulu sibara ka bangsa Israel, ai leú et rababaya ka sia, tápoi ka tubut Abraham lé rakakau nia ka tetret iei si Abraham masibaya ka tubut Melkisedek

¹⁰ Kenanen tápei amutú-tú matat Lepi, tápoi momoi takua, aian nia mukukuddu ka tubut taikebbukatnia si Abraham, ka tetret arapaaili ka sia si Melkisedek sambat si Abraham

¹¹ Ka tetret ka pu-imamanda tai Lepi te, aitukau surukat ka tubudda bangsa Israel. Aipoí ka sia tai imam Lepi siburú, tápei momoi imakaplu ragalaiaké apa galajet simateú galaiakenen, buítá anai lé sia tai imam sabagei, iaté kelé si Imam Melkisedek, tápoi táan sibara ka rubeiat Imam Aron

¹² Oto, ké tusiliy galajetda tai imam néné, surukat aratda tai Jahudi leú et buítá tusiliy

¹³ Kuanennia sené iaté, Tuhanta: Nia ka sia néné sibara ka suku bagei lé nia, bulat beri pei sia sara ka sukunia sipu-iimam

¹⁴ Ai lé raagai sangamberi sirimanua, Tuhanta néné sibara ka sukudda tai Jahuda; samba ka sia si Mose leú et, bulat beri paobboiakéna nia pagalaiat suku néné ké itiboi pagalaiat tai imam

¹⁵ Kuanen sené memei makokolou, sarapei aibara sara imam bagei simakeré kai Melkisedek

¹⁶ Aitupauddet nia ka sia muimam, tá siripot teú bagadda sirimanua, kalulut puririmanuania simasut gege lé samba sitá anai kalepakat

¹⁷ Aipoí ka Buko Sipunenan leú et ai aikua kisé, "Ekeu néné iaté sara imam teret buru-burú, kelé si Imam Melkisedek.

¹⁸ Oto kineneiget, peraturan siburú, táan atuenung'aké, aipoí tá maron sambat tá anai lulunia

¹⁹ Ka sia surukat aratda tai Jahudi bulat beri sara momoi igagalai bulat pat erú. Iaté lulunia ka sita kineneiget iaké pukakaronan bulat simaerú; kalulut néné oi talegeri kam Taikamanua

²⁰ Sarapei mitsá sangamberinia sialei suppat Taikamanua lé. Tápei anai suppa kelé néné ka tetret tupauddet sia tai imam sabagei

²¹ Tápoi ka sia geti Jesus sibara suppa lé aitupauddet nia muimam, ka tetret aikua Taikamanua ka tubunia, "Amusuppangan nia si Tuhan, samba tá isisiliy sipinaatunia, 'Ekeu néné, iaté imam teret buru-burú.'

²² Oto kalulut néné leú, Jesus néné bailiu sara jaminan ka pakerekat бага sisaliu erú peilé

²³ Iageti ai peilé mitsá, iaté: tai imam bagei maigi sia, kalulut sia

néné mamatei lé sia; bailiu tá momoi rariu-riuaké jabatannia

²⁴Tápoi ka sia geti Jesus, mariu-riu lé ipurimanua teret buru-burú. Kalulut néné jabatannia sipuoni imam, tá tukakau nia ka sabagei

²⁵Oto riu-riu lé teret buru-burú, ka sia Jesus ipasiarauaké sirimanua, siooi ka tubut Taikamanua kalulunia, aipoí mariu-riu lé ipurimanua teret buru-burú, bulé itiddouaké sia ka tubut Taikamanua

²⁶Jesus néné te Imam Sabeu perluakenenta. Sipunenan lé nia; tá anai beri sara tusese sele, elé jo ka tubunia. Atupasaraaké nia ka tubudda sirimanua sijo, samba atubuak'aké nia ka kudduat simakopé buak, bulat pat saliu sangamberi manua

²⁷Tá kelé ka tai imam sabagei, buítá rabuluaké buluakenen kalulut jodda ka sia boikí, lepá geti, iapeí joddangan sapaamian. Tápoi ka sia geti Jesus, sarat sangamitsá lé aibuluaké buluakenennia, tápoi pat aili teret buru-burú, iaté ka tetret aibuluaké tubunia bailiu buluakenen

²⁸Ka sia surukat aratda tai Jahudi, iaté masipauddet sia simagulai pueerú,

bailiu imam sabeu. Tápoi lepá mitsá sibara ka surukat néné leú et, aigalai palelengannia Taikamanua, sialei suppa, pagalaiat pauuddetna nia mu-Imam Sabeu ka sia Toga, sibailiukenen nia leú et Sipaarau sipulelelek teret buru-burú.

8¹ Oto pubakkanan sangamberinia tiboiet sené, iaté: Ai ka sita Imam Sabeu kelé néné, sipuririmata sambat Taikamanua Sipulubeunan ka manua

² Aigalaiaké galajetnia siripot pu-Iimam Sabeu nia, iaté ka Bilí Sipunenan, iaté ka bagat kemat Tuhan sibulatnia, sirióakenen Tuhan, tá sirióakenenda sirimanua

³ Aiturióaké sia tai imam sabeu, iaté masibuluaké buluakenen, elé buluakenen ka tubut Taikamanua. Oto kisedda leú te ka sia si Imam Sabeuta néné, buítá bara apa pá buluakenennia

⁴ Ké ai baí nia ka polak néné, tá ibabailiu nia imam, kalulut aian sia tai imam sipasibubuluaké buluakenen siripot sikuania ka bagat surukat aratda tai Jahudi

⁵ Aipoí galajet sigalaiakenenda siripot pu-iimamra néné, sarat muoni lé nia sara tularat samba sigogoat aponia

sikukuddu ka manua. Aipoiliat'an Taikamanua siburú ka matat Mose, ka tetret aibabagai bagania masigalai Kemat Tuhan. Aikua ka matat Mose kisé, "Repdem! Buítá nugalai nia siripot kelé siitsónu ka uddut leleu.

⁶Tápoi kineneiget atukauan ka tubut Jesus galajet imam sisaliu latsat peilé, belé peilé ka sigalaiakenenda ka sia tai imam. Aipoí pakerekat бага sigalainia ka tubut Taikamanua sambat ka sirimanua, iaté pakerekat бага sisaliu erú, kalulut sipubobongen ka pakerekat бага sisaliu pueerú leú et

⁷Aipoí ké tá anai bai simagulai ka pakerekat бага siboikí, táan leú anai lulunia itubaraaké pakerekat бага sikarua

⁸Tápoi aisesengan Taikamanua selet tubudda sapaamiannia, pat kuanangan kisé, "Repdem kam néné, iaaili te tetrenia, kubaraaké pakerekat bagakku sibau ka bangsa Israel, sambat ka bangsa Jahuda

⁹Táan kelé pakerekat bagakku sigalaiku ka taikebbukatda ka tetret akupalulu sia rabela ka laggai Misir. Tá matopit sia ka

pakerekat бага sigalaiku ka tubudda;
iaté lulunia tá akupuukú sia

¹⁰Tápoi kineneiget, aikoí né pakerekat
baga kugagalai ka tubudda bangsa Israel
Aikua si Tuhan: ka gogoi sibabara, Ka
paatuatdangan lé kukakau surukatku,
samba ka bagat paatuatda ka bagangan
lé kususurat'aké nia. Bailiunangan aku
Taikamanuanda, sia ka sia leú et, bailiu
sapaamianku

¹¹Táan leú pangangantoman sia
katubu, elé isesegeaké ka tubudda
sasarainania, masikua ka matadda, 'Agai
kam nia si Tuhan.' Aipoí sangamberidda
sikebbukat sambat tasulé, iaagai aku

¹²Kuaappéaké sangamberi seleda,
samba jodda leú et, táan kurerepdem.

¹³Oto kapasibabaraakéna pakerekat
baga sibau, bailiukénangan pakerekat
baga siboikí néné Taikamanua, siburú
elé siburukat; oto apa sipuoni siburú,
táan te mauuju itatá.

9¹Ka sia pakerekat бага siboikí, ai
galai paniniddou, samba ai kudduat
paniddogat sigalai kabeira sirimanua

²Sara kema sirióakenen ka rubeiat ka
mata tuoniaké Bilí Sipunenan. Sedda ai

kudduat alito sambat ai meja sibara roti
buluakenen ka tubut Taikamanua

³ Ka rubeiat ka бага, iaté ka tei-tei
kekre komang sikarua, ai bilí oniakenen
Bilí Simakopé Sipunenan

⁴ Ka bagat bilí néné, ai langgatan sigalai
sibara ka emas, kudduat pasilabokat
buluat pasingi-singin, sambat ai leú
et Peti Pakerekat бага sangamberinia
silap-lap emas. Ka bagat Peti nenda
ai koalí emas sibara ka бага manna,
tuturat Aron sipusisilibetat, samba rua
ngabábá bukkú leí sibara surat pulu
ngamata surukat Taikamanua

⁵ Ka uddut Peti ai rua Kerub, iaté
makluk sibara kappó, kelé sara kirekat
kababarania Taikamanua ka talagadda.
Kappóra ka ruadda makluk néné,
aitukekelau ka uddut takket Peti,
iaté kudduat pasiappekat jo. Tápoi
sangamberinia néné tápei momoi
itukolouaké kineneiget pasasara

⁶ Oto kisedda te katugalangannia
sangamberinia. Senen gogoi ratugurú
tai imam ka rubeiat laibokat kema,
ragalaiaké galajetda

⁷ Tápoi bulat ka bagat kema geti ka
бага, sarat sia lé tai imam sabeu.

Sangarura sangamitsá lé ragagalaiaké nia. Iageti pakeietda masigalaiaké néné, iaté raabbit logau buluakenenda ka tubut Taikamanua, siorak ka tubunia ka sia samba leú et kalulut jo sitaipapaliketda ka sia sapaamiannia

⁸Kalulut aturan nenda, bulat patoilánangan nia Ketsat Sipunenan, iaté kaburut ipurió peilé ka sia rubeiat kema ka mata, tápei tububukáaké enungan situgugurú ka Bilí Simakopé Sipunen

⁹Néné masilambang'aké tetre kineneiget; samba momoi takua, panguruat samba tarimeu buluakenen sibuluakenenda ka tubut Taikamanua, tá momoi ipamuiné pupaaturananda ka бага ka sia sipasibubuluaké buluakenen

¹⁰Aipoí upacara nenda, sarat siorak ka pagalaiat komen, ló, samba piga ngamata pá upacara pasimagirat tubu. Sangamberinia néné sarat peraturan siorak ka putubuat lé, sioi tupakei teret ailina ibaraaké Taikamanua pasibaugat

¹¹Tápoi ka sia geti Kristus amoian nia kelé sara sipuoni Imam Sabeu, siorak ka pagalaiat simaerú, siturerere kababara. Kemat Tuhan kudduatnia masigalaiaké galajetnia siripot pu-Iimam

Sabeu nia peilé malainge samba bulat malelek. Kema nenda, tá sigalai kabeira sirimanua; katukolobatnia, iaté, tá sibara ka polak, sibaraakenen néné

¹² Ka sia Kristus sarat sangamitsá lé aiguruki Bilí Simakopé Sipunenan, tápoi pat aili teret buru-burú. Ka tetret nenda, tá aiabbrit buluakenennia logau biri-biri sikeú elé logau togat jai; tápoi logaunia lé aiabbrit, samba kalulut nenda paaraunangan sita teret buru-burú

¹³ Logau biri-biri sambat logau jai sikeú sambat abut togat jai te ikakau masisósoki sia sirimanua kasit-sit'akenen siripot peraturan ka puaranan, bulé ramaliná ka jodda. Oto ké beringan logau sambat abu momoi ipaliná pulolinan sirimanua

¹⁴ bulat sarapeite logau Kristus! Kalulut Ketsat simatom, buluakénangan tubunia Kristus, ka Taikamanua, kelé buluakenen simasut. Logaunia te aikau masibui paatuatta ka бага sibara ka upacarat arat sitá lulu, bulé ioi tapuukú kam Taikamanua sipuririmanua

¹⁵ Iaté lulunia, aibailiu nia ka sia Kristus, Sipatalaga ka pakerekat бага sibau, bulé ioi rasiló nia ka sia sinogai Taikamanua

néné, panukanan simatom, sitonéakenen
Taikamanua. Iooi ipuaili sangamberinia
néné, kalulut aian sia simamatei, iaté
Kristus, samba kamateiatnia néné,
masibelaaké sirimanua ka puseleatra,
sigalaiakenenda ka tetret ai peilé
tueenung'aké pakerekat бага siboikí

¹⁶ Ké ai surat warisan, buítá amakolouan
lalangóna nia sipasigagalai surat néné

¹⁷ Aipoí tápei tupapakei surat warisan
néné, ké ai peilé nia muririmanua
sibakkat surat néné. Teret ailangóan geti
nia, iapeité itupakei

¹⁸ Kalulut néné ka sia pakerekat бага
siboikí buítá leú et tusah'aké nia ka logau

¹⁹ Siboikí aisegéaké si Mose surukat
Taikamanua ka tubudda bangsa Israel.
Lepá alánangan logau togat jaui sambat
logau biri-biri sikeú, alánangan oinan
galúnia, iageti só-sóakénangan nia ka
Bukot Surukat Taikamanua sambat ka
tubudda sangamberidda bangsa Israel.
Ipapakei sosó-sónia iaté, puo hisop
sambat bulut biri-biri simabonan

²⁰ Aisosó-sóaké si Mose, aikukua, "Iaté
néné logau sipasisasah'aké pakerekat
bagá sibara ka Taikamanua bulat
reddeenemui.

²¹ Lepá kelé nenda leú et igagalai si Mose, ipasó-só logau ka tubut Kemat Tuhan samba ka tubut sangamberi pugalai pakeiet ka paniddogat

²² Kirénangan tedda, siripot surukat ka aratda tai Jahudi, momoi takua, kelé sangamberinia apa pá sarat logau lé tukakau masipaliná; samba ka sia jo leú et, teret itupiliaké logau peité ioi ituappéaké

²³ Ka enungan kelé néné te, bailiu buitá tupalina sangamberinia bibilet sipasilalambang'aké pagalaiat pumanuaat. Tápoi siorak ka pagalaiat pumanuaat nenda leú et, maperlu leú et tukang ka sia buluakenen bulat sisaliu erú peilé

²⁴ Aipoí tá tugugurú nia Jesus, ka Bilí Sipunenan sigalai kabeira sirimanua, sipasilalambang'aké Bilí Sipunenan bulat sibulatnia. Bulat tubuniangan lé poí Kristus atugurú ka manua. Oto kineneiget sedda, ai nia ka matat Taikamanua kalulut sita

²⁵ Ka sia tai Imam sabeura tai Jahudi, senen rura ratugurú ka Bilí Simakopé Sipunenan ka Uman Taikamanua, raabbit logau sangamuneng tarimeu. Tápoi

ka sia geti Kristus, tá aipaole tubunia
tugurú, masibuluaké tubunia

²⁶ Aipoí ké kisedda baí nia, bulat
amaolengan aipangorik, taddanangan
aitubaraaké polak néné. Tápoi kineneiget
siripot gogoi kalepakat néné, sarat
sangamitsá lé aioi masiappéaké jotta,
iaté kapasibubuluakéna tubunia

²⁷ Aiteúakéan Taikamanua sarat
sangamitsá lé ramatei sirimanua, lepá
adilinnan sia Taikamanua

²⁸ Kisedda leú te ka sia Kristus,
sarat sangamitsá lé aitubuluaké nia
kelé buluakenen, masiappéaké jodda
sirimanua simigi. Momoi nia mitsá
sikaruania, tápoi táan masipagaba
siorak pagalaiat jo, tápoi masipaarau
siangan lé sipasinge-ngenaaké tubuna,
ka kaoijanannia.

10¹ Ka sia geti surukatda tai Jahudi,
sarat masiaké sara tularat
simajajou siorak pagalaiat sangamberi
simaerú sipuaaili ka gogoi sibabara
le; tápei bulat tularatnia sipulelelek
ka sia nenda pagalaiat simaerú. Tá
momoi ka sia surukat néné isusut'aké
pueerúra sirimanua sieei maniddou
ka Taikamanua, ka buluakenen

sibuluakenenda ka tubut Taikamanua,
kenanen baí mariu-riu senen rura
tubuluaké buluakenen simakeré

² Ké baí sibulatnangan amalináan sia
ka jodda sia sipaniddogi Taikamanua,
táan iaagai bagadda ka jodda, samba
buluakenen leú, táan tububuluaké mitsá

³ Tápoi sené toilá, buluat sibuluakenen
senen rura, kelé masiparepdem sia ka
jodda lé

⁴ kirénangan poí ka sia logau jaui
sambat logau biri-biri sikeú, tá momoi
iappéaké jo

⁵ Iaté lulunia, ka tetret aioi Kristus
ka polak néné, kuanangan ka tubut
Taikamanua kisé, "Tá ainukikiddiy buluat
sambat buluakenen; aipoí siripokatnia
anutarek'akéan kaku tubu

⁶ Tá nuobá buluat sirarak elé buluat
pasiappet jo

⁷ Lepá kuakkungan, 'Aikoí aku ale
Taikamanua! Akuoi iaté masigalaiaké
siobat bagam, kelé ka sitususurat
pagalaiat tubukku ka Buko Sipunenan.'

⁸ Panandaatnia aikua Kristus, kisé, "Tá
ainukikiddiy buluat sambat buluakenen;
samba tá ainukikiddiy buluat tarimeu
sirarak kelé sara buluakenen pasiappet

jo." Ka sia Kristus aikua kisedda, kenanen sangamberinia buluat tubuluaké siripot surukat aratda tai Jahudi

⁹ Lepá kuanangan mitsá Kristus kisé, "Aikoí né aku, ale Taikamanua! Akuoi iaté masigalaiaké siobat bagam." Oto sené itatáaké Taikamanua sangamberinia buluat siburú, iageti siliynangan nia ka buluakenen Kristus

¹⁰ Oto ka sia Jesus Kristus, aigalaiakéan siripot obaket bagat Taikamanua, samba aibuluakéan tubunia kelé buluakenen. Ka buluakenen, sigalainia sarat sangamitsá lé, tápoi pat aili teret buru-burú nenda, sedda aibuian sita sangamberitta ka jotta

¹¹ Sangamberidda tai imamra tai Jahudi, senen gogoi raenung'aké galajetda siripot pu-iimamra, samba marei-rei raoleaké rabuluaké buluakenen simakeré. Tápoi buluakenen nenda, bulat beri oi nia iposa jo

¹² Tápoi ka sia geti Kristus, sarat sara lé aibuluaké buluakenen pasiappet jo, tápoi buluakenen nenda mariu-riu itupakei teret buru-burú. Iageti lepá aibuluaké buluakenen, uddet nia Kristus kai kattoet Taikamanua, purimataddangan ruadda

¹³ Oto ka sia Kristus kineneiget, aian lé nia masinge-ngena teret ikau sia Taikamanua, sangamberi saggaknia, murappo ka matania

¹⁴ Ka sarat sara lé buluakenen, oi isut'aké sia Kristus sangamberi sipalinánia ka jo

¹⁵ Iageti pagalaiat nenda leú et, aimuneng'aké leú et ka sia Ketsat Sipunenan ka tubutta. Aikua Ketsat Sipunenan

¹⁶ "'Néné lé pakerekat бага baraakenenku ka tubudda ka gogoi sibabara,' nga-ngan Tuhan, 'Ka bagaddangan lé kukakau surukatku, samba ka paatuatdangan lé kususurat'aké nia.'

¹⁷ Aikua leú et ka sia Taikamanua kisé, "Táan kurerepdem jodda samba leú et kataíra.

¹⁸ Jo sambat pukakataí, aiappéakéan Taikamanua, oto táan anai lulunia tubuluaké buluakenen pasiappet jo

¹⁹ Iageti alé kam Sasarina, kalulut kamamatei Kristus, bailiu maemenangan bagatta masiguruki Bilí Simakopé Sipunenan

²⁰ Aibukáan Kristus ka sita enungan sibau, iaté enungan sibaraaké purimanuaiat. Enungan néné sitebek komang kekre, iaté bulat tubut Yesus

²¹ Oto kineneiget, aian ka sita sara imam sabeu, siputatanggung jawab ka uman Taikamanua

²² Oto kalulut néné, kauan taei kam masilegeri Taikamanua ka linat paatuat samba ka tonem бага simaron; samba sibara ka paatuat sipaliná ka agai бага kalulut sele, elé ka tubu sipalinat oinan simamurni

²³ Buítá taomet'aké kam simaron karonietta simuneng'akenenta ka bagat paatuatta, aipoí bulat katonemiet lé nia Taikamanua néné, samba bulat muaaili iaké sitonéakenennia

²⁴ Kau tapaletsei kam katubu pasasambatta, bulé ioi tapatubbui kam mununtu бага ka pasasambatta, samba masigalaiaké sangamberi simaerú

²⁵ Kau mariu-riu taparurú kam pasasambatta, sambat buí imaore bagatta kelé ka sabagei. Tápoi bulat kau imakopé tamatopit pasopo katubu, aipoí aian taagai kam, taimauju nia ioi mitsá si Tuhan

²⁶ Aipoí ké atusegéakéan katuareman bulat sibulatnia sibara ka Taikamanua ka tubutta, tápoi riu-riunia lé tagalaiaké kam jo bulat sipalíta, oto táan te anai mitsá buluakenen masiposa jotta

²⁷ Tá anai bagei eijatta, sarat ka matat pengadilan Taikamanua samba ka apit golúnia, sipasilalabó sia pat pí sipasilalawan nia lé, taei kam

²⁸ Kasei sitaireddet surukat siaket Mose, ukum simateiakenen lé rasisiló, bulat beri te paappe-appé, ké bulat makolou bai selenia siripot simuneng'akenenda rua elé telu sia igidda

²⁹ Oto sarapeite bulat sanénia ukuman orak'akenen ka tubudda sipaperá Togat Taikamanua. Sia néné araaddeakéan lé nia sikanana, logau pakerekat bagat Taikamanua, iaté kamateiat Kristus masipaliná nia ka jo. Aipaloloian Ketsat, sipanguruat'aké panguruat katat бага

³⁰ Taagai kam nia sipasikukua, "Kululumun'aké te sia!" Kuukum'aké te sia! sambat sipasikukua, "Ihahakimi te sia si Tuhan, sapaamiannia.

³¹ Oto apanganté bulat kopet kataí besínia, ké segé sia ka kabei Taikamanua Sipuririmanua

³² Repdem peité kam kipa galai puririmanuamui siburú, ale kam Sasarainamai. Ka tetret nenda lepána aitoroji kam torot Taikamanua, maigi kam amangorik; tápoi riu-riu lé ron nga-ngamui berjuang

³³ Kakkau rapalololoi kam samba ragagalai sikataí ka tubumui ka matat siberikabaga. Samba kakkau leú et kam ka kam, orikmuian leú et siorikra sipango-ngorik, kalulut sigalaiakenenda ka tubudda kelé néné

³⁴ samba pureu-regimuian pureu-regat bagadda siukum'akenen ka bagat penjara. Ka tetret ararau-rauaké kam pat bolot pí sangamberinia bibiletmui, anusiló kam sigalaiakenenda néné ka angkat бага, aipoí ai lé nuaagai kam kababarania siloketmui sisaliu peilé erúnia, sambat tá ipakakataí teret buru-burú

³⁵ Oto kalulut néné, buí ibara belet bagamui, aipoí ké mariu-riu tonem bagamui ka tubut Tuhan Jesus, ai upa sabeu siloketmui kalulunia

³⁶ Buítá nuom'aké kam nia, bulé ioi nugalaiaké kam siobat bagat

Taikamanua, samba kalulut néné
silómuian sitonéakenennia

³⁷ Aipoí ka bagat Buko Sipunenan ai
atusurat'aké kisé, "Táan mauju, oi nia,
kuanenta siooi; bulat tá ipabuburú ioi

³⁸ Oto sapaamianku simaroipo
paatuat matotonem bagadda samba
muririmanua sia; tápoi ké ai sia sisik-sik
tei-teina, bulat tá mangká bagakku ka
tubunia.

³⁹ Sita geti néné ka sita, tá paamian
sisik-sik tei-teina samba simapepepe.
Tápoi paamian simatonem бага ka tubut
Taikamanua lé sita sambat sipaaraunia.

11 ¹ Mutonem бага, katukolobatnia
iaté, bulat masikatonemi бага
sangamberi karoniet, samba leú et
masimuneng'aké ka bagat paatuat bulat
kababarania sitaimatotoilá

² Kalulut tonem bagadda ka sia
sirimanua siburú, bailiu maangkánangan
bagat Taikamanua ka tubudda

³ Kalulut tonem бага, bailiu agaitangan
nia babaraakéna polak sambat
manua néné, tiboiet Taikamanua; oto
apa simatotoilá néné, sibabara ka
sitaimatotoilá lé

⁴ Kalulut tonem бага, buluakénangan si Abel, buluakenen simakopé erú ka tubut Taikamanua, belé peilé ka sibuluakenen Kain. Kalulut tonem bagania néné, silónangan nia Taikamanua si Abel néné, kelé sara sirimanua simaerú paraboa, kalulut matoilá aisiló buluakenennia Taikamanua. Oto kenanen ailangóan nia si Abel, tápoi kalulut tonem bagania nenda, bailiu ai peilé nia maninibo teret kineneiget

⁵ Kalulut tonem bagania si Henok, bailiu tá ailangó nia, tápoi atuakkat'aké lé nia itutaroaké ka tubut Taikamanua. Bulat beri sara sipasisesese nia, aiakkat'akéan poí nia Taikamanua. Ka Buko Sipunenan ai atusurat'aké kisé, ainangan tá iaabitnia Taikamanua si Henok, aibaraakéan puangkakat bagat Taikamanua

⁶ Bulat beri oi nia iangkáaké bagat Taikamanua ké tá anai tonem bagania ka tubut Taikamanua. Aipoí senen sieei ka tubut Taikamanua, buítá raagai kababara nia Taikamanua, samba kakauna upa ka tubudda sipasigagaba nia

⁷ Kalulut tonem бага, poiliatnangan ka tubut Noak, Taikamanua aponia

sipuaaili ka gogoi sibabara, sitaiooi iitsó. Aireddet nga-ngan Taikamanua si Noak, pat galainangan sara kapá, oto sibailiu sibelaaké nia leú et ka eba sambat sangamberidda ka bagat lalepnia. Ka enungan nenda, oraknangan nia ukuman ka sia polak néné, tápoi ka sia geti si Noak, kalulut tonem bagania, oniakénangan nia si Noak néné Taikamanua, sirimanua simaerú paraboat

⁸ Kalulut tonem бага, reddenangan nga-ngan Taikamanua si Abraham, ka tetret aisogai nia samba aikoiniaké nia ka laggai sitonéakenen Taikamanua ka tubunia. Iageti einangan leú et si Abraham ka laggai taiaagaiet nia

⁹ Ka tonem bagania si Abraham, pusitoinangan ka laggai sitonéakenen Taikamanua ka tubunia. Kuddu nia sedda si Abraham ka bagat kema. Oto kisedda leú te ka sia kai Isak sambat kai Jakob, sipasisisiló patonekat kelé nenda leú et, sibara ka Taikamanua

¹⁰ Aipoí ainge-ngenaaké tubunia ka sia si Abraham, ibara laggai siripot sirencanaakenen Taikamanua, elé

sirióakenen Taikamanua, sibara pundasi simaron

¹¹ Kalulut tonem bagania si Abraham, bara tuppai tubunia kai Sara, kenanen bulat amabajáan nia si Abraham, samba ka sia leú et si Sara, sipututukkú tubu lé nia. Matonem bagania si Abraham, puaaili nia sitonéakenen Taikamanua ka tubunia

¹² Kenanen ka tetret nenda kéan lé simamatei tubunia, tápoi amoi peilé simigi sapunuteteu, sitaioi tuadde kopet igidda, bulat kéan lé nuntut panyanyat ka manua sambat igit ngaí ka bet-bet coat

¹³ Ka sia sangamberidda néné, riu-riu lé rakatonemi Taikamanua teret matei. Tá arasiló sitonéakenen Taikamanua, tápoi sarat masiitsó samba masiroroi ka simareunan lé aragalai. Oto sedda kuaddangan tubudda, sia néné sitoi samba simaeppak lé sia ka polak

¹⁴ Ka sikuadda néné te masipatotoilá, sia néné, ai peilé sia masigagaba laggai kudduatra

¹⁵ Tá laggai sikaddiuakenenda nenda rasosoibi. Aipoí ké kisedda baí nia, maigi

peilé oggak ka sia ratoili mitsá ka laggai nenda

¹⁶Tápoi sené matoilá, soibietda iaté laggai sisaliu erú peilé, iaté laggai manua. Néné te lulunia tá imamaila Taikamanua raoniaké nia Taikamanuanda, aipatarek'an poí ka sia sara laggai, kudduatra

¹⁷Kalulut tonem бага leú et, buluakénangan si Isak si Abraham, kelé buluakenen ka tetret aiuji nia Taikamanua. Ka tubut Abraham te aikau sitonéakenennia Taikamanua, iaté si Isak, tápoi matarek peilé nia si Abraham masibuluaké tokania sisasara néné

¹⁸Aikuangan Taikamanua ka matat Abraham, "Sibara ka tubut Isak néné te ibabara sapunuteteunu, sitonéakenenku ka tubum.

¹⁹Matonem bagania si Abraham kaooinia irimanuaaké nia mitsá si Isak Taikamanua sibara ka kamateiat. Oto momoi takua, aisiló nia mitsá si Isak néné si Abraham, sibara ka kamateiat'an lé

²⁰Kalulut tonem бага, tonéakénangan si Isak panukanan ka tubut Jakob samba

kai Esau, pagalaiat sipuaaili ka gogoi sibabara

²¹ Kalulut tonem бага, bailiu ainangan tá ilalangó nia si Jakob, kaunangan panukanannia ka tubudda tatogat Josep; aiaddaiaké uténia ka utet tuturánia, lepá paniddounangan leú et ka tubut Taikamanua

²² Kalulut tonem бага, bailiu kai Josep, kei ilangó nia, pusiblanangan leú et pagalaiat kabebeladda bangsa Israel ka laggai Misir, samba patanénangan leú et sia pagalaiat kipa ragagalaiaké ka tubut tubunia simamatei

²³ Kalulut tonem бага, koiríakérangan si Mose saeppunia ka bagat telu ngalaggó burúnia, barana ka putútukat matania. Kalulut iitsóra laingen tubunia toga néné, taikalotóakérangan masilawan nga-ngan rimata

²⁴ Kalulut tonem бага, bailiu kelé aiabeu si Mose, tá iobá rakua nia togat togat rimatadda tai Misir sinanalep

²⁵ Mangorik sambadda sabangsai Taikamanua peilé iobá, belé peilé masinanam erut puririmanua ka jo

²⁶ Aipaatu poí ka sia si Mose, rapaloloi nia peilé maabeu ka paatuatnia

kalulut Rimata Sipaarau sitonéakenen
Taikamanua, ka pasiiikep'aké sangamberi
pukayoat Misir, ai lé poí ikakaroni бага
isiló upania, ka gogoi sibabara

²⁷ Kalulut tonem бага, bailiu tá
aikalotóaké golut rimata, si Mose,
aitui-tui ikaddiuaké laggai Misir. Ka sia
kai Mose riu-riu lé iailiaké ailiakenennia,
kéan lé baí aiiitsoán Taikamanua,
sikukuddu ka simalipput

²⁸ Kalulut tonem бага, baraakénangan
Punen Paska si Mose, samba kuanangan,
bulé rasó-sóaké logau ka matatbaliu
lalepra tai Israel, bulé tá imateiaké
tatogadda sikebbukat, Malaika
Pasimamatei

²⁹ Kalulut tonem бага, oi aratalipoki
tai Israel Koat Simabonan, pat bulat
kéan lé raenungi polak simagarak, tápoi
ka sia geti tai Misir labbúnangan sia
koat nenda, ka tetret airasisibo ka sia
ratalipoki nia

³⁰ Kalulut tonem bagadda, oi raragat'aké
kekret laggai Jeriko tai Israel, lepat
arabokkó nia ka bagat pitu ngagogoi

³¹ Kalulut tonem бага,
taitumateiakénangan ka sia si
Rahab, simaolop tubu néné, kelé ka sia

sipasisasaggangi Taikamanua; kalulut aisiló poí sia tai Israel sipasitataiko laggai Kanaan, ka erut бага

³² Oto momoi kuriu-riuaké kutiboi nia, tápoi tá iaaili tetrekku. Aipoí tápei akutiboi sia ka sia tai Gideon, tai Barak, tai Simson, tai Jepta, tai Dapid, tai Samuel, samba sia leú et tai nabi

³³ Kalulut tonem бага, oi arakalaaké tai rimata. Samba kalulut gagalaiakéra simaroipo, bailiu silórgan leú et sangamberinia sitonéakenen Taikamanua. Momoi rapet-pet ngu-ngun singa

³⁴ samba momoi rapéaké api simakopé juluu, samba leú et momoi rakatsliaké tubudda ka sot lanjau. Masaggo sia, tápoi lepá maronrgan leú et; bulat magege sia ka pasaggangan, pat oi rakalaaké pasukanda sabangsa bagei

³⁵ Kalulut tonem bagadda tainanalep néné, seseddangan mitsá sasarainanda simamatei. Samba ai leú et sia siobáaké tubuna rapaorei sia teret matei, samba ratá-táaké bulé tá tubelaaké sia ka ukuman, aipoí obára turimanuaaké sia mitsá ka purimanuaiat sisaliu erú peilé

³⁶ Ai rapagegeji, ai rapajiguji, ai rarattei tali labá samba ai leú et ragurúaké ka bagat penjara

³⁷ Baijukrangan sia bukkú teret matei, ai sia rapagajiji, samba ai leú et sia rasaggri lanjau. Pueppakrangan leú et, tápoi ka tubudda, sarat leppei kulit biri-biri, elé kulit kambing lé; simagebá lé sia samba ai lé rapaoorei elé rabebesiki sia

³⁸ Ka sia néné, tá aibailiu nia polak néné kudduat sipasesese ka tubudda. Muekpak lé ragagalai ka simatangeu sambat ka palele-leleu, samba leú et ka ngaliu samba ka lobok polak

³⁹ Bulat abeu kamanangan rasisiló sangamberidda néné, kalulut tonem bagadda! Tápoi tá rasisiló sitonéakenen Taikamanua

⁴⁰ ai peilé poí sipinaatut Taikamanua ka sita sisaliu kopet erú peilé, siorak ka pagalaiat néné. Sipinaatunia néné iaté, buítá sambatta lé, iapeité rasiló nia ka sia simasut erú.

12 ¹ Iageti pagalaiat tubutta leú et ka sita, ai maigi pat bokkó saksitta! Oto kalulut néné, kauan taribbaiaké kam sangamberinia sisanéaké sita

sambat jo sikukuddu ka tubutta. Kau bulat imaletsei ka bagatta masienungi patakaiat siitsóta ka matatta

² Buítá tamataiaké kam matatta ka tubut Jesus, aipoí nia lé masitutú-túaké tonem bagatta samba masipasisikeli, barania ka panandaatnia, pat aili ka kalepakatnia. Aiom'aké Jesus mangorik ka loiná siliktenga! Tá aipuletsei katukuanan matei ka loiná siliktenga iaté kelé sara katukailaat. Sarat puangkakat бага siloketnia ka gogoi sibabara lé aipaatu. Kineneiget aian nia mukukuddu kai kattoet uddenan purimataat Taikamanua muririmata sambat nia

³ Oto patup-tup peité kam ka bagat paatuatmui, kipa kopet besínia pangoringan Jesus masipalabáaké galai tubudda sirimanua sijo, sipasisasaggangi nia bulat sikataí besí! Oto buí imaanu bagamui elé imabelé bagamui

⁴ Aipoí perjuanganmui masilawan jo, tápei abara pat pili logaumui

⁵ Oto buí nukalipogi kam ngantoman Taikamanua, siakénia ka tubumui sipuoni tatogania: "Ale kam tatogakku, lelek'aké kam sipulelelek ngantoman Tuhan,

samba buí imaanu bagamui ké ipugoluki kam

⁶ Aipoí bulat iteteká sia Taikamanua simanuntut bagania, samba ipabobó-boki sia, siaddeakenennia tatogania.

⁷ Buítá nusiló kam bobot-bot Taikamanua, kelé nganturat sara ukkui. Kipa, ai poí sia sara tatoga sitaiorak golut ukkuinia

⁸ Ké tá tuukum'aké leú et kam ka kam, kelé ka sia sangamberidda tatogania sabagei, oto kam néné tá tuaaddeaké kam bulat tatogania, tápoi tatoga ka bé-bé lé

⁹ Ka sita ai ukkuita ka polak néné. Samba aipanga-ngantru sita; sita leú et ka sita, aitahohormati nia. Oto sarapeite ukkuita ka puketsanan, sikukuddu ka manua, buítá saliu peilé kopet purereddetta ka tubunia, bulé tapurimanua kam

¹⁰ Ka sia saepputta ka polak, rapangantru sita, ai puteteratnia, samba nganturat singantruakenenda nenda leú et, apa siripot sipinaatudda simerúra ka sia lé. Tápoi ka sia geti Taikamanua, sibailiu katuerukatta lé, ipukakateki sita

baga, bulé tamaliná kam ka sita sambat nia

¹¹ Kirénangan ka tetret airapangangantru sita, ukuman siakéra, bulat tá isese ka bagatta, sibaraaké reu-reu bagatta lé. Tápoi lepá nenda, ka sita sipangantrudda néné, ukuman siakéra ka tubutta nenda, masikau sita muparaboat siripot obaket bagat Taikamanua lé, samba sibaraaké ka sita rogdang puririmanua

¹² Oto kalulut néné, ron'aké kabeinu simasaggo samba bokklom simageret

¹³ Kau imariu-riu nupuenung ka enungan simagaktuk, bulé tá tuingroi nenda rerem simajegeu, tápoi bailiu male lé

¹⁴ Bulat besíaké numaaban ka tubudda sangamberi sirimanua. Samba besíaké leú et imaliná puparaboanannu kai Tuhan. Aipoí beri sia sara momoi iitsó si Tuhan, ké tá muparaboat sia kelé néné

¹⁵ Jago buí rabara beri sara siareuaké tubuna ka kup-kumen erut bagat Taikamanua, bulé buí ibara sia ka talagamui kelé tuba, sibaraaké pugejaat бага, elé sipakataí sirimanua simigi kalulut tubania

¹⁶ Bulat jago buí rabara sipusisilainge
samba sitaipuletsei pagalaiat siorak ka
puketsanan, kelé sigalaiakenennia ka
sia si Esau. Aisakiaké haknia siripot
pusisikebbukat, sarat kalulut sangapiring
kan

¹⁷ Kelé siagaimui, lepá besíakénangan
nia mitsá si Esau, isiló panukanan sibara
ka ukkuinia, tápoi tá aikau ka tubunia.
Aipoí kenanen baí pat pusounangan
igaba enungan masipaerú selenia, táan
anai oggak ka sia masipaerú

¹⁸ Ale kam sasarinamai, anuoi kam
sené, tá masimatai apa pá, kelé sipuaaili
ka sia tai Israel siburú. Ka sia néné
atukau sia masimatai siooi turape, iaté
kelé Leleú Sinai sibara api sipujujuluu;
masimatai pugep-geman, elé simainep
samba leú et rusa simapiret

¹⁹ elé masimatai nga-ngan pipiau,
samba nau nga-nga sabeu. Kelé
araarep nia tai Israel nga-nga nenda,
tiddourangan nia Simakopé bulé buían
ipanibo mitsá nga-nga nenda

²⁰ Aipoí bulat tá raom masiarep parenta
sikuat nga-nga néné. Aikua nga-nga
néné iaté, "Kasei sibeg-beg leleu néné,
tarimeu pá nia, elé kasei pá onia, tá

tupagagaba, buítá tubaijuk nia bukkú teret matei.

²¹ Siitsóra tai Israel néné bulat simakopé lotóra, pat kuanangan nia ka sia si Mose, "Bulat seget kopet lotóku, pat pugeretnangan tubukku.

²² Tápoi ka kam geti amoian kam ka Leleú Sion sambat ka laggai Taikamanua sipuririmanua, iaté Jerusalem ka manua sibara malaika sipuriribu igidda

²³ Amoi kam ka parurukat puangkakat бага, iaté parurukatda tatogat Taikamanua sikebbukat, sitususurat oni ka manua. Amoi kam masiailiaké Taikamanua iaté Hakimra sangamberi taikapolak néné. Apatuggut'an kam mata ka ketsatda simaerú paraboat, silepá tusut'aké pueerúra

²⁴ Amoi kam sené ka matat Jesus, iaté Sipatalaga ka pakerekat бага sibau; samba amoi kam sené masimatai logau sinósokat, sipasijajamin pagalaiat bulat simakopé erú peilé, saliu ka sijaminnia ka sia logau Abel

²⁵ Oto kalulut néné, bulat kau nujago kam tubumui, buí tá nuobá kam masiarepi nga-ngania sipaninibo ka matamui. Aipoí beringan sia sitaiarepi

nga-ngania siooi ka polak néné
iaté sipasisesegéaké katuareman
sibara ka Taikamanua, tá momoi
rakatsliaké tubudda. Iangan pá sita
néné sipasiaarepi tiboietnia, sipaninibo
ka manua! Ké tá taobá kam masiarepi
tiboietnia, bulat kaipa te iooi takatsliaké
kam tubutta

²⁶ Ka tetret nenda, bulat pat ngeu-
ngeu polak kalulut nga-ngania. Tápoi
kineneiget geti aitonéaké kisé, "Ai pei
sangamitsá kubaraaké tá sarat polak
néné mungengeu-ngeu, tápoi sambat
manua leú et.

²⁷ Nga-nga sipasikukua, "ai peilé
sangamitsá" masipatoilá ka sita,
sangaliot polak sibaraakenennia
ipangengeu-ngeu sambat tukakarit'aké,
bulé sarat sitaiagai ngeu-ngeuan lé
mulelegei

²⁸ Oto kalulut néné kau takua kam
surá ka tubut Taikamanua, kalulut
ataxilóan kam sibara ka tubunia sara
purimataat sitaioi tupangeu-ngeu. Kau
takua kam surá samba tapaniddogi kam
Taikamanua ka hormat samba ka lotó,
siripot sipasesese ka siobánia

²⁹ Aipoí ka sia Taikamanuanta, kelé api sipasilalabó lé nia.

13 ¹ Kau mariu-riu nupakaté kam бага pasasambamui, siripot pusasarainanda tai Kariten

² Buí imatik-tik tubumui masisiló tairauma ka lalepmui kenanen tápei nuagai kam sia. Aipoí ai sia, kapasigagalaiakéra kelé nenda, ka taibabagalet bagadda, raumandangan leú et tai malaika, ka lalepra

³ Repdem kam sia sipenjaraakenen; samba addeaké lé kam nia kelé baí ai lé kam ka kam sambamui ka bagat penjara. Samba kau nurepdem kam sia sipasioorik kalulut ragalai siobára ka tubudda, nualaki kam nia ka tubumui, pat kelé ka tubumui lé baí aragalaiaké nia

⁴ Bulé rapatoilá ka sia sangamberi sirimanua hormatda ka tubut putalimogat, iaté lulunia ka sia simanteu sambat sinanalep, buítá matopit sia ka pasasambadda. Aipoí iaadili te sia Taikamanua sipusisilainge sambat sipaeet

⁵ Buí ikup-kup'aké ekeu puaalau бага ka bulagat, tápoi kauan isegé bagam

siripot sibabara ka tubum. Aikuangan poí Taikamanua kísé, "Tá kuooreaké ekeu elé tá kukakaddiuaké ekeu.

⁶Oto bailiu maró bagatta masakua, "Taikamanua lé Ropku, bulat beri lotóku. Aponiangan lé momoi ragagalai sirimanua ka tubukku?

⁷Buí nukalipogi kam sia tai bajámui sipasisesegéaké patonekat Taikamanua ka tubumui. Lelek'aké peité kam galai puririmanuanda samba galai ramatei, samba ului kam putotonem bagadda

⁸Ka sia Kristus néné tá isisiliy, makeré lé nia siburú sambat kineneiget, tá isisiliy teret buru-burú

⁹Buí nuobá ipepeaké kam nganturat smakisei ka bagatta. Kau erut bagat Taikamanua iron'aké paatuatta néné, aipoí nenda lé maerú; buí surukat pagalaiat siorak ka komen. Sia sipasirereddet surukat nenda siburú, bulat tá anai lulunia ka tubudda

¹⁰Ai ka sita sara kudduat pasibuluat, masibuluaké buluakenenta ka tubut Taikamanua. Samba sia tai imam sipuukú galajet Tuhan ka Kemat Tuhan, tá anai hakra masikom buluakenen ka uddut pasibuluat nenda

¹¹ Logau tarimeu sibuluakenen, kelé pasiappet jo néné, abbitrangan nia tai imam sabeu ka Bilí Simakopé Sipunenan, tápoi tubut tarimeu simamatei geti, labórgan nia ka tei-tei pukemaat

¹² Iaté lulunia ka sia Jesus, aimatei ka tei-tei matatbaliu laggai, masipaliná bangsania ka jodda, bulat tubut logaunia

¹³ Oto kau taei kam ka sita ka tubunia ka tei-tei pukemaat, bulé rapaloloi leú et sita ka sita sambat nia

¹⁴ Ka polak néné tá anai kudduatta simatom; ai lé tagagaba kam kudduat siooi ka sita ka gogoi sibabara

¹⁵ Oto kalulut Jesus, kau imariu-riu taumun kam Taikamanua; kelé sara buluat buluakenenta ka tubunia, iaté sibuluakenenta ka sitiboakenen ngu-ngunta masiumun oninia

¹⁶ Buí nukalipogi kam masigalaiaké simaerú sambat parom pasasambamui, aipoí néné lé kelé sara buluakenen siobat bagat Taikamanua

¹⁷ Tut kam sikuadda tai bajámui, samba kau nureddet kam nga-nganda. Aipoí sia lé ipasisikeli engamui, samba sia leú et ka sia buítá bertanggung jawab ka tubut Taikamanua. Oto ké mareddet

kam ka tubudda, oi rapugalai ka angkat baga; tápoi ké tá maredet geti kam, pugalairangan ka reu-reu baga, samba nenda tá ibabaraaké puuktunganmui

¹⁸ Kau imariu-riu nutiddouaké kam kai ka tubut Taikamanua. Aipoí matonem bagamai pulilinat paatuatmai, kalulut ka sangamberinia, riu-riu lé puobámai masigalaiaké aponia simaroipo

¹⁹ Bulat paniddogatku simaron ka tubumui, bulé nutiddouaké kam aku, bulé imaruei ikoiniaké aku mitsá Taikamanua ka tubumui

²⁰ Aisuruakéan nia mitsá Taikamanua, Jesus néné ka simamatei. Kalulut kamamateinia néné bailiunangan nia kineneiget Sipasijajago Sabeu ka sita, iaté sipuoni sabiri-birinia. Kamateiatnia néné leú et, masisah'aké pakerekat baga simatom sigalai Taikamanua ka tubutta

²¹ Bule Taikamanua pubakkanan pabujaiat masisut'aké kam ka sangamberinia simaerú, pakeietmui masigalaiaké siobat bagania. Bulé kalulut Jesus Kristus, galaiakénangan ka tubutta Taikamanua apa kiddiyet bagania. Bulé tuumun'aké onin Kristus teret buru-burú

²² Bulat paniddogatku bulé nulelek'aké kam sangamberinia nganturatku néné kaom бага, aipoí tá makopé nanta suratku néné

²³ Bulé nuagai kam nia, sarainanta si Timoteus arabelaakéan nia ka bagat penjara. Ké amoian baí nia ka kudduatku, abbitkungan leú et nia kaoijatku kubalou kam

²⁴ Segéaké kam salamku ka tubudda tai bajámui sambat ka tubudda sangamberi paamian Taikamanua. Siló leú kam salamra sasarainanta sikukuddu ka Italia

²⁵ Bulé ipanukani kam sangamberimui si Tuhan.

Yakobus

1 ¹Ale kam sangamberimui
Sasarainamai, sapaamian
Taikamanua ka sangaliot polak!
Kusegéaké salamku ka tubumui, iaté
aku sipuoni si Jakobus, pagugulet
Taikamanua samba leú pagugulet Tuhan
Jesus Kristus

²Ale kam sasaraina! Kau ikua ka
bagamui puuktunganmui lé, ké marei-rei
ioi pasisiboat ka tubumui

³Aipoí kelé siagaimui leú, ké mariu-riu
baí tonem bagamui ka tubut Tuhan,
kenanen moi pasisiboat ka tubumui,
bailiu bara ka kam puoom бага

⁴Oto bulat pasikeli kam, bulé puoom
bagamui néné memei makokopé
ipuurau, pat bulat sut pueerúmui samba
táan anai apa pá ka kam simagulai

⁵Ké ai baí ka talagamui simagulai sikut
paatuat, buítá ratiddou pusisikut paatuat
néné ka tubut Taikamanua, tá isoppi
ikau ka sia Taikamanua pusisikut paatuat
néné. Aipoí senen tubut sirimanua,
ikakau Taikamanua ka tubudda siripot

aggai bagania samba punununtut
bagania

⁶Tápoi ka sia sipaniddogi nia, buítá
bulat matonem bagadda ka tubunia; buí
iparua bagadda. Aipoí ka sia simarua
baga makeré lé galai tubudda kelé onut
koat, kaipa lé ikau nia rusa, einangan
leú et

⁷Sia kelé néné, tá mamumuiné
pupaatuananda; tá momoi rateúaké
aponia pá, galaiakenenda. Oto kalulut
néné, tá leú te anai lulunia ikaroni бага
apa pá sibabara kai Tuhan

⁸(1:7)

⁹Tai Kariten simagebá, buítá imangká
bagadda, ké ibuak'aké sia Taikamanua

¹⁰Kisedda leú te ka sia tai Kariten
simakayo, buítá leú et mangká bagadda
ké iparepé sia Taikamanua. Aipoí ka sia
simakayo, tatatá lé sia, kelé bobotsoket
turu-turu

¹¹Kelé imaoloi sulu, malajúnangan leú
et turu-turu néné, iageti belénangan
leú et ka sia bobotsoketnia, oto tatá leú
et laingenia. Oto kisedda leú te ka sia
simakayo néné, tatatá lé sia ka tetret
airaeenung'aké pukayoatda

¹² Mauktuk te sia simaom бага масiorik pasisiboat. Aipoí ké moi iom'aké nia sangamberinia pasisiboat sioriknia, silónangan upania, iaté purimanuaiat sitaitatátá, siripot sitonéakenen Taikamanua ka tubudda simanuntu бага ka tubut Taikamanua

¹³ Ké ai sia sara siorak pasisiboat kelé nenda, buí ikua, "Sibara ka tubut Taikamanua lé pasisiboat néné," Aipoí ka sia Taikamanua tá momoi isibo nia pukakataí, samba tá ikakau pasisiboat ka tubudda kasei pá

¹⁴ Ioorak geti sia ka sia pasisiboat, ké maré-ré sia ka sipinaatudda, kelé siripot obaket pubobot-bot akkulára sikataí

¹⁵ Oto, ké ratut'aké baí siripot obaket pubobot-bot akkulára néné, tú-tú jodda. Iageti ké asegeán aipuurau jodda néné, bara kamateiatda

¹⁶ Buí rapataju kam, ale Sasarainangu, kilibet bagakku

¹⁷ Ka manua lé kabariaiat panguruat simaerú, sambat hadia simasut pueerú, igorosot'aké nia Taikamanua, sipasibabaraaké sangamberinia pató ka manua. Ka sia Taikamanua néné, tá

isisiliy burú, samba tá ibabaraaké apa pá
pugep-geman

¹⁸ Ka teú bagat Taikamanua lé,
aibailiuaké sita néné tatogania, kalulut
tiboietnia pubulanan. Aigalaiaké nia geti
kelé néné, Taikamanua, bulé ibailiu sita
siabeu, ka tubut sangamberi makluk
sibaraakenennia bagei

¹⁹ Repdem kam sikuakku néné, ale
kam Sasaraina kilibet bagakku!
Sangamberimui, buítá maruei
nutongiaké kam talingamui masiarepi
tiboiet; tápoi kau mamoi le mutitiboat,
samba buí imaruei ibara golúmui

²⁰ Aipoí sirimanua simagolú, tá babara
simaerú sigalaira siangkáaké bagat
Taikamanua

²¹ Oto galak'aké kam galai tubu simalolit
samba sikataí. Tápoi kau lé nusiló kam
tiboiet néné siurep'akenen Taikamanua
ka bagat paatuatmui, ka repet paatuat.
Aipoí tiboiet nenda, ai gegenia ipaarau
kam

²² Kau nugalaiaké kam nia sangamberi
siarepmui sikuat Taikamanua, buí sarat
arep lé lepá, buí ibailiu kam sipataju
tubuna

²³ Aipoí sia sipasiaarep tiboiet
Taikamanua, tápoi tá ragagalaia ké,
bulat makeré lé sia kelé sara sirimanua
sipasitotoro tubunia ka totoro

²⁴ Kelé itui-tui ka totoro lepat ituneaké
tubunia, kalipoginangan leú et kipa
putubuatnia

²⁵ Ka sia geti Surukat Taikamanua,
bulat masut pueerúnia, samba ai
gegenia masiujaaké sirimanua. Oto sia
sipasigegelai samba sipasilelelek'aké
bulat sipulelelek samba sipasigagalaia ké
sikuat surukat néné, tápoi tá sarat
arep, lepá kalipoginangan nia, sia té
ipanunukani Taikamanua ka sangamberi
galajetda

²⁶ Ké ai sia sikua ka paatuatna matopit
sia muarat, tápoi tá raagai masijago
jalaira ka titiboat, oto arapataju lé
tubudda, bailiu musisiboboi lé ukut
bagadda muarat

²⁷ Oniakenen geti putotopit muarat
bulat simamurni samba sipulelelek ka
matat Ukkui Taikamanua, iaté néné:
masirop'aké tatoga sipululusaí samba
siputatáina, masirop'aké tailumang siorik
gejat бага, samba masijago tubu buí
ipakataí sia siobat bagat polak néné.

2¹ Ale kam Sasarainangku! Siripot sipuoni simatonem бага ka tubut Tuhan Jesus Kristus, Tuhan Sipulubeunan, buí nupabaggei kam sirimanua, kalulut masiitsó sirimanuania

² Aipoí ké moi sia sara simakayo sibara sip-sip emas, samba sipuleleppei simalainge ka parurukatmui, lepá oi sia mitsá ka sia sipuleleppei leppei pabiri-birit

³ bailiu simakayo peilé makopé nuhormati kam. Kuamui lé ka matania, "Sené puuddet kam ka kam, Tuan, ka uddenan simalainge." Tápoi ka tubudda geti ka sia simagebá, kuamui lé, "Rióaké ekeu sedda," elé, "Seddangan té nupuuuddet ka bagat lalep.

⁴ Ka sigalaiakenenmui néné, anupabaggeian kam sia saalei pasasambamui. Siripot sipinaatumui sikataían lé anupakei kam masinilai sirimanua

⁵ Repdem kam sikuakku néné, ale kam Sasarina kilibet bagakku! Simagebá ka polak néné, aipiliyan sia Taikamanua bailiu simakayo ka putotonem бага ka tubut Tuhan Jesus. Sia té ibabailiu sapaamian Taikamanua, kelé sipinalelek

Taikamanua ka tubudda simakaté бага ka tubunia

⁶Tápoi nupalololoi lé kam sia simagebá. Oto simakayo lé ipaoorei kam samba ipagigirit kam, rataroaké kam ka pengadilan

⁷Sia té masipaloloi oni simalatsat, sisilómui sibara ka Taikamanua

⁸Simaerú te sigalaiakenenmui néné, ké nugalaiaké baí kam surukat Taikamanua siripot sitususurat ka Buko Sipunenan sipasikukua kisé, "Kau imakaté bagam ka tubudda saaleinu sirimanua, kelé katet bagam kekeu ka tubum.

⁹Oto ké nupabaggei kam saaleimui sirimanua kalulut masiitsó sirimanuania, anugalaian kam jo. Siripot surukat Taikamanua, kam néné tuoniaké sipasabau surukat

¹⁰Sia sipasabau sara ka talagat surukat Taikamanua, tukuangan lé nia, arapasabauan sangamberinia

¹¹Aipoí sia sipasikukua, "Buí nupaelet," sia leú et masikukua, "Buí nupamatei." Oto kenanen tá apaelet kam, tápoi anumateiakéan kam sirimanua; oto anupasabauan leú et kam surukat

¹² Oto buítá kélé aituaadili ekeu siripot surukat Taikamanua sipasiuujaaké sirimanua, nupanibo samba nugalaiaké apa pá galajetnu

¹³ Aipoí ka sia Taikamanua, bulat tá ipukakateki sia бага, sitá anai katet бага ka tubudda sirimanua. Tápoi nuntut bagat Taikamanua peilé abeu ka ukuman

¹⁴ Ale kam Sasaraina! Aponia uktukra sipasikukua, "Simatonem бага ka tubut Tuhan Jesus lé aku néné," ké tá ipatoilá putotonem bagania néné ka sigalaiakenennia? Momoi leú pá irop'aké nia tonem бага kelé néné

¹⁵ Ké ai baí sara sasarainamui, elé sara maniumui tá anai leppei pakeietnia, elé sitaimaigi kan ka purimanuaiatnia senen gogoi

¹⁶ Apangan lé lulunia nukukua kam ka matadda, "Kauan pakeian kam leppei simakeppu бага, imaoloi bagamui, elé nukua kam, kauan pukom'an kam pat ektek!", ké tá nukau kam ka tubudda ibara pakeietda ka purimanuaiatra

¹⁷ Oto kisedda leú te ka sia putotonem бага kai Tuhan Jesus, ké tá tupatoilá nia ka pasigagalaiaké, tá anai katukaunan nia

¹⁸ Kupaatu ai sia sipasikukua, "Ai sia sipasisisiddoni putotonem bagania kai Tuhan Jesus; tápoi ai leú et sia sipasisisiddoni sigalaiakenennia." Oto, "Patoilá peité kam ka tubukku, kipa rapaeerú sirimanua ibara tonem bagadda tápoi tá airagagalaiaké siripot putotonem bagadda, iageti patoilákungan kaku sigalaiakenenku siripot kababaranian tonem bagakku.

¹⁹ Matonem tebaí bagamui sarat sara lé Tuhan, elé? Tápoi beri leú et ka sia paketsa-ketsat sikataí leú et, matonem bagadda, bulat pat geret tubudda, kopet kataí lotóra

²⁰ Bulat sitaiagai paatuat lé kam néné! Kipa, nubebesíaké peilé kam tupatoilá ka tubumui tatat lulunia mutonem бага sitaigagalaiakenen

²¹ Repdem peité kam, kelé ka sia taikebbukatta si Abraham. Lulunia aisiló nia Taikamanua, kalulut sigalaiakenennia ka tetret aibuluaké toganian si Isak, ka Taikamanua ka pasibuluat

²² Oto sené, amatoiláan putotonem бага ka tubut Tuhan Jesus néné, buíta tapatoilá kam nia ka pasigagalaiakéta

nia, bulé bulat imasut ituenung'aké
putotonem бага нéné

²³ Néné maipó kelé ka sikuat Buko
Sipunenan, "Kalulut tonem bagat
Abraham ka tubut Taikamanua, bailiu
silónangan nia Taikamanua, kelé
sara sipasigagalaia ké siobat bagat
Taikamanua." Iaté lulunia aituoniaké nia
si Abraham нéné, "Suruak Taikamanua.

²⁴ Oto amakolouan kineneiget,
kalulut sigalaiakenenda lé isisiló sia
Taikamanua, tá sarat kalulut tonem
bagadda ka tubunia

²⁵ Repdem leú kam kelé ka sia
kai Rahab, sara sinanalep simaolop
tubu. Aisiló nia Taikamanua kalulut
sigalaiakenennia; iaté aisiló tairauma
sibara ka tai Israel sipasitataiko laggai
Kanaan ka lalepnia, samba airop'aké
sia bulé ratui-tui rakaddiuké laggai ka
enungan bagei

²⁶ Kelé ka sia tubu нéné, ké tá anai
ketsat, tubu нéné simamatei lé. Ialeú
et ka sia tonem бага, ké tá tugalaia ké,
bailiu tonem бага нéné simamatei lé.

3 ¹ Ale kam Sasaraina! Buí maigi ka
talagamui siobá muguru. Aipoí kelé

siagaimui sita tai guru lé bulat tuadili
simakopé, belé peilé ka sabagei

² Marei-rei ka sita sangamberitta
tagalai kam sele. Tápoi sia geti sitaigalai
puseleat ka titiboatnia iaté oniakenen
sirimanua simasut pueerú, siagai
masijago tubunia ka sikataí

³ Ké taratsat ngu-ngut kuró, bulé
taabbit nia ka siobáta, bailiu oi tagalai
kam siobáta ka tubunia

⁴ Tapasíaké lé kam nia boikí ka kapá.
Kuanenta tebaí, kapá bulat abeu,
momoi ipit-pit nia rusa simapiret. Tápoi
kenanen kisé, gurungan sigoisó lé
iipóaké puenunganannia, siripot teú
bagat simuriaké nia

⁵ Oto kelé kisedda leú te ka sia jalaita
néné, kenanen taitso nia magoisó, tápoi
momoi iumun'aké tubunia, iabeuaké
sibabara ka tubunia. Paatu peité kam, tá
isoppi imalabó leleu simalio, kalulut sara
api sigoisó

⁶ Ka sia jalai néné, makeré sia
api. Pubakkanan pukakataí lé nia,
masisalúaké pukakataí ka sangaliot
tubutta. Api sibara ka narako lé ikakau
masilabó sangamberi purimanuaiatta

⁷ Patarime-tarimeu ka polak néné, iaté kelé tarimeu simasagbang, umá, tarimeu sipulalatá, samba paiba-iba, momoi itupauup, elé, arapaup'an sirimanua

⁸ Tápoi ka sia geti jalaira sirimanua néné, bulat tá momoi rapaup nia kasei pá. Bulat sikataí lé nia ka sia jalai néné, bulat sitaiagai Perú. Asut'an ka tubunia tuba, sipasimamateiaké

⁹ Katupakeiatnia jalaita néné, iaté, masisuráaké si Tuhan, samba masisuráaké Ukkuita; tápoi kakkau leú, pakeitangan leú et nia masipateleji saaleita sirimanua, sibaraakenen simakeré ka tubut Taikamanua

¹⁰ Ka tubut sara ngu-ngu bela rua tiboiet; iaté tiboiet pusurakat, samba tiboiet pateleiat. Tápoi bulat siripokatnia baí, bulat tá momoi kelé kisedda

¹¹ Elé kipa poi. Ai leú, ka sara bubuakat, mubuggra oinan simaleu, mubuggra leú et oinan simapongit

¹² Ale kam Sasarainangku. Tá ibubuaaké ka sia buat Zaitun loinat sileu. Kisedda leú et ka sia anggur, tá ibubuaaké buat sileu. Iageti bubuakat oinan simakaop leú et, tá ibubuggraaké oinan simaleu

¹³ Ké ai sia ka talagamui simasiku paatuat samba simaerú бага, buíta rapatoilá nia ka paraboarda simaerú; samba ka pasigagalaiakéra simaerú leú, kau sialei repet paatuat samba ka sikut paatuat

¹⁴ Tápoi ké geti matutu bagamui, elé mangú-ngú bagamui, samba sarat tubumui lé nupuuukú kam, buí nuumun'aké kam pusisikut paatuatmui néné, aipoí kalulut néné, pabailokmuian katuareman sibulatnia sibara ka Taikamanua

¹⁵ Aipoí tá ka tubut Taikamanua aibara sikut paatuat kelé néné. Sibara ka taikapolak lé. Iaté sibara kapubobot-bot akkulára sirimanua, samba sibara ka sanitu lé

¹⁶ Kaipa ikuddu putututut бага samba obat masipuukú sarat tubunia, sedda leú te kabaraia pulamagat samba sene ngamata galajet sikataí

¹⁷ Tápoi ka sia geti sisiló sikut paatuat sibara ka pata, muboikí takua nia néné maliná paatuatnia, samba leú iobá paaban, matopit ka paaleiat, sambat maredet nia ka nga-nga. Masut paatuatnia punununtut бага,

samba maigi abara simaerú sigalainia.
Tá maré-ré nia ka sisara, samba tá
mapatajuat tubunia

¹⁸Kirénangan pueerú néné, iaté
sibabara ka buat karamen paabanan,
sikarap'akenenda siobá paabanan!

4¹Kaipa kabaraiaitnia palabakat
samba pajoggolat ka talagamui? Tá
poi sibara ka pubobot-bot akkulámui
sitaipuaari pasaggak ka bagat
paatuatmui, ibesíaké iikep'aké
pusanangan ka polak

²Bulat ainukikiddiy kam, tápoi tá
babara. Oto kalulut néné, isiakémuian
pamatei! Ron pupaatuanan geti,
bulat ai ka kam, tápoi tá iaaili
siripot sipinaatumui; oto kalulut néné
pagolúmuian samba palabámuian leú et.
Bulat beri te sara tá babara nugagaba
kam, tá poí ainutitiddou kam ka tubut
Taikamanua

³Iageti kenanen baí anutiddouan kam,
ialeú et tá babara, aipoí ailiakenen
paniddogatmui tá aisese; siripot siobat
tubumui lé poí nutitiddou kam

⁴Bulat sitaimatopit lé kam néné! Kipa,
nuagai leú kam, ibailiu kam saggak

Taikamanua, ké maré-ré kam ka siobat polak néné

⁵Buí ka bagamui sitá paluluat lé aikua nia ka bagat Buko Sipunenan, sipasikukua kisé, "Ka tubutta néné ai aiaké Taikamanua ketsat sibesíaké teret eddet ka sipinaatunia.

⁶Tápoi kenanen kisedda galainia, panguruat Taikamanua siakénia ka tubutta peilé maron, ka tubut siobat ketsatta. Iaté lulunia ka Buko Sipunenan leú, ai atusurat'aké kisé, "Isasaggangi lé sia Taikamanua simaukat tubu, tápoi simarepé paatuat geti, ipukakateki sia бага.

⁷Oto reddet kam nga-ngan Taikamanua, iageti lawanmuian Sanitu, oto kaddiuakénangan leú et kam

⁸Legeri kam Taikamanua, bulé ilegeri kam ka kam, Taikamanua. Paliná kam kabeimui sigalaiaké sikataí, ale kam sirimanua sijo! Palatsat kam paatuatmui, ale kam simarua бага

⁹Kau bulat iolei bagamui samba pusou kam samba pului-lui kam; bulé gágámui néné, bailiu sou, iageti puangkakat bagamui bailiu pureuregat бага

¹⁰ Parepé kam paatuatmui ka tubut Tuhan, bulé ibuak'aké kam si Tuhan

¹¹ Ale kam Sasarainangku, buí nupajo kam katubu elé nupasele kam katubu. Aipoí sia sipasijojoaké sabagei, elé sipasiseseleaké saaleira pasasamba tai Kariten, kelé surukat Taikamanuangan lé te aijoaké, elé aiseleaké. Ké nuseleaké kam surukat Taikamanua, oto táan anureddet kam surukat nenda, tápoi aibailiuan lé kam hakimnia

¹² Aipoí sarat sara lé ai hak masiukum'aké samba masiadili sirimanua. Iaté Taikamanua sibara ka tubu gege masiarauaké elé masisubuaqué sirimanua. Oto kasonia poi kam néné, pat koí obámuian masiseleaké saaleimui pasasamba sirimanua

¹³ Anukua kam ale Sasaraina, "Gogoi néné elé matsep memei kai ka laggai anu. Burúmai sedda pajaga masigaba bulagat, ka bagat sangarura." Oto arep'aké peité kam nganturatku néné

¹⁴ Aponia pá sipuaaili ka tubumui matsep, tá nuagai kam! Aipoí kam néné, kelé kujuk lé, tulu lé imatoilá, tatá

¹⁵ Oto siripokatnia, kisé lé nukukua kam, "Ké iobá lé baí nia Taikamanua,

riu-riu peilé kupurimanua kai, samba kugalai kai néné, elé nenda.

¹⁶Tápoi kineneiget geti, anuumun'aké lé kam tubumui samba amasosot lé titiboatmui. Oto sangamberinia pusososot titiboat kelé néné, bulat tá pasese

¹⁷Aipoí sirimanua sijo lé sia tuooniaké, ké airaaagai masigalaiaké simaerú, tápoi tá ragagalaiaaké.

5¹Ale kam Sasarainamai simakayo! Arep'aké peité kam nganturatku néné. Kauan nupusou kam, elé kauan nupului-lui kam, aipoí mangongorik'an lé kam

²Amabutéan pukayoatmui. Bibiletmui leú et aigut-gut'an tabbubulut

³Emas sambat perakmui amakaop'an; kaopnia néné te ibabailiu saksi, ilawan kam samba ikokom tubumui pat pí-pí kelé api. Aipoí anururúaké kam pukayoatmui ka legret iaili gogoi kalepakatnia

⁴Tá anubaya kam upadda sipugagalai ka monemui. Oto kineneiget arep'aké kam hoi-hoira! Sia sipasimomonei buat siuremannu, kineneiget ai sia mugegerei masitiddou paromannu, samba gereira

néné aiarep'an Taikamanua, Tuhan
Sipulugege

⁵Bulat amulegeian erúnia
puririmanuamui samba anunanam'an
kam pusanangan ka polak néné. Tápoi
kéan lé ainumomó-móaké kam tubumui
ibara jájaket ka gogoi pasijájakat

⁶Anupaukumingan kam sia elé
anupamateian kam sia sitá anai sele,
samba tá aralawan kam

⁷Oto kalulut néné, ale kam sasaraina,
kau nuom'aké kam nia masiorik
pangoringan, teret iaili tetrenia
kaoijanan Tuhan! Itsó peité kam om
bagadda sipasigagalai mone, rangena
ibara buat siuremanda ka monenda,
kelé oniakenenda puuktunganda sabeu.
Raom'aké rangena ibelé urat ka rura
sigoisó samba ka rura sabeu

⁸Ialeú et kau imaom bagamui samba
kau imaabeu ka paatuatmui, aipoí
amalegrengan iaili kaoijanan Tuhan

⁹Bá putetetet kam, elé bá pasesele
kam katubu, bulé tá iukum'aké
kam Taikamanua. Tápoi néné lé
repdemenmui! Amalegrengan te nia si
Hakim, aipatarek'an tubunia ioi

¹⁰ Repdem peité kam kelé ka sia tai nabi sipungangantoman ka onin Tuhan. Maom bagadda samba maron paatuatda masiorik pangoringan. Oto sia te nenda nuuului kam ka kam

¹¹ Atuoniakéan sia simauktuk, kalulut ron paatuatda masiorik. Ialeú et anuarep'an kam puoom bagat Job. Kelé leú siagaimui, tá aisoppi aipanukani nia si Tuhan. Aipoí bulat simakopé nuntut бага samba simakopé erut бага lé nia si Tuhan

¹² Oto bulat siabeunia, iaté: Buí nupusuppa, elé ka onin manua, elé ka onin polak, elé ka onin apa páonia. Ké bulatnia "Oo", kuanungan oo, iageti ké bulatnia, "Tá", kuanungan leú et tá; bulé tá iukum'aké kam Taikamanua

¹³ Ké ai ka talagamui simareu-reu бага, kau rapaniddou ka tubut Taikamanua. Ké ai sia sipuaangká бага, kau rapuurai masiumun'aké Taikamanua

¹⁴ Ké ai sia simabesí, kau rasogai sipugagalai ka paamian, bulé ratiddouaké sia simabesí néné, ka tubut Taikamanua. Lepá lokot'akérangan leú et tula, masitulaji nia ka onin Tuhan

¹⁵Oto ké bulat sibara ka tonem bagadda ka tubut Tuhan Jesus baí nia, rasegéaké paniddogatda néné ka tubut Taikamanua, tá isoppi ialeaké nia simabesí néné, Taikamanua. Iageti jo sigalai nia leú, appéakénangan nia

¹⁶Oto kalulut néné, buítá nuseseaké kam jomui ka pasasambamui saalei, samba leú patiddouaké kam katubu ka tubut Taikamanua, bulé ialeaké kam. Aipoí bulat makopé gegenia paniddogatda sirimanua ka tubut Taikamanua, ké maredet sia ka teú bagania

¹⁷Si Elia ka sia, makeré lé pusisirimanuanta. Kelé aipaniddou ka tubut Taikamanua, bulat tubut sibara ka paatuatnia, bulé tá iaké urat, taibelénangan leú et urat, telu ngarura sitenga burúnia

¹⁸Lepá paniddounangan mitsá ka tubut Taikamanua. Oto akénangan uratnia mitsá manua, pat bara mitsá buat siureman ka mone

¹⁹Ale kam sasarinamai! Ké ai sia sara ka talagamui sitaibá masitut nganturat Taikamanua, lepá oi sia

sabagei masitoiliaké nia mitsá ka tubut
Taikamanua

²⁰ repdem kam ka sitususurat ka ruang
néné: Sipasitotoiliaké sara sirimanua
sijo, bulé ibauaké paatuatnia, nia té
sipasibebelaaké sirimanua sijo néné,
ka kamateiat, samba leú et kalulut
néné, bailiu maiginangan jo tuappéaké.
Hormatmai, Jakobus

1 Petrus

1 ¹ Alé kam Sasarainamai sapaamian sipiliy Taikamanua, sipukukuddu ka puekpangan ka laggai Pontus, Galatia, Kapadokia, ka Asia, sambat ka laggai Bitinia! Aku néné sipuoni si Petrus apostel Jesus Kristus, bulat aikukakaroni baga bulé iaké ka kam Taikamanua panukanan samba pabujaiat sipususukkra. Atupiliy kam bailiu sikauman Taikamanua siripot rencanat Ukkui Taikamanua. Samba aibailiuakéan kam néné, Ketsat Sipunenan, sapaamian sipunenan, sikokoiaakenen ka Taikamanua, bulé numareddet kam ka tubut Jesus Kristus samba ibui kam logaunia

² (1:1)

³ Kau takua kam surá ka tubut Taikamanua, Ukkui Tuhanta Jesus Kristus! Bulat makopé nuntut bagania ka tubutta, iaté lulunia aiaké ka tubutta purimanuaiat sibau, ka pasisusuruakéna mitsá Jesus Kristus ka simamatei. Oto néné te masiaaké ka sita pukakaronan simaron

⁴Takaroni kam бага, bulé tabakkati kam panukanan sinarek'akenen Taikamanua kaunennia ka sapaamiannia, iaté panukanan sikoiríakenennia ka manua, bailiu tá makakataí, elé tá mabubuté elé tá ilelebbei

⁵Ka kam te sangamberinia nenda, kalulut tonem bagamui ka tubut Taikamanua. Oto kam néné, jagonangan kam geget Taikamanua, bulé nusiló kam puaragat simatatarek, patoilaketnia ka gogoi sialu

⁶Kalulut néné, kau imagora bagamui, kenanen baí kineneiget ka oggak néné, buítá mureu-reu kam бага, kalulut iginia nuorik kam sene ngamata pasisiboat

⁷Nenda geti ibabara kelé néné, iaté masipatoilá, kipa bulat matonem leú pá bagamui ka tubut Tuhan, elé tá. Beringan koí emas smakataiket, tuuji nia ka api. Oto tonem bagamui peilé makopé kepput saki ka emas, oto buítá tuuji leú et nia ka sia, bulé imaron. Samba kalulut nenda, bailiu tuumun'aké samba tuhormati samba tuabeuaké kam ka gogoi kaoijanannia mitsá Jesus Kristus

⁸ Manuntu bagamui ka tubunia, kenanen baí siburú tá anuitsó kam nia. Samba kineneiget mitsá matonem bagamui ka tubunia kenanen tá ainuiitsó kam nia kineneiget. Iaté lulunia numagogora kam бага, samba iagai tubumui angkat бага sabeu sitaioi tukua

⁹ Aipoí ailiakenen tonem bagamui asegeán, iaté puaragat ketsatmui

¹⁰ Puaragat kelé néné te ratataiko samba rabebesiaké ka sia tai nabi samba arapatup-tup pagalaiat panukanan akenen Taikamanua ka tubumui

¹¹ Arabesiaké geti rataiko nia, bulé raagai kipa tubunia samba pigamoi ipuaaili sangamberinia néné, kelé sipinaatut Ketsat Kristus sikukuddu ka bagat paatuatda. Ka tetret nenda pusiblanangan Ketsatnia ka tubudda, pagalaiat pangoringan siloketda kalulut Kristus sambat pulatsanannia siooi ka tei-tei, lepá itulettu sangamberinia

¹² Ka tubudda leú et ka sia tai nabi aikua ka matadda, sangamberi sigalaiakenenda, tá uktukra tápoi uktuknu lé: iaté kelé siarepmui simakolou kineneiget sibara ka tubudda sipaarep Katuareman Simaerú pagalaiat

tubut Jesus Kristus. Ka geget Ketsat Sipunenan lé arasegéaké nia ka tubum sikoiniakenennia sibara ka manua. Mandé ka sia tai malaika leú et raobá raagai katuareman pagalaiat katuareman simaerú sipakakaradda néné

¹³Oto kalulut néné, buítá matarek tubumui. Kau nupanuksuk kam samba kau mamuiné nukaroni kam panukanan Taikamanua ka tubumui ka tetret ioi Jesus

¹⁴Kau numareddet kam ka nga-ngan Taikamanua, buí nupuparaboat kam kelé siobat bagamui siburú, kelé ka tetret tápei anuagai kam nia Taikamanua

¹⁵Tápoi kau lé numaliná kam ka sangamberinia sigalaiakenenmui, kelé liná nia ka sia Taikamanua sipasisosogai kam

¹⁶Ka Buko Sipunenan ai atusurat'aké kisé, "Buítá numaliná kam ka kam, aipoí simaliná lé aku kaku.

¹⁷Ka tetret ai kam maniniddou ka tubut Taikamanua, kuamuian nia Ukkui. Oto Taikamanua nenda te masihahakimi sirimanua siripot sigalaiakenennia, samba bulat tá irarasei sirimanuania. Oto kalulut néné, ka burut

puririmanuamui peilé ka polak, buítá nuabeuaké kam onin Taikamanua ka bagat purimanuaiatmui

¹⁸Nuagai leú kam, aponia atukau panebuimui, masibelaaké kam ka puririmanua siboboi, siikep'akenenmui sibara ka taikebbukatmui. Tá te apa pá atukau panebuimui, simalabbei makataí, kelé perak elé mas

¹⁹tápoi simakopé kepput saki lé; iaté bulat tubut Kristus, sibailiu kelé biri-biri sibuluakenen ka tubut Taikamanua, sitá anai kuat tubu, elé loloiet

²⁰Tápei aibaraaké polak néné Taikamanua, aipiliyan nia Taikamanua, Kristus néné. Samba kei iaili kalepakatnia, oi nia ka polak néné, bulé ipaarau kam

²¹Kalulunia te anumatonem kam бага ka tubut Taikamanua, sipasisusuruaké nia mitsá ka simamatei, samba latsat'akénangan leú nia. Oto Taikamanua lé katonemi kam бага, samba ka tubut Taikamanua leú nupukakaronan kam

²²Kalulut reddetmui ka nganturat Taikamanua, lináakémuian tubumui, samba pukatekimuian sia бага saalei

sikeré putotonem бага, bulat sibara ka linat paatuatmui. Oto kau nupukaté kam бага pasasambamui bulat sibara ka sangamuinet paatuatmui

²³ Aipoí kalulut tiboiet Taikamanua sipuririmanua samba sitaitatátá, bailiunangan kam sirimanua sibau, tá sipututú-tú mata ka sirimanua, tápoi sibara ka Ukkui sitaitatátá lé

²⁴ Ka Buko Sipunenan ai atusurat'aké kisé, "Kelé turu-turu lé sia sangamberi sirimanua, samba sangamberi pulatsanannia kelé bobotsoket turu-turu lé. Malajú lé ka sia turu-turu, bobotsoketnia leú et laju

²⁵ tápoi tiboiet Tuhan geti riu-riu lé teret buru-burú." Tiboiet néné, iaté Katuareman Simaerú sipinaarep ka tubumui.

2¹ Oto kalulut néné, ribbaiaké kam ka tubumui sangamberinia sikataí. Buían nupabokoí kam, buí imapatajuat tubumui. Buí imaoro matamui, samba buí nupaloloi kam sirimanua

² Buítá kelé tatoga sigoisó sipututútú mata sibau kam néné, sarat irepdem bagania muló suat tot-tot puketsanan

simamurni. Kalulut néné puuraumuian
samba silómuian puaragat

³ Ka Buko Sipunenan leú, ai atusurat'aké
kisé, "Bulat tubumuian amasipuuktungi
bulat kopet pueerúnia si Tuhan.

⁴ Oto kalulut néné, kenan kam
nutaget'aké kam nia si Tuhan. Kelé
bukkú sipuririmanua lé nia, iaté bukkú
siribbaiakenenda sirimanua, kalulut tá
anai kaura nia; tápoi sipiliy Taikamanua
lé nia, kelé bukkú simakeppu saki

⁵ Kam leú et ka kam, kelé bukkú
sipuririmanua leú et. Oto kauan
obáan kam ipakei kam si Tuhan
masirióaké uman Taikamanua siripot
ka puketsanan. Oto bailiu kam néné
imam-imam, sipuririmanua simakokoi
ka matat Taikamanua, samba ka onin
Jesus Kristus, nubuluaké kam ka
tubut Taikamanua, buluat puketsanan
sipasesese ka bagat Taikamanua

⁶ Aipoí ka Buko Sipunenan, ai
atusurat'aké kísé, "Akupiliyan sara
bukkú simakeppu saki, galak'akenenku
ka Sion, sibailiu bukkú bonggan inan
arigi; tá tupabubuji bagadda simatonem
baga ka tubunia.

⁷ Bulat makopé kepput sakinia bukkú néné ka tubumui simatonem бага. Tápoi ka sia geti sitaimatonem бага, oraknangan kelé ka sikuania ka ruang Buko Sipunenan sipasikukua kisé, "Bukkú taipapakeietda tai tukang aibailiu nia bukkú bongan inan arigi.

⁸ Samba "Iaté nenda bukkú, sisok-sok reredda sirimanua, sikau rabelé." Ratusosok-sok geti, kalulut taimatonem bagadda lé ka tiboiet Taikamanua. Oto kiseddangan té siteúakenen Taikamanua pagalaiat tubudda ka sia néné

⁹ Tápoi kam geti ka kam, bangsa sipiliy Taikamanua lé kam, imam-imam sipuukú tai rimata, bangsa sipunenan, sikokoiaenen ka Taikamanua, paamian bakkat Taikamanua. Aipiliy kam Taikamanua samba aisogai kam, nubela kam ka pugep-geman, nutugurú kam ka bagat toronia simalatsat, bulé nupaarep kam katuareman pagalaiat sigalaiakenennia bulat kiseiet sabeu

¹⁰ Siburú, kam néné, tá sikauman Taikamanua. Tápoi kineneiget geti aibailiuan kam sikauman Taikamanua. Siburú tá makaté bagania Taikamanua

ka tubumui; tápoi kineneiget geti,
anusilóan kam panguruat katet bagania

¹¹ Ale kam Sasarainamai simanuntut
bagamai! Taitoi sambat sipueekpak lé
kam ka polak néné. Oto kalulut néné
kutiddou simaron ka tubumui, bulé tá
nutut'aké kam pubobot-bot akkulára
sirimanua, sitaitatakkí pasaggak
masilawan ketsat

¹² Buítá bulat maerú paraboatmui
ka talagadda sirimanua sitaiagai si
Tuhan, baleú iipó rapaloloi kam rakua
kam sirimanua sikataí, kalepakatnia
seseakérangan leú et sigalaiakenenmui
simaerú, pat umunrangan leú et
Taikamanua ka tetret kaoijanannia

¹³ Ka onin Tuhan, kau numareddet
kam nga-nganda pamarenta siutéaké
sirimanua; elé ka tubut Kaisar uté sabeu

¹⁴ elé ka tubut gubernur sipauddet
Kaisar sipasiuukum'aké sirimanua sijo
sambat sipasihohormati sirimanua
sigalaiaké simaerú

¹⁵ Aipoí siobat bagania ka
sia Taikamanua, bulé kalulut
sigalaiakenenmui simaerú, bailiu
pet-petmuian ngu-ngunda sipaninibo
sitaipaatu

¹⁶ Kau puririmanuamui néné siripot puririmanuanda sipuuja, samba buí nupakei kam puujaatmui néné masitabbó kataímui, tápoi kau lé nupuparaboat kam siripot puparaboananda sapagugulet Taikamanua

¹⁷ Kau nuhargai kam sangamberi sirimanua, samba kau imanuntu bagamui ka tubudda sasarainamui pasasambamui tai Kariten. Kau nukalotóaké kam Taikamanua, samba kau nuhormati kam si Kaisar

¹⁸ Ale kam Sasarina sipuoni pagugulet, kau numareddet kam ka nga-nganda tai majikanmui, bulat sibara ka hormatmui simasut; tá sarat ka tubudda tai majikan simaerú бага, elé simaleppe бага, numahohormat kam, tápoi sambat ka tubudda leú et tai majikan sikataí pugegege

¹⁹ Isusukat'ake kam Taikamanua, ké kalulut agaimui kolounia siobat bagat Taikamanua, om'akémuian masiorik sigalaiakenenda sitaimaadil ka tubumui

²⁰ Aipoí aponia uktukmui ké nuom'aké kam masiorik ukuman, tápoi mateú nusiló kam ukuman nenda, kalulut sele sigalaimui? Tápoi ké nuom'aké

kam masiorik ukuman siorak'akenen
ka tubumui kalulut gagalaiakémui
simaroipo, panukaninangan kam
Taikamanua

²¹ Iaté lulunia aisogai kam Taikamanua.
Aipoí amangorik'an Kristus kalulumui,
oto ka enungan nenda akénangan ka
kam uluiet, bulé nutut kam sienungi nia

²² Bulat beri aigalai jo, samba beri sia
sipasiaarep aipaboko

²³ Ka tetret airapakukuaji nia, bulat beri
pulangajina sia ka sia. Ai nia mangongorik,
beri pugegenia; tápoi sarat ka tubut
Taikamanua lé aisegéaké sangamberi
pakaronia, kelé Hakim simaadil

²⁴ Tubunia lé Kristus aibairat jotta
ka loiná siliktenga, bulé tabela kam
ka kup-kumen jo, tapuparaboat kam
siripot obaket bagat Taikamanua. Maujut
Kristus lé aialeaké kam

²⁵ Kam néné siburú, kelé biri-biri
simapepepe lé kam, tápoi kineneiget geti
aitoiliakéan kam mitsá, bulé nutut kam
Sipasijajago samba Sipasikeli ketsatmui.

3 ¹ Oto kisedda leú et ka kam
tainanalep, buítá maredet kam ka
taimanteumui, bulé ké ai ka talagadda
sitaimatonem бага ka tubut katuareman

sibara ka Taikamanua, oto paraboatmui nenda te ikakau sia mutonem бага. Samba tá leú nukukua kam apa pá ka tubudda

² ai lé poí raiigbuk paraboatmui simaerú, samba surúmui ka arat

³ Buí sarat ka simatotoilá lé pulalaingen tubumui, kelé masipatulai alai, elé masipakei pulaingeat, elé masipakei bibilet simakeppu saki

⁴ Tápoi buítá ka bagat paatuatmui lé ibabara pulaingeat tubumui, iaté pueerut paraboat ka leppet бага, samba ka aban бага. Iaté nenda pulaingeat simatom, sipasesese ka matat Taikamanua

⁵ Kisé te aragalaiaké ka sia tainanalep siburú, simasurú ka arat, sipukakaronan ka tubut Taikamanua, rapalainge tubudda ka purereddetra ka taimanteura

⁶ Ka sia si Sara, kisedda leú et aigalai, mareddetnia ka tubut Abraham, samba ioniaké nia tuannia. Oto kam ka kam leú et kineneiget, tatogat Sara lé tuooniaké kam, ké nugalaiaké kam simaerú samba tá malotó kam ka tubut apa pá

⁷ Ialeú et kam taimanteu, kau bulat nuagai kam murimanua ka tubudda tainanalepmui, ka agaimui kolou, ka sia

tainanalep néné, simaluluk tubu lé. Oto surú kam sia, aipoí ai lé sia ka tubumui, samba rasisiló panguruat sibabara ka Taikamanua, iaté puririmanua sipulelelek. Oto galaiaké kam néné, bulé tá bara sisaila paniddogatmui

⁸Oto katumuinekatnia, iaté: Kau imakeré bagamui samba paatuatmui. Kau nupanuntu kam бага pasasambamui kelé sipusasaraina. Samba kau nupakaté kam бага samba imarepé paatuatmui

⁹Buí nusiliaké kam jo silit jo, elé laga silit laga; tápoi tiddou lé kam panukanan sibara ka Taikamanua, kelé silinia. Aipoí aisogai kam Taikamanua, bulé nusiló lé kam panukanan sibara ka tubunia

¹⁰Ka Buko Sipunenan leú et, ai aikua kisé, "Kasei siobá masinanam puririmanua samba masipuuktungi gogoi simaerú, kau ijago ngu-ngunia, bulé tá ikua sikataí samba tá imuneng'aké boko

¹¹Buíta iareuaké tubunia ka sikataí, samba igalaiaké simaerú; buíta bulat malelek iperjuang'aké ibara paabanan

¹²Aipoí mariu-riu lé iritúaké sia Taikamanua, siobá masitut siobat bagania, samba mariu-riu lé iarepi

paniddogatda si Tuhan tápoi isasaggangi lé sia si Tuhan sigalai sikataí.

¹³Kasoniangan lé iobá igalai sikataí ka tubum, ké magou-gou bagamui masigalaiaké simaeru

¹⁴Tápoi kenanen baí mangorik kam kalulut gagalaiakémui simaerú, mauktuk kam! Buí numalotó kam ka tubudda kasei pá, samba buí imakarat bagamui

¹⁵Tápoi ka bagat paatuatmui, kau nukau penghormatan simakokoi ka tubut Kristus siripot puoninia si Tuhan. Samba buítá mariu-riu tarekmui masialegi sia sangamberi sipasinonou-nou ka tubumui pagalaiat pukakaronan бага siikep'akenenmui

¹⁶Tápoi buítá ka leppet бага samba ka hormat nugalaiaké kam nia. Samba bulé maliná pupaaturanmui, bulé ké rapakataí nga-nga ka tubumui kalulut lelek puririmanuamui siripot puonimui sipasiului Kristus, bailiu mailaddangan sipakataí nga-nga ka tubumui

¹⁷Oto maerú peilé nupangorik kam, kalulut gagalaiakémui simaerú, ké iteúaké baí nia Taikamanua, buí lé nupangorik kam, kalulut gagalaiakémui sikataí

¹⁸ Kalulut ka sia Kristus sarat sangamitsá lé aimatei, tápoi teret buru-burú katukaunannia, kalulut jodda sirimanua; samba bailiu matei sara sirimanua sitá anai jo, kalulut sirimanua sijo. Aigalaiaké kelé kisedda Kristus, bulé ioi ipalulu kam nuei kam ka tubut Taikamanua. Atumateiaké nia siripot ka putubuat, tápoi aturimanuaaké nia mitsá siripot ka puketsanan

¹⁹ Ka bagat ketsat, ei nia masipaarep katuareman sibara ka Taikamanua ka tubudda paketsa-ketsat sipenjaraakenen

²⁰ iaté ketsatda sitaimareddet ka tubut Taikamanua ka tetret Noak. Ka tetret nenda, bulat aiom'aké Taikamanua ingena teret lepat igalai kapania si Noak. Oto sarat sia sikukuddu ka kapá, iaté igidda sangamberidda, ai sia balu, atubelaaké ka eba sabeu

²¹ Oto sibabara nenda, tupasikat'aké nia ka tubut pasiraukat kineneiget, sipasiaarauaké kam. Pasiraukat néné, tá punen pasilinkat tubu ka sangamberinia pulolinan, tápoi kelé palelengannu lé, ka tubut Taikamanua, sibara ka bagat paatuatnu ka бага simaerú. Pasiraukat

néné iaté masipaarau kam kalulut katususurut Jesus ka simamatei

²²samba atusakaian nia ka manua.

Kineneiget aian nia muuté sambat Taikamanua, masiutéaké sangamberi malaika, sangamberi sauté samba sangamberi sibara gege.

4¹Amangorik'an poí nia ka sia Kristus ka putubuat, oto kam leú et ka kam, buítá nuparon kam ka kam paatuatmui kelé pupaaturan nenda. Aipoí sia sipangongorik ka putubuat, táan te ragagalai mitsá jo

²Oto kau ipaakkup puparaboananmui ka gogoi sibabara ka polak néné, kelé siripot obaket bagat Taikamanua, buí kelé ka siripot obaket bagadda sirimanua

³Siburú, bulat amaburúan anugalaiaké kam galajet siripot siobat bagadda sipuarat sabulungan. Tá maerú puririmanuamui. Siripot pubobot-bot akkulámui lé nugagalaiaké kam, iaté mupuineng, mupunen sabeu, muló, samba masibuluji sabulungan ka enungan kasit-sit'akenen

⁴Tápoi kineneiget geti, bulat amakiseian ka bagadda sipuarat sabulungan ka tubumui, kalulut taitutut'akémui galai

tubudda, masinanam jo sitaiaatuakenen.
Iaté lulunia rapalololoi kam

⁵Tápoi rapepertanggung jawab'aké
te ka tubut Taikamanua, simatarek
masiadili sipuririmanua sambat
simamatei

⁶Iaté lulunia aitusegéaké Katuareman
Simaerú néné ka tubudda sirimanua
simamatei. Bulé sia siadili siripot ka
putubuat, kelé pagalaiat sangamberi
sirimanua buítá tuadili, bailiu murimanua
siripot ka puketsanan, sipasesese ka
siobat bagat Taikamanua

⁷Iaailingan lé te katukappulatnia
sangamberinia. Oto kalulut néné, kau
nukera kam tubumui ka sikataí, samba
nupanuksuk kam, bulé ioi nupaniddou
kam

⁸Bulat ka uddut sangamberinia,
kau bulat nupakaté kam бага
pasasambamui, kalulut ké apakatéan
kam бага pasasambamui, bailiu
matarekmuian leú te paappé jo
pasasambamui

⁹Kau nusiló kam kaoaira saalei ka
lalepmui sene-senemui, tápoi tá ka sanet
paatuat

¹⁰ Aipoí kam sangamberimui anusilóan kam panguruat sitaimakeré sibara ka Taikamanua. Oto siripot sipuoni sipasikeli sipulelelek panguruat Taikamanua, kau nupakei kam puaagaimui néné, sibailiu puuktunganmui simakeré

¹¹ Sia sipakakra katuareman simaerú, buítá rapakakakra katuareman simaerú sibara ka Taikamanua; sia sipuukú sabagei, buítá rapasikeli sia, siripot ron sibara ka tubut Taikamanua, bulé ka sangamberinia, onin Taikamanua tuumun'aké, kalulut Jesus Kristus. Aipoí nia lé sibakkat gege simateú umun'akenen teret buru-burú. Amen

¹² Ale kam Sasarainamai simanuntut bagamai! Kineneiget bulat ai kam mangongorik simakopé, kalulut aituuji kam. Tápoi buí imakisei ka bagamui, nupaatu kam kelé ai sibabara bulat simakopé, ka tubumui

¹³ Tápoi siripokatnia muaangká lé kam бага, kalulut aian kam ka kam mangongorik sambamui Kristus. Oto ké atupatoiláan baí pulatsanan Kristus, sedda peité puangkámuian бага

¹⁴ Mauktuk te kam ké rapaloloi kam kalulut puoonimui sipasiului Kristus.

Nenda te masipatoilá kababaranian Ketsat sipulubeunan, iaté Ketsat Sipunenan, ka tubumui

¹⁵ Buí lé ibara ka talagamui sipango-ngorik kalulut pasimamateiakéna sirimanua, élé pananangkou nia, élé kalulut kataí paraboatnia, élé kalulut ialá galajetda sabagei

¹⁶ Tápoi ké geti kalulut pu-Kakaritenmui nupangorik kam, buí numaila kam kalulut nenda. Kua lé kam surá ka tubut Taikamanua, kaooinia nusegéaké kam onin Kristus

¹⁷ Aiailingan te tetrenia iadili polak néné, Taikamanua. Iaadili boikí, iaté sapaamian Taikamanua. Oto ké ka tubutta boikí itaddaaké nia, kipangan lé muaaili ka tubudda ka sia sitaimatonem бага ka tubut Katuareman Simaerú sibara ka Taikamanua

¹⁸ Ka Buko Sipunenan ai atusurat'aké kisé, "Ké beringan sia sirimanua simaerú paraboat amabesían itupaarau sia, kipangan pá muaaili ka tubudda ka sia sirimanua sijo, sitaiagai si Tuhan!

¹⁹ Oto ké ai sia sipango-ngorik ka teú bagat Taikamanua, buítá rapuparaboat simaerú, samba rasegéaké tubudda

ka tubut Sipasibabaraaké sia. Aipoí mariu-riu lé ipuaili sitonéakenennia.

5¹ Bulat kutiddou simaron ka tubudda siutéaké paamianmui. Kugalai surat néné, siripot saalei siutéaké paamian sambat siripot aku, bulat sipasiiigbuk bulat tubukku, pangoringan Kristus, sambat latsat'akenen leú et, ké atupatoiláan pulatsanan Kristus ka tubudda taikapolak. Kutiddou simaron ka tubumui

² bulé nujago kam mungkuat biri-biri sisegéakenen Taikamanua ka kabeimui. Pasikeli kam sia ka angkat бага siripot ka siobat banget Taikamanua, buí siubbuakenen. Samba buí nugalaiaké kam galajetmui néné, kelé pasigagabamui uktukmui, tápoi kau lé bulat sibara ka teú bagamui

³ Buí nuputuan kam tubumui ka tubudda sisegéakenen Taikamanua ka kabeimui, tápoi kau lé ibailiu kam uluietda

⁴ Oto ké amoian geti nia Sipasijajago Sipulubeunan, silómuian kirit purimataat simalainge, sitaimalelebbbei pulatsanannia

⁵ Oto kisedda leú te kam ka kam alé Sasarainamai, kam sibau tubu. Kau

numareddet kam ka tubudda sikebbukat. Buítá nuparepé kam paatuatmui, samba kau nupaletsei kam katubu ka repet paatuat. Aipoí ka Buko Sipunenan ai atusurat'aké kisé, "Isasaggangi lé sia Taikamanua, simabuak paatuat, tápoi ka tubudda geti simarepé paatuat, makaté bagania.

⁶Oto kalulut néné, kau nuparepé kam paatuatmui ka tei kabei Taikamanua simaron, bulé ibuak'aké kam ké iaili tetrenia

⁷Segéaké kam sangamberinia pureuregat bagamui ka tubut Taikamanua, aipoí nia lé simatamli ka бага masipasikeli kam

⁸Buítá nupanuksuk kam samba kau imatarek tubumui! Aipoi saggakmui iaté Sanitu. Ka sia néné kelé singa lé nia kaipa iobá ei; ai nia muuukkú ipunau, aigagaba sagbangennia

⁹Lawan kam nia ka tonem bagamui simaron, kalulut kelé siagaimui, saaleimui leú et sabagei tai Kariten, ka sangaliot polak, kelé kam leú et rapangorik

¹⁰Tápoi lepá nupangorik kam ka oggak siteté néné, iapeité bulat

tubut Taikamanua simanuntu бага ka tubutta masisusut'aké kam ka sangamberinia. Nia té masipauudet samba masiparoron kam sambat masipababakap puririmanuamui. Aipoí nia ka sia Taikamanua, simakopé erut бага lé nia, sipasisosogai kam masipuuktungi pulatsanannia simatom, kalulut Kristus

¹¹ Nia te sibakkat purimataat teret buru-burú! Amen

¹² Akugalai suratku siteté néné ka tubumui, iaté ka paroman Silas, oniakenenku sarainangku tai Kariten simatopit. Kuobá kutubbui kam samba masipatonem bagamui ka sangamberinia sisurat'akenenku néné, iaté katuareman bulat sibulatnia, siorak ka pagalaiat panguruat katet bagat Taikamanua. Oto kau nuomet'aké kam simaron panguruat katet bagat Taikamanua néné

¹³ Beri leú et ka sia saalei, sisangapaamian ka Babilon, sipiliy Taikamanua leú et, segé salamra ka tubumui; samba salamnia ka sia togakku si Markus simanuntut bagakku

¹⁴ Kau nuparoro kam pasasambamui, bulat sibara ka nuntut bagamui, siripot

sipuooni sasaraina tai Kariten. Bulé ibujai
kam si Tuhan, kam sangamberimui,
sipuoni bakkat Kristus. Hormatmai,
Petrus

2 Petrus

1 ¹ Ale kam sasaraina, bulat simatonem
baga ka tubut Jesus Kristus, kelé
kai néné! Jesus Kristus iaté Taikamanua
Rimata Sipaarau sita lé, aibaraaké
tonem bagatta ka tubunia, kalulut roipot
sigalainia. Surat néné iaté sibara kai
Simon Petrus, sara pagugulet samba
apostel Jesus Kristus

² Bulé isukat'aké samba ibujai kam
Taikamanua sipususukkra, kalulut
agaimui Taikamanua sambat Jesus
Tuhanta

³ Aipakeian Taikamanua gege pu-
Taikamanuaatnia, iaké ka tubutta
sangamberi besiakenenta, bulé
tamasurú kam ka arat. Aigalaiaké
nia néné, iaté ka siripot puaagaita
pagalaiat Jesus Kristus, sipasisosogai
sita masipuuktungi pubebeunan samba
pueerut bagania

⁴ Ka enungan kelé nenda te
aipanguruani sita Taikamanua,
panukanan simakopé beunan, sambat
simakopé kepput saki, kelé ka

sitonéakenennia. Ka panukanan néné te, aioi anubela kam ka pubobot-bot akkulá sikataí, sikau tumakataí ka polak néné, iageti silómuian galai tubut pu-Taikamanuaat

⁵Oto kalulut néné, bulat besíaké kam sipulelelek imariu-riu tonem bagamui ka tubut Kristus, samba putotonem bagamui néné leú, kau isopo nia puparaboananmui simaerú. Ka puparaboanan simaerú néné leú et, buíta nubesíaké kam ibailiu kam sirimanua sibara puaagai

⁶ka puaagaimui néné leú et, buíta leú bara surut tubumui. Ka pusususurut tubu néné leú et, buíta nuubui kam tubumui muom бага масіорік сaгaмберініа сіооі ка tubumui, samba kau leú nupuparaboat kam siripot sipasesese ka bagat Taikamanua

⁷Pupaparaboat siripot sipasesese ka bagat Taikamanua leú et, buíta isut'aké nia punununtut бага ка tubudda sasaraina sikeré tonem бага. Iageti mitsá, bulé punununtut bagamui ka tubudda sasaraina sikeré tonem бага néné leú, kau ituppai nia mitsá siorak

ka punununtut bagamui ka tubudda sangamberi sirimanua

⁸Sangamberi galai tubu kelé nenda te besíakenen babara ka tubumui. Oto ké bara galai tubu kelé nenda ka tubumui, sipububura kopet iginia, iapeité ibara besit ka bagamui samba bara buat sigalaiakenenmui, samba kokkopé kolou ka bagamui, pagalaiat tubut Jesus Kristus Tuhanta, bulat sipulelelek

⁹Tápoi ka sia geti sitá anai galai tubu kelé nenda, tá makeru pupaaturanannia; mapeket lé matania sambat aikalipogingan katupalilinat jonia siburú

¹⁰Oto ale kam Sasaraina, bulat besíaké kam simakopé, bulé pasogaiat Taikamanua samba pamiliyatnia ka tubumui, memei makokopé ronnia. Ké baí nugalaiaké kam nia kelé nenda, taisok-sokmuian tei-teimui mutonem бага ka tubut Jesus Kristus

¹¹Kalulut néné akénangan ka kam Taikamanua, hak simasut, tugurú ka Purimataat simatom sibara kai Tuhan, elé sibara ka tubut Rimata Sipaarau sita, iaté Jesus Kristus

¹² Néné te lulunia tá ipuaari kuparepdem kam ka pagalaiat nenda, kenanen baí aian nuaagai kam samba makopé ron tonem bagamui ka ngantoman Taikamanua, sisilómui

¹³ Ka burut puririmanuangku, bulat mateú lé kuparepdem kam pagalaiat sangamberinia néné

¹⁴ Aipoi akuagaian táan mauuju kukaddiuaké polak néné, kalulut bulat amakolouan aikua nia ka matakku Tuhanta Jesus Kristus

¹⁵ Oto mariu-riu lé bulat kubesiaké nia, bulé kenanen ailangóan aku, tápoi riu-riunia lé nurepdem kam nia mitsá sangamberinia néné

¹⁶ Ka tetret akusegéaké kai nia ka matamui, kipa kopet latsatnia kaoijanan Tuhanta Jesus Kristus, tá sialámai ka pungu-nguan sipinabaradda sirimanua. Aipoí bulat tubumaian lé, amasiitsó pulatsanan Kristus néné

¹⁷ Ai kai sedda aihormati samba ailatsat'aké nia Ukkui Taikamanua. Ka tetret nenda maarepnangan nga-ngania Sipulubeunan, sipasikukua ka matania kisé, "Nia té néné Togakku, kilibet bagakku, samba siobat bagakku!

¹⁸ Bulat tubumai amasiarep nga-nga néné, sibara ka manua ka tetret ai kai sambamai ka uddut leleu sipunenan

¹⁹ Iaté lulunia bulat kukakatonemi kai nia бага patonekat Taikamanua ka sisegéakenenda tai nabi. Oto maerú nulelek'aké kam nia ka kam, patonekat néné, aipoí patonekat néné, bulat kelé alito siputotoro ka simagep-gep, teret belat sulu, sambat kelé torot panyanyat usutat siputotoro ka bagat paatuatmui

²⁰ Bulat repdemenmui siboikí, iaté: Patonekat Taikamanua sisegéakenenda tai nabi, tá momoi nupakolou kam nia siripot sipinaatumui saramui

²¹ Aipoí tápei ataagai kam, aitupaarep patonekat Taikamanua néné, siripot ka teú bagadda sirimanua. Tápoi Ketsat Sipunenan lé, ipalululu sia rapasisesegéaké' patonekat Taikamanua néné.

2¹ Siburú ka talagat paamian Taikamanua, abara sia tai nabi sipatataju. Kisedda leú te ka talagamui ka kam néné, babara te sia tai guru sipatataju. Raaaké te nganturat sipasipepe sikau kasubuatda sirimanua. Raputatatá te Sipulugege sipasitetebui

sia. Kalulut néné arabaraakéan te kasubuatda. Samba ipuaili ka tubudda néné simaola lé

²Tápoi kenanen kisedda, bulat maigi sia sipasitutum'aké galai tubudda tai guru sipatataju néné, sipinalulut pubobot-bot akkulára. Samba sigalaiakenenda tai guru sipatataju néné, masikau sirimanua masipaloloi Enungan Simaroipo sisesege ka tubut Taikamanua

³Kalulut alau bagadda, tiboirangan leú et pungu-nguan sipinabaradda saradda, bulé ibara uktukra sibara ka tubumui. Tápoi amaburúan aitupatarek pengadilan sipasioorak'aké ukuman ka tubudda, samba kasubuat siteúakenen ka tubudda leú et, aian ingengenaaké sia

⁴Aipoí beringan leú sia samalaika sijo, tá leú et iooreaké Taikamanua, ratukatsli ka ukuman, tápoi turiribbaiaké lé sia ka narako. Tugugurúaké te sia ka guluggú simagep-gep, rakuddu sedda teret iaili Gogoi Pengadilan Taikamanua

⁵Kisedda leú te ka sia polak néné siburú, tá leú et aiobáaké ratukatsli ka ukumannia. Ka tetret nenda baraakénangan leú et eba ka polak ka kudduatra sirimanua sijo. Sarat

si Noak sambat sia sabagei sipitu lé,
amurimanua, kalulut paaarepna si Noak
pagalaiat puririmanua sipasesese ka
bagat Taikamanua

⁶Makeré lé nia kelé laggai Sodom
sambat Gomora: Aibeléaké api
Taikamanua isubuaké laggai néné, bulé
ibailiu nia kirekat sipuaaili ka tubudda ka
sia sirimanua sijo

⁷Tápoi ka sia geti si Lot, tá atusubuaké
nia, kalulut tutut'akéna siobat bagat
Taikamanua; bulat amangorik'an nia ka
paraboatda sitaimatéú, sia sigalaiaké
kasit-sit'akenen

⁸Kukuddu nia si Lot simatopit néné ka
talagadda sipuparaboat kelé nenda, bulat
amabesían paatuatnia, kalulut senen
gogoi iitsó sambat iarep sigalaiakenenda
sikataí

⁹Oto ai lé iaagai galaiakenennia si
Tuhan, masibelaaké sia situt'aké siobat
bagania, ké bara pasisiboat ka tubudda.
Samba iagai leú et si Tuhan, masikoiriaké
sia sirimanua sikataí paraboat, paoreet
ka Gogoi Pengadilan

¹⁰iaté bulat sia sirimanua situt'aké
pubobot-bot akkulára simalolit sambat
sipaloloi geget Taikamanua. Bulat

makopé rot bagadda sambat buak
paatuatda tai guru sipatataju néné, pat
beri gí-gíra masipaloloi makluk siabeu
tiboi tubu ka manua

¹¹ Beringan samalaika sisaliu peilé
ron samba gegedda ka tubudda tai
guru sipatataju néné, tá maró bagadda
masijoaké makluk siabeu tiboi tubu
ratiboaké nga-nga paloloiat ka matat
Tuhan

¹² Tápoi ka sia geti tai guru sipatataju
néné, bulat apanganté onia! Bulat
kelé tarimeu lé sia tú-tú matania, lepá
labá itumateiaké. Bulat tá rapaaatu,
tápoi tenan lé sia galaiaké kelé siripot
siubui tubudda lé, pat saggangiddangan
pagalaiat taiaagaietda ka tiboi et
paloloiat. Oto kalulut sigalaiakenenda
néné, bailiu tusubuaké sia kelé tarimeu
simasagbang

¹³ Samba kelé lumun babaraakéra
pangoringan néné, orikrangan leú et ka
sia pangoringan. Bulat ka sia poí néné,
simaangkat bagadda, iaté bulat apa
robá galai. Iageti ragalaiaké nia sinágó,
bulé rasegéaké bagadda siripot siobat
tubudda. Ké mukuddu kam sambamui ka
pupunenan, galai tubudda bulat masitsin

sita iitsó sia, kalulut aipuineng'an sia
pubobot-bot akkulára

¹⁴ Bulat tá inga-ngaú sia mugalai
jo, samba bulat siobat bagadda iaté
masiritúaké tainanalep simaolop tubu.
Oto bulat rakakabli, iaté sia simaruei
muarat, oniakenen, simagulai tonem
baga peilé ka tubut Tuhan Jesus. Bulat
aiubuan tubudda mualau бага. Sia té
néné sitelei Taikamanua

¹⁵ Kalulut taiohára masitut'aké enungan
simaroipo, mapepeddangan leú et.
Enungiddangan leú et kelé sienungit
Bileam togat Beor siburú. Ka sia si
Bileam néné, bulat aikikiddiy ibara
bulagatnia ka sigalaiakenennia sikataí

¹⁶ Tápoi atutekáan nia simaron, kalulut
galai tubunia sikataí néné, ka tetret
aipanibo kalideinia kelé nga-ngan
sirimanua. Oto paksaaké ka tubunia si
nabi néné, bulé iariaké sigalaiakenen nia
sitaipasesese néné

¹⁷ Oto sia tai guru sipatataju néné, kelé
bubuakat simagarak lé sia, samba kelé
tinobut siboroi rusa simapiret. Bulat
aitarek'akéan ka sia kudduatra néné
Taikamanua, bulat ka simakopé gep-gep

¹⁸ Ka sia tai guru sipatataju néné, raobá rakua kuanen paalakat baga sitá lulu; samba pubobot-bot akkulat pusilaingeat lé rapapakei masipapepe sia sibau bela ka mungkuatda sirimanua sipupaparaboat sikataí

¹⁹ Ratanéaké puujaat, ka sia tai guru sipatataju néné, ka tubudda néné, tápoi ka sia geti ai lé ipupapagugulet'aké sia arat tubudda simarei-rei, sipakataí sirimanua. Aipoí ké ikalaaké nia aponia pá, aibailiuan te nia pagugulet sipasikakalaaké nia

²⁰ Tápoi ka sia geti sipasiaagai si Tuhan sambat Sipaarau sita iaté Tuhan Jesus, abelangan sia ka kup-kumen polak néné, sipasilololit'aké sirimanua. Tápoi ké geti aialá nia mitsá sesere, pat oi ikalaaké nia geget kataí nenda, bailiu kalepakatnia bulat kopé kataí nia, belé peilé ka siburú

²¹ Oto maerú peilé tá raagai enungan katuripoat sibara ka Taikamanua, kalulut kenanen baí airaagai, tápoi tá raobá ratut'aké surukat siaket Taikamanua ka tubudda

²² Sangamberinia sigalaiakenenda néné, bulat apasese lé ka tiboiet paobboiakenen néné, "Ikokom lé mitsá

jó-jó sigelek'akenennia." sambat,
"Sakkoiló kenanen aturaúan nia, ialeú
et ei nia mitsá masipalebbu tubunia ka
lotí."

3¹ Ale kam Sasarainangku simanuntut
bagakku! Néné te suratku sikarua
ka tubumui. Ka ruania suratku néné,
kubesiáké masiparepdem kam ka
pupaatuanan simaliná sikukuddu ka
tubumui

² Bulat kutiddou ka kam, bulé nurepdem
kam sangamberinia sikuadda tai nabit
Taikamanua, samba surukat sibara kai
Tuhan, Rimata Sipaarau, sisilómui ka
sinegéakenenda tai apostel

³ Bulat agaietmui, siboikí iaté, ka
gogoi kalepakatnia, babara te sia ka
puririmanuanda néné, simatutru ka
pubobot-bot akkulára. Rapalololoi te
kam

⁴ rakua ka tubumui kisé, "Aitonéaké
si Tuhan momoi nia! Oto kineneiget
kaipangan né nia? Taikebbukatta
ailangóan sia, tápoi ituitsó makeré lé nia
kelé siburú, ka tetret pasibaraat polak
peilé!

⁵ Bulat arabagai lé ka sia néné, tá rasiló
pagalaiat aibaraaké manua sambat

polak néné Taikamanua, ka tiboietnia.
Aibaraaké polak néné Taikamanua,
sibara ka oinan, sambat aitugalai sambat
oinan

⁶tápoi oinan leú et, iaté eba sabeu
aitusubuaké polak néné siburú

⁷Tápoi beri leú et polak sambat manua
kineneiget, ai leú ipasisikeli nia tiboiet
Taikamanua, bulé itusubuaké nia ka api
ka gogoi sibabara. Samba kineneiget leú
ai peilé ipasisikeli manua sambat polak
néné, teret iaili tetrenia ituukum'aké
samba itusubuaké sia sikataí paraboat

⁸Tápoi mitsá alé kam Sasarainangu,
ai peilé sara tá momoi nukalipogi kam:
ka sia kai Tuhan, tá anai baggeinia
sangagogoi ka si sangaribu ngarura;
karuania néné, makeré lé ka sia

⁹Tá maburú ka sia kai Tuhan iaké
sitonéakenennia, kenanen baí ai sia
sipaatu kelé néné. Tápoi maom lé
bagania ka tubumui, kalulut taiobána
ibara beri sara simasusubu. Bulat
besíakenennia geti, bulé rabauaké
paatuatda sangamberi sirimanua

¹⁰Tápoi Gogoi kaoijanan Tuhan geti
sinulut lé; ioi kelé sipananangkou. Ka
Gogoi nenda, manua tatá sialei nga-ngan

leleggu, samba leú et pabula-bulá ka manua leú sappru ilabónia api, ialeú et ka sia polak néné samba sangamberinia sibabara ka bagania leú, tatá

¹¹Oto ké kisedda baí enungnia itusubuaké sangamberinia; oto kipa lé simateú nia puparaboananmui? Bulat buítá maliná paraboatmui, samba masipunenan tubumui ka Taikamanua

¹²ka burut nupangena kam, elé imarepdem bagamui iaili Gogoi Taikamanua. Ka tetret nenda, tatatá te imalabó ka sia manua, samba kalulut oloinia maanaunangan sangamberinia pabula-bulá ka manua

¹³Tápoi ka sita geti aitange-ngena kam sipinaleleknia Taikamanua, iaté manua sibau sambat polak sibau; sedda ai keadilan

¹⁴Oto kalulut néné ale kam Sasaraina simanuntut bagakku, pangenan iaili Gogoi nenda, bulat kau nubesíaké nupaliná kam paraboatmui samba buí ibara kuat tubumui sikataí ka matat Taikamanua. Samba pasikeli kam erut pattablaratmui ka tubut Taikamanua

¹⁵Tápoi addeaké lé kam nia puoom bagat Tuhanta néné ka tubumui néné,

kelé sara oggak siakénia ka tubumui, ioi nusiló kam puaragat. Beri leú et ka sia sarainanta simanuntut bagatta si Paulus, aikua leú et ka bagat suratnia ka tubumui. Sibara ka tubut Taikamanua lé pusisikut paatuatnia si Paulus aigalai suratnia néné

¹⁶ Sangamberi suratnia, sarat pagalaiat néné leú et ikukua. Kirénangan ai piga ngamataat pá ka bagat suratnia sitaioi tuckeruji. Oto rubeiat nenda te arapabailok ka sia sitaiagai aponia pá, samba sitaimaron putotonem бага ka tubut Jesus Kristus. Tápoi tá leú tagegégeki kam, kalulut ka rubeiat bagei leú et ka Buko Sipunenan kisedda leú et aragalaiaké. Tápoi apa sigalaiakenenda néné masibaraaké kasubuatda lé

¹⁷ Tápoi kam geti ka kam alé Sasaraina simanuntut bagamai, anuagaian kam pagalaiat nenda. Oto kalulut néné, kau nupanuksuk kam, bulat buí nutut'aké kam katupepeatda sirimanua sipupaparaboat kasit-sit'akenen, pat julut kam ka pasiddonanmui simaron

¹⁸ Bulé memei nupuuktungi kam panguruat katet bagat Jesus Kristus Tuhanta, Rimata Sipaarau sita, samba

bulé memei makokopé nuagai kam nia.
Oto tuumun'aké lé nia, kineneiget, pat
aili teret buru-burú! Amen. Hormatmai,
Petrus

1 Yohanes

1 ¹ Bagat surat néné, siorak ka pagalaiat Tiboiet sibaraaké purimanuaiat, iaté, Tiboiet siturerere baranangan ka panandaatnia peilé. Akuarep'an kai, samba bulat tubumai amasiitsó. Akukirenengan kai nia, samba bulat kabeimaian amasiomet'aké

² Akuitsóan kai ka tetret atupatoilá purimanuaiat néné. Iaté lulunia kumumuneng'aké kai nia pagalaiat tubunia. Kupaagai kai ka kam pagalaiat purimanuaiat sipulelelek samba simatom, sikukuddu ka tubut Ukkui, samba sipatoilá nia ka tubumai

³ Apa kuarep kai elé kuitsó kai, nia leú té nenda kusesegéaké kai ka tubumui, bulé sambatta masipuuktungi puririmanua sipatatabbra ka tubut Ukkui sambat ka tubut Togania Jesus Kristus

⁴ Akugalai kai surat néné ka tubumui, bulé imasappru puaangkat bagatta

⁵ Néné te katuareman siarepmai sibara ka Togania, sisegéakenenmai ka tubumui: Pató lé nia, ka sia Taikamanua

néné, samba bulat tá anai gep-gep ka tubunia

⁶Ké takua ai sita patatabbra ka tubunia, tápoi ai lé sita mukukuddu ka pugep-geman, oto apabokongan lé sita ka titiboat samba ka galai tubu

⁷Tápoi ké ka pató takuddu kam, kelé kukudduna ka sia Taikamanua ka pató, bailiu maronnangan patabbaratta, samba paabantangan pasasambatta, iageti buinangan leú et jotta logau Jesus, iaté Toganía

⁸Ké takua baí kam tá anai jotta, oto atabokoían te kam tubutta; bailiu tá anai Taikamanua ka bagat paatuatta

⁹Tápoi ké geti taseseaké kam jotta ka matat Taikamanua, bailiu riu-riu iaké sitonéakenennia samba galaiakénangan keadilan. Appéakénangan jotta samba palinánangan leú et sita ka sangamberi puseleatta

¹⁰Tápoi ké geti takua kam tá anai jotta, ataaddéakéan lé te kam nia Taikamanua néné simaboko, samba toilá tá aitisisiddoni kam tiboiet Taikamanua ka bagat paatuatta.

2¹Ale kam tatogakku! Akugalai suratku ka tubumui néné, bulé tá

nugalai kam jo. Tápoi ké ai peilé sia sigalai jo, ai ka sita sara sipasibebela sita, iaté Jesus Kristus simaadil; ititiddouaké te sita ka matat Ukkui

²Oto kalulut Jesus Kristus, appéakénangan jotta Taikamanua. Iageti tá sarat jotta iaapéaké, tápoi sangamberi jodda taikapolak leú et

³Ké mareddet sita ka surukat Taikamanua, nenda te toggaiat agaita nia Taikamanua

⁴Sia sipasikukua, "Kuagai nia Taikamanua," tápoi tá mareddet sia ka surukatnia, sipaboboko lé sia, bulat tá anai Taikamanua ka bagat paatuatnia

⁵Tápoi ka sia geti simareddet ka tiboiet Taikamanua, bulat mamuiné punununtut bagania ka tubut Taikamanua. Nia té toggaiat ai sita patatabbra ka tubut Taikamanua

⁶Kasei sipasikukua ai nia patatabbra ka tubut Taikamanua, buítá itut'aké enung puririmanuan Kristus

⁷Ale kam Sasarainamai simanuntut bagamai! Sisurat'akenenku néné ka tubumui, tá te surukat sibau. Néné geti iaté surukat siburú sisegéakenen ka tubumui taddanangan anumatonem kam

baga ka tubut Kristus; iaté Katuareman
Simaerú sibara ka Taikamanua siarepmui
siboikí

⁸Tápoi kenanen kisedda, surukat
sinurat'akenenku néné, sibau leú
et; kalulut ituaagai pusingeseatnia,
matotoilá ka tubut Kristus samba ka
tubumui leú et ka kam. Aipoí ka sia
pugep-geman memei tatatá, tápoi toro
bulat sibulatnia, aian itataddaaké iputoro

⁹Oto sikua tubuna aian nia muririmanua
ka bagat pató, tápoi ai peilé ipulalagaki
sia бага sasarainania, oto ai peilé sia ka
bagat pugep-geman teret kineneiget

¹⁰Sia sipukateki бага sasarainania,
ai sia muririmanua ka pató, pat beri
sara apa pá ka tubunia sibaraaké jodda
sirimanua

¹¹Ka sia geti sipulagaki бага
sasaraianania, ai sia mukukuddu ka
pugep-geman. Ka gep-gep lé ipueenung,
samba tá iagai kaipa pá ieei, kalulut
gep-gep nenda poí tá iooi ipaitsó

¹²Akugalai suratku ka tubumui kam
Tatogakku, aipoí atuappéakéan jomui
kalulut Kristus

¹³Akugalai suratku ka tubumui alé kam
Saukkui, kalulut anuagaian poí kam nia

siturerere kababara ka panandaatnia peilé. Kugalai suratku néné ka tubumui kam Sibautubu, kalulut anukalaakéan kam nia Si Jo

¹⁴ Akugalai suratku néné ka tubumui kam Tatogamai, anuagaian poí kam nia Ukkui Taikamanua. Akugalai suratku ka tubumui kam alé Saukkui, kalulut anuagaian poí kam Tiboiet siturerere kababara baranangan ka panandaatnia peilé. Akugalai suratku ka tubumui kam Sibautubu, aipoi bulat maron pupaaturanmui. Ai ka bagat paatuatmui tiboiet Taikamanua, samba anukalaakéan kam nia Si Jo

¹⁵ Buí nupununtuki kam бага polak néné, elé aponia pá sibabara ka bagat polak néné. Ké ka tubut polak néné lé manuntu bagamui, oto táan te amanuntu bagamui ka tubut Ukkui Taikamanua

¹⁶ Sangamberinia sibabara ka matat polak néné, iaté siobat bagat pubobot-bot akkulára sirimanua sijo, itsó lepá besíaké, samba umun'akenen, sangamberinia néné, tá te sibabara ka Ukkui, tápoi sibara ka polak lé

¹⁷ Aipoí ka sia polak samba sangamberinia sibabara ka bagania,

sipuoni kiddiyet bagadda sirimanua, aian lé nia tatatá. Tápoi ka sia geti situt'aké siobat bagat Taikamanua, riu-riu lé rapurimanua teret buru-burú

¹⁸Ale kam Tatogakku, aian te malelegre iaili kalepakat polak! Atukuangan ka tubumui ka panandaatnia, kaooira Saggak Kristus; samba kineneiget aian sia maiigi sipasisasaggangi Kristus. Nia té nenda toggaiat kalelegrenia iaili kalepakat polak néné

¹⁹Saggak Kristus iaté, sia sipasikakaddiuaké sita, aipoí kirénangan tá saladdouta sia néné. Ké saladdouta baí sia néné, riu-riu lé takuddu kam sambatta. Tápoi arakaddiuaké lé sita, bulé imakopé kolounia bulat beri sia sara ka talagadda bulat oniakenen saladdouta

²⁰Tápoi anusilóan kam Ketsat Sipunenan siuruakenen Jesus Kristus, iaté lulunia nuaagai kam nia sangamberimui ngantoman bulat sibulatnia

²¹Oto akugalai suratku néné ka tubumui, tá te kalulut taiagaimui kolounia ngantoman bulat sibulatnia, tápoi kalulut kolou aagaimui nia lé, samba anuagaian leú et kam tatá nia

pabokoat ka bagat ngantoman bulat sibulatnia néné

²² Oniakenen sipaboboko geti, iaté sia sipasikukua tá Rimata Sipaarau nia ka sia Jesus sitonéakenen Taikamanua néné. Bulat Saggak Kristus te sia néné; tá raakui Ukkui sambat Toga

²³ Oto ké tá raakui Toga, sia néné, tá leú te rasisiló nia ka sia Ukkui. Tápoi ké raakui Toga, Ukkui ka sia leú et, rasisiló nia

²⁴ Kalulut néné, bulé nujago kam sipulelelek ka bagat paatuatmui sangamberinia katuareman siarepmui siboikí, taddanangan anumatonem kam бага ka tubut Tuhan Jesus. Aipoí ké baí nulelelek'aké kam nia sipulelelek katuareman néné, riu-riu patabbaratmui ka tubut Toga sambat ka tubut Ukkui

²⁵ Oto néné te sitonéakenen Kristus ka sita iaté: purimanuaiat sipulelelek samba sitaitatátá

²⁶ Akugalai suratku néné iaté, masikua ka matamui pagalaiat sia sigelai masipataju kam kineneiget

²⁷ Tápoi kam geti ka kam, aiuruakéan Kristus Ketsatnia ka tubumui. Oto kaburut ikuddu Ketsatnia ka tubumui,

táan leú anai lulunia raoi sabagei rapangantru kam. Aipoí igegeiaiké kam Ketsatnia ka sangamberinia; samba sangamberi sigelaiakenennia bulat sineseat, tá pabokoat. Oto kau numareddet kam ka singantruakenen Ketsat ka tubumui, samba kau mariu-riu patabbaratmui ka tubut Kristus

²⁸ Kau imariu-riu nupatabbra kam ka tubut Kristus, alé kam tatogakku, bulé ké iaili tetrenia ioi, maró bagatta patuggut mata, tá mulilipput sita kalulut ailatta

²⁹ Anuagaian kam puririmanuania ka sia Kristus, siripot siobat bagat Taikamanua lé. Oto buítá nuagai kam, sangamberi sipupaparaboat siripot siobat bagat Taikamanua, iaté oniakenen tatogat Taikamanua.

3 ¹ Itsó peité kam kopet nuntut bagania Taikamanua ka tubutta, pat oniakénangan sita tatogania. Aipoí kirénangan lé poí tatogat Taikamanua lé sita néné. Iaté lulunia tá raaagai sita taikapolak sikataí paraboat néné, aipoí tá raagai nia taikapolak, Taikamanua néné

² Ale kam Sasarainamai simanuntut bagamai! Kineneiget amuoningan sita

tatogat Taikamanua, tápoi kipa ibabailiu sita ka gogoi sibabara, tápei tagai kam kolounia. Tápoi kenanen kisedda, ai lé taagai kam, ké moi baí Kristus, bailiu makerétangan ka tubunia, aipoí bulat tubut tubunungan poí taiitsó kam

³Oto sangamberi sipukakaronan kelé néné ka tubut Kristus, kau rajajago tubudda, bulé bulat imaliná; maliná ka jo, kelé linánia ka sia Kristus

⁴Kasei sigalai jo, arapasabauan te surukat Taikamanua; aipoí ka sia jo, iaté pasipasasabau surukat Taikamanua

⁵Kelé siagaiatmuian leú et, aioi Kristus, iaté masiappéaké jodda sirimanua, samba tá anai jo ka tubunia

⁶Oto sangamberi sirimanua sipatatabbra ka tubut Kristus, táan mariu-riu ragalai jo. Iageti sangamberi simariu-riu mugalai jo, bulat beri peité araitsó, elé araagai nia Kristus

⁷Ale kam Tatogakku, buí nuobá kam rapapepe kam kasei pá. Sangamberi sipasigagalaiaké siobat bagat Taikamanua, iaté tatogat Taikamanua, kelé Kristus ka sia néné, Togat Taikamanua lé nia

⁸ Tápoi sia simariu-riu masigalaiaké jo, tatogat Sanitu lé sia, aipoi ka sia Sanitu néné, amajongan nia baranangan ka panandaatnia peilé. Iaté lulunia aioi Togat Taikamanua, bulé ipakataí galajet Sanitu

⁹ Sia sipuoni Tatogat Taikamanua, táan mariu-riu ragalaiaké jo, aian poí ka tubudda galai tubut Taikamanua. Samba kalulut aipu-Ukkuian poí Taikamanua, bailiu táan momoi iriu-riuaké mugalai jo

¹⁰ Nia té néné pabaggeiatda tatogat Taikamanua ka tubudda tatogat Sanitu; oto kasei sitaigalaiaké siobat bagat Taikamanua samba sitaipununtuki бага sasarainania, tá tuooniaké nia tatogat Taikamanua

¹¹ Baranangan ka panandaatnia, atusegéakéan katuareman néné ka tubumui: Buítá tapakaté kam бага pasasambatta saalei

¹² Buí taului kam kelé galai tubut Kain, sibailiu togat Sanitu, kalulut aimateiaké sarainania. Apa lulunia aimateiaké baginia si Kain? Iaté kalulut sigalaiakenennia nenda masele, tápoi sigalaiakenen sarainania geti, maroipo lé

¹³ Oto ale kam Sasarainanku, buí imakisei ka bagamui ké rapulagaki kam бага таикаполак

¹⁴ Kelé siagaiattangan leú, sita néné, abelangan sita ka kamateian; lepá ei sita ka purimanuaiat. Ataagai geti kam nia kelé nenda, kalulut pakakatéta бага пасасамба сасарайна. Oto sitaimakaté бага ka tubudda сасарайна, ai peilé ikukup-kup'aké sia kamateiat

¹⁵ Simalagá бага ka tubudda сасарайна, sipamamatei lé nia; oto kelé siagaimui, sia sipamamatei bulat tá te ibabakkati purimanuaiat sipulelelek sambat sitaitatatá

¹⁶ Oto ka enungan kelé néné te taagai kam pakaté бага пасасамба: Aibuluakéan engania Kristus punu tubutta. Kalulut néné, buítá tabuluaké leú kam ka sita enganta punu tubudda сасарайнанта

¹⁷ Ké baí airaiitsó sia sitaimaigi sibabara ka tubudda, sia simabara ka tubu, tápoi tá raobá masirop'aké сасарайна, kipa iooi ikua manuntu bagania ka tubut Taikamanua

¹⁸ Ale kam tatogakku! Buí sarat ka ngu-ngunta lé élé sarat ka tiboietta lé

ikukuddu punununtut бага. Tápoi kau bulat sibara ka nuntut бага sipulelelek, simatotoilá ka sigalaiakenenta

¹⁹ Kisedda te taagai kam katuooniakéta tatogat Taikamanua bulat sibulatnia, sambat paatuatta leú et matenang ka matat Taikamanua

²⁰ Aipoí ai lé taagai kam, ké ijoaké sita paatuatta, oto puaagai Taikamanua peilé abeu ka puaagai paatuatta, ai lé poí iaagai sangamberinia

²¹ Oto ale kam Sasarainangu simanuntut bagakku, ké tá baí ijoaké sita paatuatta, bailiu ró bagatta mei ka matat Taikamanua

²² Bulat apa lé tatiddou kam ka tubunia, akénangan leú et nia ka sita, kalulut reddetta ka surukatnia samba gagalaiakéta siobat bagania

²³ Surukatnia geti sikuania ka tubutta, iaté: Buítá matonem bagatta ka tubut Togania, iaté Jesus Kristus, samba buítá pakaté sita бага pasasambatta, kelé singantoman'akenen Kristus ka tubutta

²⁴ Aipoí sangamberi simareddet ka surukat Taikamanua, sipatatabbra ka tubut Taikamanua lé sia ituooniaké; oto bailiu ka sia leú et Taikamanua

patabbranangan ka tubudda. Kelé siagaita, ai lé nia patatabbra Taikamanua ka tubutta, aiakéan poí Ketsatnia ka sita.

4¹ Ale kam Sasarainamai simanuntut bagamai! Buí nukatonemi kam sia бага sangamberi sikua tubuna ai ka tubudda Ketsat Sipunenan, tápoi sibo lé kam sia boikí, ituagai bulat sibulatnia leú pá sibara ka Taikamanua ketsat ka tubudda nenda elé tá. Aipoí amaingingan sia tai nabi sipatataju siputetebá ka senen kudduat

² Oto kisé lé nugagalai kam bulé ioi nuagai kam nia, sibulatnia Ketsat Sipunenan leú pá elé tá: Sangamberi sipasimumuneng'aké kaooi Jesus Kristus ka polak néné bailiu sirimanua, sia té nenda sibara ka tubu Ketsat Sipunenan sibara ka tubut Taikamanua

³ Tápoi sitaipasimumuneng'aké geti pagalaiat tubut Jesus néné, tá anai ka tubudda Ketsat Sipunenan. Ketsat sibara ka Saggak Kristus lé ai ka tubudda. Kelé siarepmui kaooinia ketsat, kineneiget aian nia ka polak néné

⁴ Tápoi kam geti ale Tatogakku, Kristus lé sibakkat kam. Anukalaakéan kam tai nabi sipatataju, aipoí Ketsat sikukuddu

ka tubumui peilé magege ka tubut ketsat
sikukuddu ka tubudda ka sia sipuoni
bakkat polak néné

⁵ Ka sia tai nabi sipatataju sarat
pagalaiat pupolangan lé ratitiboi, iageti
ka sia taikapolak leú et, raaarepi
tiboietda, aipoí polak lé sibakkat sia

⁶ Tápoi sita geti ka sita, tatogat
Taikamanua lé sita néné; oto sia
sipasiaagai Taikamanua, raarepi
tiboietta. Oto kisedda te taaagai kam
pabaggeiatnia, Ketsat sipasigegelaiaké
ngantoman katuripoat, ka ketsat
sibaraaké katupepeat

⁷ Ale kam Sasarina simanuntut
bagamai! Kau tapakaté kam бага
pasasambatta, aipoí sibara ka tubut
Taikamanua lé punununtut бага néné.
Tatogat Taikamanua lé sia ituooniaké
simanuntu бага, samba sia leú et, raagai
Taikamanua

⁸ Sitaimanuntu бага geti, tá raagai nia
Taikamanua, aipoí nuntut бага lé nia
Taikamanua néné

⁹ Aipatoiláan nuntut bagania ka tubutta,
Taikamanua iaté, aikoiniaké Togania
sisasara ka polak néné, bulé taikep'aké
kam purimanuaiat kalulut Togania

¹⁰ Oto néné te punununtut бага: Tá sita amasipununtuki бага Taikamanua, tápoi Taikamanua lé aipununtuki sita бага samba aikoiniaké Togania, bulé kalulut nia, bara katuappekat jotta

¹¹ Ale kam Sasaraina simanuntut bagamai, ké kisé baí bulat ipukateki sita бага ka sita Taikamanua, oto buítá leú pakaté kam sita бага ka sita pasasambatta

¹² Bulat beri peité sia sara sipasiitsó tubut Taikamanua, tápoi ké pakaté sita бага, oi nia Taikamanua patabbra ka tubutta; oto bailiu nuntut bagania sikukuddu ka tubutta néné, sut

¹³ Kalulut aiuruakéan poí Ketsatnia Taikamanua ka tubutta, agaitangan aian sita patatabbra ka tubut Taikamanua, samba Taikamanua leú et aian nia patatabbra ka tubutta

¹⁴ Bulat tubumaian te amasiitsó tubut Togat Taikamanua, samba akupaarep'an kai kokoiniakéna nia Ukkui, bailiu Rimata Sipaarau taikapolak néné

¹⁵ Oto kasei simuneng'aké Jesus néné iaté Togat Taikamanua, ei Taikamanua patabbra ka tubudda, samba sia leú et patabbraddangan ka tubut Taikamanua

¹⁶ Beri sita leú et ka sita, taagai kam samba matonem bagatta punununtut bagat Taikamanua ka tubutta. Nuntut бага lé nia Taikamanua néné. Sia siparimanuaaké punununtut бага, aian sia patatabbra ka tubut Taikamanua, samba Taikamanua ka sia leú et ai nia patabbra ka tubudda

¹⁷ Itususut'aké punununtut бага ka tubutta, bulé ibara emen bagatta ka tetret iaili Gogoi Pengadilan. Imaeeme geti bagatta, kalulut puparaboananta ka polak néné, amakeréan kelé puparaboanan Kristus

¹⁸ Oto sia sipasinananam nuntut bagat Taikamanua, tá anai ka tubudda pulolotó; aipoí ka sia punununtut бага simasut masitataáké sene ngamata pulolotó. Matoilá lé sia sitaipasinananam punununtut бага bulat simasut, iaté malotó sia masiitsó Gogoi Pengadilan

¹⁹ Atamakaté kam бага ka sita, kalulut Taikamanua lé poí boikí aipukateki sita бага

²⁰ Oto ké ai sia sipasikukua, "Makaté bagakku ka tubut Taikamanua," tápoi tá aipukakateki sia бага sasarainania, bulat simaboko lé nia. Aipoi sitaipukateki

baga sasarainania siitsónia, tá leú te makakaté bagania ka tubut Taikamanua sitaiiitsoketnia

²¹ Oto néné te surukat siaket Kristus ka tubutta, iaté: Kasei simanuntu бага ka tubut Taikamanua, buítá manuntu leú et bagania ka tubudda sasarainania.

5 ¹ Togat Taikamanua lé ituooniaké sia sangamberi sikatonemi Puririmata Sipaarau nia Jesus, sitonéakenen Taikamanua néné. Simanuntu бага ka tubut sara ukkui, manuntu leú te bagania ka tubut togat ukkui néné

² Oto ka enungan néné te taaagai kam nia punununtukitta sia бага tatogat Taikamanua, iaté: Manuntu bagatta ka tubut Taikamanua sambat maredet sita ka surukatnia

³ Masipununtuki бага Taikamanua, katukolobatnia iaté, masireddet surukatnia. Bulat tá masané ka tubutta surukatnia

⁴ aipoí sangamberi tatogat Taikamanua, momoi rakalaaké polak sijo néné. Tonem bagatta lé tapapakei kam masikalaaké polak néné

⁵ Kasonia momoi masikalaaké polak néné? Bulat sarat sia lé sikatonemi, Jesus néné, iaté Togat Taikamanua

⁶ Jesus Kristus te amoi ka polak néné sambat oinan pasiraukatnia samba leú et logau kamateiatnia. Aioi tá sarat oinan, tápoi sambat oinan sialei logau. Bulat tubut Ketsat Sipunenan te amasimuneng'aké pusisineseatnia néné, aipoi ka sia Ketsat beri pei paboko nia

⁷ Ai telu sipasimumuneng'aké, iaté: Ketsat Sipunenan, oinan sambat logau; kateludda néné, makeré simuneng'akenenda

⁸ (5:7)

⁹ Kirénangan matonem bagatta ka simuneng'akenenda sirimanua, tápoi bulat simuneng'akenen Taikamanua peilé bulat maron. Oto nenda te pasimunengan siaket Taikamanua pagalaiat tubut Toganua

¹⁰ Kalulut néné, sia simatonem бага ka tubut Togat Taikamanua, arasilóan té simuneng'akenen néné ka bagat paatuatda. Tápoi sia geti sitaimatonem бага ka tubut Taikamanua, araoniakéan lé nia Taikamanua néné kelé sipaboboko,

tá poí matonem bagadda ka sikuat
Taikamanua pagalaiat tubut Togania

¹¹ Néné te tiboiet pasimuneng: Aiakéan
ka tubutta puririmanua sipulelelek
samba sitaitatátá, samba Togania te
bakkat purimanuaiat

¹² Oto kasei masibakkati Togat
Taikamanua, aian té ka tubunia
purimanuaiat nenda; iageti sitaibakkati
nia, tá leú te anai purimanuaiat ka
tubunia

¹³ Kugalai suratku néné ka tubumui
simatonem бага ka tubut Togat
Taikamanua, bulé nuagai kam nia
kababarania purimanuaiat sipulelelek
samba sitaitatátá ka tubumui

¹⁴ Samba amaemengan bagatta
mei ka matat Taikamanua, kalulut
atakatonemingan aarepina paniddogatta,
ké tatiddou kam apa pá siripot teú
bagania

¹⁵ Kalulut aagaita aarepina paniddogatta
ké tatiddou apa pá ka tubunia, oto kolou
leú et taagai kam aakéna apa siniddouta
ka tubunia

¹⁶ Oto ké nuitsó kam ai sara ka
talagamui tai Kariten sigalaiaké jo
sitaibaraaké kalimaiat puririmanua

sipulelelek sambat sitaitatatá, tiddouaké kam nia ka tubut Taikamanua; bulé ikau ka sia Taikamanua purimanuaiat. Néné sarat ka tubudda lé sigalai jo, tápoi jodda nenda tápei sibaraaké kalimaiat purimanuaiat sipulelelek samba sitaitatatá ka tubudda. Tápoi ai jo sibaraaké kalimaiat purimanuaiat nenda ka tubudda. Pagalaiat nenda geti, tá leú kukukua ka matamui bulé nutiddouaké kam sia ka tubut Taikamanua

¹⁷ Sangamberinia sele sigalaiakenen, iaté nenda oniakenen jo, tápoi ai jo sitaibaraaké kalimaiat purimanuaiat sipulelelek sambat sitaitatatá ka tubudda sirimanua

¹⁸ Taagai kam sangamberi sipuoni tatogat Taikamanua, tá ragagalai taiaariakenen mugalai jo, aian poí Togat Taikamanua sisakkeri sia, oto ka sia leú Si Jo néné, táan momoi igalai apa pá ka tubudda

¹⁹ Ataagaian kam babakkatina sita Taikamanua, kenanen baí sangaliot polak néné ai nia ka kupkumen Si Jo

²⁰ Ataagaian kam amoian nia Togat Taikamanua, samba aiakéan ka sita pukokolou ka бага, bulé bulat

taagai kam nia Taikamanua bulat sibulatnia. Oto patabbarattangan ka tubut Taikamanua bulat sibulatnia, samba patabbarattangan leú et ka tubut Togania Jesus Kristus. Oto nia té néné Taikamanua bulat sibulatnia, samba néné te purimanuaiat sipulelelek samba sitaitatátá

²¹ Oto kam Tatogakku, areuaké kam tubumui ka tubut sabulungan!

2 Yohanes

1 ¹ Sibara kaku sipuoni panei-nei paamian, bulat simanuntu бага ka tubumui te surat néné, kuaké nia ka tubum Ina sipilit Taikamanua, samba leú et ka tubudda tatogam Ina. Iageti tá sarakku manuntu бага ka tubumui, tápoi beri leú et sia siagai katuareman bulat sibulatnia sibara ka Taikamanua leú et, manuntu bagadda ka tubumui

² Aipoí ka sia Taikamanua, ai lé nia mukukuddu ka bagat paatuatta, samba mariu-riu lé ikuddu ka talagatta teret buru-burú

³ Bulé isukat'aké samba ipanguruani sita katet бага samba ibujai sita Ukkui Taikamanua samba Jesus Kristus Togat Ukkui. Bulé ka linat paatuat samba ka nuntut бага tabakkati kam sangamberinia néné

⁴ Bulat seget kopet angkat bagakku akuagai kababaradda tatogam Ina sipupaparaboat siripot ngantoman Taikamanua, kelé ka sikuat Ukkui Taikamanua ka tubutta

⁵Oto kalulut néné Ina, bulat paniddogatku ka tubumui, bulé pakaté kam sita бага pasasambatta. Sikuakku ka tubum néné Ina, tá surukat sibau, tápoi amaburúan aituaké ka tubutta ka panandaat atamatonem kam бага peilé

⁶Pakaté бага iaté, muparaboat siripot obaket bagat Taikamanua. Ialeú et surukat siarepmui ka panandaatnia, iaté masikua, bulé nupakaté kam бага pasasambamui

⁷Atusalúan polak putebakatda sipatataju. Sia néné tá ramumuneng'aké ka bagadda kaooi Jesus Kristus ka polak néné bailiu sirimanua. Oto sia néné te oniakenen sipatataju sambat Saggak Kristus

⁸Oto bulat jago kam, buí imapepe sigalaiakenenmai sibailiu puuktunganmui. Bulat besíaké kam bulé nusiló kam sangamberinia upamui sibara ka Taikamanua

⁹Kasei sitaiomet'aké nganturat Kristus, tápoi bagei lé ragagalaiake, tá kelé singantruakenen Kristus, tá anai sia mubabakkat ka tubut Taikamanua. Tápoi sia geti simariu-riu masiomet'aké

nganturat Kristus, ai sia mubabakkat ka tubut Ukkui, samba leú ka tubut Toga

¹⁰ Oto ké ai sia siooi masingantruaké nganturat bagei, tá kelé singantruakenen Kristus, bá sisiló kam sia ka lalepmui; samba bá kakau kam salam ka tubunia

¹¹ Aipoí sia sipasikakau salam ka tubut sirimanua kelé néné, aratut'aké leú te sia masigalaiaké sikataí

¹² Siripokatnia maigi peilé kuanenku ka matamui; tápoi kelé tá masegé bagakku kutiboi nia ka surat. Bulat aikukakaroni бага ioi kuoi kubalou kam, bulé bulat imagora bagatta

¹³ Oto beri sia leú samomoínu Ina sipiliy Taikamanua leú et, segé salamra ka tubum Ina.

3 Yohanes

1 ¹Ale saraina Gayus simanuntut bagakku! Aku néné panei-nei paamian, bulat simakaté бага ka tubum

²aikutitiddouaké ekeu ka tubut Taikamanua, bulé imarogdang puririmanuam, samba bulé ramaerú sangamberidda ka tubum, kelé erut bagam kekeu leú et

³Bulat mangká bagakku simakopé akuarep katuareman tubum sisegéakenenda piga pá saalei tai Kariten, iaté pagalaiat topitnu ka tubut Taikamanua bulat sibulatnia, aipoí bulat kirénangan lé bulat mariuriu nuparaboat'aké siripot tiboiet Taikamanua

⁴Tá anai bagei siangkáaké bagakku simakopé, sarat masiarep erut puparaboananda tatogakku ragalaiaké siripot singantoman'akenen Taikamanua lé

⁵Ale Sarainangku Gayus! Bulat matopit ekeu masipuukú galajet, iaté masipasikeli saalei pasasamba tai

Kariten; samba beri leú sia saaleita tai Kariten taiaagaietnu leú, ainupasisikeli sia

⁶Aranunuakéan punununtut bagam sigalainu, ka matadda sapaamian ka kudduatmai sené. Oto kutiddou ka tubum bulé nurop'aké sia, ioi rariu-riuaké puenungannanda, oto bailiu mangkánangan bagat Taikamanua

⁷aipoí ka puenungananda raei masipuukú galajet Kristus, bulat beri apa pá tá anai rasisiló sibara ka tubudda sipuarat sabulungan

⁸Oto buítá tarop'aké kam sia saaleita pasasamba tai Kariten sigalaiaké kelé néné, bulé sikeré kabei sita masipakakra ngantoman arat bulat sibulatnia sibara ka Taikamanua

⁹Akukauan suratku siteté ka tubudda sapaamian, tápoi ka sia geti si Diotrepes sigelai muuté ka paamian, tá iobá ireddet sikuakku

¹⁰Amoian geti aku poiliatkungan nia sangamberi sigalaiakenennia, iaté pagalaiat pukakataí nia samba pabokoatnia, ipabara tiboiet pagalaiat tubumai! Tápoi bulat tápei sesegé bagania galai tubunia kelé nenda.

Ka tetret araoi saalei pasasambadda tai Kariten, bulat tá iobá isiló sia. Tápoi aikeraaké lé sia siobá masisiló sasarainanta néné, bulé buí rasiló sia, samba lepá, kuanangan bulé rabelaaké sia ka paamian

¹¹ Ale kam Sasarainamai simanuntut bagamai, buí nuului kam pukakataí néné. Simaerú lé ului kam. Aipoí Taikamanua lé sibakkat sia sipasigagalaiaké simaerú. Sia geti sitaigalaiaké simaerú, tápei raagai nia Taikamanua

¹² Tápoi araumun'akéan galai tubunia ka sia si Demetrius. Beringan Taikamanua aiumun'akéan galai tubunia. Kai leú et ka kai akuumun'akéan kai sigalaiakenennia, samba ai lé nuaagai kam, sangamberinia sisegéakenenmai néné, bulat katonemiet lé

¹³ Bulat maigi peilé kuanenku ka tubum, tápoi sipinaatukku, maerú peilé tá kukua nia ka suratku

¹⁴ Bulat táan leú mauuju tapaaili, sedda peité tapatibo sipatutuggut mata. (1-15) Bulé ipanukani ekeu Taikamanua. Beri sia saaleinu leú et ka kudduatku néné, segé salamra ka tubum. Ai

leú nusegéaké salamku ka tubudda
sangamberi saaleita; ai leú nusenei sia.

Yudas

1 ¹ Ale kam Sasaraina sipiliy elé
simanuntut bagat Ukkui Taikamanua
samba sia pasikeliet Jesus Kristus.
Aku néné si Judas, sarainan Jakobus
pagugulet Jesus Kristus

² Bulat kukaroni бага: Bulé ipanukani
samba ibujai kam Taikamanua, samba
leú iaké ka kam panguruat sipususukkra

³ Ale kam Sasaraina simanuntut
bagakku! Aikabaraji geti akuaké suratku
néné ka tubumui, iaté masikolouaké
puaragat sisilóta simakeré. Tápoi
kineneiget bulat aitubbui bagakku
masingantru kam ka suratku néné, bulé
mariu-riu nuperjuang'aké kam nia teret
eddet putotonem bagamui ka tubut
Kristus, sipanguruat'akenen Taikamanua
ka paamiannia, sangamitsá tápoi teret
buru-burú

⁴ Aipoí sia néné, taiaagaietta lé,
aratugurú ka talagatta. Simakopé kataí
paraboat lé sia néné. Galajetda iaté
masipabailok Katuareman Simaerú,
iaté pagalaiat panguruat katet

Taikamanuanta, bulé ioi rasegéaké bagadda mugalai siobat akkulára. Tá leú et raobá masisiló, Jesus Kristus, sarat nia Utéta samba Tuhanta. Aipoi ka panandaatnia peilé atusiblaakéan ka Buko Sipunenan pagalaiat ukumanda

⁵Kirénangan anuagaian kam sangamberinia néné. Tápoi kenanen kisé, kuobá kukua nia mitsá ka matamui pagalaiat sigalaiakenen Taikamanua aibelaaké bangsa Israel ka laggai Misir. Lepá subuakénangan sia ka talagadda sitaimatonem бага ka tubut Taikamanua

⁶Bulé nuagai kam nia, beri leú et sia samalaika, ké rasaliuaké masigalai galajet tá siripot galajetda, pat kaddiuakérangan kudduatra, tá isoppi ikabé sia rattei simatom, Taikamanua, iribbaiaké sia ka kudduat simagep-gep ka tei polak. Iageti Kuddu sia sedda, teret iaili tetrenia rasiló ukuman ka Gogoi pasiukuman sabeu

⁷Repdem leú kam kelé ka laggai Sodom sambat Gomora, samba leú ka palagga-laggai ka bébénia, sipasigagalaiaké kelé sigalaiakenenda samalaika. Ragalaiaké pusilaingeat samba muparaboat bulat kasit-sit'akenen. Pat silórgan paoreat

ka api sitaípepé, bulé ibailiu nia
repdemenra sangamberi sirimanua

⁸ Kisedda leú te ka sia, apabulá rapaatu,
pat pajoddangan tubudda. Rapuaarak
lé geget Taikamanua, samba raobá
masipaloloi samakluk siabeu tiboí tubu
ka manua

⁹ Beringan ka sia si Mikael siutéaké
samalaika, tá aiperú kelé néné. Ka tetret
arapajogglo Sanitu leú et arapaukeli
kasei masiaalá tubut Mose simamatei, tá
maró bagania ijoaké Sanitu ka paloloiat.
Tápoi aikua lé kisé si Mikael ka tubut
Sanitu, "Bulé iukum'aké ekeu si Tuhan!

¹⁰ Ka paloloiat sikuadda néné,
arasaggangingan sangamberinia
sitaiaagaietda. Bulat kelé tarimeuan lé
sia, sitá paatuat, tuklet tubuddangan
lé raagai nia. Oto nenda te kabariaiat
katukataikatda

¹¹ Bulat mateirangan tedda!
Aratut'akéan kelé galai tubut Kain.
Kalulut rabesíaké ibara bulagatda,
gurukiddangan guluggut katupepeat,
kelé kai Bileam. Iageti sia leú et ka
sia tususubuaké leú et sia kalulut
pasisasaggangidda, kelé ka tai Kora

¹² Oto mugegelek sita masiitsó galai tubudda ka tetret ai kam mupupunen. Kalulut emúra mukom; bulat beri goisó ailadda, bulat sarat tubudda lé rapasisikeli, lepá. Sia néné, kelé tinobut siboroi rusa, tá ibebeléaké urat. Ialeú et sia néné kelé loiná sitaipububua, kenanen aiailingan tetret pubuaat buat kaju; samba bulat kelé loiná siburau lé sia, pat oi sambat ungatnia, amatteian sia

¹³ Kelé onut koat sikataí, pat pububutnangan, kisedda te sia néné, rabelaaké bubut ka galai tubudda sipakaila sirimanua. Makeré lé sia kelé panyanyat simatui-tuiet, kaipa nia ei. Oto aitarek'akéan Taikamanua kudduatra ka simakopé kataí gep-gep. Iageti kuddu sia sedda teret buru-burú

¹⁴ Si Enok, reddenan sikapitu barania kai Adam, ai sibalatnia pagalaiat néné. Aikua si Enok, "Itsó pei kam, momoi te si Tuhan sambadda sipuriribu samalaikania sipunenan

¹⁵ masihakimi sangamberi sirimanua. Iuukum'aké te sia si Tuhan sangamberi sikataí paraboat kalulut sigalaiakenenda kasit-sit'akenen. Samba iuukum'aké te

sia sijo samba sitaimareddet ka nga-nga, kalulut paloloiat sitiboakenenda.

¹⁶ Sarat mutetet samba masijoaké sabagei lé ragagalai. samba sarat siripot pubobot-bot akkulá ka jo lé rapaparaboat'aké. Masiatsi tubu samba masiumun sabagei lé ragagalai, bulé ibara uktukra

¹⁷ Tápoi kam geti ka kam ale Sasarainangu, kau nurepdem kam sikuadda siboikí tai apostel Tuhanta Jesus Kristus

¹⁸ Arapoiliat'an poí ka matamui siboikí, iaté, kei iaili tetrenia Gogoi Sialu, babara te sia siasá kam, iaté sia siparaboat'aké siripot pubobot-bot akkulára ka sikataí

¹⁹ Sia té néné sibaraaké karaganan ka paamian, aisop-sop'an ka tubudda galai tubut polak néné. Tá aisosop-sop ka tubudda Ketsat Sipunenan

²⁰ Tápoi kam geti ka kam ale Sasaraina, kau imariu-riu nujago kam puririmanuan tonem bagamui ka tubut Kristus; aipoí tonem bagamui néné, bulat maliná. Kau nupaniddou kam ka tubut Taikamanua ka geget Ketsat Sipunenan

²¹ Samba kau leú imariu-riu nukuddu kam ka pasikelat nuntut bagat

Taikamanua, ka pasingengenamui iaili tetrenia ioi panguruat katet bagat Tuhanta Jesus Kristus, sipasiaaké ka tubumui purimanuaiat sipulelelek samba sitaitatata

²²Kau nupatoilá kam nuntut bagamui ka tubudda simarua бага

²³Tik-tik kam sia rabela ka api, buí ramalabó. Ka sia sabagei leú et, kau nupatoilá kam katet bagamui ka tubudda ka lotó. Tápoi kau nukasit-sit'aké kam parabotda, samba leppeira sisappot pubobot-bot akkulára ka jo

²⁴Aipoí Taikamanua, simagege masipasikeli kam, buí nubelé kam, samba sipasiaabbít kam ka matania ka simalatsat ka angkat бага samba sitá kuat tubu ka sikataí

²⁵sarat nia lé Taikamanua, Sipasiaarauaké sita, sinilóta ka sigalaiakenen Jesus Kristus Tuhanta. Nia té Taikamanua sipululatsat, samba sipulubeunan, sipasikukup-kup'aké samba berwibawa barania ka panandaatnia peilé, pat aili teret buru-burú! Amen.

Wahyu

1 ¹ Bagat buko néné iaté pagalaiat sangamberi sipinatoilat Jesus Kristus, sipuaaili ka gogoi sibabara. Aipoiliat sangamberinia néné Taikamanua ka tubut Kristus, bulé isegéaké nia ka tubudda sapagugulet Taikamanua pagalaiat sipuaaili ka gogoi sibabara.

Aikoiniaké malaikania Kristus ka tubut Johannes, paguguletnia, bulé ipoiliat sangamberinia sipuaaili néné, ka tubunia

² Bailiu ka sia si Johannes, poiliatnangan sangamberi siitsónia néné. Oto néné te pangasegekatnia pagalaiat patonekat Taikamanua siron'akenen Jesus Kristus ka simuneng'akenennia

³ Oto mauktuk te sia sipasibabatsaaké samba sipasiaarep katuareman siniblaakenen buko néné, samba sipasirereddet sangamberinia sitususurat ka bagania. Aipoí táan mauju ipuaili sangamberinia néné

⁴ Ale kam Sasarainamai sikukuddu ka paamian sipitu néné ka Asia! Aku sipuoni si Johannes néné bulat aikukakaroni

baga, bulé tupanguruat'aké ka tubumui panukanan samba pabujaiat sibara ka Taikamanua; iaté nia, tonemnangan lé aian nia, samba siturerere kababara, sambat simariu-riu kababara; samba leú et sibabara ka sipitu ketsat sikukuddu ka matat uddenan purimataat Taikamanua

⁵samba leú sibabara ka tubut Kristus sipasimumuneng simatopit. Nia lé bulat siboikí aisuruaké Taikamanua ka simamatei, samba nia leú et masikukup-kup'aké tai rimata ka polak néné. Bulat makaté bagat Jesus ka tubutta, samba kalulut kamamateinia, belaakénangan sita ka jotta

⁶samba bailiuakénangan leú et sita sara bangsa sikokoiaenen sarat imam, sipuukú galajet Taikamanua, Ukkuinia. Jesus Kristus te sipulubeunan samba sipulugege teret buru-burú. Amen

⁷Itsó kam, aian nia momoi aikukunemi nia tinobut! Raiitsó te nia sangamberi sirimanua. Beri sia sipasipupunu nia leú et, raiitsó nia. Mulului-lui te sia sangamberi taikapolak kalulunua. Oo, bulat momoi nia! Amen

⁸Aikua si Tuhan Taikamanua, "Aku té panandaatnia sambat leú et

kalepakatnia, iaté nia bulat tonemnangan
lé aian nia, siturerere kababara, sambat
sibabara teret buru-burú, sambat
Sipulugege.

⁹Aku néné iaté sipuoni si Johannes,
sarainamui sikeré besit tubu mangorik
pangoringan siloketda sangamberi
sipasiului Kristus. Maom bagatta
mangorik siripot puoonitta paamian
bakkatnia. Araribbaiaké aku ka nusa
Patmos kalulut sesegéakéku patonekat
Taikamanua, siron'akenen Jesus ka
simuneng'akenennia

¹⁰Ka gogoi Tuhan, kuneminangan aku
Ketsat Sipunenan, arepkungan leú et
nga-nga simaron, kelé nga-ngan pipiau,
ipanibo ka tei-teiku

¹¹Kuanangan nga-nga néné ka
tubukku, "Surat'aké sangamberinia
siitsónu, lepá kaunungan nia buko néné
ka paamian sipitu, iaté: Epesus, Smirna,
Pergamus, Tiatira, Sardis, Piladelpia,
sambat Laodikea.

¹²Iageti pitsakkungan tei-teiku kuitsó
kasonia sipaninibo ka tubukku. Oto
itsókungan pitu ngambua reret kudduat
alito sigalai sibara ka emas

¹³ Ka tangan reret kudduat alito, ai sara sipuririó; ituitsó kéan lé mutubu sirimanua. Ai saraubánia simananta pat aili ka rerenia. Ka rurukatnia ai aipakei tabbot rurukat sigalai sibara ka emas

¹⁴ Mabulau alainia kéan lé bulut biri-biri, bulat kéan lé bagat batta. Matania aimuju-juluu kéan lé api

¹⁵ rerenia aimukikinam kéan lé baí tembaga silabó. Nga-ngania kéan lé nga-ngan oinan puruupugat sabeu

¹⁶ Ka kabeinia sikattoet, ai pitu panyanyat, samba ka ngu-ngunia ai sara lanjau simalauru rua ngasilá nia. Matania matoro, kéan lé matat sulu sinágó

¹⁷ Oto kelé akuitsó nia, purappokkungan ka matania, bulat kéan lé simamatei, aku. Tápoi lepá rapeakénangan kabeinia sikattoet ka tubukku, iageti kuanangan ka matakku, "Buí numalotó! Aku té néné panandaatnia samba leú et kalepakatnia

¹⁸ Aku té néné sipuririmanua! Amateian aku, tápoi itsó peité, amurimanuangan aku teret buru-burú. Aku lé sipanei-nei kamateiat, samba taikabaga

¹⁹ Oto kalulut néné, surat'aké sangamberinia siitsónu, iaté sangamberi

sibabara kineneiget, samba aponia
sipuaaili ka gogoi sibabara

²⁰ Néné te kelé keleatnia sipitu
panyanyat siitsónu kai kattoetku,
samba sibara ka sipitu reret alito sigalai
sibara ka emas: Panyanyat sipitu iaté,
samalaikat paamian sipitu, samba sipitu
reret kudduat alito, iaté, paamian sipitu."

2¹ "Surat'aké kisé ka tubudda
samalaikat Epesus: Aikoí né
patonekat sibara ka sia sipasiomet'aké
kai kattoetnia panyanyat sipitu, samba
sipueenung ka talagat reret alito sipitu
sigalai sibara ka emas

² Ai lé kuaagai sangamberinia
sigalaiakenenmui: Bulat ainumomo-
moaké kam tubumui mugalai, sambat
bulat makopé om bagamui. Aikuaagai
bulat beri tutuna bagamui ka sikataí.
Sia sipasiooniaké tubuna apostel, oto tá
sibulatnia, anuujujan kam sia, samba
anuagaian kam pabokoatda

³ Anuom'aké samba amangorik'an kam
kalulut aku, samba tá amabelé bagamui

⁴ Sarat néné lé taiset bagakku ka
tubumui: Táan ainupukakateki kam aku
baga kelé ka panandaatnia

⁵Oto kalulut néné, bulat amakopéan kerunia anubelé kam! Bauaké kam paatuatmui, samba galaiaké kam kelé sigalaiakenenmui siboikí. Ké tá baí nugalaiaké kam sikuakku néné, oi aku kuburau reret alito ka kudduatnia

⁶Tápoi ai leú te simaerú sigalaiakenenmui, iaté: Malagá bagamui ka sigalaiakenenda sipasiului Nikolaus, simalagat bagakku kaku leú et

⁷Kasei simaarep piú, kau ilelek'aké sikuat Ketsat Sipunenan ka tubudda sapaamian! Simamanang kuoobáaké rakom buat loiná purimanuaiat sipututútú ka Monen Taikamanua.

⁸"Surat'aké kisé ka tubudda samalaikat paamian Smirna: Aikoíné patonekat sibara ka tubut panandaat samba kalepakat; simamatei sambat sitususuru mitsá

⁹Ai lé kuaagai pureu-regat bagamui; samba ai leú et kuaagai gebámui, tápoi siripokatnia simakayo lé kam! Akuagaian paloloiat sikuadda ka tubumui, sikua tubuna tai Jahudi, oto tá; tápoi paamianda Sanitu lé sia

¹⁰Táan té mauuju ioi ka tubumui pangoringan; aipoí buítá nuorik kam

néné. Kalulut néné buí numalotó kam. Sarat néné lé repdemenmui, Ikakau té kam Sanitu piga pá ka talagamui ka bagat penjara, bulé isibo kam. Pulu ngagogoi te burúnia nupango-ngorik kam sedda. Oto buítá numatopit kam masitut aku teret matei, iapeité akékungan ka kam purimanuaiat sipulelelek sambat simatom kelé sara hadiah kamamanangmui

¹¹ Kasei simaarep piú kau ilelek'aké sikuat Ketsat Sipunenan ka tubudda sapaamian! Sia simamanang, táan raorik apa pá, kalulut kamateiat sikarua.

¹² "Surat'aké kisé ka tubudda samalaikat paamian Pergamus: Aikoíné patonekat sibara ka tubunia sipasiomet'aké lanjau simalauru rua ngasilánia

¹³ Aikuaagai kudduatmui, iaté ka kudduat purimataat Sanitu. Matopit kam masitut aku. Beringan poí ka tetret aitumateiaké ka matamui si Antipas sipasimumuneng'aké aku simatopit ka markas Sanitu tá anuputatá kam putotonem bagamui ka tubukku

¹⁴Tápoi kenanen kisé, ai piga pá sitaioobaket bagakku ka tubumui: Iaté, ai piga pá sia ka talagamui sipasitutum'aké nganturat Bileam. Aipoí aipangantoman nia si Bileam si Balak néné, bulé iagai kipa ipaeerú ioi ramajo bangsa Israel; iaté ináná sia rakom kan sibuluakenen ka tubut bulungan samba leú et bulé ragalaiaké pusilaingeat

¹⁵Samba ai leú et sia ka talagamui situm'aké nganturatda sipasiului Nikolaus

¹⁶Oto bauaké kam paatuatmui! Ké geti tá nubauaké kam paatuatmui, táan mauju oi aku kusaggangi sia lanjau sikukuddu ka ngu-ngungku

¹⁷Kasei simaarep piú kau ilelek'aké sikuat Ketsat Sipunenan ka tubudda sapaamian! Simamanang, kuoobáaké rakom manna simalipput, samba senenda rasisiló bukkú simabulau sibara kaku. Ka bukkú néné, ai atusurat'aké sara oni sibau, sitaiaagaietda kasei pá, sarat sia lé sipasisisiló iagai nia.

¹⁸"Surat'aké kisé ka tubudda samalaikat paamian Tiatira: Aikoíné patonekat sibara ka Togat Taikamanua, sibara mata sipuju-juluu kelé api, samba rerenia sipukikirisau kelé tembaga silabó

¹⁹ Ai lé kuaagai sangamberinia
sigalaiakenenmui, samba ai lé kuaagai
pakakatémui бага pasasambamui,
topitmui, pugagalaimui, samba leú et
om bagamui masiorik pangoringan.
Aikuaagai ronmui kineneiget mugalai,
belé peilé kelé siboikí

²⁰ Tápoi ai taiseset bagakku ka
tubumui: Aitututu bagamui ka tubut
Isebel, iaté sinanalep sikua tubuna
pakoiniet Taikamanua. Amaingingan
sia sapakoinietku, sipataju nia
sambat sipangantru nia, bulé ragalai
pusilaingeat, samba leú masikom kan
sibuluakenen ka sabulungan

²¹ Akukauan ka sia oggak, bulé ibauaké
paatuatnia, tápoi tá iobá iariaké galajet
pusilaingeat

²² Oto repdem néné! Kurarapdam'aké
te nia pat bara besínia ka pereman.
Pangorikrangan simakopé sedda,
sambadda sabagei sipaeet ka
tubunia. Kineneiget te kugagalaiaké nia
sangamberinia néné, sarat ké raariaké
geti masigalaiaké jo sambat nia ka sia
néné, iapeité taigalaiakékungan nia

²³ Kumamateiaké leú te sia ka sia
sipasiuluinia, bulé raagai nia sangamberi

paamian, puaaku nia siagai masikeruji
sipinaatu sambat paatuatda sirimanua.
Kusisiliaké te ka tubumui siripot
sigalaiakenenmui sene-senemui

²⁴Tápoi kam geti ka kam sabagei ka
Tiatira, tá anutut'aké kam nganturat
sikataí néné, samba tá anugelai kam
pusikuat paatuat Sanitu. Kukua ka
matamui, tá kututuppai ka tubumui
abbinen sisanéaké kam

²⁵Tápoi pat oi aku ka gogoi sibabara,
kau imariu-riu nuomet'aké kam
siikep'akenenmui

²⁶Oto sangamberi simamanang pat aili
ka kalepakatnia mariu-riu ragalaiaké
siobat bagakku, kaukungan gege
ka tubudda, kelé sisilóku kaku ka
Ukkuiku. Rasisiló te gege sibara kaku
masiutéaké tai bangsa ka gege simaron,
masisubuaké tai bangsa kelé raragat'aké
parió polak

²⁷(2:26)

²⁸Rasisiló te panyanyat usutat sibara
kaku

²⁹Oto kasei simaarep piú, kau ilelek'aké
sikuat Ketsat Sipunenan ka tubudda
sapaamian."

- 3**¹ "Surat'aké kisé ka tubudda samalaikat paamian Sardis: Aikoíné patonekat sibabara ka tubunia sibara pitu ketsat Sipunenan sambat sibara pitu panyanyat. Ai lé kuaagai sigalaiakenenmui. Katukuanannia geti, ai kam muririmanua, tápoi siripokat nia, ai lé kam mamatei
- ² Oto kauan, suru kam, paron kam apa sipulelegei siikep'akenenmui, ainangan tápei mamatei sangamberinia. Aipoí kipa siitsóku ka sigalaiakenenmui, tápei anai beri sara simalelek ka matat Taikamanua
- ³ Repdem kam mitsá sangamberinia sigelaiakenen ka tubumui siboikí, samba sangamberinia siarepmui. Oto galaiakéan kam sangamberinia sambat bauakéan kam paatuatmui. Bulat ké tá nureddet kam, oikungan leú et ka tubumui kelé sipananangkou; bulat tá te nuaagai kam, tetrenia kaoijananku
- ⁴ Tápoi ka talagamui ka Sardis néné, ai peilé sia sijago bulé mariu-riu maliná leppeira. Sambamai té mueenung muleppei leppei simabulau, aipoí mateú sia ka sia kelé nenda
- ⁵ Ka tubudda simamanang tukakau saraubá simabulau. Oninda leú et, tá

tupoposa ka Buko Purimanuaiat. Samba kumumuneng'aké te ka matat Ukkuiku sambat ka matadda samalaikania, pubabakkatku sia néné

⁶Kasei sibara piú, kau ilelek'aké sikuat Ketsat Sipunenan ka tubudda sapaamiannia!

⁷"Surat'aké kisé ka tubudda samalaikat paamian Piladelpia: Aikoíné patonekat sibara ka tubunia sipunenan sambat bulat sibulatnia. Nia té sipasiomet'aké panguksik sibakkatit Dapid; ké ibukáaké baí, bulat beri sia sara siooi masipat-pat'aké, samba ké ipat-pat'aké baí, bulat beri sia sara siooi masibukáaké

⁸Ai lé kuaagai sigalaiakenenmui. Ai leú et kuaagai taimakopé nia ronmui; anutut'akéan kam ngantomanku, samba matopit kam ka tubukku. Ka kam akubukáakéan sara matatbaliu, sitaioi rapat-pat'aké kasei pá onia

⁹Repdem kam néné: Sia sibailiu sikauman Sanitu, sipaboboko, sikua tubuna tai Jahudi, oto tá, bulat kukakau sia murappo ka matam. Sedda peité raagai punununtukikku ekeu бага

¹⁰Kalulut anureddet'an poí kam surukatku, bulé numaom kam бага,

aku leú et kaku kusasakkeri leú et kam
ka paoreat sipuaaili ka sangaliot polak
néné. Ipuaaaili kelé néné geti, bulé itusibo
sia sangamberi taikapolak néné

¹¹Táan mauuju kuoi! Jago
kam sipulelelek sangamberinia
siikep'akenenmui, buí rarau-rauaké nia
kasei pá hadiah kamananganmui

¹²Simamanang, kubabailiuaké sia kelé
arigi ka uma sipunenan Taikamanuangu,
iageti kuddu nia sedda teret buru-burú.
Oto Onin Taikamanuangu sambat onin
laggai Taikamanuangu, iaté Jerusalem
sibau siooi sibabara ka manua, sibabara
ka Taikamanuangu, kususurat'aké ka
tubudda. Samba oningku sibau leú et,
kususurat'aké ka tubudda

¹³Kasei simaarep piú, kau ilelek'aké
sikuat Ketsat Sipunenan ka tubudda
sapaamiannia!

¹⁴"Surat'aké kisé ka tubudda
samalaikat paamian Laodikea: Aikoíné
patonekat sibara ka tubut Amen,
sipasimumuneng simatopit sambat bulat
sibulatnia, kabaraia sangamberinia
sibaraakenen Taikamanua

¹⁵Ai lé kuaagai sigalaiakenenmui;
samba ai leú et kuaagai, kam néné

ka kam, tá maleppet tá leú et maoloi.
Siripokatnia kam néné maoloi elé
maleppet pá

¹⁶Tápoi kalulut kam néné, maka
oloi goisó; samba tá maoloi, tá leú et
maleppet. Bailiu kugegelek'akéan lé
kam, nubela kam ka ngu-ngungku

¹⁷Anukua kam, 'Makayo kai samba
sangamberinia ai ka kai; bulat tá anai
simagulai.' Tápoi tá iaagai tubumui,
bulat kopet kataí nia uktukmui sambat
kopet reu-reu bagatta taitso kataí nia
puririmanuamui. Aipoí simagebá lé kam,
simabulutut samba simapeset lé kam ka
simerú

¹⁸Iaté lulunia kupangangantru
kam, bulé nusaki kam ka tubukku
emas, iaté emas simamurni, bulé
numakayo kam. Samba saki leú kam
ka tubukku lepei simabulau, bulé
ibara leppeimui, ituleppeji pububulutut
tubumui simailatta néné. Samba saki leú
et kam laggek lokot'akenen ka matamui,
bulé imakoinong matamui

¹⁹Kuaaséaké samba kupabobóboki
te sia simanuntut bagakku. Oto kau
imaron paatuatmui, samba bauaké kam
paatuatmui

²⁰ Itsó kam! Ai te aku muririó ka matatbaliu masiluu-luu. Ké ai sia sipasiaarep nga-ngangu, iageti bukánangan matatbaliu, gurú aku kuailiaké nia, pukommaian leú et sambamai

²¹ Simamanang kuoobáaké rapukuddu sambamai ka uddenan purimataatku, kelé kamamanangu leú et kaku, iageti kineneiget aian aku mukukuddu ruamai Ukkui ka purimataatnia

²² Kasei simaarep piú, kau ralelek'aké sikuat Ketsat Sipunenan ka paamian!"

4 ¹ Lepá bara mitsá siitsot matakku. Itsókungan sara matatbaliu sitububuká ka manua. Iageti maarepnangan mitsá nga-nga sipaninibo siboikí ka tubukku kelé nga-ngan pipiau. Pelé nga-ngania, "Sakaiaké ekeu sené. Bulé kupatoilá ka tubum sipuaaili ka gogoi sibabara.

² Oto kuneminangan aku Ketsat Sipunenan. Itsókungan leú et sara uddenan purimataat ka manua, ai sia sara sipuuuddet ka uddenan purimataat nenda

³ Matania makirisau kelé bukkú permata pakiri-kirisau simalainge; ai kirisau

limun, ai kirisau kiniu samba leú et kirisau limun simakinam. Ai linui sibokkó uddenan purimataat néné, kelé mutubu bukkú permata pakiri-kirisau simalainge; ai limun lumut; simakiniu kelé emas, kelé bukkú intan simakirisau

⁴Samba sibokkó uddenan purimataat nenda, ai mitsá rua ngapulu epat uddenan purimataat bagei. Sedda ai muuuddet rua ngapulu epat sia igidda tai bajá sipuleppei leppei simabulau, sibara kirit purimataat emas

⁵Ka uddenan purimataat nenda leú et bela toro simabilá samba bela leú et nga-ngan leleggu simakararat. Ka matat uddenan purimataat nenda leú et ai pitu ngambua soló sipuju-juluu; iaté nenda sipitu Ketsat Sipunenan

⁶Samba ai leú et ka matat uddenan purimataat, ituitsó kelé koat kaca, makirisau kelé kristal. Sikoilip uddenan purimataat, iaté senen bébénia, ai epat makluk, ka mata samba ka tei-teinia sut sarat mata

⁷Makluk siboikí ituitsó kéan lé mutubu singa. Sikarua kéan lé jai sikeú. Sikatelú sibara mata kelé matadda

sirimanua. Iageti sikaepat, ituitsó kían lé manyang sitububurut

⁸Kaepatnia makluk nenda, sarat paeenem igit kappóra, samba pat bókó, elé beri leú ka бага, sut sarat mata. Tá muaari rapuurai samakluk néné, sinágó samba sinoibó, rauraiaké, "Sipunenan, sipunenan, sipunenan lé si Tuhan, Taikamanua Sipulugege; tonemnangan aian nia, samba siturerere kababara samba leú et simariu-riu kababara.

⁹Iageti uraiakérangan urai pasiumun, samba urai masihormati samba leú et urai pusurakat sia siepat makluk néné ka tubunia sipuuuddet ka uddenan purimataat, nia té nia sipuririmanua teret buru-burú. Samba ka tetret ai sia muuurai siepat makluk néné

¹⁰purappoddangan leú et ka sia sirua ngapulu epat tai bajá ka matania sipuuuddet ka uddenan purimataat, paniddogiddangan leú et nia sipuririmanua teret buru-burú néné. Lepá ribbaiakérangan kirit purimataatra ka matat uddenan purimataat pelé nga-nganda

¹¹"Ale Tuhan, Taikamanuamai! Ekeu lé mateú masisiló katuumun, hormat

samba gege. Aipoí ekeu lé amasibaraaké sangamberinia, samba ka teúnu leú et aibara samba aipurimanua sangamberinia néné."

5¹ Lepá itsókungan sara purunan buko, ai ka kabei sipuuuddet ka uddenan purimataat. Sut lé ka bagat buko nenda surat, bara ka бага, bara leú et ka uddutnia, samba atumeteraiakéan pitu segel ka tubunia

² Iageti itsókungan sara malaika simagege sipugegerei masikua, "Kasonia simateú masibabá-bá segel néné samba masibabailá bagania?

³ Tápoi beri sia sikukuddu ka manua sambat ka polak, elé sikukuddu ka taikabaga simaró бага masibailá buko néné, samba masiitsó bagania

⁴ Iageti pusoukungan leú et, pat pasikúnangan aku, aipoí beri sia sara simateú masibailá buko néné, ioi raitsó bagania

⁵ Oto kuanangan nia sara ka talagadda tai bajá ka tubukku, "Bá pusosou! Itsó peité! Singa sibara ka sukut bangsa Jahuda, punuteteu Dapid sabeu, amamanang'an nia. Nia lé momoi

masibabá-bá segel samba masibabailá buko nenda.

⁶Lepá itsókungan sangamuneng Togat Biri-biri ai nia muririó ka talagat uddenan purimataat, airabobokkó nia samakluk siepat samba sangamberi tai bajá.

Ituitsó ka sia Togat Biri-biri nenda, kéan lé atujá-jáan. Sibara pitu ban samba pitu mata: iaté pitu ketsat Taikamanua sikoiniakenennia mei ka sangaliot polak

⁷Iageti ei nia Togat Biri-biri masialá purunan buko néné ka kabei sikattoet sipuuuddet ka uddenan purimataat

⁸Aiaalá buko néné Togat Biri-biri, purappoddangan leú et ka sia makluk siepat néné sambat sirua ngapulu epat tai bajá ka matania. Ai ka kabeira sangamberidda kecapi sambat makkó emas sibara ka бага kamenyan, iaté paniddogatda taikauman Taikamanua

⁹Iageti uraiakérangan urai sibau pelé nga-nganda: "Ekeu lé mateú masialá buko nenda samba masibabá-bá pasege-segelnia. Aipoí atumateiakéan ekeu, samba kalulut kamamateinu, bailiu sangamberi sirimanua ka senen suku, nga-nga, negara samba bangsa, nusaki, ibailiu sia bakkat Taikamanua

¹⁰ Anubailiukéan sia sara bangsa
simakokoi sarat tai imam, bulé rapuukú
Taikamanuanta, samba rakup-kup'aké
polak néné.

¹¹ Lepá itsókungan mitsá. Iaté akuarep
nga-ngan malaika sipuribu elé sipuju-
juta iginia. Ai sia muririó masibokkó
uddenan purimataat sambadda makluk
siepat sambat tai bajá

¹² Iageti puurairangan simaron, pelé
nga-nganda, "Mateúan ka sia togat Biri-
biri sijá-já néné, isiló gege, pukayoat,
pusisikut paatuat sambat puroron;
mateú tuhormati, tuabeuaké samba
tuumun'aké nia!

¹³ Iageti arepkungan rapuurai
sangamberi makluk ka manua, ka
polak, ka taikabaga sambat ka koat;
momoi takua sangamberi makluk ka
sangaliot polak sambat manua néné,
pelé nga-nganda, "Umun'akenen,
hormanen, latsat'akenen samba
sipasikukup-kup'aké teret buru-burú lé
nia, sipuuuddet ka uddenan purimataat,
sambat Toga Biri-biri néné!

¹⁴ Alegiddangan leú et nia samakluk
siepat, "Amen!" Iageti ka sia leú et tai
bajá, purappoddangan rapaniddogi nia.

6¹ Lepá itsókungan Togat Biri-biri aibabá-bá segel siboikí ka talagat sipitu segel nenda. Iageti arepkungan rapanibo ka sia makluk siepat, palé nga-nganda, "Konan!" Nga-nganda ituarep kéan lé nga-ngan leleggu beunannia

²Oto kinerekkungan nia, iageti itsókungan sangamuneng kuró simabulau tubu. Ai ka kabeinia sikukuddu ka tei-tei kuró néné rou-rou, samba ka tubunia atukau sara kirit purimataat. Iageti puenungnangan ka mata, kelé simama-manang sieei masioppu kamanangan

³Lepá bá-bánangan segel sikarua Togat Biri-biri néné. Iageti arepkungan ipanibo ka sia makluk sikarua, pelé nga-ngania, "Konan!"

⁴Belanangan leú et ka sia kuró bagei. Tubut kuró nenda simabonan. Atukau ka sia sipuuuddet ka tei-teinia gege masitatóaké paabanan ka polak néné, bulé rapamatei pasasambadda sirimanua. Kaurangan leú et ka kabeinia sara lanjau simalio бага

⁵Lepá bá-bánangan segel sikatelú Togat Biri-biri néné. Oto arepkungan leú

et nia ipanibo ka sia makluk sikatelú,
pelé nga-ngania, "Konan!" Iageti
kinerekkungan nia, oto itsókungan leú
et sangamuneng kuró simapusú tubu. Ai
ka kabeinia sipuuuddet ka tei-tei kuró
néné, sara timbangan

⁶Iageti arepkungan leú et kelé sara
nga-ngan sogá sibara ka talagadda
samakluk siepat néné. Pelé nga-
ngania, "Sangaliter gandum simaerú,
simemet nuntut sakit upa ka bagat
sangagogoi, samba telu ngaliter gandum
bagei simemet nuntut upa ka bagat
sangagogoi leú et. Tápoi buí nupakataí
paloina-loinat zaitun sambat monen
anggur!

⁷Lepá bá-bánangan leú et segel
sikaepat Togat Biri-biri néné. Iageti
arepkungan leú et ipanibo ka sia makluk
sikaepat, pelé nga-ngania, "Konan!

⁸Oto kinerekkungan nia, itsókungan
leú et kuró simakamung tubu. Onin
sikukuddu ka tei-teinia, iaté Kamateiat.
Aitutut nia ka legre ka sia Laggai
Taikabaga. Atukauan ka sia gege rakup-
kup'aké seperepat polak néné, bulé ioi
rapamatei ka enungan pasaggangan, ka

enungan pulajeat, ka enungan oringen,
samba kalulut tarimeu simasagbang

⁹ Lepá nenda, bá-bánangan mitsá
segel sikalima Togat Biri-biri néné.
Iageti itsókungan ka tei langgatan ai
paketsa-ketsatda simateiakenen, kalulut
paroronda ka patonekat Taikamanua ka
simuneng'akenenda

¹⁰ Iageti pugereirangan leú et masikua,
"Ale Tuhan Sipulugege, sipunenan samba
bulat sibulatnia! Pigamoian lé nuaadili
sia taikapolak samba nuukum'aké sia
kalulut mamateiakéra kai?

¹¹ Ka tubudda ai atukau sara saraubá
simabulau. Lepá koiniakérangan sia,
bulé raaroiaké tubudda goisó, pangenan
itukapplu igidda saaleira sikeré besit tubu
mugalai, samba leú et sasarainanda,
mateiakenen peilé, kelé ka sia néné

¹² Lepá itsókungan ibá-bá segel
sikaenem Togat Biri-biri néné. Iageti
baranangan leú et teteu simakopé kataí
ron. Mapusúnangan leú et matat sulu
kéan lé komang simapusú simakelá
baga, samba ka sia leú et laggó
mabonannangan kelé logau

¹³ Pabelénangan leú et tubunia ka sia
panyanyat sibara ka manua, kéan lé

buat sileu simatsit, sibara ka buttetnia
ka tetret iboroi nia rusa simapiret

¹⁴ Ka sia leú et manua tatá, kelé karate
sipurut'akenen, samba paoksaknangan
leú et tubunia ka sia sangamberi leleu
sambat panusa-nusa ka kudduatnia

¹⁵ Iageti eirangan leú et sangamberidda
tai rimata ka polak, siabeu tiboi
tubu, tai panglima, simakayo sambat
sauté, samba leú et sia sabagei, iaté
sapagugulet elé sipuuuja, mulipput ka
ngaliu bukkú samba ka paela-elak leleu
bulak

¹⁶ Kuaddangan leú et ka matat palele-
leleu samba pabukku-bukkú, "Sak-sak
kai! Sakkeri kai ka matania sipuuuddet
ka uddenan purimataat, samba ka golut
Togat Biri-biri

¹⁷ Aiailingan poí gogoi sabeu sikataí
galai, oto kineneiget'an té tetrenia,
rasegéaké bagadda mugolú; bulat beri te
sia sara simaró бага murió ka matadda!"

7 ¹ Lepá nenda, itsókungan ai sia epat
samalaika sipuririó ka epatnia matat
rusa sipuboboroi ka polak. Pet-petrangan
leú et ka epatnia matat rusa ka polak,
bulé buí ipuboroi rusa ka polak elé ka
laut, elé ka paloina-loiná

² Lepá mitsá itsókungan sara malaika bagei barana ka kabelaiat sulu. Ai aiabbrit segel sibara ka Taikamanua sipuririmanua. Iageti pugereinangan leú et isogai sia samalaika siepat sisiló gege sibara ka tubut Taikamanua masipakataí polak sambat koat

³ Kuanangan ka matadda malaika néné, "Bá pakakataí kam boikí polak sambat manua, elé paloina-loiná, ké tápei akukau kai toggaiat segel ka tou-toura sapakoiniet Taikamanuanta.

⁴ Oto poiliatnangan ka tubukku kababaradda 144.000 sia igidda sikau toggaiat segel Taikamanua ka tou-toura. Sia néné sirurú ka sipulu rua ngasuku ka bangsa Israel

⁵ ka senen suku tualá 12.000 sia igidda. Iaté sibara ka suku: Jahuda, Ruben, Gat

⁶ Aser, Naptali, Manase, Simon, Lepi, Isasar

⁷ sibara ka suku Sebulon, Josep, sambat sibara ka suku Benyamin

⁸ (7:7)

⁹ Lepá mitsá kinerekkungan nia, iageti itsókungan sirimanua simakopé igi, bulat tá tuagai nuntutda. Sia néné sibara ka senen bangsa, suku, negara, sambat

nga-nga. Ai sia musasaraubá simabulau
samba ai kakabeira katsaila rorot poula,
puriórangan leú et sirimanua simigi
néné, ka matat uddenan purimataat
samba ka matat Togat Biri-biri

¹⁰ Iageti pugereirangan masisogaaké,
"Ka Taikamanua lé ibabara puaragatta,
sipuuuddet ka uddenan purimataat
samba sibara ka tubut Togat Biri-biri!

¹¹ Sangamberidda samalaika murió
masibokkó uddenan purimataat
sambadda tai bajá samba leú et
samakluk siepat. Iageti purappoddangan
samalaika ka matat uddenan purimataat
paniddogiddangan leú et Taikamanua

¹² Oto pusogaddangan leú et
samalaika, rasogaaké, "Amen!
Tuumun'aké lé Taikamanuanta
sipululatsat sambat simasiku paatuat.
Mateú tukang ka tubunia pusurakat
sambat penghormatan. Ai ka tubunia
gege samba leú et ron teret buru-burú!
Amen.

¹³ Iageti nou-nounangan aku sara ka
talagadda tai bajá, pelé nga-ngania,
"Kasonia sipusasaraubá simabulau néné;
kaipa arabara?

¹⁴ Kuakkungan nia ka matania, "Tá té kuagai, Tuan. Kam lé te Tuan, iagai sia." Oto kuanangan nia ka matakku, "Sia té néné sipaarau ka paoreat sikataí besí. Arapalináan leppeira, arabulauakéan ka logau Togat Biri-biri

¹⁵ Iaté lulunia rapuririó ka matat uddenan purimataat Taikamanua, samba rapaniniddou ka tubunia, sinágó sambat sinoibó ka Uman Taikamanua. Samba memei nia ka talagadda, ka sia sikukuddu ka uddenan purimataat nenda, isakkeri sia

¹⁶ Táan raorik laje sambat oggou; táan raorik sulu elé rakat sulu

¹⁷ aipoí Togat Biri-biri sikukuddu ka talagat uddenan purimataat, ijajago sia. Palulunangan leú et sia ka bubuakat purimanuaiat. Ipoposa sangamberi eludda, Taikamanua."

8 ¹ Kelé aibá-bá nia Togat Biri-biri segel sikapitu, matangeunangan leú et manua, ai pá sitenga jam burúnia

² Iageti itsókungan malaika sipitu, ai sia muririó ka matat Taikamanua, samba ka tubudda néné atukau pitu ngambua pipiau

³ Ai mitsá malaika bagei sipasiaabbit sara kudduat pasilabokat kamenyan sigalai sibara ka emas, murió ka matat kudduat pasijá-jakat tarimeu buluakenen. Bulat maigi atukau ka tubunia kamenyan kaunen nia ka paniddogatda sangamberi paamian Taikamanua, samba leú et buluakenen ka kudduat pasijá-jakat tarimeu buluakenen sigalai sibara ka emas, sikukuddu ka matat uddenen purimataat Taikamanua

⁴ Sipaaleiaké paniddogatda sapaamian Taikamanua iaté, kujuk kamenyan sipuju-juluu leú et, aimunonoi-noi ka kabei malaika sipuririó ka matat Taikamanua

⁵ Lepá alánangan nia kudduat pasilabokat néné malaika, kaunungan ka bagania api sibara ka kudduat pasijá-jakat, tarimeu buluakenen iageti ribbaiakénangan leú et nia ka polak. Oto pugururuunangan leú et ka sia nga-ngan leleggu, samba ka sia bilá leú et, apabilá; lepá baranangan leú et teteu

⁶ Lepá nenda patarekrangan leú et tubudda mupiau, ka sia samalaika sipitu, sipasiomet'aké pipiau

⁷ Iageti pupiaunangan malaika siboikí, belénangan leú et urat es simatirit sambat api sigalú logau ka polak néné. Oto malabónangan leú et polak sepertelu lionia; kisedda leú et paloina-loiná samba papuo-puo sepertelu leú et lionia ka sia amalabó

⁸ Lepá mitsá pupiaunangan ka sia malaika sikarua; iageti kelé ai sara bulat sabeu, ituitsó kelé sara leleu sipuju-juluu, turibbaiaké ka bagat coat. Oto sepertelu lionia coat aibailiu logau

⁹ mateinangan leú et sepertelu iginia makluk ka coat; kisedda leú et ka sia pakapá-kapá, kataí sepertelu iginia

¹⁰ Lepá pupiaunangan ka sia malaika sikatelú, iageti belé ibelé sara panyanyat sabeu sipuju-juluu, kelé oong sibara ka manua, sak-saknangan leú et sepertelu bagat oinan samba bubuakat

¹¹ (Onin panyanyat néné, iaté, "Simapongit".) Iageti mapongitnangan sepertelu oinan, maigi sia amatei kalulut igidda sipasiloló oinan simapongit néné

¹² Iageti piaunangan ka sia pipiaunia malaika sikaepat. Bailiu tutipak sepertelu matat sulu, sepertelu matat laggó, samba sepertelu matat panyanyat, pat

lebbeinangan torodda sepertelu iginia.
 Kisedda leú et sepertelu aibeleki toronia
 ka sia tágó toronia, samba sepertelu leú
 et ka sia aibeleki gep-gepnia soibó

¹³Iageti lelek'akékungan nia, oto
 arepkungan ai sangamuneng manyang,
 ai nia tububurut ka pata, pelé nga-
 ngania, "Mateirangan te! Mateirangan te!
 Mateirangan te sangamberi sirimanua
 ka polak néné, ké maarep baí rapiau
 pipiaura ka sia samalaika sitelu!"

9 ¹Iageti pupiaunangan ka sia malaika
 sikalima, oto itsókungan ibelé ka
 polak sara panyanyat barania ka manua.
 Ai atukau ka tubut panyanyat néné,
 panguksik guluggut kamateiat

²Oto bukánangan matatbaliu guluggut
 kamateiat néné, panyanyat, iageti
 belanangan leú et kujuk sibara ka
 bagania, kéan lé sibara ka purusuat
 sabeu. Bulat pat gep-gep matat sulu
 sambat manua kalulut kujuk sibara ka
 guluggú nenda

³Belanangan leú et sin sibara ka kujuk,
 gorosot nia ka polak. Atukauan ka
 tubunia sin néné gege simakeré kelé ka
 telenga-ngá

⁴Tápoi atukeraaké lé sia rapakataí papuo-puo, elé paloina-loiná, elé siureman bagei. Sarat sia lé sitá anai toggaiat segel ka tou-tou sibara ka Taikamanua, rasasaggangi

⁵Tá tuoobáaké sin néné ramateiaké sirimanua, sarat masipaorei sia lé, ka bagat lima ngalaggó burúnia. Pulalap-lap sisonan sin néné, makeré kelé ipulap-lap sisonan telenga-ngá

⁶Ka lima ngalaggó nia nenda, bulat airabebesíaké ramatei sirimanua, tápoi tá mamatei sia; elé airaoobá matei, tápoi kamateiat, ai lé nia tuaareu ka tubudda

⁷Putubuat sin néné, makeré kelé kuró sieei pasaggak. Ka utéra ai sara, ituitsó kelé kirit purimataat sigalai sibara ka emas. Pumataatda makeré kelé matada sirimanua

⁸Alaira kéan lé alaira tainanalep, samba sotda kéan lé sot singa

⁹Rurukatda aitatabbó nia, kelé sara leppeí labá. Nau kappóra kéan lé nga-ngan kereta simigi ai sia memei pasasaggak

¹⁰Ai pai-paira sambat pasorotda kelé telenga-ngá. Ka bagat pai-paira nenda te, kudduat gegedda masibesiki

sirimanua, ka bagat lima ngalaggó
burúnia

¹¹ Ai rimatadda sipasiuutéaké sia.
Rimata néné iaté malaika sipasikeli
guluggut kamateiat. Oninia ka nga-
ngan Ibrani si Abadon; ka nga-ngan
Junani geti, si Apolion (katukolobatnia,
"Sipasikakataíaké")

¹² Oto paoreat siboikí atukapplungan.
Tápoi ai peilé mitsá babara, rua ngamata
paoreat

¹³ Lepá pupiaunangan ka sia malaika
sikaenem. Iageti arepkungan nga-nga
sibara ka epat taming kudduat pasijá-
jakat tarimeu buluakenen sigalai sibara
ka emas sikukuddu ka matat Taikamanua

¹⁴ Kuanangan nia nga-nga néné ka
matat malaika sikaenem, "Rugut sia
samalaika siepat, siappraakenen ka
Oinan Eprat!

¹⁵ Iageti beladdangan leú et malaika
siepat néné. Atupatarek'an sia
masipasikeli jam, gogoi, laggó sambat
rurat pasimateiatda sepertelu nuntutda
sangamberi sirimanua

¹⁶ Arapaagai ka tubukku, igidda
pasukan kuró néné, ai rua ngotu ngajuta
sia igidda

¹⁷ Oto ka siitsot matakku, akuitsó kuró sambat sia sikukuddu ka tei-teinia. Sia sikukuddu ka tei-teinia ai leppeira labá simakopé kataí bonan, samba kelé bukkú simakirisau; latsatnia latsat limun, sambat makiniu kelé belerang. Utet kuró néné kelé utet singa, samba aibebela api, kujuk sambat belerang ka ngu-ngunia

¹⁸ Oto sepertelu nuntutda sirimanua aimateiaké ka sia pasimamatei sitelu néné; iaté api, kujuk, sambat belerang sibebela ka ngu-ngun kuró

¹⁹ Puroronnia ka sia kuró néné, iaté sibara ka ngu-ngunia sambat ka pai-painia. Pai-pai kuró néné, kelé ulou sibara uté. Pai-painia te ikakau ka sia kuró, masibesiki sirimanua

²⁰ Tápoi kenanen kisé, sia sirimanua sipulelegei sitaimamateiakenen pasimamatei néné, tá leú et ragagalak'aké sigalaiat kabeira. Tá leú et raaariaké masibuluji paketsa-ketsat sikataí samba bulungan emas, perak, tembaga, bukkú sambat loiná sitaimaitsó mata, élé sitaimaarep piú, samba sitaipueenung

²¹ Samba, tá leú et ragagalak'aké
paraboatda sikataí, iaté, pamamatei,
pugagaut, paelet, sambat
pananangkou.

10 ¹ Lepá itsókungan sara malaika
bagei, bulat simagege barania ka
manua. Ai kukunemi nia tinobut, samba
ai bobokkó uténia linu. Matania matoro
kelé matat sulu, samba rerenia kelé
leí-leí api

² Ka kabeinia ai sara purunan buko
sigoisó sitububuká. Rerenia sikattoet
iperáaké ka coat, tápoi rerenia geti
sikatsiu iperáaké ka polak

³ Iageti pugereinangan leú et kénan lé
ukkut nga-ngan singa. Lepá aipugerei
malaika néné, aleginangan nia leleggu
sipitu sipuguguru-ruu

⁴ Lepá aipuguru-ruu nga-ngan leleggu
sipitu néné, gelaikungan kusurat'aké nia,
tápoi arepku lé nga-nga sibara ka manua
sipasikukua, "Pakele lé tiboiet sikuat
gululuu leleggu néné; bá susurat'aké!

⁵ Iageti itsókungan malaika
sipasipeperaaké rerenia silá ka
coat, silá ka polak, aitotoiaké kabeinia
sikattoet ka manua

⁶ Pusuppanangan leú et ka onin Taikamanua sipuririmanua teret buru-burú, sipasibabaraaké manua sambat polak samba leú et koat samba sangamberinia sibabara ka bagania. Iageti kuanangan malaika, "Táan tupauuju iaili tetrenia

⁷ Tápoi ké geti iaili tetrenia rapupiau ka sia samalaika sipitu, taddaakénangan nia ka sia Taikamanua masigalai keleat sirencanaakenennia, kelé ka sikuania ka tubudda sapakoinietnia, iaté tai nabi.

⁸ Lepá arepkungan nia mitsá ipanibo ka tubukku nga-nga sibara ka manua néné, pelé nga-ngania, "Kenan nualá purunan buko ka kabei malaika siperáaké rerenia silá ka bagat koat, silá ka polak!

⁹ Iageti eikungan leú et ka tubut malaika masitiddou, bulé iaké ka tubukku purunan buko sigoisó nenda. Oto kuanangan ka matakku, "Aláan, lepá komnungan leú et nia. Mapopongit te nia ka balugúnu, tápoi ka nga-ngam geti makai-kai, kelé suat mani.

¹⁰ Iageti alákungan nia purunan sigoisó ka kabeinia, komkungan leú et nia. Ai nia ka bagat nga-ngangu makai-kai

kelé suat mani, tápoi kelé kuguk nia, ei nia ka balugú, mapongitnangan leú et

¹¹ Lepá kuanangan ka matakku, "Pakakra mitsá katuareman simaerú sibara ka Taikamanua siorak ka pagalaiat tai bangsa, negara, nga-nga sambat tai rimata."

11 ¹ Lepá akénangan ka tubukku sangatippú loiná simakeré kelé tuturá kirekat, kuaddangan ka matakku, "Kenan nukireki Uman Taikamanua sambat kudduat pasijá-jakat tarimeu buluakenen. Addenungan leú et piga sia sieei maniddou ka bagania

² Tápoi buí nukireki betbet Uman Taikamanua, aipoí atukauan nia kudduatra sitaiagai si Tuhan. Aipoí rakakalaaké te laggai sipunenan néné, bulé ragalai siobára ka tubunia, ka bagat epat ngapulu rua ngalaggo burúnia

³ Kukokoiniaké te sia rua sipasimu-muneng'aké aku sipuleppei purúpú, rasegéaké katuareman sibara ka Taikamanua ka bagat 1260 ngagogoi burúnia.

⁴ Karuadda sipasimu-muneng'aké aku néné, iaté, rua ngaloiná zaitun, samba rua ngambua reret alito, sikukuddu ka

matat Tuhan, sibaraaké manua sambat polak

⁵Ké ai sia siisiaké masigalaiaké sikataí ka tubudda, belaakérangan ka nga-nganda api sipasisusubuaké saggakra. Ka enungan kelé néné, bailiu sangamberi saggakra siisiaké masipaoreji sia, tumateiaké

⁶Ai ka tubudda gege masipet-pet'aké manua, buí ibelé urat kaburut rapakakra katuareman sibara ka Taikamanua. Ai leú et ka tubudda gege ka tubut sangamberi bubuakat, bulé ioi rabailiuaké oinan, bailiu logau. Samba ai leú gege ka tubudda rabó-bóaké ka polak néné, sene ngamata paoreat, kaipa gogoinia itutu bagadda ragalaiaké nia

⁷Lepá rapararat katuareman néné, sagganginangan sia tarimeu sibebela ka bagat guluggut kamateiat

⁸Tubudda simamatei néné mutagguilú ka enungan sabeu, ka kudduat katusiliktengaat Tuhanda. Onin laggai néné ka pasikat iaté Sodom elé Misir

⁹Raiitsó te tubudda simamatei néné, sangamberi negara, suku, bahasa sambat bangsa, ka bagat telu ngagogoi

sitenga burúnia, samba tá tuoobáaké
iturateiaké tubudda simamatei néné

¹⁰ Oto sangamberi taikapolak muaangká
baga, kalulut kamamateira sipasimu-
muneng sirua néné. Galairangan
leú et punen, sambat pakaurangan
hadia, kalulut karuadda nabi néné
arabaraakéan paoreat ka tubudda
sangamberi taikapolak

¹¹ Kapplu telu ngagogoi sitenga burúnia,
oi mitsá enga sibara ka Taikamanua,
gurú nia ka tubudda tai nabi sirua néné.
Iageti suru sia, rió; oto malotóranan
simakopé, sangamberidda sipasiiitsó

¹² Lepá areprangan nga-nga sabeu
sibara ka laggai manua, sia tai nabi
sirua néné, sipasisosogai sia, pelé
nga-ngania, "Sakaiaké kam sené!" Oto
ka mataddangan leú et saggakra, sakai
sia ka manua, aisasaluki sia tinobut

¹³ Ka tetret nenda, bara teteu simakopé
beunan. Iageti makataínangan sepertelu
liona laggai, samba ai sia pitu ngaribu
igidda simamatei, kalulut teteu néné.
Oto malotóranan leú et sabagei, bailiu
umun'akérangan leú et Taikamanua ka
manua

¹⁴ Paoreat sikarua atusabauan. Oto ka sia paoreat sikatelú, táan mauuju ibara

¹⁵ Iageti pupiaunangan malaika sikapitu néné, oto maarepnangan leú et nga-nga bulat sabeu ka manua, sipasikukua, "Kineneiget aian ka kabei Tuhanta Rimata Sipaarau sitonéakenen Taikamanua, gege masiutéaké polak néné. Purimatanangan teret buru-burú!

¹⁶ Oto purappoddangan leú et, masipaniddogi Taikamanua sia tai bajá sirua ngapulu epat, sipuuuddet ka uddenan purimataatra, ka matat Taikamanua

¹⁷ Pelé nga-nganda, "Ale Tuhan, Taikamanua Sipulugege, tonemnangan lé aian ekeu, samba siturerere kababara! Bulat surá lé kukua kai ka matam, kalulut anupakei gegem sipulubeunan, samba anutaddaakéan murimata

¹⁸ Sitaiagai ekeu Tuhan, aian sia mugegege aipoí aiailingan tetrenia nusegéaké golúnu, samba aiailingan tetrenia nuadili sia simamatei. Nénéan té tetrenia nukau upadda sapakoinietnu, iaté tai nabi, samba ka sangamberi paamiannu, iaté sangamberi sipaniddogi ekeu, sikebbukat samba tasulé. Néné te

tetrenia tusubuaké sia, sipakataí polak néné!

¹⁹Iageti tubukánangan Uman Taikamanua ka manua, oto matoilánangan leú et Peti Pakerekat Baga ka bagania. Baranangan leú et bilá, bulat apakinam sambat nga-ngan leleggu sipugugulu-luu samba simakararat, samba leú et teteu sambat urat es simatirit.

12 ¹Iageti matoilánangan leú et ka manua, pukerengan sambat kiseiet sabeu. Iaté sara sinanalep sipuleppei matat sulu, ai nia muririó ka uddut laggó. Ai ka uténia sara kirit purimataat, iaté pulurua ngambua panyanyat

²Ai suruketnia sinanalep néné, samba kalulut aiailingan laggónia, pukatsinangan leú et kalulut besínia

³Iageti matoilánangan leú et sara kiseiet. Ai sangamuneng ulou simakopé beunan. Tubunia simabonan, sipitu uté, sambat sipulu ban. Senen uténia, ai kirit purimataatnia

⁴Iageti bolit'akénangan pai-painia ka tubut sepertelu ka manua, pagiritnangan nia, lepá ribbaiakénangan nia ka polak.

Ulou simakopé beunan néné, ai nia muririó ka tei-tei sinanalep sipususulé, iisiaké, bulé tú-túna lé matat toganía, guknangan leú et nia

⁵Oto tú-túakénangan leú et matat toga simanteu sinanalep néné, iaté sipasiuutéaké tai bangsa ka gege sabeu. Tápoi atuoppu lé toga nenda ka tubut inania; iageti abbit ka tubut Taikamanua, samba ka matat purimataatnia

⁶Ka sia sinanalep néné, tui-tuinangan leú et ka simatangeu ka kudduat sinarek'akenen Taikamanua. Ka kudduat nenda te, tupasisikeli nia ka bagat 1260 ngagogoi burúnia

⁷Iageti baranangan leú et pasaggangan ka manua. Ka sia si Mikael sambat tai tenterania, saggangiddangan leú et ulou simakopé beunan néné. Oto ka sia ulou simakopé beunan néné leú et, ka paromanda samalaikania, saggangiddangan leú et si Mikael

⁸Tápoi amakala lé nia ka sia ulou simakopé beunan. Oto nia ka sia sambat samalaikania táan tuoobáaké sia rakuddu ka manua

⁹Iageti ribbaiaké nia ulou simakopé beunan néné, ka gerat! Nia té nenda

ulou si mabajá, oniakenen Sanitu,
elé Ketsat Sikataí, sipataju sangaliot
polak. Ribbaiaké nia ka polak sambat
sangamberi samalaikania

¹⁰ Oto arepkungan leú et nga-nga
simaron ka manua, sipasikukua,
"Kineneiget'an té ipaaarau sapaamiannia
Taikamanua! Kineneiget te ipatotoilá
gegenia Taikamanua, sipuoni Rimata!
Kineneiget leú et ka sia ipatotoilá
gegenia ka sia Rimata Sipaarau
sitonéakenen Taikamanua néné! Aipoí
sipasisususui matadda sasarainanta
ka matat Taikamanua sinágó, sambat
sinoibé atubelaakéan nia ka manua

¹¹ Arakalaakéan nia sasarainanta
ka logau Togat Biri-biri samba
ka katuareman bulat sibulatnia
sipinaarepra. Matarek sia masibuluaké
enganda teret matei

¹² Oto kalulut néné, kau ipugora бага
manua sambat sangamberi sikukuddu
ka bagania! Tápoi mateinangan te polak
sambat koat, atugorosot'an poí nia
Sanitu néné, ka tubum ka golú sabeu,
aiagaian poí, táan mauuju iaili tetrenia.

¹³ Kelé aiagai tubunia ulou simakopé
beunan néné katuriribbaiaké nia ka

polak, táddaakénangan leú et masikukru sinanalep sipasitutú-túaké matat toga simanteu néné

¹⁴Tápoi atukau lé ka tubunia sinanalep néné, rua kappot manyang sabeu, bulé ituburut ka kudduatnia ka simatangeu, itupasikeli nia sedda, ka bagat telu ngarura sitenga burúnia, ibela ka tubut ulou simakopé beunan

¹⁵Iageti buraakénangan oinan simigi, ka bagat nga-ngania ulou simakopé beunan, ka tubut sinanalep néné, bulé iraggaiaké nia

¹⁶Tápoi airop'aké lé nia polak, sinanalep néné; ainga-ngaaké nga-ngania, ipot-pot oinan sibebela ka nga-ngan ulou simakopé beunan néné

¹⁷Oto pugolúnangan leú et simakopé ulou simakopé beunan néné, ka tubut sinanalep, pat einangan leú et isaggangi sangamberi punuteteu sinanalep néné, sabagei iaté sangamberi simareddet ka surukat Taikamanua, samba sipasimumuneng'aké Jesus Kristus sambat gegenia.

13 ¹(12-18) Iageti puriúnangan leú et ulou simakopé beunan néné ka bet-bet koat. (13-1) Lepá

itsókungan leú et sangamuneng tarimeu situoottou ka bagat koat. Ai pulu bannia samba pitu uténia. Senen bannia ai kirit purimataatnia, samba senen uténia ai atusurat'aké sara oni kelé paloloiat ka tubut Taikamanua

²Tarimeu siitsóku néné, ituitsó kelé harimau simaguttí tubu, rerenia kelé reret beruang, moksoknia kelé moksok singa. Iageti kaunangan ka sia ulou simakopé beunan néné, ron sibara ka tubunia, purimataatnia, samba gegenia simakopé beunan, ka tubut tarimeu néné

³Sara ka talagat utet tarimeu sipitu néné, kelé ai sara matat maujú simakopé kataí besí, tápoi amalengan maujú nenda. Iageti tutrangan nia taikapolak tarimeu néné, ka kisei ka бага

⁴Samba umun'akérangan ulou simakopé beunan néné, kalulut aikauan gege ka tubut tarimeu néné. Sambat airapaniniddogi leú nia, tarimeu néné. Arakua, "Tá anai simakeré ka tubut tarimeu néné! Tá anai simaró бага masisaggangi nia!

⁵Atuobáaké ka sia tarimeu néné, ikua apa pá ka buak paatuatnia, masipaloloi

Taikamanua. Atuobáaké ipurimata ka
bagat epat ngapulu rua ngalaggó burúnia

⁶Iageti taddaakénangan masipaloloi
Taikamanua, samba leú onin

Taikamanua. Kisedda leú et kudduat

Taikamanua, samba sangamberi
sikukuddu ka manua, paloloinangan nia

⁷Atuobáaké leú et ilawan sapaamian
Taikamanua, samba ikalaaké sia. Gege
masukup-kup'aké sangamberi suku,
negara, nga-nga, sambat bangsa leú et,
atukau ka sia

⁸Iageti paniddogiddangan nia
sangamberi sirimanua sipuririmanua ka
polak néné, legeina lé sia sitususurat
oni, ainangan tá tubabaraaké polak
néné, iaté sitususurat ka bagat buko
purimanuaiat bakkat Togat Biri-biri silepá
jájá

⁹Oto kalulut néné, ké moi nuarep'aké
kam nia, arep'akemuian nia katuareman
néné

¹⁰"Ukum'akenen, buítá tuukum'aké. Sia
saggiret lanjau ramatei, buítá tusaggri
ramatei. Iaté lulunia, buítá maom
bagadda samba matopit sia sapaamian
Taikamanua.

¹¹ Lepá itsókungan sangamuneng tarimeu bagei tubujlu ka polak. Sirua ban, kelé ban togat biri-biri. Nga-ngania kelé nga-ngan ulou simakopé beunan

¹² Ka matat tarimeu siboikí, ipapakei gege sabeu sialánia ka tarimeu nenda leú et. Sangaliot polak samba sangamberi sikukuddu ka bagania, paksanangan sia, bulé rapaniddogi tarimeu siboikí, iaté simamale maujú

¹³ Tarimeu sikarua néné, maigi kiseiet sabeu aigalai. Ka mataddangan leú et sangamberi sirimanua, gorosot'akénangan api sibara ka manua ka polak

¹⁴ Iageti patajunangan sia sangamberi sirimanua ka polak ka kiseiet sigalainia ka matat tarimeu siboikí. Kuanangan ka matadda sangamberidda, bulé ragalai tularat tarimeu sibara siorangan lanjau, tápoi riu-riu lé ipurimanua

¹⁵ Tuobáaké ka tubut tarimeu sikarua néné, ikau enga ka tubut tularat néné, pat oi ipanibo, lepá pamateinangan sia sangamberi sitaiobá masipaniddogi nia

¹⁶ Sangamberidda sikebbukat élé tasulé, simakayo élé simagebá, pagugulet élé sipuuja, paksanangan sia

tarimeu néné bulé rasiló toggaiat ka kabeira sikattoet elé ka tou-toura

¹⁷ Beri sia sara momoi pasaki elé rasakiaké apa pá, ké tá anai toggaiat nenda ka tubudda, iaté onin tarimeu nenda, elé angká masipatoilá oni nenda

¹⁸ Oto sené ai lulunia tumasiku paatuat. Simasiku paatuat momoi raadde katukolobat angká ka tubut tarimeu nenda, aipoí angká nenda, iaté onin sara sirimanua. Angkánia, iaté 666.

14 ¹ Lepá lelek'akékungan nia, iageti, itsókungan leú et Togat Biri-biri, ai nia muririó ka uddut Leleú Sion. Ai saaleinia 144.000 sia igidda, sibara surat ka tou-toura oninia, sambat onin Ukkuinia

² Iageti arepkungan nga-nga sibara ka manua, kelé ipuukkú oinan puruupugat sabeu, samba leú et kelé gulu-luu leleggu simakopé ron. Ituarep nga-nga néné kéan lé nga-ngan musik sinauakenenda sipasinanauaké kecapi

³ Iageti puurairangan leú et, rauraiaké urai sibau sia si 144.000, ka matat uddenan purimataat sambat ka matat siepat makluk samba tai bajá, sibokkó uddenan purimataat. Urai néné, tá

momoi ragelai nia kasei pá, sarat sia lé
si 144.000 sibelaakenen ka kupkumen
polak néné lé momoi

⁴ Sia néné nia né nia tubudda, bulat
kelé taiokkó peilé sia, kalulut tá
arapaaleiaké tainanalep. Bulat kaipa
iei Togat Biri-biri, eirangan leú et. Ka
talagadda sangamberi sirimanua, sia té
atubelaaké, kelé buluakenen siboikí ka
tubut Taikamanua, samba ka tubut Togat
Biri-biri

⁵ Bulat beri pei pabokodda; samba beri
goisó tá anai loloiet ka tubudda

⁶ Lepá itsókungan sara malaika bagei,
sitububurut bulat simakopé buak
ka manua. Ai aiabbít malaika néné,
Katuareman Simaerú simatom, bulé
tusegéaké ka tubudda sangamberi
taikapolak, iaté ka tubudda sangamberi
bangsa, suku, nga-nga, sambat negara

⁷ Iageti pugereinangan leú et malaika
néné, pelé nga-ngania, "Kau nukalotóaké
kam Taikamanua, samba umun'aké kam
pulatsanannia! Aipoí aiailingan tetrenia
ihakimi sia sirimanua, Taikamanua.
Paniddogi kam nia sibaraaké manua,
polak, koat sambat sangamberi matat
bubuakat!

⁸ Oto oinangan leú et ka sia malaika sikarua, iamiaké malaika siboikí, ai nia masisosogaaké, "Amakalangan nia! Laggai Babel sabeu amakalangan! Aipapuineng'an sangamberi bangsa, kalulut anggurnia, iaté anggur pubobot-bot akkulánia ka pusilaingeatnia!

⁹ Iageti oinangan leú et malaika sikatelu, masiailiaké malaika sirua néné, ai nia masigegereiaké, "Sipaniddogi tarimeu sambat tularatnia, samba sibara toggaiat tarimeu ka tou-tou sambat ka kabeinia

¹⁰ sia té masiloló anggur Taikamanua, iaté anggur oloi golúnia sipiliakenen nia ka bagat makkónia, tápoi beri goisó atubeleki iginia! Sangamberidda néné tupaoorei ka bagat api sambat belerang ka matadda samalaika sipunenan samba leú et ka matat Togat Biri-biri

¹¹ Iageti ka sia kujuk api, sipaorei sia néné, riu-riu lé iputinobut teret buru-burú. Tá anai arinia sinágó sambat sinoibó itupaorei sia; iaté sipaniddogi tarimeu sambat tularatnia, samba sangamberi sibara toggaiat onin tarimeu.

¹² Kalulut néné, sia sapaamian
Taikamanua, simareddet ka surukat
Taikamanua samba simatopit ka tubut
Jesus, kau ramaom бага

¹³ Lepá arepkungan nga-nga sibara ka
manua sipasikukua, "Surat'aké néné:
Barania kineneiget, bulat mauktuk
sia simamatei talagat puukúra galajet
Tuhan!" Iageti aleginangan nia ka sia
Ketsat Sipunenan, "Bulat sibulatnia.
Raariakéan té ramomoaké tubudda
mugalai, aipoi buat sigalaira te itutut sia.

¹⁴ Lepá lelek'akékungan nia, oto
itsókungan tinobut simabulau. Ai sia
sara sikukuddu ka tinobut néné, ituitsó
kelé mutubu sirimanua. Ai ka uténia
kirit purimataat sigalai sibara ka emas,
samba ka kabeinia ai sara sasabí
simalauru

¹⁵ Lepá bela mitsá sara malaika bagei
ka Uman Taikamanua. Pugereinangan
leú et musoga ka tubut sipuuuddet ka
tinobut, masakua, "Araiakéan sasabínu
nupasigetai kineneiget, aiailingan poí
tetrenia pasimoneiat; amatuáan poí ka
sia polak néné!

¹⁶ Iageti araiakénangan sasabínia sipuuuddet ka tinobut néné ka polak, oto taddaakénangan masimonei polak néné

¹⁷ Lepá mitsá, itsókungan sara malaika bagei, ai nia bebela, barania ka Uman Taikamanua ka manua. Ka sia leú et ai ka kabeinia sasabit simalauru

¹⁸ Lepá mitsá, itsókungan leú et aoi malaika bagei sipasikup-kup'aké api, barania ka kudduat pasijá-jakat tarimeu buluakenen. Iageti pugereinangan leú et ka tubut malaika sipasiomet'aké sasabit simalauru, pelé nga-ngania, "Araiakéan sasabínu, getaian pabua-buat anggur ka polak, amatuáan poí buania!

¹⁹ Oto araiakénangan sasabínia malaika ka polak, sabínangan pabua-buat anggur ka loinánia, ribbaiakénangan nia ka pametsunan anggur oloi golut Taikamanua

²⁰ Pabua-buat anggur néné ka tei-tei irip laggai lé itububutsit, samba puguruknangan leú et logau ka pametsunan anggur néné, kelé oinan, ai telu ngotu ngakilo meter reunannia, samba kerunia malegre rua ngameter.

15 ¹ Lepá itsókungan leú et ka manua kiseiet bulat tá anai siaili nia.

Ai pitu sia igidda samalaika samba leú et pitu paoreat pasilepá. Nia té néné pasilepat oloi golúnia Taikamanua

²Lepá nenda itsókungan sara, ituitsó kelé koat kaca pagalú api. Samba itsókungan leú et simamanang ka tubut tarimeu sambat tularatnia, samba simamanang ka tubudda sitoggaji oni angká. Ai sia muririó simamanang néné, ka bet-bet koat kaca, ai ka kabeira kecapi sikau Taikamanua ka tubudda

³Iageti uraiakérangan urai Mose, pagugulet Taikamanua, samba leú et urai Togat Biri-biri. Kelé néné nga-ngania, "Ale Tuhan, Taikamanua Sipulugege, bulat abeu samba kiseiet lé sigalainu! Rimatadda sangamberi bangsa, bulat maadil samba makolou sigalaiakenennu

⁴Kasoniangan lé tá malotó ka tubum, alé Tuhan? Kasoniangan lé táíobá masipaarep pubebeunannu? Sarat ekeu lé sipunenan. Momoi te sia sangamberidda tai bangsa masipaniddogi ekeu kalulut adil nia sigalaiakenennu samba araitsóan sangamberi sirimanua.

⁵Lepá nenda itsókungan Uman Taikamanua ka manua aitububuká, ai ka bagania Kemat Tuhan

⁶Iageti beladdangan leú et samalaika sipitu sambat sipitu paoreat ka Uman Taikamanua. Leppeira komang simakirisau simaalit бага. Ai tabbot rurukatda emas

⁷Lepá kaunangan nia ka tubudda samalaika sipitu, simakluk ka talagat makluk siepat néné, pitu ngambua pulokat sibara ka бага oloi golut Taikamanua, iaté Taikamanua sipuririmanua teret buru-burú

⁸Oto sut lé Uman Taikamanua, kujuk pulatsanan sambat geget Taikamanua. Samba ka burut ilepá paoreat sipitu siabbitta malaika sipitu néné, bulat beri sia sara siooi tugurú ka bagat Uman Taikamanua néné.

16 ¹Lepá arepkungan nga-nga sabeu ka Uman Taikamanua sipasikukua ka matadda samalaika sipitu, "Kenan kam, nupiliaké kam bagat pulokat sipitu oloi golut Taikamanua néné, ka polak!

²Iageti einangan leú et malaika siboikí, ipiliaké sikukuddu ka bagat pulokat néné ka polak. Oto baranangan leú et appu sikataí besí, ka tubudda sangamberi sirimanua sibara ka tubu toggaiat

tarimeu, samba ka tubudda sipaniddogi tularatnia

³Lepá nenda piliakénangan ka sia malaika sikarua sikukuddu ka bagat pulokatnia ka koat. Iageti bailiunangan koat néné kelé logaura sirimanua simamatei. Oto mateinangan leú et sangamberi makluk sikukuddu ka bagat koat

⁴Lepá mitsá ei nia ka sia malaika sikatelu, masipiliaké sikukuddu ka bagat pulokatnia ka pabaga-bagat oinan sambat ka sangamberi matat bubuakat. Oto ka sia sangamberinia oinan bailiu logau

⁵Iageti arepkungan nia ipanibo ka sia malaika sikup-kup'aké oinan néné, pelé nga-ngania, "Maadil lé ukuman siorak'akenennu, ale Sipunenan, Taikamanua tonemnangan lé aian nia samba siturerere kababara

⁶Arapiliakéan logaura sapaamian Taikamanua sambat logaura tai nabi; oto kineneiget kaunungan sia masiló logau. Kirénangan mateúan rasiló kelé nenda!

⁷Lepá arepkungan nga-nga sibara ka kudduat pasijá-jakat tareimeu buluakenen, sipasikukua, "Ale Tuhan,

Taikamanua Sipulugege, maroipo samba maadil lé ukuman siorak'akenennu!

⁸ Lepá nenda, piliakénangan ka sia sikukuddu ka bagat pulokatnia ka matat sulu; oto obáaké ka sia matat sulu, ilabó sirimanua oloinia simakopé kataí besí néné

⁹ Oloi sulu néné te masilalabó sirimanua, oto kalulut néné, pateleirangan leú et onin Taikamanua, sipasikukup-kup'aké paoreat néné. Tápoi kenanen kisedda, tá leú et rababauaké paatuatda, samba tá raobá masiumun'aké pulatsanan Taikamanua

¹⁰ Iageti piliakénangan sikukuddu ka pulokatnia ka sia malaika sikalima, ka uddenan purimataat tarimeu. Oto magep-gepnangan leú et sangaliot purimataat tarimeu néné, pat sotdangan jalaira sirimanua, kopet besínia

¹¹ Oto pateleirangan leú et Taikamanua ka manua kalulut besit tubudda sambat kalulut apputda. Tápoi bulat beri bauakéra paatuatda ka galai tubudda sikataí

¹² Lepá piliakénangan ka sia sikukuddu ka bagat pulokatnia malaika sikaenem, ka Oinan Eprat sabeu. Iageti

makalanangan leú et, bulat pat oi
raenungi nia tai rimata sibara ka
kabelaiat sulu

¹³ Oto itsókungan leú et, telu ketsat
sikataí, kelé mutubu kuret. Rababara
iaté, ka nga-ngan ulou simakopé beunan
sambat ka nga-ngan tarimeu, samba leú
et ka nga-ngan nabi sipatataju

¹⁴ Sia néné te paketsa-ketsat sikataí
sibaraaké pakise-kiseiet. Iageti eirangan
leú et kateludda ketsat néné, ka
sangaliot polak masirurúaké sangamberi
tai rimata, bulé raei pasaggak ka
Gogoi sabeu, iaté Gogoi Taikamanua
Sipulugege

¹⁵ "Arep'aké! Momoi te aku kelé
sipananangkou! Mauktuk te sia
simatarek tubu samba sipasijajago
leppeinia, bailiu tá simabulutut ipuenung
elé maila nia ka siberikabaga!

¹⁶ Iageti eirangan leú et paketsa-ketsat
néné masirurúaké tai rimata ka sara
kudduat, onin kudduat néné ka nga-ngan
Ibrani iaté Harmagedon

¹⁷ Lepá nenda piliakénangan nia ka sia
sikukuddu ka bagat pulokatnia malaika
sikapitu, ka rusa. Iageti maarepnangan
nga-nga simaron sibara ka uddenan

purimataat ka Uman Taikamanua,
sipasikukua, "Atuléléan!

¹⁸Oto bara bilá sitaipuaari, apakilat,
samba nga-ngan leleggu apagururuu
samba simakararat, samba teteu
simakopé kataí ron. Bulat barania ka
panandaat aitubaraaké sirimanua, bulat
ainangan tá babara teteu sabeu kelé
néné. Néné te sara teteu bulat simakopé
kataí ron

¹⁹Laggai sabeu ragai oi telu, samba
palagga-laggai ka sangaliot negara
leú et kakkataí. Iageti repdemnangan
laggai Babel sabeu néné Taikamanua.
Kaunangan lónia anggur sibara ka
pulokat anggur Taikamanua, iaté anggur
oloi golúnia

²⁰Oto sangamberinia panusa-nusa tatá,
samba sangamberi palele-leleu leú et,
tatá

²¹Urat es leú et belé palilima ngapulu
kilogram sanénia, pasaksanginangan leú
et sirimanua. Iageti paloloirangan leú
et Taikamanua, kalulut paoreat urat es
simakopé kataí besí néné.

17¹Lepá oinangan leú et sara
malaika ka talagadda samalaika
sipitu, sibara ka kabei pitu pulokat,

ka tubukku, kuanangan, "Konan sené, kupatoilá ka matam kipa tugagalai, ituukum'aké sipusisilainge néné, iaté laggai sabeu, sirióakenen ka bet-bet paoina-oinan

²Aragalaian pusilaingeat ka tubunia tai rimata ka polak, samba aipuineng'an sia taikapolak kalulut anggur pusilaingeatnia.

³Iageti kuneminangan aku Ketsat Sipunenan, oto abbitrangan aku ka simatangeu. Oto itsókungan sedda sara sinanalep, ai nia muuuddet ka tei-tei sangamuneng tarimeu simasuan onam tubu, sisusut ka tubu oni paloloiat ka Taikamanua. Utet tarimeu néné ai pulu iginia, samba pulu igit bannia

⁴Leppeinia sinanalep néné simasuan laiket samba simasuan onam, samba ai pulaingeatnia emas, pabukku-bukkú simakirisau sambat mutiara. Ka kabeinia ai pulokat emas sibara ka бага simasit-sit sita samba simalolit, sialakat pusilaingeatnia

⁵Ka tou-tounia ai atusurat'aké sara oni keleat. Oni nenda iaté, "Babel Sabeu, turot sangamberi pusilaingeat samba bulat sikataí paraboat ka polak néné.

⁶Iageti itsókungan leú et ipuineng
nia sinanalep néné logaura sapaamian
Taikamanua, sambat simateiakenen,
kalulut topitda ka tubut Jesus.
Kelé akuitsó nia sinanalep néné,
makiseinangan ka bagakku

⁷Iageti kuanangan malaika ka tubukku,
"Angoi imakikisei ka bagam? Eddangan
nia kutiboi ka matam keleat, pagalaiat
sinanalep néné, sambat keleat tarimeu
sijanangi nia

⁸Panandaatnia tarimeu néné ai
nia muririmanua, tápoi kineneiget,
amateian nia. Táan mauuju ibela ka
guluggut kamateiat, lepá ei nia iailiaké
kasubuat. Sangamberi taikapolak
sitaisusurat'akenen oni ka Buko
Purimanuaiatra Sirimanua, ainangan tá
tubabaraaké polak néné, makikisei ka
bagadda masiitsó tarimeu néné. Aipoí ai
nia muririmanua tarimeu néné siboikí.
Tápoi kineneiget, amateian nia, lepá
barania mitsá

⁹Oto sené, ai lulunia pusisikut paatuat,
samba puaagai kolou. Uté sipitu néné,
iaté pitu ngambua leleu; iaté leleu
kudduat sinanalep. Tápoi uté sipitu néné
leú et, iaté pitu sia tai rimata

¹⁰ lima ka talagadda amakalangan sia, sara ai peilé nia muririmata, tápoi sara geti tápei amoi nia

¹¹ Iageti tarimeu sipuririmanua siburú, tápoi kineneiget táan muririmanua nia mitsá, iaté rimata sikabalunia. Nia néné, iaté sara ka talagat tai rimata sipitu leú et, oto kineneiget aian lé nia memei masiailiaké kasubuat

¹² Ban sipitu siitsónu nenda, iaté tai rimata sipulu, tápei arataddaaké murimata. Tápoi tukakau ka tubudda gege, bulé rapurimata sambat tarimeu ka bagat sangajam burúnia

¹³ Ka puludda tai rimata néné makeré besíakenenda; iaté rakau puroron sambat gegedda ka tubut tarimeu néné

¹⁴ Sia néné, rasasaggangi nia Togat Biri-biri. Tápoi ikakalaaké lé sia Togat Biri-biri sambat sipasiuluinia simatopit, sipiliy nia sambat sinogai nia, tai rimata néné. Aipoí nia lé Tuhanda sangamberi tai tuan, sambat Rimatadda tai rimata.

¹⁵ Iageti kuanangan malaika ka matakku, "Oinan siitsónu nenda, iaté kudduat nia sinanalep sipuoolop tubu; iaté sia tai bangsa, tai rayat, negara samba panganga-nganga

¹⁶ Ban sipulu siitsónu sambat tarimeu nenda malalagá bagadda ka tubut sipuoolop tubu néné. Raparauragi te sangamberinia sibabara ka tubunia, sambat rabubulutuni nia. Komrangan leú et akkulánia sambat puruakérangan leú et nia ka api, imasubu

¹⁷ Aitubbuian poí paatuatda Taikamanua, bulé raenung'aké rencanat Taikamanua. Aikauan ka sia Taikamanua pukerekat бага bulé rakau gegedda ka tubut tarimeu néné, bulé ipurimata tarimeu néné teret puailinia sikuat Taikamanua

¹⁸ Sinanalep siitsónu néné iaté laggai sabeu, sipanei-nei tai rimata ka polak néné."

18 ¹ Lepá itsókungan sara malaika sabagei, ai nia tugogorosot barania ka manua. Ai ka tubunia gege sabeu, pat pató sangaliot polak kalulut pulatsanannia

² Iageti pugereinangan leú et pelé nga-ngania, "Amakalangan nia! Laggai Babel sabeu, amakalangan! Kineneiget aibailiuan nia kudduatra sanitu sambat paketsa-ketsat sikataí. Ai ka bagania

sene ngamata umá paloli-lolit, samba simalagat bagat sirimanua

³Aipoí sangamberi bangsa aralóan anggur pubobot-bot pusilaingeatnia. Sia tai rimata, aragalaiakéan pusilaingeat ka tubunia, samba leú et sia sipajajaga ka polak, amakayongan sia, kalulut pubobot-bot akkulára, sitaioi raom'aké.

⁴Iageti arepkungan nga-nga bagei sibara ka manua sipasikukua kisé, "Belaaké kam tubumui kam sapaamianku! Belaaké kam tubumui ka bagania! Bá tutut'aké kam jonia, nubairat kam ka kam ukumannia

⁵Aipoí amupoggouan jonia, pat aili ka manua, sambat jonia néné, airerepdem Taikamanua

⁶Galaiaké kam ka tubunia ka sia néné, kelé sigalaiakenennia ka tubumui ka kam; siliaké kam sigalaiakenennia rua ngaoleat iginia. Baliu kam pulokatnia rua ngaoleat igit ló sinarek'akenennia ka kam

⁷Kau kam ka tubunia paoreat sambat pureuregat бага simakeré beunan ka pulatsanan samba pukayoat sikaunia ka tubunia ka sia. Aipoí tá muaari ipatiboaké tubunia, ikua, 'Aku néné

rimata sinanalep! Aku néné tá silumang;
tá kuoorik pureuregat бага!

⁸ Kalulut nenda te, bailiu ka bagat
sangagogoi oraknangan nia paoreat,
iaté, besí, pureuregat бага, sambat
pulajeat. Samba tulalabóaké te nia ka
api, oto si Tuhan Taikamanua lé magege
iadili nia.

⁹ Rasosoibi samba rakangengeleji
бага te, tai rimata ka polak néné,
sipasitutut'aké pusilaingeatnia sambat
pubobot-bot akkulat sinanalep nenda, ké
raitsó iputinobut kujuk api sipasilalabó

¹⁰ Ka sareunan lé rapuririó masiigbuk,
kalulut lotóra isappó sia pangoringannia.
Pelé nga-nganda, "Bulat apanganté
kopet kataí besínia paoreat ka laggai
simakopé erut katuareman néné, iaté
laggai Babel simaron! Bulat ka bagat
sangajam lé burúnia aitugalaiaké
ukumannu!

¹¹ Ka sia leú et sipajajaga ka polak
néné, musou sambat mupurúpú, kalulut
sinanalep néné, aipoí beringan sia sara
sipasisasaki pajagadda

¹² Táan anai sia sisaki emas, perak,
permata, sambat mutiaratda; samba
leú et komang lenan, komang simasuan

laiket, sutera, samba komang simasuan onam; samba sene ngamata loiná simabesí tugaba, bibilet sibara ka gading, samba sibara ka paloina-loiná simakeppu saki, sibara ka tembaga, labá, sambat pualam

¹³ kulit kayu manis, rempah-rempah, setanggi, mur, sambat kamenyan; anggur sambat minyak, tapung sambat gandum; jaui sambat biri-biri, kuró sambat kereta, sapagugulet, pat leú et aili ka engan sirimanua

¹⁴ Pelé nga-nganda sipajajaga ka tubut sinanalep nenda, "Sangamberinia sipuoni bakkatnu, táan anai, samba sangamberinia pukayoatnu samba leú et pulaingeatnu amalimaian!

¹⁵ Muririó te sia sipajajaga simakayo, kalulut pajajagadda ka laggai nenda, lotóra isappó sia paoreatnia. Musosou sambat mupupurúpú te sia

¹⁶ pelé nga-nganda, "Ale, apanganté kopet kataínia pangoringannia laggai simaerú katuareman néné! Simarei-rei leppeinia komang lenan, komang simasuan laiket, samba simasuan onam; simarei-rei sut lé ka tubunia pulaingeat emas, permata, sambat mutiara

¹⁷ Tápoi ka bagat sangajam burúnia, tatá sangamberi pukayoatnia!" Ka sia leú et sangamberidda tai nahkoda, sipanonompang samba leú et sia tatogat kapá, samba sangamberidda sipasigagaba purimanuaiatra ka koat, muririó leú te sia ka sareunan

¹⁸ Kelé raitsó iputinobut kujuk api aimalabo laggai nenda, pugereirangan leú et. Pelé nga-nganda, "Tá anai beri sara laggai bagei simakeré ka laggai néné!

¹⁹ Iageti paragatdangan leú et abu ka utéra, kelé toggaiat purereu-reura бага, lepá pusourangan sambat pugereirangan leú et, rakua, "Ale, apanganté kopet kataínia pangoringannia laggai sabeu néné! Aipakayongan sia sangamberi sibara kapá ka koat, kalulut pukayoatnia! Tápoi ka bagat sangajam lé burúnia, limai sangamberinia!

²⁰ Ale kina manua, kau imaangká bagam, kalulut kakakataí nia laggai Babel! Ale kam sapaamian Taikamanua, tai apostel, tai nabi, pugora kam бага! Aiukum'akéan poí nia Taikamanua, kelé sara lumun sigalaiakenennia, ka tubumui

²¹ Iageti itsókungan sara malaika
simagege iakkat'aké sara bukkú,
beu bukkú pasigulunan sabeu,
ribbaiakénangan nia ka bagat koat,
iageti kuanangan, "Kisé té tupaeerú ka
tubut laggai Babel simaerú katuareman
oni néné, ituribbaiaké nia simakopé, pat
táan tusesese nia mitsá

²² Oto táan te maarep nga-ngan musik
sibóbóra siagai masibebeú kecapi, siagai
muurai, siagai musuling samba siagai
mupiau ka tubum! Tá leú et tusesese
sedda sipugagalai siagai kabei samba
nga-ngan bukkú pasigulunan leú et, táan
tuaarep sedda

²³ Táan raiitsó mitsá torot alito ka
tubum; samba táan raaarep mitsá sedda
gaú-gaúra sirimanua simigi sipupupunen
putalimogat. Sipaja-jagam te bulat
siabeu tiboí tubu ka polak néné, samba
kalulut againu mugaut, bailiu oi nupataju
sangamberi bangsa ka polak!

²⁴ Aituukum geti laggai Babel néné,
kalulut atusesese ka laggai néné, logaura
tai nabi, logaura sapaamian Taikamanua;
momoi takua logaura sangamberi
simateiakenen ka polak néné.

19 ¹ Lepá arepkungan leú et ipuukú nga-nganda sirimanua ka manua, sipasisosogaaké, "Umun kam Taikamanua! Taikamanuanta néné, iaté Taikamanua sipaarau, Taikamanua simalatsat samba sipulugege

² Pasihahakimi nia, maadil, sambat sineseat! Aiorak'akéan ukuman ka tubudda sipuoolop tubu simakopé, sipakataí polak, kalulut pusilaingeatnia. Aiukum'akéan nia Taikamanua sipuoolop tubu néné, aipamatei poí sia sapakoiniet Taikamanua.

³ Iageti pusogaddangan mitsá sirimanua simigi, pelé nga-nganda, "Umun'aké lé Taikamanua! Tá te muaari ipukuilú api, sipasilalabó laggai nenda!

⁴ Oto purappoddangan leú et ka sia sirua ngapulu epat tai bajá, sambat sia samakluk siepat, sibokkó uddenan purimataat, rapaniddogi Taikamanua, sipuuuddet ka uddenan purimataat. Pelé nga-nganda, "Amen! Umun kam Taikamanua!

⁵ Iageti maarepnangan nga-nga sibara ka uddenan purimataat, sipasikukua, "Umun kam Taikamanua, kam sangamberi sapakoiniet Taikamanua,

sikebbukat sambat tasulé, sipaniddogi Taikamanua!

⁶Lepá mitsá, arepkungan kelé nga-nganda sirimanua simakopé igi; ipunau, kelé ipuja nga-ngan onut koat, samba kelé guru-ruu nga-ngan leleggu. Akuarep sikuadda, "Umun kam Taikamanua! Aipoi si Tuhan Taikamanuanta Sipulugegengan lé amurimata

⁷Kau imangká samba imagora bagatta, kau taumun kam pulatsanannia! Aiailingan poí gogoi putalimogat nia sipuoni Togat Biri-biri, samba talimouakenen, amatarek'an nia itutalimouaké

⁸Leppei simaalit бага simakirisau atukauan ka tubunia, ipakei nia." (Leppei simaalit бага нéné iaté, sangamberi simaerú, sigalaira sapaamian Taikamanua.

⁹Iageti kuanangan malaika ka tubukku, "Surat'aké нéné: 'Mauktuk te sia sinogai ka punen putalimogat Togat Biri-biri.'" Lepá tuppainangan nia mitsá malaika ikua nia, "Iaté нéné katuareman bulat sibulatnia sibara ka Taikamanua.

¹⁰Iageti purappokkungan ka matat malaika masipanindogi nia. Tápoi

aikua lé ka tubukku, "Tá kisé! Bá paniniddogi aku. Taikamanua lé paniddogi! Beri aku leú poí kaku pagugulet leú et, kalé ekeu, samba kelé leú sasarainam sipasioomet'aké simaron simuneng'akenen Jesus!

¹¹ Lepá itsókungan itubuká manua, iageti matoilánangan leú et sangamuneng kuró simabulau. Sikukuddu ka tei-teinia iaté, Oniakenen Simatopit samba Oniet Sibulatnia. Maadil nia masiorak'aké ukuman sambat pasaggangan sigalaiakenennia

¹² Matania kelé juluu api, samba ka uténia maigi kirit purimataat. Ka tou-tounia ai atusurat'aké sara oni; sarat nia lé iagai oni nenda

¹³ Leppei sipakeinia, atulogabingan. Nia néné tuoniaké, "Tiboiet Taikamanua"

¹⁴ Airatutut nia tai tenterat manua, sipukukuró simabulau samba sipuleppe komang simaalit бага, simabulau simaliná

¹⁵ Ai bebela ka ngu-ngunia sara lanjau simalauru, samba lanjau nenda te ipapakei masikalaaké tai bangsa, samba utéakénangan sia ka gege simaron. Ibubutsit te suat anggur ka kudduat

pasibutsinan oloi golut Taikamanua
Sipulugege

¹⁶ Ka saraubánia sambat ka bakkapatnia
ai atusurat'aké oni néné, "Rimatadda tai
rimata, samba Tuhanda tai tuan.

¹⁷ Lepá itsókungan leú et sara malaika
sipuuuddet ka matat sulu. Iageti
pusoganangan simaron, masukua ka
tubut sangamberi umá sitububurut ka
pata, "Konan kam parurú masiroroi
punen sabeu sibaraakenen Taikamanua

¹⁸ Konan kam mukom akkulára tai
rimata, akkulára tai panglima, samba
akkulára tai pahlawan, konan kam
mukom akkulára sikukuddu ka tei-tei
kuró samba leú et akkulat kuróra
samba akkulára sangamberi sirimanua,
sikebbukat samba tasulé, sapagugulet
samba sipuuuja!

¹⁹ Lepá itsókungan raparurú, tarimeu
sambat sia tai rimata ka polak néné,
samba leú et tai tenteratda, raei
pasaggak, masisaggangi sikukuddu
ka tei-tei kuró simabulau, sambat tai
tenterania

²⁰ Iageti labáranan tarimeu néné
sambat tai nabi sipatataju, sigalai
kiseiet ka matat tarimeu néné. (Oto

kiseiet nenda te igagalai tarimeu néné,
 masipataju sia sibara toggaiat tarimeu,
 samba sia sipaniddogi tularat tarimeu.)
 Iageti ribbaiaké tarimeu sambat tai nabi
 sipatataju néné ai sia muririmanua, ka
 bagat api sipuju-juluu, sibara belerang

²¹ Iageti tai tenteradda, atumateiakéan
 sia ka lanjau sibebela ka ngu-ngunia
 sikukuddu ka tei-tei kuró simabulau. Oto
 oinangan leú et umá, pakomiddangan
 leú et akkulára simateiakenen néné.

20 ¹ Lepá nenda itsókungan sara
 malaika, ai nia tugogorosot
 barania ka manua. Ai ka kabeinia
 panguksik guluggut kamateiat, samba
 sara paleggiui sabeu

² Iageti labánangan leú et ulou
 simakopé beunan, sipuoni ulou
 simabajá, elé Sanitu, elé Ketsat Sikataí,
 palengguinangan leú et nia ka bagat
 sangaribu ngarura burúnia

³ Lepá ribbaiakénangan ulou simakopé
 beunan néné, malaika, ka bagat guluggut
 kamateiat, iageti kutsik'akénangan leú
 et guluggú néné, kaunangan segelnia,
 buían ipataju sia mitsá ulou simakopé
 beunan néné, tai bangsa teret itukaplu

sangaribu ngarura. Lepá nenda buítá tubelaaké nia ka bagat oggak siteté

⁴Iageti itsókungan paudde-uddenan purimataat, atukauan ka tubudda sipuuuddet sedda, gege masiteúaké ukuman. Oto itsókungan leú et ketsatda sitippú lolokkat, kalulut mumuneng'akenenda Jesus, sambat paarepra katuareman simaerú sibara ka Taikamanua. Tá raobá masipaniddogi tarimeu, elé tularatnia. Beri silóra toggaiat tarimeu ka tou-toura, elé ka kabeira. Iageti suru sia mitsá, puutérangan sambat Kristus ka bagat sangaribu ngarura burúnia

⁵Néné te patterat siboikí, tusuruaké sia mitsá simamatei. (Tápoi sia geti simamatei sabagei, tápei tususuruaké sia ka oggak sangaribu ngarura néné.

⁶Mauktuk te sia sisuruakenen ka patterat siboikí néné. Sia néné, mateú ibailiu sia bakkat Taikamanua. Táan ikukup-kup'aké sia kamateiat sikarua. Ibabailiu te sia imam Taikamanua sambat imam Kristus, samba muuté te sia sambadda ka bagat sangaribu ngarura burúnia

⁷ Lepá aitukapflu sangaribu ngarura, belaaké nia ka sia Sanitu ka bagat penjarania

⁸ einangan leú et masipataju bangsa bulat sabeu ka sangaliot polak, iaté Gog sambat Magog. Oto rurúakénangan sia simakopé igi kelé nuntut ngaí ka buggei, raei pasaggak

⁹ Iageti pakarapangan tubudda ka sangaliot polak, koiliprangan leú et pukemaadda sapaamian Taikamanua sambat laggai simanuntut bagat Taikamanua. Tápoi abelé lé api isubuaké sia

¹⁰ Lepá ribbaiaké Sanitu sipataju sia néné, ka bagat api simalio sambat belerang. Sedda te kudduatnia ka sia tarimeu sambat tai nabi sipatataju ituriribbaiaké sia boikí. Oto paorei sia, sinágó sambat sinoibó, teret buru-burú

¹¹ Lepá mitsá itsókungan sara uddenan purimataat simabulau sabeu sambat nia ka sia sipuuuddet ka uddutnia. Iageti tatá manua sambat polak ka matania, oto táan amakoinong mitsá

¹² Iageti itsókungan simamatei, sikebbukat sambat tasulé, ai sia muririó ka matat uddenan purimataat. Oto

bailá pabuko-buko. Ka sia buko sara leú et bailá, iaté Buko Purimanuaiatra Sirimanua. Lepá orak'aké ukuman ka tubudda simamatei néné, siripot sigalaira ka sisurat'akenen ka pabuko-buko néné

¹³Iageti ka sia leú et koat, taroakénangan sia simamatei ka tubunia. Beri leú et ka sia leú et Kamateiat samba Taikabaga, taroakérangan sia simamatei ka tubudda. Oto sangamberidda simamatei néné tuukum'aké, siripot sigalaira

¹⁴Lepá ribbaiaké ka sia Kamateiat sambat Taikabaga néné ka api simalio. (Api simalio néné, iaté kamateiat sikarua.

¹⁵Oto sangamberi sitaitususurat oni ka bagat Buko Purimanuaiatra Sirimanua, ribbaiaké ka api simalio.

21 ¹Lepá itsókungan manua sibau sambat polak sibau. Iageti ka sia manua siboikí samba polak siboikí, pepe, samba leú et ka sia koat, tatá

²Iageti itsókungan laggai sipunenan, iaté Jerusalem sibau tugorosot barania ka laggai manua, sibara ka Taikamanua. Laggai nenda atupatarek'an, bulat kéan lé sinanalep talimouakenen,

atupalaingengan tubunia, iei masiailiaké
simanteu talimouakenen

³Lepá arepkungan nga-nga sabeu
sibara ka uddenan purimataat,
sipasikukua, "Ka talagadda
sirimanuangan lé ikukuddu kineneiget
Taikamanua! Seddangan lé ikukuddu
sambadda, samba sia leú et bailiu
sapaamiannia. Bulat tubut Taikamanua
lé mukukuddu ka talagadda, bailiu
Taikamanuanda

⁴Posanangan leú sangamberi elu
ka matadda. Táan anai kamateiat,
pureuregat бага, sou, elé besí leú et
táan anai. Sangamberinia sipuoni siburú,
tatá.

⁵Pelé nga-ngania sipuuuddet ka
uddenan purimataat, "Kubabailiuaké
te sangamberinia néné sibau!" Iageti
kuanangan leú et ka tubukku, "Surat'aké
néné, aipoí tiboiet néné, bulat sibulatnia
samba katonemiet lé.

⁶Iageti kuanangan, "Atuléléan!
Aku té néné panandaatnia samba
kalepakatnia; aku té né Tuhan barania
ka Panandaatnia pat aili ka Kalepakatnia.
Kasei simaonggou, kaukungan ló ka

tubunia, sitá saki, sibara ka bubuakat purimanuaiat

⁷Rasisiló te sia simamanang néné, sibara kaku. Bailiunangan aku Taikamanuanda, iageti nia ka sia leú et, bailiu togakku

⁸Tápoi sia geti sipulolotó, sipajo sirimanua, sikataí paraboat, sipasimamateiaké sirimanua, sipusisilainge, sipugagaut, sibuluji sabulungan, samba sangamberi simaboko, turiribbaiaké lé ka bagat api simalio samba belerang sipujujuluu, iaté kamateiat sikarua.

⁹Iageti oinangan leú et ka tubukku, iaté sara ka talagat malaika sipitu, siukkáaké pulokat sisusut pitu ngamata paoreat, masikua ka matakku, "Konan! Kupatoilá ka matam, Talimouakenen, iaté sinanalep Togat Biri-biri.

¹⁰Oto kuneminangan aku Ketsat Sipunenan, iageti abbitnangan aku malaika, ka sara leleu simakopé buak. Patoilánangan leú et ka matakku, laggai Jerusalem, iaté laggai sipunenan. Laggai néné, situgogorosot sibara ka manua, iaté sibara ka tai Taikamanua

¹¹ sialei pubeunanan sambat pulatsanan Taikamanua. Laggai néné apakirisau, kéan lé bukkú simalatsat, samba kelé bukkú simakirisau limun simalatsat, kelé kristal

¹² Kekrenia situbobokkó, tápoi mabuak sibara pulu rua matatbaliu, ai sia pulu rua igidda samalaika sipasijajago. Ka senen matatbaliunia ai atusurat'aké oninda sipulu rua ngasuku ka bangsa Israel

¹³ Samba ai leú et telu matatbaliu simatai ka senen bé-bénia; telu saigit kabelaiat sulu, telu saigit kayaman, telu saigit baré, samba telu ka saigit kabelekat sulu

¹⁴ Ka uddut pulu rua pundasi, aiturioáké kekrené. Ka bukkú pundasi néné, ai atusurat'aké oninda ka pulu ruadda tai apostel Togat Biri-biri

¹⁵ Malaika sipaninibo ka tubukku, ai ka kabeinia tuturá kirekat, sigalai sibara ka emas, masikireki laggai néné, iaté matatbaliu laggai sambat kekrenia

¹⁶ Laggai néné siepat persegi, makeré nantania ka lionia. Iageti kirekinangan nia tuturánia malaika laggai, néné, ai

2400 ngakilometer nantania, lio sambat
buaknia makeré lé ka nantania

¹⁷ Kelé aikireki nia malaika kekre néné,
ai enem ngapulu ngameter buaknia.
Kirekat ipapakei malaika néné, iaté
kirekat pakeietda sirimanua

¹⁸ Kekret laggai néné, sigalai sibara ka
bukkú simakirisau limun, kiniu laggai
nenda geti sibara ka emas simamurni,
malatsat kelé kaca

¹⁹ Bukkú pundasit laggai néné,
atupalainge sibara ka sene ngamata
bukkú simakirisau. Bukkut pundasi
siboikí, sigalai sibara ka bukkú
simakirisau limun, kiniu. Pundasi
sikarua, sigalai sibara ka bukkú
simakirisau limun latsat, pundasi
sikatelu, sigalai sibara ka bukkú
simakirisau limun, pundasi sikaepat
sigalai sibara ka bukkú simakirisau limun
lumut

²⁰ Pundasi sikalima, iaté sigalai sibara
ka bukkú simakirisau sibara tularat
ungat elé loiná, pundasi sikaenem,
sigalai sibara ka bukkú simakirisau
limun, pundasi sikapitu sigalai sibara
ka bukkú intan simakiniu, pundasi
sikabalu, sigalai sibara ka bukkú

simakirisau simakalimun, pundasi
sikasiba, sigalai sibara ka bukkú
simakirisau, ai simakiniu, simakabonan
ai leú simacoklat, pundasi sikapulu,
sigalai sibara ka bukkú kelé susu
simalimun, pundasi sikapulu sara, sigalai
sibara ka bukkú simakirisau simalimun,
makabonan, pundasi sikapulu rua,
sigalai sibara ka bukkú simasuat laiket

²¹ Kapulu ruania matatbaliu sabeu,
sigalai sibara ka mutiara, senen
matatbaliu, sigalai sibara ka sara
mutiara. Enungan laggai néné, sigalai
sibara ka emas simamurni, makirisau
kelé kaca simabilá

²² Tá akuitsó Uman Taikamanua ka
laggai nenda, aipoí Uman Taikamanua,
iaté tubut Tuhan lé. Taikamanua
Sipulugege, sambat Togat Biri-biri

²³ Táan leú maperlu itoro nia matat
sulu, elé itoroji nia laggó, ka sia laggai
nenda, aipoí pulatsanan Taikamanua
itotoroji nia, samba Togat Biri-biri
alitonía

²⁴ Iageti puenungrangan tai bangsa ka
polak, ka toronia, samba sia tai rimata,
abbitrangan leú et pukayoatda, ka laggai
nenda

²⁵Tápoi ka sia geti matatbaliu laggai, sarat katububuká lé nia senen tetre, tá tupapat-pat'aké, tá poí anai sedda soibó

²⁶Pulatsanan samba pukayoatda tai bangsa, tuaabbit ka bagania

²⁷Tápoi ka sia geti sigalaiaké kasit-sit'akenen, elé sipaboboko, tatetéaké nia, aponia kasit-sit'akenen, bulat tá tugugurú sia ka bagania. Sarat sia lé sitususurat oni, ka Buko Purimanuaiat Sirimanua, sambat ka bukot Togat Biri-biri, momoi tugurú ka bagania.

22 ¹Iageti malaika nenda leú et, amasisaú-saú ka tubukku, oinan purimanuaiat. Bagat oinan néné, makirisau kelé kristal, samba aimuguguruk sibara ka uddenan purimataat Taikamanua, samba purimataat Togat Biri-biri

²ka talagat enungan laggai nenda. Ka bet-bet oinan nenda, ka rua ngasilánia, ai loinat bubuakat purimanuaiat, sipububua, pulu rua ngamitsá ka bagat sangarura, iaté sangamitsá sangalaggó ipubua. Buluknia momoi itupakei, masialeaké tai bangsa

³Ka laggai nenda, tá anai sia beri sara siorak pateleiat Taikamanua. Uddenan

purimataat Taikamanua, sambat Togat Biri-biri, tukakau ka laggai néné. Ka tubunia te rapaniniddou sapaguguletnia

⁴samba raitsó matania. Oninia tususurat'aké ka tou-toura

⁵Táan leú maperlu ka sia alito sambat torot matat sulu, aipoí táan anai soibó; Tuhan Taikamanuangan lé poí, itotoroji sia. Iageti purimataddangan leú et, teret buru-burú

⁶Iageti kuanangan nia malaika ka tubukku, "Tiboiet néné bulat sibulatnia, samba katonemiet. Tuhan Taikamanua sipanguruat'aké Ketsatnia ka tubudda tai nabi, aikoiniakéan malaikania, bulé rapatoilá, ka tubut pakoinietnia, aponia sipuaaili simaruei.

⁷Oto pelé nga-ngan Jesus, "Lelek'aké kam néné! Táan mauju kuoi. Mauktuk te sia sireddet sibalat, ka bagat buko néné!

⁸Aku té néné si Johannes, akuarep'an samba akuitsóan sangamberinia néné. Lepá akuarep samba akuitsó nia néné, purappokkungan ka matat malaika, sipasitotoiláaké sangamberinia ka tubukku; oto aikugegelai kupaniddogi nia

⁹ kuanangan ka matakku, "Tá kisedda! Bá paniniddogi aku! Taikamanua lé paniddogi! Aipoí aku kaku leú et, pagugulet leú et, kelé ekeu, samba kelé sasarinam tai nabi leú et, samba sangamberi simareddet ka sitonéakenen buko néné!

¹⁰ Lepá kuanangan mitsá, "Buí nupakele nia, sangamberi sibalat ka bagat buko néné, aipoí amalegrengan tetrenia ipuaili sangamberinia

¹¹ Eddangan nia rariu-riuaké mugalai jo, ka sia sijo, sia kasit-sit'akenen, eddangan nia rakau tubudda kasit-sit'akenen, siobá masireddet siobat bagat Taikamanua, edda imariu-riu rareddet siobat bagat Taikamanua, sia sikokoiaakenen ka Taikamanua, edda ramariu-riu rapurimanua simakokoi ka Taikamanua.

¹² Iageti kuanangan nia Jesus, "Lelek'aké néné! Táan mauju oi aku, kuabbat upa, masilumun'aké sangamberi sirimanua, siripot sigalaira

¹³ Aku té néné siboikí, sambat sikatei-tei; aku té néné Tuhan Panandaatnia, samba Kalepakatnia.

¹⁴ Mauktuk te sia sipaliná saraubára, pat liná, bailiu bara hakra, masikom buat loiná purimanuaiat, samba oi ratugurú ka laggai, ka matatbaliu geratnia

¹⁵ Tápoi sia geti sigalaiaké galajet sikataí, sipugagaut, sipusisilainge, sipasimamateiaké sirimanua, sipasibubuluji sabulungan, samba sipaboboko, ka titiboat elé ka galai tubu, ka tei-tei irip laggai lé kudduatra, sangamberidda néné

¹⁶ "Aku sipuoni Jesus té, amasikoiniaké samalaikakku ka tubumui, bulé isegéaké nia, pagalaiat néné, ka tubumui, sibailiu puuktunganda sapaamian. Punuteteu Dapid te aku néné; aku té nenda usutat simapató.

¹⁷ Iageti kuanangan nia Ketsat Sipunenan sambat Talimouakenen Sinanalep, "Konan kam!" Sangamberi sipasiaarep néné, buítá leú et rakua ka sia, "Konan kam!" Kasei simaonggou kau ioi! Kasei siobánia, kau raalá oinan purimanuaiat, sitá saki

¹⁸ Kasei sipasiarep sibalat ka bagat buko néné, aku sipuoni si Johannes, ikua ka matamui: ké ratuppai baí apa pá, ka tiboiet sibalat néné,

tuppainangan leú et ukumanda
Taikamanua, iaté sangamberinia
paoreat, sitularat'akenennia ka bagat
buko néné

¹⁹Iageti, ké ai sia sibeledi, rubeiat
sibalat ka bagat buko néné, belekinangan
leú et rubeiatnia, Taikamanua, ka
sitularat'akenennia, ka bagat buko
néné, iaté rubeiat sibara ka loinat
purimanuaiat, samba sibara ka laggai
sipunenan néné

²⁰Oto nia sipasisesegéaké
sangamberinia katuareman néné
masukua, "Sibulatnia, táan mauuju kuoi!"
Amen! Konan'an ale Tuhan Jesus

²¹Bulé ikau panguruatnia Tuhan
Jesus, ka tubudda sangamberi paamian
Taikamanua!

Bahasa Mentawai

=====

Mentawai

LAI - Today's Version

© 1996 LAI

<http://www.bible.is/copyright?base=MWVLAIN>